


Monoq Gotola
Gosohaq



The New Testament in the Alekano (Gahuku) Language of Papua
New Guinea

Monoq Gotola Gosohaq
The New Testament in the Alekano (Gahuku) Language of Papua
New Guinea
Nupela Testamen long tokples Alekano (Gahuku) long Niugini

Copyright © 1973, 1986 Bible Society of Papua New Guinea

Language: Alekano (Gahuku) (Alekano or Gahuku)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files dated 9 Oct 2020
44bc4c3c-532b-5251-95bd-2c3cfdce78ba

Contents

FRT	1
Mataió	2
Makí	50
Luká	77
Zoní	124
Aposolo	155
Loma	194
1 Koliti	215
2 Koliti	234
Galesia	247
Epeso	254
Pilipi	260
Kolosa	265
1 Tesalonika	270
2 Tesalonika	274
1 Timotí	277
2 Timotí	283
Taetasí	287
Pilemó	290
Hípulu	291
Zemusí	307
1 Pitá	312
2 Pitá	318
1 Zoní	322
2 Zoní	327
3 Zoní	328
Zutá	329
Alikamú	331

MONÓ GOTOLA GOSOHÁ

The New Testament in the Alekano (Gahuku) Language of Papua New Guinea

Nupela Testamen long tokples Alekano (Gahuku) long Niugini

Monó Gotola Gosohá

The New Testament in the Alekano language of Papua New Guinea
[gah]

© 1973, 1986 Bible Society of Papua New Guinea

Web version

© 2013, Wycliffe Bible Translators, Inc.
www.Wycliffe.org

<http://pngscriptures.org>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- **Attribution.** You must attribute the work to *Bible Society of Papua New Guinea* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela**.

Izesu Kilistoni Gakó Lamaná Mataió Luhuva Gizamó

*Izesu Kilistoni avolage
(Luk 3:23-38)*

¹ Vegená utó imi itiki itiki ikago Izesu Kilistó eza agulizaki ve Tevitini agávolaho utó imó. Itó Tevití eza Avalahani agávolaho minamó. Nenémimi gakoálaa imane neve.

² Avalahakutí Isaká utó imó. Isakani asevalotí Zakopó utó imó. Zakoponi asevalotí Zutaki uvolage agunalagi utó amó. ³ Zutani asevalotí Pelezeko Zelako utó asimó nene Tamalé getamó. Pelezeni asevalotí Hezeloná utó imó. Hezelonani asevalotí Lamú utó imó. ⁴ Lamuni asevalotí Aminatapá utó imó. Aminatapani asevalotí Nasoná utó imó. Nasonani asevalotí Salamó utó imó. ⁵ Salomoni asevalotí Poasini nene Lahapá getokago utó imó. Poasini asevalotí Opeteni nene Lutí getokago utó imó. Opeteni asevalotí Zesí utó imó. ⁶ Zesini asevalotí agulizaki ve Tevití utó imó.

Agulizaki ve Tevitini asevalotí Salomó utó imó. Uliá helekago gevoná venalímo nene Tevititó vike getamó. ⁷ Salomoni asevalotí nene Lehopoámo utó imó. Lehopoámini asevalotí nene Apiá utó imó. Apiani asevalotí nene Asá utó imó. ⁸ Asani asevalotí nene Zehosapatá utó imó. Zehosapatani asevalotí Zolamá utó imó. Zolamani asevalotí Uziá utó imó. ⁹ Uziani asevalotí nene Zotámo utó imó. Zotámini asevalotí nene Ahazí utó imó. Ahazini asevalotí Hezekiá utó imó. ¹⁰ Hezekiani asevalotí nene Manasé utó imó. Manaseni asevalotí nene Amó utó imó. Amoni asevalotí nene Zosiá utó imó. ¹¹ * Zosiani asevalotí nene Zekoniá itó agunalagi utó amó. Zuta vegená nagá kimiiki Papelonia mikasigú kilímiki va gamenaló nene utó amó.

¹² Papelonia mikasiuka kilímiki vikago nenetí nene Zekoniani asevalotí Sealitielé utó imó. Sealitieleni asevalotí nene Zelupapelé utó imó. ¹³ Zelupapeleni asevalotí nene Apiutí utó imó. Apiutini asevalotí nene Eliakímo utó imó. Eliakímini asevalotí nene Azolá utó imó. ¹⁴ Azolani asevalotí nene Zatokó utó imó. Zatokoni asevalotí nene Akimá utó imó. Akimani asevalotí nene Eliutú utó imó. ¹⁵ Eliutuni asevalotí nene Eleazalá utó imó. Eleazalani asevalotí nene Mataná utó imó. Matanani asevalotí nene Zakopó utó imó. ¹⁶ Zakoponi asevalotí nene Zosehé utó imó. Eza Maliani vana loló imó. Maliá nene Izesuni getamó. Eza nene Ómasímo gologí oletative loko lo mololeta ve.

¹⁷ Utó iakaláa nene imanémiliki nene utó amó. Avalahakutí nene utó imi iteke lakani nene 14 utó ikago agulizaki ve Tevití utó imó. Tevitikutí nene lakani 14 utó iliki itikago nene Zuta vegená nagá kimiiki Papelonia mikasigú nene kilímiki vamó. Nene gamenalotí nene ámináminoko lakani nene 14 utó imi itikago gologí oletative loko lo mololeta vema utó imó.

*Izesu Kilistó utó imó
(Luk 2:1-7)*

¹⁸ * Izesu Kilistó utó itímimi mogonáa lá oko neve. Izolaho Maliá nene Zoseheni ángi milínikago ve aleve amasike hotopotó minasimó. Niasigo Ómasímini Sikalahulímimi zámuzaló Maliá nene izegipa agatupagi minamó. ¹⁹ Minokago nene ángi milita ve Zosehé nene monolagi ve minamó nenazo, nenemú nene ahulotatomóza, vegená kogovisaló ahulotatomó nene avoza helekatize, legesó oko nene ahulotatove. ²⁰ Loko loake agata gelekago nene, Guivahanímimi ageló makolímimo vamotoka utó o amike láa loko lo amimó: Zosehé geza nene Tevitini agávolagamaka, venaka Maliani nene alitohé alemitohé loko nene gagata giliko gena givisemino. Izegipa agatupagi nominamó nene Sikalahulímimi zámuzaló neve. ²¹ * Eza vegenala zuha nene golesa netalímimi nagakutí gologí oketatimó nenazo, minoko gipala getatimó nene agulizá nene Izesú ave loko molatane. Ámina agulizalímimi mogonáa nene gologí olimiaká ve. ²² Itó netá matá lá oko utó imó nene Ómasímini agepagutí gakó loaká vemámo nene Guivahanímimi gakó makó nene gihila zitive loko utó imó neve. Eza luhuva makó láa loko gizamó neve:

²³ * Gilinahe. Vegi akamimó zaha mina vená makolímimo izegipa agatupagi minooko gipala getatimó nene, agulizá nene Emanuelé ave liki litave.

Itó ámina agulizalímimi mogonáa lelí gakokutí nene Ómasi nene lezagi makó noive loko. ²⁴ Láa loko vamotoka lo amekago Zosehé nene oteake, Maliani nene numunagú alémoko

* 1:11: 2 Kug 24:14–15:2; 2 Iki 36:10; Zel 27:20 * 1:18: Luk 1:27 * 1:21: Luk 1:31 * 1:23: Isa 7:14

itimó. ²⁵ * Ve aleve oko minoaká nenéminiki minamasike gipala getamó. Getokago Zosehé nene agulizá Izesú ave loko molamó.

2

Sonohí mogona gili vevesiaká a ve amó

¹ Heloté nene agulizaki ve napa loló oake gizapa noigo, Izesú nene Petelehe numutoka utó imó, Zutaia mikasigú nene. Gamena nene zupa nene ho noititokatí mikasi mulalokatí sonohí mogonáa gili vevesiaká a ve makó nene Zelusale numutoka amó. ² Iake nene loká iki Zuta ve lekeli agulizaki ve gosohá nene hí apatoka utó ive. Leza numuteloka ho noitiuka nene utó itímimi sonohila okulumató nego áinigokunike gupá ze amitune loko nene noune. ³ Liki loká ikago nene, agulizaki ve Heloté nene gakó geleake, ininá noike agata gululusi nogliligo, ⁴ keza Zelusale apá amelage ámináminiki ininá amó. Lá niago, Heloté nene guguni giziaká a ve napagi monó mogona apí ikimiaká a vegi kelémo nupa oake nene Ómasímo gologí oleketative loko lo mololeketa vema nene hí apatoka utó itive liki linamó neve. ⁵ Loko loká okimikago, keza láa liki li amemó: Petelehe numutoka Zutaia mikasiuka utó itive loko Ómasímimi agepagutí gakó loaká vemámo Ómasímo lo ami gakó láa loko luhuva gizonoiómá nena:

⁶ * Petelehe numutokatí agulizaki ve napa makó utó okoko nene Isilae vevenáne zuha nene gizapa oketati ve nenazo, ámina apá Zutaia mikasigú noimó nenémo Zutaia mikasiuka gotó apá mukí niakutí lemeko nene nomive.

⁷ Liki nene gakó li amikago nene, geleake, Heloté nene sonohí mogonáa gili vevesiaká a vema asugunatoka kelémo nupa oake, sonohíma apí oko utó itoti gamena nanakí vive loko loká okimikago, nene gamenave liki legesó iki li amemó. ⁸ Li amikago, Heloté nene láa loko lo kemeake kimisilimó: Lekeza nene Petelehe numutoka víki amuza miliki vitagá iki alími utó iliki iki li nimitate. Iki li nimikiko, neza vinake ámináminoko voko gupá ze amitoze. ⁹ Loko lokago, nivago nene, numúitoka ho noititoka ániaga sonohíma utó oake nene, ale goí imó. Ale goí oko víke nene, izegipa namuni mína numuni veletó oko hízekago, ¹⁰ ániagiake, mulúikú lamaná giliake nene, ¹¹ numukú itiake ániagamó nene izolaho Maliaki niasigo, ániagiake kalapusa híziki izegipa namuníma gupá zi amiake góini agepáa ali vatá iake áminagutí nene henokanoni lehizitamó. Henokanoni nene goli gehani itó lokila anuvavagi iteaká i netá itó anuva hilina lamaná nene ¹² lehizimiake, akinago nene, Ómasímo nene vamotoka láa loko lo kimimó: Lekeza nene Heloté noigo ániagiake anite gapoló vamiki haitó gapoloka atiginá iki víki numutitoka vi anititaze. Loko lo kemekago nene vamó.

Izipi mikasiuka gólisi vamó

¹³ Nivago nene, Ómasímimi ageló makolímó Zosehene nene vamotoka utó o amike láa loko lo amimó: Helotéma gipakamú nene vitagá oko ale utó okoko nene apilitove loko lokamó nenazo, geza litá oko otekoko izolahiko gipalago nene kelémoko Izipi mikasiuka víki minataze. Víki níki nene, nénisi gakó litokumukó gámemé iki gili minataze. ¹⁴ Loko lokago, Zosehé nene litá oko oteake límugusigú nene izolahiki gipalagi kelémoko Izipi mikasiloka vamó. ¹⁵ * Neneloka víki niago Heloté nene hilimó. Lá okago, Zosehege atiginá iki Isilae mikasiló vamó nene hanuvamú negopa Ómasímimi agepagutí gakó loaká ve makolímó gipáne nene Izipi mikasiuka minokago sele lo amutó noave loko Ómasímo lo ami gakó luhuva gizamó nene alévolé itive liki atiginá iki vamó.

Izegipa namuni kipili gesá amó

¹⁶ Itó Heloté nene vevesá helenamike sonohí mogona giliaká a ve nenete agoka viziake vakumú nene izapaló molamó. Izapaló golesa molokago nene, gimisigi ve nene kimiseleago, keza nene Petelehe numutó itó apá alitokagi numutó namató míhina míhina iki nene izegipa namuni gipagó kilisimasi losi ali ahulinamamoláa kipili asú amó. ¹⁷ Lá iki kipili asú amó nene, sonohí mogona giliaká a vete sonohíma ganá apí oko ániughatotí gamena lá oko mota vokave liki Heloteni li ametó lá amó. Lá ikago, Lama numuni nene Petelehe numuni helegaloka minamó nenazo, Ómasímimi agepagutí gakó loaká ve Zelemíá gakó láa loko limó nene alévolé imó:

¹⁸ * Lama numutoka nene ive nama nenémo haitolímínoko nominago Lahelé nene izegipa apalamú ive noigo nene alémo zou litune liki nilago, mukitó mota hili asú ikamó nenazo alími zou lamitamó ikago ive okogó minamó neve.

Izipi mikasiukatí atiginá amó

* 1:25: Luk 2:21 * 2:6: Mik 5:2 * 2:15: Hos 11:1 * 2:18: Zel 31:15

¹⁹ Heloté helekago nene, Izipi mikasigú Guivahanímini ageló makolímó Zosehene nene vamotoka goha utó o amike láa loko lo amimó: ²⁰ Gipaka apilitove loko li vema mota helekave. Nenemú geza otekoko izolahiko gipalago kelémoko Isilae mikasiuka atiginá oko kelémoko vozo. ²¹ Loko lokago izolahiko gipalago nene goha kelémoko vimó. Atiginá iki Isilae mikasigú minake nene, ²² Zosehé nene gakó makó láa loko gilimó: Heloteni gipala Akelaó áisi nene amelahini akilí hitoake, Zutaia mikasigú nene agulizaki ve loló oko noive. Gakó némika liki likago geleake, Zutaia mikasigú voko minatikumú alegesá ligimó. Alegesá legekago nene, vamotoka gakó makó gilimó. Geleake, Galilaia mikasiloka nene ²³ * apá makó agulizá Nasaleté neneloka voko minamó. Lá okago, Ómasímini agepagutí gakó liaká a ve keza Ómasímó amisilitove loko lo mololeta vemú Nasaleté veve liki litave liki lina gakó nene alévolé imó.

3

Nagamí holokimiaká ve Zonini monó (Mak 1:1-8; Luk 3:1-18; Zon 1:19-28)

¹ Gamena nene zupa monó nagamí holokimiaká ve Zoní nene Zutaia mikasigú oake, mikasi gomopalaló monó láa loko lo utó imó: ² * Ómasímini agulizaki ve napa nene omo lokogovisaloka okaze. Likigika ali viligalo. ³ * Loko limó nene, Ómasímini agepagutí gakó loaká ve Isaiá gakó láa loko limó:

Mikasi gomopalaló ve makolímó gakó napagutí nene Guivahanímini gapo vilitalo. Likigikagú limiti gapo ali hee litalo loko nolive.

⁴ * Loko luhuva giza gakó nene Zonitoka alévolé okago, eza Ómasímini agepagutí gakó loaká ve Ilaizani suni alike kamele iza zopovatunú lilí a gó luhoake, iza galupavatunú lilí a holotani nene gohalaló zeake, pipizá nosáneta nene ganuki himoni nogozaqi nene noko minamó. ⁵ Lá noigo, Zelusale numutotí itó Zutaia apá makotokatí itó Zota nagamí vola helega ima helegalokatí nene aitoka vi anitiake nene, ⁶ lihimáini li utó ikago, Zota nagamikú monó nagamí holoketamó.

⁷ * Noholoketago nene, Palisaio monó ve itó Satukaio monó ve keza monó nagamí hlanigi ikago, láa loko lo kimimó: Gosihalímini agapilamó zuha lekeza nene golesa netalímíni lihima nene lekelitoka anitinogo noimó nene likigika ali viligamiki hanuva golisi itave loko éaho lo likimigo niave. ⁸ Likigika nene ali viligiiki nenémíni gihila ali utó iiki alo. ⁹ * Neza láa loko lo nolukumuve: Avalahani agapilamó zuha keza sonohikitana nene gatamoakalímíni lilí itave loko lo molota gakó nene alévolé itive loko lekelisi negopa, Ómasi nenémó gakó litove loko nene lokiko, gehani imanete Avalahani agapilamó zuha lilí inigi nene lilí itamó nenazo, nenemú lukugupelini aliki itiki Avalahani agapilamó zuha nouninazo, Ómasímó lihimatemú goní oletaminogo ive liki lamilo. ¹⁰ * Luni makó nene za mogonagú gamuni oake noive. Nenemú gihila lamaná ali utó inamitamoláa nene, hukoko lokú gizanogo ive. ¹¹ Neza nene likigika ali viligikamómave loko nene nagamí hololikimiaká noumóza, nemegezaloka noa ve áisi nene Ómasímini Sikalahulagi likigikagú netá golesa lolímó lati loki hololeketanogo noave. Aí zámuzá nenémó není zámuzá nene nivilegekave. Neza ánéámina gelekelé otoko aí gasa gó ate akisitomó oko minamuve. ¹² Eza nene lolopa giteaká netaki aleko oko laisi nene gesopá zeko lolopa giteko ale lamaná itove loko ale vavá okave. Nosáneta lamaná nene numunagú gizaká oko ale molokiko minanogo ive. Lolopaváa nene giteko lokú gizokiko lova lova oko minanogo ive, loko limó.

Izesú monó nagamí holamó (Mak 1:9-11; Luk 3:21-22)

¹³ Gamena nene zupa Izesú nene Galilaia mikasigutí vike Zota nagamitoka anitike nagamí holonetative loko Zonini voko lo amekago, ¹⁴ Zoní nene géneka loake láa loko limó: Nénisi ánéama nounazo, géisi holonetatanimó nene etanogo ize. Nenitoka animó nene etamive. ¹⁵ Loko lokago, Izesú nene láa loko limó: Nene gakó lamaná nolanimóza, itínasa nene nenémínoko minatife. Hoza nene lá iki alitáive loko letoamóma nenazo, golesa aminogo ive. Loko lokago, Zoní nene gele amimó. ¹⁶ Gele ameake nene alémoko lemeko Zota nagamikú nene holomikago, iteake ánigamó nene, okulumá koló okago, Ómasímini Sikalahú nenémó nama luhusimagitana oko lemeko Izesuni amupiló nolimigo ánigamó.

* 2:23: Mak 1:24; Luk 2:39; Zon 1:45; Isa 11:1 * 3:2: Mat 4:17; Mak 1:15 * 3:3: Isa 40:3 * 3:4: 2 Kug 1:8
* 3:7: Mat 12:34, 23:33 * 3:9: Zon 8:33 * 3:10: Mat 7:19

17* Lá okago nene, okulumakutí gako makó láa loko limimó: Imane nigika amenou gipáne noive. Ánigo lamaná okuve, loko limó.

4

Satá Izesuni gimivagú molamó (Mak 1:12-13; Luk 4:1-13)

1* Lá okago, Ómasímini Sikalahú nenémo Izesuni nene mikasi gomopalaló alémoko vimó nene Satá gimivagú molative loko geleake alémoko vimó. ² Neneloka minake gamena 40 oko novigo nosáneta mosimó nenazo, gaúna helekago, ³ gimilegú moloaká ve nenémo aitoka anitimó. Aniteake láa loko limó: Geza Ómasímini gipala noitanimó nene, gehani imane gako lo kemekako nosáneta lílilí ikiko natanize. ⁴ Loko lokago, Izesú nene Óe, monó gotolaú láa liki luhuva gizinamóma neve:

Vegená neneta nosáneta noko lamaná oko minoakaláa nene nomive. Ómasímini agepagutí gako nolimimó nene gele alekoko lamaná oko minoakaláa neve.

⁵ Loko lokago, Izesuni alémoko Zelusalega vike monó zagusave agoka hánaló nene alémoko iteake, ⁶ láa loko lo amimó: Geza Ómasímini gipala noitanimó nene, imanelotí ká omame mikasiló olío molozo. Gako makó monó gotolaú láa liki luhuva gizinamó neve:

Geikumú Ómasímo af ageló nene hoza gako lo kemekiko gehanimo gigisagú hizekative liki keza limiki kigizani agikagú gilími milanigave,

liki luhuva gizinamó nenazo, gotá gepeleminogo ive. ⁷ Loko lokago, Izesú láa loko lo amimó: Óe, monokú gako makó láa loko neve:

Guivahani Ómasímo lelémó vatí itihe loko negi netá lílilí amilo.

⁸ Loko lokago nene, agoka hána hána makotó alémoko itimó. Neneloka itike numutó namató kugulizakí vetini apáini itó luhuvagí netáni nene nalapizike, ⁹ láa loko limó: Geza nene galapusa hizeko negepoka lokako, gelepizu netá mukí geí loló itive. ¹⁰ Loko lokago, Izesú láa loko limó: Satá geza nene ahulokokó vozo. Gako makó nene monó gotolaú láa liki luhuva gizinamóma neve:

Guivahani Ómasi aikó nene lalapusa hizeko gupá ze ameko agepoka loakaláa neve. Itó aikó gelekelé omiakaláa neve.

¹¹ Loko lokago, ve golesa nenémo ahuloake vokago nene, agelolite aniteke nasahilí itiki minamó.

Galilaia mikasiuka Izesú monó hoza apí imó (Mak 1:14-15; Luk 4:14-15)

¹² Zonini nene nagá numukú ahulimikago noigo nene, Izesú nene gako geleake Galilaia mikasigú vimó. ¹³ Nasalette numutoka voko gamena hána minamike agilikaloka nene Kapanao numutoka voko minoko aleko imó. Ámina apá nene Galilaia nonohuló agataloka minamó nene Zepuloko Napataliko keí kagapilamó zuhatini mikasiloka minamó. ¹⁴ Lá okago, Ómasímini agepagutí gako loaká ve Isaiá epoapoga li gako nene alévolé imó. Eza láa loko luhuva gizamó neve:

¹⁵ Zepuloni mikasigú itó Napatalini mikasigú nene, age nagamí alitó, Zota nagamí vola helegaloka nene, itó Galilaia mikasiuka numuká ve keza miniki aliki iaká niatoka nene,

¹⁶ límugusigú miniaká nia vegená keza ló liví napa ánigatave.

Itó heleakalímini límugusigú mina vegená keza nene lapaná utó okiminogo ive.

¹⁷ Nene gamenaló Izesú nene monó láa loko apí oko lo kimimó: Ómasímini agulizakí ve napa nene omo lokogovisalo okave. Likigika nene ali viligalo, loko lo kimimó.

Izesú lagaha aliaká a ve 4-a sele lo kimimó (Mak 1:16-20; Luk 5:1-11)

¹⁸ Gamena makó zupa Izesú nene Galilaia nonohuló agataloka mohona noigo, ve lositá uvolahiko agunalago minasimó. Makó agulizá nene Saimon, agulizá makó nene Pitá, itó agunalámini agulizá nene Etulú, keza nene lagaha miliaká asi ve niasinazo, nonohulukú nene lagaha gotaha ahuliki niasigo, ¹⁹ Izesú ángoake láa loko lo kimimó: Némegetiki alizo. Lagaha hoza aliki minasimóma itina vegenatoka hoza aliki kilími nenitoka milatáive loko lekelémó nomuluve. ²⁰ Loko lokago nene, litá iki lagaha gotaha nene ahulikásike ámegetiki

* 3:17: Apí 22:2; Age 2:7; Isa 42:1; Mat 12:18; Mak 1:11; Luk 9:35 * 4:1: Hip 2:18, 4:15 * 4:4: Gapo 8:3 * 4:6: Age 91:1,11,12 * 4:7: Gapo 6:16 * 4:10: Gapo 6:13 * 4:12: Mat 14:3; Mak 6:17; Luk 3:19-20 * 4:13: Zon 2:12 * 4:15: Isa 9:1-2 * 4:17: Mat 3:2

vasimó. ²¹ Itó vake Zepetaioni gipala lositá ámináminiki niasigo ánígamó. Uvolahini agulizá nene Zemusi, itó agunalámini agulizá nene Zoní. Keza sipigú nene améipiki minasike, lagaha gotaha ali lamaná niasigo, Izesú ánígoake sele lo kimimó. ²² Sele lo kemekago litá iki améipinigi itó nagamikú lapéinigi nene ahulikasike Izesuni ámegetiki vasimó.

Izesú vejená mukí nasahilí oketamó

(Luk 6:17-19)

²³ * Izesú nene Galilaia mikasigú nene vigé vigé oko mohona ike nene, monó numuni minakú minakú nene monó lo keme keme ike Ómasímini gizapaló minoakalímini gakó lamaná lo utó moloko lo kerneká itó haitopaitó netá gizale vejená itó haitopaitó netá kivisi vejená kelémo zokoká oko minamó. ²⁴ Lá noigo, aikumú gakoaláa likago, Silia mikasigú vike numutó namató vo asú okago nene gili asú amó. Gili asú iake nene haitopaitó netá kivisi vejená itó kugupe miluma gele vejená itó kigikagú holosi mina vejená itó kigika gopa okago minamoláa itó gepili minamoláa mukí nene Izesutoka kilímiki ikago kelémo zoko asú imó. ²⁵ Lá okago nene, Galilaia mikasiukatí taoni 10-a mina mikasi agulizá Tekapoli loko noi mikasigutí itó Zelusale numutokatí, itó Zutaia apá makotokatí, itó Zota nagamí vola hegalokatí nene vejená vai iki ámegetiki vamó.

5

Izesú zopezaló monó lo kimimó

¹ Izesú nene vejená mukí alegesá ikago ánígoake zopezaló iteko minamó. Noigo, izegipala zuha nene aitoka alegesá iki minamó. ² Niago nene Izesú monó láa loko lo kimimó:

Logoliza vizeakalímini gihila

(Luk 6:20-23)

³ Kigikámini henonimú gilikago lemeko mina vejenakumú gelekugo kogoliza nivizemó geleaká noive. Okulumalímini lapaná nene ali lá inigave. ⁴ * Itó ive nama iki miluma giliki miniaká niamó nene keikumú gelekugo kogoliza nivizemó geleaká noive. Ómasímo kelémo zou litive. ⁵ * Itó kugupenini aliki limiki miliaká niamó nene keikumú gelekugo kogoliza nivizemó geleaká noive. Mikasiuka nene Ómasímini helisa henoni mukí nene ali lá inigave. ⁶ Itó Ómasímini avogisaló hee hee liki minatakumú miluma giliki miniaká niamó nene keikumú gelekugo kogoliza nivizemó geleaká noive. Hee liki minatamó nenémo kigika itive. ⁷ Kigika hizi kimiaká niamó keikumú gelekugo nene kogoliza nivizemó geleaká noive. Ómasi eza agika hize kimitimó neve. ⁸ * Itó kigika gizopagi miniaká niamó nene keikumú gelekugo kogoliza nivizemó geleaká noive. Keza miniki Ómasi ániganigave. ⁹ Itó kilími zou liaká niamó nene keikumú gelekugo kogoliza nivizemó geleaká noive. Ómasímo izegipáne zuha niave loko loketanogo ive. ¹⁰ * Itó hee lo mina mogona ámegetiaká niató miluma netá alikitiki gopoguni milikimikago miniaká niamó keikumú gelekugo nene kogoliza nivizemó geleaká noive. Keza nene okulumalímini lapanató víki minanigave. ¹¹ * Itó nenikumule liki alivi letivi iki gopoguni mililitikiki likilími golesa galasa iki lotoka lataka nihizilitikikoma nene lokogoliza vizitave lokogó nene gelenouve. ¹² * Okulumakú meinavatini sipisi netimó nenazo, nenemú mulutikú lamaná giliki lokogoliza viziki láa liki gilitave: Ómasímini agepagutí gakó liaká a ve gozapá nene áminámini ikitamóma nenazo, Ómasímo ámina vejenaki meinava napa kimimó nene ámináminoko liminogo ive liki lokogoliza vizilo.

Age itó liví nenémini gakola

(Mak 9:50; Luk 14:34-35)

¹³ Lekeza nene mukí vejenalitiní age lilí iki niave. Agémini lagaváa asú itimó nene, nana oko goha alémo melelé itune. Ma aminogo une. Ha netá loló okamó nenazo, nenemú lekeko ale ahulokuko, ká omane mikasiló neiko nene, vejená nenete lisiki goihá ziki vigá igá inigave. ¹⁴ * Itó lekeza nene mikasiuka vejená mukilitini livíni lilí iki niave. Liví napa nene agokaló ale utó molonouko, netá makolímó ale hitosá amive. ¹⁵ * Itó liví lege molokoko nene somotunú gahumá oakaláa nomive. Holomaló molokuko nene, numukú nia vejená hize sata o asú okimiaká noive. ¹⁶ * Lekeza miniki aliki atímo livímáminoko vejená nene hize sata oketatize. Lá okoko nene, lekelisi lamaná iki iki miliki itamó nene vejená nenete ániigiiki laga kivisekiko, okulumakú ametipini agepoka litaze.

* **4:23:** Mat 9:35; Mak 1:39 * **5:4:** Isa 61:2 * **5:5:** Age 37:11 * **5:8:** Age 24:3-4 * **5:10:** 1 Pit 3:14 * **5:11:** 1 Pit 4:14 * **5:12:** 2 Iki 36:16; Apo 7:52 * **5:14:** Zon 8:12, 9:5 * **5:15:** Mak 4:2; Luk 8:16, 11:33 * **5:16:** 1 Pit 2:12

Mosé lo hukoko li gakokumú

¹⁷ Nenikumú nene Mosé lo hukoko li gakó itó Ómasímíni agepagutí gakó liaká a vete li likimína gakó ale ahulatove loko okane liki lakagata gelemilo. Ale ahulatove loko lumumó negopa, mogonáa lo utó oko lokugo gihila zitive loko lumumóma neve. ¹⁸ * Gakó lamaná lo likimitoze, gililo: Okulumaki mikasigi velesá vo tolova amoko ha nekoma nene, Mosé lo hukoko li gakokutí gakó koma ma gopa aminogo ive. Ha mino-loko voko neiko nenémíni gihila utó inogo ive. ¹⁹ Nenemú makó eza lo hukoko li gakokutí koma makó avutá apeleoko vejená lugáate ámináminiki avutá apilitave loko lo kimitimó nene, okulumakú Ómasímíni avogisáló eza lemeko minanogo ive. Itó makó eza lo hukoko li gakó gele alekoko vejená makolite ámináminiki gili alitave loko lainim-oketatimó nene, okulumakú Ómasímíni avogisáló iteko minanogo ive. ²⁰ Nénisi láa loko lo nolukumuve: Lekeza nene monó mogona apí ikimiaká nia vetini itó Palisaio monó vetini mogonáminimú gilikago hee lokogó noitave liki giliaká niamóza, lekelí hehe liki miniaká nia mogonatini nenémo keí mogonáini kiviligemitimó nene, lekeza okulumakú Ómasímíni avogisáló ma iteminigave.

Lizapaló moloakálmíni gakola

²¹ * Mosé lo hukoko li gakokutí avotikini láa liki li kiminámoma neve: Geza vejená kepele helemo. Makolímohe makolímohe ve makó apele hilitimó nene, gakó hozámíni mututoni loló itive. ²² Itó nénisi nene láa loko lo nolukumuve: Makolímohe makolímohe agivelahinimú izapaló molatimó nene gakó hozámíni mututoni loló inogo ive. Itó makolímohe makolímohe agivelahini ale mumusopa zeko litimó nene monó gizapa vetini kovogisáló goní napa inogo ive. Itó makolímohe makolímohe agivelahinimú aleko letoko negi ve lotatimó nene, ási nene ló apalímíni mututoni loló inogo ive. ²³ Nenemú geza nene guguni gizoaká netá matá aleko voko holomaló molatani zupa nene nigivénehiki logoka hotopotó igo lovaleta onousimóma nenazo, nenema ha neve loko gilitanimó nene, ²⁴ guguni gizoaká netá neneló ahulokako, neko nene, voko gigivekahiki gakó ligili hagili iki nene likigizakú aliki ali hulu itáve. Ali hulu iiki nene guguni gizoaká netáma nene goha voko Ómasímíni holomaló molatane. ²⁵ Ve makó eza geí lihimamú goní ogetanogo goní numutoka gelémoko noviko, gapoloka niviki nene lihimavaka asú itive loko netá makó amezo. Itó áminagi aleloko gopa hanuva goní ale heleaká ve noitoka anititanimó nene, goní ale heleaká vemámo pilisi vetini kigizakú gelémo molokíko keza nagá numukú ahuligimikataze. ²⁶ Neza lamaná lo nogumuve. Geza Ómasímíni nagá numuni napagú minokoko lihimakámíni meinaváa koma napa apaso asú amitanimó nene áminagú mino-loko voko minanogo ane.

Vená loká oaká gakó

²⁷ * Mosé lo hukoko li gakokutí avotikini nene gakó láa liki li kiminámoma neve: Haitó vená makó loká amo. ²⁸ Itó nénisi nene láa loko lo nolukumuve: Ve makó nenémo vená makó nene áni go amu hilitimó nene ámina vená nene agikatanú mota loká okamó nenazo, nenémíni lihima áitoka minanogo ive. ²⁹ * Nenemú gogómula lugaloka nenémo lihima aleaká gapogú gelémo nomilikoma nene, gugupe avasavagi minoko nene meikú holokatanize. Nenemú gogómula nenémo gelémo gopa okative loko gogómula lugaloka nene hize likoko ale ahulozo. Gogómula hamoki minoko vávani oko minanogo ane. ³⁰ * Itó gigizani lugaloka nenémo lihima aleaká gapogú gelémo nomilikoma, gugupe avasavagi minoko meikú holokatanize, nenemú gigizani lugaloka hukoko ale ahulozo. Gigizani hamoki minoko vávani oko minanogo ane.

Vená kimisele ahuloaká gakó

(Mat 19:9; Mak 10:11-12; Luk 16:18)

³¹ * Mosé lo hukoko li gakó makó láa loko neve: Makó eza venala ahulatotave loko nookoma nene pepa luhuva gizo ameeko nene ahulatotave. ³² * Itó nénisi nene láa loko lo nolukumuve: Ve makolímohe makolímohe venala gumesisi mokoló mogonaló negopa hanuvamú amisele ahulatimó nene, ámina miní ezega emega oakalímíni lihimavala nene goí o vanaloka minanogo ive. Itó alika vegi apizikí minasitímíni lihimavala nene goí o vanámíni amupiló iteko minanogo ive.

Ómasímíni avogisáló lo hukoaká gakó

³³ * Mosé lo hukoko li gakokutí nene avotikini nene gakó láa liki li kiminámoma neve: Geza nene Ómasímíni avogisáló lo hukoaká noanimó nene sozagutí ale moloko lamo.

* 5:18: Luk 16:17 * 5:21: Gá 20:13; Gapo 5:17 * 5:27: Gá 20:14; Gapo 5:18 * 5:29: Mat 18:9; Mak 9:47

* 5:30: Mat 18:8; Mak 9:43 * 5:31: Gapo 24:1-4; Mat 19:7; Mak 10:4 * 5:32: 1 Koli 7:10-11 * 5:33: Liv 19:12;

Nam 30:2; Gapo 23:21

Guivahanîmini avogisalo gakô lo hukoko lanimô nene gele alekako gihila utô inovo ive. Nene gakô lekeza mota gilinamôza, ³⁴* nênisî lãa loko lo nolukumuve: Ómasîmini avogisalo lo hukooká gakô nene ahulalo. Okulumakutî nene Ómasîmo gizapa olimiaká noimô neve. Nenemú okumatoka ali miliki gakô li hukamilo. ³⁵* Itô imane mikasîló nene Ómasîmo lisoaká noive. Nenemú mikasîgú ali miliki gakô li hukamilo. Itô Zelusale nene okulmakú agulizaki ve napâmini apâ neve. Nenemú Zelusale numutoka ali miliki lo hukooká nene ahulalo. ³⁶ Itô lekeza zopovatini loî zekikoma nene gakô li amikiko anupá lolô amitimô, itô zopovatini anupá nene gakô li amikiko loî zemitimô neve. Nenemú zopovatiniól ali miliki gakô li hukamilo. ³⁷ Netá nenêminãa ahuliiki lamaná oo lolô itune likigô, itô óe lolô amitune likigô lilo. Nenêmini amupilô gakô makô litamô nene ve golesalokatî linigave.

Golesa netá apasoaká gakô
(Luk 6:29-30)

³⁸* Moseni gakô makô lãa liki linamô nene giliaká niamóma neve: Makolîmo gogómula hize likokikoma, ámináminoko aí agómula hize likozo. Makolîmo gegepa ze letokikoma geza aí agepa ze letozo. ³⁹ Liki linamôza, nênisî nene lãa loko lo nolukumuve: Likipilitune nikikoma lukugupelini ali agutô vîzemîlo. Nenemú ve makolîmo gagamîpa lugaloka zekikoma, gagamîpa lugaloka nipilitive loko viligo amezo. ⁴⁰ Makolîmo gonî nogetoko nene siotika alekikoma nene, hepé gómagi gopa amezo. ⁴¹ Itô kiapé makolîmo henokanoni geheko gapo alínipalô vitane loko nolikoma, gapo hánagi nene hanuva geheko vozo. ⁴² Itô makolîmo geî netakumú voká nolikoma, hanuva amezo. Netá mataka gutá ale minatove lokikoma, amezo.

Gala ve ligika kemeaká gakô
(Luk 6:27-28,32-36)

⁴³* Gakô makô lãa liki linamô nene giliaká niamóma neve: Geza gigika nene gigivekahini amezo. Gala vega nene aleko letoko mukahá apelezo. ⁴⁴ Liki linamôza, nênisî lãa loko lo nolukumuve: Gala velini nene likigika kimiki nasahilî ikitalo. Gopoguni mililikitata vegeakumú Ómasiloka lilo. ⁴⁵ Lã niiki okulmakú ametipini gipala mohô gihila lilî iki minatave. Ásî lokago, aí ho silikakêna nenêmo vegená golesagi lamanaki mukitoka hamô lelegitô hize hanatolimiaká noive, itô ási lokago nene aí golini nenêmo golesa iki mina vegenaki hee liki mina vegenaki hamô lelegitokô ale geha zelimiaká noive. ⁴⁶ Lekeza nene gigika likimita vegenakô nasahilî iki likigika kimitamô nene, Ómasîmitokatî meinavãa alemitamô neve. Takisi gehani aliaká ve lekeza ániigi goselê iaká nia ve nenete kigika limita vegená nene ligika kimitune liki liaká niamole. ⁴⁷ Itô likigivetikinigô geké likitatamô nene, likigivetikini nana netá lamaná lilî ikimiaká niamô neve. Monô gilina vegenalitini suni negopa, monô gelema vegená kezagi ámina suni aliaká niave. ⁴⁸* Nenemú lekelisi okulmakú ametipo hee loko minoaká noimô nenêminikigô minalo.

6

Gohogô vegená nasahilî okimiaká gakô

¹* Lekeza monokumule liki vegená kilîmi lamaná iki nasahilî ikitata netá nene vegenalite legepoka litave liki lilî amîlo. Lekeza vegenalite legepoka litave liki ali minatamô nene, ehe, okulmakú ametipo meinavãa lekememinogo ive.

² Nenemú gohogô vegená nasahilî oketokoko gigivekage ániigi lamaná itave loko golómeni gizamo. Genezáini losîgi ve nenete soza saza gakô lake monô numukú itô vegená kovogisalo vegenalite ániigi lamaná iiki legepoka litave liki lã iaká niave. Neza lamaná lo likimitoze, gililo. Kegepoka liaká niamô nenêmo keî meinavãa lolô okago mota alikago asú oaká noive. ³ Gohogô vegená nasahilî oketatove lokoma gigizani lamagalokatî asugunatoka nasahilî oketozo. Lã okako gigizani sogaloka nia vegená nenete gelemítave. ⁴ Lã okako nasahilika nene asugunatoka minative. Amekaho nene asuguná oko aleaká noani netá ániigoaká noinazo, nenemú meinavãa giminogo ive.

Ómasiloka loakakumú apî okimimô
(Luk 11:2-4)

⁵* Lekeza Ómasiloka nilikima nene sozalô genezáini losîgi vegenalitini suni alemîlo. Keza nene monô numúikú itô vegená kovogisalo vegenalite ániigi lamaná itave liki otiki Ómasiloka liaká niave. Neza lamaná lo likimitoze, gililo. Kegepoka liaká niamô nenêmo keî

* 5:34: Zem 5:12; Isa 66:1; Mat 23:22 * 5:35: Isa 66:1; Age 48:2 * 5:38: Gá 21:24; Liv 24:20; Gapo 19:21 * 5:43: Liv 19:18 * 5:48: Liv 19:2; Gapo 18:13 * 6:1: Mat 23:5 * 6:5: Luk 18:10-14

meinaváini loló okago mota alego asú oaká noive. ⁶ Geza Ómasiloka litove loko nookoma nene, numukagú iteoko gahe gekoko amekaho asugunatoka ángoaká noi veloka lozo. Lá okako nene, amekaho asuguná netá aleaká noani netá ángo asú oaká noi ve nenémo meinaváa giminogo ive.

⁷ Lekeza nene Ómasiloka niliki nene lekegepatunú goha liiki goha liiki ikiki hána hána loló okiko ha gakó loló okatize. Monó gelema vegealite Ómasiloka loloko vova vova nouko gele limitihe liki lá iaká niave. ⁸ Lekeza keí suni alemilo. Ómasímo netá matakumú vitagá nouko nene litá oko voká lonamuko hanuva geleaká noive. ⁹ Nenemú lekeza nene láa liki Ómasiloka lilo:

Okulumakú ametega, geí gugulizá etó oko minatize.

¹⁰ Numotó namató geí gizapaló minoakalímíni zámuza utó o asú ino. Okulumakú géisi lanitó molanitó gelekelé igímiaká niave.

Mikasiuka lezaloka áminagó oko utó ino.

¹¹ Gamena gamena nosánatete lemezo.

¹² Leza ligivetegini lihima nekisáini ahulokimiaká nounimó nenéminoko lihimate ale minuháma nene ale ahuloletozo.

¹³ Gimilegú moloakakú lelémó molamo.

Ve golesámitokatí akagá oletozo.

^{14*} Lekeza likigivetikini lihima ahulikitatamó nene, okulumakú ametipo nene áminagó oko lekelí lihimatini ale ahuloleketanogo ive. ¹⁵ Itó lekeza vegealitiní lihima ali minatamó nene ámináminoko okulumakú ametipo nene lekelí lihimatini ale minahogo ive.

Monokumule loko nosáneta moseaká gakó

¹⁶ Itó monokumule liki nosáneta mosi keké ita zupa nene monó gelemiki genezáini losigi vegealitiní suni alemilo. Vegená makolite mosé oaká nouni suni ángiiki legegoka litave liki kogoka kegepaló ángiake muhelé ahelé iaká niave. Neza lamaná lo likimitoze, gililo. Vegenalite kegegoka liaká niamó nenémo meinaváini loló okago, mota alikago asú oaká noive. ¹⁷ Géisi nene monokumule loko nosáneta nomoseko nene gotoka komu aleko ale lamaná okoko gogoka gegepa nagamí zezo. ¹⁸ Lá okako, vegená makolite nosáneta nomosenimó nene ángi vevesamítave. Amekaho asugunatoka noi ve nenémo gilitize. Itó asugunatoka aleaká ani netá ángoaká noi ve amekaho nene meinaváa giminogo ive.

Okulumakú henoni

(Luk 12:33-34)

^{19*} Mikasigú henoni nene gaupá geakalímíni itó gúnakonite hukiakalímíni, itó vegealite zivi letivi iki gumina oakalímíni nenazo, nenemú mikasiuka imane ali nupa nupa amilo. ²⁰ Lekeza okulumakú henoni nene gaupá gemoakalímíni gúnakonite hukamiakalímíni itó guminaló vete zivi letivi iki gumina alemoakalímíni nene ali nupa ilo. ²¹ Gelenape. Henokanoka lamaná neti apatoka nene gigika neinogo ive.

Lugupémini ló liví

(Luk 11:34-46)

²² Gogómula nene gugupémini ló liví neve. Gogómula nenémo mumuzó oakalímíni gapogú gelémo molamitimó nene, Ómasímini lapaná nenémo gugupe gigika mukitoka hize hanato asú inogo ive. ²³ Itó gogómula nenémo gelémo golesa itimó nene, gigikaloka ámina oko límugusi ze minanogo ive. Gigikagú liví lonoimó nenémo lihbatimó nene, límugusi zitimóza, sipisi haitolímíni zekiko nene gopa gapo veleko minanogo ane.

Ómasímini hozagi moni henonímíni hozagi

(Luk 16:13; 12:22-31)

²⁴ Ve hámakolímó kugulizaki ve lositosini gelekelé ma oketaminogo ive. Maga ve agika amekoko maga ve gasó amitimó onoiwe. Makotó gímize lamaná okoko makó ángo goselé itimó neve. Lekeza nene ámina iki Ómasímini hozagi moni henonímíni hozagi lelegí oko aleakaláa nomive.

Mulute iteaká gakó

²⁵ Nenemú neza láa loko lo likimitoze, gililo. Lekeza miniki aliki itakumú nene nosáneta hikutí noko minatupe, itó ginegane nene hikutí ale akoloko minatupe liki mulutini itemino. Lekelisi ma liléna. Miniki aliki iaká nia netá nenémo netá gihila nehe, itó nosáneta nenémo netá gihila neve. Lukugupémo netá gihila nehe lukugupeló ginegane nenémo netá gihila neve. Minoko aleko oaká itó lugupe nenémo netá gihila nene. ²⁶ Lekeza veletó vogalaló nama nene ángalo. Keza netá matá ma zuhá isá amave. Itó minumuni

* 6:14: Mak 11:25-26 * 6:19: Zem 5:2-3

o molokago nosáneta nene numúikú ali nupa iki nisá amave. Lá onoimóza, okulumakú ametipo nosáneta gopa ale utó o kemeaká noive. Nenegú nana onoive. Namamate itiki niago lekelisi nene lemeko nounge liki nigelehe. Lá oko nomive. Lekeza itiki nianazo, netá matá vitagá nia netá nene hanuva ale utó mololeketanogo ive. ²⁷ Lekelikutí makó éaho muluna noitiko minoko aleko ititó nene ezáa agata geleko miní ameko kilisimasi makó molomo iteko minative. Ma nomive.

²⁸ Itó gineganemú nene nanamú mulutini iteaká noive. Gihisigú palauá nenetini mogona gili vevesamahe. Netá nenémináate hoza alisá amave. Itó ginegane lamanatamanakó ali luhatakumú gó isá amave. ²⁹ * Lá onoimóza, nenemú lo likimitoze, gililo. Gozapá agulizaki ve napa Salomó nene golivagi netá akoloaká imóza, gihisigú palauá nenete Salomoni agupeló netá nene aviligikave. ³⁰ Palauá nene itínasa utó oaká noive, itó gó lokago gululupasokago hukiki ló giziaká niave. Lá onoimóza, Ómasímo lokago, ámina palauá nenémo lá oko gonanalisi lamaná oaká noimó nenazo, nenemú lekeza komáisi gili alévolé inamó neneta, ginegane nene Ómasímo hanuva ale utó oleketanogo ive. ³¹ Nenemú lekelisi nosáneta hikutí aleko noko moloko itupe, itó ginegane ale akalatunimó nene hikutí ale akalatupe liki mulutini itemino. ³² Monó gelema veená keza ámina netakumú kagata gululusi giliki vitagá iaká niave. Keí suni alemilo. Okulumakú ametipo nene ámina netá makó lekelitoka minamitimó nene lukugupe lamaná amitive loko geleneimóma nene. ³³ Lekeza ámina netakumukopa, Ómasímo gizapa vetini loló iti gapogú itó Ómasímimi hee hee loko minoaká gapogú likigika lakagata goí iki miliko vo minino. Lá ikiko nene, lukugupémimi netaki nene hagitana lehizeleketanogo ive. ³⁴ Nenemú azo utó iti netakumú nene mulutini itemino. Azo utó iti netá nenémimi genaváa azogó asú inogo ive.

7

Vegenalitini lihimamú gakó li hukikitamilo

(Luk 6:37-38,41-42)

¹ Lekeza vegenalitini lihimáinimú gakó li hukikitamilo. Ómasímo ámináminoko lekelí lihimamú gakó lo hukolikimikatize. ² * Lekeza vegenalitini lihimáinimú li hukikita polosava lekelí lihimamú lo hukoleketanogo ive. Itó lekeza vegenalititoka iki miliki ita polosava ámináminoko Ómasímo lekelitoka oko moloko inogo ive. ³ Nenemú geza givivekahini agómulagú gilisá onoikoma ángokoko gezaka gogómulagú za lana vonoimó nene nanamú ángo lamaná amane. ⁴ Gezaka gogómulagú za lana vonoimó nene hanuva nego, givivekahini nanamú gogómulagú gilisá vonoimó nene ale ahulogetatove loko nolane. ⁵ Sozaló ve gezaka losi minamó neneka, gezaka gogómulagú za lana nemó nene goí oko ale ahulokoko alika geza ángo vevesooko nene givivekahini agómulagú gilisá ale ahulotatanimó nene etanogo ive.

⁶ Lekeza nene monolímimi gakó lamaná nene galagitana veená li kememilo. Keza gopa viligiki akohú likipilikataze. Itó monolímimi meinava iteko mina gakó nene izagitana veená li kememilo. Keza nene monotini gili ahuliiki likilími golesa ikataze.

Ómasiloka loko voká loaká gakó

(Luk 11:9-13)

⁷⁻⁸ Voká liaká nia vegenalite netá matá mota aliaká niave. Vitagá iaká nia vegenalite gihila ali utó iaká niave. Gaheló hoko-hoko likago koló okimiaká noive. Lá onoinazo, Ómasiloka liki voká litamó nene alinigave. Vitagá itamó nene gihila ali utó inigave. Gaheló hoko-hoko nilikoma, gahe koló oleketanogo ive. ⁹ Lekelikutí ve makolímimi gipala nenémo nosánetakumú voká lohiko, amelaho gehani mula makó amitihe. ¹⁰ Itó lagahamú voká lokiko gosihá amitihe. Óe, lá aminogo ive. ¹¹ Lekeza veená golesa minikamóza, izegipatini gizapa lamaná ikitake netá lamaná ali kegepa iaká nianazo, okulumakú ametipo voká lita veená nene aleko iteko haitolímimi nene netá lamaná lehizeleketanogo ive.

¹² * Lekeza vegenalite némini manámimi lilí ilitave liki giliaká niamó nene lekeza áminagó iki nenémimi manámimi lilí ikitalo. Ámina gakó nenémo Mosé lo hukoko li gakoki Ómasímimi agepagutí gakó liaká a vele apí ikimina gakoki nenémimi gotoláa neve.

Gateni komagú iteaká gakó

(Luk 13:24)

¹³ Latila oaká apalímimi gatenáa napa neve, itó gapováa sipisi neve, itó neneloka veená mukilite viaká niave. Nenemú ámina gapogú vamiki okulumá gateni komagú itilo.

¹⁴ Alévolé oko minoaká apalímíni gatenía koma neve, itó gapováa koma nego génopa hoza aleko iteakaláa nenazo, vegená luguhakó viaká niave.

Gihila golesa lamaná zeakalímíni mogonáa
(Luk 6:43-44)

¹⁵ Soza saza monó lili ali ve keza kugupe zou lo minamó itó hela gala kígikagi nenémináate lekelitoka anititakumú, ehe, lukugupe gizapa iki minalo. ¹⁶ Keza iki miliki ita sunímo mogonatanagáni ale utó okíko ániagi vevesataze. Hilipa nenémo gihila noakalímíni zitimó nehe. Itó gomogisigú nene gihila noakalímíni zitimó nehe. Óe, nenéminoko nomive. ¹⁷ Za lamaná nenémo gihila lamanakó zeaká noive. Za golesa nenémo gihila golesagó zeaká noive. ¹⁸ Za lamanalímó gihila golesa zeakaláa nomive. Za golesámo gihila lamaná zeakaláa nomive. ¹⁹ * Lá onoinazo, vegenalítini mogonatagana hamó lelegító neve. Gihila lamaná ali utó amitamoláa hukoko lokú gizanogo ive. ²⁰ * Nenemú soza saza monó lili ali vete iki miliki ita suni nenémo mogonatanagáni ale utó okíko, lekeza nenémini gihiláa nene ániagi vevesanigave.

Lekelí ániagi vevesonamuve
(Luk 13:25-27)

²¹ Guivahaníneve guivahaníneve liki liaká nia vegenakutí lugáa avasavagi okulumá apakú iteminígave. Aménehini gakó gili aliaká nia vegenakó nene itinígave. ²² Gamena napaló nene vegená lugáate láa liki li niminigave: Guivahanitemaka, leza nene geí gaktó monó lo kemeaká uháma neve. Itó geí gaktó kígikagutí holosi kepeleko kimisele ahuluháma neve. Itó geí gaktó alévolé suni mukí aleháma neve. Nenemú gahe segeletamane. ²³ * Liki li nimikiko, neza nene láa loko lo kimitove: Nénisi nene lekelí ániagi vevesonamuve. Golesa netatokagó mihina amó neneta aló vilo loko linogo uve.

Numuni lapusámini gakola
(Luk 6:47-49)

²⁴ Nenemú gakóne imane giliiki ámegetata vegená nenémináate láa iki niave: Gele veveso mina ve makolímó numuna nene mikasi alévolelaló nené oko gekago, ²⁵ nego nene, golini napa zeake nagami velekago itó una napa alekago, mikasi alévolelaló gimó nenazo, alévolé okogó minamó. ²⁶ Itó gakóne imane giliiki gili ahulata vegená nenémináate láa iki niave: Negi ve makolímó numuna nene nagami agataloka getatoka gekago, nego, ²⁷ golini napa zeake nagami napa vilitímó itó una napa alítímó ake ahelú okago, numunima lemeko pou loko akamó.

²⁸ Loko Izesú ámina gakó lo keme asú okago, ali nupa iki gakola gele vegená nene Izesú monó lo kimikumú sigaga litake láa liki lamó: ²⁹ * Monó mogona apí ikimiaká nia vete nene avotegini gaktó amegesaló milatave líkigó liaká niamóza, áisi nene ezáa gakola nene gihila noikumule loko amegesa milatató neve loko lainim-olimiaká noive, liki lamó.

8

Izesú lokago halamé gizali ve gililimó
(Mak 1:40-45; Luk 5:12-16)

¹ Izesú agokagutí nolimígo, ve vená mukí nene ámegetiki vamó. ² Nivago, ve makó halamé gizaleake mina ve nenémo víke alapusa hízeko Izesuni láa loko lo amimó: Guivahanínemaka, geza nelémo gililitove loko nene hanuva nelémo gililitanimó nenazo, nelémo gililitane loko noluve. ³ Loko lokago nene, Izesú nene agizani lutoko agupeloka ale nogilike gililitane loko gelekuze, halamé nene gilelezo. Loko lokago halamé netala litá oko gililimó. ⁴ * Gilelekago, Izesú nene láa loko lo amimó: Geza nene imane gakó aveté oko vegená makó lo kememoko voko guguni gizoaká ve nene gugupe alapizekako mota gilelekane loko ániगतize. Itó gilenínumú nene Moseni gaktó ale moloko netá makó Ómasi guguni gizo amiti netá amekako gilenítímíni mogona nene mukí vegená lo kemekiko gili vevesatave, loko lo amimó.

Izesú ami gizapa vémini gelekelé veva alémo zokamó
(Luk 7:1-10)

⁵ Izesú nene Kapanao numutoka itekago, Loma apatotí ami vetini gizapa ve makolímó aniteake negénegeka loko láa loko lo amimó: ⁶ Guivahanínemaka, gelekelé izegipáne nene netá napa avisekago helisala hulupa lo minokago miluma geleko numukuka noize, makó vitíve loko noluve. ⁷ Loko lokago, Izesú nénisi vinake alémo zokatove loko lo amekago,

* 7:19: Mat 3:10; Luk 3:9 * 7:20: Mat 12:33 * 7:23: Age 6:8 * 7:29: Mak 1:22; Luk 4:32 * 8:4: Liv 14:1-32

⁸ ami gizapa vémo láa loko limó: Guivahanínemaka, goselé gapo okoko ve ánéamina není numukú nanamú ititane. Geza nene imaneloka nooko hanuva gegepatunú lokako gelekelé izegipáne nene zokative. ⁹ Nénisi nene ámináminoko kugulizaki vetini gelekeleláa nouve. Itó lovámíni gala ve makó není gizapaló niave. Lá niago, ve makokumú nene vozo loko lomikugo hanuva vinogó ive. Itó ve makokumú ano loko lomikugo nene hanuva anogó ive. Itó gelekelé izegipánemú nene voko hoza alezo litomó nene hanuva voko alitimó nenazo, geí gakó ámináminoko alévolé itive loko gelenouve. Nenemú nene geza hanuva imaneloka nooko gakoláa lokako zokatihe loko luna. ¹⁰ Loko lokago, Izesú geleake nene sigaga lotake ámegetiki va vejená nene láa loko lo kimimó: Neza lamaná lo likimitoze, gililo. Hetoka ve imanémó nenikumú gele alévolé onoimó nene haitolímíni neve. Isilae ve lekezalokatí gele alévolé oaká nenémíni makó ángoko gelesá amumóma neve. ¹¹ * Nenemú nene láa loko lo nolukumuve. Ho noititokatí itó ho nolimitokatí hetoka vejená ve imanegítana nia vejená mukí nenete anitíiki nene Avalahá Isaká Zakopó kezagi okulumalímíni lapanalaló alegesá iki miniki nosáneta niki kogoliza vizinígave. ¹² * Lá niiko, goí oko alesa molo kimimó Isilae vejená nene limugusi apakú ahulokimikiko, limiki miniki ive nama iki míluma maluma giliki kegepa atalá iki minanígave. ¹³ Loko loake, ami gizapa ve nene láa loko lo amimó: Geza nene numutoka vozo. Gele alévolé animó nenémíni gihila utó inogó ive. Loko Izesú agepa ateleko noligo nene, gelekelé izegipa nene zokamó.

Izesú vejená mukí kelémo zokamó

(Mak 1:29-34; Luk 4:38-41)

¹⁴ Izesú nene Pitani numukú iteake, Pitani venalámíni izolahíni agupegú ló lokago, akonoigo ángoake, ¹⁵ agizakú alimó. Agizakú naligo, ló la netá nene asú omíkago, oteake nasahílí otamó. ¹⁶ Lá okago, únaká ho lemekago nene, kígikagú holosi mina vejená nene Izesutoka kilímiki amó. Ikago nene, kivisi vejená kelémo zokaká kígika gopa i vejená gakó noloketake holosi kepeleko kimuseleká imó. ¹⁷ * Lá okago nene, Ómasímíni agepagutí gakó loaká ve Isaiá gakó láa loko luhuva gizamó nene alévolé imó: Netá livisekago keé lamuni netá ezáa agohí gimole.

Izesuni ámegetanigi gele vejená

(Luk 9:57-62)

¹⁸ Lá okago, ve vená mukí iki Izesutoka hizi vigikago, ángoake izegipala zuha nene sipigú nilímiki vola helegaloka vitave loko lo kimimó. ¹⁹ Lo kemekago nene, monó mogona apí okemeaká ve makolímó voko amatoka minoake Izesuni láa loko lo amimó: Tísánemaka, vitanitoka vitanitoka neza gémege gémege inogó uve. ²⁰ Loko lokago, Izesú nene láa loko lo amimó: Gaha nene mikasi koló onoikú itiaká niave. Itó namatini numúni nemóza, okulumakutí lumu ve gihila neza akato numúne itó gotóneló za nomíni vitagá noumó nenazo, makó vitíve loko lanimó nenémíni mogona gele hee lominoko nolape, loko lo amimó. ²¹ Itó ámegetiki va vejenakutí makó nenémó láa loko lo amimó: Guivahanínemaka, geza gelekako nene, neza minoko améneho helekiko vinake gale zemikinake oko gémegetatove. ²² Loko lokago, Izesú nene láa loko lo amimó: Geza nene némegetoko ano. Hilínita vejená gale zikimiaká nene kígika heleneiti vejená kezagi ámina hoza alitave, loko limó.

Izesú lokago una napa ahulamó

(Mak 4:35-41; Luk 8:22-25)

²³ Izesú izegipala zuhagi nagamikú lapegú itiake vamó. ²⁴ Nivago nene, una napa nene litá oko amó. Amuza moloko alekago nene, nagamí nene valahuká zeko lapegú nene ite vaí inogó imó. Lá okago, Izesú nene avó akonoigo, ²⁵ izegipala zuhate alímí noteke láa líki lamó: Guivahanítemaka, nagamikú simá nanogó nounize, lugutó vizemane. ²⁶ Líki líkago, Izesú láa loko lo kimimó: Lekelisi komáisi gili alévolé iaká niatita, nanamú líkígika gologolo sekave. Loko loake, oteake, unagi nagamí valahukaki nene ahualizo loko lo kemekago nene kíi nolike zou limó. ²⁷ Zou lokago nene, vejená mukí nenete sigaga lake láa líki lamó: Ve imane haitolímíni neve. Unagi nagamí valahukaki keza aí gakoláa gili alikasive, líki lamó.

Gatala mikasiuka holosi golesa amisele ahulamó

(Mak 5:1-20; Luk 8:26-39)

²⁸ Nonohuló aviligiake vola helega Gatala vejenalítini mikasigú anitikago, ve lositá holosi golesa kígikagú mina ve minasimó. Niasike, ámepe vizikasigo, vejená nene kelegesá legekago neneló vigá igá amamó. ²⁹ Ámina ve nenetosa geha mulikú gonosi mílimiligutí lemesike Izesugegi hotu lamó. Hotu liake keza litá iti gopaga líki láa líki gamoga giki lí

* 8:11: Luk 13:29

* 8:12: Mat 22:13, 25:30; Luk 13:28

* 8:17: Isa 53:4

amesim0: 0masimini gipalamaka nana netá golesa oletanogo noane. Gamena alitamit0 nene miluma hoza liminogo noape. ³⁰ Liki lasim0 nene áminal0 iza mulusi napa miliki hot0 otigf iki gale niki minam0. ³¹ Gale niki niago nene, holosi nenete negénegeka lake láa liki lam0: Limisele ahulanogo nookoma nene iza mulusi vozane kigikagú nene limisele ahulamane. ³² Liki likago, Izesú nene vilo loko kimiselekago, viki izatini kigikagú itiake nene lemem0. Izatini kigikagú nene limikago, ámina iza mukí nene olí miliake meinil0 limiake nonohulukú limiki nagamí niki hutiake hili gesá am0. ³³ Hili gesá ikago nene, iza gizapa ve nenete golisi viake taoniloka gak0 nene liliki vake kigikagú holosi mina vetosini gakoláa avet0 iki li kemem0. ³⁴ Li kimikago, ve vená mukí nene gili asú iake mukí veenalite Izesuni ániगतune liki limiake mikasinini ahulokokoko vitive liki negénegeka liki li amem0.

9

*Izesú ve gepili alémo zokam0
(Mak 2:1-12; Luk 5:17-26)*

¹ Izesuge nene nagamikú lepegú itiake numunaloka goha atiginá iki am0. ² Ikago nene, ve gepili mak0 nene ukoakogú nene zal0 miliki aliki am0. Alike ikago, Izesú nene ezámú gili alévolé am0 nenémini mogonáa ángoake ve gepilima láa loko lo amim0: Gipáneve, goha gena givisemino. Lihimaka nene ahulogimikuve. ³ Loko lokago, keza mon0 mogona apí ikimiaká a ve lugáa nenete kigikauka nene 0masi aviliginogo nolihe liki gelem0. ⁴ Liki gilikago Izesú nene Zuta veenalite lihima ahulolimiaká it0 veená kelémo zokoaká nene 0masimog0 lol0 oaká netá neve liki kigikagú gelem0 nenémini mogonatagana ángoake láa loko lo kimim0: Likigikauka nene nanamú gak0 golesa nigeleve. ⁵ Ve makolimo 0masi noamitim0 nene lihimaka gilatogimikuve loko vávani oko lamitim0za, ámináminoko kelémo zokoaká zámuzagi ve noamitim0 nene ve gepili mak0 geza otekoko mohona oko vozo loko litá oko lo ameminogo ive. ⁶ Lá onoim0za, okulumakutí lumu ve gihila nénisi nene imane mikasiuka lihima gilatoakalimini zámuzá it0 veená kelémo zokoakalimini zámuzá nenitoka nem0 nenémini mogonatagana ángi vevesatave loko loake ve gepilima nene láa loko lo amim0: Oteoko nene avilisaka geheko numukauka vozo. ⁷ Loko lokago oteake avilisala geheko numunaloka vim0. ⁸ Geheko vokago, veená mukí keza ángiake kehelele vizekago, 0masimini zámuzá nene mikasigú veená kigizakú molokam0 minokave liki giliake 0masi agepoka lam0.

*Izesú Mataioni sele lo amim0
(Mak 2:13-17; Luk 5:27-32)*

⁹ Gamena nene zupa Izesú nene vike takisi moni aleaká ve není nugulizá Mataiona takisi moni aleaká numúnegú minokugo ángoake láa loko lo nimim0: Geza nene némegetoko ano. Loko lo nemekago, ámegetoko vum0. ¹⁰ * Izesugegi není numukú iteko minunike nosáneta noko minuhá. Lá nouko, takisi aliaká a vegi netá golesa aliaká a ve lugáagi mukí keza iteke mini miní ameke minake nosáneta nam0. ¹¹ Ninago Palisaio mon0 ve nenete ángiake ametipo nana igo takisi aliaká ve sukagi netá golesa aliaká nia ve lugáagi mak0 minake nosáneta nonave, liki nene Izesuni izegipala zuha loká ilitam0. ¹² Li limikago nene, Izesú geleake láa loko lim0: Keza kivisemigo ha minamoláate lusa vemú sele lisá amave. Kivisi veenaliteg0 nene lusa vemú sele liaká niave. ¹³ * It0 lekeza nene mon0 gotolaú 0masimo li gak0 mak0 lá oko nemómámini mogonáa nene gili vevesiki gililo: Neza nene guguni gizi nimitave loko gelesá amuve. Likigika hizi kimiakakumú geleaká nouve. It0 kugupenimimú hee loko noune liki liaká nia veená kelémo otopá zitove loko lememum0 neve. Neza nene lihimáinigi veená kelémo otopá zitove loko lumumóma nena, loko lim0.

*Nosáneta moseakakumú loká itam0
(Mak 2:18-22; Luk 5:33-39)*

¹⁴ Gamena neneloka mon0 nagamí holokimiaká ve Zonini izegipala keza 0masimo nosáneta mosekuko lelikumú litihe liki liaká a ve nenete Izesutoka viki alegesá iake láa liki loká itam0: Leza nene Palisaio mon0 veenaliki monokumule loko nosáneta nene mosé mosé oaká noune. It0 gei izegipaka zuhá keza mosisá amave. Nanamú neve. ¹⁵ Liki likago nene, Izesú láa loko lo kimim0: Ve makolimo agivelagegi mak0 kogoliza viziki minata zupa nene agivelage aikumú miluma giliiki nosáneta mositahe. Lá oko nomive. Minoko gala vete ámina ve nene kigizakutí ipá iki apili hilikiko nene, keza miluma giliiki nosá

* 9:10: Luk 15:1-2

* 9:13: Mat 12:7; Hos 6:6

netá mosinigave. Ámináminiki izegipáne zuhate alika nenikumú miluma giliki mosí mosí itamóza, itína lá oko nomive.

¹⁶ Makó nene lavolavo gó nene litaha lokoko hukokiko nene, lavolavo gosohá nene nagamí ziki ali koma ama lavolavo nene hukoko ale litaha lavolavoló molo apizeko akotoakaláa nomive. Akotiiki nagamí zikiko nene gosohá lavolavo nenémo litaha lavolavolotí hikelekiko litaha gó nene hukoloko voko huko napa inogo ive. ¹⁷ Itó makó nene vain nagamí gituhú galakalá noigo nagamí getununi lithagú ligi milisá amave. Vain nagamí nenémo gituhú galakalá nooko giputooko litaha getununi zeko ategekiko vain nagamiki itó goni getununigi nene latila okative liki vain nagamí gosohá nene goni getununi gosohakú leke moloaká noune. Lá okuko getununigi vain nagamiki lamaná oko minanogo ive. Loko limó nene litaha monó sunímini amupiló nene ezáa gosohá monó molo apizeakaláa nomive loko nosánetá moseakakumú anoza gakó lo kimimó.

Gizapa vémíni moholagi Izesuni gotó ale gili venaki
(Mak 5:21-43; Luk 8:40-56)

¹⁸ Izesú nene gakó lo kemeko noigo nene, monó gizapa ve makolimo oko gupá ze amike láa loko limó: Není mohóne nene itína mota helekaze, nenémú nene voko gigizanitunú ale geleko nónohá zemikoko alémo otitane loko gelémoko vitove loko nouve. ¹⁹ Loko lo amekago, Izesú nene oteake izegipala zuha lezagi nene ámegetoko vunimó.

²⁰ Novuko nene, vená makó nene ikanimo apelelago númase gapo molova molova oko noigo kilisimasi 12-a ale ahulamó. ²¹ Eza nene agikatunú láa loko gilimó: Neza nene voko Izesuni agupeló ahe itó hanuva luhoaká gotó ale gelekinake zokatove. ²² Loko geleake Izesuni amegasaló oko noike luhoaká gó agataloka ale gelekago, Izesú nene viligoko láa loko limó: Mohó geza goha gena givisemino. Gele alévolé anitumo gelémo zokokave, loko nene lo amimó. Loko agata ateleko noligo litá oko zokamó.

²³ Lá okago, Izesú nene vike monó gizapa vemámini numukú iteko ánigamó nene, musiki ziaká a ve alegesá iki niago ive napa nenémo notoloni lemeko minamó. ²⁴ Nego, Izesú nene itike alémo otitove loko geleneike láa loko limó: Ahuliiki vilo. Imane mohó nene helemive. Hanuva avó akonoive. Loko lokago nene, keza nene giza gakó lihe liki giza itamó. ²⁵ Giza nitago nene, kimisele hetoka oake, mohóma ako mina holomaloka nene vimó. Vo alí loake agizató ale notigo mohó nene otimó. ²⁶ Otekago, nenémíni gakola nene mikasi nekisa vokisauka vo asú imó.

Izesú ve lositá kogómula ale goloutoketamó

²⁷ Lá okago, Izesú nene ámina numuni apá ahuloake novigo, kogómula lika ve lositá nene ámegetiki vasimó. Ámegetiki nivasike nene gamoga giki sele liki agulizaki ve napa Tevitini ágávolagamaka lelikumú milumavate geleletamane. ²⁸ Liki likasigo, voko numukú itekago nene, ámina ve lositá viki amatoka minikasigo nene, Izesú loká oketake láa loko limó: Lokogómula ale goloutato zámuzá nenitoka nemó nene mota gili alévolé inasihe. Loko loká okimikago keza láa liki lasimó: Guivahanitemaka, mota gele alévolé onousimole. ²⁹ Liki likasigo Izesú nene kogómulaló ale nogilike láa loko limó: Gili alévolé asitímini gihila nene utó ino. ³⁰ Loko lokago, kogómula goloutokago, Izesú nene láa loko lo kimimó: Gilinasihe. Lá oleketu netakumú viki vejená li pou lamilizo. ³¹ Loko lokago gakó nene gililiki vasimóza, ámina gakoláa li pou likasigo, mikasi nekisa vokisauka nene puu loko vo asú imó.

Izesú agepa lakolí i ve alémo aká imó

³² Itó nivasigo nene, ve makó holosi makolimo agepa ze lakolí okago mina ve nene zaló míliki alikamó. ³³ Alikí ikago, Izesú nene holosí apeleko amiseleko ale ahulamó. Alahulokago, litá oko gakó limó. Ámina netá nene vejená mukilite ánigiake sigaga lake Isilae mikasigú gozapá netá némináa makó utó igo ánigamuháma neve. ³⁴ * Liki lamóza, Palisaio monó ve keza Izesukumú nene holositini agulizaki ve nenémo alémo vatí igo holosi nene kepeleko kimiseleaká noive, liki lamó.

Izesú vejená mukikumú agika hizimó

³⁵ * Lá ikago Izesú nene numutó namató mohona ike apá koma napa nene ánigo asú imó. Ánigo asú ike, monó numuni minakú minakú nene monó lo keme keme oko minamó. Lá ike nene, Ómasímini gizapaló minoakalímini gakó lamaná nene lo utó moloko lo kemeko mohona imó. Itó haitopaitó netá gizale vejená itó haitopaitó netá kivisi vejená kelémo zokomo vimó. ³⁶ * Lá oake vejená mukí ánigamó nene muhelé ahelé ake gopa iki minamó.

* 9:34: Mat 10:25, 12:24; Mak 3:22; Luk 11:15
22:17; 2 Iki 18:16; Izi 34:5; Zak 10:2; Mak 6:34

* 9:35: Mat 4:23; Mak 1:39; Luk 4:44

* 9:36: Nam 27:17; 1 Kug

Sipsip iza gizapa vetini nomigo hanuva minamó nenéminiki minikago, Izesú ániagoake agika hízekago ³⁷ izegipala zuhama anozá gako makó láa loko lo limimó: Vegená imane latila ikataze. Mikú nosánetá mukí omolokamóza, hoza aleaká ve nene lagasó minokunize. ³⁸ * Nenemú lekeza mini amelahitoka likiko nene hozaló ve makó kimiselekiko viki hozavagú minumuni alitaze, loko limó.

10

Izesú ve 12-a kelémo etó imó
(Mak 3:13-19; Luk 6:12-16)

¹ Izesuni izegipala zuha 12-a alesá molo lemekago, okuko nene, kigikagú holosi minatamó kipiliki kimisilitave loko itó haitopaitó netá gizalinita vegená itó haitopaitó netá kivisití vegená kilími zokatave loko zámuzá nene limimó. ² Aposolo 12 leza lugulizate nene makó agulizá Saimon agulizá gosohá nene Pitá, itó agunala Etulú, itó Zepetaioni gipala Zemusi itó agunala Zoní, ³ itó Pilipó, itó Patolomaió, Itó Tomasi, itó Mataiona neza takisi moni aleaká u ve nene, itó Alapaioni gipala Zemusi itó Tataiá, ⁴ itó Saimoná eza Lomagatí gamani amisele ahulanogo i ve, itó Kaliotó apakutí Izesuni amimika li ve Zutá.

Izegipala zuha 12-a keza monó hozaló vamó
(Mak 6:7-13; Luk 9:1-6)

⁵ Ámina ve 12-a nene nolimisilike hoza gako láa loko lo limimó: Lekeza nene hetoka vetini mikasigú itó Samalia vegenalitiní apá makotoka ma vamilo. ⁶ Isilae vegená lugáagutí sipsip iza vi tolova amó keitokagó nene viki ániago. ⁷ * Niviki monó nene láa liki nene lilo: Ómasímini agulizaki ve napámini zámuzá nene omo lokovogisaloka okave. ⁸ Nenemú kivisimoláa kilími zokataze, itó helemoláa nene kilími otitaze, itó halamé gizalemoláa kilími gililitaze, itó kigikagú holosi golesa minatamó nene kipiliki kimisili ahulataze. Meinaváa nomimó hagitana lehizeleketumó nenazo, nenemú meinaváa nomitimó hanuva kilími lamaná ilo. Itó moni koma lagasoláagi ma gúiki alemilo, keké. ⁹⁻¹⁰ * Gapo vitatoka akiseaká gó aliki vamilo. Itó gó lositá nene luhamilo. Itó likigisaló suú nene luhamilo. Itó hánusaló nene alemiki hanuvagó vilo. Vegená makolititoka hoza alita ve nenete ámina vegenalitinigutí nosánetá aliki niki minatamó nene lamaná itive.

¹¹ Itó apá nenelokahe nenelokahe viki anitiiki nene ganá nene apá amelagini loká iki mogonáinimú gililo. Makolímimi mogona lamaná itimó nene, aí numukú itiki miniki nene ámina numukukó akilíki viki otiki vitaze. ¹² Itó numukú itiki nimiriki nene hulu nene lekelitoka minino liki li kimilo. ¹³ Numuni amelage likilími milikikoma, miniki ámina gako li kiminamó nenémini gihiláa utó itimóma neve. Itó minikiko mogonáini lamaná amikoma nene, hulu gakolímimi gihiláa nene goha atiginá oko lekelitoka anogo ive. ¹⁴ * Itó apá makokú likilími lamaná iki gakatini gelemikoma nene lekemegeza vizi kimiiki niviki nene vahé miliki likigisagutú mumusopa usagamá zi ahuliki vilo. ¹⁵ * Neza lamaná lo likimitoze, gililo. Gamena napaló nene Soto apakú itó Gomola apakú mina vegená keza lihima koma alinigave. Itó likilími lamaná amita vegená nene lihima napa itiki alinigave.

Gopoguni mililitata gamena utó inogo ive
(Mak 13:9-13; Luk 12:12-17)

¹⁶ * Gilinahe. Sipsip izagitana nene hela galatini holúikú geha ziki minatave loko nolikimisuluve. Nenemú lekelisi nene gili guni i miniki hulu iki minalo. ¹⁷ * Keza nene likigizató aliki gonitó likilímiki vinigave. Itó monó numúkú numúkú nene segi nogosani likipilinigaze. Ehe, lekeza gizapa alévolé iki minalo. ¹⁸ Itó není nugulizá lekelitoka minakumule liki kugulizaki vetini itó kiapegini kovogisaló likilímiki vikiko nene gako hoza alilikitanigave. Lá niko nene, lekeza keí kovogisaló itó hetoka vetini kovogisaló není monó li utó itive. ¹⁹ Není gakónemule liki gonitó likilímiki vita gamena nene, gako nanave loko litupe itó gako nana oko geleko litupe liki lakagata giliko gena amino. Gamena nene zupa nene gako litave loko Sikalahú nenémo likigikagú mololeketanogo ive. ²⁰ Lá okiko, gako likiko nene, lekelí gako loló aminogo ive. Ametipini Sikalahú nenémo likigikagú gako lo nomiliko linigave.

²¹ * Itó uvolaho makó nenémo agunala nene agizató alekoko goní omikiko nene agunalama apili hilinigave. Itó amelaho nene gipala nene agizató alekoko goní omikiko nene gipalama apili hilinigave. Itó izegipáini keza izóikini améikini nene goní ikimikiko izóikini

* 9:38: Luk 10:2 * 10:7: Luk 10:4-12 * 10:9-10: 1 Koli 9:14; 1 Tim 5:18 * 10:14: Apo 13:51 * 10:15: Mat 11:24; Apí 19:24-28 * 10:16: Luk 10:3 * 10:17: Luk 21:12-15 * 10:21: Luk 21:16

améikini kipili hilingave. ²²* Itó vegená mukilite není nugulizá lekelitoka minakumule liki mukahá likipilinigi niamóza, makó keza gamenaváini asú ititó monó ahulamiki alévolé iki miniliki vitamó nene Ómasímo kugutó vizinogo ive. ²³ Itó apá makotoka gopoguni mililikitikoma, golisi iiki apá makotoka nene vilo. Neza lamaná lo líkimitoze, gililo. Lekeza monó hozaló Isilae mikasiuka mukí apató vi asú amiko okulumakutí lumu ve gihila neza litá oko anitino uve.

²⁴* Sukulu izegipa nenémo tísala avilegeakaláa nomive. Gelekelé izegipa nenémo agulizaki veva nene avilegeakaláa nomive. ²⁵* Lá onoinazo, sukulu izegipa oko moloko itímó nenémo tísalámini lelegító onoikoma etanogo ive. Itó gelekelé izegipa oko moloko itímó nenémo agulizaki vevámini lelegító onoikoma etanogo ive. Ámináminoko ametipina nenikumú holositini gizapa ve Pelezepulole liki linamó nenazo, izegipa nugunamotamó neneta, lekelí lukugulizá aliki mumusopa ziliki víki minanigave.

Lehelele viziti ve lelepizimó

(Luk 12:2-7)

²⁶* Nenemú gopoguni mililikitata vegentakumú lekelegesá legemino. Hítonoiti netá matá nenémo minoko tolova aminogo ive. Minoko utó o asú ititó neve. Itó asuguná ne netá nenémo minoko utó o asú inogo ive. ²⁷ Neza nene límugusigú legesó oko lo lukumu gakó nene lekelisi miniki hanató li utó itaze. Itó lakagatauka musika loko lo lukumu gakó nene lekelisi miniki numuni hetotí gakó napagutí li utó iki litaze. ²⁸ Vegená makolite lukugupegó nene apili hilingave. Lekemeni apili hiliaká zámuzá keitoka nominazo, keikumú nene lekelegesá legemino. Itó lekemeni nemó itó lukugupe nemó ale nupa napa oko ló apakú apele heleaká zámuzagi ve Ómasímú nene lekelegesá liginó. ²⁹ Somohá nene ha netá neve. Itó golohá monitunú nene nama somohá lositá meina hizeakaláa nemóza, ametipo gelemikoma nama somohá hamokó nene nene mikasigú lememinogo ive. ³⁰ Lekelí gototini zopovatini gatoakaláa nene Ómasímo gele asú oko geleneive. ³¹ Lekeza nene nama somohá niamave. Lekelisi nene vegená nianazo, itó Ómasímo gizapa olikimiaká noinazo, nenemú lekelisi nene netá makokumú ma lekelegesá legemino.

Izesuni agulizá lo utó oaká gakó

(Luk 12:8-9)

³² Vegenalítini kovogisalo není nugulizá li utó iki nilími napa ita vegená nene neza ámina oko okulumakú aménehini avogisalo kelémo napa oko litomóza, ³³* vegenalítini kovogisalo nenikumú zivi hitivi ita vegená nene neza ámináminoko okulumakú aménehini avogisalo keikumú zevo hitovo inogo uve.

Nonagaki lovagí ale utó itove loko limi gakó

(Luk 12:51-53; 14:26-27)

³⁴ Nenikumú nene mikasiuka nonagá ale utó inogo limimóma neve liki lamilo. Neza nene nonagakigó nomive. Lovagí ale utó itove loko lumumóma neve. ³⁵* Neza lumumómámini gihila nene amelahiko gipalago lovaleta lavaleta iki kogoka hotó itímó neve. Itó izolahiko moholago lovaleta lavaleta iki kogoka hotó itímó neve. Itó anohúvolahiko avolahiko lovaleta iki kogoka hotopotó itímó neve. ³⁶ Itó lekelí numutikú lekelí zuhate gala velini líl inigave. ³⁷ Itó lekeza izotikini ametikiniloka likigika kimiiki itó nenitoka koma nimitamó nene, není mututoni minata avotigila iki niamave. Itó izegipatiniloka likigika kimiiki itó nenitoka koma nimitamó nene, není mututoni minata avotigila iki niamave. ³⁸* Itó zohota zaló kipili hilingi miluma netá ali gihikitatakumú gili ahulíiki nigizaka hiziki némegetiki amitamó nene není mututoni minaminigave. ³⁹* Itó makó keza nene kigika kemeníini ale gikitiiki ali minatamó nene, miniki gopa itamó neve. Makó keza nenikumule liki kigika kemei vinasatamó nene alévolé kemetameni alinigave.

Meinaváa alesá gakó

(Mak 9:41)

⁴⁰* Vegená makó keza lekelí nasahilí ilikitatamó nene není nasahilí inimiaká niamó gelekave. Itó nasahilí initatamó nene nimisili vema nasahilí imiaká niamó gelekave. ⁴¹ Vegená makó keza monó lole ale ve noikumule liki monó lole ale ve makó nasahilí itatamómámini meinaváa alinigave. Itó vegená makó nenete monolagi ve noikumule liki

* **10:22:** Mat 24:9; Luk 21:17; Mat 24:13 * **10:24:** Luk 6:40; Zon 13:16, 15:20 * **10:25:** Mat 9:34, 12:24; Mak 3:22; Luk 11:15 * **10:26:** Mak 4:22; Luk 8:17 * **10:33:** 2 Tim 2:12 * **10:35:** Mik 7:6 * **10:38:** Mat 16:24; Mak 8:34; Luk 9:23 * **10:39:** Mat 16:25; Mak 8:35; Luk 9:24, 17:33; Zon 12:25 * **10:40:** Luk 10:16; Zon 13:20; Mak 9:37; Luk 9:48

monolagi ve makó alími lamaná iki nasahilí itatamó nene, nenémini meinaváa alinígave. ⁴² Neza lamaná lo likimitoze, gililo. Lekeza nene není vejenáne zuhagutí makó limiki minatamoki keikutí makó nene není gipa noikumule liki gosohá nagamí ihiki amitamó nene, haha aminogivo ive. Meinaváa alitamó neve.

11

*Zoní ve lositá kimiselelago Izesutoka vasimó
(Luk 7:18-33)*

¹ Izesú nene izegipala zuha 12-a nene ámina gakó lo leme asú oake, leza voko minuhá numutó numutó monó lo kemeko apí okiminogivo vimó. ² Lá okago, monó nagamí holokimiaká ve Zoní nene nagá numukú noike netá golesagutí gologí olimiaká ve Kilistó ave loko loaká nouni vémo hoza alimó nenémini gakoláa geleake, izegipala zuha losi nene kimiselelago Izesú noitoka vasike láa liki loká itasimó. ³ Utó itive liki monó gotolaú luhuva gizina vema nene géisi noape, itó alika makó utó itikumú ageva itunimó nehe, liki loká itasimó. ⁴ Loká itasigo, Izesú nene ámina vema noive loko Zoní gilitive loko láa loko lo kimimó: Lekeza nene atiginá iki viki nene loló nou netá matá imane nánigasimó nenémini gakoláa aveté iki Zonini li amilizo. ⁵ * Kogómula lilikupá molamó nene kogómula ale hanatokimiaká noive. Itó kigisalo alimó nene kígisa ale lamaná okimiaká noive. Itó halamé gizalemó nene kelémo gileleaká noive. Itó kagata molamó nene kagata ale koló okago gakó giliaká noive. Lepa gonosi nene kelémo oteaká noive. Itó limiki minamó ámemena nenete gakó lamaná nene giliaká niave. ⁶ Lá onoinazo, není mogonamú kagata losi pasi gelemitamó nenete kogoliza viziki minanígave.

⁷ Loko lokago, Zonini izegipala zuhama atiginá iki nivasigo, Izesú eza vejenala sii sii liki minamoláa nene Zonikumú láa loko lo kimimó: Lekeza nene mikasi gomopalaló nanámini o mína ve ániganigi vamóma neve. Zoní nene hepélímo gihinahisi ale volaloka imaloka imómámini noigo ániganigi vamóma nehe. ⁸ Itó eza gola gonanalivagi luhouake noigo ániganigi vamóma nehe. Óe. Gó luhuvagi luhiaká nia ve nene kugulizaki vetini numukú akiki otiki iaká niave. ⁹ Zoní nene Ómasímíni agepagutí gakó loaká ve noigo ániganigi vamó nehe, olo. Neza lo likimitoze, gililo. Lekeza nene ánigi mína vema nene Ómasímíni agepagutí gakó loaká ve lugáagitana minamimó neve. Eza haitolímíni okave. ¹⁰ * Monó gotolaú Ómasímíni li gakó makó láa liki gizinamóma neve: Gililo. Neza nene gakó lole ale ve makó amiselekugo áisi voko ale goí oko kigikagú hoza aleko gapo velegetanogivo ive.

Ámina gakó nene Zonitoka voko alimó neve. ¹¹ Itó neza lamaná lo likimitoze, gililo. Mikasiuka utó ina vejenakutí makolímíno monó nagamí holokimiaká ve Zonini nene ma avilegesá amimóza, Ómasímíni gizapaló limiki niamolategi gopa Zonini aviligítigi iki niave. ¹² * Zoní nene monó nagamí holokimiaká i gamenaloú minoloko iteko okulumalímíni gapo nene utó o lamaná oko utó noigo, vejená mukilite amuza miliki lovasava iki okulumalímíni lapanala ali lá iaká niave. ¹³ Zoní velesá utó amigo Ómasímíni agepagutí gakó liaká a vegi Moseki keza mukitoka alika utó iti netakumú epoapoga liki Ómasímíni agulizaki ve napa alemó utó iti gakó liliki vamó. ¹⁴ * Itó gilitune liki nilikoma makó lo likimitoze, gililo: Ve makó Ómasímíni agepagutí gakó loaká ve Ilaizakitana ative liki lina ve nene Zoní noave. ¹⁵ Lá onoinazo, lekeza lakagatagi minatamó neneta ámina gakó lonoumó nene gili vevesiki gililo.

¹⁶ Oko moloko oaká nou netá ánigina vejená nene nanetató lo moloko nolugo vo guni itive. Keza gili goselé iaká nia izegipagitana niave. Izegipa keza alegesá apató niake kigivéitini nene sele liki láa liki li kimiaká niave: ¹⁷ Leza nama luható nene nanamú lisá amave. Itó helegaloka ive nama uható nene nanamú ive nama isá amave, liki liaká niave. ¹⁸ Ámináminoko Zoní nene hozava apí oake nene nosáneta lamaná namike vain nagamí namike etó oko minamó. Etó oko noigo ánigiake holosi makolímíno agika ale gopa okago noihe, liki nene lamó. ¹⁹ Itó helegaloka neza okulumakutí lumu ve gihila okuke iza goula zahí nagamí nosáneta lamaná nonugo, ánigiake láa liki nilave: Ve imane nene ánigalo. Áisi nene gasova ve itó nagamitó ve noihe takisi aleaká vegi itó netá golesa aliaká nia ve lugáatini zogonini noive, liki liaká niave. Lá onoiómóza, Ómasímíni gele guni oko netá matá aleaká noimó nenémini gihiláa utó okago, vevesokogó minoaká noimó nenémini mogonáa nene utó oaká noive, loko limó.

* 11:5: Isa 35:5-6, 61:1 * 11:10: Mal 3:1 * 11:12: Luk 16:16 * 11:14: Mal 4:5; Mat 17:10-13; Mak 9:11-13

Kigika ali viligama vegealite miluma sipisi gilinigave.

(Luk 10:13-15)

²⁰ Izesú apá lugáaloka nene hoza aleloko vike alévolé suni haitolímuni mukí ale utó imó. Ale utó okago ángamóza, ángi hagele gele iake kigika ali viligamago, gahá kemeko láa loko nene limó: ²¹ * Agae, Kolazina amelagita. Agae, Petesaita amelagita. Lekelitoka nene golvivagi netá utó inogo ive. Golesa netá aliki minakumú nene Tulo apá itó Sitona apá gozapá tui loko vimóza, alévolé suni lekelitoka alumó nene ámina apá lositataka utó imó nelina, keza nene gozapá miluma giliki kigika ali viligamó nenémini mogonáa ali utó iki ginégane línaha luhiake lánéhá nene kugupeló hiliki hanuva minaline. ²² Nenemú lo likimitoze, gililo. Tulo apató itó Sitona apató vegeá keza gamena napaló nene lihima koma alitamóza, lekelisi nene lihima napa alinigave. ²³ * Itó Kapanao amelagita lekeza lukugulizá nene okulumakú ititive liki ali otiaká niahe. Nenéminoko nomive. Lokú lekehelú inogo ive. Alévolé suni lekelitoka ale utó umó nene Soto apakú utó imó nelina, kigika ali viligikago ámina apá nene tui loko vamiline. Imane gamenaló nene hanuva minalinamó neve. ²⁴ * Nenemú lo likimitoze, gililo. Lihima kimiti gamenaló nene Soto apatoka nene lihima lagasó keitoka utó inogo ive. Itó lekelí nene ale nupa okoko genavaló geheleketanogo ive, loko limó.

Nenitoka atamó nene lekelémo geha zinogo uve

(Luk 10:21-22)

²⁵ Gamena nene zupa Izesú gakó láa loko nene limó: Aménega, geza okulumakú mikasigi keí Guivahani géisi nene noane. Sukulu lunike gele vevesokune liki liaká nia vegeá keza monoka giliiki gili guni ikatave loko ale halá geko molokimikanike nene sukulu lamake izegipa namunigítana iki mina vegealitini kigikagú molokimiaká noane. Lá oaká noanikumú gegepoka noluve. ²⁶ Aménega, nenéminoko utó oloko vitive loko gelenanimó nene etoaká noive. ²⁷ * Loko loake, miní ameko láa loko limó: Améneho netá matá mukí nene nigizakú molo asú okave. Lá onoimóza, Ómasímuni gipalámina mogona gili vevesina vegeá ma niamave. Améneho hamokó geleneive. Itó améhini mogona nene ve makolite gili vevesamave. Gipala noutímuna itó nezáne lo utó oko lo kemekugo ángi hehe litave loko gilito vegeá niamoláa lezategó améhini mogona gelenoune.

²⁸ Goselekaselé iki muhelé ahelé iki nia vegeá itó haitopaitó netalímo gena likiviseaká noi vegealita mukitoka nenitoka imi asú iki alo. Lekelémo geha zinogo uve. ²⁹ * Neza nene zou loko nouve. Itó nigika lamanaki nouve. Ikiko nene niginaloka hévetú nemó nene mololeketatoze. Mololikimikugo nene nenitokatí gakó lamaná gilitaze. Itó lekemenitini nene avasú vizeko mino lamaná oko minatize. ³⁰ Není niginaloka hévetú nemó nene huluváa lamaná neve. Itó genavagi nomive, loko limó.

12

Holisigú Izesuni vegealita zuhate kilé hisiki nimi vamó

(Mak 2:23-28; Luk 6:1-5)

¹ * Gamena nene zupa holisi makokú Izesú ale goí igo izegipala zuha leza kilé mikú mohona oko vunimó. Novunike nene, izegipala leza gaúna helekunike kilé akutokunike gihiláa hiseko nomo novuko nene, ² Palisaio monó ve keza ángiake gili golesa ake Izesuni nene láa liki li amemó: Ánigozo. Izegipakamate netá nalemó nenémo nene golesa okave. Lelí holisigú hoza nalemó nene lá amoakalímuni ikave. ³ * Liki likago, Ómasímo vegealita zuhate netakumú vitagá niko ezáa lo huka gakó nene hanuva molo gaheva itimó neve liki gilitave loko láa loko lo kimimó: Gozapá agulizaki ve napatipo Tevití nene vegealita zuhagi nosánetakumú gaúna hiliake netá makó alemó nenémini gakola monó gotolau luhuva gizikago lekeza gatinamóza, mogonáa gilísá amahe. ⁴ * Tevití eza nene Ómasímuni monó numukú itekago guguni gizoaká ve napámo Ómasímuni avogisaló mila peleti nene amekago namóma neve. Itó vegealita kezagi namóma neve. Itó ámina peleti nene hanuva vegealite namitave liki guguni giziaká vetegó natave liki monó gotolau lí hukinamóma neve. ⁵ * Itó Mosé nene guguni giziaká ve keza holisigú nene monó zagusaveú hoza aliki niake nene holisimú lí hukina gakó nene avutá apiliaká niamóza, áminámo lihima keitoka minosá amive loko luhuva gizonaimóza, nene gatiki gilísá amahe. ⁶ Nénisi nene lo likimitoze, gililo. Likigilikagú noutímuna nene monó zagusave avilegeko nene nouve. ⁷ * Itó monó

* **11:21:** Isa 23:1-18; Izi 26:1-28:26; Zoe 3:4-8; Emo 1:9-10; Zak 9:2-4 * **11:23:** Isa 14:13-15; Apí 19:24-28 * **11:24:** Mat 10:15; Luk 10:12 * **11:27:** Zon 3:35, Zon 1:18, 10:15 * **11:29:** Zel 6:16 * **12:1:** Gapo 23:25 * **12:3:** 1 Sam 21:1-6 * **12:4:** Liv 24:9 * **12:5:** Nam 28:9-10 * **12:7:** Hos 6:6; Mat 9:13

gotolaú Ómasímo li gakó makó lá oko neve: Neza nene guguni gizi nimitave loko gelesá amuve. Likigika hizi kimiakakumú geleaká nouve. Lekeza nene ámina gakolímíni mogona gelelina nene, lekeza lihimaváini nomíti vejenalítini lihimáinimú gakó hoza alikitamalíne. ⁸ Okulumakutí lumu ve gihíla neza nene holísi ameláhina nounazo, ízegípáne zuhate holísígú lílí ita netá nene není netá neve.

Agizani nakeseta ve
(Mak 3:1-6; Luk 6:6-11)

⁹ Láa loake, nenelotí oteake víke monó numuni makokú nene ítimó. ¹⁰ Ítimó nene ve makó agizani lugaloka nakeseta ve noigo, ve lugáa keza Izesuni loká itake lelí holísígú nene vejená kelémo zokoakaláa nene nehe nomíve, líki nene lamóza, hanuva nene Izesuni imane nana gakotó ale moloko lokínake goní otatune líki, gimivagú mílíki nene lamó. ¹¹ * Lá íki gimivagú mílíki, Izesú nene kígikagú emane ángo vevesoko ángoake láa loko límó: Lelékíutí makó nenémo nene sípsíp iza akaleváa makó nene holísígú nene gale hángú velehé límítímó nene, holísímagule lokoko ahulókíko áminagú mínatímó nehe. Óve, ale gelehéá oko ale veletoka alahulatímó neve. ¹² Lá ítimóza, sípsíp nene ha netá neve. Itó vejená lélísi nene netá gihíláa noune. Nenemú holísígú nene vejená kelémo lamaná oakaláa nene neve. ¹³ Loko loake ámina ve nene gígizani lutozo loko lokago, agizani lugaloka nene lutokago, agizani magáa mínamómámini oko goha lamaná ímó. ¹⁴ Lamaná okago nene, Palisaio monó vejená keza ámina netá ángíamó. Ángíake límíki víake Izesuni nene nana inake apele hilitune líki lova gízamó.

Ómasímo gelekelé ízegípála Izesuni alémo etó ímó

¹⁵ Lá okago, Izesú ámina gakó geleake nene, numuni apá ahuloake apá makotoka vímó. Lá oko novígo mukí vejená ámegetíkí vamó. Lá íkago, kívisí vejená mukí nene kelémo zokoake nene, ¹⁶ aí mogonáa nene avetó íki lílí alí amítave loko lo hukoko loketamó. ¹⁷ Láa loko lokímíkago, Ómasímíni agepagutí gakó loaká ve Isaiá anoza gakó makó láa loko luhuva gízamó nene gihíla zímó:

¹⁸ * Ómasímo láa loko nolíve: Gelekelé ízegípáne alémo etó umó nene ángíalo. Nígíka amenouke aikumú nene gele lamaná oaká nouve. Itó neza Sikalahúne nene aí amupíló molokugo alémo vávani okíko, hetoka ve numutó namató vejená nene líhimáinimú gona moloketatí gakó nene lo utó oko lo kímítímó neve. ¹⁹ Eza lovaleta oko gopaga lamoko gapoló gakó napagutí laminogó íve. ²⁰ Vegená ámenenáa límíki mínamó nene ma kelémo golesa o asú aminogó íve. Límíki mína vejená nenete gelemó ló guluma koma nenéminoko nemó nene ma ze líhamínogó íve. Itó lá okoko hozaváa amúza moloko aleloko vokó míníko nene, ale kegesoaká nenémo netá mukí kívílegeko mínanogó íve. ²¹ Lá okíko, hetoka ve numutó namató vejenalíte kígíka nene aí agulízató alí mílíki aikumú kagata losí gelemíkí ageva íki mínánígave, loko lo hukoko límó.

Izesuko Pelezepuloko
(Mak 3:20-30; Luk 11:14-23)

²² Nene gamenaló ve makó nene holísi makolímó agíka ale gopa oko agómula líka ve itó agepa híze lakolí okago mína ve nene Izesú noítoka alímíki vamó. Alímíki víkago, Izesú nene alémo lamaná okago, ve eza agómula goloutoake nene, gakó límó. ²³ Gakó lokago nene, vejená mukí nenete ángíake sígaga lítake agulízakí ve Tevítini ágávolaho atíve líki la ve netíhe. ²⁴ * Líki líkago nene, Palisaio monó vete ámina gakó gíliake láa líki lámó: Pelezepuló eza holosítini agulízakí ve loló oake alémo vatí ígogó holosí nene kepeleko kímíseleaká noíve. ²⁵ Líki líkago, Izesú nene kígikagú gakó hanuva geleake láa loko lo kímímó: Míkasi makotoka vejená keza hízi hóu lííki lova gopa hízítámó nene, keí míkasi gámé mínatímó neve. Itó apá makotoka itó numuni makokú vejená keza hízi hóu lííki eza akohú apílíko eza akohú apílíko ítamó nene hutílí íki vínigave. ²⁶ Itó Satá ezáa ízegípála zuha kepeleko kímíseleneítímó nene, aí avogísáló nene ítína mota hízi hóu líake alévolé íki mínamítámó neve. ²⁷ Lekeza neníkumú Pelezepuloní zámuzatunú holosí nene kepeleko kímíseleaká noíve líki líaká níave. Láa líkíma nene lekelítini ízegípatini zuha nenete nene Satá ámina oko kelémo vatí ígo holosí kípílíkí kímísíliaká níahé. Óe, lá oko nomíve. Nenemú kéisi nene soza gakotínímíni mogona hanuva alí utó ítamó neve. ²⁸ Lá onóimóza, nénsíni nene Ómasímíni Sikalahulímó nelémo vatí ígo holosí nene kepeleko kímíseleaká nounazo, Ómasímo agulízakí ve napa ale utó oleketamó nenémíni zámúza lokovogísaloka mota omo ávatíha onóimó nenémíni mogona mota utó okáve. ²⁹ Ve makolímó gasovagí ve amúza ve

* 12:11: Luk 14:5 * 12:18: Isa 42:1-4 * 12:24: Mat 9:34, 10:25

makolímíni numukú nene litá oko iteko henokanona nene ma ipá oko alitihe. Nenémínoko nomíve. Gasovagi ve amuzá vema nene goí oko agisa agizat0 nagá aleakaláa nene neve. Lá okogó aí henoni ipá inogo ive. Loko limó nene Satani zámuza avilegeake holosiva kepeleko kimiseleaká noutve loko lo moloko limó neve.

³⁰* Loko loake makó láa loko limó: Makó keza nene nenikutí ve minamitamó nene není gala ve minanigave. Ve makó keza nilími vatí ikí vevená kilími nupa amitamó nenete kilími hutilí iaká niamó geleneive. ³¹ Nenemú lo likimitoze, gililo. Ómasímo golesa netá haitopait0 itó alivi letivi iaká haitopaitolímíni nenémíni lihimaava ahuloaká gapo nemóza, ve makolím0 Sikalahukumú alev0 letovo oko litimó nene Ómasímo ámina lihima ahulotati gapo nomíve. ³²* Makó keza okulumakutí lumu ve gihila není imane alivi letivi itamó nene Ómasímo ámina lihima nene hanuva ahulokimiakaláa nemóza, Sikalahukumú alivi letivi iki lita lihima nene mikasigú nemó itó okulumakú nemó nene ma asú amitit0 neve.

Oko moloko nounitím0 mogonate ale utó oaká noive
(Luk 6:43-45)

³³* Lekeza nene za gihila lamaná makó ániigiiki za lamanakutí neve liki litaze. Itó za gihila golesa makó ániigiiki nene ámina iki za golesagutí neve liki litaze. Za gihila neném0 zámini mogona ale utó oaká noive. ³⁴* Gosihalímíni agapilamó zuha lekelisi nene niave. Mogonatini golesagi nianazo, gakó lamaná ma lisá amave. Ligikagú vaí o minakutí legepatunú loaká noune. ³⁵ Vegená lamanalitini kigikagú nene netá lamanakó ititimó nenazo, kigikagutí nene vatí sunigó utó itimó neve. Itó vegená golesatini kigikagú nene golesa netakó minatimó nenazo, kigikagutí ámináminoko golesa sunigó ititimó neve. ³⁶ Nenemú nénisi lo likimitoze, gililo. Lihima aleaká gamenaló nene vegená mukilite ha gakó haitopaitolímíni gopa linakumú nene gakó hozava aliiki asenini hizikí lúitamó neve. ³⁷ Gakó lanimó neném0 oko moloko animómámíni mogonaka lo utó molokiko, lamaná itimó nene, lihimaka nomitimó minatanimó neve. Itó golesa itimó nene, lihimaka ha minatimó neve.

Vegená golesate alévolé suni ániगतune liki lamó
(Mak 8:11-12; Luk 11:29-32)

³⁸* Láa loko lo kemekago, monó mogona apí ikimiaká a ve itó Palisaio monó ve lugáa keza gakó láa liki li amemó: Tisatemaka, geza nene alévolé suni ma ale utó okako nene ániगतune. ³⁹* Liki likago, Izesú láa loko lo kimimó: Oko moloko oaká nou netá ániगतaká nia vegená lekelisi nene vegená golesave itó monó gili ahuliaká vegená niave. Lekelisi alévolé suni ale utó okugo ániगतune liki iaká niamóza, lekelisi nene haitó suni makó ale utó ugo ániगaminigave. Ómasímíni agepagutí gakó loaká ve Zonatoka emane utó i suni makó nenitoka utó okiko nenegó ániगतave. ⁴⁰* Zoná nene gamena losive makole nene lagaha sipisímíni agatupagú minake goha otimóma neve. Áminagó oko okulumakutí lumu ve gihila nénisi nene gamena losive makole mikasigú mininake goha otinogo uve. ⁴¹* Itó Zoná nene Niníve vegená monó lo nokimigo kigika ali viligamóma neve. Itó nénisi ató imane nene Zonakitana minamoko Zonani avilegeko noumóza, lekeza není gakó gili ahuliake likigika ali viligamave. Nenemú Ómasímo gona mololeketati gamena nene Niníve apá amelage nene otiki miniki oko moloko nou netá ániगतaká nia vegenalitini lihímáminimú lotuva liginigave. Lá ikiko lihima alitamó neve. ⁴²* Itó agulizaki vená Sipá mikasi emegaló minamó neném0 Ómasímo gona mololeketati gamena nene oteko oko moloko nou netá ániगतaká nia vegenalitini mogonatini nene lotuva legekiko lihima nene alitamó neve. Ámina vená neném0 Salomó gele vevesoko gilimómámíni gihiláa gilinogo mikasi hotokatí gapo hána hána amó. Itó nénisi ató imane noumó nene Salomoni avilegeko noumóza, lekeza není gakó gelemave.

Holosi golesa atiginá i gakó
(Luk 11:24-26)

⁴³ Holosi makó nene ve makolímíni agikagutí iteoko avasú vizeko minati numunimú vitagá inogo vegená minama mikasiló voko mohona itive. Vitagá oloko novoko, ⁴⁴ neza numúne nene ahulokuke umómá nenazo, goí oko minu numutoka goha atiginá oko vinake minatoze lokoko nene, atiginá oko, oko ániगतimó nene, ámina numuni lolopa gitiki ali guni inakú nene numuni gizapa ve nomiko ániगतimó nene, ⁴⁵ goha nene ahulokoko voko holosi agivelagini 7-a nene kugupelotí sisipa anuva ovimó nene kelémoko oko áminagú nene limiki

* 12:30: Mak 9:40 * 12:32: Luk 12:10 * 12:33: Mat 7:20 * 12:34: Mat 3:7, 23:33; Luk 3:7; Mat 15:18

* 12:38: Mat 16:1; Luk 11:16 * 12:39: Mat 16:4 * 12:40: Zna 1:17 * 12:41: Zna 3:5 * 12:42: 1 Kug

10:1-10; 2 Iki 9:1-12

miniki aliki inigave. Lá ikiko, ámina ve nene goí oko golesa oko minamóza, íi, alika nene golesa o lamaná oko golesa inogo ive. Lá onoize, ve golesa áimane lekelitoka utó itikumú noluze, ehe.

Izesuni izolahiki agunamotamolagi
(Mak 3:31-35; Luk 8:19-21)

⁴⁶ Izesú gako lo kemeko noigo, amegesaloka nene izolage izegipa agunamotamola nene gako lo amitune liki hetoka gizapa iki niago, ⁴⁷ ve makolimo Izesuni nene gelenape, izokage izegipa gugunamotamokama gako lo gimitune liki nene hetoka iki gizapa niave. ⁴⁸ Loko lokago, Izesú nene láa loko lo amimó: Izónege nugunamotamónemú lape. ⁴⁹ Loko loake, izegipa apala nouni liginaloka nene agizani hisú oko láa loko limó: Ánigalo. Izónege izegipa nugunamotamóne imane niave. ⁵⁰ Okulumakú améneho li gako ámegetiaká niamó kéisi nene izónege izegipa nugunamotamóne niave, loko limó.

13

Zuha netá atilí oaká vemú anoza gako
(Mak 4:1-9; Luk 8:4-8)

¹ Izesú nene ámina gamenaló numuni minakutí lemeake nonohuló agataló lemeko noi, ² * gako apí okininogo mitó minokago, ve vená mukí nene iki sii sii liki getatoka alegesá ikago, ángoake veđená giki akumule loko nagamikú lape makokú nene itimó. Iteko minake nene, ³ anoza gako haitopaitolimini lo kimimó. Lá noi, makó láa loko limó: Gilinahe. Zuha netá atilí oaká ve makó nenémo netá gihila nene atilí inogo vimó, ⁴ Vike mikuka atilí omo novigo nene, makó nene gapogú alemó zekago gaha namate ake ni asú amó. ⁵ Itó lugáa nene gehani amupiló mikasi lagasó netó lemekago, mikasi hána nomimó nenazo, goloakaláa golokago litá oko itiha, ⁶ ho nolake avagugu vizekago, luhusa hána nomigo osagava vizimó. ⁷ Itó gihila lugáa nene lilihámini luhusa nene mikasigú ha netó alemó zeake, goloko itekaha, lilihámo zetamó. ⁸ Itó lugáa nene mikasi lamanakú lemeko minake goloko iteake gihila lamaná zimó. Zava makototí nene gihila 100 nene zimó. Zava makototí nene gihila 60 zimó. Zava makototí nene gihila 30 zimó. ⁹ Lekeza lakagatagi minatamó neneta gako imane gili vevesiki gililo.

Anoza gakokumú lo kimimómámini mogona
(Mak 4:10-12; Luk 8:9-10)

¹⁰ Gako láa loko lo lemekago, izegipala zuha leza amatoka voko minunike geza nene anoza gako nenémináa nanamú lo nokemene. ¹¹ Loko lokoko nene, eza láa loko lo limimó: Okulumalímmini gasovaló minoakalímmini asuguná gako nene lekeza gilitave loko nene lonoimóza, lugáa keza gelemítave loko nene neve. ¹² * Makó keza monó nene vatí iki gizapa iki ali minata veđená nene áminaló nene miní ameko kemekiko minumuni lamaná utó o kiminogo ive. Itó makó keza monó nene lamaná iki gizapa amita veđená nene hanuvagó ale minune liki litamóza ipá oko alekiko nene hanuva minanigave. ¹³ Keza nene ángatune liki ángi-likí nivamóza, ángi hehe lisá amave. Itó gilitune liki gilimi vaha vaha mogonáa nene gili vevesisá amave. Nenemú anoza gako imane lo nokumuve. ¹⁴ * Lá okago Ómasímmini agepagutí gako loaká ve Isaiá alika utó iti netakumú lo ami gako nenémo keitoka voko alekave. Ómasímo lí gako nene láa loko luhuva gizamóma neve:

Lakagatatanú giliakaláa nene hanuva gilitamóza, gili vevesaminigave. Itó lokogómulatunú ángiakaláa nene hanuva ángatamóza, ma ángi vevesaminigave. ¹⁵ Veđená mulusi imane niamó kígika nene híze lí oake kígika kii lo vimó niave. Itó kogómula nene liko vimó niave, itó kagata molamó niave. Nenemú netá matá hanuva ángoakaláa hanuva nánigave. Itó kagatatanú geleakaláa hanuva nigeleve. Kígikatunú nene gili lamaná iki nene ma gilisá amave. Lá iiki kígika ali viligisá amanaze, neza nana oko kelémo lamaná itomó neve.

¹⁶ * Itó Ómasímo nónohá zelikimikago, lekelisi nene lokogómulatunú ángi vevesiake lakagatatanú gili lamaná iaká niave. ¹⁷ Neza lamaná lo likimítoze, gililo. Gopezá Ómasímmini agepagutí gako liaká ve mukí kezagi itó monó gele ve mukí kezagi nene oko moloko nou netá lekeza ángiaká nia netáma ángatune liki lamóza, ángamamóma neve. Itó lekeza nene nepegagutí gako giliaká nia gako gilitune liki lamóza, gelemamóma neve.

Zuha netakumú anoza gakolímmini mogonáa
(Mak 4:13-20; Luk 8:11-15)

* 13:2: Luk 5:1-3

* 13:12: Mat 25:29; Mak 4:25; Luk 8:18, 19:26

* 13:14: Isa 6:9-10

* 13:16: Luk 10:23-24

¹⁸ Netá gihila atilí oakalímimi mogona nene lo likimitoze, gililo. ¹⁹ Ómasímimi gasovaló minoakalímimi gakó giliki gili vevesama vegenalite monó nene gigikagú milikago minamó nene golesa netá amelaho Satá nene netá gihilama aleko golisi vokiko netá gihila gapoló alemó zimó nenéminiki minanigave. ²⁰ Itó gehani amupiló lemeko minamó nenéminiki minata vejená nene monó nigiliki laga kivisekago giliaká niamóza, ²¹ gigikagú emane nene luhusa ale gilitamigo, gamena alínipa aliniko, monó gako gilinakumule liki gopogu galatakalatá milikitata gamenaló nene litá iki ahulanigave. ²² Itó lilihagú limimó nenéminiki minata vejená nene monó giliakaláa hanuva gilitamóza, imane mikasiuka gena kepeleaká noi netá itó monimú lagaváa giliaká nia netá nenémo monó zemikago, keitoka gihiláa makó utó osá amive. ²³ Itó mikasi lamanakú limimó nenéminiki minatamoláa monó giliiki gili vevesiki ali minata vejenatoka nene gihila zeaká noive. Makolititoka napa otigí zeaká noive, makolititoka mukí zeaká noive, makolititoka vauva aleko zeaká noive.

Lilíhamú anoza gakó

²⁴ Láa loko loake, anoza gakó makó láa loko lo limimó: Okulumalímimi avogisaló iteaká mognamú nene ve makolímimo nene minagú laisi gihiláa atilí imó neneló ale moloko litoze. ²⁵ Gihiláa atilí oake vokago nene, makó holugú nene vejená kovó aki asú iki akinago, gala veva nenémo aniteake laisi vogalaló minoake nene, liliha nene atilí oake vimó. ²⁶ Lá okago laisi goloko iteakaláa goloko iteake, gihiláa nene nozigo, liliha makó nene ámináminoko goloko itimó. ²⁷ Lá okago, izegipala zuha nenete iki láa liki li amemó: Gugulizakí velemaka, geza nene mikagú nene netá lamanaláa makó atilí animómá nemóza, liliha mukí nene nana oko itive. ²⁸ Liki likago, eza nene gala ve makolímimo onoitivo loko lokago, keza voko lilihama asutatupe liki likago nene, ²⁹ eza láa loko nene limó: Óe, liliha nene asuti ahulatamóza, laisigi nene asutikatave. ³⁰ Nenemú nene laisigi lilihagi hanuva minatize. Neiko nene, laisi ale moloaká gamenaló nene minumuni aliaká ve láa loko loketatove: Lekeza niviki liliha nene apí iki gizaká iiki asapú ikiko lokú gizatunize. Itó laisima nene haitó gizaká iiki ale moloaká numúnegú milataze, loko limó.

Masteti gihilamú anoza gakó

(Mak 4:30-32; Luk 13:18-19)

³¹ Izesú nene anoza gakó makó láa loko lo limimó: Okulumalímimi avogisaló vi hilata vejená keza nene masteti gihila nenéminiki niave. ³² Ámina netá nene zuha netá lugágutí koma koma nemóza, ve makó nenémo ámina netá nene minagú atilí okago goloko iteko napa oake zamú mukí kivilegeko zagitana loló onoive. Lá okago, nama nenete anitiake nenéminiki izanaló nene numuni giaká niave.

Peleti lulu vizeaká netakumú anoza gakó

(Luk 13:20-21)

³³ Anoza gakó makó láa loko lo limimó: Okulumalímimi lapanató vo holoakaláa nene peleti lulu vizeaká netá nenéminoko neve. Vená makolímimo ámina netá nene polisigi ali gopa okago hutilí okago peleti nene lulu vize napa oaká noive.

Izesú anoza gacolímimi mogona lo kimimó

(Mak 4:33-34)

³⁴ Vegená vaí iki alegesá ikago, Izesú eza gakó mukí imane lo kimimó nene anoza gajokutí nene lo kimimó. Gakó lo kiminogo noike anoza gajokutikó lo kemeaká imó. ³⁵ * Lá noigo, Ómasímimi agepagutí gakó loaká ve makó nenémo gakó láa loko luhuva gizamó nene alévolé imó: Negepagutí anoza gajokutí lo nokiminake mikasi emane utó amigo gakó halá geko minoloko voko minamó nene itína nene lo utó itove.

Lilíhamú anoza gacolímimi mogonáa lo utó imó

³⁶ Izesú nene vejená ahulokimikane numukú itekago, izegipala zuha leza laisi mikú liliha utó itímimi mogona lokako gilitune loko loká omikuko, ³⁷ Izesú láa loko limó: Gihila lamaná atilí i vemú lumó nene okulumakutí lumu ve gihila nezánemú luve. ³⁸ Minimú lumó nene mukí mikasiukamú luve. Itó netá gihila lamanakumú lumó nene Ómasímimi lapaná alina vejenakumú luve. Lilíhamú lumó nene netá golesa amelaho Satani vejenala zuhamú luve. ³⁹ Gala ve aniteake netá golesa atilí i vemú lumó nene Satakumú luve. Laisi ale moloaká gamenaló minumuni aliaká vemú lumó nene, mikasiuka netá asú iti gamenaló nene hozaló ve keza hoza alitakumú luve. ⁴⁰ Liliha nene asutiiki lokú gizamó nene ámináminoko mikasiuka netá asú iti gamenaló nene ⁴¹ okulumakutí lumu ve gihila neza nene agelóne kimiselekugo, není gizapaló vejenáne zuha niakutí kilími gohá iaká nia vejená itó golesa netá aliaká nia vejená gizaká iki kilími nupa iiki ⁴² ló napagú ali

* 13:35: Age 78:2

ahulikimikiko liminigave. Neneloka limiki miniki ive nama iki miluma maluma giliki kegepa atalá iki minanigave. ⁴³ Itó hee liki minamoláa keza nene améipini avogisalo nene ho nenémini iki lapanánigi minanigave. Lá onoize, lekeza lakagatagi minatamó neneta gakó imane gili vevesiki gililo.

Helisa netakumú anoza gakó

⁴⁴ Okulumalímini lapanató iteakalímini meinava lá oko neve. Helisa netá makó nene za zuhagú minatimó nene etó oko apazá neiko nene, ve makó nenémo voko ánigokoko nene goha ale halá gekoko agoliza vízeko voko ezáa moni henokanona nene salimi asú okoko moni aleoko ámina za zuhama meina hizeko alinogo ive.

Lulukumú anoza gakó

⁴⁵ Okulumakú iteakalímini meinaváa lá oko neve. Ve makó nenémo lulú makó meinava iteko mina netakumú nene vitagá oloko vike nene ⁴⁶ hozavagú molokiko neiko, lulú makó meinava iteko noitimó nene ale utó okoko nene ezáa moni henokanona salimi asú okoko moni aleoko ámina netá nene meina hizeko alinogo ive.

Lagaha gotahamú anoza gakó

⁴⁷ Okulumalímini lapanató iteaká gapováa nene lagaha gotaha nenémini oko nene neve. Vegená keza lagaha gotaha nene age nagamikú ahulikago lemeake lagaha nene haitopaitolímini nene aleaká noive. ⁴⁸ Gotaha nene vaí okago, gelelehá iki ali getatoka iake minake nene, noakalímini nene lapegú ali milimili iaká niave. Namoakalímini nene ali etó iki ahuliaká niave. ⁴⁹ Mikasi gamenava asú iti zupa nene ageló nenete áminámini inigave. Ageló nenete numutó namató vetini holúikutí vegená golesa gizaká iiki ⁵⁰ lokú nene ali ahulikitanigave. Neneloka miniki ive nama iki miluma maluma giliki kegepa atalá iki minanigave.

Litaha monokutí itó gosohá monokutí ale utó oaká gakó

⁵¹ Izesú láa loko lo leme asú oake nene, láa loko loká oletamó: Lekeza nene mukitoka gakó imane gili asú inahe. Loko lokago, leza mota gele asú onoune ⁵² loko lokuko, eza láa loko limó: Ve makolímó aí henoni litahagutí itó gosohakutí gona moloko aí vegenala zuha kemeaká noimómáminiki monó mogona apí ikimiaká a ve lugáa keza okulumalímini lapanalímini mututoni lilí nia vegená nenete Ómasímini litaha monolímini agikagutí itó gosohá monolímini agikagutí ali utó itamó neve.

Nasalete apatoka Izesuni ánihi ahulamó
(Mak 6:1-6; Luk 4:16-30)

⁵³ Izesú nene anoza gakó haitopaitolímini láa loko lo leme asú oake nene, ámina numuni apá ahuloake ⁵⁴ ezáa gotó apalaloka vo anitimó. Vo aniteake monó numukú iteake monó lo kimimó. Monó gakó nene avetó oko lo kemekago, giliake sigaga sagaga litake láa liki lamó: Ve imanémo gele vevesoakaláa nene hikutí alive. Itó alévolé suni aleaká noimómave. ⁵⁵ Leza aí mogonáa gelenounize. Áisi nene kapetamámini gipalama noive. Itó izolahini agulizá nene Maliáma neve. Itó agunamotamolatiní kugulizáini nene Zemusiki Zoseheki itó Saimon itó Zutá nene agunamotamola niave. ⁵⁶ Itó mohó agunala kezagi imaneló miniki aliki iaká nianazo, áisi lezagitana ve noimóza, áisi nene haitopaitó suni nana oko aleaká noive. ⁵⁷ * Liki liake aikumú gelemó nene gena okago, aí nene ali letivi iki likago, Izesú láa loko lo kimimó: Ómasímini agepagutí gakó liaká vetini kugulizá nene numutó namató puu loko vitimóza, kezáini gotó apatokagi numúikukagi kezáini kugulizá nomitive, loko limó. ⁵⁸ Ámina apató vegená keza nene gili alévolé amamó nenazo, Izesú nene alévolé suni mukí neneló ale utó amimó.

14

Monó nagamí holokimiaká ve Zoní hili gakó
(Mak 6:14-29; Luk 3:19-20; 9:7-9)

¹ Gamena nene zupa agulizaki ve napa Heloté nene Izesuni gakoláa likago gilimó. ² Geleake nene, gelekelé izegipala nene láa loko lo kimimó: Zoní monó nagamí holokimiaká ve áisi nene hilmómagutí oteake imane zamuza nene netá haitolímini ale utó oake noihe loko limó. ³ Nene hanuva lamimó. Heloté nene amunaloka emane uvolaho Piliponi vená agulizá nene Helotiasini ipá oko alimó. ⁴ * Lá okago, Zoní nene Heloteni nene uvokahini vená ipá oko alenimó nene etamive. Loko lo ame-ame oloko vokago, Heloté nene venalámó gala vízekago ve makó kimiselekago vake Zonini agizató aliake nagá numukú ahulitamó. ⁵ Mukí vegenalite Zonikumú nene Ómasímini agepagutí gakó loaká ve noive liki liaká amó

* 13:57: Zon 4:44 * 14:4: Liv 18:16, 20:21

nenazo, Heloté nene Zonini apilitomó nene Ómasímo nana onetatihe loko ahelele vizekago ahulamó.

⁶ Lá imóza, Heloteni nene geta gamena alitokago mukí kugulizaki ve aí numukú nene iki alegesá amó. Alegesá iki niago, Helotiasini mohola nenémo kovogisaló melekeni noigo, Heloté nene ániago amu heleake, ⁷ láa loko limó: Neza nene Ómasímíni avogisaló lo hukoko noluve. Geza nemú manamú nivivise loko litani netá hanuva giminogo uve. ⁸ Loko lokago nene, izolaho lo amekago láa loko limó: Monó nagamí holokimiaká ve Zonini luvana nene hutoko lapegú moloko nemekako ániogokinake mota helekave loko litove loko noluve. ⁹ Loko lokago nene, agulizaki vémo agepa gahava nomigo gilimó gena imóza, Ómasímíni avogisaló lo hukokumóma nenazo itó alesa molokugo iki mina vegenalítini kovogisaló imane lo hukokunazo loake, gele ameake, gopa nene pilisi ve makó voko luvana hutoko alekative loko lomikago, ¹⁰ vike nagá numukú nene luvana hutoake gotola gitegeko nene ¹¹ lapegú moloake mohóma amekago, mohólámo aleko vike izolahíni alemo amimó. ¹² Alemo amekago nene, Zonini izegipala zuha nenete ámina gacoláa nene giliake vake gonosiváa gale zemó. Gale ziake, ámina gakó nene Izesuni avetó iki li amemó.

Ve 5 tausén nosánétá kemeko namó

(Mak 6:31-44; Luk 9:10-17; Zon 6:1-13)

¹³ Li amikago, geleake ámina apá ahuloake izegipala zuhagegi nagamikú lapegú itekunike vola helegaloka mikasi gomopalaló vo anitehá. Lá okuko, vegená mukí keza giliake, numuni apáini ahuliake mikasigú ámegetiki vamó. ¹⁴ Lá ikago, Izesú nene lapegutí olío lemeko ániagamó nene, vaí iki alegesá ikago ániagoake, agika hizekago kivisi vegená nene kelémo zokamó.

¹⁵ Lá okago, únaká ho lemekago, izegipala zuha leza aitoka unike láa loko lo amunimó: Imane apá nene ha gámetó minokaze, itó gamena mota asú okaze, vegenáma apá makotoka makotoka viiki nosánétáini meina hizitave loko kimiselemané. ¹⁶ Loko lo amekuko, Izesú láa loko lo limimó: Nanamú vitave. Lekezatini nene nosánétá kimiki nalo. ¹⁷ Loko lokago, leza íi, peleti 5-a itó lagaha lositakó imane molonouhá lae. ¹⁸ Loko lokuko, Izesú láa loko limó: Nene aliki nenitoka alo. ¹⁹ Loko lo lemeake, vegená keza gihisiló minatave loko lolimiake, peleti 5-agi itó lagaha lositaki aleake, okulumatoka okenava oko nánigake, Ómasi agepoka loake, peleti gitegeko lemekago, leza vegená mukí gona moloko kemehá. ²⁰ Kemekuko, mukilite nikake kagatupa okago nosánétá lumáa ali nupa iki gosúveha 12 vaí okago ali milamó. ²¹ Nosánétá na véa 5000 nenémíniiki minamó. Vená izegipáini nene gatamune.

Izesú nagamí amupiló liso liso vimó

(Mak 6:45-52; Zon 6:15-21)

²² Lá okago, Izesú ezáa nene vegená nokimisilike izegipala zuhama sipigú itiiki vola helegaloka goí iki vitave loko loletamó. Lolimikago novuko nene, ²³ vegená kimisele asú oake ezáagó agoka makokú iteko minake Ómasiloka loko minamó. Lá noigo, ²⁴ límugusí zekago akovevé loló okago nene, izegipala zuha leza sipigú voko voko nonohuló holutó novuko logómualokatí nene una napa aleko ake lehelú inogo igo, nagamí nenémo valahuká zeko lelémo ligitagani imó. ²⁵ Lá noigo, gokululuva notovoigo, Izesú nene nonohuló amupiló liso liso vike vo alí noligo, ²⁶ izegipala zuha leza ániogokinike, holosí noahe oko lehelele vizekago, gopaga lunimó. ²⁷ Gopaga lokuko, Izesú litá oko láa loko limó: Lekelegesá legemino. Nezama nouve. Mulutini lepa hizino. ²⁸ Loko lokago, Pitá nene láa loko limó: Guivahanitemaka, géisi noitanimó nene lokako nagamí amupiló imane lisokinake géisi noanitoka vitohe. ²⁹ Loko lokago amane loko lokago, Pitá nene sipigutí olío lemeake, Izesú noitó nene apí oko nagamí amupiló liso liso vimó. ³⁰ Liso liso novigo, una nalikumú geleake alegesá legekago, nagamikú velehé liminogo noike, Guivahaníemaka nelémo nugutó vizemane loko gopaga lokago, ³¹ Izesú litá oko agizani lutoko nanukike láa loko lo amimó: Geza komáisi nenikumú gele alévolé anitika, nanamú gagata losi gelenimó neve. ³² Loko loake, sipigú goha itikasigo, una nene asú imó. ³³ Asú okago, sipigú makó minuhá ve leza Izesuni gupá ze ameko geza lamaná Ómasímíni gipala noane, loko lunimó.

Genesalete apatoka Izesú kivisi vegená kelémo zokamó

(Mak 6:53-56)

³⁴ Loko lunike, vola helegaloka Genesalete apakú vo anitunimó. ³⁵ Nagamí nonohuló agataloka getatoka nene itekuko, vegená keza Izesuni ániagi vevesiake Izesuteho mota okave liki numuni apá alitoka gacoláa ahulikago, vegená keza giliake kivisi vegená Izesutoka kilímiki amó. Kilímiki ake ³⁶ kivisi vegená imane nene gele kemekako, gugupeló ahe itó hanuva luhoaká gó gahevalokahe imane ali giliiki nene zokatave, liki negénegeka likago, áminámini niake ale gele vegená nene zoki asú amó.

15

Avóike apí a mognatagana
(Mak 7:1-13)

¹ Gamaena nene zupa Zelusaletatí Palisaio monó ve itó monó mogona apí ikimiaká a ve lugáa kezagi Izesutoka ake láa liki loká itamó: ² Izegipaka zuha keza avotegini mognatagana ali minamake nanamú ahulikave. Nosáneta natune liki ligika ale golutuva loaká suni aliki kigizani nene nagamí zemave. ³ Liki likago, Izesú láa loko lo kimimó: Lekelisi nanamú avotikini gakóini gili alinigi Ómasímo lo hukoleketa gakó avutá iaká niave. ^{4*} Ómasímo láa loko lonoimóma neve: Izokahiko amekahiko kugulizá ale otezo. Itó makó nene láa loko lonoimóma neve: Makó eza nene izolahiko amelahiko usí vizekimiaká gakó lo kimitimó nene, apele hilitunize. ⁵ Lá onoimóza, lekeza nene láa liki iaká niave: Makó eza nene izolahiko amelahiko hize lé oketanogo lonou netáma mota Ómasímini amekuve, ⁶ liki liake nene izotikini ametikini nasahilí ikitata gapo hizi lí iaká niave. Itó lekeza lá iake, Ómasímini gakó nene vasá ziake lekezatini avotikini gakó alévolé iki ali miniaká niave. ⁷ Genezatini lositaki neneta Isaiá alika utó iti netakumú gakó láa loko limó nene, lamaná lekelikumú lonoimóma neve. Ómasímo lí gakó nene láa loko luhuva gizononimóma neve: ^{8*} Vegená mulusi imane nene kegepatunukó nugulizá ali otiaká niamóza, kígika nenitoka mili gímizinamake mili hotó inave. ⁹ Vegenalitiní gakó nene není gakokítana okago lí kimi-kimi iki miniaká niake, soza miliki gupá zi nimiaká niave.

Ligika ale gopa oaká netá
(Mak 7:14-23)

¹⁰ Izesú nene láa loko lo kemeake vegená lugáa mukí sele lo kemekago, aitoka ikago, láa loko lo kimimó: Neza gakó lo líkimitoze. Gili vevesiki gililo. ¹¹ Ni mikilí ikago lakagatupagú lemeaká noi netá nenémo líkigika ale golutuva lamitimó neve. Lekegepagutí emane itíti netalímo líkigika ale golutuva litimó neve. ¹² Loko lo kemekago, izegipala zuha leza amatoka voko láa loko lunimó: Geza nene Palisaio monó ve imane gakó lo kemekako gili golesa ikave. Gili golesa amó nene mota gelenape. ¹³ Loko lokuko, Izesú eza anoza gakó láa loko lo limimó: Za nene okulumakú améneho zuhá amigo hanuva goloko itimoláa nene áisi asutoko luhusagi ale ahulanogo ive. ^{14*} Lá onoinazo, lekeza ahulikimikiko minino. Palisaio monó ve nene kogómula lika mola vegitana niave. Agómula lika ve makolimo agómula lika ve makó nene gapo alapizitihe. Kogómula lika ve losi nenetosa eza agizató aliko eza agizató aliko iiki vitáimó nene losiló galegú hilanigasive.

¹⁵ Loko lokago, Pitá láa loko lo amimó: Geza nene anoza gakó itínasa lanimómámini mogonáa lo utó okako gilitune. ¹⁶ Loko lokago, Izesú láa loko limó: Íi, lekelisi nene áinagó iki lakagata velesá kolosamimó niahe. ¹⁷ Mogonáa gili vevesamahe. Lekegepatunú nosáneta níkago aselikú nene lemeake nene eza gapováa voaká noive. ^{18*} Itó lekegepagutí iteaká noimó nenémo líkigikagutí utó oake lekemeni ale golutuva loaká noive. ¹⁹ Vegená líkigikagutí iteaká noi netá nene láa oko neve: Golesa lakagata geleaká, itó vegená kepele heleaká, ve vená huki ezega emega oaká, mokoló mogona, gumina, soza, kemegeka loaká, nene. ²⁰ Netá nenémináámo lekemeni alémo golesa oaká noive. Ligizani nagamí zemunike noaká nouhá nenémo lemeni ale golutuva losá amive.

Kenan mikasiukatí hetoka mina venalímo gele alévolé imó
(Mak 7:24-30)

²¹ Loko loake, Izesuki makó vunike mikasi ahuloko Tulo numutoka itó Sitona numutoka apá agilikaloka voko nouko nene, ²² Kenan mikasiukatí hetoka mina vená makó nene aitoka noake gamoga geko láa loko limó: Guivahanínemaka, geza Tevitini agávolagamaka golesa netakutí gologí oletatani velemaka, milumaváne gelenetamane. Holosi golesa makolimo mohónémini agikagú minoake alémo gopa napa okago noinae. ²³ Loko lokago, Izesú nene geletigí gelemotigí oake novigo nene, izegipala zuha leza vená imanémo negénegeka lomo lémegetoko amó goselé ovize. Geza nene amiselekako vitiho. ²⁴ Loko lokuko, Izesú láa loko lo limimó: Neza nene Isilae vegená vi tolova inakutí kelémo vatí itane lokogó nimiselekago lumumóma nena. ²⁵ Loko lokago, vená nenémo litá oko amatoka oko agisauka gupá nozike láa loko limó: Guivahanínemaka, geza nelémo vatí amane. ²⁶ Loko lokago, Izesú nene Isilae vegenalite Ómasímini lusa goí iki ali alitakumú geleneike anoza gakó láa loko lo amike limó: Izegipatiní nosáneta nene ipá oko galatini kegepagú ahuloakaláa nomive. ²⁷ Loko lokago, hetoka vená nenémo Isilae vegenakó negopa, ezagi

* 15:4: Gá 20:12; Gapo 5:16; Gá 21:17; Liv 20:9

* 15:8: Isa 29:13

* 15:14: Luk 6:39

* 15:18: Mat 12:34

Ómasímini lusa ale alitikumú geleneike láa loko limó: Guivahanínemaka, nene lamaná lokanimóza, neza litoze. Gala amelage nene nosáneta ninago lanáa koma alemó zimó nene galate gopa niaká niamole. ²⁸ Loko lokago, Izesú láa loko limó: Geza nene gigika ma nego lokanize. Nenemú nene lani netá utó ogetanogo ive. Loko lokago nene, ámina gamenalóisi mohola nene zokoko lamaná imó.

Izesú vegená mukí kelémo zokamó

²⁹ Lá oake Izesú nene numuni apáma ahuloake goha atiginá oko vike Galilaia nonohulotoka aniteake zopega makokú iteko minamó. ³⁰ Iteko noigo, vegená mulusi haitopaitolimíniki alegesá amó. Iki alegesá amó nene kigisaló alimó kogómulaló alimó itó lilikupá gepili nuvane itó gakó lamamó negi ve itó kivisi vegená mukí kilímiki iki Izesuni agisauka kilími nupa ikago kelémo zoko asú imó. ³¹ Lá okago, gakó lama vegená nene kegepa álemo vávani okago gakó lamó, itó kigisa kigizani nakeseta vegená nene kelémo lamaná okago lamaná iki minamó, itó kigisaló alimó nene lisi pehe liake otiki vamó. Itó kogómulaló ali vegená nene kogómula ale goloutokimikago kogómula ániagamó. Lá iki minago vegená mukí keza sigaga lake leza Isilae vegenalitini Ómasite napa noive liki agepoka lamó.

Ve 4 tausen nosáneta kemeko namó

(Mak 8:1-10)

³² Lá okago, Izesú nene izegipala zuhama sele lo lemekago, aitoka okuko, láa loko lo limimó: Vegená mukí imane nosáneta namake nenitoka nene gamena losive makole minikago milumaváini gelekuze. Itó itína gaúna hiliki niko, kimiselekugo, numúitoka niviko gapoló kovonana vizekatihe loko nenemú nagata gulugo gena nivisekave. ³³ Loko lokago mikasi gomopalaló nouninazo, vegená imane nosáneta nene hikutí ale utó oko kemeko natune. ³⁴ Loko lokuko, Izesú loká oletake lekelitoka peleti nanakí neve. Loko lokago, leza nene peleti 7-a, itó lagaha koma luguhakó ma neve. ³⁵ Loko lokuko, áminama aliki alo loake nene aleko okuko, Izesú nene vegená mukí mikasiló minalo loko lolimiae, ³⁶ peletigi lagahagi aleake, Ómasi agepoka loake, gitegeko lemekago, leza vegená gona moloko kemekuko namó. ³⁷ Niki niki kagatupa ikago, nosáneta lumáa minamó ali nupa iki gosúveha nene 7-a vai okago ali milamó. ³⁸ Nosáneta na ve nene 4000 nenémíniki minake namó. Vená izegipáini ma gatamune.

³⁹ Lá okago Izesú nene ámina vegená kimisele ahulokago, nivago, sipigú makó itunike Magatana mikasiuka vola helegaloka vo anitunimó.

16

Alévolé suni ániगतune liki lamó

(Mak 8:11-13; Luk 12:54-56)

¹ * Palisaio monó vegi itó Satukaio monó vegi keza Izesutoka iake gimivagú molatune liki loká itake láa liki lamó: Geza nene Ómasilokatí alévolé suni makó ale utó okako géi mogona ániगतune. ² Liki likago, eza láa loko lo kimimó: Lekeza nene límugusi zinogo noigo guhizakó ániagiake azo ho latimó neve, liki liaká niave. ³ Itó gó lokago gó nohitago nene golini zitimó neve liki liaká niave. Itó lekelisi nene okulumató ániagiake nenémíni mogona gona miliki giliaká niamóza, itína gamenaló oko moloko oaká noutímíni mogonamú nene ma gili lamaná amake hanuva miniaká niave. ⁴ * Imane gamenaló nia vegená lekelisi nene ve goesave itó monó nene gili ahuliaká vegená niave. Lekelisi nene alévolé suni ale utó okugo ániaganigi giliake nilahe. Lekelisi nene haitó suni makó ale utó ugo ániaganigave. Gozapá monó loaká ve Zoná nene gamena losive makole oko vokago heleaká gapogutí oti sunigitana makó nenitoka utó iko nenegó ániaganigave, loko lo kemeake ahulokimiaké vimó.

Palisaio monó vegi Satukaio monó vegi kei mogonatagana

(Mak 8:14-21)

⁵ Itó izegipala zuha leza nene peleti makó aleko vitunikumú lagatí molokago ahulunike sipigú makó itunike nonohuló avilegekunike ima helegaloka oko anitehá. ⁶ * Oko anitekuko, Izesú nene anoza gakokú láa loko lo limimó: Lekeza nene Palisaio monó vegi itó Satukaio monó vegi kei lulu vizeaká netalímo lekepelekatize, ehe. ⁷ Loko lo lemekago, peletímíni lulu vizeaká netakumú lihe loko lezateloka logele hagele unike peleti nene ahulokoko unikumú nene gakó lo nolimize. ⁸ Loko luni gakó nene agataló holokago geleake láa loko lo limimó: Agae, lekeza komáisi gili alévolé amó neneta, peleti ahulokoko unikumú nolive liki nanamú mulutini itekago lekezatitoka ligili hagili niave. ⁹ * Neza nene alévolé suni aleko nosáneta hanuva ale utó oleketatomómámíni mogonáa velesá gili

hee lamahe. Neza ve 5 tausenimú peleti 5-a gitegeko kemekugo, niake kagatupa okago lumáa ahulikago gosúveha 12 nene vaí okago aleve. Nenemú lakagatí molokago nilahe. ^{10*} Itó vegená nene 4 tausen keikumú peleti ligizani lugaloka losi olío molago kemekugo, nikake kagatupa okago, lumáa nene gizaká iki ali milámoma nene gosúveháa 7 ali milámó neve. Nenegi lakagatí molokago nilahe. ¹¹ Leza nene peletimú lo lemenape liki lekeza nene není mogonamú nanamú gili vevesamave. Palisaio monó vegi Satukaio monó vegi kei lulu vizeaká netalímo lekepelekatize, ehe. ¹² Loko gakó nene lo lemekago, neneló nene gele vevesunimó. Gele vevesunike nene, peletimíni lulu vizeaká netakumukopa, Palisaioite itó Satukaioite soza monó liaká akumú nene lokave loko nene gulunimó.

Pitá Izesuni mogonamú lo utó imó

(Mak 8:27-30; Luk 9:18-21)

¹³ Izesú nene Sisalia mikasiuka agulizaki ve Piliponi agulizató apá nene agilikaloka voko noiike, izegipala zuha nene láa loko loká oletake limó: Vegená keza nene okulumakutí lumu ve gihila nenikumú nene éahove liaká niave. ^{14*} Loko lokago nene, vegená lugáa nenete Zoní monó nagamí holokimiaká vema noane liki liaká niave. Itó lugáa nenete Ilaizá gozapá okulumakú iti vema noane liki nilago, lugáa nenete Ómasímíni agepagutí gakó loaká ve Zelemiá ahe itó Ómasímíni agepagutí gakó loaká ve makó gozapá minamokitana noane liki liaká niave. ¹⁵ Loko lo amekuko nene, itó lekelisía nene nenikumú éahove liki liaká niave. ^{16*} Loko loká olimikago nene, Saimon Pitá nene láa loko limó: Geza gologí oletatane loko lo mololeta vema alévolé Ómasímíni gipala nene noane. ¹⁷ Loko lokago, Izesú nene láa loko lo amimó: Zonani gipala Saimoga, geí gakó nene gelekugo gogoliza novizenimó geleaká noiwe. Vegenalite ma li gimikago lamané. Okulumakú améneho nene gelémo vávani igo lokanize. ¹⁸ Nenemú lo gimitoze, gelezo. Geza gugulizaka nene Pitá noane. Itó lelí gakokutí nene gasova gehanímó. Itó nénisi nene ámina gasova gehanimámíni amupiló nene monó ali amegesa milina vegená kelémo nupa okoko ahulokimikugo meikú hilatatímíni zámuzáa nenémo ma kelémo amunauka aminogo ive. ^{19*} Itó nénisi nene okulumalímíni lapanató vi hilatatímíni kiiláa giminogo uve. Itó geza nene mikasiuka netá makokumú lo hoipa oketatanimó nene Ómasímó okulumakukagi ámina netakumú lo hoipa oketanogo ive. Itó mikasiuka netá makokumú lo hoipa oketamitanimó nene Ómasímó okulumakukagi ámina netakumú lo hoipa oketamítimó neve. ²⁰ Loko loake, izegipala zuhama nene lagata alike alévolé oko lo limimó: Neza gologí oletekative loko lo mololeketa vema noumóza, nene gakó nene vegená keké li kememilo, loko limó.

Izesú ezáa alika hiliti gamenamú lo kimimó

(Mak 8:31–9:1; Luk 9:22-27)

²¹ Gamena nene zupa Izesú nene apí oake minomo vike netá matá aitoka utó iti gakó nene izegipala zuha láa loko lo limimó: Zelusalega itekugo nene, monó gizapa ve itó guguni giziaaká ve itó monó mogona apí ikimiaká vete miluma netá mukí nimiki nipili hilikiko, gamena losive makole minokinake goha otinogo uve. ²² Nene gakó lo leme asú okago, Pitá nene Izesuni alémo apazá zeake géneka loko gahá amike láa loko limó: Guivahanínemaka, Ómasímó asega zegeto-loko noviko nenémíni suni nene geí gumupiló utó aminogo ive. ²³ Loko lokago, Izesú viligoko Pitani láa loko lo amimó: Satani gakó lanitika, géisi nene mino olové amane. Není gapo hize lí itani gakó lokane. Gakó nene lokanimóza Ómasímíni gakó lamanike ha vegenalítini kigikagutí gakó aleko lokane.

^{24*} Loko loake, gamena nene zupa Izesú izegipala zuhama miní ameko láa loko lo limimó: Vegená makó nenete není némegetoko vitune liki nigilikima nene, kugupémo giliti netá gili ahulíni zohota zaló kipili hilinegi miluma netá ali gihikitatakumú gili zagiliki némegetiki ataze. ^{25*} Makó keza nene kigika kemeníni aliki amánapa iki minata vegená nene kigika kemeni gopa inogo ive. Itó makó keza nenikumule liki kigika kemeni vinasatamó nene alévolé kemetamení alinigave. ²⁶ Makó keza nene mikasi amupiló ne netá ali asú iiki itó kezáini kigika kemeni gopa okoko tolova itimó nene ámina mikasigú henoní nenémo nana oko kelémo lamaná itive. Itó kigika kemeni nene nana nana iki meina hiziki goha alitamó neve. Nenémínoko nomive. ^{27*} Okulumakutí lumu ve gihila neza aménehini lapaná nenémo numupiló itekiko, agelova mukí nene kelémoko lemekinake vegená mukí mikasigú iki miliki iaká niamó nenémíni ago helegáa lihima kimitomó neve. ²⁸ Neza lamaná lo likimitoze, gililo. Lekelisi ató nene nia vegená lekelikutí nene lugáa makó

* **16:10:** Mat 15:34-38 * **16:14:** Mat 14:1-2; Mak 6:14-15; Luk 9:7-8 * **16:16:** Zon 6:68-69 * **16:19:** Mat 18:18; Zon 20:23 * **16:24:** Mat 10:38; Luk 14:27 * **16:25:** Mat 10:39; Luk 17:33; Zon 12:25 * **16:27:** Mat 25:31; Age 62:12; Lom 2:6

hili asú inamiki ha niko okulumakutí lumu ve gihila neza liminake agulizaki vetini loló oleketatomámámini zámua nene lamaná oko utó okiko lekelisi ániánigave, loko limó.

17

Izesuni agupe haitólúmini imó
(Mak 9:2-13; Luk 9:28-36)

¹* Izesú hoza gamena 6-a minomo noitike Pitani Zemusini itó Zemusini agunala Zoninigi kelémoko kezáiko agoka hána makokú itemó. ²Neneloka itiake kogómulaló nene Izesú haitó agupe ale luhamó. Okulumakú agupe ale luhoake nego, agoka agepa nenémo ho silikakéna nenéminoko noigo, goláa nenémo gizopa vae vae loko minamó. ³Lá okago, Ómasímíni agepagutí gakó emane amunaló liaká asi ve Ilaizako Moseko nene utó i kimikasio, keza Izesugegi gakó ligili hagili amó. ⁴Ligili hagili ikago, ániagiake, Pitá nene Izesuni láa loko lo amimó: Guivahanitemaka, imaneloka minuhá laga okaze. Nenemú gelekako nene imaneló gaizopa losive makole geleketaunize, makó geile, makó Ilaizanive, makó Mosenive. ⁵* Loko noli agepagi límusi saheheváa nene lemeko ze hitokimikago, límusigutí Ómasímo láa loko limó: Imane nigika amenou gipáne noimó nene ániigo numu helekuze, lekeza nene gakoláa gili alilo. ⁶Loko lokago, izegipala zuha keza nene mikasigú kogoka hiziki akiake kehelele vizekago, kigisa kigizakutí nene guli guli oko minamó. ⁷Lá niago Izesú nene voko kugupeloka ale nogliké láa loko limó: Lekelegesá legemiko otemave. ⁸Loko lokago, otiki ániagamó nene Izesú ezáagó noigo ániagamó.

⁹Ániagiake, Izesugegi agokagutí nilemeke Izesú láa loko lo kimimó: Agokaló lekeza netá matá ániagamó nene vegená litá iki avetó iki li kememilo. Nénisi okulumakutí lumu ve gihila heleneitokutí iteko vokugo li kimitaze. ¹⁰* Loko lokago keza láa liki loká itake lamó: Gologí oletati vema anitemigo Ilaizá goí oko anititive liki monó mogona api ikimiaká ve nenete nanamú liaká niave. ¹¹Liki likago nene eza láa loko limó: Ilaizá goí oko aniteko netá matá mukí ale vavá itive liki lamaná linamóza, ¹²* neza lo likimitoze, gililo. Ilaizakitana noi vema mota anitekamóza, ániigi yevesamake kezámi kagata gele netá golesa lili itiki minamó. Keza ámináminiki okulumakutí lumu ve gihila není nene míluma netá niminigave. ¹³Loko Ilaizakitana venú limó nene monó nagamí holokimiaká ve Zonikumú nolinae liki gelemó.

Izesú holosi golesagi mína gipa alémo zokamó
(Mak 9:14-29; Luk 9:37-43)

¹⁴Lá iake, agokagutí limiake vegená mukí niatoka ikago nene, ve makólímo ake Izesuni amatoka alapusa híziike láa loko limó: ¹⁵Guivahanínemaka, gipánemú nene mílumaváne gelemane. Eza negi hízeake sehovala veleake minake, lokú ahé itó nagamikú ahé lemeko pou loko akoaká noive. ¹⁶Izegipaka zuhate alími zokatahe loko keitoka alémoko vumóza, lá imi vaha vaha alími zokamave. ¹⁷Loko lokago, Izesú láa loko limó: Lekeza ató imane gili alévolé amake mulutikú amanapa iki minamó neneta lekelikumú goselé nepelekave. Lekezagi gamena gamena minoloko voko mininake nene lokogohí gehekogó minatohe. Loko loake nene, izegipama nene nénisi noutoka alímiki alo. ¹⁸Loko lokago, alímiki ikago, Izesú nene ámina holosi nene gahá amekago ahulomioko vimó. Vokago, izegipama ámina gamenalóisi lamaná okago nene, ¹⁹izegipala zuha lezategó Izesuki makó minunike loká otoko leza nene holosima nanamú apeleko amiselemuháma neve. ²⁰⁻²¹* Loko lokuko, láa loko lo limimó: Lekelisi nene gele alévolé oakatini nene alínipa minokago lá amave. Lamaná lo likimitoze, gililo. Lekelisi gili alévolé niamó nenémo komá netá netimóza, masteti gihila komamámo goloko iteko napa napa oaká noimómáminoko amuzavagi netimó nene, agoka imane míno olové ozo liki litamó nene hanuva míno olové itimó neve. Itó lekelisi nene netá makó lilí amitatíminoko nomíve, loko limó.

Izesú ezáa alika hiliti gamenamú goha lo kimimó
(Mak 9:30-32; Luk 9:43-45)

²²Koma minomo noitiko izegipala zuha lelémoko vike Galilaia mikasigú vo aniteake nene Izesú láa loko lo limimó: Okulumakutí lumu ve gihila neza nene míni hána amiki vegenalitíni kigizakú nilími milikiko, ²³nípili hilitamóza, gamena losive makole minokinake heleneitokutí goha otinogo uve. Loko lo lemekago, izegipala zuha leza mulute gitihíná imó.

Monó zagusavémini takisi moni ahuloaká gakó

* 17:1: 2 Pit 1:17-18 * 17:5: Apí 22:2; Age 2:7; Isa 42:1; Mat 3:17, 12:18; Mak 1:11; Luk 3:22; Gapo 18:15 * 17:10: Mal 4:5 * 17:12: Mat 11:14 * 17:20-21: Mat 21:21; Mak 11:23; 1 Koli 13:2

²⁴ * Minoko nene Kapanao numutoka atiginá oko vokuko, monó zagusavémini takisi aliaká a ve nenete Pitani amatoka vake loká itake láa liki lamó: Monó tísatíni nenémo monó zagusavémini takisi moni ahuloaká noihe. ²⁵ Liki likago, Pitá nene nana ive. Moloaká noimole. Láa loake, numunagú iteko gakó nene Izesuni velesá lo amenamigo, Izesú loká otake láa loko limó: Saimogo, geza nanave loko nogelene. Imane mikasigú kugulizaki véinite hí vegeatokatí takisi moni aliaká niave. Kezáini vegeánini zuhalokatí aliaká niahe itó gutá a vegeatokatí aliaká niave. ²⁶ Loko lokago, Pitá nene gutá a vegeatokatí aliaká niave loko lokago nene, Izesú láa loko lo amimó: Láa lokoma mikasi amelage kugupe meina hizemiki hanuva minataze. ²⁷ Itó neza ámina monó numuni napámini amelaho nounazo, ámina takisi moni ahulamoko ha minatomóza, keza nene lelikumú gilikiko golesa okatize. Nenemú geza nonohulukú lemeko lagaha aleaká nagá nene nagamí nonohulukú ahulo molokoko lagaha ganá alitanimoláa nene gelelehá o veletoka okoko agepa ale á oko ángozo. Lagahamámini agepagú nene moni neko ángoko alekokoma gezagi nezagi lugupe meina hizitíni moni aleko voko kemezo, loko limó.

18

Vegená mukikutí éaho livilegeko noive
(Mak 9:33-37; Luk 9:46-48)

¹ * Gakó láa loko lo limi zupahé nene izegipala zuha leza Izesutoka vunike láa loko loká otunimó: Ómasímo agulizaki ve napa ale utó o limikiko nene lelikutí éaho livilegeko agulizaki ve loló itimó neve. ² Loko lokuko, Izesú izegipa koma makó sele loko alémoko ake holutegú hize otemiake ³ * Láa loko limó: Neza lamaná lo likimitoze, gililo. Lekelisi nene likigika ali viligiiki aliliki limiki izegipa koma imanémíniki minamitamó nene Ómasímíni avogisaló nene keké ma vaminigave. ⁴ Makó keza nene izegipa koma imanémíniki kezáinimú gilikiko lemeko minatimó nenete Ómasímíni avogisaló viki kugulizaki ve líli itamó neve. ⁵ Ve makó nenete nenikumule liki izegipa koma ámanémíniki nasahilí itatamó nenete není nasahilí inimiaká niamó gelekave.

Golesa netakumú gala vizeaká gakó
(Mak 9:42-48; Luk 17:1-2)

⁶ Itó nenikumú gili alévolé i mina izegipáne limiki minamoki keikutí hamó nene ve makolímó golesa netá alitave loko gala vizeko litimó nene, agae, Ómasímo loló otati netá nene genavagi golesa neve. Ámina vémini luvanaló gehani napa nagá ziiki age nagamikú ahelú i ahulatátímíni avilegeko genavagi netá golesa loló otanogo ive. ⁷ Itó agae, golesa netá alitave loko gala vizeko loaká suni haitopaitolímíni nene mikasiuka neve. Ámina netá golesa nene hanuva utó inogo imóza, ve makolímó golesa netá alitave loko gala vizeko lomo mohona itimó nene Ómasímo nana otative. Agae, netá golvagi loló otanogo ive.

⁸ * Nenemú nene gigizánimóhe itó gígísámóhe lihima aleaká gapogú gelémo nomilikoma, hukoko nene ale ahulozo. Gigizani hamokó neiko itó gigisa hámakó neiko alévolé oko minoakalímíni apakú ititaninazo. Gigizani losigi itó gígisa losigi minokoko lihima alitanitímó ló apakú gelémo molokiko, ló nene lihamike lova lova oko nomina lokú vokatanize. ⁹ * Itó gogómulámo lihima aleaká gapogú gelémo nomilikoma, geza hanuva hize lí okoko ale ahulozo. Gogómula hamó neiko minoko alévolé oko minoaká apakú ititaninazo. Gogómula losigi minokoko lihima alitanitímó milumámíni lokú gelémo molokatize.

Sipsip iza tolova imó nenémíni anozá gakola
(Luk 15:3-7)

¹⁰⁻¹¹ Lekeza ehe tináneve. Lekeza izegipa nugunamotamónemú gilikiko lememino. Neza nenemú lo likimitoze, gililo. Ageloninite okulumakú miniaká niamó keza nene okulumakú gamena gamena aménehini avogisaló minake gizapa ikimiaká niave.

¹² Nenemú lekeza nene nanave liki nigeleve. Ve makó nenémo sipsip iza nene 100-a niakutí sipsip hamokó tolova itimó nene, vitagá amitihe. Lá oko nomive. Sipsip lugáa 99-a nene agokáu ahuloketonoko hamó legesó imolamú amuza moloko vitagá oloko vinogo ive. ¹³ Lamaná lo nolukumuve. Eza vitagá ova ova oko sipsip iza hamóma ale utó okoko agoliza vizinogo ive. Agoliza vizitímó nene sipsip iza 99 hanuva niamolámú agoliza vizeminogo ive. ¹⁴ Itó ámináminoko lekelí ametipó okulumakú noimó nenémo izegipa nugunamotamóné lekelikutí makó nene legesó itikumú ma amu helemive.

Gigivekaho lihima suni alegetati gakó

* 17:24: Gá 30:13, 38:26 * 18:1: Luk 22:24 * 18:3: Mak 10:15; Luk 18:17 * 18:8: Mat 5:30 * 18:9: Mat 5:29

¹⁵ * Gigivekaho makolímo geitoka lihima suni alegimikikoma, geza voko lekezatikó miníki lihimála alapizezo. Lá noako, geí gako gelekikoma nene, goha gigivekahini alémo geitoka itanize. ¹⁶ * Lá onoimóza, geí gako gelemikoma, ve hamó ahe lositá ahe kelémoko lekeza ámina lihimagi ve noitoka makó vilo. Lá ikiko, monó gotolaú gako makó láa liki luhuva gizinamó nenémo gihila zitive:

Gakó hoza alitató nene vejená losihe losive makolehe ve makolímini mogonamú gako hoza alitamó nene voko hee hee linogo ive.

¹⁷ Lá onoimóza, keí gako gelemikoma nene, geza monó gilina vejená lo kemezo. Itó eza nene monó gele vejenalitiní gako gele ahulokikoma, aikumú gelekako eza nene mota lihimalagi ve ánihi goselé iaká nia ve loló ino.

Lo hoipa oaká itó amoaká gakó

¹⁸ * Neza lamaná lo likimitoze, gililo. Lekeza mikasiuka netá makokumú li hoipa ikitatamó nene Ómasímo okulumakuka ámina netakumú lo hoipa oketatimó neve. Itó lekeza netá makokumú mikasiuka li hoipa ikitamitamó nene Ómasímo okulumakukagi ámina netakumú lo hoipa oketamitimó neve.

¹⁹ Makó miní ameko lo likimitoze. Lekelikutí vejená makolitehe itó lositakó ahe keza netá makokumú nene ligika mili nupa iiki hamokó loló okiko Ómasiloka litáimó nene okulumakú améneho gele kininogo ive. ²⁰ Itó vejená makolitehe itó losive makolehe itó lositakó ahe keza apá makotoka není nugulizakumú ali nupa itamó nene nénisi holúikú minanogo uve.

Lihima ahulamoaká nenémini anoza gakola

²¹ * Loko lokago, Pitá nene Izesuni amatoka mino molake láa loko loká otake limó: Guivahanímeka, nigivéneho makolímo gamena nanakí zupa lihima netá alenimikiko ahulotatove. Gamena 7 ahe. ²² Loko lokago, Izesú láa loko lo amimó: Gamena 7 nomive. Gamena 7 ahuloto-loko vova voa noako gamena 700 loló ino. ²³ Nenemú nene Ómasímini avogisaló minoakalímíni ago helegáa lekelepizeko gako makó litoze. Agulizakí ve napa makolímo gelekelé izegipalatini lihimáini netimoláamú ale hehe linogo gilimó. ²⁴ Lihima milikitinitamó ale hehe linogo apí oko hozaváa naligo, ve makó nene aitoka alímiki amó. Aitoka lihima 10 milioni kina minamó. ²⁵ Lá imóza, eza nene ámina lihima apasati moni nene ma nomimó. Lá okago nene, agulizakí ve nenémo láa loko limó: Galanava apasatikumú ezáagi itó vená izegipala izava galava itó henokanonagi nene mota vejenalite meinava hizi asú iki alikiko megusa lilí iki minatave. ²⁶ Loko lokago, gelekelé izegipa nenémo voko agulizakí vemámini agisauka alapusa hizeko láa loko limó: Asene zenetoloko voko noako, neza voko mininake moni ale utó okinake apaso asú oko gimitove. ²⁷ Loko lokago, eza ámina hozaló vémíni agulizakí ve nenémo hozaló vevamú miluma gelemiake ahulotamó. Itó lihimalagi nene hanuva ahulotamó.

²⁸ Ahulomikago, ámina gelekelé izegipama numukutí olío lemeake vike hozaló ve agivelahini makó nene moni 100 kina amunaloka emane ameneitó nenazo, ánihoake luvana aleko poló noike láa loko lo ameko limó: Geza moni gumumóma nene mukí apasoko aló nememane. ²⁹ Loko lokago, agivelaho nene agisauka alapusa hizike negénegeka nolike láa loko lo amike limó: Geza asene zeneto-loko voko noako, moni alika ánihoakinake apasoko gimitove. ³⁰ Loko limóza, eza gele ahuloake agivelahinima nene goní omikago nagá numukú ahulitamó. Nenegú minoko lihima asú itive loko kalapusi amimó. ³¹ Lá okago, keza agivelage lugáa nenete ámina suni ánihiake mulúikú golesa gelemó. Golesa giliake keza nene viki agulizakí veninima aveté iki li amemó. ³² Lá ikago, agulizakí veva nenémo ámina gelekelé izegipa nene sele lo amekago, okago, láa loko lo amimó: Gelekelé izegipa golesa neneka, geza negénegeka lako lako lihimaka mukí nene hanuva ahulogetumóma neve. ³³ Neza geikumú miluma gelegetumóma nenazo, geza ámináminoko gigivekahikumú miluma geleko lihimava nene ahulotataninazo. ³⁴ Loko loake, agulizakí veva nenémo izapaló golesa molokago miluma netá aliti-likí niviko minoko lihimavala mukí apasative loko pillisí vetini kigizakú molamó. ³⁵ Loko Izesú loake, miní ameko láa loko limó: Lekeza mukitó nene likigikagú likigivetikini lihima ahulikitamitamó nene, není améneho okulumakú noimó nenémo áminagó oko lekelitoka loló oleetanogo ive.

19

*Izesú vená kimisele ahuloakakumú gako lo kimimó
(Mak 10:1-12; Luk 16:18)*

¹ Izesú nene gakó lo asú oake, Galilaia mikasi ahuloake Zutaia mikasiloka Zota nagamí vola helegaloka vimó. ² Novigo, vegená mukí ámegetiki vamó. Neneloka kivisi vegená nene kelémo zoka zoka oko minamó.

³ Lá noigo, Palisaio monó ve lugáa aitoka ake amekú miliki láa liki lamó: Mosé lo hukoko li gakokú nene ve makolímó netá nemú manamú venala amisele ahulosá neve loko gizonoimóza, nene etahe etamive. ⁴ * Liki likago nene, Izesú láa loko lo kimimó: Lekeza nene monokú gakó láa loko nemó nene gatiki gilinamóma lakagati molokahe:

Gozapá Ómasímó ale utó ikú emane nene vegi venaki kelémo utó onoimóma neve.

⁵ * Itó kelémo utó oake láa loko limó:

Nenemú ve makolímóhe makolímóhe izolahini amelahini ahulokimioko venalagi nene kugupe kigika hamokó loló okiko apiziki minatáive.

⁶ Loko gakó imane limó nenazo, ve aleve keza lositá hóu líki nene minaminigasive. Hamó kugupe loló onoimó gelekave. Nenemú Ómasi nenémó kelémo apizimó nenazo vegenalita nene kelémo hotopotó oakaláa nomive. ⁷ * Loko lo kemekago, Palisaio monó vete láa liki lamó: Mosé nene vená kimisilinigima nene luhuva netá giziki kimiiki kimisililo loko limó nene nanamú live. ⁸ Liki likago, Izesú nene láa loko limó: Mosé nene hanuvamú lamive. Lekelisi ánuvane negi nagi hiziki likigika gopa ovikumule loko vená kimisilitave loko gele likimimóma neve. Lá onoimóza, netá matá apí oko kelémo utó i gamenaló emane nene nenémínoko nomimóma nena. ⁹ * Nenemú nénisi nene láa loko lo nolukumuze, gililo. Ve makolímóhe makolímóhe nene venala mokoló netató negopa ha netakumú amisele ahulokoko haitó vená alitimó nene, lihima napa alinogo ive.

¹⁰ Loko lokago, izegipala zuha leza íi, vegi venaki nene mogona lá oko minokanazo, vená ma aleminake hanuva gohana minatuninazo. ¹¹ Loko lokuko, Izesú láa loko lo limimó: Ve vená mukilite gakó imane aleminigave. Ómasímó zámuza kemeneimoláa kéisigó nene alitamó neve. ¹² Ve lugáa nene izóikini kagatupagutí vená alemoakalímíni utó inamó neve. Itó vegená lugáa nene gohana netá kimiká itó sihana gakó li kimiká iaká ikago hanuva miniaká niave. Itó ve lugáate Ómasímíni luhuva hutilí oko vitikumú giliake vená aleakakumú nene kezáini óe liaká niave. Makó keza nenemú nene zámuza alinitatite gakó imane gili alitamó neve, loko limó.

Izesú izegipa komakama nónohá zeketamó

(Mak 10:13-16; Luk 18:15-17)

¹³ Ámina gamenaló nene izegipa koma koma Izesutoka kilímiki vamó. Eza agizani lutoko gotóitó molonoko nónohá zeketative líki kilímiki nivago, izegipala zuha leza gahá kemehá.

¹⁴ Gahá noluko, Izesú nene láa loko lo limimó: Lekeza izegipa koma nene ahulikimikalo. Nenitoka ataze. Ánémináate Ómasímíni avogisaló viakalímíni mututoni nianazo, lekeza li hoipa ikitamilo. ¹⁵ Loko loake nene, agizanitunú ale nogilike nónohá zeketamó. Lá oake ámina apá ahuloake vimó.

Henonavagi ve

(Mak 10:17-31; Luk 18:18-30)

¹⁶ Ve makó Izesú noitoka ake láa loko loká otake limó: Tisánemaka, neza nana netá lamaná alekinake alévolé nemetameni alitomó neve. ¹⁷ Loko lokago, Izesú láa loko lo amimó: Geza netá lamanakumú nanamú loká nonetane. Lamanalímíni amelaho Ómasi hámakó noinazo, mogonáne gele hee noloko netá lamanakumú loká nonetape. Itó alévolé gemetameni alitove lokoma gapo lota gakó gele alekoko mukí ámegetozo. ¹⁸ * Loko lokago, ámina vémo gapo lota gakokutí hí gakokumú nolane loko lokago, Izesú láa loko limó: Gapo lota gakó lá oko neve: Vegená kepele helemo. Ve aleve suni ale gopa oko huko ezega emega amo. Gumina amo. Soza hakupá gakó lamo. ¹⁹ * Geza nene izokahiko amekahiko kugulizá ale otezo. Gezakamú geleaká noanimómáminoko gígivekaginimú geleko gígika kemezo. ²⁰ Loko lokago, gosohá vemámo láa loko lo amimó: Ámina lo huka gakó mukí nene ámegetoaká noumóma nena. Makó hí netakumú ligitagani okuke alemuve. ²¹ Loko lokago, Izesú láa loko lo amimó: Geza gígika avasavagi minative loko geleokoma, voko henonika mukí meinavaló moloko moni aleoko gohogó vegená kemekoko oko némegetozo. Lá okako, okulumakú alévolé helisa henoni nene geitoka utó inogo ive. Loko lokago, ²² gosohá ve nenémó ámina gakó geleake henona vaí oko minamó nenazo, gona moloko kimitohe loko agata gilitímó mulunagú gena avisekago vimó.

* 19:4: Apí 1:27, 5:2 * 19:5: Apí 2:24 * 19:7: Gapo 24:1-4; Mat 5:31 * 19:9: Mat 5:32; 1 Koli 7:10-11

* 19:18: Gá 20:13-16; Gapo 5:17-20 * 19:19: Gá 20:12; Gapo 5:16; Liv 19:18

²³ Novigo, Izesú nene izegipala zuha lo limike láa loko limó: Neza lamaná lo likimitoze, gililo. Henóiki ve nenete okulumá lapanató silipa iki ititamó neve. ²⁴ Goha makó lo likimitoze. Kamele iza nenémo nakasi vovónagú voakaláa nene vávani oko normímóza, henonavagi vémo Ómasímuni lapanató voakaláa nene genavagi golesa neve. ²⁵ Loko lokago, leza gelekunike ininá goha unimó. Ininá unike loká otunike láa lokoma éaho agutó vizekiko minoloko voko minative. ²⁶ Loko lokuko, Izesú gonú lepele hee lonoike láa loko lo limimó: Vegenalite nenémini itamoláa nomimóza, Ómasi nenémo loló itove loko i netá mukí hanuva loló inogo ive. ²⁷ Loko lokago, Pitá láa loko lo amimó: Gelenape. Leza mukí netá matate ahulokunike geí gémegetokune. Lá onoimó nenazo, leza alika netá makó alesá nehe. ²⁸ * Loko lokago, Izesú láa loko lo limimó: Neza lamaná lo likimitoze. Alika netá matá mukí gosohá utó iti gamenaló nene okulumakutí lumu ve gihila neza lapanánegi noinake gizapa okimiaká siató nougo, némegetiaká nia ve 12-a lekeza ámináminiki lapanatiki miniki gonanalivagi siá 12-a neneló miniki Isilae vegenalitini mulusi 12-a gizapa ikitiki gona milikitangave. ²⁹ Ve vená mukí není nugulizakumule liki numúinihe itó gouna zuhahe izóikinihe améikinihe itó izegipáinihe múinihe ahulatamó nene ahulatátimuni meinava aliliki itíki alitaze. Itó minova minova oaká kemetameni alinigave. ³⁰ Itína goí ina vegenakutí mukilite alika milanigave. Itó alika milina vegenakutí mukilite alika goí inigave, loko limó.

20

Vain mikú hozaló vemú anoza gakola

¹ Ómasímuni luhuva hutilí oko vitikumú hoza aleakalímuni meinaváa nene hamó lelegitó minatítimuni mogona lá oko neve. Ve makolímuni mikasi napa minamó nenémo neteká holugú otekoko vain minagú hoza alitave loko hozaló vemú vítagá oko vimó. ² Vike hozaló vete aliaká amómáminiki gamena hamotó nene 1 kina alitave loko lokago gili amikago vain minagú kimiselekago hoza alitamó. ³ Hoza nalego, neteká ho itekago 9 kilokumaló nene vike ánígamó nene maketiloka ve makó hanuva niago ánígamó. ⁴ Ánígoake lekezagi nene vain mikú hoza alitamó nene moni nene hoza alita avotigila oko likiminogo uve. ⁵ Loko lokago, keza nene viki hoza alemó. Holisakaki itó únakaki 3 kilokumagi voko ánígamó nene ámináminigó imó. ⁶ Únaká 5 kilokuló nene maketiloka voko ánígamó nene ve makó lugáa nene hanuva otinago ánígamó. Ánígoake lekeza neteká únaká imane gamenaló nana okago hanuva otinave. ⁷ Loko lokago, ve makolímó hoza lemémive, liki likago, eza láa loko lo kimimó: Lekezagi není vain mikú viki hoza alilo.

⁸ * Loko loake únaká molokago, vain mini amelaho nene hozaló gizapa veva láa loko lo amike limó: Hozaló ve sele lo kemekako, ikiko, meinaváa kemezo. Alika hozaló a ve nene moni kemeloko novoko goí iki iki hoza alemoláa nene keme lutegezo. ⁹ Loko lokago, gele amekago, únaká 5 kilokuló hoza ale vema nene 1 kina alikago, ¹⁰ keza goí iki hoza ale ve nene meinava napa alitupe liki gelemóza, ma nomimó. Kezagi nene 1 kinasí alimi vamó. ¹¹ Naleke vain mini amelahini nene gahá amiki ¹² láa liki lamó: Keza alika a ve nene hoza gamena koma aletó meinava kezagi hamolímínokogó lemekane. Lá onoimóza, leza nene genavagi hoza ho napa lató itó hómo lugupeló lake govisi lipiligo míluma geleko alekunimómave. ¹³ Liki likago, mini amelaho nene keí holúikutí ve makó láa loko lo amimó: Nigivénega, neza gelémo golesa amuve. Leza ligika molo hamó okusike 1 kina alitane loko lokusimóma neve. ¹⁴ Geza meinavaka alekoko vozo. Meina gumumó nene hamolímínokogó alika a ve nene kimitove loko gelenouve. ¹⁵ Nana onoive. Neza ámina moninetunú netá makó loló itove loko gelenoumóza, nene ma akohenamihe. Neza netá lamaná alegetumóza, geza nenemú gelekako golesa onoihe, loko mini amelaho limó. ¹⁶ * Loko Izesú loake mini ameko láa loko limó: Ámináminiki itínasa alika milina vegená nene alika goí inigave. Itó itínasa goí ina vegenakutí mukilite alika milanigave, loko limó.

Izesú ezáa alika hilitikumú gakó ligo losive makole imó

(Mak 10:32-34; Luk 18:31-34)

¹⁷ Izesugegi nene Zelusale numutoka tivinigi niake gapoló nivake izegipala zuha 12-a nene lelémó apazá zeake láa loko lo limike limó: ¹⁸ Gililo. Itína nene Zelusalega notune. Neneló okulumakutí lumu ve gihila není nene guguní giziaká ve napagi itó monó mogona apí ikimiaká a vegi keí kigizakú milikiko, neneló goní inítiki nipili hilita gakó li hukanigave. ¹⁹ Lá iiki, hetoka vetini kigizakú nilimi milikiko, gopoguka linitiki segi nogosanitunú nipiliiki zohota zaló nipili hilinigave. Lá ikiko, gamena losive makole minokinake goha otinogo uve, loko limó.

* 19:28: Mat 25:31; Luk 22:30

* 20:8: Liv 19:13; Gapo 24:15

* 20:16: Mat 19:30; Mak 10:31; Luk 13:30

Zemusiko Zoniko loká itasi netá
(Mak 10:35-45)

²⁰ Gamena nene zupa Zepetaioni venala nenémo gipala lositá nene Izesutoka kelémoko vike gupá ze amike netá makokumú gele nimitane loko nouve, loko limó. ²¹ Loko lokago, Izesú nene nanetakumú givisekago nolane. Loko lokago, eza láa loko limó: Gele nemekako, gugulizaki ve napa loló okako geí gizapaló nene gipáne lezi imane nene gonanalivagi siató gígílika luga luga minatáive loko noluve. ²² Loko lokago Izesú nene ámina ve lositá láa loko lo kimimó: Lekeza loká initasi netalímíni mogona gili gopa ikasike nilasive. Nénisi nene ekesá netá natomó nene lekelisi nene áminagutí hanuva natáimó nehe. Loko lokago, keza nana ive. Hanuva natáimóma nene. ²³ Liki likasigo Izesú láa loko lo kimimó: Ekesá netá natomó nene lamaná lekezagi natáimóza, není nigílika luga luga minoakaláa není netá nego likimitohe. Améneho ale vavá oketa vegenalitíni siakumú nilasive.

²⁴ Loko lokago, izegipala zuha lugáa 10-a leza ámina gakó gelekunike ligiveteginimú mukhá kepelekuko, ²⁵ * Izesú nene sele lo limike láa loko limó: Mikasigú kugulizaki ve keza mukí nene gelekelé izegipáini nene kagahaisiuka limitigí iki niago gizapa ikimiaká niave. Itó guivahani keza nene vegená ámenenáa kiviligiki miniaká niave. Nene lekeza mota gilinamóza, ²⁶ * lekelitoka nene lá oko minamítize. Lekelitokatí makó nenémo nugulizaki ve minatove loko nolokoma hanuva lemetigí oko gelekelé oleketoko minative. ²⁷ Itó vegená mukí kivilegeko minatove loko nolokoma lemeko lekelí megusa izegipa loló oleketanogo ive. ²⁸ Okulumakutí lumu ve gihila nénisi nene lekeza gelekelé initatave loko lememuve. Vegená mukitoka gelekelé oketoko meina hizeko gologí oketatove loko minoko aleko nugupe ahulanogo lumumóma neve, loko limó.

Izesú kogómula lika ve lositá ale goloutoketamó
(Mak 10:46-52; Luk 18:35-43)

²⁹ Izesúki makó vunike Zeliko apá ahulunimó. Ahulukunike novuko, vegená mukí nenete sii sii liki lémegetiki vamó. ³⁰ Lá niago nene, ve lositá kogómualó alimó nenetosa gapoló minasike, Izesú noave liki nilago gílikasike, Izesuní gamoga giki sele lasike láa liki lasimó: Guivahani geza agulizaki ve Tevitini agávolagamaka gologí oletatane loko lo mololeta vetemaka, lelikumú mílumate geleetamane. ³¹ Liki nilasigo, vegená mukí nenete legesó iki minatáive liki gahá kememó. Lá amóza, keza gili ahulikasike pigi viziki sele lasike láa liki lasimó: Guivahani geza Tevitini agávolagamaka, lelikumú mílumate geleetamane. ³² Liki nilasigo, Izesú nene vike gapoló noike sele lo kemekago, ikasigo láa loko limó: Lekeza nana netá aleketatokumú nilasive. ³³ Loko lokago, logómula imane ale panava zeletatane loko nolusive. ³⁴ Liki likasigo, Izesú nene mílumaváini gelekimiake kogómualó ale nogiligo, ámina gamenaló kogómula goloutokago ángikasike Izesuní ámegetiki vasimó.

21

Sigaga litanigí ago Izesú Zelusalega vimó
(Mak 11:1-11; Luk 19:28-40; Zon 12:12-19)

¹ Lá okago, keza vake Zelusale apá ali alitíake Petepage numutoka Olivi agoka agisauka nene vi anitémo. Neneloka vi anitíake, Izesú nene izegipala zuhagutí ve lositá nokimisílike ² láa loko limó: Lekeza viki helegaloka apá komaló vi anitíiki nene, toki iza izolahiko gipalago nene nagá zikitinamó nene ángiiki vinasiki imaneló kilímiki alizo. ³ Itó vinasiki aliki nisíko nene, ve makolímó loká noleketikoma Guivahanitémo hoza nego imane izamú lokago nousive liki lilizo. Láa líkisíko litá oko gele lekemekíko vinasiki aliki anigasive. ⁴ Loko lokago, vasimó nene hanuva lá amasimó. Ómasímíni agepagutí gakó loaká ve makolímó anoza gakó luhuva gizamó nene haha okative loko lá asimó. ⁵ * Nene láa loko luhuva gizamóma neve:

Zaion agokaló vegená láa liki li kimilo: Gilinahe. Agulizaki velini nenémo lekelitoka novive. Eza lemetigí oko noike nene toki izámíni amupíló iteake noave. Toki izámíni akaleva nenémo agohí gígo húane novive.

⁶ Itó izegipala zuhamate keza vasike Izesú li gakó nene gili alikasike, ⁷ toki iza izolahiko gipalago nene kilímiki asimó. Kilímiki ikasike nene, luhoaká góini nene gololohá ikasike toki iza amegasamaló milikasigo, Izesú neneló iteko minamó. ⁸ Noigo, mukí vegená nenete góini nene gololohá iake gapogú nene avilisá itamó. Itó lugáa nenete kokonasi agila letíake gapogú nene avilisá itiliki vamó. ⁹ * Lá niago, vegená mukí goí iká alika miliká amó nenete gakó napagutí láa liki lamó: Agae, Tevitini agávolagamaka, gegepoka litune. Guivahanitémini gakató antelimikane. Ómasímó lusa gegetative. Agae, veletoka okulumakú Ómasi agepoka

* 20:25: Luk 22:25-26

* 20:26: Mat 23:11; Mak 9:35

* 21:5: Zak 9:9

* 21:9: Age 118:26

litune. ¹⁰ Liki likago, Zelusalega ite anitekago, apá amelage keza nene mulúini itimó. Mulúini iteko séna gekago nene, éaho noago nilave liki likago, ¹¹ Ómasímini agepagutí gako loaká ve Izesúma Galilaia mikasigutí Nasaleta numutotí ve nene noave, liki lamó.

Monó zagusavemú lo hukoketamó
(Mak 11:15-19; Luk 19:45-48; Zon 2:13-22)

¹² Izesú nene vike monó zagusave napagú nene iteko ángoake, áminagú moni meina kona ali volaló imaló a vevenáma kimisele ahuloake, haitó mikasigutí moniló ámina mikasigú moni kimiaká a vetini holoma aleko gululupa soake, itó Ómasímini guguni gizi aminigi nama luhusi miliaká a vevenalitini holoma aleko gululupa soake, ¹³ * lóa loko lo kimimó: Ómasímo li gakó makó nene monó gotolaú lóa liki luhuva gizinamóma neve: Není numunimú nene Ómasiloka loaká numunive liki litave liki luhuva gizinamóma neve. Lóa onoi móza, lekeza nene alími maketi numuni lilí inamó nene guminaló vete halá giki miniaká geha mulí lilí ikamó geleaká noive, loko limó.

¹⁴ Lá oko monó zagusaveú noigo, vevená kogómula likamó itó kigisa kigizató alimó nene aitoka ikago kelémo lamaná oko minamó. ¹⁵ Lá noigo guguni giziaká a ve napa itó monó mogona apí ikimiaká ve nene golivagi netá oko moloko imó nene ángiake, itó izegipa koma nenete monó zagusaveú minake gopaga lake sigaga sagaga litiki, Tevitini agávolahove gegepoka litune liki nilago giliake, kizapaló molokago, ¹⁶ * gakó nilamó nene gelemape liki likago, Izesú lóa loko lo kimimó: Imane vevenalite sigaga nilinitamó nene gelenomóza, lekeza nene monó gotolaú gakó makó lá oko nemó nene gatinamóza, lakagatí molahe: Geza lokako namuni keza aminí ninamó nenete sigaga ligitiki gegepoka linigave.

¹⁷ Lóa loko lo kemeake, Zelusalega ahuloake Petania numutoka vike línugusi zekago neneloka akamó.

Gohuna za usí vizimó
(Mak 11:12-14,20-24)

¹⁸ Akoake gó lokago, neteká Izesú nene nene Zelusalega goha novike gaúna olamó. ¹⁹ Gaúna olokago, gohuna za makó nene gapo gohalaló nego ángoake mogonagú noike gihila zeneihe loko ángimó. Ángimó nene agilagó minokago ángoake gohuna za nene lóa loko lo amimó: Geza nene gihila makó zemoko gohuna loloko voko minatanize. Loko noli agepagí ámina za nene osagava vizimó. ²⁰ Osagava vizekago, izegipala zuha leza ángokunike sigaga loko za imane nana okago litá oko osagava vizive. ²¹ * Loko lokuko, Izesú nene lóa loko lo limimó: Neza lamaná lo likimitoze, gililo. Lekeza nene lakagata losi gelemilo. Gili alévolé iki minatamó nene imane gohuna zamú lumó nenéminiki lekeza alika lilí inigave. Itó nenegó nomive. Lekelisi gili alévolé iminiki agoka makó nene vokane agoka litá oko zeko akutooko age nagamikú holamane liki litamó nene gakotini geze alitimó nene. ²² Itó Ómasiloka netá makokumú voká linigi nene, gili alévolé inikigó litamó nene ámina netá alinigave, loko limó.

Zámuzamú Izesuni loká itamó
(Mak 11:27-33; Luk 20:1-8)

²³ Lá oake nene vike monó zagusaveú goha itike monó lo kemeko minamó. Lo kemeko noigo, guguni giziaká ve napa itó monó gizapa ve keza Izesutoka ake gimivagú miliki lóa liki lamó: Geza imaneloka netá matá azozá alenimó nene éahini gakotó alene. Itó éaho lokago alenimó neve. ²⁴ Liki likago, Izesú nene lóa loko lo kimimó: Nezagi gakó makó loká oleetakotize. Li nimikiko nénsi nene éahini gakotó imane netá lá oaká nouhe nenéa nene lo likimitove. ²⁵ Zoní nene monó nagamí holokimiaká hoza alimó nene hikutí ale utó ive. Ómasímini gakotó alihe itó mikasiuka vevenalitini gakotó alimó neve. Loko loká okimikago kezaitoka ligili hagili niake ámina gakotó nana oko ale viligoko lo amitune liki gelemó nene gopa okago, lóa liki gelemó: Leza Ómasímini gakotó ale utó imole losá nene, eé, lekeza nanamú ai gakó nene gili alévolé amave, loko linogo inae. ²⁶ Itó vevená mukí nenete Zonikumú nene Ómasímini agepagutí gakó loaká veve liki linamóma nenazo, hanuva vevenalitikutí ámina hoza ale utó imole losá nene vevenalite nana ilitatahe loko lehelele vizekave. ²⁷ Liki kezaitoka liake lóa liki lamó: Zonini mogona ma gelemune. Liki likago, Izesú lóa loko lo kimimó: Lóa likima neza netá matá imane aleaká noumó nene, éahini gakotó lá oaká nouhe nenegi ámina oko lo lekememinogo uve.

Gipa lositalitini anoza gakola

* 21:13: Isa 56:7; Zel 7:11 * 21:16: Age 8:2 * 21:21: Mat 17:20; 1 Koli 13:2

²⁸ Gakó makó láa loko lo likimitoze, giliki ánígalo. Ve makolímini gipala losítá minasimó. Améipo nene ganá gipala nene láa loko lo amimó: Geza gipánemaka, itínasa nene voko vain mikú nene hoza alezo. ²⁹ Loko lokago eza alemitove loko loake alika nene genezala ale viligoake gopa voko alimó. ³⁰ Lá okago, alika gipala nenémo amelaho nene ámina gakokó lo amekago, alitove loko loake vike hoza alemoko zozogozo vizeko minamó. ³¹ Itó lekeza nene amelahini gakó éaho gele alimole liki nigeleve. Loko lokago, keza ganá gipala nenémo gele amimole. Liki likago, Izesú nene láa loko lo kimimó: Neza lamaná lo likimitoze, gililo. Takisi moni aliaká vema lekeza ánihi goselé iaká nia vegi itó gapoló vená keza nene Ómasímini avogisaló nene goí i likimiki vinigave. ³² * Zoní lekelitoka aniteko hehe loko minoaká gapo nene lekelepizekago, lekeza nene monolagi gili ahulikamóma neve. Gili ahulikago, takisi aliaká a vegi itó gapoló venaki nene iki Zonini gakola nene gili alévolé ikamóma nemóza, lekelisi nene aí monó gili alévolé amake likigika ali viligamamóma neve.

Vain nagá minimú anoza gakó
(Mak 12:1-12; Luk 20:9-19)

³³ * Loko Izesú loake makó láa loko limó: Neza anoza gakó makó litoze, gililo. Ve makó nenémo mikasiva napa minokago, makotoka vain nagá zuhá o asú oake vego oko geisa hize asú oake, gihila mí zeko liliká ziti gale legeake, gizapa numuni hána geake, gizapa iki niko meínava likimitove loake vegená makó nene gutá kemeake, mikasi makotoka venoni vimó. ³⁴ Voko noigo, gihiláa guzá loaká gamena alitokago, gihiláa makó alinitiki atave loko agulizaki ve nenémo gelekelé izegipala nene kimisilimó. ³⁵ Kimiselekago, vi anitikago, mító gizapa iki mina ve nenete kigizató aliake, makó nene kigizanitunú apelemó, makó nene apili helemó, makó nene gehanitunú apelemó. Lá ikago, gelekelé izegipa makolite viki agulizaki véinima aveté iki li amemó. ³⁶ Li amikago, geleake, gelekelé izegipa mukí goha kimiselekago vamó nene ámináminiki kimisiliki kepelemó. ³⁷ Kimisilikago, vikago nene, agulizaki ve nenémo lá ikave loko ahulamike gipala hámakó nene láa loko geleake amisilimó: Není gipa gihila imane amiselekago, agulizaki vemámini gipalama okaze liki ánihiiki nene alími lamaná itamole, loko geleneike amiselekago nene, vo anitekago, ³⁸ mító gizapa ve keza ánihiake kezáitoka láa liki ligili hagili amó: Imanémo nene mikasi amelahini gipala noinazo, minokoko imane hoza nene ale lá inogo ive. Nenemú nene lélisi apele helekuko helisa henoni nene lelí loló itive, ³⁹ liake nene agizató aliake vain mikutí nene ahejú iliki vake apili helemó. Lá ikamó nenazo, ⁴⁰ nenemú nene mini amelaho aniteoko nagá miní gizapa ve nene nana oketatimó neve. ⁴¹ Loko Izesú nene loká okago, keza láa liki li amemó: Áisi lamaná ámina ve golesa kepele gesá itimóma nena. Itó vain mini nene haitó gizapa ve gutá kemekiko, keza nene guzá lati gamenaló nene gihiláa gona miliki amitave.

⁴² * Liki likago, Izesú nene láa loko miní ameko lo kimimó: Monó gotoláu gakó makó lá oko neve:

Numuni giaká vete gehani napa makó ánihi ahulamó nenémo geha lapusa alévoleláa loló oake noive. Ámina netá nene Guivahanímini gakotó utó okaze. Vegená neneta ánihiokuko nene lamaná okave.

Liki luhuva gizina gakó nene lekeza gatinamóza, lakagatí molahe.

⁴³⁻⁴⁴ Nenemú lo likimitoze, gililo: Ómasímini gizapa olikimiakalímini lusa nene Zuta ve lekelitotí ipá okoko haitó vegená kiminogo ive. Lá okiko lusámini gihiláa ámina vegenalite ali utó inigave, loko lo kimimó.

⁴⁵ Ámina anoza gakó nene lo asú oko lokago, guguni giziaaká ve napa itó Palisaio monó vema keza giliake láa liki lamó: Agae, anoza gakokutí gehanimú limó nene Izesuni ánihi ahulunikumú lokave, liki giliake nene ⁴⁶ agizató alekinake nagá amitune liki lamóza, Izesukumú nene vegená mukilite Ómasímini agepagutí gakó loaká veve liki likamó nenazo, vegenalite lipilikatave liki kelegesá legekago ahulamó.

22

Vená ale kemeaká nosakumú anoza gakó
(Luk 14:15-24)

¹ Izesú goha miní ameko anoza gakó láa loko limó: ² Okulumalímini lapanalímini mututoní lili itakumú nene agulizaki ve makolímo netá matá oko moloko imó neneloka lo moloko aveté oko lo likimitoze, gililo. Agulizaki ve makolímo gipalaló vená alemo molanogo noike nosánetá ale vavá imó. ³ Ale vavá noike gelekelé izegipala kimiselekago, goí oko alesa molo kimi vegená nene iki nosánetá natave liki viki li kememó. Li kimikago, keza nene amánapa ikago, ⁴ gelekelé izegipalama goha nokimisilike láa loko limó: Neza

* 21:32: Luk 3:12, 7:29-30

* 21:33: Isa 5:1-2

* 21:42: Age 118:22-23

alesa molo kumu vešená nene viki láa liki li kimilo: Nosáneta nene mota ale vavá okaze. Pulumaká iza gehato minamoláama itó nosáneta haitopaitolímíni nene mota ale vavá okave. Lekeza vená ale kemeaká nosató nene alo. ⁵ Loko lokago, keza gelekelé izegipa nenete viki ámina gakó li kememóza, keza gilikago goselé kipilimó. Gili ahuliake ha-gelegele amó. Makó nene míniuka vamó. Itó makó lugáa nene hozagazanikú vamó. ⁶ Itó lugáa nenete agulizaki vemámini gelekelé izegipa nene kigizató alinake ali golesa iki kepelemó. Makó lugáa nene kipili helemó. ⁷ Lá ikago, eza agulizaki ve nenémo gele golesa oake, izapaló golesa molokago, pilisi veva kimiselekago, vake ámina gelekelé izegipala kipili hele vešenáma kipili gesá iake numuni apáini nene vitú vitú iki ali golesa amó. ⁸ Lá ikago, agulizaki ve nenémo gelekelé izegipalama láa loko lo kimike limó: Vená ale kemeaká nosá nene mota ale vavá okumóza, alesa molo kumu vešenalitini kemetameni nenémo ámina nosá nata avotigila oko minamive. ⁹ Nenemú lekeza gapo izana koma komagú viki vešená nánigikima alesa míli kimikiko vená ale kemeakató nosá ale vavá uhá nene iki natave. ¹⁰ Loko lo kemekago, gelekelé izegipama nene viki gapo koma komagú mihina ake vešená vóvotiki golesa lamaná mukí nene kilímiki ake nosá ale vavá i numukú nene iki vai i lamaná amó.

¹¹ Vegená mukí iki niago, agulizaki ve nenémo ánikoketanogo itimó. Itike ve makó ángamó nene vená ali keme gamenámini luhiaká nia gó lamaná luhamike noigo, ángoake, ¹² agulizaki vémo láa loko lo amimó: Nigivénega, nana okago vená ali kiminigi niamómámini luhoaká gó luhamanike imanegú iteko noane. Loko ligo, eza gakó litimoláa nomimó. ¹³* Lá okago, agulizaki ve nenémo gelekelé izegipalama láa loko lo kimimó: Lekeza agisa agizató nagá aliiki ali hetó iiki lúmuḡusi apakú ahulimikiko lemeko minino. Neneló minoko ive nama oko miluma maluma geleko agepa atalá oko minanogo ive. ¹⁴ Loko Izesú lo kemeake makó láa loko limó: Ómasímo vešená mukí alesa molo kemeneimóza, vešená lughakó kelémo etó okago itiaká niaive.

Lugupe meina hizeaká gakó

(Mak 12:13-17; Luk 20:20-26)

¹⁵ Izesú láa loko lo kemekago, Palisaio monó ve keza vake láa liki lamó: Nana gaktotunú gelehúsi gekuko nenegú apilitive. Liake nene gakó gona giziki minake, ¹⁶ kezáini izegipáini zuhagutú itó Heloteni izegipala zuhagutú lugáa nene kimisilikago, Izesú noitoka viake láa liki li amemó: Tisalemaka, geí mogonaka gelenoune. Geza gakó gihilagó loaká noane. Gakó lamanakó lanike vešená Ómasímini gapováa vevesoko kelepezeaká noane. Vegenakumú gonukonú osá amane. Vegená iti minamó lími minamó mukí nene leleḡ okogó lainim-okimiaká noane. ¹⁷ Lá onoinazo, geza hanuva lo limitanize. Nanave loko nogelene. Loma gamanímini agulizaki ve napa Sisani nene takisi moní ameká nounimó nene etahe etamive. ¹⁸ Liki lamó nene amemitune loko lokikoma gamaniloka alémoko voko goní otatune. Itó hanuva amitune loko lokikoma Zuta vešenalite gili golesa itave loko Izesú nene keí gakóinímini mogona golesa hanuva geleake, láa loko lo kimimó: Genezatini lositaki neneta, nanamú gimineḡú milanigí nilave. ¹⁹ Takisi monigutú makó nelepipizilo. Loko lokago, moni makó aliki aitoka vamó. ²⁰ Vikago, loká oketake vogunahana imanegí itó imane luhuvagí nene éhini neve. ²¹ Loko loká okimikago, keza gamanímini agulizaki ve napa Sisanive líki lamó. Liki likago eza nene láa likima nene gamanímo voká loaká noi netá nene gamaní amilo. Itó Ómasímo voká loaká noi netá nene Ómasi amilo. ²² Loko lokago, keza nene gakó giliake sigaga limiake ahulimiake vamó.

Hilínitakutí otiakakumú loká itamó

(Mak 12:18-27; Luk 20:27-40)

²³* Ámina gamenaló Satukaio monó vešená lugáa Izesutoka amó. Keza vešená hilinakutí otisá amave líki liaká a vešená nene Izesú noitoka ake, ²⁴* láa liki lamó: Tisalemaka, Mosé láa loko limó: Ve makó izegipala getamoko minoko helekikoma agunalámo ámina gevoná vená nene alekoko uvolaho hili vemú izegipala geto molative. ²⁵ Láa lokamó nenazo, gozapá uvolaho agunala 7-a nene lelitoka minamó. Lá iki minake, ganá ve nenémo vená aleake, izegipa getamike helekago, agunala nenémo ámina vená alimó. ²⁶ Alekago ámina sunimó utó o amekago, lá imi imi vake vake keza ve 7-a nene ámináminigó amó. ²⁷ Keza hili asú ikago, venáini nene alika hilimó. ²⁸ Ámina ve 7-a nenete aí vanagó minikamó nenazo, nenemú hilinakutí goha otita gamena nene ámina venáma éhini venala loló itimó neve.

²⁹ Liki galegutú oteaká gakokumú amé ziki giza itanigí likago, Izesú nene konotó aleko láa loko limó: Lekeza monó gotolauá gakó makó nemóma nene gatinamóza, mogonáa gelemake itó Ómasímo galegutú kelémo oteaká zámuzamú nene ma gelemake gili gopa iki

* 22:13: Mat 8:12, 25:30; Luk 13:28

* 22:23: Apo 23:8

* 22:24: Gapo 25:5

nilahe. ³⁰ Keza hele vejená otita gamena nene vená aleakaláa nene nomive. Itó vená aleme kemeakaláa nomive. Okulumakú ageló nenémíniki gohuna minanigave. ³¹ Lá onoimóza, hele vejená goha otitakumú nene gohakú loká oleetatoze. Lekeza imane gakó Ómasímo lo likimimó nene gatinamóza, mogonáa gilinamahe. Emaneloka miniliki ite vemú láa loko lonoimóma neve: ³² * Neza Avalahani Isakani itó Zakoponi Ómasi minutimina mino loko voko nominuve. Láa loko limó nenazo, nenemú kemeni helenei vejenalitiní Ómasi negopa, kemeniá hanuva ne vejenalitiní Ómasi noinazo, Ómasimú gili zaginake hele vejenaki hanuva mina vejenalitiní Ómasi noive. ³³ Loko lokago, vejená mukí keza gakoláa lo kimikumú nene sigaga sagaga lake agae, vatí oko ale viligoko lo kimive, liki lamó.

Li mila gakokutí napáa

(Mak 12:28-34; Luk 10:25-28)

³⁴ Izesú nene gakotunú Satukaio monó vetini kegepa ze letoko lokago, Palisaio monó ve keza nene gakó nigeleke aitoka iki alegesá iake, ³⁵ keí holúikutí ve makó gakó mogona geleaká i ve nenémo Izesuni amekú molanogo láa loko limó: ³⁶ Tisalemaka, Mosé lo hukoko li gakokutí nene hilímo kivilegeko napa neve. ³⁷ * Loko lokago, Izesú láa loko lo ameko limó: Gigika itó gemeni itó geleakaka mukí nene Guivahani geí Ómasi lehizetozo. ³⁸ Nene gakó nenémo napa iteko neve. ³⁹ * Itó napa otigí nenémo hamolímínigó oko nemó nene láa oko neve: Gezakamú geleaká noanimómáminoko gigivekaginimú geleko gigika kemezo. ⁴⁰ Ámina lo hukoko li gakó losi nenémo Mosé lo mola gakó itó Ómasímíni agepagutí gakó liaká a vete li mila gakolímíni gotoláa loló onoive, loko limó.

Gologí oketative loko lo moloketa vemú loká oketamó

(Mak 12:35-37; Luk 20:41-44)

⁴¹ Itó Palisaio monó ve keza alegesá iki niago, Izesú loká oketake láa loko limó: ⁴² Lekeza Ómasímo gologí oleetative loko lo mololeketa vemamú nanave liki nigeleve. Éhini agávolahogó noitive. Loko lokago, keza agulizaki ve napate Tevitini agávolahove. ⁴³ Liki likago, eza láa loko lo kimimó: Láa likima Sikalahulímo nanamú Tevitini alémo vávani okago Tevití nene ámina vemú nene Guivahaníneve loko live. Tevití láa loko limó neve:

⁴⁴ * Mezaú ve nenémo není Guivahani nene není nigizani zamagaloka mino-loko voko noako, gala vega nene geí gigisa lapuvauka ahuloketanogo uve loko lo amimóma neve.

⁴⁵ Tevití nene gologí oleetative loko lo mololeketa vemú nene Guivahaníne ve loko limó nenazo, ámina ve nenémo nana igo Tevitini agávolahogó noitive. ⁴⁶ Tevitini agapilamola noitimóza, Tevitini ve napagi nene noitive. Loko lokago, ve makolite Izesuni anotó aliki li amemitamó onoive. Keza ámina gamenáminí veletó nene gakó makó loká itatakumú gelego gena okago, gimivagú miliki loká itamisá amó.

23

Monó mogona apí ikimiaká a vemuki Palisaio monó vemuki alévolé oko lo hukonoimole
(Mak 12:38-39; Luk 11:43-46; 20:45-46)

¹ Izesú koma nominake izegipala zuhagi itó vejená mukiki gakó lo limike láa loko limó: ² Keza monó mogona apí ikimiaká vegi itó Palisaio monó vegi Moseni akilí ali hitinake lo mola gakó mukí apí ilikimiaká niave. ³ Lá inake gakó mukí li likimiaká niave. Nene giliiki ámina gakotó ámegetalo. Lá onoimóza, keza iki miliki nia kemetameni nene lekezagi lá amilo. Keza gakó mukí liaká niamóza, kezáini nene ámina gakó ma ámegetisá amave. ⁴ Mosé lo mola gakó nenémo genavagi loló okago vetini kigínagú gihikimikago, gihinago, kezáini nene ámina genavagi netá ma kigizani hisúinitunú kilími vatí itigi iki ma alisá amave. ⁵ * Netá mukí aliaká niamó nene vejenalite ániagi kumu hilitive lokogó neve. Monó gotola pepa nene pokisi komagú miliake golihító miliake nagá ziaká niave. Itó kigizatoki ámina iaká niave. Luhiaká gó napaló nene gonanalisivagi luhuva hána miní amiki akotiake luhiaká niave. ⁶ Lá inake nosánetá napa ninató nene agepaló siakumukó giliaká niave. Itó monó numukú numukú nene kovogisáló minoaká holomamú kumu heleaká noive. ⁷ Itó vejenalite maketiloka geké lilitatave likigó, itó Tisale liki lilitatave likigó giliaká niave. ⁸ Lá onoimóza, vejenalite lekelikumú Tisale liki li likimínigi niko gili kememílo. Ómasi hamokó nene lekelí tisá noigo, lekeza aí izegipala niake hamó lelegitó niave. ⁹ Imane mikasiuka ve makokumú nene ametehave liki lamílo. Ametipo hámakó okulumakú noive. ¹⁰ * Itó lekelikumú nene lukugulizaki veve liki li likimikatave loko noluve. Lekelí guivahani hamó

* 22:32: Gá 3:6 * 22:37: Gapo 6:5 * 22:39: Liv 19:18 * 22:44: Age 110:1 * 23:5: Mat 6:1; Gapo 6:8;

Nam 15:38 * 23:10: Mat 20:26-27; Mak 9:35, 10:43-44; Luk 22:26

nene Ómasímo gologí oleetative loko lo mololeketa ve nouve. ¹¹ Ve makolímó ve napatini loló itove lokoma nene hanuva lemetigí oko gelekéle oleetoko minative. ¹² * Lekelikutí ve makolímóhe makolímóhe ezáa agulizala ale otitimó nene, ezáa agulizala liminogo ive. Itó ve makolímó ezáa agulizala aleko lemeko molatimó nene, Ómasímo agulizala ale napa inogo ive.

Genezáini losigi minakumú gako lo hukoko limó

(Mak 12:40; Luk 11:39-42,44,52; 20:47)

¹³⁻¹⁴ Lekeza Palisaio monó ve itó monó mogona apí ikimiaká nia ve ehe tináneve. Lekeza genezatini losigi niamó neneta Ómasímíni lapanató voaká gapo nene vegeñalitini kovogisalo hizi lí iaká niave. Lekezatini áminagú itisá amave. Itó vegeñá makó itinigi niago, hanuva itikatave liki ánigi ahulikitisá amave.

¹⁵ Lekeza monó mogona apí ikimiaká vegi itó Palisaio monó ve lekezagi genezatini losigi neneta, ehe tináneve. Lekeza age nagamitokagi itó mikasiukagi mihina niake vegeñá makó lekelí izegipatini zuha líl itave liki kilími miliaká niave. Izegipatini zuha líl ikago, lekezatiniímíni iki kilími miluma apakú miliaká niago, kéisi likivilegetigí iki meinímíni mututoni líl iaká niave.

¹⁶ Lekeza kigikámíni agómula likonoiti vema gapo kelepizinigi niamó neneta, lekeza ehe tináneve. Lekeza nene makolímóhe makolímóhe monó zagusave agulizá oko agizani iteko litimó nene nagamí pizekikoma ha netá nemóza, makolímó monó zagusaveú goli gehani agulizá oko agizani ale oteko litimó nene nagamí pizemoko litímíni inogo ive liki iaká niave. ¹⁷ Lekeza negi nagi likigikámíni agómula likamó neneta, nana netalímó iteko neve. Goli gehani iteko nehe itó goli gehani ale etó oko moloaká monó numuni nenémó iteko neve. ¹⁸ Itó ve makolímóhe makolímóhe guguni gizoaká ita veletó neti netá agulizá oko agizani noiteko litimó nene nagamí pizekikoma ha netá nemóza, ita amupiló neti netá agulizá oko agizani noiteko litimó nene nagamí pizemoko litímíni inogo ive. ¹⁹ Lekeza likigikámíni agómula lika ve neneta, guguni gizoaká nenémó iteko nehe, itó guguni ale etó oko moloaká ita nenémó iteko neve. ²⁰ Nenemú ve makolímó guguni gizoaká italo agulizá oko agizani noiteko litimó nenémó ita veletó neti netaki agulizá oko agizani noiteko litimó geleká noive. ²¹ Itó ve makolímóhe makolímóhe monó zagusave agulizá oko agizani noiteko litimó nenémó monó zagusavegi monó zagusaveú minoko aleko oaká noi Ómasígi kugulizá oko agizani noiteko litimó geleká noive. ²² * Ve makolímóhe makolímóhe okulumá agulizá oko agizani iteko litimó nene, Ómasi minoaká noi holomagi holomaló minoaká noi Ómasígi kugulizá oko litimó geleká noive.

²³ * Lekeza monó mogona apí ikimiaká vegi itó Palisaio monó vegi ehe tináneve. Lekeza genezatini losigi vese, mikú noguni mupanuha itó za silogehenigitana oko anuva oaká netá haitopaitolímíni nene aliake netá 10 10 minakutí hamopamó nene Ómasímíniive liki amiaká niave. Lá iaká niamóza, lo huka gajokutí iteko minamoláa napa nene hehe loko minoko vegeñá gona moloaká itó likigika hize kemeaká itó Ómasimú gele alévolé oaká netá nene ahulikave. Netá matá 10 10 nekutí hamopamó Ómasi ameaká netá nene ahuloakaláa nomimóza, nolu netá napa nenegi hanuva loló oaká netá neve. ²⁴ Lekeza kigikámíni agómula likonoiti vema gapo kelepizinigi niamó neneta, netá koma likigika ale gopa ameaká netá nene gizaká iki alí ahulíake lekelémó gopa oaká netá napa nene hanuva gopa niki mikilí iaká niave.

²⁵ Lekeza monó gako apí ikimiaká nia vegi Palisaio monó vegi, lekeza ehe tináneve. Lekeza genezatini losigi nego nagamí goni itó lape hetoláa nagamí zinake agikágú nene guminaló suni itó lukugupémó ániago amu hili netá nene goni vizi vai iaká niave. ²⁶ Palisaio monó ve gigikámíni agómula likonoimó neneka, geza gigikaka nagamí zeko ale guni onako hetokagi nene guluvitanogo ive.

²⁷ * Lekeza monó mogona apí ikimiaká vegi itó Palisaio monó ve neneta, ehe tináneve. Genezatini losí nego gako losí iaká niave. Lekeza nene gonosi milimiló vegeñalíte ángikiko kumu hilitive liki simeniló gonanalisi iki guhí hiliaká niamó nenémíni niave. Hetoláaloka ániagi lamaná iaká niamóza, gale agikágú nene hele vegeñalitini gonosi zamuza neike anuva oaká netá áminagú vai onoive. ²⁸ Lekezagi lá ikigó niave. Vegeñalíte hanuva lukugupeló nánigake lekeza hehe liki niave liki giliaká niave. Likigikágú nene soza loaká gokolímó itó li huka gako pelevesava ziaká netalímó vai oko neve.

Lihima alika kumupiló ititikumú gako lo kimimó

(Luk 11:47-51)

* 23:12: Luk 14:11, 18:14

* 23:22: Isa 66:1; Mat 5:34

* 23:23: Liv 27:30

* 23:27: Apo 23:3

²⁹ Lekeza monó mogona apí ikimiaká vegi itó Palisaio monó ve neneta, ehe tináneve. Lekeza genezatini losigi ve neneta, Ómasímini agepagutí gako liaká a vetini gonosi milimili numuni lamaná lili iake hee liki iki miliki a vetini gonosi milimili nene gonanalisi ikimiake, ³⁰ leza gozapá avotegini gamenaló minutilina, Ómasímini agepagutí gako liaká a ve makó kepele hele vejená nene kelémo vatí amutiline liki liaká niave. ³¹ Nene gako li utó iaká niamó nene lekezatini mogonatinimú nilave. Lekeza Ómasímini agepagutí gako liaká a ve kipili hele vetini kagapilamó zuha niave. ³² Avotikini mogona golesa nene lekelitoka vo aleko neve. ³³ * Lekeza gosihalímini agapilamó zuha neneta Ómasímini goní nenémo lekelémo ló apakú molanogo ive. Lekeza keé liki golisi aminigave. ³⁴ Nenemú gililo. Neza Ómasímini agepagutí gako liaká a vegi itó monolímini mogona apí ikimiaká nia vegi itó monó pukugutí giliaká nia vegi kimiselekugo lekelitoka vinigave. Keí holúikutí nene lekeza lugáa kipili hiliiki lugáa nene zohota zaló gánava ziki apatiiki lugáa nene monó numutikú segi nogosanitunú kipiliiki apá napa makokuti nene gimiziliki viki haitó apakú ahulikitanigave. ³⁵ * Lá ikiko, mukí hee liki nia vejená kipili helemómámini lihima nene lekelí lukumupiló iteko minanogo ive. Hehe loko mina ve Epoloni apele nohiligo golani leki gamenalotí nene ve lugáa kipili hililiki nivago, Palakiani gipala Zakaliá nene monó zavusave itó guguni giziakató nenémini holutó noigo lekeza napelego golani lekimo keí golanímini lihima mukí nene lekelí lukumupiló itinogo ive. ³⁶ Neza lamaná lo likimitoze, gililo. Ámina mogonámini lihimaivaláa nene imane oko moloko nou netá ániagiaká nia vejenalítini kumupiló ite asú inogo ive.

Izesú Zelusale vejenakumú ive imó
(Luk 13:34-35)

³⁷ Kee, Zelusale vejenáise, lekeza Ómasímini agepagutí gako liaká a ve kipili hiliká itó Ómasímo hozaló kimiselekago lekelitoka a ve gehanitunú ahuli miliki kipili hiliká iaká niave. Neza nene lekelí izegipatini zuha nene okolohómo izegipala ale amakuka moloaká noimómáminoko kelémo mulúneuka molanogo oaká noumóza, lekeza gili nimisá amave. ³⁸ Lekeza gililo. Ómasímo viselelikimikiko, apatini nene gámé pizinogo ive. ³⁹ * Láa loko lo nolukumuve. Není nene goha áninagamiki miniliki viki alika Guvahanímini gakató anitelimikane, Ómasímini lusaló okane liki li niminigave, loko limó.

24

Alika monó zagusave ali golesa itakumú lo kimimó
(Mak 13:1-2; Luk 21:5-6)

¹ Izesú eza monó zagusave ahuloake novigo, izegipala zuha leza monó numunima alapizinogo aitoka unimó. ² Lá unimóza, eza láa loko lo limimó: Lekeza numuni mukí imane nánigahe. Agae, neza lamaná lo likimitoze, gililo. Monó numuni napámini gehani mukí nene apiliki tele vizikiko gehani nene amupiló amupiló iki mililiki itekutí zeko gululupa so asú inogo ive. Itó ziki lana iiki ali hutilikatilí inigave.

Miluma gilituni gamenámini ganá netá
(Mak 13:3-13; Luk 21:7-19)

³ Loko loake, koma minake, Izesú eza Olivi agokaú mitó noigo, izegipala zuha lezagó aitoka itekunike láa loko loká otoko lunimó: Geza lo lemezo. Itina utó iti netakumú lanimó nene nanahé utó itive, itó mikasiuka netá matá asú iti gamena itó geza atiginá itani gamena alitokiko nana anosa utó okiko ániogokinake gele hee litune. ⁴ Loko lokuko, Izesú nene lonotó aleko láa loko limó: Ehe, gizapa ilo. Ve makolímó atiginá oko ato gamenamú lokogoka vizekatize. ⁵ Ve mukilite nanitiki není nugulizató liki neza Ómasímo gologí oleketative loko lo mololeketa vema nouve liki vejená mukí kogoka vizininigave. ⁶ Lekeza haitopaitó lovámini gakoláa giliiki itó lova hizinigi niko nenémini gakoláa gilinigave. Lekeza ehe tináneve. Lekeza mulutini itemino. ⁷ Ómasímo netá nenémináa utó itive loko lonoimóza, mukí netá matá velesá asú aminogo ive. Numutó namató vejená makolite gala véini lova ali nikimiko, itó numutó namató agulizaki ve napa makolímímini zuhagi itó makolímímini zuhagi lova hizininigave. Itó haitopaitó mikasiuka gaúna gamena utó oko mino-loko noitiko mukí mikasiuka nene imimá napa omo noviko, ⁸ miluma netá nenémináa utó itimó nene venalite izegipa getanigi miluma giliaká niamó nenéminoko utó inogo ive.

⁹ * Ámina gamenaló nene likigizató aliki viki goní ilikitiki miluma netá alilikitanigave. Itó lá niiki lekelikutí makó likipili hilinigave. Není nugulizá lekelitoka minakumule liki

* 23:33: Mat 3:7, 12:34; Luk 3:7

* 23:35: Apí 4:8; 2 Iki 24:20-21

* 23:39: Age 118:26

* 24:9: Mat 10:22

vegená mukí nenete mukahá likipilinigave. ¹⁰ Ámina gamenaló nene vevená mukilite Ómasimú gili alévolé iakáini nene ahulanigave. Keza nene eza amimí iko eza amimí iko iki gasó eza amiko eza amiko inigave. ¹¹ Lá niko, mukí Ómasímíni agepagutí gako liaká ve sozámíni utó iiki vevená mukí kogoka vizinigave. ¹² Golesa mogona nenémo hutilí noiko, vevená mukí nenete kigika kemeaká netá nene geha zinogo ive. ¹³ * Lá onoimóza, makó keza gamenaváini asú ititó monó ahulamiki alévolé iki minatamó nene, Ómasimo kugutó vizinogo ive. ¹⁴ Itó Ómasímíni gasovaló minoakalímíni gako lamaná nene mikasi nekisa vokisauka numutó namató vevená mukitoka giliiki gili alitahe liki nene li hutilí i asú inigave. Lá ikiko gamena asú inogo ive.

Miluma geleaká gamena napámíni gakola
(Mak 13:14-23; Luk 21:20-24)

¹⁵ * Lekeza nene mulikizapa iti netá golesa nene apá ale golesa oaká netá gozapá Ómasímíni agepagutí gako loaká ve Tanielé nenemú limó nenémo etó o mína numukú oteneiko ániganigave. (Imane gako gatatanimó neneka nene gakokumú gele guni ozo.) ¹⁶ Ámina gamenaló Zutaia mikasiuka nita vevená nene golisi iliki agokaloka ititakumule. ¹⁷ * Keza makó numuni numupitó nita vevená nene golisi iliki limiki henonímíni nene numúikutí ma aliki vamitakumule. ¹⁸ Vegená makó mikuka nitakutí nene numukuka luhoaká góini alitune liki atiginá iki vamitakumule. ¹⁹ Kee, izegipa kagatupagi nita vená itó izegipa namuni aminí nikimita vená nene nana itamó neve. ²⁰ Lekeza nene nolu netakutí golisi ita zupa nene golini gamenagú ahe itó Ómasimo lo mololeketa holisi gamenagú ahe utó amitive liki Ómasiloka likigó minalo. ²¹ * Ámina gamenaló nene genavagi netá napa utó itimó nenémo mikasi nene gosohá nego nenéminoko utó amigo minoloko iteko imane gamenaló utó amive. Nolu gamenaló nene utó okoko, nenémíni veletoka goha utó aminogo ive. ²² Lá onoimóza, Ómasimo ámina miluma gilita gamena ale atuhá amitimó nene vevená makó ma kavasavagi minamitamóza, Ómasimo kelémo etó i vevenakumule loko ámina gamena ale atuhá inogo ive.

Okulumakutí limi ve gihila atiginá iti gako
(Mak 13:24-27; Luk 21:25-28)

²³ Ámina gamenaló ve makolimo ángalo, gologí oletati vema imaneloka utó okave, itó volane noive loko lo nolikimikoma lekeza gili zagemilo. ²⁴ Ámina gamenaló gologí oleketati ve sozámíni itó soza saza Ómasímíni agepagutí gako liaká ve utó iiki Ómasimo kelémo etó onoi vevená kogoka vizitupe liki vevenalite sigaga lita netaki soza alévolé sunigi lílí iki avevezaha inigave. ²⁵ Gililo. Imane nolu netá utó onamigo mota lo lekemekuve.

²⁶ * Itó ve makolimo ángalo, Ómasimo gologí oleketati vema nene mikasi gomopalaló noive loko lo nolikimikoma, lekeza neneloka vamilo. Itó ángalo, eza nene vozane numukú halá geko noive liki nilikoma, lekeza gili zagemilo. ²⁷ Okulumató gó melevéz itimó nene ho noitikukatí ho nolimitoka vinogo ive. Okulumakutí lumu ve gihila neza nenéminoko omo nougo lekeza není ángi asú inigave. ²⁸ * Netá helemó gonosiváa nekú nene nama gosúveha mukilite litá iki ángiiki alegesá iaká niave. Ámináminoko okulumakutí nolumugo mukí vevenalite ángi asú inigave.

²⁹ * Nene gamenaló ámina genavagi netá nene asú okiko, ho nene noitiko litá oko límugusi zekiko, ikanímó hize sata amiko, itó sonohí nene okulumatotí atohimí niziko, okulumató amuzavagi netá nene mómoká i asú inigave. ³⁰ * Lá ikiko, okulumakutí lumu ve gihila goha ato anosa nene okulumató utó noiko, imane mikasiuka není gako gelema vevená mulusi mukí nene ive nama inigave. Lá niiki okulumakutí lumu ve gihila neza alévolé zámuzánegi itó lapanánegi nene okulamalímíni límusi amupiló nolumugo ániganigave. ³¹ Agelóne kimiselekugo, pikuli nene anó napa nomiliko kelémo etó u vevená ezega emegatí ho noititokatí ho nolimitokatí itó mikasi nekisa vokisalokatí kilími nupa inigave.

Gohuna zámíni anoza gakola
(Mak 13:28-31; Luk 21:29-33)

³² Lekeza za gohunámíni anoza gakola gili vevesiki gililo. Izanámo nene nagamila nego ágila guluma sekago, lekeza ángiake hogai gamena mota alitokave liki liaká niave. ³³ Ámináminoko lekeza imane nolu netá mukí utó noiko ángiiki guivahanite anogo gatekú

* 24:13: Mat 10:22 * 24:15: Tan 9:27, 11:31, 12:11 * 24:17: Luk 17:31 * 24:21: Tan 12:1; Ali 7:14 * 24:26: Luk 17:23-24 * 24:28: Luk 17:37 * 24:29: Isa 13:10; Zoe 2:10,31, 3:15; Ali 6:12,13; Izi 32:7; Isa 34:4 * 24:30: Tan 7:13; Ali 1:7

omo alitokave liki gilitaze. ³⁴ Neza lamaná lo likimitoze, gililo. Oko moloko oaká nou netá áningina vejená velesá hili asú inamiko imane nolu netá mukí utó inogo ive. ³⁵ Mikasigi itó okulumaki tolova itáiha, imane lonou gakó nene ma gopa oko tolova aminogo ive.

Gamena napamú gelemune
(Mak 13:32-37; Luk 17:26-30,34-36)

³⁶ Lá onoimóza, ámina gamenamú ve hamoláate keké gelemave. Okulumakú agelogegegi nene ma gelemave. Gipala nezánegi ma gelemuve. Améneho hamokó áisi geleneive. ³⁷* Okulumakutí lumu ve gihila není gamena alí noliko Noá mina gamenaló lilí a mogona áminagó oko utó inogo ive. ³⁸ Gozapá nagamí napa velesá velenamigo, nene gamenaló zahí nagamí niki minake vená meinakona ake zuguzugu zezezege viziki miniliki niago, Noage sipigú itemó. ³⁹* Ámina vejenalite Noani nagamí viliti gakó gili ahuliake gopa niago, nagamí napa vilike vejená mukí kepele gesá imó. Okulumakutí lumu ve gihila neza ato gamena nene lá oko utó inogo ive. ⁴⁰ Ámina gamenaló ve lositá nene makó mikú hoza nalisiko, Ómasímo maga ve alémokoko maga ve ahulotanogo ive. ⁴¹ Vená lositalitosa nosá isiki nisiko, Ómasímo vená magáa alémokoko magáa ahulomikiko minanogo ive.

⁴² Nenemú Guivahanitini ati gamena nene lekeza ma gilinamamó nenazo, lekeza gizapa keké viziki minalo. ⁴³* Lekeza gakó imane gili minalo: Numuni amelaho nene guminaló ve atikumú gilitimó nene, gizapa noiko guminaló ve oko numuni zeko epetooko henoni nene aleminogo ive. ⁴⁴ Ámináminoko okulumakutí lumu ve gihila neza atokumú negeva iki minamita gamena atomó nenazo, lekezagí ali vavá iki minalo.

Litokó alévolé oko Ómasi gelekelé otatuni gakó
(Luk 12:41-48)

⁴⁵ Není gelekelé izegipa makó nene gele vevesiniki gili minatamó itó hozaváini nene litokó aliki minatamó nene mognamú anozo gakó lo likimitoze. Gelekelé izegipa makolímó gizapa vevámo aí numukú netá matató gizapa oko minoko hozaló izegipa lugáa gizapa oketative loko lomikiko nosánetá nata gamenaló gona moloko kimitive. ⁴⁶ Gizapa veva nene okoko ámina gelekelé izegipa nene goí oko lotatímínoko hoza nalikoma ángatimó nene ámina gelekelé izegipamú gulugo agoliza vizitimó neve. ⁴⁷ Neza lamaná lo nolukumuve. Gizapa vevámo gizapa lamaná i izegipama mukí netató gizapa ve loló otanogo ive. ⁴⁸ Lá onoimóza, ámina izegipama gelekelé izegipa golesa noitimó nene není gizapa ve nene litá oko aminogo ive loko mulunagú gelekoko ⁴⁹ hozaló izegipa lugáa nene nokepeleko itó piá nagamitó ve kezagi niki minatamó neve. ⁵⁰ Lá iki niko, ámina izegipámini gizapa veva nene ámina izegipama ageva oko minamiti gamenahe itó gatizá minati gamenahe okoko ⁵¹ ámina gelekelé izegipa nene agupe apelevo hukovo okoko soza liaká ve genezáini losigi mina ve niakú alémo molanogo ive. Lá okiko ámina apakuka minoko ive nama oko miluma maluma geleko agepa atalá oko minanogo ive.

25

Zaha vená 10 kei anozo gakola

¹* Ato gamenaló nene okulumálímíni gasovaló vita mogona nenémíni oko neve. Vená goliló ve anogo noigo, zaha vená 10-a nenete alímíni vati inígi lamu lóini aliiki víki gapoló hotu lokinake zaha venáma noitoka alemoko atune liki vamó. ² Keikutí vená 5 nene negi vená minamó. Itó vená 5 nene kagata koló onoimó. ³ Keza negi vená nenete lamu lóini aliki vamó nene nagamílagi aliki vamamó. ⁴ Keza kagatagi vená nenete hela nagamí nene gonígú leki míliake lamu loki nene aliki vamó. ⁵ Vená goliló ve nene litá oko amigo, keza zaha venáma nene kogómula ahihi okago aki minamó. ⁶ Lá iki akinago, holugú akovevé nene sele makó láa loko utó imó: Vená goliló vema mota okave. Lekeza víki gapolotí alímiki ataze, viló. ⁷ Liki likago, keza vená nenete otiake lamu lóini nene levonaha ali ahuliake ló ligi mílamó. ⁸ Lá iake, keza negi vená nenete kagatagi mína venáma láa liki lí kememó: Lekeza kalasini makó limílo. Lelí lamutegú nene nagamíma asú okago mota lihanogo noive. ⁹ Liki likago, keza kagatagi mína vená nenete láa liki lí kememó: Óe, lekeza víki situakutí meina hizemave. Lekelitokagí lelitokagí vo alemítí avotigíla oko minokave. ¹⁰ Liki likago, keza negi venáma situakú kalasini meina hizinígi víki niago, eza vená goliló vema anítimó. Lá okago, keza ali vavá iki mína venámagi makó itiki numukú minake vená ali kimiaká nosakutí namó. Itó gahe nene giki etoha amó. ¹¹ Lá ikago vená lugáama alika ake láa liki sele lamó: Guivahanitemaka, guivahanitemeka, gahe segeletozo. ¹²* Liki likago, eza láa loko

* 24:37: Apí 6:5-8

* 24:39: Apí 7:6-24

* 24:43: Luk 12:39-40

* 25:1: Luk 12:35

* 25:12: Luk 13:25

lo kimimó: Neza lamaná lo likimitoze, gililo. Lekelí nene ma ángo hee lamu vená niaze, vilo. ¹³ Loko Izesú nene loake, miní ameko láa loko limó: Nenemú lekeza ato gamenamú ma gilinamamó nenazo, gizapa i guni iki minalo.

*Gelekelé ve losive makolemú anoza gakó
(Luk 19:11-27)*

¹⁴ Atiginá inake není gizapaló mina vegealite iki miliki inakumú goní oketatomó nenémuni mogonamú anoza gakó makó lá onoive. Ve makolímó venoní vinogo noko gelekelé izegipala sele lo kemekago, ikago, ai netá mukí nene gizapa initatave loko kígizakú molamó. ¹⁵ Eza nene gelekelé izegipalatiní mogonamú itó zámuzáinimú hamopamó geleneike nenémuni avotigila oko moni nene gona moloko kimimó. Ve makó nene 5 tausen kina amimó. Ve makó nene 2 tausen kina amimó. Ve makó nene 1 tausen kina amimó. Lá oake nene, gapo hána venoní vimó. ¹⁶ Vokago, ámina 5 tausen kina amí vemámo vike pisinisi ike polopeti moni 5 tausen kina makó ale utó imó. ¹⁷ Itó eza 2 tausen kina amí vemámo ámináminoko pisinisi ike 2 tausen kina ale utó imó. ¹⁸ Itó 1 tausen kina ali vemámo agulizakí vemámini moni nene aleko vike mikasigú gale legeake gale zimó.

¹⁹ Gamena hána oko vokago, gelekelé izegipatiní kugulizakí vema atiginá oake ámina moni gozapá kemeneikumú nene gakó hoza aliki ali hee litave loko gelekelé izegipama sele lo kimimó. ²⁰ Lá okago ámina 5 tausen kina ali ve nenémó ake láa loko limó: Gugulizakí venemaka, ángo. Geza 5 tausen kina nenenimó nene neza voko pisinisi uke 5 tausen kina goha makó ale miní ameko ale utó okuke aleko nouve. ²¹ Loko loake amekago, eza agulizakí vevámo láa loko lo amimó: Geza gelekelé ve lamaná noane. Geza vatí oko hozaló gizapa lamaná okane. Hoza komaló ale guni oko gizapa lamaná okanize, nenemú mukí netá gemekugo gizapa itane. Geza oko gugulizakí vegagi logoliza vizeko minatíve. ²² Loko lo amekago, eza 2 tausen kina amí ve nenémó ake láa loko limó: Gugulizakí venemaka, ángo. Geza 2 tausen kina nenenimó nene aleko vuke pisinisi okuke 2 tausen kina makó goha ale miní ameko ale utó okuke aleko nouve, loko limó. ²³ Loko loake amekago, agulizakí vevámo láa loko lo amimó: Geza gelekelé ve lamaná noane. Geza vatí oko hoza lamaná oko gizapa okane. Geza hoza komaló ale guni oko gizapa lamaná okanize, nenemú mukí netá gemekugo gizapa itane. Geza oko gugulizakí vegagi logoliza vizeko minatíve. ²⁴ Loko lo amekago, eza 1 tausen kina ali ve nenémó ake láa loko limó: Gugulizakí venemaka, geí mogona mota gelenoumole. Geza gínikaha ve noane. Ve makolíte miní zuhá inató minumuni omolokago géisi nosá aleko asutoaká noane. Itó ve makolíte hoza alikago gihiláa utó okago géisi aleaká noane. ²⁵ Lá oaká noanikumú neza nehelele vizekago, ámina 1 tausen kina nene aleko voko mikasigú gale zenoumole. Ména. Geza netaka imane alitane. ²⁶ Loko lokago, ve napava nenémó anotó aleko láa loko limó: Geza hozaló ve golesa goselé vaseletó ve noane. Geza není mogona gelenane. Ve makolíte mikú netá zuhá inató nosá aleko asutoaká nouve. Itó vegeaná makolíte zuha netá gihila atilí inató minumuni omolokago netá gihila aleaká nouve. ²⁷ Nenemú není moni nene pení numukú molataninazo, nanamú neve. Lá onako neza goha inake ámina moniló miní ameke nimilínitiko voko alitonazo. ²⁸ Lá okanize, aitokatí ipá iki 10 tausen kina ale mina vema amilo. ²⁹ * Gililo. Vegeaná netá ali miniki gizapa lamaná iki minatamoláa nene goha miní ameko kiminogo uve. Lá onoi móza, ve makolímó netá koma ale minoko gizapa lamaná amitimó nene goha ipá oko alinogo uve. ³⁰ * Itó ámina hozaló ve goekae ovimoláa nene amisilí hetó ikiko límugusi apakú lemeko ive nama oko miluma maluma geleko agepa atalá oko minanogo ive, loko limó.

Gamena napaló gona mololetati gakó

³¹ * Okulumakutí lumu ve gihila nene lapanánegi noinake agelogege makó inake gonanalivagi siató minanogo uve. ³² Lá oko nougo, keza mikasiuka vegeaná mukí iki novogisaló alegesá inigave. Lá niko, neza gona moloko vegeaná nene kelémo losí molanogo uve. Izaló gizapa vémo meme iza kelémo haitó noike itó sipsip iza kelémo haitó oaká noimó nenémuni oko ³³ neza sipsip izagitana nia vegeaná nene kelémo nigizani zamagaloka milinake, meme izagitana nia vegeaná nene kelémo sogaloka molanogo uve. ³⁴ Lá okinake nugulizakí ve noumó imanémína nigizani zamagaloka mina vegeaná nene láa loko lo kiminogo uve: Améneho nónohá zeleketa vegeaná neneta, gililo. ³⁵ Neza gaúna nohulugo nosánetá nimiaaká amó, itó nagamikumú nonivisigo nagamí ihimi nimiaaká amó, itó veno ve loló okuke nougo numutikú nilími miliaká amó. ³⁶ Ginegane nomigo ginegane nimiaaká amó. Nivisekago nougo lekeza nasahilí inimiaká amó. Nagá numukú nougo lekeza iki áninigiaká amó. Lá iaká amó nenazo, gozapá mikasi apí oko ale utó inogo Ómasímini

* 25:29: Mat 13:12; Mak 4:25; Luk 8:18

* 25:30: Mat 8:12, 22:13; Luk 13:28

* 25:31: Mat 16:27, 19:28

gizapal0 minata apá ale vavá oleketonoimóma nene iki alilo. ³⁷Loko lo kemekugo, keza hee liki mina veená nene lóa liki li niminigave: Guivahanitemaka, leza nanahé zupa gaúna nogolago ángokunike nosánetá gemehá neve. Itó nanahé zupa nagamikumú nogivisigo nagami ihemo gemehá neve. ³⁸Itó nanahé zupa veno ve loló oko noako numuteuka gelémo muluhá neve. Itó nanahé zupa ginegane nomigo leza ginegane gemehá neve. ³⁹Itó nanahé zupa givisekago noako ánguhá neve. Itó nanahé zupa nagá numukú noako ánguhá neve. ⁴⁰Liki likiko, neza nugulizaki ve noumó imanémína lóa loko lo kiminogo uve: Neza lamaná lo likimitoze, gili minalo: Vegenáne zuha limiki minamoki loló oketupe liki lilí amó nene není lilí initamó gelekave.

⁴¹Loko lo nokiminake nigizani sogaloka minata veená nene lóa loko lo kiminogo uve: Usilímíni mututoni lekeza gililo. ⁴²Neza gaúna heleko nougo nosánetá makó nimisá amamó. Nagamikumú nonivisigo nagami ihimi nimisá amamó. ⁴³Neza veno ve loló okuke nougo lekeza numutikú nilími milisá amamóma neve. Itó gineganemú vitagá nougo ginegane ma nimisá amamóma neve. Itó nagá numukú nougo itó nivisekago nougo lekeza ma iki ánginitamamóma nenazo, není ahuliiki viki ló lihamike lova lova oko nomina ló améneho Satagegi itó agelolagi ale vavá oketonoimó nenegú limilo. ⁴⁴Loko lo kemekugo, keza lóa liki li niminigave: Guivahanitemaka, geza nanahé zupa gaúna heleko noako itó nanahé zupa nagamikumú nogivisigo itó nanahé zupa veno ve loló oko noako itó nanahé zupa gineganega nomigo itó nanahé zupa givisekago noako itó nanahé zupa nagá numukú noako gelémo vatí amuhakumú lane. ⁴⁵Liki likiko, neza lóa loko lo kiminogo uve: Neza lamaná lo likimitoze, gililo. Imane mikasiuka limiki mina veenaki lá ikitamamó nenémo není lá initamamó gelekave. ⁴⁶* Loko lo kemekugo, ámina veená nene miluma apakú viki miniki miluma asú amoakalímíni alinigave. Itó hehe liki mina veená nene alévolé kemetamenigi minova minova oaká apat0 viki minanigave.

26

Izesuni apilínigi lova gizamó

(Mak 14:1-2; Luk 22:1-2; Zon 11:45-53)

¹ Izesú nene ámina gakó lo leme asú oake ámina gamenaló izegipala zuha lóa loko lo limike limó: ²* Gamena losi oko vokiko gozapá avotikini asenini zeketakumú gele minoaká holi sí utó inogo ive liki lekeza gilinave. Lá noiko, okulumakutí lumu ve gihila neza nene ve makolímó nimimika loko lova vetini kigizakú nelémo molokiko zohota zaló nipili hilinigave, loko limó.

³ Ámina gamenaló monó gizapa vegi guguni giziaká vegi keza Isilae veganalitini guguni giziaká ve napatini gizapa venini Kaiapani numuni napagú alegesá amó. ⁴ Keza asuguná iki Izesuni agizat0 aliki apili hilita gakó ligili hagili iki li hukamó. ⁵ Lá amóza, ámina holisigú apele helemítune. Veganalite lova napa ali utó iki lipilikataze, liki lamó.

Petania apatoka Izesuni anuva lamanaki uveli holotamó

(Mak 14:3-9; Zon 12:1-8)

⁶ Izesú nene Petania numutó nene Saimon eza halamé gizaleake minake zoka vémini numukú minamó. ⁷* Lá noigo, vená makó aitoka ake agizakú anuva uveli meinava iteko mina netá nene gehanigitana gonigú aleake Izesú nosánetá noko noigo gotolau leketamó. ⁸ Lá noigo, izegipala zuha leza ángokunike gele golesa nounike lezateloka lóa loko lunimó: Anuvagi uveli lamaná nene nanamú latila noive. ⁹ Itó leza ámina anuvagi uveli nene hanuva minalina, veená meina hizitave loko kemesá nene meinava napa alekunike gohogó veená kumutíline. ¹⁰ Loko noguluko Izesú nene gakote geleake lóa loko lo limimó: Lekeza imane vená nana igo genavagi gakó li nameve. Eza nene netá lamaná alenimikave. ¹¹* Gohogó veená keza nene lekezagi miniliki viki minatamóza, neza lekezagi gamena hána minoloko voko minaminogo uve. ¹² Vená imanémo gonosi milimiligú gale zinitatakumú geleake nugupeló anuvagi uveli holonimikave. ¹³ Neza lamaná lo likimitoze. Mukí mikasiuka není gakó lamaná imane li utó iki li kimitat0 li kimitat0 nene imane venalímíni mogonamú gili zagitave liki eza loló oneta sunimú li kiminigave.

Zutá Izesuni amimika litove loko lo hutamó

(Mak 14:10-11; Luk 22:3-6)

¹⁴ Loko lokago, ámina gamenaló izegipala zuha 12-a lelikutí Kaliot0 numutotí ve agulizá Zutá áisi nene guguni giziaká ve napa niat0 vimó. ¹⁵ Vike Izesuni amimí itotó lekeza nanetá

* 25:46: Tan 12:2 * 26:2: Gá 12:1-27 * 26:7: Luk 7:37-38 * 26:11: Gapo 15:11

nimitune liki nigeleve. Loko lokago, keza silivá gehani 30 alitane liki li hutiake amikago, ¹⁶eza nene Izesuni amimika linogo amapani molamó.

Izesú izegipala zuhagi asenini zekimiaká nosá namó

(Mak 14:12-21; Luk 22:7-14,21-23; Zon 13:21-30)

¹⁷Lulu vizemi peleti niaká a holisímuni ganá gamenagú nene izegipala zuha leza Izesú noitoka voko geza asenini zeketakumú gele mînoaká nosáneta nene hikú viki ale vavá initatave loko nolane. Loko lokuko, ¹⁸eza láa loko limó: Lekeza taonigú viki ve makó noitító nene viki tisamámo není gamena mota alitokaze, geí numukú asenini zekimiaká nosá nene izegipáne zuhagi natune lokago nousive liki li amilizo. ¹⁹Loko lokago lelikutí ve lositosa nene Izesú litímuni asike asenini zekimiaká nosá ali vavá asimó.

²⁰Lá ikasigo gánavaló nene Izesuki izegipala zuha 12-a lezagi alegesá unike nosáneta nunimó. ²¹Nosáneta noko nounike Izesú láa loko limó: Lamaná lo likimitoze, gililo. Leke-likutí makolimo nimimika linogo ive. ²²Loko lokago, leza miluma nogelego hamopamó Guivahanitemaka, nenikumú nolape, nenikumú nolape loko loká miká otunimó. ²³* Lá okuko, Izesú láa loko lo limimó: Hamó lapegú peleti nagamí zeko nonousi ve nenémo nimimika linogo ive. ²⁴Okulumakutí lumu ve gihila nenikumú monó gotolaú luhuva gizinamómámini oko hilito gapogú novumóza, nimimika liti ve agae, lihima sipisi alitimó nenazo, izolaho aí getamilina nene vávani oko minaline. ²⁵Loko lokago, amimika liti ve Zutá nene láa loko limó: Tisalemaka, nenikumú nolape. Loko lokago, Izesú nene gezaka mota lokanimole loko limó.

Lepa nosá apí oko kimimó

(Mak 14:22-26; Luk 22:15-20; 1 Koli 11:24-25)

²⁶Nosáneta nonunike Izesú nene peleti aleake Ómasi agepoka loake gitegeko izegipala zuha nolimike láa loko limó: Alikí nalo. Imane není mémeláne neve. ²⁷Loko loake, vain goni aleake Ómasi agepoka loake nolimike láa loko limó: Lekeza mukitó nalo. ²⁸* Lo múnahaká galkólimini golaníne nene vegená mukilitini lihímáini gilatoketative loko lekitomó imane neve. ²⁹Lamaná lo likimitoze, gililo. Vain nagalímuni gihilagutí goha naminake minoloko vinake améneho nugulizaki velini loló onetati gamenaló vain nagamí haitolímuni lekezagi makó natune. ³⁰Loko loake, monó nama makó lunike lemeko Olivi agokaú itinogo vuhá.

Izesuni Pitá egamega otatikumú lo utó imó

(Mak 14:27-31; Luk 22:31-34; Zon 13:36-38)

³¹* Agokaloka itinogo nounike Izesú láa loko lo limimó: Monó gotolaú Ómasímó li gakó makó láa liki gizinamóma neve:

Gizapa ve apelekugo sipsip iza mulusi nene hutilí iki golisi inigave.

Liki gizinamóma nenazo, itúna holugú lekeza mukitó golisi iiki visilinitamóza, ³²* helekugo, goha nelémo otekiko, Galilaia mikasiuka goí o lekemeko vitove. ³³Loko lokago, anotó aleko Pitá láa loko lo amike limó: Nénisi viselegetamítove. Keza mukitó gele alévolé oakáini nene golo golo sokikoma, neza lá aminogo uve. ³⁴Loko lokago, Izesú láa loko lo amimó: Lamaná lo gimitoze, gelezo. Itúna holugú nene okolohomámo anó molonamiko nenikumú ángamuve loko egamega onetanimó nene gamena losive makole inogo ive. ³⁵Loko lokago, Pitá láa loko lo amimó: Neza nene geikumú egamega ogetaminogo uve. Nipili hiliñigi niko gezagi makó helekusigoma lá ogetaminogo uve. Loko lokago, izegipala zuha mukitó leza láa lokogó lunimó.

Izesú Gesemane zazuhagú Ómasiloka loko minamó

(Mak 14:32-42; Luk 22:39-46)

³⁶Loko lokuko Izesú nene izegipala zuhamagi apá makó agulizá Gesemane neneloka makó vuhá. Vo anitekunike láa loko lo limimó: Lekeza nene imaneló niko neza volaneloka vokinake Ómasiloka litove. ³⁷Loko loake Pitani itó Zepetaioni gipala losigi nene kelémoko vimó. Nivake mulunagú peisi nozigo miluma golesa gilike ³⁸láa loko lo kimimó: Neza mulúnegú nene gónupa geake hilitomó onove. Lekeza imaneló miniki nenikumú gizapa iki niko makó gizapa oko minatune. ³⁹Loko loake koma minomo novike avogisalokatí pou loko agoka hizeko nakake Ómasiloka láa loko limó: Aménega, gapo neikoma geza genavagi gihinitata netá imane ale ahulonetatane loko nolumóza, není nigikaloka ale molámoko geí gigikaloka nelémo molatane loko noluve. ⁴⁰Loko loake, goha ake, izegipala zuhama kovó akinago ángoake, Pitani alémo oteko láa loko lo amimó: Lekeza nene nana ive. Nezagi gizapa oko mininake gamena koma ma oti minamitamó nehe. ⁴¹Lekemékú milatakumú gopa ikataze, lekeza gizapa iki miniki Ómasiloka liki minalo. Ligikámo vávani

* 26:23: Age 41:9

* 26:28: Gá 24:8; Zel 31:31-34

* 26:31: Zak 13:7

* 26:32: Mat 28:16

noimôza, lugupémo gena noive. ⁴² Loko loake, goha vike Ómasiloka like láa loko limó: Aménega, genavagi netá imanémo nivilege vamtimó noikoma, geí gigikaloka nelémo molozo. ⁴³ Loko loake, goha oko ánígamó nene kogómula ahíhí okago, kovó akinago ánígamó. ⁴⁴ Ahulokimiake goha vike Ómasiloka ligo gamena losive makokí imó. Goí oko vike Ómasiloka limómámíni okogó limó. ⁴⁵ Loko loake, goha ake izegipala zuha lelémo otike láa loko lo limimó: Lekeza nanamú lakavasú viziki hanuva aki nímínave. Gilinahe. Okulumakutí lumu ve gihila nimimika líki líhimáinigi vetíni kígizakú nílimi milata gamena mota okave. ⁴⁶ Lá onoiže, lekeza otíiki vilo. Ánígalo. Nímimika líti vema alító mota okave.

Izesuni amimika lokago alemó

(Mak 14:43-50; Luk 22:47-53; Zon 18:3-12)

⁴⁷ Izesú gako lo lími agepági izegipala zuha 12 lelikutí makó Zutá noago, vegená mukí ámegetiki niake sopoló hánagi gelekahosigi alí minake amó. Keza nene guguni giziaká vete itó Zuta vetíni monó gizapa vete emane amunaloka kímisilikago vamó. ⁴⁸ Nivake Izesuni amimí inogo í vémo gako makó lo kímike láa loko limó: Neza vinake ve makó nene agoka legeko nonogoma ánígiiki ámina ve noive líki nígiliki agizató alilo. ⁴⁹ Loko loake, ake, Izesú noító litá oko vo amatoka aniteake, oho, Tisalema, nene noape loko loake, agoka legeko namó. ⁵⁰ Lá noigo, Izesú láa loko lo amimó: Nígive, geza loló inogo noani netá nene litá oko loló ozo. Loko noligo, lova ve nenete ake Izesuni agizató alí gíkitiki alemó. ⁵¹ Nalego Izesuki makó minuhakutí makolímó sopoló hána nene golagutí aleko gelehá oake guguni gizoaká ve napámíni gelekéle izegipa apílike agata zeko isimó. ⁵² Lá okago, Izesú láa loko lo amimó: Sopoloka nene aleníkuka goha ale molozo. Lekeza sopolotunú geza okaní geza okaní líki líki líkipíli gesá ikataze. ⁵³ Geza nene gelemape. Neza aménehitoka litomó nene litá oko ageló nene lovámíni galaváa mulusi napa 12-a nene kímiselekiko límiki nílimi vatí inigave. ⁵⁴ Lá itamóza, lá okugo Ómasímíni luhuva nenémo nana oko gihila zitíve. Gozapá monó gotoláú nenéminoko utó itíve líki luhuva gizinámóma neve.

⁵⁵ * Loko loake, ámina gamenaló alí nupa ina vegená nene Izesú láa loko lo kímike limó: Lekeza neníkumú gelemó nene geligeli ve nougo sopoló hánagi gelekahosigi alíki niake nígizató alínigi niahe. Neza gamena gamena monó zagusaveú minuke monó lo keme keme oko mínómómalo nene nígizató alemamó nehe. ⁵⁶ Lá ikamóza, Ómasímíni agepagutí gako líaká a vete emane amunaló monó gotoláú neníkumú luhuva gízina gako nene gihila zitíve loko netá mukí imane utó noive. Loko lokago, izegipala zuha leza Izesuni ahulomíkuniké gílisi hutíli oko vunímó.

Kansoletíni kogómulaló Izesuni goní itamó

(Mak 14:53-65; Luk 22:54-55,63-71; Zon 18:13-14,19-24)

⁵⁷ Izesuni agizató aliake guguni giziaká vetíni ve napa Kaiapani numukú alímiki vake keza monó mogona apí íkímiaká vegi itó monó gizapa vegi alí nupa íki mínató alímiki vamó. ⁵⁸ Lá niago Pitá nene hotó otígí oko kémegetoko vike guguni giziaká vetíni ve napámíni hé numunaló áneneló vo aniteake, iteake pílisi vegi mínake neneló goní itatakutí nana netá utó itíhe loko gizapa oko mínámó. ⁵⁹ Lá noigo, guguni giziaká ve napagi monó kansolegi mukitó nene Izesuni apele hilitune líki soza hakupá gakoínímú vitagá amóza, ⁶⁰ ma alí utó amamó. Mukílike ake Izesukumú soza hakupá gako lámóza, líki amupesamó. Lá iva iva niake ve losítá nenetosa otikasike ⁶¹ * láa líki lasímó: Imane vémo nene Ómasímíni monó zagusave zeko tele vízekínake gamena losive makolegó oko novíko goha hanuva gítomó neve loko noligo gulusímóma neve.

⁶² Líki líkasigo, guguni giziaká vetíni ve napa nenémo oteake Izesuni láa loko lo amimó: Geza goní nígítasike nílasí gakató ale víligoko lo kímítani gako má nomíhe, olo. ⁶³ Loko lokago, Izesú agepa apízeake mínokago, eza ve napa nenémo láa loko lo amimó: Alévolé Ómasímíni avogísaló lo utó itane loko nologetuve. Geza Ómasímíni gípala gologí oletatane loko lo mologeta vema noape loko lo lemezo. ⁶⁴ * Loko lokago, Izesú láa loko lo amimó: Nene geza mota lokanimóza, neza makó láa loko lo nolukumuve: Imane gamenáminí veletó nene okulumakutí lumu ve gihila neza amúza véminí agízani zamagaloka nougo, itó okulumalímíni límusí amupíló nolomugo áníganigave.

⁶⁵ * Loko lokago, guguni giziaká vetíni ve napa nenémo gele golesa oake luhoaká gola aleko polo nolígike láa loko limó: Mota Ómasi avíligínogo lokave. Gakola gílínita vegená makó nanamú sele lokínake gakola makó lítune. Eza Ómasi avílegeko lí gako lekeza itínasa mota gílikave. ⁶⁶ Nenemú lekeza nana otatune líki nígeleve. Loko lokago, keza nakahunímíni gako lokaze, mota hilitíve. ⁶⁷ * Líki líake, lugáate Izesuni agoka

* 26:55: Luk 19:47, 21:37

* 26:61: Zon 2:19

* 26:64: Tan 7:13

* 26:65: Liv 24:16

* 26:67: Isa 50:6

agepagú gihuhú nitake kigizanitunú napelego, lugáate agoka agepaló nihitake kigizanitunú napeleke⁶⁸ gologí okimiaká ve neneka, geza gakó mogona geleaká ve noitanimó nene éaho nogipilihe lo utó oko lo lemezo liki li amemó.

Pitá Izesuni egamega otamó

(Mak 14:66-72; Luk 22:56-62; Zon 18:15-18,25-27)

⁶⁹ Lá niago, Pitá nene hé numunaló noigo guguni giziaká vetini ve napámini gelekelé mohó makolímó Pitá noitó oake, geza Galilaia mikasigutí ve Izesuki miniaká niasi vema noane, ⁷⁰ loko lo amekago, eza vege ná kovogisaló egamega ike gakó lanimó nene ma gelemuve. Loko loake, ⁷¹ hé numunamámíni gatetó lemeko noigo, gelekelé mohó makolímó aí ángoake áminaló mína vege ná nene láa loko lo kimimó: Ve imanémo Nasaleté numutotí ve Izesuki miniaká asi vema noinae. ⁷² Loko lokago, Pitá goha egamega ike láa loko limó: Ómasímíni avogisaló nigizani ale oteko lamaná noluve. Ma ánigonamu vemú nolane. ⁷³ Loko loake, gamena komáisi noigo, áminaló oti mína ve nenete Pitá noitoka ake láa liki li amemó: Lamaná nilave, geza ámina vémini zuhagutí noane. Gonó lupámo geí Galilaia mikasiukatí mogonaka ale utó okave. ⁷⁴ Liki likago, Pitá nene Ómasímíni avogisaló lo hutoko lamaná noluve, ámina ve nene ánigonamuve. Soza litomó nene Ómasímó usí vizenimikatize, loko limó. Loko noli agepagi litá oko okoloho nenémo anó molamó. ⁷⁵ Anó molokago, Pitá nene Izesú nene okoloho nenémo anó molonamiko není ánigonamuve loko egamega onetatanimó nene gamena losive makole inogo ive loko lo ami gakó goha agata geleake, lemeko hetoka ive napa imó.

27

Izesuni Pilató noitoka alímiki vamó

(Mak 15:1; Luk 23:1-2; Zon 18:28-32)

¹ Neteká ho noitigo, guguni giziaká ve napagi itó monó gizapa vegi Izesuni apili hilita gakó lí hukamó. ² Lá niake nagá ziki alímiki agulizaki ve Pilató noitoka goní itanigí alímiki vamó.

Zutá hiliimó

³ Zutá eza Izesuni amimika li ve nenémo ángamó nene Izesunima goní nitake hilitive liki gakó li hukimikago, Zutá nene goha agika ale viligoake silivá moni 30-ma nene guguni giziaká ve napagi itó monó gizapa vegi minatoka aleko atiginá oko voko kimimó. ⁴ Lá noike láa loko limó: Neza lihima alenouve. Eza lihima vava nomi vema amimika lokugo hiliinogo noive. Loko limóza, nene lelí netá nomive. Geí netaka neve. ⁵ * Liki likago, eza Zutá nene ámina silivá moni 30 nene aleko itike monó numuni napagú hutilí oko ahuloake, lemeake vike nagá imó.

⁶ Lá okago keza guguni giziaká vemate ámina silivá moni 30 nene aliake láa liki lamó: Imane hutono moni nene ve makó hiliinogo imómámíni moni neve. Lekeza nenémi moni nene monó numukú mílamilo liki lí hukinamóma neve. ⁷ Liki liake, ligili hagili iake gakó makó lí hukamó. Lá iake mikasi mulalokatí vetini gonosi milimili minative liki mikasi agulizá nene mikasi somo lilí iaká vetini mikasi nene meina hizemó. ⁸ Lá iake ámina mikasi agulizá nene gola mikasive liki mílamó. Ámina agulizá nene itínasagi nene hanuva neve. ⁹ * Lá onoigo gakó makó gozapá Ómasímíni agepagutí gakó loaká ve Zelemiani agepagú lo mola gakó nene gihila zimó. Láa loko luhuva gizamóma neve:

Keza ámina silivá moni 30 alemó nene Isilae vege nalite monimú lí mílamó imane vémini meinavamú neve liki linamóma nenazo, ¹⁰ ámina moni aliake mikasi somo lilí iaká nia vetini mikasi meina hizemó nene Guivahanímó lo nimitó neve.

Pilató Izesuni mogonamú loká otamó

(Mak 15:2-5; Luk 23:3-5; Zon 18:33-38)

¹¹ Izesuni nene alímiki vake kugulizaki vetini ve napa Pilatoni avogisaló hizi otitamó. Lá ikago, eza agulizaki vemámo loká otake láa loko limó: Geza nene Zuta vetini kugulizaki ve napáini noape. Loko lokago, Izesú nene gezaka mota lokanimole. ¹² Loko lokago, guguni giziaká vemagi itó monó gizapa vemagi keza Izesunimú hizi míliki gakó nilago, eza lá gakotó ma lo kememigo, ¹³ Pilató nene láa loko limó: Geza nene mukí gakó liki goní ngitamó nene gelemape. ¹⁴ Loko limóza, Pilató lí gakotó ma viligoko lo amemimó. Lá noigo kugulizaki vetini ve napa Pilató nene agata gululusi gilimó.

Izesú hilitive liki goní itamó

(Mak 15:6-15; Luk 23:13-25; Zon 18:39-19:6)

* 27:5: Apo 1:18-19 * 27:9: Zak 11:12-13

¹⁵ Asenini zeketakumú gili mina holisi gamena meleketo meleketo nene Zuta ve vená nenete aseva zetatumé liki ve makolímíni agulizá ikago agulizaki ve nenémo nagá numukú mina ve nene kimisele ahuloká ahuloká okago nene, ámina ve keitoka viaká amó. ¹⁶ Ámina gamenaló nene ve makó agulizá hutilí oko vi ve nene nagá numukú minamó, Izesuni apolaho agulizá napa nene Palapasí. ¹⁷ Lá okago, ve vená alegesá ikago, Pilató loká oketake lekeza éhini aseva zemikugo lekelitoka vitive liki nilave. Gologí olimiaká veve liki lina ve Izesuni aseva zetatohe, itó Izesuni apolahini Palapasini aseva zetatohe. ¹⁸ Loko limó nene keza Izesukumú amekugú níki miniake gonitó alími utó amó nenemú Pilató geleneike loká oketamó.

¹⁹ Itó Pilató nene goní gakó lo hukoaká siató noigo, venala nenémo aitoka gakó lo ahulake láa loko limó: Geza nene ámina hehe loko noi vemámíni agupeloka gakó ma lo molotamo. Itína holugú nene vamó makó ángo amekuke aikumule loko miluma napa gelemikuve, loko limó.

²⁰ Itó guguni giziaká ve napamagi itó monó gizapa vemagi vegeñalítini mulúikú hiziki láa liki nilago, Palapasini aseva zetative liki Pilatotoka nilake Izesuni nene apili hilitave liki lamó. ²¹ Liki likago, eza agulizaki vemámo ve losi imane niasimó nene éhini ahulomikugo lekelitoka vitive. Loko lokago, Palapasinive liki lamó. ²² Liki likago, Pilató nene lá okinake vegeñá mukilite gologí olimiaká noi veve liki lina ve Izesuni nene nana otatove. Loko loká okimikago, keza zohota zaló nagá otamane liki lamó. ²³ Liki likago, Pilató eza nanamú neve limó. Eza nana netá golesa alekago nilave, loko limóza keza zohota zaló nagá otamane liki pigi viziki lamó. ²⁴ * Liki likago, Pilató gilimó nene eza liti gakó nene ma vo alemitimó oake lova napa utó itimó okago, eza nene vegeñalítini kovogisaló nagamí aleake agizani nagamí zimó. Lá noike láa loko limó: Imane ve apili hilitatímíni lihima nenitoka ma minaminogo ive. Nene lekelí netale. ²⁵ Loko lokago, keza vegeñá mukí nenete anotó aliki láa liki lamó: Ámina lihima nene lezalokagi itó izegipa lagapilamotokagi minino. ²⁶ Liki likago, Pilató nene Palapasini gologí omikago keitoka vimó. Itó Pilató lokago, Izesuni nene segi nogosanitunú apilikago zohota zaló nilitunú ziki apili hilitave loko pilisí vetini kigizakú molamó.

Pilisí vete Izesuni gopoguni militamó
(Mak 15:16-20; Zon 19:2-3)

²⁷ Lá okago agulizaki vemámíni pilisí vevate Izesuni nene alímiki agulizaki vemámíni numuna napagú nene iteke keza ámina pilisí ve mukitoka nene kilími nupa amó. ²⁸ Lá iake agulizaki veñitana lilí itake Izesuni ginegane nene gololohá iki ali miñiake ginegane okohu gó nene luhimiake, ²⁹ gasovagi nagatunú nene akilí lilí iake gotolaló hitimiake, agizani zamagaloka nene akepa nogosani makó amikago ale minamó. Lá onoigo, pilisí vete amatoka iki kalapusa hízeke gopoguka litake láa liki lamó: Oga, mokáneve, Zuta vetini kugulizaki veninimave. ³⁰ Liki nilake agoka agepagú gituhú nitake ámina akepa nogosani nene aliake gotolaló zemó. ³¹ Ziake gopoguka li asú itake okohu gó luhitamó nene gololohá iake ezáa gineganeve nene goha luhitamó. Luhimiake zohota zaló nilitunú ziki apili hilinigi alímiki vamó.

Izesuni nene zohota zaló apelemó
(Mak 15:21-32; Luk 23:26-43; Zon 19:17-27)

³² Lá inigi nivake Apilika mikasiukatí Sailini apatotí ve makó agulizá Saimon nene gapoló noago ángiake Izesuni alémo vatí oko zohota zava gehetative liki gala vizikago, ³³ makó vake apá makotó vamó, agulizá Goligota, nene agulizalímíni mogona nene gotóini gonosi helisa apale loko. ³⁴ Neneló anitiake Izesú native liki vain nagamiki ekesá netaki ali gopa iake miluma gelemitive liki amemó. Amikago eza nene no geleake namike hanuva minamó.

³⁵ * Lá okago, zohota zaló apiliki apatemó. Lá iake gineganeve nene éaho alitihe éaho alitihe liake kezáini nene satu zohí amó. ³⁶ Lá niake áminaló nene gizapa iki minamó. ³⁷ Velé gotolaloka nene goní ita gakó nene láa liki luhuva gizikago minamó: Imane ve nene Izesú ave Zuta vetini kugulizaki veninive. ³⁸ Liki luhuva giziake Izesuni amatoka nene guminaló ve geligeli ve lositá nene makó nene agizani sogaloka apatiake itó makó nene agizani zamagaloka kipiliki apatemó.

³⁹ * Lá inake keza vegeñá vigá igá amó nenete gotóini goké goké nizeke amé ziki gopoguka litake, ⁴⁰ * láa liki lamó: Geza nene monó zagusave zeko tele vizekoko gamena losive makolegó oko vokiko gitomó neve loko loaká noanimóma neze, geza gugupeka alémo agutó vizemane. Geza Ómasímíni gípala nouve lokoma zohota za nene ahulokoko lememane.

* 27:24: Gapo 21:6-9 * 27:35: Age 22:18 * 27:39: Age 22:7, 109:25 * 27:40: Mat 26:61; Zon 2:19

⁴¹ Liki nilago, keza guguni giziaká ve napamagi itó monó mogona apí ikimiaká ve itó monó gizapa vemagi hamoliminiki amé ziki gopoguka litake láa liki lamó: ⁴² Vegená lugáa kelémo kugutó vizeaká imóza ezáa nene alémo agutó vizeमितimó okave. Eza Isilae vetini agulizaki vema noitimó nene itínasa zohota zalotí apasokoko limitinae. Lemekiko leza aikumú gele alévolé ituninazo. ⁴³ * Eza nene Ómasimú gele alévolé onoike neza nene Ómasímíni gipala nouve loko limó nenazo, Ómasímo aikumú geleneitimó nene itína alémo agutó vizitimole. ⁴⁴ Liki likago, guminaló geligeli ve losi Izesuni agilika luga luga zohota zaló kipiliki apatemó nenetosagi ámináminiki amé zitigí iki lasimó.

Izesú hiliimó

(Mak 15:33-41; Luk 23:44-49; Zon 19:28-30)

⁴⁵ Holisaká nene mukí mikasiuka límugusi ze asú oake minoloko novigo únaká ho ale zohota imó. ⁴⁶ * Únaká ho ale zohota noigo, Izesú pigi vizeko ezáa gajokutí nene Eli Eli lema sapatatani loko limó. Lelí gajokotegutí nene Ómasinemaka, Ómasinemaka, geza nanamú viselenimikane. ⁴⁷ Láa loko lokago amatoka mina ve lugáate ámina gako giliake imane vémo Ilaizani sele nolive. ⁴⁸ * Liki liake, keikutí makolímó lolu loko vike notunigitana netá aleake akepa lolovaló hizeake vike ekesá vain nagamikú lupizeake, Izesú native loko aminogo noigo, ⁴⁹ lugáate láa liki lamó: Ánigonozo, Ilaizá oko alémo agutó vizitihe, gizapa onoitune. ⁵⁰ Liki nilago, Izesú nene gako napagutí nolike sikalahula ahulokago vimó. ⁵¹ * Lá noigo, áminasitó monó zagusaveú Ómasímíni avogisalo iteaká gatetó zi lí ika lavolavo nene veletokatí zeko hóu loloko limike ale luga luga imó nene lelí gahe ale koló oletamó. Lá noigo mikasi imimá noi ke gehani napa napa nene zevo hóu lomo imó. ⁵² Lá noigo, gonosi milimili gale makó nene koló noigo, Ómasímíni vegenala zuha lugáa gozapá hilina vegená nene otemó. ⁵³ Gonosi milimili ahuli asú iake Izesú nene galegutí otekago viki Zelusale numutoka itikago, mukí vegenalite ángamó.

⁵⁴ Itó pilisí vetini ve napagi pilisí vegi Izesuniló gizapa iki minake, mikasi nene imimá imó itó haitopaitó netá mukí utó itimo kehelele goha vizekago, imane ve nene lamaná Ómasímíni gipala minamó neve liki lamó. ⁵⁵ * Itó vená mukí minamó keza nene amunaló Galilaia mikasi ahuliake Izesuni izamuha hiziki ámegetiki viaká a vená nene hotó otigí iki minake ángi minamó. ⁵⁶ Keikutí Magatala numutotí vená Maliá minamó itó Maliá makó nene Zemusiko Zoseheko keí izóipo, itó vená makó nene Zepetaioni venala minamó.

Izesuni gale zitamó

(Mak 15:42-47; Luk 23:50-55; Zon 19:38-42)

⁵⁷ Únaká huluvaló henonavagi ve makó Alimataia apatotí ve agulizá Zosehé eza goí oko Izesuni izegipala zuha minamó. ⁵⁸ Eza nene Izesuni gonosiváa alinogo nene voko Pilatoni loká imó. Loká okago, Pilató nene gonosiváa ali amilo loko lokago, gili amemó. ⁵⁹ Gili amikago, Zosehé nene lavolavo gó gosohá mokoná lamanatunú nene asapú imó. ⁶⁰ Lá oake gonosi nene ezáa gonosi milimiliva gosohakú aleko voko molamó. Gonosi milimilí nene meikú nego mulí ezáa goló vateikamó nenegú molomiake gehani napa makó nene ahelú ahelú oko aleko vike gonosi gale agepaló nene ze lí imó. ⁶¹ Lá noigo, vená lositá minasimó, makó nene Magatala numutotí vená Maliá itó Maliá makó minasike gonosi gale ávatíha ángi minasimó.

Gonosi galeló gizapa itamó

⁶² Lá ikasigo, gó lokago holisi gamenamámíni nosáneta ale vavá oaká gamena vokago guguni giziaká ve napagi itó Palisaio monó vegi viki Pilatotoka alegesá amó. ⁶³ * Ake láa liki lamó: Ve napale leza gako ma gelekunike noune. Ámina sozaló ve nene ha agómulagi noi ke gamena losive makole vokiko neza otinogo uve loko limómámíni okatize. ⁶⁴ Nenemú pilisí ve makó kimiselekako, viki gonosi gale agepamaló nene gamena losive makole etoha iki gizapa itave. Izegipala zuhamate gonosiváa gumina iki aliki viiki vegená nene gonosi galegutí mota otekave liki li kimikatanaze. Goí oko soza gako limó nene alika soza gako litatimo avilegeikanogo ive. ⁶⁵ Liki likago, Pilató láa loko lo kimimó: Lekeza pilisí ve makoki kilímiki vilo. Ámina gonosi gale agepaló nene lekeza itatímíni avotigila iki gehanima zi lí ilo. ⁶⁶ Loko lokago, keza nene vake gonosi gale agepaló zi hita gehani nene alévolé oko minative liki anosa miliki nagá makó alemó. Lá iake lovámíni galaváa nene áminaló gizapa itave liki ahulikitamó.

* 27:43: Age 22:8 * 27:46: Age 22:1 * 27:48: Age 69:21 * 27:51: Gá 26:31-33 * 27:55: Luk 8:2-3

* 27:63: Mat 16:21, 17:23, 20:19; Mak 8:31, 9:31, 10:33-34; Luk 9:22, 18:31-33

28

*Izesú heleneikutí otimó**(Mak 16:1-10; Luk 24:1-12; Zon 20:1-10)*

¹ Holisi gamena asú okago, Sategú neteká ho itinogo noigo, Magatala numutotí vená Maliá itó Maliá makómagi gonosi galema ániganigi vasimó. ² Nivasigo genémané mikasi nene imimá napa imó nene Guivahanímini ageló makó nene okulumakutí lemeake gehani napa nene gonosi gale agepaló zi hitámoma nene ahelú oko alahuloake ámina geható nene ase hizeko noigo imimá napa imó. ³ Noigo agoka agepa nene gó melevezakitana oko noigo luhoaká gola nene gizopa nukúnukú loko minamó. ⁴ Lá okago, lovámíni gala ve keza nenemú kehelele vizekago luvoluvo ziake hele vegeinakitana iki zámuzáini migelelé amó.

⁵ Lá noigo vená lositáma tizikasigo ageló nenémo láa loko lo kimimó: Lekeza lekehelele vizemino. Lekeza zohota zaló apilíki apate ve Izesuni ániganigi niasive loko gelenoumole. ⁶ Eza imanegú noamive. Lá okove gozapá ezáa litó mota otekave. Láa loko lekeza iki ámina ve ako mina apá ángalizo. ⁷ Lá iiki litá iki viiki izegipala zuhama galegutí nene mota otekave. Goí o lekemeko Galilaia mikasiuka novive. Lekeza viki neneloka aí nene ániganigave liki li kimilizo. Nene lo lekemenoumómámíni okove. ⁸ Loko lo kemekago, keza vená losi nene kehelele novizigo itó kogoliza nivizesike hetoka lemesike geha mulikutí litá iki ololu liki vasike aikumú izegipala zuhama li kiminigi vasimó. ⁹ Nivasigo, Izesuki gapoloka galinali hotu liake, eza nene niasihe loko lo kimimó. Loko noligo, keza nene vi alitikasike agisaló alesimó. Lá niasike gupá zi amiki agepoka lasimó. ¹⁰ Nilasigo, Izesú láa loko lo kimike limó: Lekeza lekehelele vizemino. Lekeza viki nugunáne nene Galilaia mikasiuka viiki keza nene není neneloka ániganigave liki li kimilizo loko nene limó.

Lova vete Izesú oti gakó avetó iki li kememó

¹¹ Keza vená losima nene gapo miliki nivasigo, gale agepaló gizapa imina ve lugáamate viake taonigú itemó. Itiake guguni giziaká ve napama nene utó i netakumú avetó iki li kememó. ¹² Li kimikago, keza guguní giziaká vemagi itó monó ve napamagi ali nupa ake gakó makó ligili hagili ake gakó makó li milamó. Lá ake lovámíni galaváama nene age nonó gehani mukí kememó. ¹³ Nikemeke láa liki lamó: Lekeza nene láa likigó lilo: Leza ako helenouko holugú nene izegipala zuhate ake gonosiváa gumina iki aliki vikave likigó nene lilo. ¹⁴ Itó agulizaki ve napamámo ámina gakoláa gelekoko nolikoma, leza gakó makó lo aminogo une. Lekezaloka gakó makó minaminogo ive. ¹⁵ Liki likago, keza lovámíni gala vemate la gakotó amegesaló milamó. Lá ikago ámina gakoláa nene Zuta vetiniuka hutilí oko vo asú okago, itínasa gamenagi nene ámina gakokó liaká niamole.

*Izesú aposolo 11-a monó hozaló kimisilimó**(Mak 16:14-18; Luk 24:36-49; Zon 20:19-23; Apo 1:6-8)*

^{16*} Izegipala zuha 11 leza Galilaia mikasiuka vunike Izesú nene agoka makotoka vitave loko lo limitó nene itekunike, ¹⁷ Izesuni ángokunike gupá zeko agepoka lunimóza, makó lugáate nene heleneikutí lamaná oteko áisi noihe liki kagata losi gelemó. ¹⁸ Lá ikago Izesú nene omo alitoake gakó lo nolimike láa loko limó: Ómasi nenémo okulumalímíni mikasímíni zámuzá nene nenikó neme asú onoiómoma neve. ¹⁹ Nenemú lekeza mikasi nekisa vokisauka viki vegeiná mukí nene kilími není izegipáne zuha lilí ilo. Lá niiki aménehini agulizató itó gipala není nugulizató itó Sikalahulímíni agulizató kilími nupa iki monó nagamí hilikitalo. ²⁰ Lá niiki nénisi loleketonou gakotó ámegetatave liki lainim-ikitalo. Gilinahe. Imane mikasímíni gamena asú onamíko neza nene lekezagi makó mino-loko voko minanogo uve, loko limó.

* 28:16: Mat 26:32; Mak 14:28

Izesu Kilistoni Gakó Lamaná Makí Luhuva Gizamó

*Nagamí holokimiaká ve Zoní Izesuni gapo veletamó
(Mat 3:1-12; Luk 3:1-18; Zon 1:19-28)*

¹ Izesu Kilistó Ómasímíni gipalamú gakó lamaná nene lá oko apí imó neve. ² * Nenémíni gakoláa Ómasímó gipala lo ami gakó nene Ómasímíni agepagutí gakó loaká ve Isaiá láa loko luhuva gizamóma neve:

Gelezo, není gakó lo keme keme iti ve amiselekugo,
áisi ale goí oko voko kigikagú hoza alitanimó nenémíni gapoga veletegative.

³ * Mikasi gomopalaló ámina vémo gakó napagutí láa loko nolive:
Guivahanimú nene likigika ali hee litalo.
Likigikagú limití gapo ali hee litalo.

⁴ Ámina gakó Zonitoka okago eza mikasi gomopalaló vo anitimó nene vejená makó eza noitoka ali nupa ikago likigika ali viligiiki nenémíni mogona utó itive liki monó nagamí hilitamó nene Ómasímó lihimatíni ahuloleketative loko lo utó oko lo kemeko minamó. ⁵ Lá okago, Zelusale numutokatí itó Zutaia apá makotokatí nene mukí vejená Zoní noitoka vake lihimáini li utó ikago, Zota nagamikú monó nagamí holoketamó.

⁶ * Zoní nene Ómasímíni agepagutí gakó loaká ve Ilaizakitana oko kamele iza zopovatumú lilí a gó luhoake, itó iza galupavatumú lilí a holotani nene gohalaló zeake, ganuki himoni nogozagígó noko minamó. ⁷ Noko minake, láa loko lo utó oko lo kemeko minamó: Nemegealoka noa ve aí zámuza nenémo není zámuza nivilegekave. Nénisi ánéamina aí lelegitó minamunazo, hoza lagasó aletoko aí gasa gó ate akisitomó nene etaminogo ive. ⁸ Nénisi nagamikó nohololeketumóza, áisi nene Ómasímíni Sikalahú hololeketanogo ive, loko lo kimimó.

*Izesú monó nagamí holamó
(Mat 3:13-17; Luk 3:21-22)*

⁹ Gamena nene zupa Galilaia mikasígú nene apá makó minamó, agulizá Nasalete. Izesú nenelotí Zoní noitoka anitekago Zota nagamikú monó nagamí holotamó. ¹⁰ Holomikago, nagamikutí iteake ániagamó nene, okulumá koló okago, Ómasímíni Sikalahú nene nama luhusigitana oko Izesuni amupiló nolimigo ániagamó. ¹¹ * Lá okago okulumakutí Ómasímó gakó makó láa loko limó: Geza nene nigika amenou gipáne noane. Geí ángo lamaná okuve.

*Satá Izesuni amekú moloko minamó
(Mat 4:1-11; Luk 4:1-13)*

¹² Loko lokago Sikalahulímo Izesuni amiselekago mikasi gomopalaló vimó. ¹³ Neneloka voko noigo, gamena 40-a oko novigo Satá nene gimivagú moloko minamó. Itó Izesú eza nene hela gaha namatini holúikú noigo ageló keza nasahilí itiki minamó.

*Galilaia mikasiuka Izesú monó hoza apí imó
(Mat 4:12-17; Luk 4:14-15)*

¹⁴ Lá okago, Zoníni nene nagá numukú ahulimikago noigo, Izesú nene Galilaia mikasígú vo aniteake Ómasímíni gakó lamaná lo utó oko láa loko lo kimimó: ¹⁵ * Gamena mota alitokaze, Ómasímó gizapa oleketati gamena nene omo alitokave. Nenemú likigika ali viligiiki gakó lamaná gilí alévolé ilo, loko limó.

*Izesú lagaha aliaká ve losive losive sele lo kimimó
(Mat 4:18-22)*

¹⁶ Nominake Galilaia nonohuló agataloka mohona noigo Saimoko agunala Etuluko keza lagaha miliaká asi ve minasinazo, nonohulukú nene lagaha gotaha ahuliki minasimó. Lá niasigo ángoake Izesú láa loko lo kimimó: ¹⁷ Némegetiki alizo. Lagaha hoza aliki minasimóma, vejenatoka hoza nalisiko vejená není zuha lilí itave loko lekelémo nomuluve. ¹⁸ Loko lokago, litá iki lagaha gotahama ahulikasike ámegetiki vasimó. ¹⁹ Lá ikasigo Izesú koma makó novike Zepetaioni gipala lositá Zemusiko agunala Zoniko keza nagamikú lapegú minasike lagaha gotaha ali lamaná niasigo, ángoake, ²⁰ sele lo kemekago, gilikasike, améipini Zepetaiogegi gelekelé izegipalagi lapegú niago ahulikumikasike Izesuni ámegetiki vasimó.

* 1:2: Mal 3:1 * 1:3: Isa 40:3 * 1:6: 2 Kug 1:8 * 1:11: Apí 22:2; Age 2:7; Isa 42:1; Mat 12:18; Mak 9:7

* 1:15: Mat 3:2

*Holosi golesa agikagú mina ve
(Luk 4:31-37)*

²¹ Lá okago, keza Kapanao numutoka viki anitiake holisi gamena alitokago, Izesú nene monó numukú iteko monó lo kimimó. ²²* Lo kemekago, gilikago, itimó. Monó mogona apí ikimiaká a vete gakó lainim oketamó nenéminoko apí oketamimó. Ezáa monó gakola gale geheko lo kemekago, giliake sigaga sagaga litamó. ²³ Lá okago, gamena nene zupa monó numukú ve makó minamó nene agika ale gopa i holosi agikagú minamó. ²⁴ Eza gamoga geko Nasaleta ve Izesuvo, geza nana netá golesa aleletanogo noane. Géisi lelémó golesa itove loko noape. Geí ánigo hee hee noluve. Géisi Ómasilokatí etó oko noani vema noane. ²⁵ Loko lokago, Izesú nene gahá amike gegepa apizeoko agikagutí iteko legesó oko vozo. ²⁶ Loko lomikago, agika ale gopa i holosi nenémó ale helonalo lomikago, gopaga nolike agikagutí iteko ahulomiake vimó. ²⁷ Lá okago ve vená mukí keza ininá ake kezáitoka loká loká ake lamó: Íi, imane nana suni neve. Monó nene haitolímíni amuzavagi neve. Áisi gakola gale geheko holosima lokimikago gili amiaká naive. ²⁸ Liki likago, aikumú gokoláa likago litá oko Galilaia mikasiuka puu loko vimó.

*Izesú Pitani venalámíni izolahíni alémó zokamó
(Mat 8:14-15; Luk 4:38-39)*

²⁹ Lá okago, monó numukutí limiake, Saimon itó Etulú keí numukú Zemusigegi Zonigegi itémó. ³⁰ Saimoní venalámíni izolahíni agupegú ló la netá avisekago akonoigo, Izesuni litá iki li amemó. ³¹ Li amikago, vo aniteake agizató aleko alémó otekago, agupegú ló la netá nenémó litá oko asú omikago, oteake Izesugini nasahilí oketamó.

*Ho lemekago Izesú vejená mukí kelémó zokamó
(Mat 8:16-17; Luk 4:40-41)*

³² Lá noigo, únaká ho lemekago, mukí kivisi vejenaki kigikagú holosi golesa mina vejenaki Izesutoka kilímiki ikago, ³³ apá amelage mukí iki gatetó alegesá amó. ³⁴ Lá ikago, haitopaitó netá kivisi vejená mukí kelémó zokoake holosi golesa mukí nene kigikagutí kepeleko kimisilimó. Lá itó nene ánigi hee hee likanazo, aí mogona lili ali amitave loko lo hukoketamó.

*Izesú monó lo kemeko mohona imó
(Luk 4:42-44)*

³⁵ Gó lomólomo gokululuva notovo igo, línúmuvamú Izesú eza numukutí lemeake apá makotoka mikasi gomopalaló voko minake Ómasiloka limó. ³⁶ Lá noigo Saimon nene agivelagegi keza agizaka hiziki, ³⁷ alími utó iake láa liki li amemó. Vegená mukí geikumú vitagá níaze, geza imaneló nana noane. ³⁸ Liki likago, eza láa loko lo kimimó: Apá mukí vai oko alitoka neve. Neneló monó lo utó itove loko makó vítune. Neza nene ámina hoza alitove loko omo nouve. ³⁹* Loko loake vike Galilaia mikasiuka mohona o asú noiike, keí monó numuni minakú minakú monó lo utó oko minake, holosi nene kigikagutí kepeleko kimiseleko alahula ahula imó.

*Izesú lokago halamé gizali ve gililimó
(Mat 8:1-4; Luk 5:12-16)*

⁴⁰ Lá okago, halamé netá gizali ve makolímó aitoka oake negénegeka loko alapusa hizike lo amike limó: Geza nene nelémó gililitove loko nene hanuva nelémó gililitanimó nenazo, nelémó gililitane loko noluve. ⁴¹ Loko lokago, Izesuni agika hizekago agizani lutoko agupeloka ale nogilike lo amike limó: Gililitane loko gelekuze. Gilelezo. ⁴² Loko lokago, litá oko halamé netáma asú omikago agupe lamaná okago, ⁴³ Izesú litá oko namisilike lo hukotake limó: ⁴⁴* Gelenape. Geza imane gakó aveté oko vejená lo kememo. Gilelekane liki gili hee litave loko geza nene voko guguni gizoaká ve gupepe alapizekako mota gilelekane loko ángigative. Itó gilelenikumú nene Mosé loleketa netá Ómasi guguni gizo amitive loko amekako eza vejená mukí lo kemekiko nenémíni mogona gili vevesatave. ⁴⁵ Loko lokago, ámina ve nenémó voko aveté aveté oko lole ale imó. Nenemú Izesú nene vejená sii sii liki alegesá ikatave loko taoni makotoka hanuva vamike apá agataloka minokago, vejená keza numutó namatotí gopa aitoka ikigó minamó.

2

*Izesú ve gepili alémó zokamó
(Mat 9:1-8; Luk 5:17-26)*

* 1:22: Mat 7:28-29 * 1:39: Mat 4:23, 9:35 * 1:44: Liv 14:1-32

¹ Gamena makó oko vokago, Izesú nene Kapanao numutoka goha vo anitekago, Izesú nene numukú noive liki gakoláa giliake ² vauva aliki iki alegesá akumú gatetoki hizi lí amó. Lá okago, monó lo nokimigo, ³ ve losive losive nenete ve gepili makó ukoakoló aliki niago, keitoka veđená makó kémegetiki amó. ⁴ Lá ikago veđená giki ikago, Izesuni amatoka amitamó okago numupitó itinigi ukoakoló milimiake akaló aliki itemó. Izesuni gotolaló ali koló iake, ve gepili mina ukoakoma nagá ziki ahulikago Izesuni amatoka limimó. ⁵ Lá okago, Izesúma gili alévolé amó nenémini mogona áinigoko geleake ve gepilima láa loko lo amimó: Gipáneve, lihimaka ahulogimikuve.

⁶ Loko lokago, monó mogona apí ikimiaká ve neneló minamoláate láa liki kigikatunú gelemó: ⁷ Íi, Ve makó éaho lihimate ale ahuloletatimó neve. Ómasi hamokó lihima ale ahuloaká noimó nenazo, eza agupe aleko iteko Ómasi aviligino nolihe. ⁸ Láa liki kagata nigelego, Izesú nene Zuta veđenalite lihima ahulolimiaká itó veđená kelémo zokoaká nene Ómasímogó loló oaká netá neve liki gelemó nene hanuva agikatunú geleake láa loko lo kimimó: Likigikauka gakó nenémináa nanamú nigeleve. ⁹ Ve makolímó Ómasi noamitimó nene lihimaka gilatogimikuve loko vávani oko lamitimóza, ámináminoko kelémo zokoaká zámuzagi ve noamitimó nene oteoko ukoakoka geheko vozo loko litá oko lo ameminogo ive. ¹⁰ Lá onoimóza, okulumakutí lumu ve gihila neza mikasigú nene lihima gilatoakalímíni zámuzaga itó veđená kelémo zakoakalímíni zámuzaga nenitoka neve liki gili hee hee litave loko ve gepilima lo amike limó: ¹¹ Otekoko ukoakoka geheko numukaloka vozo loko nologetuve. ¹² Loko lokago, galinali kogovisaló ukoakoma geheko vimó. Lá okago, veđená mukí keza sigaga litake Ómasi agepoka láa liki lamó: Nene suni ángosá amuhá gosohá itó keza ángokune, liki lamó.

Livaini sele lo amimó
(Mat 9:9-13; Luk 5:27-32)

¹³ Izesú lá oake goha lemeake nonohuló agataloka vike veđená mukí aitoka alegesá ikago monó apí o kemeko minamó. ¹⁴ Nenelotí novike, Alapaioni gipala Livai nene takisi aleaká numukú noigo, ángoake némegetoko ano, loko lokago, Livai nene oteake ámegetoko vimó.

¹⁵ Vike Livaini numukú itiki minasike nosánetá ninasigo, takisi moni aliaká vegi golesa netá aliaká niave liki kagata giliaká a ve makoláagi mukí keza Izesuni ámegetiki viaká a ve minamó. ¹⁶ Lá niago, Palisaio monó veđenalitini monó mogona apí ikimiaká ve nenete Izesú nene ámina ángi goselé iaká veđenaki nosánetá ninago ángiake nene, izegipala zuha láa liki li kememó: Íi, áisi nene golesa netá aliaká veđená nenémináagi nosánetá nana igo nonave. ¹⁷ Liki likago, Izesú nene geleake anoza gakó makó láa loko lo kimimó: Keza ha minamoláate lusa vemú sele lisá amave. Kivisi veđenalitegó lusa vemú sele liaká niave. Neza hee loko nounne liki liaká nia veđená kelémo otopá zitove loko lememunóma neve. Neza lihimáinigi veđená kelémo otopá zitove loko lumunóma nena, loko limó.

Nosánetá moseakakumú loká itamó
(Mat 9:14-17; Luk 5:33-39)

¹⁸ Zonini izegipala zuhagi Palisaio monó veđenaki keza Ómasímó nosánetá mosekuko lelikumú litihe liki mosé mosé iaká amó. Lá niago, ve lugáa keza Izesutoka vake láa liki loká itamó: Zonini izegipala zuhagi Palisaio monó veđenalitini izegipáini zuhagi keza nosánetá mosé mosé iaká niamóza, geí izegipaka zuha keza mosísá amave. Nanamú neve. ¹⁹ Liki likago, Izesú anoza gakó láa loko lo kimimó: Ve makolímó agivelagegi makó kogoliza viziki minata zupa nene keza akumú miluma giliiki nosánetá mositamó nehe. Lá oko nomive. Ámina vegi apiziki minata zupa nene nosánetá moseminigave. ²⁰ Ámina vema apili hilita zupa alitokiko, nene zupa miluma nigiliki nosánetá mosinigave. Áminámini iki, izegipáne zuhate alika nenikumú miluma giliki mosí mosí inigave. Itína nene moseminigave.

²¹ Itó lavolavo gó gosohá gi zenamimó nene huki koma iiki ali litaha lavolavoló mi-likí akotisá amave. Alika nagamí zikiko giki okiko nene gosohá gó komamámó litaha lavolavomalotí hikelekiko lavolavoma golesa o asú inogo ive. ²² Itó vain nagamí gosohá gituhú galakalá noigo nene litaha getununigú milisá amave. Vain nagamímámó giputooko getununima zeko pulutokiko vain nagamíma hutilí okatize, itó getununima ámina oko golesa okatize. Vain nagamí gituhú galakalá noimó nene litaha getununigú negopa gosohámagukó miliaká niave. Loko anoza gakó limó nene Zuta vetini litaha mogonáagi Izesuni izegipala zuhate gosohá iki miiki ita sunigi molo apizeakaláa nomive loko limó.

Izesuni veđenala zuhate holisigú kilé hisiki nimi vamó
(Mat 12:1-8; Luk 6:1-5)

23* Holisi gamena makokú Izesuni izegipala zuhagi kilé mikú mihina niago, izegipala zuhate gaúna hilikago kilé asutiake gihiláa hisiki nimi vamó. 24 Lá niago, Palisaio monó vegehalite gili golesa ake Izesuni li amiki lamó: Ánigozo, netá nalemó nenémo golesa okave. Lelí holisigú imane hoza lá amoakalímini nene nanamú naleve. 25* Liki likago, eza monolímini li hukina gakó nenémo vegehá kelémo vatí iti gapo nene híze lí itive loko utó amive liki gilitave loko láa loko lo kimimó: Gozapá agulizaki ve Tevitige vegenala zuhagi nosánetakumú gaúna hiliake netá alemó nene monokú luhuva gizinamóza lekeza ámina gakó gatiake mogonáa gelemiki nilahe. 26* Tevití eza Ómasímini numukú itekago guguni gizoaká ve napa Apiatalá nene Ómasímini avogisaló mila peleti amekago noake ezagi makó mina vegehá nene kemeko namó. Ámina peleti nene hanuva vegehalite namitave liki guguni giziaká vetegó natave liki alévolé iki li hukinamó nene gopa namó neve. 27 Loko loake, miní ameko láa loko lo kimimó: Holisi gamenamule loko Ómasímo vegehá loló amimóza, holisi gamena nene vegehakumule loko utó onoimó neve. 28 Lá onoinazo, okulumakutí lumu ve gihila neza holisi amelahina nounazo, izegipáne zuhate holisi gamenagú lilí ita netá nene není netá neve, loko limó.

3

Agizani nakeseta ve

(Mat 12:9-14; Luk 6:6-11)

1 Minoko monó numukú nene agizani nakeseta ve makó iteko noigo, Izesú áminagú goha itekago, 2 holisimagú nenazo, ámina ve imane holisimagú hoza aleko alémo zokokikoma goní otatunize liake gizapa iki minamó. 3 Lá niago, Izesú nene agizani nakeseta vema láa loko lo amimó: Holutegú ote minozo. 4 Loko loake vegehá láa loko loká oketamó: Holisigú nene netá lamaná alesatímo etatihe netá golesa alesatímo etative. Vegehá kelémo lamaná osatímohe kepele helesatímove. 5 Loko limóza, anotó alemake niago, izapaló molago gonú nokipilike gili ámegekumú miluma geleake, agizani nakeseta vema gigizani lutozo loko lokago, agizani lutokago goha lamaná imó. 6 Lá okago, Palisaio monó vegehá keza limiki vake nana oko apele hilitune liki kezagi Heloteni patigú vegehaki litá iki lova gizamó.

Nonohulotó vegehá iki mulusi milamó

7 Lá okago, Izesú eza izegipala zuha kelémoko nonohulotó lemekago, vegehá mukí Galilaia mikasilotí kémegetiki vamó. Itó kéisigó vamamó. 8 Zelusalegatí itó Zutaia apakú numuni apá makotokatí itó Itumaio mikasilotí itó Zota nagamí vola helegalotí itó Tulo numutokatí Sitona numutokatí vegehá keza iki Izesú oko moloko imó nenémini gakoláa giliake vaí iki aitoka alegesá amó. 9* Lá ikago, Izesú alegesá iki mina vegehá aitoka mununú ikatave loko izegipala zuhate nagamikú lape makó aliiki nagamí getatoka milikiko nenegú iteko minoko gakó lo kimitove loko loketamó. 10 Vegehá mukí kelémo zokamómave liki netá golesa gizale vegehalite agupeló ale gilitunitímo lelémo zokative liki aitoka iki mulusi milakumule loko lapemú limó. 11 Lá okago, holosi golesa kigikagú mina vegehalite ánga zupa kigihúna giki gamoga giki géisi Ómasímini gipalama noane liki liaká amó. 12 Láa liki likago aí mogona avetó iki lilí ali amitave loko alévolé oko lo hukoketamó.

Izesú ve 12 hozaló ve kelémo molamó

(Mat 10:1-4; Luk 6:12-16)

13 Izesú nene zopegaló iteake agikatunú gili vegehá sele lo kemekago aitoka viki alegesá amó. 14 Lá ikago, ve 12-a ezagi minatave loko itó kimiselekiko monó gakó lí kimitave loko 15 itó zámua kemekiko kigikagú holosi minatamó kipiliki kimisilitave loko kelémo etó oake kugulizá nene aposolo vemave loko molamó. 16 Ve 12-a nene lá iki minamó: Kugulizá Saimon, agulizá gosohá Pitani molamó, 17 itó Zepetaioni gipala Zemusi itó agunala Zoní, keza nene kugulizá Poanelekesi loko molamó, lelí gakokuti nene gó hegeaká ve. 18 Itó Etulú itó Pilipó itó Patolomaíó itó Mataíó itó Tomasi itó Alapaioni gipala Zemusi itó Tataíó itó Saimoná eza Loma vemú giligo ahulanogo i ve, 19 itó Kalíotó numutotí ve Zutá eza minomo iteko Izesuni amimika limó.

Izesuko Pelezepuloko

(Mat 12:22-32; Luk 11:14-23)

20 Izesú nene aí numutoka vimó. Vo anitekago vegehá vaí iki alegesá akumú nosánetá namamó. 21 Lá ikago, Izesuni vegehala zuhate áisi negí hízekave liki la gakó giliake, agizató alitune liki vamó. 22* Lá ikago, monó mogona apí ikimiaká ve Zelusalegatí a ve keza

* 2:23: Gapo 23:25 * 2:25: 1 Sam 21:1-6 * 2:26: Liv 24:9 * 3:9: Mak 4:1; Luk 5:13 * 3:22: Mat 9:34, 10:25

Izesunimú láa liki lamó: Holosi golesa makó agulizá Pelezeputó nene agikagú noive, itó holositini agulizaki vémo alémo vatí igo holosi nene kepeleko kimiseleaká noive. ²³ Láa liki nila gakó Izesú nene geleake sele lo kemeake Satani zámuzá mota avilegeneikumú anoza gakó makó láa loko lo kimimó: Íi, Satá ezáa izegipala zuha kepeleko kimisilitihe. ²⁴ Mikasi makokú vejená hizi hóu latamó nene, alévolé iki minamiko ámina apatoka gámekokó pizinogo ive. ²⁵ Itó hamó zuha nenete hizi hóu latamó nene, ámina vejená alévolé iki minaminigave. ²⁶ Lá onoinazo, Satá nene ezáa vejenala zuhagi hizi hóu latamó nene, voko alévolé oko minamitimó nenazo, tolova inogo ive. ²⁷ Itó ve makolímó gasovagi ve amuzá vémini numukú litá oko iteko aí henoni muki ipá oko aleakaláa nomive. Goi oko ámina vémini agisa agizató nagá aleoko alika nene iteko alitimó neve. Lá oko nagá aleoko alika iteko henoniva ipá inogo ive loko limó nene Satani agizató nagá aleuke holosiva nene kepeleko kimiseleaká nouve loko anoza gajokutí limó.

²⁸ Loko loake, makó láa loko limó: Neza lamaná lo likimitoze, gililo. Netá golesa haitopaitó nenémini lihima itó alivi letivi iaká nenémini lihimaaláa nene Ómasímó hanuva ahuloaká gapo nemóza, ²⁹ * ve makolímó Ómasímíni Sikalahukumú alevo letovo oakaláa nene Ómasímó nenémini lihimáa apasoakaláa nomive. Ámina lihima ámina vémini amupiló mino lúaló moloko minanogo ive. ³⁰ Loko limó nene Ómasímíni Sikalahulímíni zámuzatunú negopa, holosi makolímó Izesuni agikagú lemeko alémo vatí igo holosi nene kepeleko kimiseleaká noive liki lakumú nene láa loko Izesú lo kimimó.

Izesuni izolahiki agunamotamolagi

(Mat 12:46-50; Luk 8:19-21)

³¹ Izesuni izolage izegipa agunamotamolagi anitiake numuni hetoka aikumú sele lamó. ³² Sele nilago, alími vejo iake mina vejenalite láa liki li amemó: Gelenape, izokage izegipa gugunamotamoka keza hetoka emane niake geikumú sele nilave. ³³ Liki likago, Izesú láa loko lo kimimó: Izónegíni nугunamotamónemú nilahe. ³⁴ Loko loake, aitoka mina vejená nene gonú nokipilike láa loko limó: Ángalo. Izónege izegipa nугunamotamóne imane niamole. ³⁵ Ómasímó li gakotó gili amiaká nia vejená kéisi nene izónege nугunamotamóne niaive, loko limó.

4

Zuha netá atilí oaká vemú anoza gakó

(Mat 13:1-9; Luk 8:4-8)

¹ * Izesú goha nonohuló agataloka monó lo nokimigo, aitoka vejená mukí keza sii sii liki alegesá ikago vejená giki akumulé loko nagamikú lapegú iteko minokago, lape nene nagamikú minokago, vejená alegesá amó mukí keza getatoka minamó. ² Minikago, Izesú anoza gakó haitopaitolímíni lo nokimike makó láa loko lo kimimó: ³ Gililo. Zuha netá atilí oaká ve makolímó netá gihila atilí inogo vimó. ⁴ Mikuka atilí omo novgo, gihila makó gapoló alemó zekago, gaha namate ake ni asú amó. ⁵ Makó nene gehani amupiló mikasi lagasó netó lemekago mikasi hána nomimó nenazo, goloakaláa litá oko golókaha, ⁶ ho nolake avagugu vizekago, luhusa hána minamike osagava vizimó. ⁷ Makó nene lilihámíni luhusa nene mikasigú ha netó alemó zike golokago, liliha nenémo goloko iteake zemikago gihila zemimó. ⁸ Makó nene mikasi lamanakú lemeko minake goloko iteko gihila zimó. Zava makó nenémo gihila 30 zimó, makó nenémo gihila 60 zimó, makó nenémo gihila 100 zimó. ⁹ Lakagatagi minatamó neneta imane gakó gili hee liki gililo, loko limó.

Anoza gajokú lo kemeaká itímíni mogona

(Mat 13:10-17; Luk 8:9-10)

¹⁰ Vegená lugáa vi asú ikago, aitoka mina vejenaki izegipala zuha 12-a kezagó minake ámina anoza gajokumú loká imikago, ¹¹ láa loko lo kimimó: Ómasímíni gasovaló minoakalímíni asuguná gakó lekeza gilitave loko lonoimóza, hetó niamoláa keza anoza gajokukó gilitave loko loaká nouve. ¹² * Nenemú Ómasímíni agepagutí gakó loaká i ve Isaiá gakó makó láa loko luhuva gizonimó nene keitoka alévolé oko neve: Kogómulatunú ángiakaláa ha ángitamóza, ma ángi vevesaminigave. Itó kagatatunú giliakaláa nene ha gilitamóza, gili vevesaminigave. Kigika ali viligamikoma, lihímáini ahuloketamigo, ha minanogo ive.

Zuha netakumú anoza gokolímíni mogonáa

(Mat 13:18-23; Luk 8:11-15)

* 3:29: Luk 12:10 * 4:1: Luk 5:1-3 * 4:12: Isa 6:9-10

¹³ Izesú miní ameko láa loko lo kimimó: Imane anoza gakó lumó nenémini mogonáa gelemahe. Lá noikoma, anoza gakó mukí nene nana níki gili vevesatave. ¹⁴ Netá gihila atilí oaká vémo monó nene atilí oaká noive. ¹⁵ Zuha netá makó atilí noigo gapoló alemó zimó nenémini iki minatamó keza monó gilitamóza, Satá litá oko aniteko monó nene kigikagú milikago minamó nene aleko vokago kigikagú minamimó. ¹⁶ Itó zuha netá gehani hizenei mikasiló limimó nenémini iki minatamó keza monó nigilíki litá iki laga kivisekago giliaká niamóza, ¹⁷ kigikagú luhusa ale gikitamigo gamena alínipa aliniko monó gakó alinakumú gopogu galatakalatá milikitata gamenaló nene litá oko akatimó neve. ¹⁸ Itó lilihagú limimó nenéminiki minatamó keza monó giliaká niamóza, ¹⁹ imane mikasiuka gena kepeleaká noi netá itó monimú lagava giliaká nia netalímo itó netá haitopaitokumú kumu heleaká noi netá nenémo kigikagú minoake, monó zemikago keitoka gihila utó osá amive. ²⁰ Itó mikasi lamanakú limimó nenéminiki minatamó nenete monó giliki alinago, keitoka gihila zeaká noive. Makolititoka napa otigí zeaká noive, makolititoka mukí zeaká noive, makolititoka vauva aleko zeaká noive.

*Liví legeakakumú anoza gakó
(Luk 8:16-18)*

²¹ * Loko loake anoza gakó makó miní ameko láa loko lo kimimó: Ve makolímo liví lege molokoko holoma sepekú ahe somotunú gahumá oakaláa nomive. Eza liví moloaká holomaló molokago, hize hanatanogo ive. ²² * Ámináminoko Ómasímini asuguná ne netá mino-loko vo tolova amitive. Minoko utó o asú inogo ive. Halá genei netá ámina oko hanato asú inogo ive. ²³ Lakagatagi minatamó neneta gakó imane gili hee líki gililo.

²⁴ * Loko loake láa loko limó: Lekeza gakó imane nigilíki gili guni iki gililo. Lekeza gakó gilita polosava nene Ómasímo áminagó oko nene monó lehizeleketanogo ive. Itó nenegó nomive. Aleko iteko likiminogo ive. ²⁵ * Makó keza monó nene vatí iki gizapa iki ali minatamó nene Ómasímo goha miní ameko kiminogo ive. Itó makó keza monó nene lamaná iki gizapa amítamó nene monó alenoupe gilitamóza, goha ipá oko alekiko nene hanuva minatamó neve.

Zuha netakumú goloakakumú anoza gakó

²⁶ Izesú gakó makó láa loko limó: Ómasímini monolímo likigikagú gihila ale utó itimómámini mogonáa lá oko neve: Ve makolímo mikú zuha netá mikasigú atilí oake, noike, ²⁷ gó lana gó lana nominago nenémini mogonáa ániigo hee lamigo, zuha netáma goloko iteko napa noigo, ²⁸ mikasímo ezáa lulu vizeake goloaká noive. Api okó hosi oake goloko itike agila oake, gihila zeaká noive. ²⁹ * Gihila zeake zuha lokago, aleko natuni gamena alitokave loake, hukatave loko kimiselekago minumuni aliaká niave.

*Masteti zuha netakumú anoza gakó
(Mat 13:31-32; Luk 13:18-19)*

³⁰ Gakó miní ameko láa loko limó: Ómasímini avogisalo vi hilata vegená hizi hutilí itakumú nene nanelálini amupiló ale moloko litove. Nenemú litove loko nene nana gakotó anoza ale moloko litove. ³¹ Masteti loko nei zuha netá nenéminoko neve. Ámina netá nene mikasigú atilí inigi niago, mikasiuka gihila lugáagutí ezáa koma koma nemóza, ³² atilí ikago, goloko iteko iteko napa oake, zamú mukí kivilegeko izana napagi itekago, nama nenete samapalagú numuni giaká niave.

*Izesú anoza gakó mogonáa lo kimimó
(Mat 13:34-35)*

³³ Izesú anoza gakó haitopaitó mukí hamolíminoko monó lo kemeko minamó nene gilita polosava lo kimimó. ³⁴ Gakó lo kiminogo noike anoza gakokutikó lo kemeake, lo utó oko lo kememike ezagi izegipala zuhagi kezáikó minake nene, gakó mogonáa mukí lo utó oko lo kimimó.

*Izesú lokago una napa ahulamó
(Mat 8:23-27; Luk 8:22-25)*

³⁵ Ámina gamenalokó unaká gamena gánavaló nene Izesú eza izegipala zuhama vola helegaloka mota vitune, ³⁶ loko loake alegesá iki mina vegená ahulokimiake sipigú iteko noigo, keza alímiki nivago, vegená makolite nagamikú lape makokú kémegetiki vamó. ³⁷ Nivago una napa alekago, nagamí nene valahuká zitímo lapegú lemeko vaí inogo noigo Izesú nene lape asevaló akonoike, gotolaló za moloko akonoigo, ³⁸ izegipala zuhate alími otiake láa líki li amemó: Monó gizapa velemaka, nagamikú simá nanogo nounize, geza

* 4:21: Mat 5:15; Luk 11:33 * 4:22: Mat 10:26; Luk 12:2 * 4:24: Mat 7:2; Luk 6:38 * 4:25: Mat 13:12, 25:29;

Luk 19:26 * 4:29: Zoe 3:13

nanamú lelikumú gele lememanike hanuva noane. ³⁹ Liki likago, Izesú oteake unama gahá amekake nagamí nonohuló nene valahuká zemoko legesó oko minozo loko lokago, una nene ha okago nagamí nene kii nolike zou limó. ⁴⁰ Lá okago, izegipala zuha láa loko lo kimimó: Nanamú lekelegesá ligive. Nenikumú velesá gili alévolé amahe. ⁴¹ Loko lokago, kehelele goha vizigo kezáini ligili hagili ake láa liki lamó: Agae, imane ve nene Haitolímíni neve. Unagi nonohulokí nenetosa gakola gili alikasive, liki lamó.

5

Gelasa mikasiuka holosi golesa amisele ahulamó (Mat 8:28-34; Luk 8:26-39)

¹ Nonohuló vola helegaloka viake, Gelasa vejenalitiní mikasiuka anitemó. ² Neneló agikagú holosi golesa mina ve makó minamó. ³ Ámina ve nenémo geha mulikú akoaká noigo, ve makolite agizató alisá ikago seni nagatunuki alemó nene alemimó. ⁴ Gamena gamena agisa agizató etoha iki seni nagatunú aliaká amóza, agizató nagá nene zeko halí oake, agisáló nagá alemó nene zeko hukokago, ve makolimo amuzá moloko alémo zou lamitimó imó. ⁵ Gamena gamena únaká neteká mulikuki agokalokí minake nene, gopaga loko minake nene, gehanitunú agupeva gesopá zeko minoaká imó. ⁶ Ámina ve nenémo Izesú nene sipigutí nolimigo geha mulikú gonosí apakú minakutí ake hototí Izesuní ángoake ololu loko oko Izesuní agisauka gupá ze amike ⁷⁻⁸ gamoga geko láa loko limó: Izesuvo, Ómasi napámíni gipalamaka, géisi nana netá golesa loló onetanogo noane. Loko lokago, Izesú nene holosi golesa neneka, ámina vémini agikagutí iteko vamane loko lomikago, holosi nenémo amanapa ike neza Ómasímíni agulizá noluze, miluma hoza nememo. ⁹ Loko lokago Izesú nene loká otake gugulizaka éagave. Loko loká omikago eza limó: Leza mukó nouninazo, lugulizá nene ami mulusi nouve. ¹⁰ Loko loake ámina mikasilotí limiselemítane loko negénegeka limó. ¹¹ Loko lokago, iza gululusi mukí zopegaló gale níki niago, ¹² holosite negénegeka lake izatini kigikagú limiselekako limitune. ¹³ Liki likago, gele kemekago, holosi golesa nenete agikagutí itiake iza gululusi tu tausen nenetini kigikagú itiake limikago, olíi miliake meiniló limiake nonohulokú limiki nagamí níki hutiake hiligesá amó.

¹⁴ Hilikago, iza gizapa vete golisi viake taoni napaloka iza gihiló numutokagi aveté iki li kimikago, vejená keza utó i netá ánganigi viake, ¹⁵ Izesutoka anitiake holosi agikagutí kimiselekeago va ve nene ginegane ale luhoake geleakala lamaná okago, mító noigo, ángiake kelegesá ligimó. ¹⁶ Lá niago, nene suni ánga vete holosi golesagi mina ve lamaná imó itó iza helemó nenémíni gakoláa aveté iki li kimikago, ¹⁷ mikasinini ahulokoko vitive liki Izesuní negénegeka lamó. ¹⁸ Likago, Izesú eza sipigú noitigo, holosi agikagutí kimiselekeago va ve nenémo Izesuki makó minatíve loko negénegeka lokago, ¹⁹ Izesú gele amemike láa loko lo amimó: Numukaloka voko Guivahanímo geikumú agika hizekago loló ogeta netá lamanalímíni gakola nene vejenaka zuha aveté oko lo kemezo. ²⁰ Loko lokago, Tekapoli mikasiloka atiginá oko vike Izesú loló ota netakumú lo utó oko lo kimigo, ve vená mukilite Izesuní sigaga litiki minamó.

Zailoni moholagi Izesuní gotó ale gili venaki (Mat 9:18-26; Luk 8:40-56)

²¹ Lá ikago, Izesuge sipigú itiake ima helegaloka goha iake, getató limiki niago, vejená vaí iki aitoka alegesá amó. ²² Lá ikago, monó numukú agulizakí ve makó Zailó loko noi vémo oko ²³ Izesuní ángoake, gupá ze amike negénegeka like limó: Není mohó komámíni ameni nomigo, mota hilinogo noize, zokoko agómulagi minative loko, oko gigizanitunú ale geko nóhóná zetatané loko noluve. ²⁴ Loko lo amekago, geleake, makó nivasigo, vejená alegesá amó vaí iki ámegetikí nivake, aitoka sii sii liki nivakú nene ²⁵ vogaláikú vená makó nene ikanímó avutá apelekeago númase gapo kilisimasi 12 oko novigo molova molova oko noi vená minamó. ²⁶ Lusa ve mukilite miluma netá mukí amikago moni keme asú imóza, avisi netáma asú otámike alika sipisi netá gizaleko minamó. ²⁷ Eza nene Izesuní gakoláa geleake vejená alegesá amó nivakú nene Izesuní amegesaloka oake, ²⁸ agupeló ahe itó hanuva luhoaká gólaló ale gelekinake zokatove loko agata geleake luhoaká gólaló ale gilimó. ²⁹ Ale nogilike, litá oko sepá zekago, nivisi netá asú onimikave loko agupegú gilimó. ³⁰ Gelekeago, Izesú nene zámuzala agikagutí vokago geleake, vejená alegesá akutí viligoko láa loko limó: Není luhoaká gotó éaho ale gilive. ³¹ Loko lokago, ai izegipala zuhate láa liki li amemó: Vegená alegesá ikima sii sii likima nianazo, nugupeló éaho ale nogilive loko nolape. ³² Liki likago, éaho alihe loko ánganogo ángomo mohona imóza, ³³ vená nenémo Izesú loló ota netakumú geleake ahelele novizigo, luvuluvo nozike ake, agihúna geko lo utó oko lo ame asú imó. ³⁴ Lo utó oko lo amekago, eza láa loko lo amimó: Mohónemaka,

nenikumú gele alévolé anitímó gelémo zokokave. Mulukagú hulu iko vozo. Givisi netakutí zokoko minozo.

³⁵ Loko noligo, monó numukú agulizaki vemámini numukutí vejená makó iake láa liki li amemó: Mohokama mota helekave. Nenemú tisaka nanamú goha negénegeka nolotane. ³⁶ Liki gakó lamóza, Izesú nene gele ahuloake, monó numukú agulizaki vema láa loko lo amimó: Geza gehelele vizemino. Gele alévolé okogó minozo. ³⁷ Loko loake, vejená makó ámegetiki vamtave loko lo hukoko lokago, Pitaki Zemusiki agunala Zoniki kezagó kelémoko vimó. ³⁸ Viki monó numukú agulizaki vemámini numukú anitiki ángimó nene, gakó napa napa liki ive nama iki hitagá hiziki niago ángimó. ³⁹ Ángoake Izesú nene numukú iteake ve venáma láa loko lo kimimó: Lekeza nanamú gakó akó napa napa liki ive nama niave. Mohóma nene helemive. Hanuva avó akonoive. ⁴⁰ Loko alémo otitove loko gelenei gakó noligo, giza napa itamóza, vejená mukí kehélú ike kimiselekago, hetoka limikago, mohómámini izolahíko amelahíko izegipala zuha losive makolemagi kelémoko mohóma akonoitó itimó. ⁴¹ Iteake agizató nalike aí gakokutí láa loko lo amimó: Talita kumi. Nenémini mogonáa lelí gakokutí nene mohó koma otitane loko noluve loko neve. ⁴² Loko lokago, mohó nenémo litá oko oteake mohona oko minamó. Aí kilisimasi 12-a minamó. Itó vejená keza ángiake litá iki sigaga goha lamó. ⁴³ Lá niago imane netakumú vejenalite gilikataze, aveté iki li kememilo loko lo hukoketake nene, ámina mohó nene nosánetá amilo loko lo kimigo nosánetá aliake amemó.

6

Nasaleté numutoka Izesuni ángi ahulamó

(Mat 13:53-58; Luk 4:16-30)

¹ Izesú nene apá ahuloake, ezáa gotó apalaloka vo anitekago, izegipala zuha keza ámegetiki vamó. ² Lá ikago holisi gamena alitokago, monó numukú monó lo keme keme oko noigo, vejená mukilite giliake sigaga sagaga litake láa liki lamó: Imane vémo nene gakó hikutí alive. Gele vevesoakaláa éaho amive. Imane ve nenémo imane alévolé suni nene hikutí ale utó oaká noive. ³ Leza aí mogonáa gelenoune. Aísi numuni geaká ve nene Maliani gipala noinae. Itó Zemusi Zosé Zutá Saimonige keí uvóipoma noinae. Mohó agunala kezagi imaneló miniki aliki iaká nianazo, áisi nene hanuva lelikitana ve noive. Liki liake gelego, gena okago, aliki limiki likago, ⁴* Izesú láa loko lo kimimó: Ómasímini agepagutí gakó loaká vémini agulizá nene numutó namató puu loko vitimóza, ezáa gotó apatokagi ezáa vejenala zuhalokagi ezáa numunakagi aí agulizá minamitimó neve. ⁵ Loko loake áisi neloló Ómasímini zámuza ale utó itove loko imóza, gena avisekago ahuloake, kivisi vejená lugáa agizanitunú ale geleko nónohá zeketake kelémo zokamó. ⁶ Lá oake, aikumú gili alévolé amakumú giligo gena imó.

Izegipala zuha 12 keza monó hozaló vamó

(Mat 10:5-15; Luk 9:1-6)

Lá okago, Izesú nene numutó mohona oko monó lo keme keme oko minamó. ⁷ Lá oake, minomo noitike, izegipala zuha 12 nene kelémo nupa oake, mihina iki holosi golesa vejenalitini kigikagutí kipiliki kimisilitave loko zámuza nokimike, losi losi oko nokimisilike láa loko loketamó: ⁸* Gapo vitatoka nene netá makó alemiki hánusagó aliki vilo. Itó peleti alemiki akiseaká gó alemiki gó komagú nene moni guémiki, ⁹ likigisaló suú luhiki nene luhiaaká gó lositá luhamiki vilo. ¹⁰ Loko loake láa loko lo kimimó: Itita numuni makokú itíikima ámina numukú aki-likí niviki ámina apatoti vitave. ¹¹* Itó apá makotoka likilími lamaná amikoma itó lekelí gakó gelemikoma nene, ámina apá nahuliki vahé miliki likigisalotí mumusopa nene usagamá zi ahuliki vilo. ¹² Loko lokago, vake vejená keza kigika ali viligatave liki li utó iki li kimiake, ¹³* holosi mukí kigikagutí kipiliki kimisiliki itó kivisi vejená mukí nene netupa hilikimiake kilími zokimi vamó.

Nagamí holokimiaká ve Zoní hili gakó

(Mat 14:1-12; Luk 3:19-20; 9:7-9)

¹⁴* Lá ikago gakoláa hutilí oko vike agulizaki ve napa Heloteni agataló vo holokago gilimó. Ámina gamenaló nene vejená makolite Izesukumú nene Zoní monó nagamí holokimiaká vema heleneikutí oteake imane zámuza nene netá haitolímini ale utó oaká noive. ¹⁵ Liki nilago lugáa keza Izesukumú nene Ómasímini agepagutí loaká ve Ilaizá goha okulumakutí lemeake noive liki nilago, lugáa nenete gozapá Ómasímini agepagutí gakó

* 6:4: Zon 4:44 * 6:8: Luk 10:4-11 * 6:11: Apo 13:51 * 6:13: Zem 5:14 * 6:14: Mat 16:14; Luk 9:19

liaká a ve makokitana oko noive liki liaká amóza, ¹⁶ Heloté nene geleake Zoní eza luvana hukuto vemámo galegutí oteake ámina netá loló oaká noive loko limó.

¹⁷⁻¹⁸ Nene hanuvamú lamive. Heloté nene amunaloka emane uvolahó Piliponi venala Helotiasini nene ipá oko alimó. Lá okago, Zoní nene Heloteni lo ame ame oloko vike uvokahini vená ipá oko alenimó etamive. Loko lokago, venalámo gala vizekago Heloté nene ve makó kimiselekaگو vake Zonini agizató aliake nagá numukú ahulitámo. ¹⁹⁻²⁰ Lá ikago, Helotiasí nene Zonikumú izapaló molokago apele hilinogo gilimóza, Zoní nene lihimavala nomi ve minake monolagi ve minokago, Heloté nene apilitomó nene Ómasímo nana onetatihe loko ahelele vizekago Zonini gizapa lamaná otatonazo lokago Helotiasí nene Zonini apelemitimó imó. Heloté nene Zonini gakó gamena gamena geleake agata losi goha gilimóza, Zoní li gakokumú geleake laga avisimó.

²¹ Minake Heloteni nene geta gamena alitokago, mukí kugulizaki vegi lova gizapa vegi Galilaia mikasiuka vegená iti minamómagi kelémo nupa oake nosáneta vatá okimikago, niki niago, Helotiasí nene Zonini apiliti gamena ale utó imó. ²² Heloteki nosáneta niki niago, Helotiasini moholama iteake kovogisaló melekéni okago, keza ániigi kumu hiliake agulizaki ve napa nenémo mohóma láa loko lo amimó: Geza netá nemú manamú nogilitanímó nene lokako gimitove. ²³ Loko loake, Ómasímuni avogisaló lo hutoko limó: Nana nana netakumú loká onetatane. Ha giminogo uve. Gizapa nou mikasimuki loká onetanimó nene hanuva hutoko giminogo uve. ²⁴ Loko lokago, mohó nenémo hetoka lemeake izolahini nene gizapa vemámo láa loko lokanazo, nana netakumú loká otatove. Loko lokago, izolahó láa loko lo amimó: Mota helekave gilitokive loko monó nagamí holokimiaká ve Zonini luvana hutoko gotoláa nimitane loko lamane.

²⁵ Loko lokago, mohómámo litá oko agulizaki ve napa noitoka goha iteake láa loko loká otamó: Monó nagamí holokimiaká ve Zonini gotola itínasa gitegeko lapegú molokoko nimitane loko noluve. ²⁶ Loko lokago, agulizaki ve napa nenémo giligo gena imóza, Ómasímuni avogisaló lo hukokumóma nenazo itó alesa molokago iki mina vegenalitini kovogisaló lo hukokunazo loko geleake, ²⁷ litá oko pilisi ve makó amisilike Zonini gotola gitegeko alekative loko lomikago, vike nagá numukú nene Zonini luvana hutoake gotola gitegeko ²⁸ lapegú moloake aleake mohóma amekago, mohó nenémo izolahó noitoka aleko voko amimó. ²⁹ Lá okago, Zonini izegipala zuhate ámina gakoláa giliake viki gonosiváa aliki vake geha mulikú gale zemó.

*Ve 5000 nosáneta kemeko namó
(Mat 14:13-21; Luk 9:10-17; Zon 6:1-13)*

³⁰ Aposolo zuha nene losi losi iki mihina i asú iake, atiginá iki ake Izesú noitoka ali nupa ake netá iki miliki ake monó li kemekumú nene aveté iki li ami asú ikago, ³¹ vegená mukí vigá igá niago, nosáneta nata gamenagi nominazo, Izesú nene lezategú vegená niamató voko lavasú vizeko minatune. ³² Loko lokago kezáikó nagamikú lapegú itiake vake vegená niamató vamó. ³³ Nivago vegená mukí keza ániigiake ániigi vevesiake, taoni mukikutí nene mikasigú ololu liki vake goi ikitiki neneló vi anitemó. ³⁴ * Vi antiiake vegená vaí iki alegesá iki minikago, Izesú nene sipigutí olío lemeko ániagamó nene sipsip iza gizapa venini nomimó nenéminiki minikago ániigoake, keikumú agika hizekago gakó mukí lo keme keme oko minamó.

³⁵ * Lá niago, ho lemekago, izegipala zuhate aitoka ake láa liki lamó: Imane apá nene ha gámetó nouko gamena mota asú okaze, ³⁶ viki iza gihiló numutokagi luhuva numutokagi mihina iki nosánetaíni meina hizítave loko kimiselezo. ³⁷ Liki likago, konotó aleko lekezatini nosáneta kimiki nalo. Loko lokago, izegipala zuhate láa liki lamó: Íi, moni gó lositatanú peleti meina hizekoko kemesá nenegi vo aletinogo ive. ³⁸ Liki likago, eza loká oketake limó: Lekezaloka peleti nanakí neve. Viki ániigalo. Loko lokago, viki ániigiake láa liki lamó: Ligizani helegaloka asú igo neve, itó lagaha lositá neve. ³⁹ Liki likago, mukí vegená nene hizi letiká hizi letiká iki gihisi gosoható minatave loko lokimikago, ⁴⁰ hizi letiki tivamoláa nene 100 nenéminiki itó amunaloka miniliki lemamoláa nene 50 nenéminiki minamó. ⁴¹ Lá iki minikago, peleti ligizani helegaloka asú igo itó lagaha lositáma aleake okulumatoka okenava oko ániigoake Ómasi agepoka loake peletima gitegeake, vegená gona miliki kimitave loko izegipala zuha kemeake, lagaha losimagi vegená mukilite natave loko gona moloko kimimó. ⁴² Lá okago vegená mukilite nikake kagatupa okago, ⁴³ peletigi lagahagi lumáa ali nupa iki gosúveha 12-a vaí okago ali milamó. ⁴⁴ Itó nosáneta na véa nene 5 tausen nenéminiki minamó. Vená izegipagi gatamune.

* 6:34: Nam 27:17; 1 Kug 22:17; 2 Iki 18:16; Izi 34:5

* 6:35: Zak 10:2; Mat 9:36

Izesú nagamí amupiló liso liso vimó
(Mat 14:22-33; Zon 6:15-21)

⁴⁵ Lá iki niago, eza vejenáma nokimisilike izegipala zuha nene nagamikú lapegú itiiiki vola helegaloka Petesaita numutoka goí iki nivitave loko loketamó. ⁴⁶ Lá oake vejená gekéváké loko kimiseleake eza nene zopega makotó Ómasiloka linogo itimó. ⁴⁷ Lá noigo límugusi zekago, izegipala zuha nene lapegú viki viki nonohuló holukú nivago, Izesú nene ezáagó getató minake ániagamó nene, ⁴⁸ una napa aleko kogómulalokatí kehelú inogo inazo, nagamí apiliaká nogosanitunú amuza miliki apeleke ligitagani amó. Lá niago gokululuva notovoigo, Izesú nene nonohuló amupiló liso liso vike keza niatoka vo anitimó. Keza kiviligitimó noike, ⁴⁹ nonohuló amupiló mohona noigo ániagiake, holosi noave liki giliake keza mukitó kelegesá legekago gopaga lamó. ⁵⁰ Lá niago, Izesú litá oko gakó lo kimike láa loko lo kimimó: Lekelegesá legemino. Mulutini lepa hizino. Nezama nouze. ⁵¹ Loko loake, sipigú itekago hepé kii límóza, ⁵² nosáneté 5 tausen vejená kimitotí Izesu haitopaitó avevezaha aleaká itimini mognáa gili hee hee lamake sigaga liki minamó.

Genesalete mikasiloka kivisi vejená kelémo zokamó
(Mat 14:34-36)

⁵³ Keza vola helegaloka Genesalete numutoka vi anitiake, nagamikú lape ali gaheva ake nagá ziake, ⁵⁴ lapegutí olí limikago, vejenalite litá iki ai ániagi vevesiake, ⁵⁵ ololu liki numotó numotó vi asú iake, kivisi vejená nene ukoakogú kilími miliake, Izesú mina numotó numotokumú giliake neneló kilímiki vamó. ⁵⁶ Minakutí minakutí nene taoniloka itó luhuva numutoka itó iza gihiló numutoka nene kivisi vejená nene alegesá apatoka kilímimi miliake láa liki li amemó: Gugupeló ahe itó hanuva gineganega gahevalokahe ali giliiki nene zokatave. Liki negénegeka likago, áminámini niake ali gele vejená nene zoki asú amó.

7

Avóike apí a mognatagana
(Mat 15:1-9)

¹ Palisaio monó vejenaki Zelusale numutotí monó mognona apí-ikimiaká a ve lugáagi Izesutoka iki alegesá amó. ² Lá amó nene izegipala zuha lugáate kigizani nagamí zemake nosáneté ninago ániagamó. ³ Palisaio monó vejenaki Zuta vejená mukitoka keza golesa okatune liki avóike la gakotó giliiki kigizani vauva aliki nagamí zemikima nosáneté nisá amamó. Avóike li hukiki la gakó ali amegesaló miliki lá iaká amó. ⁴ Itó maketiloti nosáneté meina hiziki alikamó nene monó gelemi ve makolímó ámina nosáneté ale geleneitimó nene ligika ale golesa iti netá loló okave liki giliake nosánetéma monó nagamí hepa hepa ikakegó niaká amó. Itó nenémini okogó minamive. Mognonatagana haitopaitolímimi ali minamó. Nagamí gonigi somogi kapa lapegí nene ligikagú golutuva loko lelémo golesa okative liki nagamí ziaká amó nene avóike ali minató ali amegesaló amegesaló mililiki itemó. ⁵ Lá iaká amó nenazo, Palisaio monó vejenaki monó mognona apí ikimiaká a vegí keza Izesuni loká itake lamó: Geí izegipaka zuha nene avotegini mognonatagana ali minamake nanamú ahulikave. Nosáneté natune liki, ligika ali golutuva liaká suni aliki kigizani nagamí zemake ninave. ^{6*} Liki likago, Izesú láa loko lo kimimó: Genezatini lositaki neneta Isaiá nene alika utó iti netakumú gozapá limó nene lamaná lekelikumú lokamóma neve. Ómasímo li gakó láa loko luhuva gizonoiómoma neve:

Vegená mulusi imane keza kegepatunukó nugulizá ali otiaká niamóza, kigika nenitoka mili gímizinamake mili hotó niave.

⁷ Vegenalitini gakó nene není gakokitana okago

li kimi-kimi iki miniaká niake soza miliki gupá zi nimiaká niave.

⁸ Leliksi nene Ómasímo lo hukoleketa gakó ahuliake vejenalitini mognonatagana ali miniaká niave.

⁹ Láa loake nene láa loko lo kimimó: Avotegini mognonatagana alitune liki Ómasímo lo hukoleketa gakó lekemegesa amiake niamó nene vatí suni nego aliaká niahe. ^{10*} Mosé nene lekeza izokahiko amekahiko kugulizá ale otezo, itó ve makó eza izolahiko amelahiko usí vizekimiaká gakó lo kimitimó nene apele hilitune loko leketonoimóma neve. ¹¹ Láa loko límóza, lekelisi láa liki liaká niave: Ve makó eza izolahiko amelahiko nene hize lé oketatove loko u netá mota kolopani loló okave. Nenémini mognóna lelí gakokutí nene Ómasímini mota amekuve. ¹² Loko litikumú nene izolahini amelahini nasahilí oketati gapo hize lí oaká noive. ¹³ Lekeza lá iake nene Ómasímini gakó vasá ziake lekezatini avotikini gakó alévolé

* 7:6: Isa 29:13

* 7:10: Gá 20:12; Gapo 5:16; Gá 21:17; Liv 20:9

iki lukesa ali miniaká niave. Itó nenegó nomive. Nenémini netá mukí ali miniaká niave, loko limó.

Ligika ale gopa oaká netá
(Mat 15:10-20)

¹⁴Láa loko loake ve vená mukí sele lokago, aitoka alegesá ikago, láa loko lo kimimó: Nénisi nene gakó lo likimitoze, gililo. Mukitoka giliiki gili vevesiki gililo. ¹⁵⁻¹⁶Ni mikilí ikago lakagatupagú lemeaká noi netá nenémo likigika ale golotuva lamitimó neve. Likigikagutí iteaká noi netalímo likigika ale gopa itimó neve.

¹⁷Loko loake numukú iteake, ve vená ámegekimikago, izegipala zuhate ámina anozaga kokumú loká imikago, láa loko lo kimimó: ¹⁸⁻¹⁹Íi, lekelisi ámináminiki lakagata kolosamimó niahe. Magonáa gili vevesamahe. Legepatunú netá matá nokuko ligikagú lemekoko eza gapovagú voaká noinazo, lakagatupagú lemeaká noi netalímo likigika ale gopa osá amive. Loko limó nene nosánetá mukí nene noaká netakó minokave loko live. ²⁰Láa loake makó láa loko limó: Likigikagutí iteaká noi netalímo lekemeni ale golotuva loaká noive. ²¹Vetini kigikagutí nene golesa kagata geleaká, mokoló mogona, gumína, vevená kepele heleaká, ve vená huki ezega emega oaká, ²²ánigi lamaná oaká, netá golesa aleaká, kogoka vizeaká, hokolizá itó mumuzó oaká, kemegeka loaká, kugupe aleko iteaká, zozozogo vizeaká nenemú noluve. ²³Imane netá golesa mukí nagatumó nenémo likigikagutí iteake lekemeni ale golotuva loaká noive, loko limó.

Silia mikasiukatí hetoka venalímo gele alévolé imó
(Mat 15:21-28)

²⁴Nenetí ámina apá ahuloake Tulo numutoka apá agilikaloka vimó. Vo aniteake, numuni makokú iteake nenemú gelemítave loko gilimóza halá gemitimó okave. ²⁵Vená makolímíni mohola nene holosi makolímó agikagú lemeake alémo golesa o minamó. Lá noigo ámina venámámo Izesuní gakoaláa geleake litá oko ake Izesuní agísagú agihúna gimó. ²⁶Ámina vená nene Zuta vená negopa hetoka vená minake, Pinisia apá nene Silia mikasiuka getamó minatímo eza nene moholámíni agikagutí holosi apeleko amisilitive loko loká omikago, ²⁷Izesú nene Isilae vevenalite Ómasímíni lusa goí iki ali alitakumú geleneike anozaga gakó makó láa loko lo amimó: Izegipatiní nosánetá ipá oko galatiní kimitunimó nene etamive. Izegipa nenete goí iki niki kagatupa itave. ²⁸Loko lokago, ámina hetoka venámámo gele veveso minake ezáagi Ómasímíni lusa ale alitikumú geleake láa loko limó: Guivahanínemaka, lamaná lokanimóza, nezama litoze. Nosánetá noaká holomalotí izegipate niki lana koma alemó zimó nene galatiní netá loló oaká noive. ²⁹Loko lokago, Izesú lo amike limó: Láa loko lanikumú gele gumuze, atiginá oko numukaloka vozo. Holosi nenémo mohokámíni agikagutí mota ahulomiake vokave. ³⁰Loko lokago, numunaloka vike ánigamó nene, holosi nene moholámíni agikagutí golisi okago holomaló hanuva akonoigo ánigamó.

Izesú negi ve alémo agata koló imó

³¹Lá okago, Izesú nene Tulo numutotí atiginá oko vike Sitona numutoka avilegeake, vike Tekapoli mikasi avilegeake Galilaia nonohulotó vo anitimó. ³²Vo anitekago, negi ve makó genezala gena imó nene alímiki Izesutoka vi anitiake, eza nene agizanitunú nónohá zemikiko lamaná itive liki negénegeka likago, ³³vevená alegesá akutí alémo otopá zeake kezáiki minasike agizani hisulatunú agatagú hizeake gihutú oake, agizanitunú genezalaló lupizeake, ³⁴okulumakú okenava oko ángoake, ahuu lo nahulake láa loko lo amimó: Epata. Nenémini mogonáa lelí gakokutí nene koló ino loko. ³⁵Loko lokago, agata koló okago, genezala viligoake gakó lamaná limó. ³⁶Lá okago, Izesú nene avetó iki vevená li kememítave loko lo hukoketamóza, eza lo hutoko loketaha loketaha negénegeka liki lí utó iliki vamó. ³⁷Keza nene sigaga goha liki minake láa liki lamó: Netá mukí loló noimó nene lamaná okogó loló oaká noive. Kagata mola vevená nene ale vevesokimikago gakó giliaká niave, itó kegepa lakolí i ve ale vevesokimikago gakó liaká niave, liki lamó.

8

Izesú Ve 4000 nosánetá kemeko namó
(Mat 15:32-39)

¹Gamena nene zupa vevená vai iki alegesá ikago, keí nosánetá nomigo, Izesú nene izegipala zuhama sele lokago, aitoka ikago, láa loko lo kimimó: ²Vevená mukí imane nosánetá namake nenitoka nene gamena losive makole minikago milumáini gelekuve. ³Itó lugáa nene hotokatí nianazo, itína gaúna giliki niko numúitoka kimiselekugo vitamó nene gapoloka kovonana vizinogo ive. ⁴Loko lokago, izegipala zuhamate láa liki li amemó: Mikasi gomopalaló imane vevená mukí imane nosánetá hikutí ale utó oko kemeko natune. ⁵Liki likago, Izesú loká oketake lekelitoka peleti nanakí neve loko lokago, keza 7-a neve.

⁶ Liki likago, vegená mukí nene mikasiló minatave loko lokimiake, peleti 7-a aleake Ómasi agepoka loake, gitegeake vegená gona miliki kimitave loko izegipala zuha kemekago, keza vegená gona miliki kememó. ⁷ Lagaha lagasó minokago, nenemuki Ómasi agepoka loake imanegi gona miliki kimilo loko lokimikago kememó. ⁸ Vegená nenete niki niki kagatupa okago, lumáagi lanahanagi ali nupa iki gosúveha 7-a vai okago ali milamó. ⁹ Ámina nosánetá na vegená nene 4 tausen nenémiliki minake namó. ¹⁰ Lá ikago kimiselekago numúitoka nivago, izegipala zuhagi litá iki sipigú itiake Talamanuta numutoka vamó.

Alévolé suni ániगतune liki lamó
(Mat 16:1-4)

¹¹ * Vi anitikago, Palisaio monó vegená keza iake gimivagú miliki okulumakutí ve noitihe loko gilitune liki alévolé suni ale utó okako ániगतune liki Izesugegi lova leta amó. Lá ikago, ¹² * Izesú gele golesa oake láa loko limó: Imane oko moloko oaká nou suni ániagiaká nia ve neneta alévolé suni ale utó okago itina ániगतune liki nanamú liaká niave. Lamaná lo likimitoze, gililo. Alévolé suni makó ale utó ugo ániगaminigave. ¹³ Loko loake, ahulokimiake izegipala zuhagi nene sipigú goha itiake ima helegaloka amó.

Palisaio monó vegenaki Heloteki kei mogonatagana
(Mat 16:5-12)

¹⁴ Lá niago, peletimú kagatí molokago, alemago peleti hamokó nene nagamikú lapemagú minamó. ¹⁵ * Lá okago, Izesú nene Palisaio monó vegi Helotémagi soza mogonáinimú anoza gakokú kagata aleko láa loko limó: Palisaio monó vegi agulizaki ve napa Heloteki kei lulu vizeaká netá ehe, lekepelekatize. ¹⁶ Loko lokago, izegipala zuhamate peletimini lulu vizeaká netakumú lihe liki kezáitoka láa liki ligili hagili iki minamó: Peleti nene lagatí molokago ahulokoko unikumú lokave. ¹⁷ Liki la gakólímo agataló holokago geleake láa loko lo kimimó: Peleti ahulokunike unikumú lokave liki nanamú ligili hagili iki niminave. Azozá netá matá oko moloko utímimi mogonáa giliki velesá gili hee hee lamahe. Likigika kolosamihe. ¹⁸ * Lekeza lokogómula nemóza ániगamahe. Lakagata nemóza gelemehe. Lakagatí molokago ahe. ¹⁹ Ve 5 tausen keikumú peleti ligizani lugaloka asú igo gitegekago niake kagatupa okago lumáa ahulikago gosúveha nanakí vai iki alevé. Loko lokago, keza 12-a neve, liki lamó. ²⁰ Láa liki likago, eza vegená 4 tausen keikumú peleti 7-a kemekago niake kagatupa okago lumáa gizaká iki ali milamó nene gosúveha napa nanakí vai iki alevé. Loko lokago, keza 7-ave liki lamó. ²¹ Láa liki likago, eza láa loko lo kimimó: Nene ániगinamóma nemóza, goi oko loló oleketu netakitana oko goha loló itomó neve liki velesá gili vevesinamahe, loko limó.

Petesaita numutoka agómula lika ve ale goloutotamó

²² Lá okago, vake Petesaita numutoka vi anitikago, agómula lika ve makó nene Izesutoka alímiki viake, agizanítunú ale gelekoko ale goloutative liki negénegeka likago, ²³ agómula lika vemámini ágizató aleake símekaloka alémoko limike, agómulaló gituhú otake agizanítunú ale geleko nónohá zetake loká otake netáma nánigape. ²⁴ Loko lokago, agómula goloutoko ániгоake vegená mihina niago nánigumóza, zagítana iki niago nániguve. ²⁵ Loko lokago, goha agizanítunú agómulaló nónohá zemikago, ániго hokolotoake lamaná okago, netá mukí ániго kolosoko ániगuve loko limó. ²⁶ Lá okago, Izesú nene numunaloka namisilike limó: Numuni napaloka goi oko vamoko geza minoko aleko itanitoka vozo, loko lo amimó.

Pitá Izesuni mogonamú lo utó imó
(Mat 16:13-20; Luk 9:18-21)

²⁷ Izesú nene izegipala zuha kelémoko Sisalia mikasiuka agulizaki ve Piliponi agulizató apatoka luhuvagi numuni numutó numutó vamó. Gapoloka nivake izegipala zuha loká oketake vegenalite nenikumú éahove liki liaká niave. ²⁸ * Loko lokago, keza li amiki lamó: Monó nagamí holokimiaká ve Zoní nene goha utó oko noane liki liaká niave. Itó lugáa nenete llaizá eza gozapá okulumakú iti vema goha lemeko noane liki liaká niave. Itó lugáa nenete Ómasímimi agepagutí gakó liaká a ve gozapá minamokitana noane liki liaká niave. ²⁹ * Liki likago, Izesú goha loká oketake lekelisi nenikumú éahove liaká niave. Loko lokago, Pitá nene láa loko limó: Geza Ómasímo gologí oletatane loko lo moleleta vema noane. ³⁰ Loko lokago, aikumú avetó iki vegená láa liki li kememitave loko lo hutoketamó.

Izesú alika hiliti gamenamú lo kimimó
(Mat 16:21-28; Luk 9:22-27)

* **8:11:** Mat 12:38; Luk 11:16 * **8:12:** Mat 12:39; Luk 11:29 * **8:15:** Luk 12:1 * **8:18:** Zel 5:21; Izi 12:2; Mak 4:12 * **8:28:** Mak 6:14-15; Luk 9:7-8 * **8:29:** Zon 6:68-69

³¹ Lá okago, gamena nene zupa apí oko gakó láa loko lo utó oko lo kimimó: Okulumakutí lumu ve gihila neza nene miluma netá mukí nimiiki, monó gizapa vegi guguni giziaká ve napagi monó mogona apí-ikimiaká vegi keza neni ániigi ahulikiko miluma netá mukí nimiiki, nipili hiliikiko, gamena losive makole minokinake heleneitokutí goha otinogo uve. ³² Loko lo utó oko lo kemekago, Pitá nene alémo apazá zeake géneka like gahá amimóza, ³³ Izesú viligoko izegipala zuha ániigoake Pitani gahá namike limó: Satani gakó lanitika mino olové omene. Geza gakó gelenanimó nene Ómasímini gakó lamanike veganalite kigikagutí liaká nia gakó nene lokane.

³⁴* Loko loake, vegená mukí itó izegipala zuhamagi sele lo kemeake láa loko lo kimimó: Ve makolite neni némegetatune liki nigilikima kugupémo giliti netá gili ahuliiki zohota zaló kipili hilinigi miluma netá gihikitatakumú gili zagiiki némegetatakumule. ³⁵ Makó keza nene kigika kemeníni aliki amánapa iki minata vegená nene kigika kemeni gopa inogo ive. Itó makó keza nenikumule liki itó gakó lamanakumule liki kigika kemeni vínasi ahulatamó nene alévolé kemetameni alinigave. ³⁶ Ve makó keza imane mikasímini amupiló ne netá ale asú iiki itó kezáni kigika kemeni gopa okoko tolova itimó nene nenémi nana oko kelémo lamaná itive. ³⁷ Kigika kemeni nene nana netatunú meina hiziiki goha alitamó neve. Ma nomive. ³⁸ Imane vegená mukí kéisi netá golesa aliaká nia vegená itó Ómasi kemegesa amiaká nia vegená niago, holúikú ve makó keza nenikumupe monónemupe gilikiko kovoza hilitimó nene, okulumakutí lumu ve gihila neza aménehini lapaná nenémo numupiló itekiko apazá agelova kelémoko limito gamenaló nene keza kovoza hiliimó nenéminoko nezagi kugulizá ale otitokumú novoza hilinogo ive, loko limó.

9

¹ Láa loko loake, Izesú miní ameko láa loko lo kimimó: Lamaná lo likimitoze, gililo. Lekelisi ató nene nia ve lekelikutí lugáa makó hili asú inamiki ha niko Ómasímini gizapa oliikimiakalímini zámuzá nene amuzá moloko utó okiko ániiganigave.

Izesuni agupe haitolímini imó
(Mat 17:1-13; Luk 9:28-36)

² Loko loake, hoza gamena 6-a minomo noitike Izesú nene Pitá Zemusí Zoní kezagó kelémoko agoka hánagú kezákó itemó. Neneló kogómulaló noike haitó agupe ale luhoake noigo, ³ gineganevámo gizopa vaevae loko minokago, mikasigú veganalite nenéminoko ale mokoná lamoaká nenéminoko minamó. ⁴ Lá okago Ómasímini agepagutí gakó imane amunaló liakó asi ve Ilaizako Moseko utó i kimikasigo, keza Izesugegi gakó ligili hagili iki minamó. ⁵ Lá niago, Pitá nene Izesuni láa loko lo amimó: Monó gizapa velemaka, imaneló minuhá laga okaze. Nenemú gaizopa losive makole geleketatunize, makó geile, makó Mosenive, makó Ilaizanive. ⁶ Loko limó nene kelegesá goha legekegago, lo amiti gakokumú vitagá oake nene gakó gopa limó. ⁷* Noligo, límusi sahehevámó lemeko ze hitokimikago, límusigutí Ómasímo láa loko limó: Imane nene nigika ameaaká nou gipáne noize, aí gakó gili alilo. ⁸ Loko lokago, litá iki gilipe iki ániagamó nene keitoka Izesú ezáagó noigo ániagamó.

⁹ Ániagiake Izesugegi agokagutí nilemeke Izesú ániagina netakumú avetó iki li kememítave loko, okulumakutí lumu ve gihila neza helenoitotó otekugogó li kimitave loko loketamó. ¹⁰ Láa loko li gakó gili alemóza, hilinakutí otiakalímini mogonamú loká loká amó. ¹¹* Láa liki loká itamó: Monó mogona apí-ikimiaká ve nenete gologí oletati vema velesá anitemiko Ilaizá goí oko anititive liki nanamú liaká niave. ¹² Liki loká imikago, eza monó nagamí holokimiaká ve Zonikumú láa loko lo kimimó: Ilaizá goí oko aniteko netá matá mukí ale vavá itive liki lamaná linave. Itó okulumakutí lumu ve gihila neza nene miluma netá numupiló miliiki gopoguni milinitatave liki nenikumú monó gotolaú luhuva gizinámómagi neve. Áminamú lakagatí molahe. ¹³ Itó Ilaizakumú láa loko lo nolukumuve. Eza mota anitekago, aikumú monó pukugú luhuva gizina gakató kezáni kagata gele netá golesa mota líl imikago mota helekave, loko limó.

Izesú holosi golesagi mína gipa alémo zokamó
(Mat 17:14-21; Luk 9:37-43)

¹⁴ Láa loko lokago, izegipala zuha lugáa niatoka vi anitiae ániagamó nene, vegená vaí iki alegesá iake kezagi monó mogona apí-ikimiaká vegi lova leta iki niago ániagamó. ¹⁵ Ániigikago, vegená mukí nenete Izesuni ániagiake, litá iki sigaga goha litake aitoka lololu liki vake geké litamó. ¹⁶ Lá niago Izesú loká oketake lekeza nanamú lovaleta niave. ¹⁷ Loko loká okimikago, keikutí ve makolímó oteake láa loko lo amimó: Monó gizapa

velemaka, holosi golesa gipánémini agikagú lemeko minoake agepa aleko lakolí okago, alémoko geitoka nouve. ¹⁸ Gipáne nenémo holosi nene agikagú lemeake alémo gopa napa oaká gamena nene mikasigú alémo akokago zupakopá zeko mohona oaká noive. Lá noike sehovala novilike agepagutí gellilikililí nolike, agisa agizani pehe loake minoaká noive. Lá okago, izegipaka zuha keza holosi apiliki amisilítave loko lo kumunóza amiselemitamó okave. ¹⁹ Loko lokago, Izesú láa loko lo kimimó: Lekeza ató imane gili alévolé amamó neneta, lekelikumú goselé nepelekave. Gamena gamena lekezagi minoloko voko mininake likizamuha hízekogó minatohe. Izegipama nénisi noutó alímiki alo. ²⁰ Loko lokago, gipa nene aitoka alímiki ikago, holosi golesa nenémo Izesuni ángoake gopa alémo ininá okago, mikasiló pou loko akoake, ako viligá viligá noike, sehovala vilimó. ²¹ Lá noigo Izesú nene amelahini loká otake hí gamenaló gizalimó neve. Loko loká okago limó: Izegipa komaló gizaleneimó neve. ²² Mukí gamena ámina netalimó alémo golesa inogo lokú nemó nagamikú nemó ahelú o ahuloaká onoimóma neve. Lá onoimóza, zámuza geitoka neikoma lelikumú gigika hízekiko lelémo vatí ozo. ²³ Loko lokago, Izesú láa loko lo amimó: Zámuza geitoka neikoma loko lanimó nene nanamú lane. Makó keza Ómasímó lelémo vatí itimó neve liki gili alévolé iki minatamó nenete mukí netá nene vávani ikigó lilí itamóma neve. ²⁴ Loko lokago gipámini amelaho nene litá oko gamoga geko limó: Koma gele alévolé onoumóza koma miní ameko luhusáne ale kii lonimikako napa oko gele alévolé itove loko noluve. ²⁵ Loko lokago, Izesú ángamó nene ve vená mukí alegesá niago, ángoake, holosi golesama lovaga lo amike namisilike limó: Holosi golesa geza agepa agata aleko lakolí anitika, agikagutí itekoko vozo. Lá okoko goha atiginá oko oko itemitane loko lo nohukogetuve. ²⁶ Loko lokago, gopaga like alémo ininá goha okago, agikagutí iteko vimó. Iteko vokago, gipa nenémo gonosigitana oko mikasiló ako minakumú nene vejená makolite mota helekave liki lamó. ²⁷ Láa liki lamóza, Izesú nene agizató aleko alémo otekago ote minamó.

²⁸ Lá okago, Izesú nene izegipala zuhamagi numukú itiki kezáikó minake láa liki loká itamó: Leza nene nanamú apeleko amiselemuháma neve. ²⁹ Liki likago, eza láa loko lo kimimó: Holosi imanémimi nene netá makotunú kepeleko kimiseleakaláa nomive. Ómasiloka loakatunukó kepeleko kimisilinogo une, loko limó.

Izesú alika híliti gamenamú goha epoapoga lo kimimó
(Mat 17:22-23; Luk 9:43-45)

³⁰ Ámina apá ahuliake Galilaia mikasi aviligiki vamó. ³¹ Nivake Izesú nene izegipala zuhama láa loko lo keme ime imó: Okulumakutí lumu ve gihila neza nilími gala vetini kigizakú milikiko nipili hilinigave. Nipili hilikiko gamena losive makole minokinake goha otinogo uve. Loko lo kemeake vejená makolite ámina gakoláa gilikatave loko legesó oko vimóza, ³² ámina gakó nene gili vevesamake loká otatune liki lamóza, kehelele vizekago loká itamamó.

Vegená mukikutí éaho livilegeko noive
(Mat 18:1-5; Luk 9:46-48)

³³ Kapanao numutoka vi anitíake, numunagú itíake Izesú loká oketake gapoloka nane-takumú ligili hagili ave. ³⁴ * Loko loká oketamó nene gapoloka nivake lelikutí éaho livilegeko agulizaki ve noive liki kezáitoka ligili hagili anazo, anotó alemiki kegepa apiziki minamó. ³⁵ * Lá niago, mitó minake izegipala zuha 12-a sele lo kemeake láa loko lo kimimó: Ve makó eza nugulizaki ve napa minatove loko gilitimó nenémo lemeko minoko vejená mukilitini gelekélé oketanogo ive. ³⁶ Loko Izesú loake, izegipa koma makó nene holúikú alémoko oko híze otemiáke aputá vizeneike láa loko lo kimimó: ³⁷ * Makó keza izegipa koma imanémimiki nenikumule liki nasahilí itatamó nene, není nasahilí inimiaká niamó geleaká noive. Itó makó keza nasahilí initamó nene nenikó nasahilí initamítave. Améneho nimisili ve aiki nasahilí itatamó geleaká noive, loko limó.

Keikutí ve noamitimó nene lelikutí ve noitive
(Luk 9:49-50)

³⁸ Lá okago, Zoní láa loko lo amike limó: Tisalemaka, ve makolímó geí gugulizató like holosi golesa nene veegalitini kigikagutí kepeleko nokimisiligo ángunimó nene, lelí lémegetamimó nenazo, géneka lotunimó neve. ³⁹ Loko lokago Izesú láa loko limó: Lekeza géneka litamilo. Makó eza nugulizató loko alévolé netá netá loló itimó nene litá oko nenikumú alevo letovo aminogo ive. ⁴⁰ * Vegená makó keza lelí gala ve minamitamó nene lelikutí vejená ninigave. ⁴¹ * Neza lamaná lo likimitoze, gililo. Makó keza není vejenáne

* 9:34: Luk 22:24 * 9:35: Mat 20:26-27, 23:11; Mak 10:43-44; Luk 22:26 * 9:37: Mat 10:40; Luk 10:16; Zon 13:20
* 9:40: Mat 12:30; Luk 11:23 * 9:41: Mat 10:42

zuha niakumule liki geha nagamí kapu hamokó ihiki likimitamó nene haha aminogo ive. Meinaváa alitamó neve.

Golesa netakumú gala vizeaká gako

(Mat 18:6-9; Luk 17:1-2)

⁴² Nenikumú gili alévolé i mina izegipáne zuha limiki minamoki keikutí ve makolímo netá golesa alítive loko agoka vizeko litimó nene, agae, Ómasímo nana otatimó neve. Ámina vémini luvanaló gehani napa nagá ziki age nagamikú ahelú i ahulatatímini avilegeko genavagi netá golesa loló otanogo ive. ⁴³⁻⁴⁴* Lá onoinazo, gigizani nenémo lihima aleaká gapogú gelémo nomilikoma gigizani hutozo. Geza nene gigizani avasavagi minokoko ló apakuka lihamiti lokú holokataninazo, gepili minoko okulumakú ititanimó nene lamaná itive. ⁴⁵⁻⁴⁶ Gigisa nenémo lihima aleaká gapogú gelémo nomilikoma nene gigisa hutozo. Geza nene gigisa avasavagi nooko ló apakú gehelú ikatanazo, gepili minoko okulumakú ititanimó nene lamaná itive. ⁴⁷* Gogómula nenémo lihima aleaká gapogú gelémo nomilikoma nene gigizanitunú gogómula hize likozo. Geza nene gogómula avasavagi nooko lokú gehelú ikatanazo, gogómula hamokó minoko Ómasímini avogisaló ititanimó nene lamaná itive. ⁴⁸* Ló apakú holoko minatanimó nene, gugupegú ginini hizitimó nene asú amiti lokú voko minanogo ane. ⁴⁹ Nosánetakú nene anuva amoko laga itive loko age ahuloaká nune. Nenémini oko vegená mukitoka kigikámini lotuva nene Ómasímini ló nenémo latimó neve. ⁵⁰* Age nene netá lamaná nemóza, agema melelé amitimó nene nana iki goha alími melelé itave. Ma lá aminigave. Lekelisi nene age nenémini iki minalo, itó hulu iki nene minalo, loko limó.

10

Izesú vená kimisele ahuloakakumú gako lo kimimó

(Mat 19:1-12; Luk 16:18)

¹ Izesú ámina apá ahuloake, limike Zutaia mikasi avilegeake Zota nagamí vola helegaloka vokago, vegená mukí goha aí amatoka alegesá ikago, goí oko aleaká imó nenéminoko monó lo keme keme oko minamó.

² Lá noigo, Palisaio monó vegenalite antiiake loká itake gimivagú mílake lamó: Mosé lo hukoko li gakokú nene ve makolímo venala amisele ahulatove loko hanuva amisele ahulatimó neve liki gizinamóma nene etatihe etamitive. ³ Láa liki loká imikago eza ale viligoko loká oketake limó: Mosé nene nanave loko loleketamó neve. ⁴* Loko lokago, keza lamó: Vená kimisilínigima nene luhuva netá giziki kimiiki kimisilitave loko Mosé gele kemeaká imóma nene. ⁵ Liki likago, Izesú láa loko lo kimimó: Lekelisi negí nagí hiziki likigika gopa ovimó nenemú imane lo hutoleketa luhuva gizamóza, ⁶* netá matá apí oko kelémo utó i gamenaló emane nene Ómasímo vegi venaki kelémo utó imó. ⁷ Nenemú Ómasímo láa loko limó:

Nenemú ve makolímohe makolímohe izolahiko amelahiko ahulokimioko venalagi nene,

⁸* kugupe nemó kigika nemó hamokó loló okiko apiziki minatáive.

Loko gakó imane limó nenazo, keza lositá hóu liki minaminigasive. Hamokó kugupe loló onoinmó gelekave. ⁹ Nenemú Ómasímo kelémo apizimó nenazo, vegenalita kelémo hotopotó oakaláa nomive.

¹⁰ Loko lokago, numukú itiki niake, izegipala zuhamate ámina gakokumú goha loká imikago, ¹¹* Izesú láa loko lo kimimó: Ve makó eza venala amisele ahulokoko haitó vená alitimó nene, ve vená huko ezega emega imómámini lihima alinogo ive. ¹² Itó ámináminoko vená makolímo vana amisele ahulokoko ve makotó vitimó nene, ve vená huko ezega emega imómámini lihima alinogo ive, loko limó.

Izesú izegipa koma kama nónohá zeketamó

(Mat 19:13-15; Luk 18:15-17)

¹³ Ve vená mukí keza agizanitunú kugupeló aleko nónohá zeketative liki izegipa koma kama Izesutoka kilímiki víkago, izegipala zuhate gahá kememó. ¹⁴ Gahá kimikago, Izesú ángoake mulunagú golesa okago láa loko lo kimimó: Lekeza izegipa koma nene ahulikimikalo. Nenitoka ataze. Keza izegipa koma nenémináa nene Ómasímini avogisaló viakalímini mututoní nianazo, li hoipa ikitamilo. ¹⁵* Neza gakó lamaná lo likimitoze. Ve

* 9:43-44: Mat 5:30 * 9:47: Mat 5:29 * 9:48: Isa 66:24 * 9:50: Mat 5:13; Luk 14:34-35 * 10:4: Gapo 24:1-4; Mat 5:31 * 10:6: Apí 1:27, 5:2 * 10:8: Apí 2:24 * 10:11: Mat 5:32; 1 Koli 7:10-11 * 10:15: Mat 18:3

makó keza izegipa namuni monokú itiaká niamómáminiki vávani iki monokú itemitamó nene, Ómasímini avogisalo nene keké vaminigave. ¹⁶ Loko lo kemeake, izegipa komama kuputá vizike agizanitunú nónohá zeketamó.

Henonavagi ve

(Mat 19:16-30; Luk 18:18-30)

¹⁷ Izesú eza ámina apatotí vitove loko noigo, ve makolímó lolu loko vike alapusa hizike loká otake tisá lamanámaka, nana okinake alévolé nemetameni alitomó neve. ¹⁸ Loko lokago, Izesú láa loko lo amimó: Geza nenikumú ve lamanale loko lanimó nene mogonánemú gele hee lo minoko nolape itó hanuva nolane. Lamaná améneho Ómasi hamokó noize, makó nomive. ^{19*} Itó geza gapo lota gakó geleaká noane. Láa lokove: Geza vejená kepele heleme. Ve aleve suni ale gopa oko huko ezega emega amo. Gumina alemo. Soza hakupá gakó lamo. Vegenalitini netá hanuvamú alemo. Izokahiko amekahiko nene kugulizá ale otezo. ²⁰ Loko lokago, eza láa loko lo amimó: Tisatemaka, neza nene umaki velotí nene ámina hozá aleaká noumole. ²¹ Loko lokago, Izesú nene gonú napilike agika aitoka moloake gakó láa loko lo amimó: Netá hamokó nemó nene ale hee litanize. Geza voko henokanoka mukí molokoko meinaváa monima aleoko gohogó vejená gona moloko kemeoko oko némegetozo. Lá okako okulumakú helisa henoni geitoka utó ogetanogo ive. ²² Loko lokago, ámina gakó geleake aí henoni vaí o minamó nenazo, gona moloko kimitohe loko agata gilitimo agoka agepa muhelé okago, mulunagú gena avisekago vimó.

²³ Lá oko novigo, Izesú viligoko izegipala zuhama ániagoake láa loko lo kimimó: Henonímini vegená nene Ómasímini lapanató silipa iki itesá neve. ²⁴ Loko lokago, izegipala zuhamate ámina gakokumú ininá amóza, Izesú goha láa loko lo kimimó: Izeqipánemata, Ómasímini amakú vo holoaká nene genavagi neve. ²⁵ Kamele izámo nakasi vovónagú voakaláa nene vávani oko nomimóza, henonavagi ve nene Ómasímini lapanató voakaláa nene áminámini oko genavagi golesa neve. ²⁶ Loko lokago, ininá goha iake li amiki lamó: Láa lokoma éaho agutó vizekiko minoloko voko minative. ²⁷ Liki likago, Izesú gonú nokipilike láa loko lo kimimó: Vegenalite nenémini itamoláa nomimóza, Ómasímo netá makó loló itove loko agata giliti netá nene vávani okogó loló oaká noive.

²⁸ Láa loko lokago, Pitá láa loko lo amimó: Gelenape. Leza mukí netá matate ahulokunike geí gémegetokuninazo, alika nene meinava alitunimó nehe. ²⁹ Loko lokago, Izesú limó: Neza lamaná lo likimitoze. Ve makó keza numúinihe gouna zuhahe izóikini améikini izeqipáinihe múinihe nenikumule liki itó není gakó lamanakumule liki ahulatamó nene, ³⁰ itína imane gamenaló nene numuni gouna zuha izóikini izeqipáini múini 100 nenéminiki alitamóza, vegená makolite hanuvamú gopoguni milikitanigave. Lá ikiko alika utó iti gamena keza alévolé oko minoaká kemetamenigi minanigave. ^{31*} Lá onoimóza, itína goí ina vegenakutí mukilite alika milanigave, itó alika milina vegenakutí mukilite goí inigave, loko limó.

Izesú ezáa alika hilitikumú gakó ligo losive makole imó

(Mat 20:17-19; Luk 18:31-34)

³² Gapoló vake Zelusalega itinigi niake Izesú ale goí oko novigo, izegipala zuhamate ininá niago, ámegetiki va vegená alika kezáitoka utó iti netakumú kehelele vizigo minamó. Lá niago, Izesú eza izegipala zuha 12 nene kelémo otopá zeake, aitoka alika utó iti netakumú láa loko lo kimimó: ³³ Gililo. Leza Zelusale numutoka notune. Neneló okulumakutí lumu ve gihila není nene guguni giziaká ve napagi monó mogona apí-ikimiaká vegi kei kigizakú milikiko goní inítiki nípili hilita gakó li hukiki hetoka vetini kigizakú milanigave. ³⁴ Lá ikiko, gopoguka linitikí gihutú inítiki segi nogosanitunú nípiliiki nípili hilingave. Lá ikiko, gamena losive makole minokinake goha otinogo uve, loko limó.

Zemusiko Zoniko loká asi netá

(Mat 20:20-28)

³⁵ Zepetaioni gipala lositá Zemusiko Zoniko nene Izesutoka asike láa liki lasimó: Tisale-maka, lélisi nene nemú manamú logimikusigo nene, ámina netá aleletatane loko nolusive. ³⁶ Liki likasigo, eza nana netá aleleketatokumú nilasive. ³⁷ Loko lokago, láa liki li amesimó: Geí lapanakaló leza geí gigilika luga luga minalizo loko gele limitane loko nolusive. ^{38*} Liki likasigo, Izesú láa loko lo kimimó: Loká nunitasi netalímini mogona gili gopa ikasike likasive. Nénisi nene ekesá netá natomó nene lekelisi áminagutí hanuva natáimó nehe. Itó miluma netá gihitomó nene lekelisiva gihitáimó nehe. ³⁹ Loko lokago, láa liki li amesimó: Hanuva natáimó nena. Liki likasigo, Izesú láa loko lo kimimó: Ekésá netá natomó nene lamaná lekezagi nanigasive. Itó miluma netá gihitomó nene lekezagi gihitáimóza, ⁴⁰ není

* 10:19: Gá 20:12-17; Gapo 5:16-20 * 10:31: Mat 20:16; Luk 13:30 * 10:38: Luk 12:50

nigilika luga luga minoakaláa nene, není netá nego likimitohe. Ale vavá oketa vegealitiní holomamú nilasive.

⁴¹ Loko lokago, izegipala zuha lugáa 10-a ámina gakó giliake, Zemusiko Zoniko keikumú mukahá kipilikago, ^{42*} Izesú nene izegipala zuha mukí sele lo kemeake láa loko lo kimimó: Ve makokumú nene mikasiuka vegealitiní kugulizaki ve niave liki liaká niamó nenete gelekelé izegipáini nene alévolekutí gizapa ikimiaká niave. Itó guivahani keza nene ámina iki ámemenáa kiviligiki miniaká niamó nene lekeza giliaká niave. ⁴³ Lá onoimóza, lekelitoka lá oko minamino. Lekelikutí ve makolímó nugulizaki ve minatove loko nolokoma nene hanuva lemetigí oko gelekelé oleetokoto minatize. ⁴⁴ Makó eza mukí vegeená kivilegeko minatove loko nolokoma lemeko vegeená mukilitini megusa izegipa loló oko gelekelé oketatize. ⁴⁵ Okulumakutí lumu ve gihila neza gelekelé initatave loko lememuve. Vegená mukitoka gelekelé oketoko golesa netáini nene meina hizeko gologí oketatove oko nene minoko aleko u nugupe ahulatove loko lumumole, loko limó.

Agómula lika ve Patimiasí goha pulusoko ángamó

(Mat 20:29-34; Luk 18:35-43)

⁴⁶ Izesugegí Zeliko apatoka víki anitemó. Ámina apá ahulanigi niake, ezagí izegipala zuhagi vai iki alegesá iki mina vegeená makó nivago, Timeoni gipala Patimiasí eza agómula lika ve monimú voká vokató ve nene gapo agataloka minamó. ⁴⁷ Minake, Nasalete ve Izesúma noave liki likago geleake, gamoga geko sele loko limó: Izesuvo geza nene agulizaki Tevitini agávolaga, gologí oletatane loko lo mololeta velemaka, nenikumú miluma gelenetamane. ⁴⁸ Loko lokago, vegeená mukilite legesó oko minative liki agómula lika vema gahá ameke li amemóza, áisi gele ahuloake gamoga geko sele limó: Geza Tevitini agávolagamaka, nenikumú gigika hizino. ⁴⁹ Loko negénegeka ligo ligo, Izesú geleake voko gapoló noike ámina ve nene sele likiko ino. Loko lokago, agómula lika vema láa liki sele li amemó: Gogoliza vizeko otekoko ano. Geí sele nolize. ⁵⁰ Liki likago, hepé gola gololohá o ahuloake, mói oko oteake Izesutoka vimó. ⁵¹ Vo anitekago, Izesú nana netá alegetatokumú nolane loko loká omikago, agómula lika vemámo tisánemaka, nogómula ale goloutonetatane loko noluve. ⁵² Loko lokago, Izesú láa loko lo amimó: Geza nene vozo. Nenikumú gele alévolé anitímó gelémo zokokaze. Loko noli agepagí, agómula goloutokago ángoake gapoloka Izesuni ámegetoko vimó.

11

Sigaga litanigi ago Izesú Zelusale numutoka vimó

(Mat 21:1-11; Luk 19:28-40; Zon 12:12-19)

¹ Keza vake Zelusalega ali ávatihá niake, Oliví agoka gohalaló nene apá lositá minamó nene Petepage itó Petania loko netoka ví anitemó. Nenekola anitiaeke, Izesú nene izegipala zuhagutí ve lositá láa loko lo kimike kimisilimó: ² Helega numutoka ví anitiiki tokí iza akaleva nagá zinamómá nene, vegeená kogohí geko mohona onamitimoláa nene, ángiiki vinasiki aliki alizo. ³ Vinasiki aliki nisiko, ve makolímó nanamú niasive nolikoma, láa liki lilizo: Guivahanitémo hoza nego ámina izamú lokago aleko vinogo nousive. Goha imaneloka litá oko amiselekiko aliki anigave, liki li amilizo. ⁴ Loko lo kemekago, vasike ámina tokí iza akaleva nene gapo gahevaloka gateté nagá zinamó ángikasike nivinasasigo, ⁵ gateté mina vegealite ángiiake, tokí iza akaleva nene nanetakumú nivinasasive. ⁶ Liki likago, Izesú lo kimi gakó nene li kimikasigo gili kememó. ⁷ Lá ikago, keza tokí iza akaleva nene Izesutoka aliki vasike, gíneganéini nene gololohá ikasike tokí iza akalevamámini amegesaló milikasigo, Izesú iteko amupiló minamó. ⁸ Lá oko novigo, vegeená mukilite gíneganéini gapoló avilisá imi nivago, lugáa nenete kokonasi ágila nene gíhisigutí hutiki mililiki víki gapoló avilisá imi vamó. ^{9*} Lá niago, goí iká alika miliká a vegealite gakó napagutí láa liki lamó: Agae, Guivahanímini gakotó anitelimikaninazo, Ómasímó nónohá zegetino. ¹⁰ Avoteho Tevitikitana minatí vémo gizapa oketatimoláa Ómasímó lusa geketino. Agae, veletoka okulumakú Ómasí agepoka litune, liki lamó.

¹¹ Lá imi vago, Zelusalega ite aniteake, monó zagusave napagú iteake netá makó ángimomo mohona o asú oake, gamena asú okago, ezagí izegipala zuhamagi Petania numutoka limiki vamó.

Zuta vegeanakumú lo vizeko gohuna za usí vizimó

(Mat 21:18-19)

¹² Límugusi zeake gó lokago, Petania numutoka ahuliake nivake, Izesuni gaúna olokago, ¹³ ángamó nene gohuna za makó hotó neike ágila mukí minokago ángoake gihila zeneihe

* 10:42: Luk 22:25-26; Mat 23:11; Mak 9:35 * 11:9: Age 118:26

loko voko ánígamó nene, gihila zeaká gamena alitamigo, agilagó nego ánígoake ¹⁴ za nene láa loko lo amimó: Geza nene gihila makó zemoko gohuna loloko voko noako geikutí nene vegealite keké namitave. Láa loko noligo, izegipala zuhate ámina gakó gili asú amó.

Monó zagusave lo hukoketamó

(Mat 21:12-17; Luk 19:45-48; Zon 2:13-22)

¹⁵ Lá iake Zelusalega vi anítiake, Izesú nene monó zagusaveú itike áminagú moni meina kona ali volaló imaló a vegeená kimisele ahuloake, hotó mikasigutí moniló ámina mikasigú moni kimiaká a vetini holoma aleko gululupa soake, Ómasímuni guguni gizi amitakumú nama luhusi miliaká a vegealitiní minoaká holoma aleko gululupa soake, ¹⁶ monó zagusave napagú nene netá matá aliki tigá igá amilo loko lo hukoketamó. ¹⁷ * Lo hukoketake láa loko lo kimimó: Ómasímo li gakó nene monó gotoláú láa liki luhuva gizinámoma neve: Neni numunimú haitopaitó vegealite Ómasiloka liaká numunive liki litave liki gizinámoma neve. Lá onoiómóza, lekeza nene alími maketi numuni lílí inamó nene guminaló veta halá giki miniaká geha mulí lílí ikave. ¹⁸ Loko lokago, guguni giziaká ve napagi monó mogona apí-ikimiaká vegi keza nenemú giliake, nana okinake apele helekuko imane suni asú itive liki lamó. Láa liki ligili hagili amóza, vegeená mukilite monó lo keme keme okago laga kivisigo sigaga líta mogonamú giliake kelegesá legekago nenemú ahulitamó. ¹⁹ Lá okago únaká gamena gamena Izesuge ámina apá ahuliki viaká amó.

Gohuna za osagava vizitímuni mogona

(Mat 21:20-22)

²⁰ Neteká gó lokago, nivake, gohuna za nenémó mogonagutí osagava vizekago, ánígamó. ²¹ Lá okago, Izesú gakó limó nenemú Pitá geleake láa loko lo amimó: Tisao, ánígozo. Gohuna za azozá usi vize amenimómó mota osagava vizeake neve. ²² Loko lokago, Izesú lo kimike limó: Ómasímú gili alévolé ilo. ²³ * Neza lamaná lo likimitoze, gililo. Ve makolímóhe makolímóhe vozane agoka litá oko zeko akutooko age nagamikú holamane loko litimó nene agata losi gelemoko nolu gakó alévolé inogo ive loko gele alévolé itimó nene, utó o aminogo ive. ²⁴ Lekelisi nene netá nemú manamú giliiki Ómasiloka voká niliki mota alekune liki gili alévolé inikigó litamó nene, alinigave. ²⁵⁻²⁶ * Itó otiki Ómasiloka líta gamena gamena nene, ve makolímuni lihima ali minatamó nene ahulalo. Lá ikiko, okulumakú ametipo ámina oko lekelí lihimatini ahuleketanogo ive, loko lo kimimó.

Izesuni zámuzamú loká itamó

(Mat 21:23-27; Luk 20:1-8)

²⁷ Zelusalega goha atiginá iki iake, Izesú monó zagusave napagú iteko mohona noigo, guguni giziaká ve napagi monó mogona apí-ikimiaká vegi monó gizapa vegi aitoka iake ²⁸ láa liki loká itake lamó: Geza imaneloka netá matá aleaká noanimó nene éahini gakotó lá oaká noane. Éaho lokago aleaká noane. ²⁹ Liki loká imikago, Izesú láa loko lo kimimó: Nezagi gakó hamó loká oleketatoze. Lekeza li nimikiko neza éahini gakotó imane netá ale utó oaká nouhe neneá lo likimitove. ³⁰ Zoní monó nagamí holokimiaká hoza alimó nene hikutí ale utó ive. Ómasímuni gakotó alihe, itó vegealitiní gakotó alive. Li nimikiko gilitoze. ³¹ Loko loká okimikago, kezáitoka ligili hagili iki láa liki lamó: Okulumakutí ale utó imole loko litunimó nene, íi, lekeza nanamú Zonini gakola gili alévolé amave loko linogo inazo, ³² itó mukí vegealite Zoní nene Ómasímuni agepagutí gakó loaká ve noive liki nilanazo, ámina hoza nene vetinigití ale utó imole loko losá nene vegealite nene nana lilitatahe loko lehelele vizekave liki kezáitoka liake, ³³ Izesú li gakokumú láa liki li amemó: Leza nene Zonini mogonala ma gelemune. Liki likago, Izesú láa loko lo kimimó: Láa likima nene netá matá imane aleaká noumó nene éahini gakotó lá oaká nouhe nenegei neza ámina oko lo lekememinogo uve, loko limó.

12

Vain nagá minimú anoza gakó

(Mat 21:33-46; Luk 20:9-19)

¹ * Izesú anoza gakó makó láa loko lo kimimó: Ve makolímó vain nagá nene zuhá oake, vege vege oko geisa hize asú oake, gihiláa mí zeko liliká ziti gale legeake, gizapa numuni hána geake, gizapa iki niko meinava likimitove loko vegeená makó gutá kemeake mikasi makotoka venoni vimó. ² Voko minake nagá gihila guzá loaká gamena alitokago, geleake nagá gihila mikutí lugáa alenetoko ative loko gelekelé izegipala makó nene gizapa nia

* 11:17: Isa 56:7; Zel 7:11

* 11:23: Mat 17:20; 1 Koli 13:2

* 11:25-26: Mat 6:14-15

* 12:1: Isa 5:1-2

vegenatoka amiselekago, ³ vo anitimó. Vo anitekago, vain mitó gizapa imina vete apiliake nagá gihila amemake hanuva amisilikago atiginá oko vimó. ⁴ Lá ikago, gelekélé izegipa makó goha amiselekago keitoka goha anitekago, mini gizapa vete gotola ziki hóu nilake gopoguka litámó. ⁵ Lá ikago, makó goha amiselekago, aí nene apili helemó. Lá ikago, goha muki himiselekago, vi anitikago, lugáa nene gosohá nogosani kepelemó, itó lugáa nene kipili helemó. ⁶ Lá ikago, agika ami gipala hamokó minamó. Aí nene keitoka alika luma lama zeko láa loko geleake amisilike limó: Není gipa gihila imane amiselekago ve napámini gipalama okaze liki ániigiiki nene alími lamaná itanigave. ⁷ Loko geleake amisilimóza, vo anitekago, mitó gizapa vete kezáitoka ligili hagili ake láa liki lamó: Imanémo nene mikasi amelahini gipala noinazo, áisi nene minokoko imane hoza ale lá inogo ive. Nenemú mota losé apelekuko helekiko, helisa henoni imane nene lelí loló itive. ⁸ Liki liake, gipalama agizató aliake losé apili hiliake, nagá gihila mikutí hetoka nene gonosiváa ali ahulamó. ⁹ Lá ikamó nenazo, nagá mini amelaho nene nana itive. Áisi okoko mini gizapa vema kepele ahulokoko vain mini nene haitó vete gizapa itave loko lehizeketanogo ive. ¹⁰ Itó imane monó gotolaú gakó láa liki luhuva gizinamóma nene lekeza gatinamóza lakagatí molokahe: Numuni giaká vete gehani napa makó ániigi ahulamó nenémo geha lapusa alévoleláa loló oake noive. ¹¹ * Ámina netá nene Guivahanímini gakotó utó okanazo, vegenalita ániigokoko lamaná okave.

¹² Láa loko lo kemekago, Zuta vetini monó gizapa ve keza anoza gakokutí gehanimú limó nene Izesuni ániigo ahulunikumú lokave liki giliake, agizató alinake nagá amitune liki gelemóza, lá itunimó nene vegená vai iki minamó nenete nana ílitatahe liki kehelele vízekago, ahulimiake hanuva vamó.

Lugupe meina hizeaká gakó
(Mat 22:15-22; Luk 20:20-26)

¹³ Zuta ve keza Palisaio monó vegenakutiki Heloteni patigú vegenakutiki ve lugáa nene Izesúma gakó makó lo gopa okiko agizató alitave liki áitoka kimisilikago, ¹⁴ Izesutoka vi anitiake láa liki li amemó: Tisalemaka, geí mogonaka gelenoune. Gakó gihilagó loaká noane. Geza vegenakumú gonukonú osá amane. Géisi vegená iti minamó limi minamó mukitoka Ómasímini gapováa vevesoko lelepizeaká noane. Nenemú lokako gilitune. Loma apatoka agulizakí ve napa Sísani nene takisi moni ameká nouhá etahe etamive. ¹⁵ Takisi moni kimitupe kememitune. Láa lamó nene amemitune loko lokíkoma gamaniloka alémoko voko goní otatune. Itó hanuva amitune loko lokíkoma Zuta vegenalite gili golesa itave liki gimivagú milikago, Izesú gakó latímini mogonáa geleake láa loko lo kimimó: Nanamú giminegú milanigi nilave. Moni makó nelepizikiko ániigatove. ¹⁶ Loko lokago, makó alapizikago ániigoake láa loko loká oketake limó: Vogunahana imane itó luhuva imanegi éahini neve. Loko lokago, keza gamani agulizakí ve napa Sísanive liki lamó. Láa liki likago, ¹⁷ Izesú láa loko lo kimimó: Láa líkima nene gamanímó voká loaká noi netá nene gamani amilo, itó Ómasímó voká loaká noi netá nene Ómasi amilo. Loko lokago, vatí oko ale viligoko lo kimikumú sigaga goha litiki minamó.

Hilinitakutí otiakakumú loká itamó
(Mat 22:23-33; Luk 20:27-40)

¹⁸ * Satukaio monó vegená lugáa keza hilinakutí otisá amave liki liaká a vegená makolite Izesutoka iake láa liki loká itake lamó: ¹⁹ * Tisalemaka, Mosé láa loko luhuva gizo limimóma neve: Ve makolímó izegipa geto molamoko minoko helekikoma, agunalámó ámina gevoná vená alekoko uvolahini hili vemú izegipa geto molative loko loletamóma neve. ²⁰ Lá okanazo, uvolaho agunala 7-a minamó. Lá iake, ganá ve nenémo vená aleake, izegipa getamike helekago, ²¹ agunalámó ámina vená aleake minake, izegipa getamike helekago, agunala makolímó ámináminoko alimó. ²² Itó lá iliki vake ve 7-a nenete ámina venakó ali volaló imaló iki minake izegipa getamake hili asú ikago, venáini nene minake alika hilimó. ²³ Ve 7-a nenete ámina vená ali volaló imaló iki minamó nenazo, hilinitakutí goha otita gamena nene ámina vená nene éahini venala minative. ²⁴ Liki galegutí oteaká gakokumú amé ziki giza itanigi likago, Izesú láa loko lo kimimó: Lekeza monó gotolaú gakó gelemake itó Ómasímó galegutí kelémo oteaká zámuzagi ma gelemake gili gopa ikave. ²⁵ Keza hele vegená otita gamena nene, vená aleakaláa nomive, itó vená alimi kimiakaláa nomive. Okulumakú ageló nenéminiki minanigave. ²⁶ * Itó hele vegená goha otiaká nenemú neza lo likimitoze. Gozapá nene Mosé eza zamukutí ló guluma utó okago, ániigoake noigo, Ómasímó gakó láa loko limó nene gatiaká niamóza mogona gelemave. Ómasímó nene ká

* 12:11: Age 118:22-23

* 12:18: Apo 23:8

* 12:19: Gapo 25:5

* 12:26: Gá 3:6

emane amunaló hilina vemú nene Moseni láa loko lo ameneimóma neve: Neza Avalahani Isakani Zakoponi keí Ómasi minútímína minoloko voko nominuve. ²⁷ Loko limó nenazo, nenemú eza kemeni hele vegeñalitini Ómasi negopa, kemenía hanuva ne vegeñalitini Ómasi noinazo, Ómasimú gili zaginake hele vegeñaki hanuva mina vegeñalitini Ómasi noive. Lekeza ámina gako gili gopa goha ikave, loko limó.

Li mila gako kutí napáa
(Mat 22:34-40)

²⁸ Láa liki lova-leta iki niago, monó mogona apí-okimiaká ve makolímó oake gámémé oko geleake Izesú nene ale lamaná oko ale viligoko lo nokimigo geleake, loká otake láa loko limó: Mosé lo hukoko li gako kutí hilímó kivilegeko napáa neve. ²⁹* Loko lokago, Izesú láa loko lo amimó: Napa nenémó lá oko neve: Lekeza Isilaa vese gililo. Guivahani Ómasile nene Guivahani hamokó noive. ³⁰ Likigika lekemeni geleakatini zámuzatini mukí nene Guivahani Ómasitiniloka amilo. ³¹* Itó gako napa makó nenémó lá oko neve: Gezakamú geleaká noanimómáminoko gígívegakínimú geleko gígika kemezo. Loko loketa gako kutí napáa makó iteko minamive. ³²* Loko lokago, monó mogona apí-okimiaká vemámó láa loko lo amimó: Tisalemaka, gako nene lamaná lokane. Nene gelekugo etokave. Ómasi hamokó noive, Ómasi makó nomive. ³³* Itó ligika nemó gele vevesoakate nemó zámuzate nemó mukí aitoka amitunimó itó lezatemú geleaká nounimómáminoko ligivetegikumú geleko ligika kimitunimó nenémó Ómasi guguni gizo ameaká netá haitopaitolímíni nene avilegekeave. ³⁴ Loko gele vevesoko lokago, Izesú geleake láa loko lo amimó: Ómasi alémo geí gízapa ogetati ve loló itani gamena nene hotó nomive. Loko lokago, giliake, netá makokumú goha loká itatakumú kelegesá legekago, loká itamamó.

Gologí oketative loko lo moloketa vemú loká oketamó
(Mat 22:41-46; Luk 20:41-44)

³⁵ Izesú monó zagusave napagú monó lo keme keme noike láa loko limó: Monó mogona apí-ikimiaká vete nene gologí oleketative loko lo mololeketa ve nene agulizaki ve napate Tevitini agávolaho noive liki nanamú liaká niave. ³⁶* Tevití eza Ómasímíni Sikalahú nenémó agikagú alémo vávani okago láa loko limó: Mezaú ve eza není Guivahaníne nene není nigizani zamagaloka minoloko voko noako, mukí gala vega nene gígisa lapuvauka ahuloketanogo uve loko lo amimóma neve. ³⁷ Tevití nene gologí oleketative loko lo mololeta vemú nene Guivahaníneve lokamó nenazo, gologí oletative loko lo molota vémo nana igo Tevitini agávolahogó noitive. Tevitini agapilamola noitimóza, Tevitini ve napagi noitive. Loko Izesú noligo, alegesá iki mina vegeñá mukí nenete giliake laga kivisimó.

Monó mogona apí-ikimiaká a vemú alévolé oko lo hukonoimole
(Mat 23:1-36; Luk 20:45-47)

³⁸ Izesú nene monó lo nokimike miní ameko láa loko lo kimimó: Monó mogona apí-ikimiaká vemú, ehe. Kugupeló netá hána luhatakumú itó maketiloka mihina niago vegeñá makolite gekévaké likitatakumú, ³⁹ itó monó numukú numukú nene vegeñá mukilitini kovogisalo minoaká holomaló minatakumú, itó nosáneta napa ninató nene agepaló siakumukó nene netakumú kumu heleaká noive. ⁴⁰ Keza gevoná venañalitini henokanoni gumina ali asú iká itó kegepatunú soza miliki agepoka hána liki Ómasiloka liká iaká nianazo, ámina ve nenete miniki lihima napa genavagi alinigave, loko limó.

Gohogó vená gevonálímó ahula moni
(Luk 21:1-4)

⁴¹ Izesú eza monó zagusaveú nene moni miliaká pokisi gahevaloka minake, vegeñá mukilite ámina pokisigú moni nimilago ániago minamó. Ániago noigo, henóinigi vegeñá mukí nenete moni mukí miliva miliva niago, ⁴² gohogó vená gevoná makolímó oake golohá moni koma lositá nene pokisimagú ahulamó. ⁴³ Lá okago, Izesú nene izegipala zuha sele lo kemeake láa loko lo kimimó: Neza lamaná lo likimitoze, gililo. Vegeñá mukí imanete vai iki milina monigutí nahulamóza, gohogó vená gevoná imanémó gohogó noikutí netá matala mukí nosáneta meina hizitimoláa ahulo asú okave. ⁴⁴ Nenémó gohogó vená imanémó moni miliaká polisigú ahula monimámó mukí vegeñalitini moni avilegeneimó gelekave, loko limó.

* 12:29: Gapo 6:4-5 * 12:31: Liv 19:18 * 12:32: Gapo 4:35 * 12:33: Hos 6:6 * 12:36: Age 110:1

13

Alíka monó zagusave alí golesa itakumú limó

(Mat 24:1-2; Luk 21:5-6)

¹ Izesú nene monó zagusavegutí nolimigo, izegipala zuhagutí makolímó láa loko lo amimó: Tisalemaka, áníhozo. Imane geha numuni lagámíni alí tolova iki ginamó neve. ² Loko lokago, Izesú láa loko lo amimó: Áimáa numuni napa imanemú nolape. Itína nene ha nego nánigamóza, minoko lova gala ve keza imaneló gehani apilíki tele vizíkiko gehani nene amupiló amupiló iki milíliki itekutí gululupaso asú inogo ive.

Miluma gilituni gamenámini ganá netá

(Mat 24:2-14; Luk 21:7-19)

³ Loko loake, Izesú nene izegipala zuha Olivi agokaloka kelémoko iteake, monó zagusave helegaloka nego, neneló minake, Pitá Zemusí Zoní Etulú kezagó Izesú noitoka vake loká itake lamó: ⁴ Itína netakumú lanimó nene nanahé gamena utó itive, itó lani gamena nene alitanogo noiko nana anosa utó okiko ánígatune. Lo lemezo. ⁵ Liki likago, Izesú láa loko lo kimimó: Ehe, gizapa ilo. Ve makolímó lokogoka vizekatize. ⁶ Vegená mukilite nanitiki není nugulizató liki okulumakutí lumu ve gihíla nezama nouve liki vegená mukí kogoka vizinigave. ⁷ Lekeza haitopaitó lováminí gakola nigílíki itó lovatini konó nigílíki nene mulutini itemino. Ámina netá utó itimóza netá matá velesá asú aminogo ive. ⁸ Numutó namató vegená makó nenete gala veníni lova alí níkimiko, agulizaki ve makolímíni zuhagi itó makolímíni zuhagi lova hizinigave. Itó mukí mikasiuka imimá noiko gaúna gamena mukí utó itimóza, ámina netá utó itimó nene venalite izegipa getanigi miluma giliaká niamó nenémini oko utó inogo ive.

⁹ * Lá onoize, lekelisi gizapa keké viziki ilo. Gakó hoza alilikimíki gonitó likilímiki vinigave. Itó monó numúikú numúikú nene segi nogosanitunú likipilitamó neve. Není nugulizá lekelitoka minakumule líki kugulizaki ve napatini itó kipegini kovogisaló likilímí milíliki keí kovogisaló oti miníki není mogona lí kiminigave. ¹⁰ Lá itamóza, gamena litá oko asú aminogo ive. Goí oko Ómasímíni gakó lamaná nene numutó namató puu loko vitive líki lí hutilí í asú inigave. ¹¹ Likigizató alíki likilímiki víki goní ilíkitata gamena nene, nanave loko litupe líki lakagata gilíko gena amino. Gamena nene zupa Sikalahulímó likigikagú gakó mololikimíki áminagó nene lílo. Lélisi lupe lámiki Sikalahulímíni gakó loló ino. ¹² Ámina zupahé nene uvolahó makolímó agunala agizató alekoko goní omikiko agunala nene apilí hilinigave. Amelaho nene gipala agizató alekoko goní omikiko nene gipala apilínigave. Izegipáini nenete izóikini améikini lova alí kimíiki líkiko izóikini améikini kipilí hilinigave. ¹³ * Není nugulizá lekelitoka minakumule líki vegená mukilite mukahá likipilínigí niamóza, vegená makolize gamenáini asú amititó monó ahulamalí alévolé iki vítamó nene Ómasímó kugutó vizinogo ive.

Miluma geleaká gamena napa

(Mat 24:15-28; Luk 21:20-24)

¹⁴ * Minoko lekeza nene mu likizapa iti netá golesa nene minamoaká apatoka apá ale golesa oaká netá nenémo oteneiko ánígatave. [Imane gakó gatatanimó neneka imane nolu gakokumú gele guni ozo.] Ámina gamenaló Zutaia mikasiuka nita vegená nene golisi ilíki agokaloka ititakumule. ¹⁵ * Keí numupitó nita vegená nene golisi ilíki limíki numúikú henoníini ma alíki vamitakumule. ¹⁶ Itó mikú noiti ve nenémo luhoaká gó alitove loko numunaloka atiginá oko vamitikumule. ¹⁷ Kee, izegipa kagatupagi nita venaki izegipa namuni aminí níkimita venaki nene ámina gamenaló nene nana itamó neve. ¹⁸ Lekelisi nolu netá nene golini gamena utó amitive líki Ómasiloka líki minalo. ¹⁹ * Ámina gamenaló genavagi netá utó itimó nenémo Ómasímó apí oko netá matá ale utó í gamenalotí emane utó osá amí netá nene minoloko itike imane gamenaló utó amive. Nolu gamenaló utó okoko nenémini veletó goha utó aminogo ive. ²⁰ Guivahanímó ámina miluma gilita gamena ale atuhá amitimó nene, vegená makó ma kavasavagi minamitamó nemóza, kelémo etó onoi vegenakumule loko ámina gamena nene ale atuhá inogo ive. ²¹ Nene gamenaló ve makolímó ángalo, gologí oletati vema imaneloka utó okave, itó ángalo, volaneloka utó okave loko lo likimitimó nene, ámina gakó gili zagemílo. ²² Ámina gamenaló nene gologí oleketati ve sozámíni itó Ómasímíni agepagutí gakó liaká ve sozámíni utó iiki vegenalite sigaga líta netaki soza avevezaha sunígí aliíki Ómasímó kelémo etó onoi vegená kogoka

* 13:9: Mat 10:17-20; Luk 12:11-12 * 13:13: Mat 10:22 * 13:14: Tan 9:27, 11:31, 12:11 * 13:15: Luk 17:31

* 13:19: Tan 12:1; Ali 7:14

vizitupe liki lá inigave. ²³ Ehe, nolu netá nene utó onamigo mota lo lekeme asú okuve. Nenemú gizapa alévolé iki minalo.

Okulumakutí ve gihila atiginá iti gakó
(Mat 24:29-31; Luk 21:25-28)

²⁴ * Ámina gamenaló ámina genavagi netá asú okiko, ho noiteko litá oko límugusi zekiko ikanímo hize sata amiko, ²⁵ * sonohí nenete okulumatotí atohiki velehé nilimiko, okulumakú amuzavagi netá mómoká i asú niko ²⁶ * okulumakutí lumu ve gihila neza zámuzánegi itó lapanánegi nene límusi amupiló nolumugo ániganigave. ²⁷ Lá okiko, agelogini kimiselekugo, kelémo etó onou vejená ho noititokatí ho nolimitokatí itó ezega emegatí itó mikasi nekisa vokisaukatí kilími nupa inigave.

Gohuna zámimi anoza gakó
(Mat 24:32-35; Luk 21:29-33)

²⁸ Gohunagitana zamú anoza gakola nemó nene gili vevesiki gililo. Izanámo nene nagamila nego agila guluma sekago lekeza ániagiake ho gamena mota alitokave liki giliaká niave. ²⁹ Itó ámináminiki lo lukumu netá nene utó noiko ániigiiki ve napate nene gatekú omo ávatíha okave liki litaze. ³⁰ Neza lamaná lo likimitoze, gililo. Imane gamenaló nia vejená velesá hili asú inamiko nolu netá mukí nene utó inogo ive. ³¹ Okulumaki mikasigi tolova itáíha, není gakó nene ma gopa oko tolova aminogo ive.

Gamena napamú gelemune
(Mat 24:36-44)

³² Lá onoimóza, ámina gamenamú ve hamoláate keké gelemave, itó okulumakú ageló keza ma gelemave, itó Ómasímimi gipala noutúmina ma gelemuve. Améneho hamokó áisigó geleneive.

³³ Ato gamenamú lekeza ma gelemanazo, ehe, gizapa i guni iki minalo. ³⁴ * Lá oko neve. Ve makolímó venoni vinogo nooko numuni apala ahuloko vinogo noike gelekelé izegipala nene mukí hoza nene etó etó oko kígizakú moloko netá matalaló gizapa iniatave loko ahulokimiake gatetó gizapa ve nene gizapa oko minozo loko lomíake vimó.

³⁵ Nenemú numuni amelahoma ati gamena nene gánavaló ahe akovevé ahe gó anuva noikohe gokululuva notovoikohe lekeza ma gelemanazo, nenemú gizapa i guni iki minalo. ³⁶ Lokovó akiniko galinali oko áni golikimikatize. ³⁷ Lo nolukumú gakó nene lekelikumukó lamuve, vejená mukikumú noluze. Lekeza nene gizapa iki minalo, loko límó.

14

Monó gizapa vete Izesuni apilínigi lova gizamó
(Mat 26:1-5; Luk 22:1-2; Zon 11:45-53)

¹ * Avóikini asenini zeketakumú gili mina holisigú lulu vizemi peleti niaká a holisi alitokago, gamena lositá ha nego, guguni giziaká ve napagi itó monó mogona apí-ikimiaká vegi keza láa liki lamó: ² Vegenalite lova napa ali utó iki lipilikatanazo, holisigú nene Izesuni apelemítune. Lá onoinazo, asuguná oko Izesuni agizató aleko apele hilitune liki gakó liki liake nenémimi gapomú vitagá amó.

Petania numutoka Izesuni anuva lamanaki uveli holotamó
(Mat 26:6-13; Zon 12:1-8)

³ * Lá noigo Izesú nene Petania numutoka noike Saimon eza halamé netá gizaleake minake zoka vémini numukú iteko nosáneté noko noigo, vená makolímó gehanigitana goni aleake, agepáa zeko ategeake áminagú nene anuva lamanaki uveli agulizá nalita nene meinava iteko mina netá nene Izesuni gotolaló leketamó. ⁴ Lá okago, ve lugáate mulúikú golesa okago, kezáitoka lamó: Uveli lamaná nene nanamú latila ive. ⁵ Ámina uveli nene hanuva minalina meinaváa moni 300 kina alekinake gohogó vejená kumutiline. Liki liake gahá amikago, ⁶ Izesú geleake láa loko lo kimimó: Ahulitalo. Nana igo gena gakó li nameve. Vená imanémo netá lamaná alenimikago etokave. ⁷ * Gohogó vejená keza lekelitoka gamena hána minilíki viki minanigi anazo, kelémo lamaná itune liki nene kilími lamaná itamóza, neza lekezagi minoloko voko minaminogo uve. ⁸ Ezáa loló itove loko agata gili netá nene loló okave. Alika nénisi helekugo gonosi milimiligú gale zinitatakumú agata geleake nugupeló anuva lamanaki uveli holonimikave. ⁹ Neza lamaná lo likimitoze, gililo. Makó mikasiuka není gakó lamaná imane li utó iki li kimitató li kimitató nene imane venalímimi mogonamú gili zagítave liki eza loló oneta sunimuki li kiminigave, loko límó.

* 13:24: Zoe 2:10,31; Ali 6:12 * 13:25: Isa 34:14; Ali 6:13 * 13:26: Tan 7:13 * 13:34: Luk 12:36-38 * 14:1: Gá 12:1-27 * 14:3: Luk 7:37-38 * 14:7: Gapo 15:11

Zutá Izesuni amimika litove loko lo hutamó
(Mat 26:14-16; Luk 22:3-6)

¹⁰ Lá okago, Izesuni izegipala zuha keikutí ve makó agulizá Zutá eza Kaliotó apatotí ve nenémo guguni giziaká ve napa niatoka vike Izesuni amimika loko alémoko oko likigizakú ahulatove loko lo kimimó. ¹¹ Lo kemekago, giliake, mulúikú lamaná okago, age nonó lá oko gimitive liki Zutani agómulaló li hutikago, geleake Izesuni amimika lingo amapani molamó.

Izesú izegipala zuhagi asenini zekimiaká nosá namó
(Mat 26:17-25; Luk 22:7-14, 21:23; Zon 13:21-30)

¹² Lulu vizemí peleti niaká a holisímíni ganá gamena nene avóikini asenini zeketakumú gili minake sipsip iza akaleva apiliaká a gamenaló nene, izegipala zuhate Izesuni loká itake lamó: Asenini zeketakumú gele minoaká holisímíni nosáneta nene hiláauka víki ali vavá initatave loko nolane. ¹³ Liki likago, izegipala zuhagutí ve lositá nene nokimisilike láa loko lo kimimó: Zelusalega nanitisiko ve makó eza paisele somo nagamílagi geheneike gapoló hotu nilikima nene ámina ve ámegetiki vilizo. ¹⁴ Lá iki víki ámina ve nene numukú itekiko numuni amelahini láa liki li amilizo: Tisalémo nezagi izegipáne zuhagi asenini zekimiaká nosá natuni numuni agika hiláauka neve loko lokago nousive. ¹⁵ Liki likisiko, numuni agika veletó nego netá matá avilisá ohá lekelepizekiko neneló nosáneta ali vavá ilizo. ¹⁶ Loko lo kemekago, izegipala losima keza gili alikasike taoniló vi anitikasike ángasimó nene Izesú lo kimimómáminoko nego ángikasike asenini zekimiaká holisímíni nosá ali vavá asimó.

¹⁷ Lá ikasigo, límugusi zekago, Izesú nene izegipala zuha 12-agi ali nupa iake, ¹⁸ * nosáneta níki niake, Izesú láa loko limó: Lamaná lo likimitoze, gililo. Lekelikutí nosáneta nonuhakutí ve makolimo nimimika lingo ive. ¹⁹ Loko lokago, keza miluma nigeleke hamopamó li amiki nenikumú nolape. ²⁰ Liki likago, eza láa loko lo kimimó: Ve 12 lekelikutí hamó lapegutí peleti nagamí zeko natí ve nenémove. ²¹ Okulumakutí lumu ve ghila nenikumú monó gotolaú luhuva gizinamómámini oko hilito gapogú novumóza, nimimika loko nelémoko víti vema agae, lihima sipisi alinogo ive. Izolaho aí getamilina nene vávani oko minaline, loko limó.

Lepa nosá apí oko kimimó
(Mat 26:26-30; Luk 22:15-20; 1 Koli 11:23-25)

²² Nosáneta ninake Izesú nene peleti aleake Ómasi agepoka loake gitegeko nokimike láa loko limó: Alike nalo. Imane není mémeláne neve. ²³ Loko loake vain goni aleake Ómasi agepoka loake, kemekago, nenegutí mukitó ninago, ²⁴ * láa loko lo kimimó: Lo múnahaká gokolímíni golaníne nene vegená mukikumule loko lekitomó imane neve. ²⁵ Lamaná lo likimitoze, gililo. Vain gihilagutí goha naminake minoloko vinake Ómasímíni agulizaki vetipo loló oleetato gamena nene vain nagamí haitolímíni natove, loko limó.

Izesuni Pitá egamega otatikumú lo utó imó
(Mat 26:31-35; Luk 22:31-34; Zon 13:36-38)

²⁶ Láa loko lokago, monó nama makó liake limiake, Olivi agoka agisauka anitiake, ²⁷ * Izesú láa loko lo kimimó: Monó gotolaú nene Ómasimo li gakó nene láa liki luhuva gizinamóma neve: Gizapa ve apelekugo sipsip iza nene hutilí iki golisi inigave. Liki gizinamóma nenazo, lekeza mukitó není visilinitanigave. Lá onoitimóza, ²⁸ * helekugo goha nelémo otekiko, Galilaia mikasiuka goí o likiminogo uve. ²⁹ Loko lokago, Pitá láa loko lo amimó: Neza viselegetamitove. Keza mukitó gele alévolé oakáini nene gologolo sokikoma nénisi nene lá aminogo uve. ³⁰ Loko lokago, Izesú láa loko lo amimó: Lamaná lo gimitoze, gelezo. Itína holugú nene okolohomámo anó losi molonamiko nenikumú ángamuve loko gamena losive makole egamega onetanogo ane. ³¹ Loko lokago, Pitá pigí vizeko limó: Neza geikumú egamega ogetaminogo uve. Nipili hilinigi niko, gezagi helekusigoma nene lá ogetaminogo uve. Loko lokago izegipa zuha mukitó keza alími vatí ake ámina gakokó lamó.

Izesú Gesemane zazuahagú Ómasiloka limó
(Mat 26:36-46; Luk 22:39-46)

³² Lá ikago, apá makó agulizá Gesemane loko neneló vi anitiake, izegipala zuha láa loko lo kimimó: Lekeza imaneló niko neza voko Ómasiloka litoze. ³³ Loko loake, Pitanigi Zemusinigi Zoninigi kelémoko voake, Izesú nene mulunagú peisi nozigo miluma geleake, ³⁴ láa loko lo kimimó: Mulúnégú gónupa geake hilitomó noize, lekelisi nene imaneloka miniki gizapa iki minalo. ³⁵ Loko loake, koma minomo novike mikasigú agoka nohizike Ómasiloka láa loko

* 14:18: Age 41:9 * 14:24: Gá 24:8; Zel 31:31-34 * 14:27: Zak 13:7 * 14:28: Mat 28:16

limó: Aménege, genavagi gihito netá imane gelekako nivilege vitive loko noluve. ³⁶ Loko nolike láa loko limó: Aménegamaka, geza mukí netá loló itove loko gagata gilitani netá nene vávani okogó loló itanimó nenazo, genavagi gihinitata netá imane nenitokatí ale olové itane loko nogulumóza, neni nigikaloka molamoko geí gigikaloka nelémo molatane loko noluve. ³⁷ Loko loake, oake izegipala zuha ániagamó nene, kovó akinago ániagoake, Pitani alémo oti ke láa loko lo amimó: Saimon geza akonape. Geza gamena koma gizapa oko ote minamitape. ³⁸ Lekemekú milatakumú gopa ikatanaze, gizapa iki miniki Ómasiloka liki minalo. Likigikámo vávani noimóza, lukugupémo gena noive. ³⁹ Loko lo kemeake, goha vike ámina gakó like Ómasiloka loake, ⁴⁰ atiginá oko ániagamó nene, kogómula ahilí okago kovó akinago ániagamó. ⁴¹ Lá okago anotó aliki li amita gakovumú vitagá amó. Goha ago nene losive makole okago, Izesú lo kimike limó: Lekeza lakavasú viziki hanuva aki niminahe. Ánesile. Gilinahe. Okulumakutí lumu ve gihila neza lihimáinigi vetini kigizakú nimimika liki nilími milata gamena mota alitokave. ⁴² Otilo, mota vitunize. Ánigalo. Nimimika liti vema mota alitó okave.

Izesuni amimí okago alemó

(Mat 26:47-56; Luk 22:47-53; Zon 18:3-12)

⁴³ Láa loko lo kemeko noigo, izegipala 12 keikutí kigivéipo makó Zutá noago, vejená mukí keza ámegetiki niake gelekaohisigi sopoló hánagi ali minake amó. Keza nene guguni giziaká vegi monó mogona apí ikimiaká vegi monó gizapa vegi keza emane amunaloka kimisilikago, ⁴⁴ nivake amimika liti vemámo gakó makó láa loko limó: Novinake ve makó agoka legeko nonogo nene ániigiiki ámina ve noive liki agizató aliki gizapa itiki alímiki vilo. ⁴⁵ Loko loake ake, Izesú noitoka litá oko vo amatoka aniteake, oho, tisatehove nolike agoka legeko namó. ⁴⁶ Lá okago lova ve nenete ake Izesuni agizató ali gikitiki alemó. ⁴⁷ Lá niago, amatoka mina vejenakutí makolímó aí sopoló hána nene gologatú seageke guguni gizoaká ve napámini gelekelé izegipala apilike agata zeko isimó. ⁴⁸ Lá okago, Izesú nene lova vema láa loko lo kimimó: Neza nene laskoli nougo sopoló hánagi itó gelekaohisigi aliki niake nigizató alitune liki niahe. ⁴⁹ * Gamena gamena lekezagi monó zagusave napagú minuke monó lo keme keme oko minumómalo nigizató alisá amamó nehe. Lá ikamóza, emane amunaló nenikumú monó gakó luhuva gizinamó nene alévolé itive loko netá imane utó okave. ⁵⁰ Loko lokago, izegipala zuha nenete ahulimíage golisi hutilí iki vamó.

Makí golisi vimó

⁵¹ Lá ikago, gosohá ve makolímó gó gizapa agupeló likeake Izesuni nene ámegetoko novigo, ámina ve nene agizató alikago, ⁵² góma nene gololohá oko ahulo kigizakú oake agupe zapakó golisi vimó.

Kansoletini kogómulaló Izesuni goní itamó

(Mat 26:57-68; Luk 22:54-55,63-71; Zon 18:13-14,19-24)

⁵³ Lá okago, Izesuni nene guguni gizoaká ve napa noitoka alímiki vikago, guguni giziaká ve napagi itó monó gizapa vegi monó mogona apí ikimiaká vegi alegesá iki minakú alímiki itemó. ⁵⁴ Izesuni alímiki nivago, Pitá nene hotó otigí oko kémegetoko vike, guguni gizoaká ve napámini hé numunagú áneneló iteko ámina vémini gelekelé izegipategi minake lotó agupe lotá oko minamó.

⁵⁵ Lá noigo, guguni giziaká ve napagi keí kansolegi mukitó nene Izesuni apele hilitune liki soza hakupá gakóinimú vitagá amóza, ⁵⁶ hakupá gakó la ve nenete gakóini hamó lamamó. Mukí liki amupemusó nenazo, ali utó amamó. ⁵⁷ Makolite otiki hakupá gakó aikumú láa liki lamó: ⁵⁸ * Eza nene monó zagusave napa kigizanitunú ginamóza imane zeko tele vizekinake, gamena losive makole noviko goha nigizanitunú gemitoha hanuva lokugo utó inogo ive loko noligo gulunimole. ⁵⁹ Liki lamóza, gakóini nene hamó gapoló vamigo, ⁶⁰ guguni giziaká vetini ve napáini nenémo holúikú oteake Izesuni loká otake goní nigitake nila gakotó geza ale viligoko lo kimitani gakó ma nomihe. ⁶¹ Loko limóza, Izesú nene agepa apizeake minake gakó ale viligoko lo amemigo, guguni giziaká vetini ve napa nenémo goha loká otake limó: Geza gologí oletatane loko lo mola vema Ómasi agepoka loaká nouháminini gipala noape. ⁶² * Loko loká omikago Izesú limó: Oo, nene mota nolane. Itó makó lo likimitoze, gililo. Okulumakutí lumu ve gihila neza amuza vémini agizani zamagaloka nougo, itó okulumalímini límusigú nolumugo ániganigave. ⁶³ Loko lokago, guguni giziaká vetini ve napa nenémo gele golesa oake luhoaká gola aleko polo noligike vejenala zuha láa loko lo kimimó: Gakola gilina vejená makó nanamú sele lokinake gakó goha lokiko gilitune. ⁶⁴ Ómasi avilegeko li gakó mota gilikaze. Nenemú lekeza gilikago nana

* 14:49: Luk 19:47, 21:37

* 14:58: Zon 2:19

* 14:62: Tan 7:13

onoive. Loko lokago, keza mukilite nakahunímini gako lokaze, mota losé apilitune liki li hukitake, ⁶⁵ lugáate gituhú itake agoka agepaló nihitake kigizanitunú napeleke lamó: Geza gako mogona lo utó oaká ve noitanimó nene, éaho nogipilihe lo utó oko lo lemezo. Liki likago, gelekelé izegipáimimate kigizanitunú apelemó.

Pitá Izesuni egamega otamó

(Mat 26:69-75; Luk 22:56-62; Zon 18:15-18,25-27)

⁶⁶ Lá niago Pitá nene hé numuni amunaloka noigo, guguni gizoaká ve napámini gelekelé mohola makolímó oko ániagamó nene, ⁶⁷ Pitá nene agupe ló lotá oko noigo, ániagoake gonú napilike geza nene Nasalete numutotí ve Izesuki miniaká niasi vema noane. ⁶⁸ Loko lokago, Pitá eza egamega ike gako lanimó nene ma gelemuve, itó mogonáa gele vevesamuve. Loko loake, gategú nolimigo, ⁶⁹ ámina gelekelé mohó nenémo aí goha ániagoake alegesá iki mina vevenáma lo kimike ve imane Izesuni zuhagutí noive. ⁷⁰ Loko lokago, goha egamega hulupaváa imó. Lá okago, gamena komáisi neigo áminaló oti mina vevenalite Pitani goha láa liki li amemó: Géisi Galilaia ve noaninazo, géisi lamaná Izesuni zuhagutí noane. ⁷¹ Liki likago, eza Ómasímini avogisaló lo hutoko lamaná noluze, soza litomó nene Ómasímo usí vizenimikatzize, lekeza gako nila ve nene ániagonamu vemú nilave, loko limó. ⁷² Loko noli agepagi okoloho nenémo goha anó molamó. Anó molokago, Pitá nene Izesú lo ami gako nene, okoloho nenémo gamena lositá anó molonamiko není ániagonamuve loko egamega onetatanimó nene gamena losive makole inogo ive loko amunaloka lo ami gako goha geleake ive napa imó.

15

Izesuni Pilató noitoka alímiki vamó

(Mat 27:1-2,11-14; Luk 23:1-5; Zon 18:28-38)

¹ Neteká ho noitigo, guguni giziaká ve napagi monó gizapa vegi monó mogona apí-ikimiaká vegi monó kansole ve mukí kezagi lova gizi hutiake Izesuni nene nagá zimiake alímiki vake Pilatoni agizakú milamó. ² Lá ikago, Pilató nene Izesuni ániagoake loká otake geza nene Zuta vetini kugulizaki ve napáini noape. Loko loká omikago, eza láa loko lo amimó: Nene gezaka mota lokanimole. ³ Loko lokago, guguni giziaká ve napamate mukí netakumú goni imikago, ⁴ Pilató goha loká otake limó: Geikumú gako genavagi nilamó nenazo, geza gako ale viligoko lo kimitanimoláa ma nomihe. ⁵ Loko loká omikago, Izesú gako ale viligoko lo kememigo Pilató nene agata gululusi gilimó.

Izesú hilitive liki goní itamó

(Mat 27:15-26; Luk 23:13-25; Zon 18:39-19:16)

⁶ Kiapé eza Zuta vetini avolagini asenini zeketakumú gili mina holisigú meleketó meleketó nene Zuta ve keza aseva zetatahe liki ve makolímíni agulizá ikago, agulizaki ve nenémo nagá numukú ahulikita ve kimisele ahuloká ahuloká okago, ámina ve nene numúitoka viaká amó. ⁷ Lá imó nene gamena nene zupa ve makó nagá numukú minamó, agulizá Palapasí. Áisi nene vevená lugáa kelémo vatí ike gamaniloka lova gizakú nene ve makó kepele hilimó nenazo, nagá numukú ahulimikago minamó neve. ⁸ Lá okago, vevená mukí nenete Pilató noitoka vake eza aleaká imómáminoko alitive liki loká imikago, ⁹⁻¹⁰ guguni giziaká ve napa nenete Izesukumukó amekugú niki miniake gonitó alímiki vakumú nene Pilató geleneike láa loko lo kimike limó: Láa likima Zuta vetini agulizaki vetipo nene aseva zemikugo lekelitoka vitive liki nilahe. ¹¹ Loko limóza, guguni giziaká ve napa nenete vevená mukilítini mulúikú hizikago ¹² aitolí Palapasíni aseva zetamane liki likago, Pilató goha lo kimike limó: Zuta vetini kugulizaki véini noive liki liaká nia vemú nene nana otatove. ¹³ Loko loká okimikago, goha gopaga liki zohota zaló hilitikumule. ¹⁴ Liki likago, Pilató nene nanamú. Nana netá golesa alekago nilave. ¹⁵ Loko lokago, keza goha gopaga liki likago, Pilató nene ali nupa imina vevenalítini mulúikú hulu itive loko Palapasíni gologí omikago keitoka vimó. Itó Pilató lokago, Izesuni nene segi nogosanitunú apiliake viki zaló nilitunú ziki apili hilitave loko kigizakú molamó.

Ami vete Izesuni gopoguni militamó

(Mat 27:27-31; Zon 19:2-3)

¹⁶ Lá okago, ami vemate agulizaki ve napamámini numuni holutó nene Izesuni alímiki iteke ami ve lugáa mukí kilími nupa ake, ¹⁷ agulizaki vegitana lilí itake okohu gó luhimiake gasovagi nagatunú akilí lilí iki gotolaló hitimiake, ¹⁸ amé ziki geké litake oga mokáneve, Zuta vetini kugulizaki véinimave. ¹⁹ Liki liake, akepa nogosanitunú gotolaló ziake gituhú nitake agisagú gupá nizeke soza miliiki agoka agaka vizemó. ²⁰ Lá ake gopoguka li asú itake okohu gó luhitamó nene gololohá iki ali miliake ezáa gola luhimiake, zohota zaló nene nilitunú ziki apili hilinigi alímiki vamó.

*Izesuni zohota zaló apelemó**(Mat 27:32-44; Luk 23:26-43; Zon 19:17-27)*

²¹* Lá iake gapoló nivago, ve makó agulizá Saimon eza Apilika mikasiuka Sailini apatotí ve Alesaté itó Lupú keí améipo nene minaukatí noago, hotu liake gala vizikago, Izesú gehoko vi za nene alémo vatí oko gehetoko vimó. ²² Lá noigo, alímiki vake apá makotoka agulizá Goligota loko, lelí gakokutí nene gotóini gonosi helisa apale loko neneloka anitiake, ²³ Izesú native liki vain nagamití nene miluma gelemiti lusa netá makó agulizá mulu nene miliki ali gopa iake amemóza, namimó. ²⁴* Namigo, zohota zaló nene apiliki apatiake ginéganeva gona miliki aliki éaho alitihe éaho alitihe liki satu zohí amó.

²⁵ Lá iki apelemó nene gó loake ho ite alévolé noigo, zaló apiliki apatemó. ²⁶ Lá ikago, nakahunímini gakó luhuva nene Zuta vetini kugulizaki véinive liki giziake apatemó. ²⁷⁻²⁸ Itó laskoli ve geligeli ve makó nene agizani sogaloka apatemó, itó makó nene agizani zamagaloka apiliki apatemó.

²⁹* Lá ikago, vevená vigá igá amó nenete gotóinitunú goké goké nizeke amé ziki gopoguka litake láa liki lamó: Oho, monó zagusave zeko tele vizekinake gamena losive makolegó oko vokiko goha gitove loko loaká anitika, ³⁰ gugutó vizeko zohota za ahulokoko lememane. ³¹ Liki nilago, guguni gizoaká ve napagi monó mogona apí ikimiaká vegi keza hamolímíni iki amé ziki gopoguka litake kezaitoka láa liki lamó: Vegená lugáa kelémo kugutó vizeaká noimóza, ezáa nene alémo agutó vizemitimó okave. ³² Eza nene Isilae ve lelí gologí olimiaká ve itó lelí agulizaki ve noitimó nene itínasa zohota zalotí apasoko lemekiko, ánikokinake gakola gele alévolé ituninazo. Liki likago, keza luga luga zohota zaló kipiliki apate ve nenetosa áminámini iki kilími vatí asike amé zitigí iki lasimó.

*Izesú hilimó**(Mat 27:45-56; Luk 23:44-49; Zon 19:28-30)*

³³ Holisakatotí mukí mikasiuka límugusi ze asú oake mino-loko novigo únaká ho nene ale zohota imó. ³⁴* Ho ale zohota noigo, Izesú pigi vizeko ezáa gakokutí nene Eloi, Eloi, lama sapakatani loko limó nene lelí gakokutí nene Ómasinemaka, Ómasinemaka, geza nanamú viselenimikane. ³⁵ Loko lokago, amatoka mina vevená lugáate nene gakó giliake láa liki lamó: Gililo. Ómasímini agepagutí gakó loaká ve Ilaizani sele nolive. ³⁶* Liki liake ve makolímó ololu loko vike notunigitana netá legeake akepa lolovaló hizeake ekesá vain nagamiki lupizeake ale oteko Izesú native loko amimó. Namike láa loko limó: Ángatune. Ilaizá oko apasotatihe loko gizapa onoitune. ³⁷ Loko lokago, Izesú gakó napagutí like, ahuu lo nahulake hilimó. ³⁸* Lá okago, monó zagusave napagú Ómasímini avogisaló itiaká nia gatetó zi lí ika lavolavo nene velekutí zeko hoú loloko limike ale luga luga imó nene lelí gahe ale koló imó. ³⁹ Izesú nene ahuu lo nahulake helekago, ami vetini gizapa vémo Izesuni agómúlaló noike imane ve nenémo lamaná Ómasímini gipala minamó neve, loko limó.

⁴⁰ Itó vená lugáate hotó otigí iki oti minake ángi minamó. Keikuka nene Magatala numutotí vená Maliá minamó, itó Maliá makó eza Zemusí komáa itó Zosé keí izóipo itó Salomé nene makó minamó. ⁴¹* Keza amunaló Izesú nene Galilaia mikasiuka noigo ámegetiki nivake izamuha hiziki minamó neve. Kezagi itó Izesugegi Zelusalega itina vená lugáa mukímagi neneló minamó.

*Izesuni gale zitamó**(Mat 27:57-61; Luk 23:50-55; Zon 19:38-42)*

⁴² Únaká huluvaló nene holisi gamenamámini netá ali vavá iaká a gamena alitokago, holisi gamenama alitokago, gamena hamó ha nego, ⁴³ Alimataia numutotí ve Zosehé eza monó kansole vete agika itiake a vémo áisi Ómasímo gizapa ve napa ale utó oketati gamenamú gizapa oko mina vémo ahelele vizimó ze hitoake Izesuni gonosiváa alinogo Pilatoni nene loká omikago, ⁴⁴ Izesú mota hilihe loko agata losi geleake, ami vetini gizapa vema sele loake, mota hilihe loko loká otamó. ⁴⁵ Loká omikago, ami vetini gizapa vemámini gakó geleake, gonosiváamú nene Zosehé hanuva aleko vitive loko gele amimó. ⁴⁶ Gele amekago, Zosehé nene gonosiváa asapú otatikumú lavolavo gó mokoná lamaná meina hizeake gonosiváa nene zalotí apasoko ale mikasiló oake, gó mokoná lamanámagú asapú omiake aleko vike meikú geha mulí goló vateikamó nenegú molomiake, gehani napa makó ahelú oko geha mulilímíni agepaló ze lí imó. ⁴⁷ Nenegú nomolago, Maliá eza Magatala numutotí vená itó Maliá makó Zoseni izolaho nene áminaló ángi minasimó.

* 15:21: Lom 16:13

* 15:24: Age 22:18

* 15:29: Age 22:7, 109:25; Mak 14:58; Zon 2:19

* 15:34: Age 22:1

* 15:36: Age 69:21

* 15:38: Gá 26:31-33

* 15:41: Luk 8:2-3

16

*Izesú heleneikutí otimó**(Mat 28:1-8; Luk 24:1-12; Zon 20:1-10)*

¹ Ho lemekago, holisi mota asú okave liki liake, Magatala numutotí vená Maliá, itó Maliá makó Zemusini izolaho, itó Salomé keza Izesuni gonosiváaló anuva lamanaki uveli holotatune liki anuva uveli meina hizemó. ² Hiziki aliake, holisi napa Sategú nene gó lomolomo gonosi apakú viki nanitego, ho itimó. ³ Lá okago, vake gonosi apató ali alitiake kezáini ligili hagili ake geha mulí agepalotí gehani napama nene éaho ale ámegeletative. ⁴ Liki ligili hagili iake ángamó nene, ámina gehani napa mota ahelú o ámegekago gale koló onoigo ángamó. Ángiake, ⁵ geha mulikú itiake ángamó nene, gosohá ve makó nene luhoaká gó mokoná hána luhoake zamagaloka noigo, ángiake ininá goha amó. ⁶ Ininá niago, eza láa loko lo kimimó: Lekeza ininá amilo. Lekeza nene Nasalete ve Izesuni zohota zaló apiliki apate vema ánganigi niahe. Imanegú noamive. Mota otekave. Gonosiváa milita apáma ángalo. ⁷ * Itó ángiiki viki Pitage itó izegipala zuha lugáamagi láa liki li kimilo: Amunaló lo likimimómámini oko goí o lekemeko Galilaia mikasiuka mota vokanazo, lekeza neneloka aí ánganigave liki li kimilo. ⁸ Loko lokago, luvoluvo nizeke ininá anazo, hetoka limiake geha mulikutí golisi vamó. Ololu liki vake kehelele vizekago, vejená makó aveté iki li kememamó.

*Izesú Magatala apatotí Maliatoka utó o amimó**(Zon 20:11-18)*

[⁹ Izesú nene lelí holisi Sategú nene neteká holugú galegutí oteake, Magatala numutotí vená Maliá eza holosi golesa 7-a agikagutí kepeleko kimisele ámegeta vená nene ganá utó o amimó. ¹⁰ Lá okago, eza vike agivelagini nene miluma maluma nigeleke ive nama iki niago aveté oko lo kimimó. ¹¹ Heleneikutí oteake hanuva noigo ángogukve loko lo kemekago, giliake gili zagemamó.]

*Izesú izegipala losiloka utó o kimimó**(Luk 24:13-35)*

¹² Nenelotí keikutí ve lositá nene gihisigú nivasigo, Izesú nene ametameni haitolímini ale luhoake utó o kimimó. ¹³ Lá okago, keza atiginá iki taoniloka vasike vejená lugáa aveté iki li kemesimóza, gakó lasimó nene gili zagemamó.

*Izesú aposolo 11 monó hozaló kimisilimó**(Mat 28:16-20; Luk 24:36-49; Zon 20:19-23)*

¹⁴ Alika Izesú nene izegipala 11 kezáikó alegesá iki nosáneta niki niago, utó o kemeake eza galegutí oteake noigo aí ánga vejenalitiní gakó gili zagemamó nenazo, gili alévolé amakumú itó kigika hize lí ikumú nene gahá kimimó. ¹⁵ * Lá ike láa loko lo kimimó: Lekelisi nene numutó namató ho noititoka nolimitoka viki vejená mukitó niamó nene není gakó lamaná li kimilo. ¹⁶ Lá ikiko gili alévolé iiki monó nagamí hilinita vejená nene okulumalímini mututoni itamóza, gili alévolé amita vejená nene meinímini mututoni inigave. ¹⁷ Itó imane anosa nene gili alévolé iki minata vejenatoka utó oketanogo ive. Není nugulizá iki holosi golesa nene kipiliki kimisilinigave. Haitó konokutí galinali linigave. ¹⁸ Gosihá nene gopa ali otiki minatamó itó gipe nagamí gopa natamó nene nenémo kelémo golesa aminogo ive. Kivisiti vejená nene kigizanitunú nónohá zikitatamó nene zokanigave, loko limó.]

*Izesú okulumakú itimó**(Luk 24:50-53; Apo 1:9-11)*

¹⁹ Láa loko Guivahani Izesú lo kemekago, Ómasímo Alémoko okulumakú itekago, eza Ómasímini agizani lamagaloka minamó. ²⁰ Lá noigo, keza izegipala zuha nenete numutó namató viake gakola li utó iki li nikemego, Guivahani nenémo kelémo vatí ike ámina anosa utó o kimitunú nene keí gakó hize lé oketamó.]

* 16:7: Mat 26:32; Mak 14:28 * 16:15: Apo 1:8

Izesu Kilistoni Gakó Lamaná Luká Luhuva Gizamó

Luká eza imane luhuva Teopiloni gizo amimó

¹ Ve mukilite holutegú utó i netá nenémíni gakoála ali amegesaló miliki luhuva gizinamó. ² Keza nene monó liaká vete mogonalotí Izesuni netá mukí ángi hee liake li utó iki li leme gakó luhuva gizinamó nenazo, ³ neza ámina oko ámina gakó lamaná nene legesó oko ale lamaná oko gele hee lokuke nene, Teopilo gugulizaki venemaka, geí nene ale etó etó oko luhuva imane gizo nogumumó nene ⁴ géisi nene gatoko avetó gakó li gememó nene gihila lamaná neve loko gilitane loko nogizuve.

Monó nagamí holokimiaká ve Zoní utó itikumú epoapoga limó

⁵ * Zutaia mikasigú nene agulizaki ve napa Heloté gizapa oko mina zupa nene Ómasi guguni gizo ameaaká ve makó minamó agulizá Zakaliá, Apiani mulusigutí. Eza Alonani agapilamokutí vená makó alimó agulizá Elisapeté. ⁶ Keza Ómasímíni avogisalo kigika lamanaki minasike gapo lota gakó Ómasímo lo hukoko li gakó lihimáini nomimó minasike gili alikigó minasimó. ⁷ Elisapeté nene gohuna vená minokago, keza izegipáini nomimó minasike ozaha gelehosi milasimó.

⁸ Zakaliani mulusi keza monó numuni napagú Ómasi guguni gizi amita gamena alitokago, ⁹ guguni giziaká vete aliaká amó nenémíniki hozanini ali etó etó iki alimi nivake, Zakaliani nene Ómasi guguni gizo amezo liki alími etó ikago, monó zagusave agikagú itike anuva lamanaki netá nene Ómasi guguni gizo namigo, ¹⁰ vegená mukilite geisa agikagú minake Guivahaniloka liki minamó. ¹¹ Nilago Guivahanímíni ageló makolímó utó o amike guguni gizoaká ita lamagaloka ote minamó. ¹² Oteneigo, Zakaliá ángoake ininá ike alegesá ligimó. ¹³ Alegesá legekago, ageló nenémó láa loko lo amimó: Zakaliazo, geza gelegesá legemino. Guivahanímó numuna nolanimó nene mota geleneize, venaka Elisapeté nene izegipa agatupagí minoko gipa getatimó nene agulizá Zoní ave loko molozó. ¹⁴ Geza mulukagú lamaná geleko gogoliza vizinogo ane. Itó vegená mukilite gipaka utó itikumú nene laga kivisinogo ive. ¹⁵ * Eza nene Guivahanímíni avogisalo nene ve napa loló oko minative. Eza vain nagamí ahe itó negi nagamí ahe nonamoko moseko nominiko, izolahini agatupagú noikutí Sikalahulímó aí agikagú mino vaí itive. ¹⁶ Lá okiko Isilae vegená mukí nene gapo golesagutí kelémo atiginá okiko, Guivahani Ómasímíni kovogisa i aminigave. ¹⁷ * Eza Ómasímíni agepagutí gakó loaká ve Ilaizá oaká imó nenémínoko amuza moloko Guivahanímíni gapo veletoko aí gakó lo utó utó oko minanogo ive. Lá oko minoko olotiva vegenalitimíni itó izegipa komatini kigika ale apizeketative. Lá okiko gakó gili ahuliaká vegená nenete kigika lamanaki vete nigele monó nene kagata gámemé iki gilinigave. Itó eza ámina hoza alekiko, vegená mukí keza Guivahanímú ageva iki minanigave.

¹⁸ Ageló nenémó láa loko lokago, Zakaliá eza anotó aloko láa loko lo amimó: Venánegi leza ozaha gelehosiama nousinazo, nenemú geí gakó gulo gihiláa loló amive. ¹⁹ * Loko lokago, agelómámo láa loko lo amimó: Gelenape. Neza nugulizáne Gapelienama noluve. Neza Ómasímíni avogisalo minoko aleko oaká noumóma neve. Áisi nimiselekago lumuke gakó lamaná imane lo nogumuve. ²⁰ Nenemú gelezo. Gakó lo nogumumó nene gele alévolé amanímómámíni lihima nene gakó lamoko negi hizeko minoloko novako, minoko gakó lo nogumumó nene gihila ziti gamena nene gakó goha linogo ane. Neza nolu gakó nene hetagá aminogo ive.

²¹ Loko lokago, Zakaliá eza monó numuni napagú gamena hána minokago, vegená keza ageva iki minake minake gopa kagata gelemó. ²² Lá iki niago, Zakaliá alika limike gakó lo kiminogo gopa imó. Gakola gopa okago, keza nene monó zagusaveú netá haitolímíni makó ánginoitive. Liki nigelego, eza negi hizeake gakó nana oko lo kimitohe loko agizanitunú avevezaha o kimike gakó lo kememimó. ²³ Lá oko noigo, hoza alití gamena asú okago Zakaliá nene numunaloka atiginá oko vimó.

²⁴ Alika venala Elisapeté nene izegipa agatupagí minamó. Lá oake ikani 5 oko novigo halá geko minake, ²⁵ Guivahanímó gamena molamó nene alitokago Guivahanímó hize lé onimiake gohuna vená minukumule loko novoza hulu netá monéna ale ahulonimikave, loko limó.

Izesú utó itikumú epoapoga limó

* 1:5: 1 Iki 24:10 * 1:15: Nam 6:3 * 1:17: Mal 4:5-6 * 1:19: Tan 8:16, 9:21

²⁶ Lá okago, izegipalagi minatoti ikani 5-a ale ahulokago, Ómasímo ageló Gapelienima goha amiselekeago Galiláia mikasiuka Nasaleta numutoka vimó. ^{27*} Neneloka izaina vená makó minamó, agulizá Maliá. Eza nene agulizaki ve napa Tevitini agapilámó zuhagutí ve makó minamó agulizá Zosehé aí ániigi milimikago minamó. ²⁸ Noigo ageló nenémo Maliá noitoka utó oake láa loko lo amimó: Guivahanímo hize lé ogetago noanitika nenoape. Guivahanímo geitoka noive. ²⁹ Loko agelómámo lokago, Maliá giligo gena okago, agikatunú nene gakó limómámini mogona nana oko netive. ³⁰ Loko nogiligo, agelómámo láa loko lo amimó: Maliázo geza gehelele vizemino. Ómasímo geí ániigokago lamaná okave. ^{31*} Gelenape. Geza izegipakagi minoko gipa getatanimó nene agulizá Izesú ave loko molozo. ^{32*} Eza nene sipisi ve loló oko noiko Ómasímíni gipalave liki linigave. Itó Guivahani Ómasímo nene avolaho Tevitini akilí ale hitomikiko minanogo ive. ³³ Itó míno lúaló moloko Zakoponi agapilámó zuhaloka gizapa oko minanogo ive. Guivahani loló oko minatimó nene asú amoko gamena hána hána míno-loko voko minanogo ive. ³⁴ Loko agelómámo lokago, Maliá láa loko lo amimó: Neza vánegi apizeko minamusive. Nenemú nolani gakó nene nana oko alévolé itive. ³⁵ Loko lokago, ageló nenémo láa loko lo amimó: Ómasímíni Sikalahulímo geí gumupiló liminogo ive, itó Guivahanímíni zámuzámo hize lé ogetanogo ive. Nenemú gipa getatanimó nene etó keké vizeko noi gipa Ómasímíni gipalave liki linigave. ³⁶ Itó makó lo gimitoze, gelezo. Geí zuhagutí Elisapetéma nene gelehosimámo izegipa agatupagi noigo ikani 6 mota vokave. Eza nene gohuna venámave liki nilago izegipalagi minokave. ^{37*} Ómasímo loló amiti netala ma nomive. Loló iti netakó nenazo, nenemú Ómasímo Elisapetenimú li gakó mota gihila zekave. ³⁸ Loko lokago, Maliá nene neza Guivahanímíni gelekelé mohó nounazo, nolani gakó nene ámináminoko utó ino. Loko lokago, ageló nenémo ahulomiake vimó.

Maliá Elisapeté noitoka vimó

³⁹ Maliá nene míno hána amike Zutaia mikasiuka agokaloka numuni makó minatoka iteko vimó. ⁴⁰ Iteko vike Zakaliani numukú itike Elisapeteni geké lotamó. ⁴¹ Geké lomikago, Elisapeteni mulunagutí izegipalama zigini igo gilimó. Gelekago, Ómasímíni Sikalahulímo nene Elisapeteni agikagú lemeko vaí okago, ⁴² gakó napa like láa loko lo amimó: Ómasímo eza vená mukikutí gelémo etó ike nónohá zegimikave, itó izegipa getatanimó nenegi lusa gemikave. ⁴³ Geza není Guivahanímíni izolagama noane. Vená ánéama nounazo, nanamú nenitoka okane. ⁴⁴ Gelezo. Geké nolonetako, izegipa nenémo mulúnegutí agoliza novizike zigini okago gelekuve. ⁴⁵ Itó geza nene Guivahanímo lo gimi gakó vo alitive loko gele alévolé okako, Ómasímo lusa gegimikave. Nenemú gulugo lamaná okave.

Maliá agoliza vizike Ómasi agepoka limó

⁴⁶ Loko lokago, Maliá láa loko limó:
Neza nigikatunú Guivahani agepoka noluve,
^{47*} itó sikalahúnetunú Ómasi nugutó vizeaká vemú nogoliza vizuke agepoka noluve.
⁴⁸⁻⁴⁹ Itó gelekelé mohola neza minomo lemeko minomó itínasa nelémoko noitive.
Ómasi alévolé ve nenémo nenitoka netá gihila ale utó okamó nenazo,
nenemú omolelé amalelé iki mini-likí itita vegealite
nenikumú giliikí Ómasímo lusa geta venale liki linigave.
Aí agulizá etó oko neve.
⁵⁰ Aí gili amita vegeá nasahilí okimiaká noive.
Omolelé amalelé iki minimi ite vegeá lá okimiaká noive.
⁵¹ Kezáini kugupemú gelego iteaká noi vegeá nene ezáa alévolé zámuza ale utó ike kelémo ahuloaká noive.
⁵² Itó kugulizaki ve kehélú okago
keí gonanalivagi holomalotí velehé limiaká niave.
Itó vegeá limikí minamoláatini kugulizáini ale napa oaká noive.
⁵³ Gohogó vegeá itó gaúna hiliki nimina vegeá nene netá gihila kemekago, kagatupa igo miniaká niave.
Itó henóinigi vegeá ahulokimikago
muhelé iki miniaká niave.
⁵⁴ Ómasi eza gelekelé otoko minuni vegeá nene hize lé olimikave.
Eza agika lamanakímove loko Isilae vegeá leza lá olimikave.

* 1:27: Mat 1:18 * 1:31: Mat 1:21 * 1:32: 2 Sam 7:12-16; Isa 9:7 * 1:37: Apí 18:14 * 1:47: 1 Sam 2:1-10

55* Avotegini láa loko lo moloketamó nene
Avalahani itó agapilamó zuhagi lo mololetamómámini gihila utó oloko voko minanogo
ive.

56 Loko Maliá loake, Elisapeteki minasike ikani losive makole ale ahuloake, numunaloka
atiginá oko vimó.

Monó nagamí holokimiaká ve Zoní utó imó

57 Itó Elisapeté eza izegipa getati gamena alitokago, gipa getamó. 58 Getokago, vejenala
zuha agivelage keza Guivahanímo muluna ze hou lake ale utó i netakumú giliake, ezagi
makó mulúikú lamaná gelemó. 59* Lá iake, gamena 8 oko vokago, gipa namunimámini
agupeló Ómasímini anosa militanigi mukí vejená alegesá ake amelaho Zakaliani agulizató
milanigi lamó. 60 Liki likago, izolaho géneka like Oe, agulizá Zoní ave loko molatune.

61 Loko lokago, keza láa liki li amemó: Íi, geí zuhatini kugulizá makó nenémínoko nomive.
62 Liki géneka hánaka nilake, Zakaliá nene gipalámini agulizá nanave loko molative liki
kigizanitunú avevezaha ikago, 63 eza pepamú agizanitunú avevezaha okago, pepa alimi
amikago, agulizá Zoní ave loko luhuva gizamó. Gizokago, giliake sigaga lamó. 64 Lá ikago,
Zakaliani genezala litá oko lamaná okago, Ómasi agepoka limó. 65 Lá okago, agive lugáa
keza giliake kelegesá ligimó. Lá okago, Zutaia mikasigú zopegaloka numutó namató nene
ámina gakó avetó iki ligili hagili ikago, 66 vejená mukilite gakóini giliake ali kigikagú milake
gipama nene napa okoko nana itive. Liki lamó nene, Guivahanímini zámuza nene ámina
gipaloka nego giliake lamó neve.

Zakaliá epoapoga li gakó

67 Itó amelaho Zakaliani nene Ómasímini Sikalahulímo agikagú minake alémo vávani igo
alika utó iti netakumú epoapoga like láa loko limó:

68 Isilae ve leza Guivahanite Ómasi agepoka litune.

Eza nene vejenala zuha lelí lelémo vatú ike

netá golesagutí gologí olimikave.

69 Lugutó viziti lapusa ale oteko hizekave.

Gelekelé izegipala Tevitini agapilamó zuha lelitoka neve.

70 Ómasímini agepagutí gakó liaká ve kelémo vávani okago
epoapoga gozapá láa liki liaká amóma neve:

71 Lova vetini kigizakutí gologí oletanogo ive.

Mukahá lipiliaká nia vegutí akagá oletanogo ive.

72 Avotegini nigika hize kimítove loko lo moloketamole.

Lo múnaheake lo hukoko li gakó gele minake lá oketamole.

73 Itó avoteho Avalahani láa loko alévolé oko lo molotamole:

74 Gala vetini kigizakutí gologí oletanogo ive.

Lá okiko lelegesá legemiko gelekelé otoko minanogo une.

75 Nenemú ligika avasavagi miniko gakote minamiko

gelekelé otoko minoko hilitune, liki lamó neve.

76* Itó gipa geza Guivahanímini monó gakoláa lole ale oko aí gapo veletataninazo,
geikumú nene vozaú vémini agepagutí gakó loaká veve liki linigave.

77 Ómasímo vejenala zuha kugutó viziti gakó lo kemekako,
keza gili zagikiko, lihimáini ahuloketanogo ive.

78 Lelí Ómasile eza milumate geleaká noimó nenazo,

eza lilitó nene velé okulumakutí okululuva notovoko,

79* Íimugusigú nouhá vejená hize hanatoletanogo ive.

Itó heleakakú nominuhá vejená hize sata oletanogo ive.

Lá onoiko nonagá lamanalímini gapova utó iko

nenegú vinogo une, loko Zakaliá limó.

80 Itó ámina gipa nene agupegí agikagi napa oko alévolé okago, mikasi gomopalaló voko
noigo, hoza aliti gamena alitokago, Isilae vejenatoka utó oko minamó.

2

Gipa Izesú utó imó

(Mat 1:18-25)

¹ Gamena nene zupa Loma vetini agulizaki ve napa minamó, agulizá Agustó. Eza
numutó namató vejená kugulizá alilo loko gakó ahulokago vimó. ² Nenémíni hoza gozapá

alemamó. Kilinió nene Silia mikasiuka agulizaki ve loló oko noigo ámina netá apí iki alemó. ³ Lá niago, vegená mukí nene lugulizá alitave liki avóikini gotó apáitoka viká viká niago, ⁴ Zosehé eza agulizaki ve napa Tevitini agapilamó minamó nenazo, eza ámináminoko Galilaia mikasiuka Nasalete numutoka minatotí ahuloko Zutaia mikasiuka nene Tevitini gotó apatoka Petelehe numutoka itimó. ⁵ Noitike ániigi milita vená Maliáma izegipa agatupagi alémago vasimó. ⁶ Viki minasike izegipala getati gamena alitokago, venoni vegenalitini akiaká numuni gikí okago, olovó zikasike pulumaká izatini numukú itiki minasike, ⁷ ganá gipala getoake, gotunú asapú omiake pulumaká izatini nosánetá kimiaká lapegú molomikago ako minamó.

Sipsip izaló gizapa vegi ageló vegenaki

⁸ Lá okago, ámina mikasiuka ve lugáa nene holugúnaka gihisiló minake sipsip izáiniló gizapa iki minamó. ⁹ Lá niago Guivahanímini ageló makolímó keitoka utó noigo, Guivahanímini lapanalímó hize sata omikago, kehelele vizimó. ¹⁰ Lá okago, agelómámo láa loko lo kimimó: Gilinahe. Neza gakó lamaná aleko nolumumó nenazo, lekeza lekehelele vizemino. Nenémíni gihiláa nene vegená mukitoka utó o likimiko mulutikú agila guluma inogo ive. ¹¹ Itínasa lukugutó viziti ve Guivahani eza gologí oleketative loko lo mololeketa vema nene Tevitini gotó numutó utó o noive. ¹² Itó anosa makó lo likimitoze, gililo. Izegipa namuni makó nene gotunú asapú iki izatini nosánetá lapegú milimikago akonoize, viki ániigalo. ¹³ Loko lo kemekago, galinali ageló vegená mulusi napa nene okulumakutí limiki kigivéipo minató alesás iki minake Ómasi agepoka lake nama láa liki lamó:

¹⁴ Logoliza vizeko okulumakú Ómasi agepoka litune.

Mikasiuka Ómasímó ániigo amu hili vegenatoka hulu utó ino.

¹⁵ Liki ageló vegenámate liake atiginá iki okulumakú itikago, sipsip izaló gizapa ve keza láa liki ligili hagili amó: Leza Petelehe numutoka vinake Guivahanímó gakó lo limitímíni gihila ániगतune. ¹⁶ Liki liake litá iki viki Maliako Zoseheko kilímí utó iake gipa namunima pulumaká izatini nosánetá lapegú akonoigo ániigamó. ¹⁷ Ániigiake, agelómámo izegipamú lo kimi gakó nene aveté iki li kememó. ¹⁸ Lá ikago, izaló gizapa vetini kegepagutú gacoláa gele vegená keza sigaga li asú amóza, ¹⁹ Maliá nene gakó mukí ale agikagú moloake agata geleva geleva oko minamó. ²⁰ Itó sipsip iza gizapa ve keza atiginá iki vake ageló lo kimitó utó okago ániiga netakumú nene Ómasi agepoka liki agulizá ali otiki minamó.

Izesuni agupeló Ómasímíni anosa militamó

²¹ * Gipa Izesúma utó okago, gamena 8-ía vokago, gipamámíni agupeló nene Ómasímíni anosa militake agulizá Izesú ave liki milamó. Ámina agulizá nene Maliá izegipa agatupagi minonamigo ageló nenémó goi loko lo amitó nene milamó.

Monó zausavegú Izesunima Ómasímíni gipa minative liki anosa militamó

²² * Gipala getakumú agupe ali lamaná itave loko Mosé lo hukoko li netá aliki lilí itái gamena alitokago, Zoseheko Maliako keza gipa Izesuni nene Zelusalega alímiki itesike, Guivahani Ómasímíni gipa minative liki anosa militasimó. ²³ * Lá asimó nene Guivahanímó láa loko lo hutokago mína gakó nene gili alesike lá asimó:

Ganá gipa utó noiko, Guivahanímini gipa minative liki lehizitalo.

²⁴ Itó

Nama luhusihe nama gelehová ahe lositá aliki viki není guguni gizi nimilo loko Guivahanímó lo huta gakó nene gili alesike namagi aliki vasimó.

²⁵ Lá ikasigo, Zelusalega ve makó minamó, agulizá Simeó. Eza nene hee hee loko monolagi ve minake, Isilae vegenáma miluma giliki minakutí gologí oketati vemú ageva oko mínoaká imó. Aí agikagú nene Ómasímíni Sikalahulímó lemeko vaí oko minake, ²⁶ gakó láa loko lo amimó: Geza helemoko hanuva noako Guivahanímó gologí oleketative loko lo mololeketa vema ániiganogo ane. ²⁷ Itó Simeó nene Sikalahulímó alémo vávani okago monó zausavegú itimó. Lá imó nene Maliako Zoseheko keza Ómasímó lo hukoko li gakotó aliki lilí itatave liki gipa Izesunima alímiki itesigo, ²⁸ Simeó nene gipa Izesunima zanava oko geheneike Ómasi agepoka like láa loko limó:

²⁹⁻³⁰ Guivahanínnemaka, imane lugutó viziti vema itínasa nene nogómula gihilatunú ániigokuve.

Gakó lo molonetanimó nene gihila mota zekaze, nenemú geí gelekelé ve neza monokú nelémó molako hulu nivisiko hilitove. ³¹ Geza numutó namató vegenalite ániगतave loko lelémó lamaná iti ve imane alémo utó okane. ³² * Nenémó hetoka

vegenalitiní kígika hize hanatokimikiko monó gilinigave. Itó Isilae vegenalitiní lugulizá ale otínogo ive.

³³ Loko gipa Izesukumú lokago, izolahiko amelahiko gilikasike sigaga lasimó. ³⁴ Lá ikasigo, Simeó eza lusa getake izolahini Malianima láa loko lo amimó: Gelenape. Imane gipaloka Isilae vegená hizi hóu litave loko lonoimóma neve. Ámina gipámini gakotó nene vegená lugáa keza lisiki gululú viziki akatave. Itó lugáa keza lisi gikitiiki otitave. Eza anosavagi noitimó nenazo, ve mukilite alivi letivi itatave. ³⁵ Itó napiliko geza gipakamú miluma geleko gígika hizinogo ive. Nene suni utó noiko, vegená mukilitini kígikagú gakóini utó inogo ive.

³⁶ Loko lokago, Ómasímini agepagutí gakó loaká vená makó minamó, agulizá Haná. Áisi Panueleni mohola Aseloni mulusigutí minatímo veló voko minake kilisimasi 7 ale ahulokago, vana helekago, ³⁷ gevoná vená loló oko minomo noitike kilisimasi 84 ale ahulake gelehosi molamó. Áisi nene monó zagusave ahulamike gamena gamena únaká neteká Ómasi geké lotoko minake, nosáneté moseko minake, Ómasiloka loaká imó. ³⁸ Eza nene ámina gamenaló anitike Ómasi agepoka like, Zelusale numutoka Ómasímo gologí oketati gamenamú ageva iki mina vegená nene gipa Izesukumú aveté oko lo kimimó.

Nasaleta numutoka atiginá iki vamó

³⁹ * Lá okago, Maliako Zoseheko keza Guivahanímo lo huka gakolímíni hozaváa ali asú ikasike, Galilaia mikasiuka keí numutoka Nasaleta neneloka atiginá iki vasimó. ⁴⁰ Neneloka viki niasigo gipa Izesuni nene Ómasímo gizapa otake hize lé omikago, napa ike alévolé oko minake gakó mukí gilimó.

Gipa Izesú monó zagusaveú minamó

⁴¹ * Avóikini asenini zeketakumú gili mina holisi zupa meleketó meleketó nene Maliako Zoseheko keza Zelusalega itiaká asimó. ⁴² Lá iki niasigo, gipa Izesú nene kilisimasi 12 ale ahulokago ámina holisi makó alitokago goí iki aliaká asimó nenémíni gipa Izesuni alímiki Zelusalega makó itemó. ⁴³ Itiki niago, holisima asú noigo nene, keza nene gipa Izesuni nene Zelusalega taiza imikasigo, noigo, Maliako Zoseheko taiza itasikumú gelemasike atiginá iki lemesimó. ⁴⁴ Vegená lugáaloka gímizeko vo noitihe liki gilikasike, gapoloka nivasigo lúmugusi zekago, keí zuhagi itó kígivéike niakú vitagá asimó nene, ⁴⁵ noamigo, Zelusalega atiginá iki itesimó. ⁴⁶ Itiki vitagá iva iva iki niasigo, gamena losive makole oko vokago, Izesú nene monó zavusave napagú noiike monó gakó lainim-ikimiaká vetini holúikú minake gakóini gilike itó mogonamú loká oketoko noigo ángasimó. ⁴⁷ Itó monó ve nenete gipa Izesú gakó gilikumú itó loká atoka ale viligoko lo kimikumú sigaga litamó. ⁴⁸ Lá oko holúikú noigo alímí utó ikasike, ininá goha asike izolahó láa loko lo amimó: Gipáne geza nanamú taiza oletane. Gelenape. Amekahiki leza geikumú mulute ze hóu loko mohona oko vitagá onousive. ⁴⁹ Loko lo amekago, Izesú láa loko lo kimimó: Nanamú vitagá asimó neve. Neza aménehini numukú aleko minozo loko loneta hozamagú nouve. Nene gakó gelemasike nilasihe. ⁵⁰ Loko limóza, keza nenémíni mogaána gili vevesamasimó.

⁵¹ Lá ikasigo, izolahiko amelahiko alímiliki vake Nasaleta numutoka vasigo eza gelekelé oketoko minamó. Itó izolahó nene gili gakó mukí ale agikagú moloko minamó. ⁵² * Noigo, Izesú nene agikagi agupegi napa oko alévolé igo minamó. Lá okago niago, Ómasigi mukí vegenaki Izesukumú keza ángi kumu hiliki minamó.

3

Zoní monó gakó lo kimimó

(Mat 3:1-12; Mak 1:1-8; Zon 1:19-28)

¹ Tipelió eza Loma vegenalitiní kugulizaki ve napa-napa loló oko noigo, kilisimasi 15 oko vokago, Potiasí Pilató eza Zutaia mikasiuka kiapé napa loló oko noigo, itó agunala Pilipó nene Itulaa itó Talakoniti mikasiuka kiapé loló oko noigo, itó Lisaniá nene Apilene mikasiuka kiapé loló oko noigo, ² itó guguni giziaká ve napatini gizapa ve lositá Anasiko Kaiapako niasigo, ve nenémíni gizapa ve lilí iki niago, gamena nene zupa Zakaliani gipala Zoní nene mikasi gomopalaló noigo, Ómasímo hoza gakó lotamó. ³ Lá okago, Zota nagamí vola helega ima helega mohona mohona ike, vegená kígika ali viligiiki monó nagamí hilikiko Ómasímo lihimáini ahuloketative loko lo utó oko lo kemeko minamó. ⁴ * Lá noigo, Ómasímini agepagutí gakó loaká ve Isaiáma epoapo gakó láa loko gizamó nene Zonitoka alévolé imó:

* 2:39: Mat 2:23

* 2:41: Gá 12:1-27; Gapo 16:1-8

* 2:52: 1 Sam 2:26; Ano 3:4

* 3:4: Isa 40:3-5

Mikasi gomopalalo ve makolimo gako napaguti laa loko nolive: Guivahanimini gapova likigikagu vilitalo. Ai gapo ali hee litalo. ⁵ Gimuzal emeneitimó nene apiziki alimi lamaná ilo. Agoka iteneitimoláa alimi lasava zilo. Zová zeneitimoláa alimi pehe lalo. Gapolo mikasi itesú lemesú itimó nene apiziki alimi geleni lilí ilo. ⁶ Lá ikiko, mikasigú vevená mukí keza Ómasimini kugutó vizeaká netá ángiganigave.

⁷ * Lá noigo vevená mukilite Zoní noitoka vake monó nagamikumú likago, eza láa loko lo keme keme oko minoaká imó: Lekeza gosihalimini agapilamó zuha neneta, golesa mogonatinimini lihimala anitino noimó nene lekeza likigika ali viligamikí hanuva golisi itune liki niahe. ⁸ * Lekeza likigika ali viligiiki nenémini gihila ali utó ilo. Neza lo likimitoze, gililo. Avalahani agapilamó zuha keza sonohikitana nene gatamoakalimini lilí itave loko lo molota gako alévolé itive loko lekelisi negopa, Ómasi nenémo gako litove loko nene lokiko gehani imanete Avalahani agapilamó zuha lilí inigi nene hanuva lilí itamó nenazo, lekeza lukugupetini aliki itiki Avalahani agapilamó zuhama nouninazo, Ómasi eza lihimatémú goní oletaminogo ive liki lamilo. ⁹ * Luni leko makó nene za mogonagú gamuni oake noimóma neve. Nenémú gihila lamaná ali utó inamitamoláa nene asahizeko lokú gizanogo ive.

¹⁰ Loko lo kemekago, mukí alegesá iki mina vevenalite loká itake leza nana itune. ¹¹ Liki likago, láa loko lo kimimó: Ve makó nenémo sioti losi aleminokoma agivelahini sioti nomiti ve nene magáa amino. Itó nosáneta nene áminámini ilo. ¹² * Loko lokago, takisi aliaká vete monó nagamí hilanigi aniteke loká itake monó velemaka, leza nana itunimó neve. ¹³ Liki likago, eza láa loko lo kimimó: Takisi moni gamanimo alilo loko molató nene aviligiki alimi itiki alemilo. ¹⁴ Loko lokago, pilisí ve nene ake loká itake leza nene nana itunimó neve liki likago, eza láa loko lo kimimó: Lekeza vevenalite moni limitave liki kipiliki kilími golesa amiki hakupá gako likitamilo. Itó ikató hozalotí moni aliaká niamó nenémú gosele lekepelemino, loko limó.

¹⁵ Vevená mukí keza Ómasimo gologí oketative loko lo moloketa ve atikumú gituhú niki ageva iki minake, Zonikumú nene ámina vema noihe liki kagata losi gelemó. ¹⁶ Lá ikago, Zoní nene vevená mukí láa loko lo kimimó: Neza nene nagamikó hololikimiaká nouve. Není nemegekaloka noa vémini zámuzal nenémo není zámuzal nivilegekave. Neza ánéama nounazo, ai gasa gó ate akisitomó nene etaminogo ive. Ásini nene Ómasimini Sikalahuki likigikámini pipizá netá loko loaká loki hololeketanogo ive. ¹⁷ Eza nene lolopa giteaká netaki aleko oko laisi nene gesopá zeko lolopa giteko ale lamaná inogo ive. Nosáneta lamaná nene gizaká oko ale numunagú molokiko minanogo ive. Lolopaváa nene giteko lokú gizokiko lovalo oko minanogo ive, loko limó.

¹⁸ Zoní eza láa oko vevená kagatala alike ámina gakoki gako lugáagi lo kimike Ómasimini gako lamaná lo kemeko minamó. ¹⁹ * Lá imóza, agulizaki ve Heloté nene uvolahini venala Helotiasini ipá oko aleake netá golesa lugáa alekago, Zoní nenémú gahá amekago, Heloté nenémú gele golesa oake, ²⁰ miní amike netá golesa gohalo alike Zonini nene nagá numukú ahulotamó.

Izesú monó nagamí holamó
(Mat 3:13-17; Mak 1:9-11)

²¹ Zonini nene nagá numukú vevesá ahulotamigo vevená mukí monó nagamí holokimikago, Izesú ámináminoko Zonitoka voko monó nagamí holamó. Holoake, Ómasiloka noligo, okulumá koló okago, ²² * Ómasimini Sikalahú nene nama luhusi agupegi loló oake Izesuni amupiló lemeko minamó. Noigo, okulumakutí gako makó láa loko utó imó: Gipáne gihila noane. Geí ángigo lamaná okuve, loko limó.

Izesuni avolage
(Mat 1:1-17)

²³ Izesú nene kilisimasiva 30 nenéminoko oko novigo monó hoza apí oko alimó. Naligo, vevená nenete Zosehene gipala nehe liki gelemó. Zosehé nene Helini gipala, ²⁴ eza nene Matatani gipala, eza nene Livaini gipala, eza nene Melikini gipala, eza nene Zanaini gipala, eza nene Zosehene gipala, ²⁵ eza nene Matatiani gipala, eza nene Amosini gipala, eza nene Nahumini gipala, eza nene Eselini gipala, eza nene Nagaini gipala, ²⁶ eza nene Malatani gipala, eza nene Matatiani gipala, eza nene Semeinini gipala, eza nene Zosekeni gipala, eza nene Zotani gipala, ²⁷ eza nene Zoanani gipala, eza nene Lesani gipala, eza nene Zelupapeleni gipala, eza nene Sealitileni gipala, eza nene Nelini gipala, ²⁸ eza nene

* 3:7: Mat 12:34; 23:33 * 3:8: Zon 8:33 * 3:9: Mat 7:19 * 3:12: Luk 7:29 * 3:19: Mat 14:3-4; Mak 6:17-18
* 3:22: Age 2:7; Mat 17:5; Luk 9:35

Melikini gipala, eza nene Atini gipala, eza nene Kosamini gipala, eza nene Alimatamani gipala, eza nene Eleni gipala, ²⁹ eza nene Zosuani gipala, eza nene Eliezeleni gipala, eza nene Zolimini gipala, eza nene Matatani gipala, eza nene Livaini gipala, ³⁰ eza nene Simeoni gipala, eza nene Zutani gipala, eza nene Zoseheni gipala, eza nene Zonamani gipala, eza nene Eliakímini gipala, ³¹ eza nene Meleani gipala, eza nene Menani gipala, eza nene Matatani gipala, eza nene Natanani gipala, eza nene agulizaki ve napa Tevitini gipala, ³² eza nene Zesini gipala, eza nene Opeteni gipala, eza nene Poasini gipala, eza nene Salani gipala, eza nene Nasonani gipala, ³³ eza nene Aminatapani gipala, eza nene Ataminoni gipala, eza nene Alanini gipala, eza nene Hezelonani gipala, eza nene Pelezeni gipala, eza nene Zutani gipala, ³⁴ eza nene Zakoponi gipala, eza nene Isakani gipala, eza nene Avalahani gipala, eza nene Telani gipala, eza nene Naholeni gipala, ³⁵ eza nene Seluguni gipala, eza nene Lagauni gipala, eza nene Pelegeni gipala, eza nene Epeleni gipala, eza nene Selani gipala, ³⁶ eza nene Kenani gipala, eza nene Alapasatani gipala, eza nene Semeni gipala, eza nene Noani gipala, eza nene Lamekeni gipala, ³⁷ eza nene Metusalani gipala, eza nene Enokuni gipala, eza nene Zaleteni gipala, eza nene Mahalaleni gipala, eza nene Kenani gipala, ³⁸ eza nene Enosini gipala, eza nene Seteni gipala, eza nene Atani gipala, Atá nene Ómasilokatí.

4

Satá Izesuni gimivagú molamó

(Mat 4:1-11; Mak 1:12-13)

¹ Izesú nene Ómasímini Sikalahulímo agikagú leme vaí oake alémo zaú okago, Zota nagamí ahuloake mikasi gomopalaló vimó. ² Neneloka gamena ve lositosini kigisa kigizani asú igo akoko noike, nosáneta namike alika gaúna heleko minamó. Lá noigo, Satá nene oko gimivagú molake ³ láa loko lo amimó: Geza Ómasímini gipala noitanimó nene, geza lokago gehani imanémo nosáneta loló okiko noko minamane. ^{4*} Loko lokago, Izesú láa loko lo amimó: Óe, monó gotolaú luhuva láa liki gizinamóma neve:

Vegená neneta nosánetakó nokoko lamaná oko mínoakaláa nene nomive.

⁵ Loko lokago, Satá agoka hána makokú alémoko itike numutó namató kugulizaki ve mukilitini apáini litá oko alapize asú oake, ⁶ láa loko lo amimó: Amuza miliki niago kugulizá novi netaki mikasigú netá lamanaláa nenegi imane geikó game asú itove. Ámina netá nene není nigizakú molo asú onoinazo, makope makope amitove loko hanuva amitomóma neve.

⁷ Nenemú geza není nigisauka gupá zeko negepoka lokako geikó loló o asú itive. ^{8*} Loko lokago, Izesú láa loko lo amimó: Óe, gakó makó monó gotolaú láa liki gizinamóma neve:

Guivahani Ómasigó lalapusa hizeko gupá ze ameko agepoka loakaláa neve, itó aikó gelekelé omiakaláa neve.

⁹ Loko lokago Satá nene Izesuni alémoko Zelusalega vike monó zavusave napámini agoka hánaló alémoko itike láa loko lo amimó: Geza Ómasímini gipala noitanimó nene, imanelotí olío ká omanegú molozo. ^{10*} Gakó makó monó gotolaú láa liki luhuva gizinamóma neve:

Geikumú Ómasímo aí ageló nene hoza gakó lo kemekíko gizapa iki gilími vatí inigave.

^{11*} Itó makó láa loko neve:

Gehanímó gígisagú hizekative liki keza limiki kigizani lukilagú gilími milanigave.

Liki luhuva gizinamóma nenazo, golesa aminogo ane. Loko lokago, Izesú láa loko lo amimó:

^{12*} Óe, monokú gakó makó láa loko neve:

Guivahani Ómasí nene gopa netakumú gimivagú molamitane.

¹³ Loko lokago Satá nene lá oká lá oká ike agoka vize asú oake, ahuloko gamena makó zupave loake ahulomiake vimó.

Izesú Galílaia mikasiuka monó hoza apí oko alimó

(Mat 4:12-17; Mak 1:14-15)

¹⁴ Izesú nene Sikalahulímo hize lé otake zámuza amekago, Galílaia mikasiuka atiginá oko vimó. Atiginá oko okago, aí gakoláa helega helega vo asú igo gelemó. ¹⁵ Neneloka monó numuni minakú minakú nene iteko lemeko oko monó lo kemekago, vegená mukilite laga kivisekago geké litamó.

Nasalete numutoka Izesuni ániagi ahulamó

(Mat 13:53-58; Mak 6:1-6)

* 4:4: Gapo 8:3 * 4:8: Gapo 6:13 * 4:10: Age 91:11 * 4:11: Age 91:12 * 4:12: Gapo 6:16

¹⁶ Lá ikago, Izesú ezáa napa i apá Nasaleta numutoka nene áminámini oko vo anitike, holisi alitokago, monó numukú itimó. Eza holisi mina zupa zupa ámináminoko iteaká imó. Iteko monó gatoko lo kiminogo noitigo, ¹⁷ Ómasímini agepagutí gakó loaká ve Isaiá giza pepama amikago, ataloko ángoake gakó makó láa loko minamó nene ale utó ike gato kimimó:

¹⁸* Guivahanímini Sikalahulímo nenitoka holonetake, hoza gakó láa loko lonetamáma neve. Minimi limiki nia vejená nene gakó lamanáma lo kemezo. Kalapusi numukú nia vejená gologí oleketatove loko, itó kogómula lika vejená nene ale goloutoleketatove loko, itó muhelé ahelé iki minata vejená nene gologí oleketoko lekelémo molatove loko lo kemezo. ¹⁹ Guivahanímo lekelémo lamaná iti gamena alitokave loko lo kemezo.

²⁰ Loko Izesú nene gatoko lo kemeake, pepama gakeko gelekélé vema goha ameake mitó minamó. Noigo, monó numukú mina vejená keza mukitoka aí gonú apiliki niago, ²¹ gakó láa loko lo kimimó: Monó gotola gakó gatokugo gelemómámini gihila ítínasa nenitoka utó okave. ²² Loko lokago, keza giní i amiake, aí agepagutí gakó gilikago laga kivisimó. Lá okago, keza sigaga lake lamó: Eza nene hanuva ángonouhá ve Zoseheni gipala nenazo, nenémini gakó nana oake nolive. ²³ Liki likago, eza láa loko lo kimimó: Anozá gakó makó láa liki liaká niave: Lusa ve gezaka haitó vejená kelémo vatí ani netá aleko gezaka vejenaka zuha kelémo lamaná amane. Neza nagata gulumó lekeza ámina anozá gakó vasá zeke li nimiiki, Kapanao numutoka hoza aleko gakoláa gulunimómáminoko imane gotó numukaloka alekako ángatune liki li nimitaze. ²⁴* Loko loake, miní ameko láa loko limó: Neza lamaná lo likimitoze, gililo. Ómasímini agepagutí gakó loaká vémo ezáa gotó apalaloka voko monó lo kemekago eza lelí gipate noive liki gakola gilisá amave. ²⁵* Nene sunimú gakó lamaná lo likimitove. Ilaizá eza monó hoza ali gamena nene okulumá gapo lí okago minake melekeni losive makolegi ikani 6-ía oko novigo golini zemimó. Golini zemigo gaúna gamena napa nene mukí apatoka utó imó. Ámina gamenaló nene Isilae mikasiuka gevoná vená mukí minamóza, ²⁶* Ómasímo Ilaizani nene ámina vená keitoka kelémo vatí itive loko amiselemive. Sitona mikasiuka Salepata apatoka Zuta vená negopa hetoka gevoná vená makó noitoka alémo vatí itive loko amisilimó. ²⁷* Itó Ómasímini agepagutí gakó loaká ve Elisá hoza ali gamena nene Isilae mikasiuka halamé gizale ve mukí minamóza, Elisá keikutí kelémo zokamike Silia mikasiuka hetoka ve makó Nemanigó alémo zokamó. ²⁸ Loko lo kemekago, ámina gakó giliake, Ómasímo lezagi ahuloletati gakó lokave liki giliake monó numukú mina vejená keza mulúikú golesa giliake, kizapaló goha molokago, ²⁹ zaú iki otiake núsaseloka Izesú alímiki vake ámina apá mina agoka lusenaló agataloka ahelú i ahulanigi alímiki iteha, ³⁰ áisi nene ahulokimiake holúikutí hanuva vimó.

*Holosi golesa agikagú mina ve
(Mak 1:21-28)*

³¹ Lá oake Izesú nene Galilaia mikasiuka lemeake, Kapanao numutoka anitike holisigú holisigú nene monó lo kemeko minamó. ³²* Lá noigo, monó gakola gale geheko lo kemeaká imó nenazo, nenemú keza ininá iki sigaga litamó. ³³ Lá niago, keí monó numukú nene ve makó minamó nene holosi makolímó agikagú minake alémo gopa okago minamó nenémo gamoga geko láa loko limó: ³⁴ Eé, Nasaleta ve Izesuvo, nana netá golesa aleletanogo noane. Lelémo golesa inogo noape. Geí nene ángo hehe noluve. Geza Ómasilokatí etó keké vizeko noani vema noane. ³⁵ Loko lokago, Izesú gahá amike gegépa apizeoko legesó okó agikagutí lemeko vamane. Loko lokago, holosi nenémo vejená holúikú ámina vema nene ahelú okago puu loko akamóza, alémo golesa amike ahulomiake vimó. ³⁶ Lá okago keza vejená mukitoka ininá ake ligili hagili ake láa liki lamó: Nana ive. Monola nene haitolímíni neve. Áisi gakola gale geheko aí amuzatunú lokimiaká noigo holosi golesate ahulikimiaká niave. ³⁷ Liki likago, Izesunimú gakó nene ámina apá helega helega puu loko vo asú imó.

*Izesú Pitani venalámíni izolahíni alémo zokamó
(Mat 8:14-15; Mak 1:29-31)*

³⁸ Lá okago, Izesú nene monó numukutíma lemeake Saimoni numukú itimó. Neneló Saimoni venalámíni izolahíni agupegú ló napa lo minokago, alémo zokative liki li amemó. ³⁹ Li amikago, áisi voko alító otenei ke agupegú ló la netáma nene gahá amekago agupegú ló la netáma asú otamó. Asú omikago, ámina venalímó litá oko oteake Izesugini nasahili oketamó.

* 4:18: Isa 61:1-2 * 4:24: Zon 4:44 * 4:25: 1 Kug 17:1 * 4:26: 1 Kug 17:8-16 * 4:27: 2 Kug 5:1-14
* 4:32: Mat 7:28-29

Izesú únaká veđená mukí kelémo zokamó
(Mat 8:16-17; Mak 1:32-34)

⁴⁰ Únaká ho nolimigo, haitopaitó netá kivisi veđená kilímiki Izesú noitoka ikago, agizani-tunú kugupeló ale geleko kelémo zokamó. ⁴¹ Itó veđenalitini kígikagú holosi golesa minamó nene kepeleko nokimisiligo, gopaga lake geza Ómasímimi gipala noane. Liake ahulikimiake vamó. Nivago, keza Izesukumú Ómasímo gologí oletative loko lo mololeta vema noive liki geleomé nenazo, Izesú nene gahá nokimike ai mogona lilí ali amitave loko lo hukoketamó.

Izesú monó lo keme keme oko mohona oko vimó
(Mak 1:35-39)

⁴² Neteká ho noitigo, Izesú eza numuni apakutí lemeake voko mikasi amegesa vizitoka minoko numuna linogo voko minamó. Noigo, veđená keza aikumú vitagá iki iki alími utó iake, ahuloketamitive liki lamóza, ⁴³ eza láa loko lo kimike limó: Neza nene apá lugaloka mohona oko Ómasímimi gasovaló minoakalímimi gakó lamaná lo keme keme inogo uve. Ámina hoza alitane loko Ómasímo nimiseleneimóma neve. ⁴⁴ Loko loake, vike Zutaia mikasiuka monó numuni minakú minakú iteko monó lo keme keme oko mohona imó.

5

Izesú litó lagaha mukí alemó
(Mat 4:18-22; Mak 1:16-20)

¹ * Gamena makó zupa Izesú eza Genesalete nonohuló agataloka noigo, veđená keza Ómasímimi gakó gilitune liki ali nupa iake aitoka sii sii liki minikago, ² lagaha aliaká ve makó nene nagamikú lapéinigití limiake, lagaha gotahánima nagamí nizego, itó sipi lositá nene nagamikú ha nego, ³ Izesú nene ángoake magáa Saimoni nagamikú lape minakú iteake, nagamí getatokatí hilulú oloko koma vitane loko loká imó. Gele amekago sipigú minake mukí ali nupa a veđenáma monó lo kimimó. ⁴ Lo keme asú oake Saimoni láa loko lo amimó: Hilulú oloko voko nagamí ohunágú molo-minoko nene gígivekagegi lagaha alinígí niaze, gotahalini nene ohunágú ahulalo. ⁵ * Loko lokago, Saimon Pitá nene anotó aleko láa loko lo amimó: Gizapa velemaka, leza itína holugúnaka gotaha ova ova oko minuháza, lagaha hamolagi ma alemune. Lá unimóza, geza lanimómave loko nene lagaha gotaha nene goha nagamí ohukú ahulatune. ⁶ Loko lo ameake, aliki viki gotahama ahulake lagaha mukí nalego, lagaha gotaháni nene zeko hukanogo noigo, ⁷ kígive lugáa sipi makokú minamoláama iki kilími vatí itave liki kígizani gumí zi kimiki sele lamó. Lá ikago, keza ake sipi lositámagú lagaha ali nimilago, lagaha vaí oake nagamikú lapema nene nagamikú liminogo imó. ⁸⁻⁹ Lá noigo, Saimon Pitáki makó mina veđenáki keza lagaha mukí alekumú ángiake sigaga lamó nenazo, Pitá eza Izesuni agisauka gupá zeko lo amike Guivahanínemaka, neza lihimánegi ve nounazo, ahulonimioko vozo. ¹⁰ Loko noligo Zepetaioní gipala losi Zemusiko Zoniko keza Saimoni agivelahiko nenetosa ámináminiki sigaga lasimó. Sigaga nilasigo, Izesú nene Saimoni láa loko lo amimó: Geza gehelele vizemino. Itína imanémimi veletó nene geza monó hoza aleloko novako mukí veđená nene není zuha lilí itave. ¹¹ Loko lokago, nagamikutí lapéinima aliliki getatoka vake nene, mukí netá matáini ahuliake Izesuni ámegetiki vamó.

Izesú lokago halamé gizali ve gililimó
(Mat 8:1-4; Mak 1:40-45)

¹² Izesú nene apá napa makotoka voko noigo, halamé agupeló vaí oko gizali ve makó noike, Izesuni ángoake vike agisauka gupá ze ameake negénegeka like láa loko limó: Guivahanínemaka geza nene nelémo gillitove loko nene hanuva nelémo gililitanimó nenazo, nelémo gililitane loko noluve. ¹³ Loko lokago, Izesú nene agizani lutoko agupeló ale nogilike gililitane loko gelekuze, gilelezo. Loko lokago, litá oko gililimó. ¹⁴ * Lá okago, ámina gakó nene avetó oko veđená avetó oko lo kememitive loko lo hukomiake láa loko limó: Aló gilelekane liki gili hee litave loko geza nene voko guguni gizoaká vémitokama gugupe alapizekako ángitave. Itó gilelenikumú nene Mosé loleketa netá aleko Ómasi guguni gizo amitive loko amekako eza veđená mukí lo kemekiko nenémimi mogona gili vevesatave. ¹⁵ Loko limóza, aí gokoláa nene puu loko vokago, mukí veđená gili asú iake Izesuni gakó gilitune liki itó kivisi netakutí kelémo zokative liki Izesú noitoka alegesá iaká amóza, ¹⁶ eza mikasi gomopalaló voko minake Ómasiloka linogo voaká imó.

Izesú ve gepili alémo zokamó
(Mat 9:1-18; Mak 2:1-12)

* 5:1: Mat 13:1-2; Mak 3:9-10; 4:1 * 5:5: Zon 21:3-8 * 5:14: Liv 14:1-32

¹⁷ Gamena makó zupa Izesú eza monó gakó lainim-oketoko noigo Palisaio monó ve-genaki monó mogona apí ikimiaká vegi keza Galilaia apatotí itó Zelusalegati itó Zutaia apá makotokatí nene mukí numutotí iki neneló ali nupa amó. Lá niago Izesú nene kivisi ve-gená kelémo zokatí zámuzagi minató minamó. ¹⁸ Lá noigo ukoakoló zaló mililiki a ve gepili makó nene alímiki iake Izesuni agisauka ahulitanigi niago, ¹⁹ ve-gená mukí giki iake gapo hizi lí ikago, alímiki numupitó itiake ali koló iake, ukoakogi nagá ziake ahulikago ve-genalitini holúikú limike Izesuni avogisaloka lemekago, ²⁰ Izesú nene ániagoake gili alévolé amó nenémini mogonáa ániagoke geleake, ve gepilima láa loko lo amimó: Vémage, lihimaka ahulogimikuve. ²¹ Loko lokago monó mogona apí-ikimiaká vegi Palisaio monó vegi keza kagata gululusi giliake kezáitoka láa liki ligili hagili amó: Makó éaho lihima gilatoaká noive. Ómasímo hamokó lá oaká noinazo, ezáa agupevamú giligo itekago, Ómasi aviliginogo limó nene etamive. ²² Liki kigikatunú nigelego, Izesú nene Zuta ve-genalite lihimate ahulolimiaká itó ve-gená kelémo zokoaká nene Ómasímogó loló oaká netá neve liki gilinave loko geleake láa loko lo kimimó: Lekeza likigikauka nanamú láa liki nigeleve. ²³ Ve makolímó Ómasi noamitimó nene lihimaka gilatogimikuve loko vávani oko lamitimóza, kelémo zokoaká zámuzagi ve noamitimó nene gakó lokiko gihila zemitihe loko ve gepili makó nene oteoko vozo loko litá oko lo ameminogo ive. ²⁴ Lá onoimóza, okulumakutí lumu ve gihila neza mikasigú lihimá gilatoaká zámuzagó negopa, lihimatini ale ahulolikimiaká zámuzaga nenitoka neve. Loko loake nenémini mogonáa gili hee hee litave loko ve gepilima lo amike nene láa loko noigetuve: Otekoko ukoakoka geheko numukaloka vozo. ²⁵ Loko lokago, mukí ve-genalitini kogómulaló nene litá oko oteake ukoakova ale geheko numunaloka vike Ómasímini agulizá ale oteko minamó. ²⁶ Lá noigo, ve-gená mukilite sigaga liake Ómasi agepoka lake mulúini otopá nozigo itínasa haitolímuni suni ániogokune, liki lamó.

Izesú Livaini sele lo amimó

(Mat 9:9-13; Mak 2:13-17)

²⁷ Alika Izesú lemeake noive takisi aleaká ve makó agulizá Livai áisi nene hoza aleaká numunauka noigo ániagoake geza nene némegetoko ano. ²⁸ Loko sele lo amekago Livai nene netá mukí ahuloake ámegetoko vimó.

²⁹ Makó vasike Livaini numukú nosáneta napa Izesuni vatá omikago, takisi aliaká vegi ve makoki keza mukitó namó. ³⁰ * Ninago, Palisaio monó vegi monó mogona apí-ikimiaká vegi keza Izesuni izegipala zuhamú gili golesa niake láa liki li kememó: Lekeza nene takisi aliaká vegi netá golesa aliaká ve-gená makoki nanamú makó miniki nosáneta ninave. ³¹ Liki likago, Izesú geleake láa loko lo kimimó: Hanuva lamaná iki mína ve-genalite lusa vemú sele lisá amave. Kivisi ve-genalitegó lusa vemú sele liaká niave. ³² Neza hee loko noune liki liaká nia ve-gená kelémo otopá zitove loko lememumóma neve. Neza lihimáinigi ve-gená kigika ali viligatave loko kelémo otopá zinogo lumumóma nene, loko limó.

Nosáneta mosiakakumú loká itamó

(Mat 9:14-17; Mak 2:18-22)

³³ Lá okago, keza láa liki li amemó: Zonini izegipala zuha keza gamena mukí monokumule liki nosáneta mosé mosé iki Ómasiloka liaká niave. Itó Palisaio monó vetini izegipáini zuha keza ámina suni aliaká niamóza, gei izegipaka zuha keza nosáneta gopa aliki niaká niamó nene nanamú niave. ³⁴ Liki likago, Izesú anoza gakó láa loko lo kimimó: Vená ali amita ve ezagi agivelagegi apiziki niminiko ve makolímó nosáneta moseketatimó nehe. Lá aminogo ive. ³⁵ Gala vete vená ali amita vema kigizakutí ipá ita gamena alitokiko, nene zupa miluma nigiliki nosáneta mosinigave. Ámináminiki izegipáne zuhate alika nenikumú miluma giliki mosé mosé inigave. Itína lá oko nomive.

³⁶ Loko loake, miní ameko anoza gakó makó láa loko lo kimimó: Lavolavo gó nene litaha looko hukokiko nene, gosohá gó makó hukiiki litaha gotó molo apizeko akotoakaláa nomive. Nagamí zikiko giki okiko lavolavo gó gosohá hukokiko gosohá lavolavo gó nenémo litaha lavolavo gotó haitolímínoko minanogo ive. ³⁷ Itó vain nagamí nene gituhú galakalá noigo nene nagamí getununi lithagú ligi milisá amave. Vain nagamí nenémo gituhú galakalá nooko giputooko litaha getununi zeko ategekiko vain nagamiki nagamí getununi gí latila okatinazo, ³⁸ vain nagamí gituhú galakalá noimó nene goní getununi gosohakukó leke moloaká noune. ³⁹ Itó ve makolímóhe makolímóhe vain nagamí lithagó noaká noike, áminamú laga avisekago gosohá vain nagamí natove loko gelesá amive. Litaha vain nagamí nene vatí oko neve loko loaká noive. Loko limó nene litaha monó sunímuni amupiló nene ezáa gosohá monó molo apizesá nene etamive loko anoza gakó limó.

* 5:30: Luk 15:1-2

6

Holisigú Izesuni vegenala zuhate kilé hisiki nimi vamó
(Mat 12:1-8; Mak 2:23-28)

¹ * Holisi gamena makókú nene Izesú eza izegipala zuhagi kilé mikú mihina niake, izegipala zuhate kiléma akutiake gihiláa kigizanitunú hisiki nimi vamó. ² Lá niago, Palisaio monó ve lugáate ániagiake gili golesa ake láa liki lamó: Holisi gamenagúma nenazo, hoza nalemó nene netá golesa lilí niave. Lá amoakalímíni nene nanamú naleve. ³ * Liki likago, Ómasímo vegenala zuhate netakumú vitagá niko ezáa lo huka gakó nene hanuva molo gaheva itimó neve liki gilitave loko Izesú láa loko lo kimike limó: Gozapá agulizaki ve napa Tevitige vegenala zuhagi nosánetakumú gaúna hiliake netá makó alemó nene lekeza gakó gatinamóza, mogona gelemiki nilahe. ⁴ * Tevití eza Ómasímíni monó numukú itekago guguní gizoaká ve napámo Ómasímíni avogísaló mila peletima ameko ezagi makó mina vegená kimigo namóma neve. Ámina peleti nene hanuva vegenalite namitave liki guguní giziaká vetegó natave liki alévolé iki li hutinamóza ámina gamena nene hanuva vegenalite gopa namó neve. ⁵ Loko loake, Izesú miní ameko láa loko lo kimimó: Okulumakutí lumu ve gihila neza holisi amelahina nounazo, izegipáne zuhate holisi gamenagú lilí ita netá nene není netale, loko limó.

Agizani nakeseta ve alémo lamaná imó
(Mat 12:9-14; Mak 3:1-6)

⁶ Holisi makókú Izesú nene monó numukú iteko monó lainim-oketoko noigo, agizani zamagaloka nakeseta ve makó minamó. ⁷ Noigo, monó mogona apí-ikimiaká vegi Palisaio monó vegi keza ámina vema alémo lamaná okikoma imane holisimagú nenazo, goní otatunize liake, gizapa iki minamó. ⁸ Lá iki kagata gelemoláa nene Izesú ániagoake, agizani nakeseta vema otekoko holutegú ote mínozo loko lo amekago, eza oteake áminaló ote minamó. ⁹ Lá oko oteneigo, Izesú láa loko lo kimimó: Netá makokumú loká oleketatoze. Holisigú nene netá lamaná alesatímó etatihe netá golesa alesatímó etative. Vegená kelémo lamaná osatímó nehe kepele helesatímó nene neve. ¹⁰ Loko loake, vegená mukí gonú nokipilike agizani nakeseta ve nene gigizani lutozo loko lo amekago, agizani lutokago, goha lamaná imó. ¹¹ Lá imóza, monó mogona apí-ikimiaká vegi Palisaio monó vegi keza kizapaló molokago Izesuni nana otatune liki ligili hagili amó.

Izesú izegipala 12 kelémo molamó
(Mat 10:1-4; Mak 3:13-19)

¹² Gamena nene zupa Izesú nene Ómasiloka linogo agokáú itimó. Itike Ómasiloka loko minova minova noigo gó lamó. ¹³ Gó lokago, ho noitigo, izegipala zuhama sele lo kemekago, ikago, keikutí ve 12 kelémo etó oake, kugulizá nene aposolo veve loko molamó. ¹⁴ Keza lá iki minamó: Kugulizá Saimon agulizá gosohá Pitá ave loko molamó, itó agunala Etulú, itó Zemusi, Zoní, Pilipó, Patolomaíó, ¹⁵ Mataió, Tomasi, Alapaioní gipala Zemusi, itó Saimoná eza Loma gamani amisele ahulanogo i ve, itó Zemusi makolímíni gipala Zutá, ¹⁶ itó Kალიotó numutotí ve Zutá eza mínomo noitike Izesuni amimika li ve neve.

Izesú vegená mukí nasahilí oketamó
(Mat 4:23-25)

¹⁷ Izesú nene izegipala zuhagi limiake apá geleni makotó neneló viki niago, aí vegenala zuha makoki ve vená mukí Zelusalegatí itó Zutaia apá makotokatí itó age nagamí gahevaloka nene Tulo itó Sitona apatotí keza Izesuni gakó gilitune liki itó kivisi vegená kelémo zokative liki neneló alesesá iki minamó. ¹⁸ Niago, holosi golesa kigikagú mina vegená nene kelémo lamaná imó. ¹⁹ Itó Izesuni agupeló ali gilikago ai agupegutí zámuza nenémo netá kivisi vegenáma kelémo zoko asú imó nenazo, alesesá iki mina vegená mukilite ligizani lutoko agupeló ale gilitunitimo lelémo zokative liki gelemó.

Okulumakú mututoni itó meikú mututoni nenémini gakola
(Mat 5:1-12)

²⁰ Lá ikago, Izesú nene izegipala zuhama gonukonú kepeleake láa loko limó: Lekeza gohogó vegená neneta, Ómasímíni lapaná ali lá itamó nenazo, lokogoliza nivizemó geleká noive.

²¹ Lekeza netá lamanakumú likivisigo mina vegená neneta, netá lamanalímó likigikagú vai itimó nenazo, lokogoliza nivizemó geleká noive. Lekeza ive nama iki nimina vegená neneta, lekeza giza zohí itamó nenazo, lokogoliza nivizemó geleká noive.

²² * Okulumakutí lumu ve gihila nenikumule liki vegená makolite mukahá likipiliiki

visililikimiiki lekelikumú alivi letivi iiki vegená golesave liki lukugulizatini ali ahulatamó nene, lokogoliza vizitave lokogó gelenouve. ²³ * Lá nilikitikoma likigisa ziki miniki lokogoliza viziki gozapá avóike keza Ómasímini agepagutí gako liaká a ve ámina iki líl' íkimikago Ómasímo meinava napa kimimó nenazo, okulumakú meinavatini sipisi netimó neve liki gililo.

²⁴ Lekeza henotiki vegená neneta, lekeza ehe tináneve. Lokogoliza viziki iki miliki amó mota asú okave.

²⁵ Lekeza niki lakagatupa iki nia vegenalita, ehe tináneve. Alike gaúna hilinigave. Lekeza giza zohí iki nia vegená neneta, ehe tináneve. Alike lekeza miluma giliki ive inigave.

²⁶ Lekeza vegená mukilite lukugulizá ali otiaká niamó neneta, ehe tináneve. Avóike ámináminiki soza monó líli ali vetini kugulizá ali otiaká amóma nemóza, Ómasímo ámináminoko keikumú giligo itemimóma neve.

Gala velini likigika kimilo

(Mat 5:38-48)

²⁷ Lá onoi móza, neni gako nigele vegenáise gako lo likimitoze, gililo. Lekeza gala velini nene likigika kimiiki nasahilí ikitalo. Vaika likamita vegená nene kilími lamaná ilo. ²⁸ Lekelikumú alivi letivi nia vegená nene nónohá zikitalo. Gopoguni mililikitata vegenakumú numuna lilo. ²⁹ Ve makolímó agizanitunú nene gagamipaló helegaloka zekikoma, helegaloka gipilitive loko velelepá ze amezo. Ve makolímó geí hepé goka ipá oko aleko novikoma, geí sioti aleko amanapa amo. Nenegi aleko vitize. ³⁰ Itó ve makolímó geí netakumú voká litimó nene hanuva amezo. Itó ve makolímó geí netá aleko vitove lokikoma hanuva amekako aleko vokiko goha ale nimitive loko voká lamo. ³¹ * Lekeza vegená makolite némini manámini suni líl' ílitatave liki giliaká nia netá nene líl' íkitalo.

³² Vegená golesate kigika limiaká nia vegená nene ligika kimitune liki liaká nianazo, ámináminiki kigika likimiaká nia vegenakó likigika kimitamó nene, Ómasímo lekegepoka lamitive. Vegená golesate kezagi ámináminiki kigika limiaká nia vegená nene ligika kimitune liki liaká niave. ³³ Lekeza netá lamaná líl' ílikimiaká nia vegenakó nene pekimi iki netá lamaná líl' íkitatamó nene, Ómasímo lekegepoka lamitive. Vegená golesate kezagi ámina suni aliaká niave. ³⁴ Lekeza vegená makolite netá makó limitave liki giliiki netá makó kimitamó nene Ómasímo lekegepoka lamitive. Vegená golesate alike keza ámináminiki limitave liki ve golesa makó nene moni kimiaká niave. ³⁵ Lá niamóza, lekelisi gala velini likigika kimiiki netá lamaná líl' íkitiki goha limitave liki gelemiki hagítana kimilo. Lá ikiko, alike nene meinavatini napa iteko neiko, lekeza okulumakuka Ómasímini izegipa lamaná minatave. Ómasi eza agepoka lama vegenaki vegená golesagi hanuva muluna moloketake lehizekimiaká noive. ³⁶ Lekeza lá iki ametipo miluma gelelikimiaká noimómámini iki vegenakumú miluma gilikitalo.

Numuni lapusámini anoza gakola

(Mat 7:1-5)

³⁷ Lekeza nene vegenalitini mogonataganamú lotuva legemilo. Lá niko Ómasímo lekelí mogonataganamú lotuva legeminogo ive. Lekeza vegenalitini lihiamamú gako li hukikitamilo. Lá niko Ómasímo lekelí lihiamamú gako lo hukoleketaminogo ive. Lekeza vegenalitini lihima ahulikitatamó nene, Ómasímo ámina oko lihimatini ahuloleketanogo ive. ³⁸ Lekeza vegenalitimoka iki miliki ita polosava nene Ómasímo ámináminoko lekelitimoka oko moloko inogo ive. Ómasímo lamaná oko likigikagú lehizelikimioko mí zeko hilulú oko nogúeko goha gúitimó nene velemó zesá oko minanogo ive. Lekeza gona miliki kimiaká niamómámini avotigila oko Ómasímo ámináminoko gona moloko likiminogo ive.

³⁹ * Loko loake, miní ameko netá golesáinimú anoza gako láa loko lo kimimó: Agómula lilikupá mola ve makolímó agómula mola ve makó nene gapo alapizitihe. Óe, lá oko nomive. Ve lilikupá losi nenetosa eza agizató aliko eza agizató aliko vitáimó nene lositáma galegú hilanigasive. ⁴⁰ * Itó sukulu izegipa makolímó litá oko tisala avilegemitive. Alike sukulu loloko voko gele asú okoko tisala nenéminoko minanogo ive. ⁴¹ Geza gigivekahini agómulagú gilisá onoi ve loko lanimóza, gezaka gogómulagú za lana vonoimó nene nanamú áni go lamaná amoko lane. ⁴² Gezaka gogómulagú za lana vonoimó ha nego áni gamanimó nenazo, géisi nene nigivénéga, gogómulagú gilisá vonoimó nene ale ahulogetatove loko nanamú nolane. Geza sozaló ve genezaka losi minamó neneka, gezaka gogómulagú za lana

* 6:23: 2 Iki 36:16; Apo 7:52

* 6:31: Mat 7:12

* 6:39: Mat 15:14

* 6:40: Mat 10:24-25; Zon 13:16

nemó nene goí oko ale ahulooko gogómulatunú ángo vevesooko alika nene giguekahini agómulagú gilísá onóimó nene ale ahulotatanímó nene etanogo ive.

*Gihila golesa lamaná zeaká nenémini mogona
(Mat 7:17-20; 12:33-35)*

⁴³ Itó za lamaná makolímó gihila golesa zeminogo ive. Itó za golesa makolímó gihila lamaná zeminogo ive. ⁴⁴ Za gihilámó ámina zámini lamaná imoláahe golesa imoláahe ale utó oaká noive. Hilipa nenémo gizasi apelekiko hukiki natahe. Itó gumené nenémo loisi apelekiko akutiki natahe. Lá oko nomíve. ⁴⁵ Ámináminoko ve lamanalítini kigikagú netá lamaná minatímó nenazo, kigikagutí vatí sunigó itítimó neve. Ámináminigó oko ve golesatini kigikagutí nene golesa sunigó itítimó neve. Ligikagú vaí o minakutí legepagutí loaká nouné.

*Numuni lukesavámini anoza gakola
(Mat 7:24-27)*

⁴⁶ Lekeza nenikumú Guivahaniteve Guivahaniteve liaká niamó neneta není gakó nene nanamú ámegetísá amave. ⁴⁷ Nenitoka iake není gakó gili aliaká nia veenalítini mogonamú lo likimitoze. ⁴⁸ Ve makolímó numuni ginogo gale hána legeake gehani amupíló lapusa hízeake, numuni gekago, golini zike nagamí napa veleko una napa nenémo ake numunima ahelú imóza, numuni nene geható ginazo, mómoká amike alévolé oko minamó. ⁴⁹ Nenéminiki niamóza, ve makolite není gakó giliakaláa giliake není gakó gili alísá amave. Keza nenéminiki niave. Ve makolímó numuni ginogo lapusa hizemoko mikasi veletó soza moloko numuni gekago, alika nagamí veleko una napa nenémo ake ahelú okago, numunima litá oko lemeko pou loko akamó.

7

*Izesú ami gizapa vémini gelekélé veva alémo zokamó
(Mat 8:5-13)*

¹ Izesú eza monó gakóma neneló lo keme asú oake Kapanao numutoka vimó. ² Neneló Loma apatotí ami vetini gizapa ve makolímíni gelekélé veva netá napa gizaleake helesakosá oko noigo, gizapa vevámo izegipalamú nene amekumú izegipala nenazo. ³ Izesuní gakoláa geleake, Zuta vetini ve uvóipini makó nokimisilike Izesuní lí amíkiko okoko není gelekélé izegipa nene avisi netáma alémo zokatíhe líki víki loká ilo loko loketamó. ⁴ Lokimiake kimiselekago, keza Izesutoka víki anítiake amuza miliki láa líki lí amemó: Lelí lova vetímíni gizapa vema oko moloko noimó nene lamaná noive. ⁵ Eza nene agikáa nene leza Zuta vejená lemeaká noive. Itó monó numute utó itive loko nene moní napa molokago, akohekago, gilitamóma neve. Lá oaká noi vema nenazo, gakola gele amitanímó nene vevesanogo ive. ⁶ Líki lí amikago, Izesú geleake kezagi makó vamó. Víki numu ávatíha víkago, lova gizapa ve nenémo agive makó nene Izesutoka nokimisilike gakó láa loko kimiselekago vamó: Guivahanínemaka, neza ánéáminaloka goselé gapo okoko numúnégú nanamú itítane. Áminaló minozo. ⁷ Nezánemú gulumó vevesamigo, geitoka vamuve. Nenemú gezama hanuva neneló nooko gegepatunú lokako gelekélé izegipáne zokative. ⁸ Neza ámináminoko kugulizakí vetini gelekeleláa nove. Itó ami ve makó nene není gizapaló niave. Lá niago keitokatí makokumú vozo lomikugo hanuva vinogo ive. Itó makokumú ano lomikugo nene hanuva anogo ive. Itó gelekélé izegipánemú nene voko hoza alezo litomó nene hanuva voko hoza alinogo ive. Nenéminoko geí gakó nene alévolé onoinazo, hanuva áminaló minoko gakó lokako avisi netá zokative loko lunae. ⁹ Líki lí amikago, Izesú nene ámina gakó geleake, ámina ami vetini gizapa vema sigaga lotake mino viligoake, ámegetiki va vejená láa loko lo kimimó: Neza lamaná lo likimitoze, gilílo. Isílae vejená lekezalokatí gele alévolé oaká nenémináa makó ángíoko gelesá onamumóma neve. ¹⁰ Loko lokago, ami gizapa vémo kimisilí vejená atígíná líki numutoka vake ámina vémini gelekélé ve ángíamó nene zokoake noigo ángíamó neve.

Izesú Naino numutoka gohuna venalímíni gipa heleneikutí alémo otimó

¹¹ Lá okago, Izesú mino hána amike apá makó agulizá Naino neneloka izegipala zuhagi nivago vejená mukí kámegetiki vamó. ¹² Víki numu gatetó nanitego gonosí makó zaló miliki alíki lememó nene, gevoná vená makolímíni gipala hámakó minamó nene helekago, gale zinígi numutotí ve vená mukí nilemego, ¹³ Guivahanímó gevoná venáma ángoake muluna gitihíná okago ive amo loko loake ¹⁴ víke ukoakoló ale gilimó. Ale gelekago, gíhiake otinago, Izesú gipa geza otítane loko noluze, otemane loko lokago, ¹⁵ heleneí netalímó oteake gakó akó límó. Nolígo, Izesú nene izoláhiki goha minatáive loko lotamó. ¹⁶ Lomikago vejená keza ánga netakumú kelegesá goha legekago, Ómasi agepoka lake Ómasímíni agepagutí gakó

loaká ve napa nene holutegú utó oko noive liki likago, lugáate Ómasímo vejenala zuha lelémo vatí inogo ve imane amiselekago okave. ¹⁷ Liki likago aikumú gakoála nenémo Zutaia mikasiuka itó mikasi helega helegaloka voko oko imó.

Zoní ve lositá kimiselekago Izesutoka vasimó
(Mat 11:2-19)

¹⁸ Zoní nene nagá numukú noigo, izegipala zuhate Izesú oko moloko i gakola aveté iki li amikago, ¹⁹ ámina gakó geleake, Izesukumú agata losi geleake, keikutí ve lositá alesa moloake Guivahanima láa liki loká itáive loko kimisilimó: Utó itive liki monó gotolaú luhuva giza vema nene géisi noape itó alika makó utó itikumú ageva itune, liki lilizo loko kimiselekago, ²⁰ ámina ve keza Izesutoka víki lasimó: Monó nagamí holokimiaká ve Zoníma gologí oletative loko lo mololeta ve ative liki li milamóma géisi nene noape, itó makokumú ageva itune liki loká ilizo loko limiselekago nousive. ²¹ Liki likasigo, ámina zupama Izesú nene mukí kivisi vejená itó netá gizale vejená kelémo zokoká itó kigikagutí holosi golesa kepeleko kimiseleká itó kogómula likamó ale pulusoketoká imó. ²² * Lá noigo, ve losima anitiki loká imikasigo Izesú nene ámina vema noive loko Zoní gilitive loko láa loko lo kimimó: Lekeza atiginá iki víki netá matá imane loló nougo ángiki miliki asimó nenémini gakola aveté iki Zonini li amilizo: Kogómula lilikupá molamó nene kogómula ale hanatokimiaká noive. Kigisaló alimó nene ale lamaná okimiaká noive. Halamé gizalemó nene gililiaká niave. Kagata molamó nene kagata ale koló okago gakó giliaká niave. Lepa gonosi kelémo oteaká noive. Itó limiki minamó ámemena nenete není gakó lamaná giliaká niave. ²³ Lá onoinazo, makó keza není mogonamú kagata losipasi gelemitamó nenete kogoliza viziki minanigave liki li amilizo.

²⁴ Loko Zoní kimisili vema lo kemekago, atiginá iki nivasigo, Izesú vejená sii sii liki minamoláa Zonikumú láa loko lo kimimó: Lekeza Zoní noitoka mikasi gomopalaló vamó nene nanakitana vema ániganigi vamóma neve. Ve makó akepagitana oko hepélímó aleko mómoká noiko ániganigi vamóma nehe. ²⁵ Itó ve makó gonanalivagi gó ale akoloake noigo ániganigi vamóma nehe. Gilinahe. Luhuvagi gó ali akiliki miniaká nia ve keza kugulizaki vetini numuni napagú akiki otiki minake nosá hisugú viziaká niave. ²⁶ Lekeza Ómasímini agepagutí gakó loaká ve makó ániganigi vamóma neve, olo. Itó makó lo likimitoze, gililo. Lekeza ángi mina vema Ómasímini agepagutí gakó liaká ve lugáa keikitana minamive. Eza haitoliminoko minokave. ²⁷ * Monó gotolaú Ómasímo gakó makó láa loko limó nene láa liki luhuva gizinamóma neve:

Gililo. Není gakó lole ale ve makó amiselekago, ale goí oko voko kigikagú hoza alitan-imómámini gapoga vevegetanogo ive.

Loko li gakó nene Zonitoka vo alimó neve. ²⁸ Loko loake, láa loko limó: Neza lamaná lo likimitoze, gililo. Mikasiuka utó ina vejenakutí makolímó Zonini ma avilegesá amive. Lá onoimóza, Ómasímo gizapa okimiaká noi vejená limiki niamoláa kezagi gopa Zonini aviligitigí iki niave. ²⁹ * Loko lokago, takisi aliaká nia vegi vejená lugáagi keza ámina gakó giliake Zonitokatí monó nagamí amunaloka emane hilianamó nenazo, Ómasímini gakó hizi lé ikago gihila zimóza, ³⁰ Palisaio monó vegi monó mogona apí ikimiaká a vegi keza nene Zonini monó nagamikumú goselé iake Ómasímo veleketá gapo nene ángi ahulamó neve.

³¹ Loko loake, Izesú makó láa loko limó: Oko moloko nougo ángiagaká nia vejená nene nanetató lo moloko lokogo vo guni itive. Hiláagitana niave. ³² Keza gili goselé iaká nia izegipagitana niave. Izegipa keza alegesá apatoka minake izegipa lugáama sele liki leza nama luható nene nanamú nama lisá amave. Itó helegaloka nene ive nama luható nene nanamú ive nama isá amave liki li kimiaká niave. ³³ Itó nezagi Zonímagí ámináminoko nousigo goselé lekepeleaká noive. Monó nagamí holokimiaká ve Zoní eza apí oko hozaváa nalike iza goula zahí nagamí lamaná namike otó oko minokago lekeza ángiake holosi makolímó agika ale gopa okago noive liki lamó. ³⁴ Itó okulumakutí lumu ve gihila neza lemeko iza goula zahí nagamí nosánetá lamaná noaká nougo ángiake ve imane ángigalo. Áisi nene gasova ve nagamitó ve eza nene takisi aliaká ve itó ángi goselé oaká nouhá vejená makolitini zogonini noive liki liaká niave. ³⁵ Láa nilamóza, Ómasímo gele guni oko netá matá aleaká noimó nene vevesokogó minoaká noigo, izegipala zuha keza nenémini mogona ali utó iaká niave, loko limó.

Izesú eza Palisaio monó ve Saimonani numukú minamó

³⁶ Palisaio monó ve makolímó nosánetá natane loko Izesuni alesa molo amekago, numunagú itiki nosánetá niki minasimó. ³⁷ * Ámina apatotí mokoló vená makolímó Izesú eza

* 7:22: Isa 35:5-6; Isa 61:1 * 7:27: Mal 3:1 * 7:29: Mat 21:32; Luk 3:12 * 7:37: Mat 26:7; Mak 14:3; Zon 12:3

Palisaio monó vemámini numukú iteko noive liki lamóma geleake, anuva hilina gehanigitana gonigú minamó nene aleko iteko, ³⁸ amegesaloka noike ive noigo, agómula nogoza nene Izesuni agisaló lemekago, gotola zopovatunú nene agisa gilatotamó. Gilatomiake, Izesuni agisa nene agoka legeko nonake, anuvavagi meseme nene agisaló holotamó. ³⁹ Holomikago, Izesuni alesá molo ami ve nenémo ángoake, agikatunú láa loko gilimó: Imane Izesuni agupeló ale nogili vená nenémo golesa netató vená noive. Izesú eza ató imane Ómasímini agepagutí gako loaká ve minalina, ámina venalímini mogonamú nene moko mogonaló venale loko gililine. ⁴⁰ Loko agikatunú gelekago, Izesú nene Saimonao, neza gako makó lo gimitoze loko lo amekago, tisánemaka, lokako gilitove. ⁴¹ Loko lokago Izesú anoa gako makó láa loko limó: Ve makolímó alikamule loko loake moni nene ve losi gutá kimimó. Makó nene 500 kina amimó, itó maga ve nene 50 kina amimó. ⁴² Lá okago alika nene áminaló nene pekimitíve liki monimú vitagá asimó nene nomigo, eza ahulalizo loko lokago, ali haha asimó. Keitokatí hilímó aikumú lagaváa napaló gelenetive. ⁴³ Loko lokago, Saimoná láa lo amimó: Nagata gulumó moni nekisala napaló ahulota ve nene neitive. Loko lokago, Izesú geza vatí oko lokane. ⁴⁴ Loko loake, venáma noitoka viligo moloake Saimonani láa loko lo amimó: Vená imane ángigonape. Neza numukagú itekugo, géisi nigisa nigizani nagamí zito nagamí leke molonetamako, imane vená nenémo ive nogozatunú nigisaló holonimiake gotola zopovatunú nogilatonetave. ⁴⁵ Itó géisi leza Zuta vetini suni aleko nogoka negepa namanimóza, vená imanémó numukagú apí oko noitugo nigisáne amuza moloko agoka agepa nonave. ⁴⁶ Géisi oaká nouhá netá aleko gotónegú nene meseme holonetamanimóza, imane vená nenémo nigisáneló anuvavagi mesemetunú holonimikave. ⁴⁷ Neneóló láa loko lo nogumuve. Imane vená eza nenikumú geleake nasahilí napa onimikago lihimala mukí ahulomikuve. Makó eza lihimavala koma ahulomikiko noitítimo nene lihimavala gilatotá vema agika napa ameminogo ive. ⁴⁸ Loko loake, venáma láa loko lo amimó: Lihimaka ahulo asú ogimikuve. ⁴⁹ Loko lokago, ezagi nosá niki mina vejená keza kigikatunú láa liki lamó: Áisi haitolímínimo nolíhe. Lihimavaka asú okave loko nolimó nene hí ve suka nolive. ⁵⁰ Liki nilago, Izesú nene venáma láa loko lo amimó: Nenekumú gele alévolé anitímó gelémo lamaná okaze, mulukagú hulu iko vozo, loko limó.

8

Izesugegi vená makó miniaká amó

¹ Nene zupa velelaló nene Izesú eza apá koma napaló mohona ike vejená nene monó lo kemeko Ómasímini gizapaló minoakalímini gako lamaná lo keme keme oko mohona imó. Mohona noigo, ámegetiki mihina niamoláa nene izegipala zuha 12-a ² itó vená lugáa amunaló emane kigikagutí holosi kepeleko kimisilimóláa itó kivisekago niago kelémo zokamoláa keitokatí makó Malíá agulizá Magatalalo liki milamó, agikagutí holosi 7 kepeleko kimisili vená, ³ itó makó agulizá Zoaná eza Heloteni hozaló gizapa ve Kuzani venala, itó Susaná itó vená lugáa keza moni henokanonigi miniake Izesugini nasahilí ikitiki minamó.

Zuha netá atilí oaká vemú anoa gakola (Mat 13:1-9; Mak 4:1-9)

⁴ Numutó namató ve némitó ve Izesutoka vóvotiki alegesá iki minamó. Lá niago, ángoake anoa gako makó láa loko lo kimimó: ⁵ Zuha netá atilí oaká ve makolímó netá gihiláa atilí inogo vimó. Mikuka atilí omo novigo, gihila lugáa gapoló alemó zekago, vegehanite lisiki matelé zemó. Itó gaha namate ake ni asú amó. ⁶ Itó gihila lugáa nene gehani amupiló lemeko minake, goloko iteakaláa itekamóza, mikasi nogoza minamígo osagava vizeake hilimó. ⁷ Itó gihila lugáa nene lilihámini luhusa nene mikasigú ha netó lemeko minake goloko itike liliha nenémo zemikago, nogotamó. ⁸ Makó nene mikasi lamanakú lemeko minake goloake, gihila mukí zimó. Hamó zámo nene gihila 100 zimó. Loko lo asú oake, gako napagutí láa loko limó: Lakagatagi minatamó neneta, gako imane gili hee liki gililo, loko limó.

Zuha netakumú anoa gakoímini mogonáa (Mat 13:10-23; Mak 4:10-20)

⁹ Loko lokago izegipala zuhate anoa li gakokumú loká itago, ¹⁰ eza láa loko lo kimimó: Ómasímini gasovaló minoakalímini asuguná gako lekeza gilitave loko lonoimóza, lugáa keza nene anoa gako gilitaze. Lá niiki netá matá kogómulatunú nene ángatamóza ángi vevesaminigave, itó kagatatunú gakoíagó gilitamóza, mogonáa gili vevesaminigave. ¹¹ Itó anoa gako imane nolomó nenémini mogonáa lá oko neve. Zuha netá gihiláa

* 8:2: Mat 27:55-56; Mak 15:40-41; Luk 23:49 * 8:10: Isa 6:9-10

nene Ómasímini gako neve. ¹² Gihiláa gapoló lemeko minamó nenéminiki minatamó keza monó gilitamó nene kigikagú limitimóza, áminasitó Satá nene gili alévolé ikiko Ómasímo kugutó vizekative loko aniteko ámina gako nene ipá oko aleko voaká noive. ¹³ Itó gihila lugáa gehani amupiló lemeko goloaká imó nenémini iki minatamó keza monó nigiliki laga kivisekago giliaká niamóza, kigikagú luhusáini alemigove liki gamena alinipa alinago gimínikú moloaká netá utó okago monóma ahuliaká niave. ¹⁴ Gihila lugáa lilihagú lemeko minamó nenéminiki minatamó keza monó giliakaláa gilitamóza, kugupémini netakumú gekeleleláa niminiko, moni henokanonímini lagavámo kigikagú lemeake monóma zemikago, keitoka gihila utó oko guzá losá amive. ¹⁵ Gihila lugáa mikasi lamanakú lemeko minamó nenéminiki minatamó keza monó giliiki kigika ali guni iiki legesó iki ali minikago, keitoka monolimini gihila utó oaká noive.

Liví legeakakumú anoza gako
(Mak 4:21-25)

¹⁶ * Hí vémo liví legeoko somotunú ze hitatimó neve, itó hí vémo legeoko sepekú lolosá gitimó neve. Lá oko nomive. Itita vejená nene hize hanatoketative loko legeoko holomaló molanogo ive. ¹⁷ * Ámináminoko Ómasímini asuguná onoi netá nene mino-loko voko tolova amitive. Minoko utó o asú inogo ive. Halá genei netá nemó nene ámina oko utó o asú okoko hitaminogo ive. ¹⁸ * Monó alinita vejená nene vatí iki gizapa iki ali minatamó nene Ómasímo goha miní ameko makó kiminogo ive. Itó makó keza monóma lamaná iki gizapa amitamó nenete alenoupe liki litamóza, goha ipá oko alekiko hanuva minatamó neve. Nenemú lekeza gako imane nigiliki gili guni iki gililo, loko limó.

Izesuni izolahove agunamotamolave
(Mat 12:46-50; Mak 3:31-35)

¹⁹ Gamena makó nene mukí vejenalite Izesuni hizi vigiake niago, Izesuni izolage izegipa agunamotamolave ake vejenakumú olovó ziake mini hetó minamó. ²⁰ Lá niago, ve makolímó ángoake Izesuni nene izokage izegipa gugunamotamokama geí ániganigi amó nene hetoka niave. ²¹ Loko lo amekago, Izesú nene vejenáma láa loko lo kimimó: Ómasímini gako giliiki gili alitamó imanete není izónege izegipa nugunamotamóne niave, loko limó.

Izesú lokago una napa ahulamó
(Mat 8:23-27; Mak 4:35-41)

²² Gamena makó zupa Izesú ave izegipala zuhagegi nagamikú lapegú itemó. Itiake, Izesú nene nonohuló líkeko vola helegaloka vitune loko lokago, giliake, vamó. ²³ Nivake, Izesú nene agómula ahihí okago, avó akonoigo una napa nalike nonohulóma golesa oake valahuká nozike sipimámini agikagú lemeko vái oake, nagamí nonohulukú hilisá amó. ²⁴ Lá niake, Izesuní alimí oteke láa liki li amemó: Gizapa velemaka, leza nagamí nonohulukú simá nanogo nouhá lae. Liki likago, Izesú oteake, unamagi nagamí valahukámagi gahá kemekago, kii nolike zou limó. ²⁵ Zou lokago, lekeza gili alévolé iakatini hí neve. Loko lo kemekago, izegipala zuhate keza ámina netá ániagiake, kelegesá legekago, sigaga lake ligili hagili niake, agae, ve imanémo hepeki nagamí valahukaki gako lokimikamó nene gili alikasimó nenazo, ve imane haitolímuni netive, liki lamó.

Gelegesa mikasiuka holosi golesa amisele ahulamó
(Mat 8:28-34; Mak 5:1-20)

²⁶ Lá okago, Galilaia nonohuló helegaloka Gelegesa vejenalitini mikasiuka vi anitemó. ²⁷ Neneló anitiake nagamí gahevaloka nitego, numuni apá napalokatí ve makó ake Izesuki hotu lasimó. Ámina vémini agikagú nene holosi golesa mukí minikago gamena hána gó luhamike minake numukú akosá amigo, hanuva geha mulikú gonosi milimiligukó akoko mohona oaká i ve minamó. ²⁸⁻²⁹ Ámina holosite gamena gamena ámina vémini agikagú alévolé iki minikago, vejená keza agisa agizató seni nagatunú ziake gizapa iki minamóza, holosi nenete nagá nene apilikí hukimikago golisi mikasi gomopalaló voaká imó. Áisi nene Izesuni ángoake gopaga like agisauka pou loko mikasiló akoake gako napagutí gamoga geko láa loko limó: Izesuvo, Ómasí napámini gipalamaka, géisi nene nana netá golesa onetanogo noane. Loko lokago Izesú nene holosi golesa geza ámina vémini agikagutí itekoko vamane loko lo amekago, holosi nenémo amanapa ike geza miluma hoza nememitané loko alévolé oko loká nogetuve. ³⁰ Loko lokago, Izesú loká otake limó: Gugulizaka éagave. Loko loká omikago, holosi vái iki agikagú minamó nenazo, neza nugulizáne nene ami mulusi nouve loko limó. ³¹ Loko lokago, holosimate meikú limisele molamítane liki negénegeka lamó. ³² Liki likago, ámina mikasiló iza gululusi mukí nene

* 8:16: Mat 5:15; Luk 11:33

* 8:17: Mat 10:26; Luk 12:2

* 8:18: Mat 25:29; Luk 19:26

agokaú gale niki niago, limiselekako izatini kigikagú limitune liki negénegeka likago, gele kemekago, ³³ holosi golesa nenete ámina vémini agikagutí itiake vake izatini kigikagú itiake limikago, ámina iza keza olí miliake meiniló limiake nonohulukú limiki nagamí niki hutiake helemó.

³⁴ Limiki hilikago, iza gizapa vemate ániagiake ololu liki taoniloka itó numuni amegesa-loka viki aveté iki li kimikago ³⁵ vejená keza ámina utó i netá ániaganigi viake, Izesutoka anití-ake holosi agikagutí kimiselekago va verna nene luhoaká gó luhoake itó geleakaláa lamaná okago, Izesuni agisauka gakó geleko noigo, ániagiake kelegesá ligimó, ³⁶ Lá niago, ámina netá ániaga vete holosivagi mina ve lamaná ikumú nene ániagi mina vejená aveté i kememó. ³⁷ Lá ikago, Gelegesá mikasiuka amelage keza kelegesá goha legekago, Izesú eza nene mikasinini ahulooko vitive liki li amemó. Li amikago, eza atiginá oko vinogo nagamikú lapegú itimó. ³⁸ Noitigo, holosi agikagutí kimiselekago va vemámo Izesuki minatívive loko negénegeka lokago, Izesú gele amemike láa loko lo amimó: ³⁹ Geza numukaloka voko Ómasimo loló ogeta netá lamanálimini gakoaláa nene vejenaka lo kemezo loko amiselekago, ámina vemámo atiginá oko vike Izesú loló ota netakumú nene apá amelagini lo utó oko lo keme asú imó.

Zailoni moholagi Izesuni gotó ale gili venaki

(Mat 9:18-26; Mak 5:21-43)

⁴⁰ Lá okago, vejená keza vola helegaloka Izesukumú ageva iki niago, atiginá oko omo anitekago, ániagiake, geké vaké limikago, ⁴¹⁻⁴² monó numukú agulizaki ve makó agulizá Zailó loko noi vémini mohola hamokó aí kilisimasiva 12-a mina mohó nene helesakosá oko minokago eza ake Izesuni aghiúna geko numúneloka makó vitíve loko negénegeka loko limó. Lá okago, makó nivasigo, vejená keza sii sii liki nivago, ⁴³ holúikú vená makó minamó nene ikanimo apelekago númase gapo molova molova oko noigo, kilisimasi 12 oko novigo lusa ve nene moni keme asú imóza, keza lusa geha geha asú amitimó okago ahulitamó. ⁴⁴ Ámina venalimo Izesuni amegesaloka oake, luhoaká gó gahevaloka ale gilimó. Ale nogiligo áminasitó nene golaniva utamó. ⁴⁵ Lá noigo, Izesú loká oketoko éaho nugupeloka ale gilive loko lokago, vejená keza egamega ikago, Pitá láa loko limó: Gizapa velemaka, vejená sii sii liki nivamó nenazo, makolimo noitíve. ⁴⁶ Loko lokago, Izesú láa loko limó: Óe, makolimo nugupeló ale nogiligo, zámuzáne makó nene nugupelotí novigo noguluke noluve. ⁴⁷ Loko lokago, vená eza mogonáne mota utó noinazo loko geleake, huvolovo zeake Izesuni aghiúna geake, vejenalitiní kovogisaló nene avisi netalimini mogona itó ale nogilike zokamó nenémimi mogona lo utó okago gili asú amó. ⁴⁸ Nigelego Izesú láa loko lo amimó: Mohónemaka, nenikumú gele alévolé anitimo gelémo zokokave. Mulukagú hulu iko vozo.

⁴⁹ Loko noligo, monó numukú agulizaki vemámini numukutí ve makolimo oake láa loko limó: Mohokama mota helekave. Lá okanazo, tisate nene goselé gapo hanuvamú okatize, ahulikozo. ⁵⁰ Loko lokago, Izesú geleake Zailoni láa loko lo amimó: Geza gehelele vizemiko gele alévolé okogó minatanimó nene, mohoka goha otinogo ive. ⁵¹ Loko loake, numutó vo aniteake vejená makó nene ámina numukú itemitave loko lokimikago, hetó niago, Pitá Zoní Zemusi itó mohó izolahiko amelahiko kezagó kelémoko itimó. ⁵² Iteke ve vená keza ámina mohó ive nama itiki niago, ániagoake goha alémo otitikumú geleneike anoza gakó láa loko lo kimimó: Ive amilo. Mohóma nene helemive. Hanuva avó akonoive. ⁵³ Loko lokago, mota heleneimó nemóza liki giliake giza itamó. ⁵⁴ Giza imikago, Izesú nene agizató aleake sele loko mohó geza otezo loko lokago, ⁵⁵ áminasitó ameni atiginá okago otimó. Otekago, nosáneta aliki mohóma amiko native loko loketamó. ⁵⁶ Lokimikago, izolahiko amelahiko keza gelesimó nene golivagi netá loló imó. Lá okago, Izesú nene ámina netakumú gakó aveté iki vejená li kememitave loko lo hukoketamó.

9

Izegipala zuha 12 keza monó hozaló vamó

(Mat 10:5-15; Mak 6:7-13)

¹ Izesú eza izegipala zuha 12-pala sele lo kemeake vejenalitiní kigikagutí holosima gale gihiki kipiliki kimisilitave loko itó kivisi vejená kilími zokatave loko nenémimi zámuza kimimó. ² Kemeake, Ómasímimi gizapaló minoakalímimi gakó li kimiki kivisiti vejená kilími zokatave loko nokimisilike, ³ * gakó láa loko lo kimimó: Gapo vitatoka netá matá aliki vamilo. Hánusa akiseaká gó peleti moni nene alemiki, itó gó lositá luhamiki vilo. ⁴ Itita numuni makokú itiikima, ámina numukú akiliki niviki ámina apatotí vitave. ⁵ * Apá makotoka likilími lamaná amikoma, ámina apá ahuliki niviki vahé miliki likigisalotí

* 9:3: Luk 10:4-11 * 9:5: Apo 13:51

mumusopa nene usagamá zi ahuliiki vilo. ⁶ Loko lo kemekago, keza numutó namató vake Izesuni gako lamaná nene li utó i kimi kimi iká kivisi vegená kilími zokiká amó.

Monó nagamí holokimiaká ve Zoní hili gako

(Mat 14:1-12; Mak 6:14-29)

⁷* Lá niago, agulizaki ve Heloté nene aposolote alévolé netá lilí niakumú geleake, agata gululusi gilimó nene, ve makolite Zoní nene heleneikutí oteake ámina netá loló noive liki nilago, ⁸ itó makolite nene Ómasímíni agepagutí gako loaká i ve Ilaizá goha utó okave liki liaká niago, makolite nene gozapá Ómasímíni agepagutí gako liaká a vegutí makóma Ómasímó alémo oteneive liki liaká amó nene, ⁹ Heloté geleake, láa loko limó: Zonini luvana hukumóza, ve makokumú gako láa nenémika liki lago nogulumó nene hí ve noitive. Loko loake, Izesuni ániaganogo gilimó.

Ve 5000 nosáneta kemeko namó

(Mat 14:13-21; Mak 6:30-44; Zon 6:1-13)

¹⁰ Aposolo keza monó hozaló kimisilitotí atiginá iki iake, keza iki miliki a netakumú Izesuni avetó iki li amemó. Avetó iki li amikago, eza kelémoko vike kezáikó apá makó agulizá Petesaita numutó vi anitemó. ¹¹ Lá niago, ve vená mukí keza giliake, Izesuni ámegetiki nivago, eza kelémo moloake Ómasímíni gasovaló minoakalímíni gako lo kimike, kivisi vegená kelémo zokamó. ¹² Lá noigo, únaká nene gamena asú inogo noigo, izegipala zuha 12-palamate iake láa liki li amemó: Leza mikasi gomopalaló nouninazo, vegená kimiselekako luhuva numutokagi iza gihiló numutokagi viki nosánetakumú vitagá iki niiki akatave. ¹³ Liki likago, Izesú nene lekezatini nosáneta kimiki nalo loko lokago, keza anotó aliki láa liki lamó: Peleti ligizani lugaloka asú igo itó lagaha lositakó molonounimó nenazo, leza imane vegenalitiní nosáneta voko meina hízeketatune loko nolape. ¹⁴ Liki lamó nene áminaló mina véa 5000 nenémíni niago giliake láa liki likago, Izesú nene izegipala zuha láa loko lo kimimó: Mukí vegená nene 50 50 nenémíni mulusi miliki minalo liki likitalo. ¹⁵ Loko lokago, keza izegipala zuhate láa liki likimikago, vegená mulusi miliki niago, ¹⁶ Izesú nene peleti ligizani lugaloka asú igoma itó lagaha lositámagi aleake, okulumakú okenava oko nánigake Ómasi agepoka loake peleti gitegeake, ámina nosáneta gona miliki kimitave loko izegipala zuha kimimó. ¹⁷ Lá okago, vegená mukilite níkake kagatupa okago, nosáneta lumáa ali nupa iki gosúveha 12 vaí okago ali milamó.

Pitá Izesuni mogonamú lo utó imó

(Mat 16:13-19; Mak 8:27-29)

¹⁸ Gamena makó nene Izesú eza Ómasiloka loko noigo, izegipala zuha kezagó neneló niago, eza loká oketake vegenalite nenikumú éahove liki liaká niave. ¹⁹* Loko lokago, keza láa liki li amemó: Monó nagamí holokimiaká ve Zoníma goha utó noane liki liaká niave. Itó lugáate nene Ilaizá gozapá okulumakú iti vema goha lemeko minane liki liaká niave, itó lugáate nene gozapá Ómasímíni agepagutí gako liaká vegutí makó nene galegutí oteake liki liaká niave. ²⁰* Liki likago, Izesú loká oketoko lekelisi nenikumú éahove liki liaká niave. Loko lokago, anotó aleko Pitá nene geza Ómasímó gologí oletatane loko lo mololeta vema noane, loko limó.

Izesú hiliti gamenamú epoapoga limó

(Mat 16:20-28; Mak 8:30-9:1)

²¹ Láa loko lokago, Izesú láa loko lo hukoketoko limó: Lekeza imane gako lo nolukumumó nene vegená makó li kememilo. ²² Okulumakutí lumu ve gihila neza nene monó gizapa vegi guguni giziaká ve napagi monó mogona apí-ikimiaká vegi keza miluma netá mukí nímí-iki není ániagi goselé ikiko nipili hilikiko, gamena losive makole minokinake heleneitokutí goha otinogo uve.

²³* Loko loake, vegená mukí láa loko lo kimimó: Vegená makolite není némegetatune liki nigilikima nene kugupémo giliti netá matá nene gili ahuliiki zohota zaló kipili hilinigi miluma netá ali gihikitatakumú gamena gamena gili zagiiki némegetiki ataze. ²⁴* Makó keza kígika kemeníni ali amánapa iki minata vegená nene kígika kemení gopa inogo ive. Itó makó keza nene nenikumule liki kígika kemení vínasi ahulatamó nene alévolé kemetaméni alitamó neve. ²⁵ Makó keza mikasímíni amupiló ne netá ali asú niko kezáini kígika kemení gopa okoko tolova itimó nene, mikasiuka henonímámo nana oko kelémo lamaná itive. ²⁶ Ve makó keza nenikumupe monónemupe avetó itakumú kovoza hilitimó nene, okulumakutí

* 9:7: Mat 16:14; Mak 8:28; Luk 9:19

* 9:19: Mat 14:1-2; Mak 6:14-15; Luk 9:7-8

* 9:20: Zon 6:68-69

* 9:23:

Mat 10:38; Luk 14:27

* 9:24: Mat 10:39; Luk 17:33; Zon 12:25

lumu ve gihila neza lapanáne itó aménehini lapaná nenémo numupiló itekiko apazá agelova kelémoko limito gamenaló nene keza kovoza hilimó nenéminoko nezagi nene kugulizá ale otitokumú novoza hilinogo ive. ²⁷ Neza lamaná lo likimitoze, gililo. Lekelisi ató nene nia vegená lekelikutí lugáa makó hilinamiki ha niko Ómasímo gizapa oketatimómámini zámuza utó okiko ániganigave, loko limó.

Izesuni agupe haitolímíni imó
(Mat 17:1-13; Mak 9:2-13)

²⁸ Izesú ámina gakó lo kemeake, gamena 8-ía nenéminoko oko vokago, Pitani Zonini Zemusini kelémake agokaú Ómasiloka linogo itimó. ²⁹ Itike Ómasiloka loko noigo, haitó agoka agepa ale noluhake noiike ginéganevámo gizopa vaevae loko minamó. ³⁰ Lá noigo, galinali ve lositá Moseko Ilaizako keza okulumakutí utó ikasike Izesugegi gakó ligili hagili ake, ³¹ okulumalímíni gonanalivagi niasike, Izesú nene Zelusalega noheleko Ómasímo lo mola netá loló itikumú ligili hagili amó. ³² * Lá niago, Pitagegi kogómula ahihi okago, kovó akinakutí otiake ánigamó nene, Izesú eza lapanalagi noigo itó ve losima ezagi niasigo ánigamó. ³³ Ánigikago, ve losima keza ahulimíiki vinigi niasigo, Pitá láa loko Izesuni lo amike limó: Monó gizapa velemaka, imaneló minuhá laga okaze. Lá okanazo, gaizopa losive makole geleketatune, makó geile, makó Mosenive, makó Ilaizanive loko limó nene gakó gele guni amike gopa limó. ³⁴ Loko noli agepági límusímo lemeko ze hitokimikago, límusi hitoketakumú kehelele vizimó. ³⁵ * Lá noigo, límusigutí Ómasímo láa loko limó: Imane gipáne alémo etó onou gipáne noize. Aí gakó gili alilo. ³⁶ Gakó láa loko utó okago, giliake ánigamó nene Izesú ezáagó noigo ánigamó. Ánigiake, ámina gamenaló ániga netakumú kegepa apiziake aveté iki vegená makó nene li kememamó.

Izesú holosi golesa mina gipa alémo zokamó
(Mat 17:14-21; Mak 9:14-29)

³⁷ Akiake gó lokago, agokagutí limiake niago, vegená mukí iake Izesugegi hotu lamó. ³⁸ Hotu liake keikutí ve makolímó gakó napagutí láa loko limó: Monó gizapa velemaka, není gipa hamokó oko ánigatane loko loká nogetuve. ³⁹ Holosi makolímó aleko alévolé oake noigo, galinali gopaga loaká noiive. Lá noigo, holosi nenémo alémo mómoká goha okago, sehovala veleaká noiive. Itó apeleva apeleva oko noiike litá oko ahultosá amive. ⁴⁰ Itó izegipaka zuha nene holosima apiliki amisilitave loko lo kumómóza, amiselemitamó okave. ⁴¹ Loko lokago, Izesú láa loko lo kimimó: Lekeza ató imane gili alévolé amake mulutikú amánapa iki minamó neneta lekelikumú goselé nepelekave. Lekezagi gamena gamena minoloko iteko minokugo gili alévolé itahe. Lá ikaze, gipaka imaneló alémoko ano. Loko lokago, izegipama Izesutoka noago, holosi nenémo mikasiloka ahelú okago pou loko akonoigo, alémo mómoká imó. ⁴² Lá okago, Izesú nene holosi golesama gahá amike namisilike, ámina gipa alémo zokoake, goha amelahitoka alémo atiginá imó. ⁴³ Lá noigo, ve vená mukí keza Ómasímíni zámuza napamú sigaga sagaga lamó.

Izesú hiliti gamenamú goha epapoga limó
(Mat 17:22-23; Mak 9:30-32)

Lá iake Izesú oko moloko i netakumú sigaga nilago, Izesú nene izegipala zuha láa loko lo kimimó: ⁴⁴ Lekeza imane gakotó lakagata miliki giliki minalo: Okulumakutí lumu ve gihila neza gala vetini kigizakú nene nepele hilitune liki nilími milanigave. ⁴⁵ Loko limóza, nene gakolímíni mogonáa gilikatave loko kigika kagata koló amimó nenazo, keza gili vevesamake, ámina gakokumú loká itanigi kehelele vizekago loká itamamó.

Vegená mukikutí éaho livilegeko noiive.
(Mat 18:1-5; Mak 9:33-37)

⁴⁶ * Lá ikago, izegipala zuhamate gakokumú lova hizeke lelikutí éaho livilegeko agulizaki vele minative liki lamó. ⁴⁷ Nilago Izesú eza kigikagú nigele gakó geleake izegipa koma makó alémoko ake amatoka alémo oteneike, ⁴⁸ * láa loko lo kimimó: Makó keza nenikumule liki izegipa koma áimanémíni nasahilí ikitatamó nene, není nasahilí inimiaká niamó gelekave. Itó makó keza nasahilí initatamó nene nimisilí ve aménehini nasahilí itatamó gelekave. Lekelikutí ve makolímó lemeko nouve loko giliti ve nene Ómasímo alémo ve napa loló okiko likivilegeko minanogo ive.

Lekelí gala ve noamitimó nene lekelikutí ve noinogo ive
(Mak 9:38-40)

* 9:32: 2 Pit 1:17-18 * 9:35: Luk 3:22 * 9:46: Luk 22:24 * 9:48: Mat 10:40; Luk 10:16; Zon 13:20

⁴⁹ Loko lokago, Zoní láa loko lo amimó: Gizapa velemaka, leza ve makolímo geí gugulizató like holosi golesa nene vegeñalitiñi kigikagutí kepeleko nokimisiligo áñgunimó nene lelí lémegetami ve nenazo, géneka lotunimole. ⁵⁰ Loko lokago, Izesú láa loko lo amimó: Lekeza géneka litamilo. Ve makó keza lekelí gale valini niamitamó nene lekelikutí ve ninigave, loko limó.

Samalia vegeñá makolite Izesuni alími milamamó

⁵¹ Ómasímo Izesuni goha okulumakú alémoko ititi gamena alitokago, Izesú nene Zelusalega vitove loko alévolé oko agata gilimó. ⁵² Lá oake ve makó kimiselekago, vake Izesú atikumú ali vatí itanigi Samalia mikasiuka apá makotoka vi anitemóza, ⁵³ Samalia vegeñaki Zelusale vegeñaki kogoka hotopotó minamó nenazo, Izesú eza Zelusalega vitove loko likumú goselé kepelekago alími milamago, ⁵⁴ * izegípala zuhagutí Zemusiko Zoniko keza nene suni áñgikasike láa liki li amesimó: Guivahanitemaka, leza lokuko okulumakutí lolímo lemeko imane ve kepele gesá itive loko nogelepe. ⁵⁵ Liki likasigo, Izesú mino viligoake gahá kimimó. ⁵⁶ Gahá kemeake haitó apatoka makó vamó.

Izesuni ámegetanigi mini viliga vegeñá

(Mat 8:19-22)

⁵⁷ Gapoloka nivago, ve makolímo Izesuni lo amike vitanitoka vitanitoka nene neza gémege gémege oko minanogo uve. ⁵⁸ Loko lokago, Izesú láa loko lo amimó: Mikasi koló onoikú nene gahate itiaká niave, itó namatini numúini nemóza, okulumakutí lumu ve gihila neza akato numuníne itó gotóneló za nomigo vitagá noumó nenazo, makó vitiive loko nolape. ⁵⁹ Loko loake, ve makó nene geza oko némegetozo. Loko lokago, eza láa loko limó: Guivahaníneka, geza gelekako nene, neza minoko améneho helekiko vinake gale zemikinake gémegetatove. ⁶⁰ Loko lokago, Izesú láa loko lo amimó: Hilinita vegeñá gale zikimiaká hoza nene kigika heleneiti vegeñá kezagi ámina hoza alitamó neve. Géisi nene voko Ómasímini gizapaló minoakalímini gakó lo utó oko lo kemezo. ⁶¹ * Loko lokago, makolímo láa loko limó: Guivahaníneka, geí gémegetanogo noumóza, voko není numukú nia vegeñáma kemesosoka lokinake gémegetatove. ⁶² Loko lokago, Izesú láa loko lo amimó: Ve makolímohe makolímohe není hozagutí mino viligatimó nenémo Ómasímini gapogú hoza alitimoláa nomive, loko limó.

10

Ve 72 monó hozaló vamó

¹ Lá okago, Guivahanímo ve 72-a kelémo etó oake, gona moloko losi losi iki ale goí iki vitave loko alika ezáa vinogo noi apatoka numutó namató kimisilimó. ² * Lá noike aí vegeñala zuha lilí inigi nia vegeñakumú anozá gakó makó láa loko lo kimimó: Mikú nosáneta mukí omolokamóza, hoza aleaká vegeñá lagasó minokunize. Nenemú lekeza miní hoza amelahitoka likiko nene hozaló vegeñá makó kimiselekiko hozavagú viki minumuni alitaze. ³ * Lekeza vilo. Gilinahe, hela galagitana mina vegeñalitiñi holúikú nene likigikagú geha ziki sipsip izagitana minatave loko lekelí nolikimisuluve. ⁴ * Lekeza vinigi niki, moní géeká gó itó akiseaká gó itó likigisaló suú alemiki lekeza gapoló niviki miniki aliki amiki amuza miliki vilo. ⁵ Numuni makokú itinigi niikima numuni amelagini mulutikú hulu oleketino liiki itilo. ⁶ Ámina numukú hulu ve makó noitimó nene, hulumú lina gakó nene aitoka gihila zitimóza, nenémini ve noamitimó nene hulu gakolímini gihiláa nene lekelitoka goha atiginá oko anogo ive. ⁷ * Ve makolititoka hoza alita vegeñá nenete ámina vegutí nosáneta aliki niki minatamó nene lamaná itimó nenazo, numuni makokú itiiikima ámina numukú mini-likí niviki meinavatini nosáneta zahí nagamí likimitamokó nene niki minalo. Lekeza haitó numukú itemiki numuni hamokukó minalo. ⁸ Apá makokú niviko, ámina apá amelage likilími milikoma lekeza nosáneta likimitamokó nene niki niminiki ⁹ kiviñi vegeñá nene kilími zokiki láa liki li kimilo: Ómasímini gizapaló minoakalímini zámuzá nene lokovogisaloka okave. ¹⁰ Itó apá makokú niviko, likilími lamaná amikoma, lekeza viki gapoló otiniki láa liki li kimilo: ¹¹ * Lekelí apakutí mumusopa ligisaló gimizeneimó nene lekelikumú vahé moloko atilí noune. Lá nounimóza, gakó imane gili minalo: Ómasimo gizapa oleketatimó nenémini zámuzá nene lokovogisaloka omo alitokago áñgi ahulikave, liki li kimilo. ¹² * Neza gakó lo likimitoze, gililo. Gamena napaló nene Soto apakú mina

* 9:54: 2 Kug 1:9-16 * 9:61: 1 Kug 19:20 * 10:2: Mat 9:37-38 * 10:3: Mat 10:16 * 10:4: Mat 10:7-14; Mak 6:8-11; Luk 9:3-5 * 10:7: 1 Koli 9:14; 1 Tim 5:18 * 10:11: Apo 13:51 * 10:12: Mat 10:15; Apí 19:24-28; Mat 11:24

vegenalite golesa mogonáinimú goní koma itamóza, likilími lamaná amita vegealite goní sipisi inigave.

Kigika ali viligama vegealite miluma sipisi gilinigave
(Mat 11:20-24)

¹³ Agae, Kolazina amelagita, itó Petesaita amelagita, lekelitoka golvigi netá utó inogo ive. Alévolé suni lekelitoka loló umó nene golesa netá aliaká a vegeaná miniaká a apá Tulo apatoka itó Sitona apakú utó ilina, keza gozapá miluma giliki kigika ali viligamó nenémini mogonáa li utó iki ginegane litaha ali akiliki ló luma nene kugupeló hiliki minaline. ¹⁴ Gamena napaló nene Tulo apakuki Sitona apakuki mina vegealite goní itamóza, lekeza goní napa genavagi inigave. ¹⁵ Itó lekeza Kapanao amelagita, lugulizá okulumakú ititive liki ali otiaká niahe. Nenéminoko nomive. Zunigú lekehelú inogo ive.

¹⁶ * Loko loake, goha miní ameko izegipala zuha láa loko nokimisilike limó: Ve makó keza lekegepagutí gulupe liki gilitamó nene není negepagutí gakó gilinogo ive. Itó ve makó keza kemegeza likimitamó nene, kemegeza nememó gilitimó neve, itó kemegeza nimitamó nenete nimisili ve kemegeza amemó gilitimó neve.

Ve 72 atiginá amó

¹⁷ Láa loko kimiselekago, viki miniake, goha ake mulúikú agila guluma igo kogoliza viziki láa liki lamó: Guivahanitemaka, geí gakotó nene holosi golesa nenete kezagi gili limiki golisi iaká niave. ¹⁸ Liki likago, Izesú láa loko lo kimike limó: Satá eza gó vegitana oko okulumakutí lemekago ángokuve. ¹⁹ * Lekeza gililo. Neza zámuzá lekemekugo lekeza gosiható itó akohú oaká gosihakitana netató lisatamó itó lelí lova gala ve Satani zámuzalaló nilisikoma nenémo lekepeleminogo ive. ²⁰ Lá onoimóza, holosite lekeli gakó gili aliaká niakumukú giliko itemiko, lekeza Ómasímini mututoni minakumule loko lukugulizá nene okulumakú gizononimó nenemú lokogoliza viziki minalo.

Izesú agoliza vizimó
(Mat 11:25-27; 13:16-17)

²¹ Loko loake áminasitó Ómasímini Sikalahulímo agika alémo vávani noigo, mulunagú ló guluma noigo láa loko limó: Aménege geza okulumalímini mikasímini Guivahani géisigó nene noane. Sukulu lunike gele vevesokune liki liaká nia vegeaná keza giliki gili guni ikatave loko monó imane ale halá geke molokanike sukulu lamake izegipa namunigitana iki mina vegealitiní kigikagú molokimiaká noanikumú gegepoka noluve. Aménegeamaka, geza nene nenéminoko utó oloko vitive loko gelekako nene etoaká noive. ²² * Loko loake, miní ameko láa loko limó: Améneho netá mukí nene nigizakú molo asú okave. Itó ve makolite Ómasímini gipala noutímini mogona gelemave. Améneho ezagó geleneive. Itó ve makolite aménehini mogona gili vevesamave. Neza gipaka noumó itó nezáne lo utó oko lo kemekugo ángi hehe litave loko gilító vegeaná niamó lezategó aménehini mogona gelenoune.

²³ Loko loake, izegipala zuhaloka mino viligoake keikó Izesú láa loko lo kimimó: Ómasímo nónohá zelikimikago lekeza lokogómulatunú netá imane ángi vevesikave. ²⁴ Neza gakó lo likimitoze, gililo. Gozapá Ómasímini agepagutí gakó liaká a vegi kugulizaki ve napagi nenete oko moloko nou netá lekeza ángiaká niamó nene ángitune liki gelemóza, ángiamómá neve. Itó lekeza negepagutí giliaká nia gakó gilitune liki amóza, gelemamómá neve.

Samalia ve lamanalímini gakola

²⁵ * Loko lokago, monó mogona apí-okimiaká ve makolímó oteake Izesuni amekú moloko láa loko loká otake limó: Monó gizapa velemaka, neza nana okinake alévolé nemetameni alitöhe. ²⁶ Loko li gakotó nene Izesú lo amike limó: Mosé nanave loko lo hukoleketave. Geza nene gakó nanave loko gatoko gelene. ²⁷ * Loko lokago, eza láa loko limó: Geza gigika gemení zámuzaka itó geleakaka mukí nene Guivahani geí Ómasiloka lehizetozo. Itó gezakamú geleaká noanimómáminoko gígivekaginimú geleko gigika kemezo loko luhuva gizononimóma neve. ²⁸ * Loko lokago, Izesú láa loko lo amimó: Lo nogumu gakotó lo vevesoko lokane. Lani gakotó amegesa molokogó loló itanimó nene alévolé oko minanogo ane.

²⁹ Loko lokago, ámina ve nenémo ezáa mogonala hize lé inogo Izesuni loká otake láa loko limó: Nigivénege keza éage niave. ³⁰ Loko lokago, Izesú láa loko lo amike limó: Ve makó

* **10:16:** Mat 10:40; Mak 9:37; Luk 9:48; Zon 13:20 * **10:19:** Age 91:13 * **10:22:** Zon 3:35; 10:15 * **10:25:** Mat 22:35-40; Mak 12:28-34 * **10:27:** Gapo 6:5; Liv 19:18 * **10:28:** Liv 18:5

eza Zelusalega ahuloake Zeliko numutoka nolimigo laskoli vete gapoló apiliake lavolavo gola netá matala mukí gumina iki aliki vikago, hilingo gapoló ako minamó. ³¹ Lá oko akonoigo, Ómasi guguni gizoaká ve makó nene ámina gapoló novike ángamó nene hilingo akonoigo zová zeko avilegeko vimó. ³² Vokago, ámináminoko monó zagusaveú hozaló ve Livaini agapilamokutí makó nenémo áminaloka oake ángamó nene lá oko akonoigo, ángoake zová zeko avilegeko vimó. ³³ Vokago, Samalia vegi Zuta vegi apiziki minamamóma nemóza, Samalia ve makolímo ámina gapoló novike apili ahula vema akonoitó oko ángoake, muluna gitihiná okago, ³⁴ noitó vike apelego golani imómalo nene hilingo vain nagamiki holomiake asapú omiake, alémo oteake tokí izavámíni amegesaló ahulomiake vike veno vegeñalitíni numukú itesike nasahilí otamó. ³⁵ Akikasike gó lokago ámina ve vinogo noike veno vegeñalitíni numuni gizapa ve nene kina lositá namike limó: Geza imane ve gizapa lamaná otozo. Lá noako moni gumumó nene asú okikoma neza goha inake gimitove, loko limó. ³⁶ Nenemú geza nanave loko nogelene. Ve losive makole akutí nene laskoli vete apilikago gapoló ako mina vemámíni agivelaho hí ve minamó neve. ³⁷ Loko lokago, monó mogona api-okimiaká vemámó láa loko limó: Miluma gelemiake alémo lamaná i veve. Loko lokago, Izesú nene géisi voko áminámíni ozo, loko lotamó.

Malatako Maliako Izesuni alesa míli amesimó

³⁸ * Lomiake, gapoló nivake apá makokú anitemó. Nene apakú vená makó minamó agulizá Malatá eza Izesuni alémo numunagú molokago, ³⁹ mohó agunala agulizá Maliá eza nene ake Guivahanímíni agisauka minake aí gakó geleko minamó. ⁴⁰ Lá noigo, Malatá eza nosánetá ale vavá i hozamú muluna itimó. Lá oake, Malatá vike Izesuni láa loko lo amimó: Guivahanínemaka, mohó nugunáne Maliá nene ahulonimikago nezánégó nosánetá ale vavá noumó ángamape. Lo amekako, oko hozaló nelémo vatí itive. ⁴¹ Loko lokago, Guivahanímó lo amike láa loko limó: Malata, Malata, geza gagata gululusi nogelenike muluka itekave. ⁴² Geza netá hámakokumú gelezo. Maliá nene netá lamanaláa ale gizaká ike nenitokatí zámuza alekave. Nenémo aitoka gihila zekiko makolímo agizakutí ipá aminogo ive, loko limó.

11

Izesú Ómasiloka loakakumú lainim-oketa gakó
(Mat 6:9-15; 7:7-11)

¹ Gamena makó zupa Izesú nene apá makotoka Ómasiloka loko lo asú okago, izegipala zuhagutí makolímo láa loko lo amimó: Guivahanitemaka, Zoní nene izegipala zuha Ómasiloka litave loko lainim-oketoaká i netá aleko lainim-oletozo. ² Loko lokago, Izesú láa loko lo kimimó: Ómasiloka niliki nene láa liki lilo:

Ametega, geí gugulizá etó oko minatize. Numutó namató geí gizapaló minoakalímíni zámuza utó o asú ino. ³ Geza gamena gamena nosate lemezo. ⁴ Leza ligivetegini lihíma nekisáini ale ahulokimiaká nounimó nenémíni oko lihimate ale ahuloletozo. Geza gimilegú moloaká netakú lelémo molamo.

⁵ Loko loake, láa loko lo kimimó: Lekelikutí ve makolímo nene holugú akovevé zogovámíni numutoka voko sele loko zogone geza peleti losive makole nemezo. ⁶ Zogone makó nene gapoló ake ake není numukú itínasa okago, nosánetá koma amitomó nomigo loká nouve. ⁷ Loko lokiko, zogova nenémo numukutí nene leza gahe gekunike vená izegipánegi akonouhakú goseleka lamo. Neza otekinake netá makó gememinogo uve. ⁸ Loko litimó nene, neza láa loko lo nolukumuve. Eza není zogone minokagove loko oteoko netá makó amemitimó nene, maga ve nenémo sele lova lova okiko, eza oteoko vitagá noi netáma aminogo ive. ⁹⁻¹⁰ Nenemú láa loko lo nolukumuve. Ómasiloka voká liaká niamó nenete netá mota aliaká niave. Vitagá iaká niamó nenete netá gihila ali utó iaká niave. Itó gaheló hoko-hoko likago gahe koló okimiaká noive. Lá onoinazo, lekeza Ómasiloka voká liikima ámina netá alinígave. Vitagá iikima netá gihila ali utó inígave. Gaheló hoko-hoko nilikoma gahe koló oleketanogo ive. ¹¹ Lekelikutí ve makolímini gipalámo lagahamú voká lokiko nene amelaho gosihá amitihe. ¹² Itó okoloho mulamú voká lokiko nene akohú gosihakahá amitihe. Lá aminogo ive. ¹³ Nenemú lekeza vegená golesa neneta izegipatíni gizapa lamaná ikitake netá lamaná ali kegepa iaká nianazo, okulumakú ametipo nene voká lita vegená nene aleko iteko Sikalahula lehizeleketanogo ive, loko limó.

Izesuko Peleze puloko

(Mat 12:22-30; Mak 3:20-27)

¹⁴ Gamena makó zupa nene ve makolímini agepa ale lakolí okago mina holisi nene Izesú apeleko amiselekago, vokago, agepa apizi vema nene agepa á oake gakó akó limó.

* 10:38: Zon 11:1

Lá okago, vegená keza sigaga lamóza, ¹⁵ * lugáate láa liki lamó: Holositini agulizaki ve Pelezepuló loko noi vémo alémo vatí noigo holosi kepeleko kimiseleaká noive. ¹⁶ * Liki likago, lugáate amekú milake loká itake okulumakutí alévolé suni makó ale utó okako geí mogonaka ániगतunize. ¹⁷ Liki likago, Izesú kigikámíni gakó hanuva geleake láa loko lo kimimó: Mikasi makokú vegená hizi hóu líiki lova gopa hizitamó nene kei mikasi nene gámekó minatímoma neve, itó numuni makokú vegená keza hizi hóu líiki eza akohú apíliko eza akohú apíliko itamó nene ámina numuni ahulíiki hutíli iki vinigave. ¹⁸ Lekeza nenikumú nene Pelezepuloni zámuzatunú holosi kepeleko kimiseleaká noive liki liaká niamóza, Satá nene ezáa izegípala zuhagi hizi hóu latamó nene aí gizapaló minatamoláa nene nana iki alévolé iki minatave. ¹⁹ Nenikumú nene Pelezepuloni zámuzatunú holosi golesa kepeleko kimiseleaká noive liki liaká niave. Láa líkima lekelítini izegípatíni zuhate nene ámina iki Satani zámuzatunú holosi golesa kipíliki kimisíliaká niave liki litahé. Óe, láa líki lamítamó nenazo, kéisi soza gakotínímíni mogonáa hanuva ali utó itamó neve. ²⁰ Lá onoi móza, neza Ómasímíni zámuzatunú holosi kepeleko kimiseleaká nounazo, Ómasímíni gasovaló minoakalímíni zámuzatunú nenémo lokovogisaloka mota omo ávatíha okamó nenémíni mogona mota utó okave. ²¹ Satá eza gasovagi ve amuva ve minooko gimísí magé aleoko numuna gizapa itimó nene, netá matala mukí nene avasavagi minanogo ive. ²² Lá itimóza, neza alévolé ve noutímíni nene okoko ámina ve lova ale ameko aí aviligítomó nene, gimísí magé gele alévolé í netáma ípá oko vegená makó gona moloko kimitove. ²³ * Itó makó keza neníkutí vegená minamítamó nene, není gala vegená ninigave. Makó keza nílímí vatí iki vegená kílími nenitoka amitamó nenete kílími hutíli iaká niamó gelekave.

Holosi golesa atiginá iti gakó
(Mat 12:43-45)

²⁴ Holosi makolímó ve makolímíni agikagutí iteoko nene avasú vízoko minatí numunimú vitagá inogo osagava apató voko mohona itive. Vitagá oloko novoko neza numúne ahulokuke umóma nenazo lokoko mohona oko vitagá itimóza, nomiko neza goha áminagú atiginá oko vinake minatove loko agata geleoko ²⁵ atiginá oko voko ániगतimó nene ámina numuni agika nene lolopa gitíki ali guni ikiko itó gizapa ve makó noamíko ániगतimó nene, ²⁶ eza goha ahulooko voko holosí agivelagíni 7-ia kugupelotí sisipa anuva ovimóláa kelémoko oko nene áminagú miníki alíki íniगave. Lá ikiko ámina ve goí oko golesa oko minamóza, íi alíki nene golesa o lamaná oko golesa inogo ive. Ve golesa áimane lekelitoka utó itikumú noluze, ehe tináneve.

Ómasímo lamaná nónohá zeketonoí vegená

²⁷ Loko noligo, ve venalítini holúíikutí vená makó minamó nenémo Izesuni sele like láa loko lo amíke límó: Vená makó nenémo geí getoake amíní gemeneimó nene Ómasímo lusa getonoimóma neve. ²⁸ Loko lokago, Izesú láa loko límó: Láa loko lanimóza, Ómasímíni gakó gíliki Ómasímo líi gakotó ámegetiaká nia vegená nene Ómasímo nónohá zeketonoimóma neve.

Vegená golesate alévolé suni ániगतune líki lamó
(Mat 12:38-42)

²⁹ * Loko loake, vegená síi síi líki alegesá niago, Izesú miní ameko láa loko lo kimimó: Oko moloko oaká nou netá ániगीaká nia vegená nene vegená golesa miníkave. Keza alévolé suni makó ániगतune líki liaká niamóza, haitó suni makó ale utó ugo ániगaminigave. Zonatoka emane utó í sunígitana makó utó íko nenegó ániगanigave. ³⁰ * Zoná nene lagaha sípísímámíni agikagú lemeko gamena losive makole minake heleaká gapogutí goha oteake Nínive vetíní kovogisaló ámina sunimú lo utó o kimimómámíni oko okulumakutí lumu ve gihíla neza imaneló vegenalítini kovogisaló není anosa ale utó oketanogo uve. ³¹ * Ómasímo gona mololeketatí gamena nene Sepá mikasiuka agulizakí vená minamó nenémo oteoko imane gamenaló nia vegenalítini mogonáini lotuva legekíko líhíma napa alítamó oko nene neve. Ámina vená nenémo nene agulizakí ve napa Salomóma mukí netá mogona gele vevesoko gílímómámíni gíhíláa gílínogo mikasi hotokatí gapo hána hána amó. Itó nénísi ató imane Salomoni koma avilegeko noumóza lekeza není gakó gílísá amave. ³² * Ómasímo gona mololeketatí gamena nene Nínive apá amelage otíkí oko moloko oaká nou netá ániगीaká nia vegenalítini mogonáini lotuva líginogo ive. Lotuva legekíko líhíma alítatokó oko neve. Nene hanuvamú nomive. Zoná nene monó lo nokimígo Nínive apá amelage kígíka alí vilígámó neve. Itó nénísi ató imane Zonakítana oko minonamuve. Zonani avilegenoumóza, lekeza gakóne gíli ahulíake líkígíka alí vilígámámó neve.

* 11:15: Mat 9:34; 10:25 * 11:16: Mat 12:38; 16:1 * 11:23: Mak 9:40 * 11:29: Mat 16:4; Mak 8:12 * 11:30: Zna 3:4 * 11:31: 1 Kug 10:1-10; 2 líki 9:1-12 * 11:32: Zna 3:5

Lugupémini ló liví
(Mat 5:15; 6:22-23)

³³ * Hí vémo ló liví legeoko holoma sepekú molatimó neve, itó somotunú gahumá itimó neve. Lá oko nomive. Liví nene legeake numukú itita vegená hize hanatoketative loko holomaló molosá neve. ³⁴ Itó gogómula nene gugupémini ló liví neve. Gogómula nenémo mumuzó oakalímíni gapogú gelémo molamítimó nene, Ómasímíni lapaná nenémo gígikagú hize hanato asú itimóza, gogómula nenémo gelémo golesa itimó nene, gugupeló itó gígikagú límugusi ze minanogo ive. ³⁵ Nenemú gígikagú Ómasímíni liví lonoimó nenémo lihokiko límugusigú minokatanize, gizapa lamaná ozo. ³⁶ Gígika makotoka límugusi zemoko hanato asú onoiiko, ló livílimo hize hanatogetitimó nenéminoko gígika hanatokogó minanogo ive, loko limó.

Izesú Palisaio monó vemuki monó mogona apí-ikimiaká vemuki alévolé oko lo hukonoimole

(Mat 23:1-36; Mak 12:38-40)

³⁷ Izesú láa loko lo asú noigo, Palisaio monó ve makolímó nosánetakumú alesa molo amimó. Lá okago, Izesú nene numunagú iteake nosáneté makó niki minasimó. ³⁸ Ámina Palisaio monó ve nenémo Izesuni ángamó nene, Zuta vetíni suni aleko agizani nagamí zemike nosáneté hanuva nonago ángoake, etami suni nalive loko geleake, ininá oake agata gululusi gilimó. ³⁹ Lá noigo Guivahanímó láa loko lo amimó: Gelezo. Palisaio monó ve lekeza lape somogitana iki niave. Lekeza nagamí goni itó lape hetolaloka nagamí ziaká niamóza, líkígikagú guminaló suni itó haitopaitó netá golesa nenémo vaí onoiive. ⁴⁰ Lekeza ve negi ve lamaná niave. Ómasímó netá hetoláa itó agikáa hamó lelegító loló okamóma neve. Nene gelemahe. ⁴¹ Líkígikagutí vegená nasahilí ikitatamó nene, líkígika viheletokogó minanogo ive.

⁴² * Lekeza Palisaio monó ve ehe tináneve. Lekelí mikutí mapánuha ekipá anuva lamanaki netá itó netá makó haitopaitolímíni 10 10 nekutí nene hamopamó aliake Ómasi amiaká niamóza, lekeza nene hehe loko hamó lelegító vegená gona moloakalímíni itó líkígika Ómasiloka moloakalímíni nene ahulikave. Lekelí netá matá 10 10 nekutí Ómasi amiakalímíni nene ahuloakaláa nomimóza, imane netá napa nenegi hanuva loló oakalímíni neve. ⁴³ Lekeza Palisaio monó ve ehe tináneve. Lekeza monó numukú numukú nene veganalitíni kovogisaló minoaká siató minatune líki giliaká niave, itó lekeza maketiloka muki vegená nenete geké lílitatave líki giliaká niave. ⁴⁴ Lekeza ehe. Lekeza gonosi milimilí halá geneimó nenéminiki niave. Áminaló veganalite mihina niake líkígikagú lili okave líki gilísá amave.

⁴⁵ Loko Izesú lokago, monó mogona apí-okimiaká ve napa makolímó lo amike monó gizapa velemaka, geza láa loko nolanike lelukumuki gahá nolape. ⁴⁶ Loko lokago, Izesú láa loko limó: Oo, lekeza monó mogona apí-ikimiaká ve, lekeza ehe tináneve. Lekezatíni lí mila gakó nenémo genavagi loló okago vetíni kíginagú gihíkimiaká niago, keza silipa iki gihíaká niamóza, ámina genavagi netá nene lekezatíni líkígizani hisúinitunú kilimí vatí itígí líki ma alísá amave. ⁴⁷ Lekeza ehe. Lekeza avotike Ómasímíni agepagutí gakó liaká ve kipilí hilina vetíni gonosi milimilí numuni lamaná lílí iake gonanalísí ikimiaká niave. ⁴⁸ Lá niago, lekeza avotike iki miliki iaká amoláa hizi lé iaká niamómámíni mogona utó okave. Avotike keza Ómasímíni agepagutí gakó liaká ve kipilí hilikago, lekeza keikítana niake gonosi milimilí numúini lamaná lílí ikimiaká niave. ⁴⁹ Nenemú Ómasi eza gele vevesoaká noi ve nenémo láa loko lonoimóma neve: Negepagutí gakó liaká vegi aposologi kimiselekugo, víki niiko, lugáa gopoguni milikimíiki lugáa kipilí hilinígave. ⁵⁰ Loko lonoimó nenazo, mikasi gena oake míno-loko iteko novigo, Ómasímíni agepagutí gakó liaká ve níkepelego golani lekemó nenéminí lihima nene imane gamenaló nia veganalitíni kumupiló ite asú inogo ive. ⁵¹ * Neza lamaná lo líkimitoze, gililo. Atani gipala Epoloni apele nohiligo golani leki gamenalotí Ómasímíni agepagutí gakó liaká a vegená lugáa kipilí hililíki nivago golani lekikago, Zakalíá eza Ómasi guguni gizi amiaká itagi etó onoi numunigi holotó noigo napelego golani lekímó, kei golanímíni lihímavala nene imane gamenaló nia veganalitíni kumupiló itinogo ive. ⁵² Lekeza monó mogona apí-ikimiaká ve, ehe. Lekeza gakó gele vevesoaká gahémíni kíila alíki víkave. Lekezatíni áminagú ítemake, vegená makó itínigi niago gapo hizi lí ikimiaká niave.

* 11:33: Mak 4:21; Luk 8:16 * 11:42: Liv 27:30 * 11:51: Apí 4:8; 2 Iki 24:20-21

⁵³ Loko loake, numukutíma nolimigo, monó mogona apí-ikimiaká vegi Palisaio monó vegi keza gakatunú Izesuni lova ali aminigi gako loká loká itamó. ⁵⁴ Izesú gako lo gopa okiko goní otatune liki aí agepaló gizapa iki minamó.

12

Izesú soza sunimú kagata alimó
(Mat 10:26-27)

¹ * Lá niago, vejená makó iki kugupeló kugupeló iki sii sii liki alegesá ikago, Izesú nene izegipala zuhaloka láa loko lo kemeneike limó: Palisaio monó ve nenete sozaló vetini suni aliki iki miliki iaká amó nene ekesá netá neve. Lekeza nenemú ehe, gizapa ilo. ² * Hitonoiti netá nene utó o asú ititokó neve. Itó asuguná iki lilí ina netá nene utó okiko vejená mukilite gilinigave. ³ Lá niiki holugú límugusigú gako legesó iki linamó nene hanatoka likiko mukí vejenalite gili asú inigave, itó lekeza numuni agikagú gako musika linamó nene numuni hetotí gako napagutí li utó niko gilinigave.

Lehelele viziti ve lelepizimó
(Mat 10:28-31)

⁴ Nigivénegita, lo likimitoze, gililo. Vegená makolite lukugupegó apili hilingave. Alike netá makó lilí ilikitatamó nomitimó nenazo, lá ita vejenakumú lekelegesá legemino. ⁵ Lá onoimóza, lehehelele viziti ve makó lekelepizitove. Ómasi eza lukugupe apele helekoko ló apakú lekehelú o ahuloaká zámuzagi ve noive. Neza lamaná lo nolukumuze, gililo, aikumú lekelegesá ligino. ⁶ Somohá nene ha netá nianazo, golohá moni lositatunú nama somohá ligizani lugaloka asú igó meina hizemosaláa neve. Lá onoimóza, Ómasi nene nama somohá makokumú ma agatí molosá amive. ⁷ Lekelí gototini zopovatini gatoakaláa nene Ómasimo gele asú oko geleneive. Itó lekeza nama somohá niamave. Lekelisi nene vejená nianazo, itó Ómasimo gizapa olikimiaká noinazo, nenemú netá makokumú ma lehehelele vizemino.

Izesuni izegipala zuha nouné loko lo utó oaká itó zeko hitoaká
(Mat 10:32-33; 12:32; 10:19-20)

⁸ Neza lo likimitoze, gililo. Vegenalitini kovogisaló ve makó keza není nugulizá li utó iki nilími napa itamó nene, okulumakutí lumu ve gihila neza Ómasímini agelogini kovogisaló ámina oko kelémo napa oko linogo uve. ⁹ Ve makó keza vetini kovogisaló nenikumú zivi hitivi itamó nene, neza ámináminoko Ómasímini agelogini kovogisaló keikumú zevo hitovo itomóma neve. ¹⁰ * Itó makó keza okulumakutí lumu ve gihila nenikumú alivi letivi itamó nene, Ómasimo ámina lihimaivala ahuloakaláa nene nemóza, Ómasímini Sikalahukumú alevo letovo oakaláa nene, Ómasimo nenémini lihimaivala ahuloakaláa nomive. ¹¹ * Itó monó numúkupe monó gizapa vetini itó kugulizaki vetini kovogisalo pe goní nilikitikoma, konotó aleko nana gako litupe itó nanave loko litupe liki lakagata giliko gena amino. ¹² Ámina gamenalóisi lekeza líta gako nene Sikalahulímo lo lekeme lekeme noiko li kimitamó nenazo, lekeza mulutini itemino.

Negi henonagi vemú anoza gako

¹³ Loko lokago, alegesá iki mina vejenakutí ve makolímó Izesuni lo amike láa loko limó: Monó gizapa velemaka, geza uvónehini lo amekako, ametehe nene helisa henoni mololetamó nené gona moloko lugáa nimitive. ¹⁴ Loko lokago, Izesú láa loko lo amimó: Vémage, helisa henonimú gona mololeketatane loko itó gonikumú lo hukoleketatane loko éaho nelémo etó okago nolane. ¹⁵ Loko loake, vejená láa loko lo kimimó: Lugupémini henoni vaí oko minatimó nenémó ligikámini henoni ale utó amitimó nenazo, ángo lukumu heleaká netakumú gizapa ilo. ¹⁶ Loko loake, anoza gako makó láa loko lo kimimó: Moni henoni vaí oko mina ve makolímíni mikasi nenémó nosáneta vaí oko ale utó imó. ¹⁷ Ale utó okago, mulunagú nene ale moloaká numukú nene nosáneta vaí okanazo, nosáneta lugáa nene nana itove. ¹⁸ Loko geleake, láa loko gilimó: Nosáneta ale moloaká numunima lukokinake napa napa gitove. Lá okinake nosánetanegi netá matánegi nene ámina numukú ale molatove. ¹⁹ Ale molokinake, nezánemú láa loko litove: Nezáne netá matá vaí oko minokamó nenazo, asú amiko melekeni mukí oko vinogo ive. Nenemú navasú vizinake nosáneta noko zahí nagamí noko nogoliza vizeko minanogo uve. ²⁰ Loko gelekago, Ómasimo láa loko lo amimó: Negi ve neneka, itína holugú geí sikalahuka alekugo hilingo ane. Lá okiko nosáneta henokanoka ale molanimó nene hutilí inogo ive. ²¹ Loko lo amitimó

* 12:1: Mat 16:6; Mak 8:15 * 12:2: Mak 4:22; Luk 8:17 * 12:10: Mat 12:32; Mak 3:29 * 12:11: Mat 10:19-20; Mak 13:11; Luk 21:14-15

nenazo, netá matá vai oko minati ve makó eza Ómasímini agómúlaló gohogó ve minatimó nene, ámina suni aitoka utó inogo ive.

Mulute iteaká gakó

(Mat 6:25-34)

²² Loko loake, izegipala zuha láa loko lo kimimó: Lá onoigo láa loko lo nolukumuve. Lekeza miniki aliki itakumú nene nosáneta hikutí noko minatupe itó ginegane nene hikutí ale akalatupe liki mulutini itemino. ²³ Nosáneta nene netá gihila nomive. Lekelisi miniki aliki itamó nenémo netá gihila neve. Itó lukugupeló ginegane nenémo netá gihila nomive. Lukugupe nenémo netá gihila neve. ²⁴ Namamú lakagata giliki gili vevesalo. Keza netá matá zuhá isá amave, itó minumuni o molokago nosáneta nene numúikú ali nupa iki nisá amave, itó nosáneta ali milata numuni gisá amamóza, Ómasímogó nosáneta gopa ale utó o kemeaká noive. Itó lekeza nama minamave. Vegená nianazo, itó nama mukí nene limiki niago lekeza itiki niamó nenazo, Ómasímó netá matá hanuva ale utó mololeketatimó nene. ²⁵ Lekelikutí makó éaho muluna noitiko minoko aleko ititó nene ezáa agata geleko kilisímisi makó miní ameko molomo iteko minative. Ma nomive. ²⁶ Itó nene netá koma nemóza, lekeza ámina netá alisá amamó nenazo, netá makokumú nanamú mulutini iteaká noive. ²⁷ * Lekeza palauá guvava oko minoaká noimó nenémini mogona gili vevesamahe. Palauá kéisi nene hoza makó alisá amave, itó ginegane lamanatamanakó ali luhatakumú gó isá amave. Lá onoimóza, neza lo likimitoze, gililo. Gozapá agulizaki ve napa Salomó nene gonanalivagi netá ale luhoaká imóza, palauá nenete Salomoni agupeló netá aviligikave. ²⁸ Palauá nene itínasa utó oake gó lokago gululupasokago hukiki ló giziaká niave. Itó Ómasímó lokago ámina palauá nenémo gonanalivagi netá ale koloaká noinazo, nenemú lekeza komasí gili alévolé inamó neneta ginegane nene Ómasímó hanuva ale utó oleketanogó ive. ²⁹ Lekeza lakagata gululusi nigiliki leza nana netá natunimó neve, itó nana zahí nagamí natunimó neve liki mulutini itemilo. ³⁰ Keza numutó namató monóini nomí vegená nenete ámina netakumú kagata gululusi giliki vitagá iaká niave. Lá niamóza, ametipo nene ámina netá lekelitoka minamitimó nene minamitave loko geleneive. ³¹ Lekeza ámina netakumukopa Ómasímó gizapa vetini loló iti gapogú likigika lakagata goí iki miliko vo minino. Lá ikiko nene, lukugupémuni netaki nene hagitana lehizeleketanogó ive.

Okulumakú henoni ale nupa oaká gakó

(Mat 6:19-21)

³² Lekeza vegená luguhá nupa inamó neneta lekehelele vizemino. Ametipo gizapa omiaká noi netá matá mukí lehizeleketanogó agoliza vizeko nogilive. ³³ Nenemú nene henokanotini salimiiki áminalotí meinava moni aliiki gohogó vegená kimilo. Lá iiki moni gúeaká gó haitolimini hulupa lamitímuni alilo. Lekeza lá iki okulumakuka asú amiti henoni ali nupa itamó nene, neneló guminaló vete mihina aminigave, itó gúnakonímó hutamitimó neve. ³⁴ Henokanotini lamaná neti apatoka nene, likigika neinogó ive.

Gelekelé izegipate gizapa iki minata gakó

³⁵ * Lekeza lavolavo gotini ali likiiki gohatitó leti ziiki lamu ló ligi miliiki ali nené iki minalo. ³⁶ * Ve makó keza gizapa venini nene vená alimi ame gamenaló amisi gitatotí numutoka atiginá oko atikumú ageva iki minake, eza oko gaheló okohá zekiko litá oko gahe segetatune liki gizapa iki minamó. Lekeza ámináminiki gizapa iki minalo. ³⁷ Gizapa venini nenémo oko gelekelé izegipala nene akamiki gizapa iki minikiko ángatimó nene kogoliza viziki minanigave. Neza lamaná lo likimitoze, gililo. Gizapa venini nenémo okoko hoza aleaká lavolavo likeoko nosáneta iki miniki nalo loko lo kemeoko, ezáa oko nosáneta vatá oketoko gona moloko kiminogó ive. ³⁸ Eza nene holugú akovevé ahe itó gó lomolomohe oko ángatimó nene, gelekelé izegipala gizapa iki niko ángatimó nené, keza kogoliza viziki minanigave. ³⁹ * Itó lekeza imanemú gililo. Numuni amelaho nene guminaló ve ati gamenamú gillina, guminaló vemule loko gizapa onoitimó nenazo, guminaló ve nene oko numuni zeko epetamitimó neve. ⁴⁰ Ámináminoko okulumakutí lumu ve gihila neza negeva iki minamita zupa anogó unazo, lekezagí ali nené iki minalo.

Amegesa moloko Ómasi gelekelé otatuni gakó

(Mat 24:45-51)

⁴¹ Loko lokago, Pitá láa loko limó: Guivahanitemaka, anozá gakó lo nolemenimó nene lelikumukó nolape itó ve makokumuki nolane. ⁴² Loko lokago, Guivahanímó láa loko limó:

* 12:27: 1 Kug 10:4-7; 2 Iki 9:3-6 * 12:35: Mat 25:1-13 * 12:36: Mak 13:33-36 * 12:39: Mat 24:43-44

Hozaló ve makó nene gele vevesonoko gele minatimó itó hozaváa nene amegesa moloko minati ve nene gizapa vevámo aí numukú netá matató gizapa oko minoko hozaló ve makó lugáa gizapa oketative loko lomikiko nosánetá nata gamenaló nene gona moloko kimiti vémini mogonamú lo likimitove. ⁴³ Gizapa veva nene okoko ámina hozaló ve nene goí oko lotamómámini oko hoza naliko ánigatimó nene, ámina hozaló vemú giligo nene lamaná itimó neve. ⁴⁴ Lá onoinazo, neza lamaná lo nolukumuze, gililo. Gizapa vevámo lá oko gizapa lamaná i vema nene mukí netató gizapa ve loló otanogo ive. ⁴⁵ Lá itimóza, ámina hozaló ve nenémo není gizapa vema nene gamena hána minokaze, litá oko aminogo ive loko mulunagú gelekoko, hozaló ve vená makó lugáa kepeleká itó nosánetá nene hanuva noko minoká itó zahí nagamí noko itó ekesá nagamí noko negi nagi hizeko minoká itimó nene, ⁴⁶ ámina hozaló vémini gizapa veva nene okoko ámina hozaló ve nene gizapa vevamú ageva oko minamiti gamena eza gatizá minati gamena okoko ámina hozaló ve nene agupe apelevo hukovo ooko amisele ahulokiko, hozamú mulúikú gili alévolé inamita vegená niakú voko minanogo ive. ⁴⁷ Hozaló ve makolímó nene gizapa vevámini agepagutí gakó gelekoko netá ale vavá oko minamoko gizapa vemámo li gakotó amegesa molamitimó nene, gizapa veva nenémo vauva aleko napiliko goní hoza napa alitimóza, ⁴⁸ hozaló ve makolímó gizapa vevámini agepagutí gakó gelemoko nogosani nati suni alitimó nene, gizapa veva nenémo hana okogó apilino gove. Ómasilokatí helisa henoni vai iki alinita vegená nene Ómasímó ali atiginiki nimitave loko goha lokiko aminigave. Itó Ómasímó ve makó nene netá vai oko kemeneitimó nene, ali atiginiki nimitave loko lokiko goha aminigave. Itó amemitamó nene, nana oketative.

Izesuni monokumú hize hoú latuni gakó

(Mat 10:34-36)

⁴⁹ Neza mikasiuka ló gizoleketatove loko lemekumóma neve. Itó mukí vegenalitiní golesa netáini ló gizatove loko itína lalina, mulúnegú lamaná gululine. ⁵⁰ * Miluma netá gihinitanigave. Veesá gihiniti asú inamiko mulúne githiná iko minoloko novugo alika gihinitanigave. ⁵¹ Nenikumú nene imane mikasiuka nonagá ale utó itane loko lemekane liki nigelehe. Óe, lo likimitoze, gililo. Není monokumú hize hoú loaká netá ale utó inogo lumumóma neve. ⁵² Itína gamenalotí veletó nene numuni makokú vegená ligizani lugaloka asú igo nitamó nene, není monokumú hizi hoú liiki, ve losive makole nenete ve losimú nene gala ve lilí ikitanigave, itó ve losí nenetosa ve losive makolemú gala ve lilí ikitanigasive. ⁵³ * Lá iiki, lá iki hizi hoú lanigave. Amelahiko gipalago mini luga luga iki hoú lanigasive, itó izolahiko moholago mini luga luga iki hoú lanigasive, itó anohúvolahiko avolahiko mini luga luga iki hoú lanigasive.

Itína gamenámini mogona gele vevesoaká gakó

(Mat 16:2-3)

⁵⁴ Loko Izesú loake, alegesá a vegená láa loko lo kimimó; Lekeza límusi makó ezegalokatí noitiko ániagiake, golini mota zinogo ive liki liaká niave. Láa liki linató nene gihila zeaká noive. ⁵⁵ Itó okulumá nene anupakó utó noiko, ániagiake, hogaí napa lanogo ive liki liaká niató nene gihila zeaká noive. ⁵⁶ Lekeza sozaló vegenáise, mikasímuni mogona gona miliká itó okulumalímuni mogona gona miliká iaká niamóza, itínasa gamena oko moloko noumómámini mogona nanamú gili vevesisá amave.

Goní ogetati ve amekú molozo

(Mat 5:25-26)

⁵⁷ Itó lekezatini nene mogona makó hee lo noitimoláa nanamú gona milisá amave. ⁵⁸ Lá niake, ve makolímó goní ogetanogo goní numutoka gelémoko novoko goní napa ale heleaká veló gelémoko novoko, gapoloka makó niviki mulunagú hulu itive loko netá makó amitanize. Lá amoko áminagi aleloko gopa hanuva goní ale heleaká ve noitoka anititanimó nene, goní napa ale heleaká ve nenémo pilisi vetini kigizakú gelémo molokiko nagá numukú ahuligimikataze. ⁵⁹ Neza lamaná lo nogumuve. Zunigú nagá numuni napagú minokoko lihimakámini meinaváa koma napa apaso asú amitanimó nene, áminagú ahulogimikiko mino-loko voko minanogo ane, loko lo kimimó.

13

Tolova ikatave liki likigika ali viligalo

¹ Ámina gamenaló neneló mína vegená lugáate Galilaia vegená makolitini gakoláa nene Izesuni láa liki li amemó: Keza Ómasímuni guguni gizi namego, Pilató nene kepele nahulake

* 12:50: Mak 10:38 * 12:53: Mik 7:6

Ómasímíni guguni gizi ame netalímíni golanígi keí golanígi ale gopánapa imó. ² Liki lí amik-ago, eza konotó aleko láa loko lo kimíke limó: Galílaia vegeanakutí lá iki hele vegealítíni líhímváíni napa napa nego lá iki kemeni vami gapo vikave líki nígelehe. ³ Lá oko nomíve loko lo nolukumúve. Lekelísí ámináminíkí líkígíka alí vilígámitámó nene, lekezagí lá ikígó tolova inígave. ⁴ Itó Siloama apatoka numuní napa makó nene lemeko akake vegeá 18 kepele hílimó nene, Zelusalega mína vegeanakutí lá iki hele vegealítíni líhímváíni napa mínámole líki nígelehe. ⁵ Lá oko nomíve loko lo nolukumúve. Lekelísí ámináminíkí líkígíka alí vilígámitámó nene, lekezagí lá ikígó tolova inígave.

Zuta vegealíte kígíka ale vilígámosá nenémini anoza gakó

⁶ Loko loake, Ómasímo Zuta vegeanakumú goselé apílikumú anoza gakó makó láa loko limó: Ve makolímo nene gohuna za makó zuhá oake, minake, alíka ake gíhílamú vítagá imó. Oko ángámó nene gíhílaá nomígo, ⁷ mikú hozaló véa láa loko lo amímó: Ángígozo, melekení losíve makole oko novígo ímane gohuna záminí gíhílaá líginogo umóza, gíhílaá nomíve. Míkasi nogozáa hanuvamú ale asú okatíze, apele ahulozo. ⁸ Loko lokago, mikú hozaló vemámó láa loko lo amíke limó: Golohá venemaka, ítína meleketó mogonauka hoza aleko míkasi ale vilígókinake, pulumaká ízatíní ase makó nene molatove. ⁹ Lá okugo, alíka kílisímásíló nene gíhíla zítímó nene, lamaná ítíve. Gíhíla zemíkoma, apelezo loko lokako, apele ahulatove, loko líve loko Izesú limó.

Holísigú helísala zová zí vená alémo zokamó

¹⁰ Holísí makokú Izesú nene monó numukú íteake monó gakó lainím-oketámó. ¹¹ Lá noígo, vená makó mínámó nene holósí makó agíkagú noígo melekení 18-ía oko novígo netá napa gízaleko mínoaká imó. Lá noíke, helísagí zová zekago, hee loko ote mínámitímó imó. ¹² Lá noígo, Izesú nene ángígoake, gakó napagutí láa loko lo amímó: Vená geza gívísí netá apasogímíkuve. ¹³ Loko nolíke venámámíní gotolaló agízánítúnú nónohá zetago áminásító lítá oko ámína vená nenémo ote vevesoake Ómasí agepoka limó. ¹⁴ * Lá noígo, monó numuní gízapa ve napámó holísígú Izesú alémo zokakumú mulunagú golesa geleake, ámínaló mína vegeá láa loko lo kimímó: Hoza aleaká gamena nene 6-ásí nenazo, lívísí vegeá lelémo zokatíve líki nígílíkíma nene holísí gamenagú amíkí hoza gamenagukó alo. ¹⁵ Loko lokago, Guívahanímó láa loko lo amímó: Lekeza sozaló ve genezatíní losígí mínámó neneta, holísígú nene pulumaká ízatíní numukú vílki nagámí natave líki tokí iza pulumaká ízatíní nene hoza alíkí vínásíkí kílmíkí víaká níamó neve. ¹⁶ Lá onoinazo, Zuta venáma ímane nene Satá alémo golesa okago, noígo, melekení 18-ía oko vímó nene avísí netalímíni mogonáa nene holísí gamenagú apasotatomó etámíhe. ¹⁷ Loko nolígo, gala véva nenetíní kovoza napa hílimó. Lá noígo, ve vená mukí keza golvagí netá lamanalímíní loló íkumú nene kogolíza vízeke geké lámó.

Mastetí zuha netakumú anoza gakó

(Mat 13:31-32; Mak 4:30-32)

¹⁸ Lá níago, Izesú láa loko lo kimímó: Ómasímíni avogísaló ví hílata vegeá nene nanámíníkí níave. Nanetalímíní amupíló ale moloko lítove. ¹⁹ Mastetí gíhíla nenéminíkí níave. Ve makolímo ámína gíhíla hamó alekoko mínagú zuhá imó nene goloko íteake zagítana okago, nama nenete ake ízanaló numuní gemóma neve.

Peletí lulu vízeaká netakumú anoza gakó

(Mat 13:33)

²⁰ Loko loake, goha láa loko limó: Ómasímíni lapanató vo holoakaláa nene netalímíní amupíló ale moloko lítove. ²¹ Peletí lulu vízeaká netá nenéminoko neve. Vená makolímo nene peletí lulu vízeaká netá nene talám losígú polísígí ale gopa okago, hutílí okago, peletí nene lulu víze napa imó neve loko Izesú limó.

Gatení komagú íteaká gakó

(Mat 7:13-14, 21-23)

²² Izesú nene Zelusalega vínogo noíke apá kománapagú víke, gakó lainím-oketomo mohona noíke vímó. ²³ Lá noígo, ve makolímo lo amíke Guívahanínemaka, Ómasímo vegeá lughakó kugutó vízítíhe. Loko lokago, Izesú láa loko lo kimíke limó: ²⁴ Gatení komagú ítínígíma lekeza helísatíní alí alévolé íníkí ítítave. Neza láa loko lo nolukumúve. Vegeá mukílíte íttíune líki gílítámóza, ítemínígave. ²⁵ Lá níuko, numuní amelaho nene oteoko numuní gahe ze lí okoko gahe lopena hízekíko, lekeza hetoka otíníkí gaheló okohá zíkí sele líki Guívahanítemaka, gahe segeletozo. Líki líkíko, neza lekelí ángígo hehe lamuve. Hí numutotí vegeá níave. ²⁶ Loko lo lekemekugo, lekeza láa líki lí níminígave: Gezagí makó mínúníke nosánetá noko zahí nagámí noko nouníke, geza nene lelí numute gapoló

* 13:14: Gá 20:9-10; Gapo 5:13-14

vanike numuteló monó gakó lainim-oletanimóma neve. ^{27*} Liki li nimikiko, neza láa loko lo likimitove: Lekeza hí apakú vejená niahe loko gelemuve loko mota lo lekemekuve. Lekeza golesa netatokagó mihina amó neneta aló vilo loko lo likimitoze. ^{28*} Loko lokugo, lekeza ániगतamó nene, Avalahá Isaká Zakopó itó Ómasímini agepagutí gakó liaká a ve mukí nene Ómasímini gizapaló niiko itó lekezatini likimisele ahulokiko hetó niiki ániigiiki ive nama iki miluma maluma giliki lekegepa atalá iki minanigave. ²⁹ Lá niiko, vejená ho noititokatí itó ho nolimitokatí ezegalokatí emegalokatí iki alegesá iiki Ómasímo gizapa okimiakató nosáneta niki kogoliza vizinigave. ^{30*} Lekeza gililo. Itína gamenaló limiki mina vejenakutí makolite alika itiki minanigave. Itó itína itiki mina vejenakutí makolite alika limiki minanigave, loko limó.

Izesú Zelusale vejenakumú ive imó
(Mat 23:37-39)

³¹ Ámina gamenalóisi Palisaio monó ve makó iake láa liki li amemó: Geza imane apá ahulokoko vozo. Agulizaki ve napa Heloté gepele hulinogo ive. ³² Liki likago, eza hoza aleloko voko ale asú okoko alika hilitikumú anozá gakó láa loko lo kimimó: Lekeza viki ámina gala ameki ve láa liki li amikiko gilino: Itínagi azogi mininake holosi golesa kepeleko kimisele ahuloká itó kivisi vejená kelémo zokoká okinake okozá hozane nene ale lutigitove. ³³ Lá onomóza, haitó apá makotoka Ómasímini agepagutí gakó loaká ve makó apili hilitamó nene etamitive. Zelusalega lá itave liki linamóma nenazo, itínagi azogi okozaki nene neza gaponeuka vinogo nouve. ³⁴ Kee, Zelusale vejenáise, Ómasímini agepagutí gakó liaká ve kipili hiliká itó Ómasímo lekelitoka hozaló kimisili vejená nene lekeza gehanitanú ahuli miliki kipili hiliká iaká niave. Neza lekelí izegipatini zuha nene okolohóma izegipala ale mulunauka moloaká noimómáminoko gamena gamena kelémo mulúneka mozogon oaká noumóza, lekeza gili nimisá amave. ^{35*} Nenemú gililo. Ómasímo viselelikimikiko apatini nene gámé numuni vizinogo ive. Neza lo likimitove, gililo. Lekeza není nene goha ma áninagamiki mini-likí niviki alika nene Guivahanímini agulizató anitelimikane. Ómasímo lusa gegimikave liki li niminigave, loko limó.

14

Izesú agisa agizani lulu vizi netá gizali ve alémo zokamó

¹ Holisi makokú Izesú nene Palisaio monó vetini kugulizaki ve makolímíni numukú iteko nosáneta noko noigo, Izesú netá ale gopa itihe liki gizapa iki minamó. ² Lá niago, áminaló ve makó minamó nene, agisa agizani lulu vizi netá gizali ve nene Izesuni avogisaló minamó. ³ Noigo, Izesú nene monó mogona apí-ikimiaká vegi Palisaio monó vegi loká oketake leza kivisi vejená nene holisi gamenagú kelémo zokosá nehe kelémo zokamosá neve. ⁴ Loko lokago, keza nene kegepa apiziake minamó. Lá niago, ámina avisi vema alémo zokoake amiselekago, vimó. ^{5*} Vokago, Izesú láa loko lo kimimó: Lekelikutí ve makolímíni gipalahe pulunaká izahé gale hánagú holisi gamenagú velehé limitimó nene, holisimagule lokoko ahulokiko áminagú minatimó nehe. Itó litá oko gelelehá oko galegutí alémo otítimó neve. ⁶ Loko lokago, anotó aliki li amemisá amó.

Nosáneta alesa molo kemeakakumú gakó

⁷ Lá ikago, alesa molo kemekago a vejená nene nosáneta nanigi niake, siá lamanaláaló minatune liki niago, Izesú ániagoake, anozá gakó makó láa loko lo kimimó: ^{8*} Ve makolímó nosáneta napaló atane loko alesa molo gemekiko nookoma, siá lamanató minamo. Ámina nosáneta ve makolímíni agulizá nenémo geí givilegeneitimó nene, ⁹ alesa molo likimiti ve nenémo okoko geza imane noani siá ahulokoko imane ve amezo. Loko lo gemekiko, geza govoza helekiko kemegejaloka ne siá golesaló minokatanize. ¹⁰ Nosáneta napaló alesa míligimikikoma, geza vokoko kemegejaloka siató noako, alesa molo gemeneiti ve nenémo okoko zogone geza kovogisaloka ne holomaló voko minozo. Loko lo gemekiko, nosáneta niki nia vejenalítini kovogisaló gugulizá oteko vinogo ive. ^{11*} Ve makolímóhe makolímóhe ezáa agulizá ale otítimó nene, ezáa agulizala liminogo ive. Itó ve makolímó ezáa agulizala aleko lemeko molatimó nene, Ómasímo aí agulizala ale napa inogo ive.

¹² Loko loake, Izesú alesa molo ami vema láa loko lo amimó: Geza nosáneta napa ale vavá nooko nene, zogoga itó gugunaka itó geza zuha itó geza numukaloka vejená itó moníini vaí onoití vejenakó alesa molo kememo. Keza nosáneta napa ali vavá niiki alesa míli gimíiki,

* 13:27: Age 6:8 * 13:28: Mat 8:11-12, 22:13, 25:30 * 13:30: Mat 19:30, 20:16; Mak 10:31 * 13:35: Age 118:26 * 14:5: Mat 12:11 * 14:8: Ano 25:6-7 * 14:11: Mat 23:12; Luk 18:14

nosáneta kementitó goha akú gimikataze. ¹³ Geza nosáneta napa ale vavá nooko nene, gohogó vege naki kigisa kigizani nakeseta vege naki kigisa genisi ina vege naki kogómula lika vege naki alesá molo kemezo. ¹⁴ Lá okako, keza niiki nene, alika goha akú nosáneta pekimi iki gimitamoláa nominazo, geza gogoliza vizeko minanogo ane. Lá oko noako, Ómasímo vege ná lamanaláa hilinitakutí kelémo otiti gamena nene meinaváa gimino go ive, loko limó.

Nosáneta napamú anoza gakó
(Mat 22:1-10)

¹⁵ Nosáneta noko mina ve makolímo Izesú láa loko noligo geleake, láa loko lo amimó: Keza Ómasímo gizapa okimiaká onoitó miniki nosáneta niki minata vege ná kogoliza viziki minanigave. ¹⁶ Loko lokago, Izesú nenemú anoza gakó makó láa loko lo amimó: Ve makó nenémo nosáneta napa ale vavá inogo vege ná mukí alesá molo kimimó. ¹⁷ Alesá molo kemekago, nosáneta nata gamena alitokago, nosáneta atave loko hozaló veva amiselekago, alesá molo kimi vege natoka vike lekeza alo, nosáneta mota ale vavá okave. ¹⁸ Loko lo kemekago, keza mukitó vitakumú goselekaseleka lake makolímo nene láa loko lo amike limó: Neza itínasa vená alekuke nouke, nenemule loko vaminogo uze, loko limó. ²¹ Láa liki likago, ámina hozaló vemámo nene goha atiginá oko vike keza la gakó nene gizapa veva aveté oko lo amekago, geleake, izapaló molokago, hozaló vema láa loko lo amike limó: Geza litá oko taoniloka voko gapo napagú komagú novoko neneló gohogó vege ná kigisa kigizani nakeseta vege ná kogómula lika vege ná kigisa genisi ina vege ná kelémoko ano. ²² Loko lokago, hozaló vevámo gele ameko mohona oake okoko láa loko lo amimó: Gizapa venemaka, hoza gakó lonetanímó mota gele alekumóza, siá makó nene hanuva minokave. ²³ Loko lokago, golohá veva nenémo hozaló vema láa loko lo amimó: Geza nene pilipilí gapoló itó mí gapoló novoko není numukú gikí iki minatave loko vege ná gala vizeko kelémoko ano. ²⁴ Neza láa loko lo nogumuve. Neza goí oko alesá molo kumu vege ná amanazo, není nosáneta kutí keké naminigave, loko lo kimimó.

Izesuni ámegetoko vinogo gele vevesatuni gakó
(Mat 10:37-38)

²⁵ Vege ná mukí nene Izesuni ámegetiki nivago, eza viligoko láa loko lo kimimó: ²⁶ * Makó eza nezagi minatíve lokokoma izolagini amelagini vená izegipala eza zuhamú gelekiko itekikoma, itó ezáa minoko aleko itimó nenemú gelekiko itekikoma nene, itó nenikumú gelekiko lemetigi oko noikoma nene, není izegipa loló oko minaminogo ive. ²⁷ Makó ezáa zohota zaló apili hilinigi miluma netá gihitatakumú gele zageoko némegetamitimó nene, není izegipa loló oko minaminogo ive. ²⁸ Lekelikutí makolímo numuni napa makó ginogoma ganatilisí meinaváa gelekoko moni mota akohihe akohemihe loko molo geleko áni gokoko, giti avotigi nehe nenémini mogonáa geleko áni ganogo ive. ²⁹ Itó lá amoko litávata oko gopa numuni ale hizeko gitimó nene, monima asú okiko vitagá okoko numunima ahulokiko, vege ná keza áni giiki nene giza itiki, ³⁰ imane vémo sozáa moloko numuni napa ale hizeake lá iha iha ahulokago lá onoi ve liki linigave. ³¹ Itó agulizaki ve napa makolímo agivelahini agulizaki ve makó apilitove loko oko lova agoka ameminogo ive. Áisi ganá láa loko agata gilinogo ive: Leza áimane luguhakó 10 tausen minokune, itó kéisi mukí 20 tausen minikanazo, kepelesá nehe kepelemosá nehe lokoko, ³² ezáagi izegipa agunamotamolagimú giliko akohemikoma, gala veva nene numunaloka ha noiko, litá oko hutono netá ameko ve makó amiselekiko voko itína nonagá itune loko nimiselekago nouve. ³³ Loko litimó nenazo, nenemú lekelitokatí makó eza ámina oko netá matala mukí ahulo asú amitimó nene nana oko není izegipa loló oko minative.

Age melelé amitikumú anoza gakó
(Mat 5:13; Mak 9:50)

³⁴ Age nene netá lamaná nemóza, agema laga amitimó nene, nana oko goha alémo melelé itune. Ma lá aminogo une. ³⁵ Némini manáminoko ale melelé itunimoláa nomive. Hanuva lepe ahulanogo une. Nenemú lakagatagi minatamó neneta gakó imane gili hee liki gililo. Lekezagi melelé iki minalo, loko limó.

* 14:26: Mat 16:24; Mak 8:34; Luk 9:23

15

*Sipsip iza tolova imó nenémini anoza gakola
(Mat 18:12-14)*

¹* Takisi aliaká vegi moko mogonaló vege naki mukí iki monó gakola gilinigi Izesutoka alegesá iaká amó. ²Lá niago, Palisaio monó vegi monó mogona apí-ikimiaká vegi keza nenemú gelego, golesa imó. Golesa okago, Izesukumú láa liki liaká amó: Imane ve eza mokoló vege namagi kelémo molokago nosáneta noaká noimó nene etamive. ³Liki likago, Izesú geleake, anoza gakó makó láa loko lo kimimó: ⁴Lekelitokatí makolímó sipsip izava 100 minatakutí nene hamó tolova itimó nene vitagá amitihe. Lá oko nomive. Lugáa 99 hanuva minamoláa makotoka kelémo nupa onoko ahuloketonoko mohona oko tolova imoláamú vitagá inogo ive. ⁵Vitagá oko oko ale utó okoko, mulunagú lamaná geleko agohí geko numutoka alekanogo ive. ⁶Aleko oko agivelagini kelémo nupa okoko láa loko lo kiminogo ive: Sipsip izáne tolova imóma ale utó molokuze, logoliza vizitune loko litimó neve. ⁷Nenemú neza lo likimitoze, gililo. Vatí oko nune liki litamoláa 99 asite kigika ali viligamita vege namakú nene okulumakú kogoliza aminigave. Ve golesa hámakolímó agika ale viligokagoma nene okulumakú kogoliza napa viziaká niave.

Moni tolova imó nenémini anoza gakola

⁸Itó vená makolímó silivá gehani 10-ía molo ikakutí hámakó alemó zitimó nene ma ahulaminogo ive. Eza liví legeko lolopa giteva giteva oko ale utó molokoko, ⁹vená agivelagini kelémo nupa okoko gehanínema alemó zimóma vitagá oko ale utó okuze, nezagi makó logoliza vizitunize loko lo kiminogo ive. ¹⁰Nenemú neza lo likimitoze, gililo. Ómasímíni ageloge keza ámina iki mokoló ve hámakolímó agika ale viligokagoma kogoliza napa viziaká niave.

Gipa makó latila inogo imó nenémini gakola

¹¹Izesú nene gakó makó láa loko lo kimimó: Ve makolímíni gipala losi minasimó. ¹²Miniki alika nanasi nenémo amelahini lo amike ahóno, geza moni henokanoni molo netanimóma nemezo. Loko lokago, moni henokanoni gona moloko gipa lositáma kimimó. ¹³Kemekago, alika nanasi eza mino hána amike henokanona ale nupa oake, gita oko aleko vimó. Voko mikasi gohauka minake, gumesisi gamasisi ike, iza goula nosató henokanona ahulo asú imó. ¹⁴Ahulo asú oake noigo, ámina mina mikasiló nene gaúna sipisi helemó. Hilikago, nosánetakumú vitagá oake, ¹⁵mikasi amelaho makotoka voko lokago, eza iza gizapa oko minatane loko lomikago, neneloka voko izama gizapa noike, ¹⁶nosá makó amemake mosimikago izatini nosánetakutí natove loko imóza, nenegí mositamó. ¹⁷Lá ikago, minake agata kolosokago, láa loko agata gilimó: Aménehini gelekelé izegipala mukí minake, goula nosáneta lamaná niki nitamóza, neza imaneloka gaúnamú hilinogo nounazo, ¹⁸numúneloka atiginá oko vinake aménehitoka láa loko lo amitove: Ahóno, golesa netá loló okugo, lihimavánemo Ómasiloka itó geitoka gena okaze, ¹⁹goha gipakave loko minamitove. Hanuva gelekelé izegipaka nelémo molokako minatove. Loko geleake, oteko amelahitoka vimó. ²⁰Voko numu gatetó anitigo, amelaho ángoake, milumavala geleake, lololu loko vike anukeake agoka agepa nonago, ²¹gipalamámo láa loko lo amimó: Ahóno netá golesa loló okugo, lihimaváne Ómasiloka itó geitoka gena okaze. Nenemú goha gipakave loko minamitove. ²²Loko noligo, amelaho nene gelekelé izegipala lo kimike limó: Lekeza litá iki gó lamaná aliiki goló vizitalo. Ana lamaná ali vizitiki suú ali miltiki ali namiki, ²³pulumaká iza akaleva geható minamó makóma apiliki gitalo. Leza ninake logoliza vizeko minatune. ²⁴Gipáne nene heleneikutí goha otekave, itó eza tolova onoiikutí goha utó okave. Loko lokago, kogoliza viziki gehani giziki namó.

²⁵Lá niago, ganá gipalamámo hozauka minakutí ake, númaseloka anitike gilimó nene, kogoliza viziki meleketakeni niago, geleake, ²⁶gelekelé izegipa makó sele lo ameake, okago, loká otoko nuvane nana niave, ²⁷loko lokago, áisi limó: Gugunakama gozapá vimóma avasavagi omo anitekago, ametipo pulumaká iza akale geható minamóma nene apelego gizo vatá nune. ²⁸Loko lo amekago, ganá gipalamámo izapaló molokago, mesaha oake áminaló vo anitemigo, améipo geleake, lemeko alémo hulu iha, ²⁹gele ahuloake láa loko lo amimó: Gelezo. Melekeni mukí ale ahulukuke gelekelé ogetoko minuke, gakoka makó gele ahulosa amumóma nemóza, geza nene mème iza akaleva makó nemeko nigive nagavegi ma apeleko namuháma neve. ³⁰Itó gipaka alika nanasima geí moni henokanonima moko netató ahulo asú okave. Ánenémini okago, geza lokako pulumaká iza akale geható minamóma apiliki gizi vatá nitahe. ³¹Loko lokago, améipo láa loko lo amimó: Gipánemaka, geza gamena hána nezagi minanimóma nenazo, není netá mukí nene geíma

* 15:1: Luk 5:29-30

neve. ³² Itó gugunaka nene heleneikutí oteko okave, itó tolova onoikutí goha utó okave. Nenemú mulutegú lamaná geleko logoliza vizuko lamaná noive, loko limó.

16

Heno gizapa ve golesámini anoza gakola

¹ Izesú nene izegipala zuhama gakó makó láa loko lo kimimó: Henonavagi ve napa makolímíni gizapa ve makó minamó. Minoko gizapa vemámíni gakó makó nene gizapa vemámo henoní ale gopa oaká noive liki lamó nene geleake, ² sele lo ameake, láa loko lo amimó: Gei gakó nanave liki lago guluhe. Ve nenémínaka není gizapa ve goha minamítane loko noluve. Hoza tiketima alekano. Moni henokanoníne gizapa anítímíni mogoaná ale utó molatune. ³ Loko lokago, henoní gizapa vemámo agikatunú láa loko gilimó: Imane golohá venémo hozanema ipá okiko nana itomó neve. Govisi hoza alitomó nene goselé nepelekave. Gapoló monimú voká vokató mohona itomó nene novozáne helekative. ⁴ Loko gelekunazo, neza golohá venémo nimiselekiko ve nigivénege nilími lamaná niko numúikú minoko aleko itomolámú netá lamaná makó oketatoze. ⁵ Loko loake, golohá vevámíni nekisáa ali mina vegenáma hamopamó alesa molamó. Moloake, makó láa loko loká otamó: Golohá venémíni nekisa geitoka nanakí neve. ⁶ Loko lokago, áisi meseme nogoza talam 100 neve. Loko lokago, litá oko tiketi imane alekoko 50 loko gizamane. ⁷ Loko loake, makóma loká otake golohá venémíni nekisáa geitoka nanakí neve. Loko lokago, áisi laisi gó 1 tausen neve. Loko lokago, litá oko tiketi imane alekoko 800 loko gizamane. ⁸ Loko lokago, golohá vevámo geleake, henona ale gopa napa gizapa vema gele veveso minake alikumú geké lotamó. Itó monóini nomi vegenalite netá matá inigi gili vevesi minake napaló gili kimiaká niave. Monotínigi vegená lekeza nenémíni suni lekelitoka ma minamive. ⁹ Nenemú litoze, gililo. Lekeza ámina iki moni henokanoni ha netale liiki vegená kimikiko keza likigive lilí ikiko, ámina netá ali minata gamenaváa asú okiko nene alévolé apatoka molo lekemekiko áminagú miniki meinavatini alinigave.

¹⁰ Makó eza netá koma kamaló nene ale guni oko gizapa itimó áisi nene netá napaloka ámina oko ale guni oko gizapa lamaná inogo ive. Itó makó eza netá koma-kamaló ale gopa napa itimó áisi nene netá napagi ámina oko ale gopa napa inogo ive. ¹¹ Lekeza henokanoni ha netá nene ali lamaná iki gizapa amitamó nene, netá gihila nene éaho likimitive. ¹² Itó netá hagitana likimimó nene gizapa i guni amitamó nene, lekeli alévolé henoní nene alika éaho lehizeleketative. ^{13*} Ve hámakolímó kugulizaki ve lositalitini gelekelé ma oketaminogo ive. Lá itimó nene maga ve agika amekoko maga ve mukahá apilitimó onoiwe. Itó maga veloka gímize lamaná okoko maga ve áni go goselé inogo ive. Lekeza ámináminiki Ómasímíni hoza nemó itó moni henokanonímíni hoza nemó ganagana lelegí oko aleakaláa nomive.

Mosé lo hukoketa gakoki Izesú gosohá lo hukoketa gakoki

¹⁴ Loko lokago, Palisaio monó ve keza moni henokanonimú lagaváa gili miniaká a ve nenete giliake, gakola gili hazutazu amó. ¹⁵ Lá ikago, Izesú láa loko lo kimimó: Lekeza nene vegená kovogisaló veveso nounne liki amuza miliki mihina iaká niamóza, Ómasímo nene likigikámíni mogoaná geleaká noive. Vegenalite ániagamó nene vevesonoi netá geleaká noigo, Ómasímo áni goko gilimó nene mu-izapa oaká noive.

^{16*} Mosé lo hukoko li gakó itó Ómasímíni agepagutí gakó liaká a vetini gakó minoloko ova ova ike ike Zonitoka anitimó. Nenelotí veletoka nene Ómasímíni gizapaló minoakalímíni gakó lamaná hutilí oko vokago vegená mukilite lovasava iki Ómasímíni avogisagú vinigi lá iaká niave. ^{17*} Okulumaki mikasigi keza vo tolova itíve liki vi tolova itáimóza, Mosé lo hukoko li gakó nenémíni lotonáa hamokó ma haha aminogo ive.

Izesú vená kimisele ahuloakakumú gakó lo kimimó

(Mat 5:31-32; 19:19; Mak 10:11-12)

^{18*} Ve makolímóhe makolímóhe venala amisele ahulokoko haitó vená alitimó nene, ve vená huko ezega emega oakalímíni lihima alinogo ive. Itó ve makolímóhe makolímóhe ahulínita vená makó alitimó nene, ámina netalímíni lihima alinogo ive loko Izesú limó.

Lasaloki henonagi ve napagi kei gakó

¹⁹ Izesú anoza gakó makó láa loko limó: Henonavagi ve napa minamó. Eza gó luhuvagigó meinava iteko minamokó ale akoloko minamó. Itó gamena gamena lo gehaka like agoliza vizé vizé oko minoaká imó. ²⁰ Lá noigo, gohogó ve makó agulizá Lasaló éza agupeló halamé gizaleake henonagi vemámíni numuni sepekuka ako minake, ²¹ nosá nakutí litímitola alemó zimoláa ma nimiko natonazo loko geleko minoaká imó. Lá oko noigo, galate aniteke

* 16:13: Mak 6:24 * 16:16: Mat 11:12-13 * 16:17: Mat 5:18 * 16:18: 1 Koli 7:10-11

halamelalotí génimiaká amó. ²² Lá oko minake, gohogó vema helekago, ageló keza alímiki itiki Avalahani amatoka ahulimikago minamó. Itó alika nene henonavagi vema helekago, gale zitamó. ²³ Gale zimikago, meikú lemeko miluma maluma geleko minake, okenava oko ángamó nene Lasaló nene Avalahani amatoka noigo ánikagamó. ²⁴ Ánikogoake, sele loko láa loko limó: Avalahazo, aménegamaka, nenikumú milumaváne geleoko Lasaloni amiselekako agizani gosavatunú nagamikú lupizeoko oko genezáneloka naliko hulu nivisitího. Neza lokú imane miluma maluma golesa geleko nouho. ²⁵ Loko lokago, Avalahá láa loko limó: Gipánemaka, gelenape. Geza mikasiuka lagámini amupiló minanimóma nene mota asú okamole. Itó Lasaló nene miluma malumámini amupiló minamóma ámina oko asú okave. Itína nene Lasaloni alími hulu niago, géisi miluma maluma geleko noane. ²⁶ Itó liglikagú nene zuni napa aleko hukokamóma nenazo, imanelokatí lemeakaláa nomive. Itó nenelokatí iteakaláa nomive. ²⁷ Loko lokago, henonavagi vemámo láa loko limó: Aménegamaka, makó litoze, gele nemezo. Elane není numutoka ²⁸ izegipa nugináne ligizani lugaloka asú igo niave. Keza miluma apakú imane ikataze, Lasaloni amiselekako voko kagata alitive. ²⁹ Loko lokago, Avalahá láa loko limó: Óve, Moseni gakó itó Ómasímini agepagutí gakó liaká a vetini gakóma nemole. Nenema gilinitanae. ³⁰ Loko lokago, eza limó: Óe, Avalahazo, aménegamaka, mokáne, lá oko nomive. Heleneitikutí ve makolímó oteoko voko lo kemekiko, kigika ali viliganigave. ³¹ Loko lokago, láa loko limó: Keza Mosele itó Ómasímini agepagutí gakó liaká a vetini gakó gili ahuliaká nitamóma, ve makolímó heleneikutí oteoko voko lo kimitimóza, nene ámina iki gili ahulanigi anae, loko limó.

17

Golesa netakumú gala vizeaká gakó (Mat 18:6-7,21-22; Mak 9:42)

¹ Izesú eza izegipala zuhana gakó makó láa loko lo kimimó: Golesa netakumú gala vizeaká nene ha minanogo imóza, golesa netakumú gala vizé vizé iti ve nene agae, Ómasímo nana otatimó neve. ² Izeqipáne koma koma minakutí ve makolímó netá golesa alitive loko gala vizeko litimó nene Ómasímo nana otatimó neve. Gehani napa nene luvalaló nagá ziki age nagamikú ahelú itamola avilegeko Ómasímo genavagi netá golesa loló otanogo ive. ³ * Ehe, lekeza ligikika gizapa iki minalo. Likigive makolímó galana alekikoma, gahá ameko agata alezo. Lá okako, gei gakó gelekikoma lihimaivala ahulotozo. ⁴ Itó gamena hámakó zupa lihima netá alegetoloko vitimó nene gamena 7-ia geitoka oko nigivénega, némuni ogetutímó mulúne githiná okave loko lo gimitimó nene, nenemú geza ámina oko lihimaivala ahulotoko minozo, loko limó.

Gele alévolé oakate ale hutilí oletati gakó

⁵ Aposolo keza Guivahanima nene geza gele alévolé oakate ale hutilí oletazo. ⁶ Liki likago, Guivahanímó láa loko limó: Masteti gihila komámo goloko iteko zamú geleká noive. Nenémínoko gele alévolé oakatinía ma minatimó nene, nimuza za volane asutooko age nagamikú omane lemeko ote minamane liki li amitamó nene, gakotini gele lekemekoko hanuva lá inogo ive.

Gelekelé izegipa loleta hoza

⁷ Lekelikutí ve makolímuni gelekelé izegipala makó nene mikasigú hoza aleko minatikutí itó iza gizapa oko minatikutí únakala anitekiko, gizapa veva nenémo geza litá oko numukuka iteko nosánetaka noko minozo loko hanuva lo amitihe. ⁸ Lá oko nomive. Áisi nene láa loko lo aminogo ive: Géisi hoza aleaká lavolavo likeoko únaká nosá vatá onimikako, nonugo, hozaka asú okiko, alika gezaka vatá oko natane. ⁹ Loko lo amekiko, gelekelé izegipama eza gizapa vevámo lota hoza nene alekogó noiko, gizapa vevámo gele lamaná itihe. Ma alémo napa aminogo ive. ¹⁰ Itó mognatipogi ámina oko neve. Lekeza hoza gakó lolekutumó nene lílí i asú iikima leza gelekelé izegipa ánéa nene loletani hozagó alekune, miní ameko makó loló amune liki lilo, loko limó.

Izesú lokago halamé gizale ve 10 gilelemó

¹¹ Izesú Zelusalega vinogo Galilaia mikasigi Samalia mikasigi holúikú novike, ¹² apá makotoka aniteake noitigo, halamé vegená ligizani luga luga asú igo keza ángiake, zuha kemeaká netá nenazo liake hotokatí sele liki ¹³ láa liki lamó: Gizapa vele Izesugama, lelikumú milumavate gelezo. ¹⁴ * Liki likago, ánikogoake, láa loko lo kimimó: Lekeza viki gililitamolamú lukugupetini nene guguni giziaká ve nene kelepizilo. Loko lokago, keza nivago, kugupeló gizale netá gilili asú amó. ¹⁵ Gilili asú ikago, keitokatí hámakolímó

* 17:3: Mat 18:15 * 17:14: Liv 14:1-32

gileleake, ániogoake, atiginá oko gakó napagutí Ómasi agepoka lomo lomo, ¹⁶ Izesutoka vike agihúna geko akoake, agepoka limó. Ámina ve nene Zuta ve negopa, Samalia mikasigutí vémo lá imó. ¹⁷ Lá okago, Izesú láa loko limó: Ve ligizani luga luga asú igo gililikamóza, ve 9-ía keza hitoka vave. ¹⁸ Keza atiginá iki iki Ómasi agepoka linigi lamake, hanuva gatizá nivago, Samalia mikasigutí hetoka ve imane eza hámakó noahe. ¹⁹ Loko loake, ámina ve láa loko lo amimó: Gele alévolé anitímo gelémo zokokaze, nenemú oteoko vozo, loko lo amimó.

Ómasímo gizapa oketati gamena utó iti gakó
(Mat 24:23-28,37-41)

²⁰ Palisaio monó ve keza Izesuni loká itiki Ómasímo gizapa olimiaká ve napa hí zupa utó o lamaná itive liki likago, eza láa loko lo kimimó: Ómasímo gizapa olikimiaká netá nene lekeza áninigiko gonanalivagi utó aminogo ive. ²¹ Nenemú lekeza anosa makó ánigiki, eé, imaneloka utó okave, itó eé, elaneloka utó okave liki laminigave. Gilinahe. Ómasímo gizapa olikimiaká netá nene likigilikagú utó oko nemole, loko limó.

²² Itó izegipala zuhama láa loko lo kimimó: Minoko gamena makó alitati zupa nene, okulumakutí lumu ve gihila neza gamena hamokó zupa utó ugo ániganigi lagava gilitamóza, ma ángaminigave. ²³ Nene zupahé eé, imane lelitoka utó onoiwe, itó eé, keitoka utó onoiwe liki lí likimikíkoma kémegetiki vamilo. Itó giliko, lamaná amino. ²⁴ Gopisína nene okulumá nekisalokatí melevezá okago, vo lutegeaká noiwe. Ámináminoko okulumakutí lumu ve gihila neza ato gamena alitokiko mikasi nekisa vokisaloka nene vejená mukitó keza není ángi asú inigave. ²⁵ Lá oko nemóza, oko moloko oaká nou netá ángiaká nia vejenalite není ángi golesa iiki miluma netá mukí nimitave liki linitinamóma neve. ²⁶ * Noá mina zupa nene vejená keza miniki aliki amó ámina iki okulumakutí lumu ve gihila není gamena alí noliko ámina inigave. ²⁷ * Keza iza goula nosá nake vená meina-kona ake, zuguzugu zezezege viziki miniliki nivago, Noá eza vená izegipala kelémo sipigú itekago, nagamí napa veleko anitike kepele gesá imó. ²⁸ * Itó Lotí mina zupa áminagó amó. Keza iza goula nosá nake meina-kona ake, hozagaza aliki zuhaina zahaina ake, numuni lukí giká lá iká iki Lotini gakó gelemiki niago, ²⁹ Lotí eza Soto apá ahuloake novigo, okulumakutí nene lánihakó netá ló gulumavagi limike vejená kepele gesá imó. ³⁰ Okulumakutí lumu ve gihila neza minoko utó ito zupa nene mukí vejená keza ámina inigave. ³¹ * Ámina zupa nene numuni numupitó nita vejená nene atiginá iki numúitokatí henóini ma aliki vamitakumule. Itó vejená hozáitoka minatatotí henonimú giliki atiginá iki numutoka amitakumule. ³² Lekeza Lotini venalámitokagó gili minalo. ³³ * Makó keza nene kigika kemeníni ali gikitiki ali minitiki vejená nene kigika kemeni gopa inogo ive, itó makó keza kigika kemeni vínasi ahulatamó nene alévolé kemetamenigi minanigave. ³⁴ Neza lo likimitoze, gililo. Ámina holugú nene ve losi keza hamó holomaló akinitáikutí maga ve alémokoko maga ve ahulomikiko minative. ³⁵⁻³⁶ Vená losi ámina iki nosá isiki minatáitotí Ómasi nenémo vená magáa alémokoko magáa ahulomikiko minanogo ive. ³⁷ Loko Izesú lokago, izegipala zuhamate loká itake Guivahanitemaka, nene netá hitoka utó itive. Liki likago, eza láa loko limó: Anuva i netalímo nama gosúveha maú zigo alegesá iaká niave. Ámina oko kigika anuva i vejená minató minató goní napa inigave, loko lo kimimó.

18

Goní ale heleaká vegi gevoná venaki keí anoza gakó

¹ Izesú nene izegipala zuhama viki akamiki gamena gamena goselekaselé amiki Ómasiloka liliki viki minikoma nene Ómasímo gele kimitikumú anoza gakó makó láa loko lo kimimó: ² Apá makotó nene goní ale heleaká ve makó minamó. Áisi nene Ómasi noimó itó vejená niamó keikumú ma gelesá amimó. ³ Lá onoiwo, ámina apató nene gevoná vená makó minamó. Áisi nene goní ale heleaká ve noitoka gamena gamena vike láa loko lo ameaká imó: Geza gala venémo nelémo golesa inogo igo nugutó vizitane loko noluve. ⁴ Loko lo ameaká noigo, goní ale heleaká vemámo gevoná venámámini gakó gamena hána gele ahuloake minoaká imóza, minoko agikatunú láa loko limó: Neza Ómasi noimó vejená niamó keikumú ma gelesá amumóza, ⁵ gevoná vená imanémo negénegé gakó loaká noiwe. Lá oko loloko ova ova oko nominiko, goselé nepelekatize, nenemú alémo vatí oko ámina gakó apele hilitove loko limó. ⁶ Loko Guivahanímo lo asú oake, láa loko limó: Goní ale heleaká ve gínikahámo gakó limó nene mota gilinahe. ⁷ Olile. Lekeza Ómasimú nanave liki

* 17:26: Apí 6:5-8 * 17:27: Apí 7:6-24 * 17:28: Apí 18:20-19:25 * 17:31: Mat 24:17-18; Mak 13:15-16

* 17:33: Apí 19:26; Mat 10:3, 16:25; Mak 8:35; Luk 9:24

liaká niave. Eza kelémo etó i vejenala zuhamate gamena gamena negénegeka liki niiko ale vevesoketamitimó neve liki nilahe. Itó gele ahulukoko minatimó nehe. Lá oko nomive.⁸ Neza láa loko lo nolukumuve. Eza ale akutoko ale vevesoketanogo ive. Lá itimóza, okulumakutí lumu ve gihila neza minoko atiginá oko imane mikasiuka ato zupa nene, není gelegele minatamoláa nene ma nitahe minamitahe loko nagata gululusi noguluve, loko limó.

Palisaio monó vegi kugupe meina aleaká vemuki anoza gakó

⁹ Ve lugáate kezáinimú gelego vevesokago, kigivéikininimú gelego lemeaká noigo, Izesú ángoake keikumú anoza gakó makó láa loko limó: ¹⁰ Ve losi keza Ómasiloka linigi monó numuni napagú itesimó, makó nene Palisaio monó ve, itó makó nene takisiló mohona oko moni gumina aleaká ve. ¹¹ Palisaio monó vemámo ote hee lonoike ezámú lá oko geleake láa loko limó: Kee, Ómasizo, ve lugáa keza laskoli miniki guminatamina iki vená loká iki miniaká niave. Neza keikitana ve minamuve, itó takisi ale ale ve hé melanegitana minamuve. Nenemú gegepoka noluve. ¹² Neza holisigú holisigú gamena lositá nene monokumule loko nosáneta mosekuke minoaká nouve. Itó moni henokanoni nániguke 10 10 nekutí hamopamó nene monokumule loko moloaká nouve. ¹³ Loko lokago, takisi ale ale vemámo nene akelepauka minake okenava oko ániganogo avoza helekago, gasínamake minake, láa loko agepoka limó: Kee, Ómasinemake, ve golesa není gigika hize nemezo loko limó. ¹⁴ * Gilinahe. Takisi ale ale vemámini lihimavala ahulo asú omikago numunaloka atiginá oko vimó. Palisaio monó vemámini lihima nene ha minamó. Lá onoinazo, kezáini kugulizáini ali otita vejenalitini kugulizá liminogo ive. Itó makó keza kezáini kugulizáini aliki limiki milatamó nene Ómasímo kugulizáini ale napa inogo ive, loko limó.

Izesú izegipa koma kama nónohá zeketamó

(Mat 19:13-15; Mak 10:13-16)

¹⁵ Itó ve vená keza izegipáini nene Izesú noitoka agizanitunú kugupeló aleko nónohá zeketative liki kilímiki viaká amó. Lá niago, izegipala zuhamate gahá kimikago, ¹⁶ Izesú nene sele lo kimike limó: Lekeza izegipa koma ahulikimikiko nenitoka atave. Nenémináa keza Ómasímini avogisaló viakalímimi mututoní nianazo, lí hoipa ikitamilo. ¹⁷ Neza lamaná lo likimitoze, gililo. Makó keza izegipa namuni monokú vávani iki itiaká niamó nenéminiki monokú itemitamó nene, Ómasímo gizapa okimiakakú keké iteminigave, loko limó.

Henonavagi gizapa ve

(Mat 19:16-30; Mak 10:17-31)

¹⁸ Itó monó gizapa ve makolímó Izesuni loká otoko Tisá lamanámaka, neza nana okinake alévolé nemetameni alitomó neve. ¹⁹ Loko lokago, Izesú láa loko lo amimó: Geza nenikumú ve lamanale loko nanamú nolane. Lamaná améneho Ómasi hámakó noize, makó nominazo, není mogonamú gele hee lominoko nolape. ²⁰ * Itó geza gapo lota gakó gelenane. Láa lokove: Ve aleve suni ale gopa oko huko ezega emega amo. Geza vejená kepele helemo. Gumina amo. Geza soza hakupá gakó lamo. Geza izokahiko amekahiko kugulizá ale otezo. ²¹ Loko lokago, gizapa vemámo láa loko limó: Neza ámina lo huka gakó mukí nene izegipa namutotí apí oko ámegetoaká noumóma neve. ²² Loko lokago, Izesú geleake, láa loko lo amimó: Netá hámakó velesá loló amanimó nene ale hee litanize. Geza voko henokanoka mukí nene meináló moloko moni alekoko gohogó vejená kemekoko, oko némegetozo. Itó lá okako okulumakú helisa henoni utó ogetanogo ive. ²³ Loko lokago, ve eza henokanona vai oake minamó nenazo, gona moloko kimitohe loko giligo gena imó. ²⁴ Lá okago, Izesú ángoake limó: Henokanóiki vejená keza Ómasímini lapanató silipa iki ititamó neve. ²⁵ Kamele izámo nakasi vovónagú voakaláa vávani oko nomimóza, henokanóiki vejená nene Ómasímini lapanató voakaláa nene ámina oko genavagi golesa neve. ²⁶ Loko noligo gele vejenalite láa liki lamó: Íi, láa lokoma éahinima Ómasímo agutó vizekiko minoloko voko minative. ²⁷ Liki likago, Izesú lo kimimó: Vegenalite nenémini itamoláa nomimóza, Ómasímo loló itove loko agata gili netá nene vávani okogó loló oaká noive. ²⁸ Loko lokago, Pitá láa loko lo amimó: Gelenape. Leza mukí netá matate ahulo asú okunike geí gémegetokuninazo, alika nene meinava alesá nehe. ²⁹ Loko lokago, Izesú Pitaginima láa loko lo kimimó: Lamaná lo likimitoze, gililo. Makó keza numúini apáini nehe vená izegipáinihe gouna zuhahe izóikini améikinihe Ómasímini lapanakumule liki ahulikitiki iki nemegeosaló atamó nene, ³⁰ nenémini meinava nene mikasiuka napaló alinígave, itó miniki okulumakuka alévolé kemetameni alinígave, loko lo kimimó.

* 18:14: Mat 23:12; Luk 14:11 * 18:20: Gá 20:12-16; Gapo 5:16-20

Izesú ezáa alika hiliti gamenamú epoapoga ligo gamena losive makole imó
(*Mat 20:17-19; Mak 10:32-34*)

³¹ Izesú nene izegipala zuhama amegesa vizitoka kelémo moloake láa loko lo kimimó: Gililo. Leza Zelusalega noitune. Itekuko, Ómasímini agepagutí gako liaká a vete okulumakutí lumu ve gihila nenikumú epoapoga linamó mukí nene alévolé inogo ive. ³² Hetoka vetini gizakú nilími milikiko, keza gopoguka linitiki galaná milinitiki, gítuhú initanigave. ³³ Lá iiki uheni nagatunú nipiliiki nipili hilikiko, gamena losive makole minokinake heleneitokutí goha otinogo uve. ³⁴ Loko lokago, keza gelego ligitagani imó. Mogonáa hitokimikago, ámina gako gilinigí gili vevesamamó.

Zeliko numutoka agómula lika ve monimú voká vokató ve ale pulusotamó
(*Mat 20:29-34; Mak 10:46-52*)

³⁵ Izesú eza vike Zeliko numutó ale alitamó. Ale alitokago, gapo agilikaloka nene agómula lika ve makó minake, monimú voká vokató minoaká imó. ³⁶ Lá oko noike, mukí vejená vigá igá niago, mogonamú loká okimikago, ³⁷ keza Nasaleta numutotí ve Izesúma noave. ³⁸ Liki likago, gako napagutí sele loko Izesuvo, geza Tevitini agávolagamaka akagá oletatane loko lo mololeta vetemaka, nenikumú miluma gelenetamane. ³⁹ Loko lokago, goí iki niva vejenalite legesó oko minative liki gahá amemóza, áisi nene gele ahuloake gamoga gike sele like geza Tevitini agávolagamaka, nenikumú gigika hizino. ⁴⁰ Loko lokago, Izesú geleake, gapoló noike lekeza nenitoka alímiki alo. Loko lokimikago, agómula lika vema Izesutoka alímiki ikago, loká otake limó: ⁴¹ Geza nana netá alegetatokumú nolane. Loko lokago, agómula lika vemámo Guivahanínemaka, nogómulané ale goloutonetatane loko noluve. ⁴² Loko lokago, Izesú láa loko lo amimó: Gogómulaka goloutino. Nenikumú gele alévolé anitímó gelémo zokokaze. ⁴³ Loko noligo, áminasitó agómula goloutamó. Goloutokago ániogake Izesuni ámegetoko vike Ómasi agepoka limó. Lá noigo, ániaga vejená keza ámina iki Ómasi agepoka lamó.

19

Izesuko Zakiasiko

¹ Izesú nene Zeliko numutoka aniteake, avilegeko vinogo igo, ² ámina apató ve makó minamó, agulizá Zakiasí, áisi nene takisi aliaká a vetini agulizaki venini. Eza henokanonámo vai o mina ve minamó. ³ Áisi nene ve alínipa nenazo, Izesuni agupeló ániगतove lokoko vejená mulusigú minake Izesuni ániगतike, ⁴ ololu loko vejená kivilegeake, vike zaló iteko noike imaneló nougo Izesú imaneloka okiko ániगतove. ⁵ Loko geleake noigo, Izesú eza áminaló o aniteake, okenava oko ániogake láa loko lo amimó: Zakiasizo, litá oko lemeno. Itína neza geí numukuka vitíive loko nouve. ⁶ Loko lokago, litá oko lemeake, mulunagú lamaná geleko numunauka alémoko vimó. ⁷ Vi itikasigo mukí vejená keza ániगतike, gili golesa iake áisi nene nanamú ve golesámini numukú iteko noive. ⁸ Liki likago, Zakiasí áisi nene Guivahanímini avogisaló oteko láa loko limó: Guivahanínemaka, gelezo. Moni henokanóne lelegí oko gona molokinake lugáa nene gohogó vejená kiminogo uve. Itó vejená lugáatini moni henokanóini soza saza luke avilegeko aleaká umó nene neko, aleko iteko hamó alutó nene losive losive kimitove. ⁹ Loko lokago, Izesú limó: Nenémini hoza aliaká nia vemú nene monóini nomí vejená niave liki liaká niamóza, imane ve Zakiasí nene ezagi Avalahani agávolaho Zuta ve gihila noive. Itína aí numukú oko ániगतómoma agutó vizeaká netá mota utó okave. ¹⁰ * Okulumakutí lumu ve gihila neza tolova inita vejenakumú vitagá oko kugutó vizitove loko lumumóma neve, loko limó.

Moni gó ligizani luga luga asú igo nenémini anoza gako
(*Mat 25:14-30*)

¹¹ Izesú Zelusalega ale alí noligo, gakola gele vejenalite itína Ómasímo gizapa olimiaká ve napa alémo utó iti gamenava alitokave liki nigelego, gili hee litave loko Izesú anoza gako makó láa loko lo kimimó: ¹² Agulizaki ve makolimo agulizaki ve napaloka voko lokogo mikasi gizapa ve nenémini akilí hitonimikiko atove loake, mikasi gohauka vinogo noike, ¹³ gelekelé izegipala ligizani luga luga asú igo sele lo kemeake, moni gó hamopamó nokimike láa loko limó: Lekeza imanetunú lilí iki ali hutilí iki niko, atiginá oko ániगतove. ¹⁴ Loko loake, vokago, aí gizapaló mina vejená lugáate gili golesa imiake, vejená kimisilikago, ámegetiki vake agulizaki ve napama láa liki li amemó: Géisi nene mikasi gizapa vele minamítane loko nolune. ¹⁵ Liki likago, agulizaki ve napamámo nene gopa voko minake mikasi gizapa vémini akilí amekago, atiginá imó. Atiginá oko vike nene gelekelé izegipala moni kimi vejená láa loko alesa molo kimimó: Moni lukumumóma nene hozaváa alikago, nanakí akohekahe, alikalo loko alesa molokago, ¹⁶ gelekelé izegipa

* 19:10: Mat 18:11

makolimo anitike limó: Guivahaninemaka, geza moni gó hámakó nemenimó nenetunú hoza aleko gó gosohá ligizani luga luga asú igo ale utó molokuve. ¹⁷ Loko lokago, láa loko lo amimó: Geza gelekelé ve lamaná noane. Vatí oko hozaló gizapa okane. Geza ha netalímimi hozaváa ale guni oko gizapa okanize, nénisi numuni apá ligizani luga luga asú igo nenetini gizapa ve loló ogimikugo minatane. ¹⁸ Loko lokago, gelekelé izegipa makolimo anitike limó: Guivahaninemaka, geza moni gó hámakó nemenimó nenetunú hoza aleko gó gosohá ligizani lugaloka asú igo ale utó molokuve. ¹⁹ Loko lokago, láa loko lo amimó: Vatí okove. Geza numuni apá ligizani lugaloka asú igo nenetini gizapa ve minatane, loko lotamó. ²⁰ Itó gelekelé izegipa makolimo aniteake láa loko limó: Guivahaninemaka, moni gó hámakó nemenimó nene gotunú asapú oko otoha oko ale molonoumó imane aleko nouve. ²¹ Geza gínikaha ve minokaninazo, ve makolite hoza alikago gihiláa utó okago aleaká noane. Itó ve makolite mini zuhá inató gihila omolokago nosáneta aleko asutoko noaká noane. Neneimú gelekuke geikumú nehelele vizekago monika nene gizapa oko alenoumole. ²² Loko lokago, gizapa vemámo láa loko lo amimó: Gelekelé izegipa golesa gezaka lani gakó nene ale viligoko goní nogetuve. Geza gínikaha ve noutímimi mogona gelenane. Ve makolite hoza alikago gihiláa utó okago aleaká nouve, itó ve makolite mini zuhá inató gihila omolokago nosáneta aleaká nouve. ²³ Nene mogonáne gelekanimóza, moníne nene peni numukuka molokalo moniló miní amiki nimilinitiko neza goha inake voko alitonazo. Nanamú neve. ²⁴ Loko loake, aí amatoka oti mina vejená láa loko lo kimimó: Moni gó aleneimó nene aliiki moni gó ligizani luga luga asú igo alenei vema nene amilo. ²⁵ Loko lokago, keza ininá iake Guivahanitemaka, eza nene moni gó ligizani luga luga asú igo mota alekamole. ²⁶ * Liki likago, eza limó: Neza gakó makó lo likimitoze, gililo. Ve makolimo Ómasilokatí netá makó alenokoma gizapa lamaná itimó nene Ómasimo goha miní ameko aminogo ive. Itó netá makó gizapa lamaná amiti ve nenémo ale nouhe loko agata gilitimóza, Ómasimo goha ipá oko alinogo ive. ²⁷ Itó není gala ve nene nenikumú Guivahanite loló amitane liki liaká a vema kilímiki iki není nogómulaló kipili hililo, loko limó.

Sigaga litanigi ago Izesú Zelusale numutoka vimó
(Mat 21:1-11; Mak 11:1-11; Zon 12:12-19)

²⁸ Izesú láa loko lo kemeake, Zelusalega vinogo ale goí o kemeko novike, ²⁹ Olivi agoka gohalaló numuni apá lositá nene Petepage itó Petania minasitó ale alí nolike, izegipala zuhagutí ve lositá nokimisilike, ³⁰ láa loko lo kimimó: Lekeza helega numutoka viki anitiiki toki iza akaleva nagá zinamóma nene vejená kogohí geko mohona onamitimoláa nene ániigiiki vinasiki aliki alizo. ³¹ Vinasiki aliki nisiko, ve makolimo nanamú nivinasasive loko nolikoma, Guivahanimo hoza nego ámina izamú limiselekago nousive, liki li amilizo. ³² Loko loake kimiselekago, keza vasigo, Guivahanimo goí oko lo kimi gakotó ámina netá utó imó. ³³ Utó okago, toki iza akalevámimi nagá nivínasasigo, iza amelage lekeza nene toki iza akalevama nanamú nivínasasive, ³⁴ liki likago, keza láa liki li kemesimó: Guivahanimo hoza nego imane izamú lokago oko novínasasive. ³⁵ Liki likasigo, iza amelage gili kimikago, toki iza nene Izesutoka aliki vikasike, hepekumú luhoaká góini gololohá iki ámina toki iza akalevámimi amegesaló milikasike Izesú nene iza amegesaló ahulimikasigo, ³⁶ toki izámimi amegesaló minoake novigo, vejená keza hepekumú luhoaká góini nene gololohá iake gapoló nene avilisá itimi vamó. ³⁷ Lá niago, Zelusalega ale alitoake, Olivi agokalotí lomo noi gapoló vo alí noligo, izegipala zuha mukilite kogoliza nivizeke alévolé suni aligo ániagakumú nene gakó napagutí Ómasi agepoka lake, ³⁸ * láa liki lamó: Guivahanímimi gakotó agulizaki ve napa anitelimikane. Ómasimo nónohá zegetatize. Okulumakú nonagá oletino. Ómasímimi mogonáa nene lapanalagi minino. ³⁹ Liki likago, vejená alegesá iki minakutí Palisaio monó ve makolite holúikú niake láa liki lamó: Gizapa ve geza izegipaka zuha imane láa liki lamilo loko lo hukoketamane. ⁴⁰ Liki likago, eza láa loko lo kimimó: Neza lo likimitoze, gililo. Keza gakó lamiki ha minatamó nene, gehani imanete gakó napagutí negepoka linigave, loko limó.

Izesú Zelusale vejenakumú ive imó

⁴¹ Lá oake, omo anitike Zelusale apá nánigake, agika nohizigo ive napa ike, ⁴² láa loko limó: Lekeza nonagá iki minata gakó gili ahuliaká niamó nene itína gamena gili alitanazo. Lá onoi móza, mogonáa halá geneimó nenazo, lokogómulatunú ániigi vevesaminigave. ⁴³ Gamena makó lekelitoka noiko, gala velinite iki numutini apatini hizi vigiiki mikasi amumú iki geisa hiziiki, likilími vigiiki ⁴⁴ vená izegipatinigi lekehelú iki likipili gesá inigave. Lá niiki numutini zivi akúvasivi niiki geha numuni nene ziki akúvasikiko gehani nene amupiló amupiló iki mililiki itekutí gululupaso asú inogo ive. Lekeza Ómasimo lukugutó

* 19:26: Mat 13:12; Mak 4:25; Luk 8:18 * 19:38: Age 118:26

vizinogo lekelitoka amómámini mogona gili vevesamamó nenazo, ámina suni lekelitoka utó oleketanogo ive.

Monó zavirusave lo hukoketamó

(Mat 21:12-17; Mak 11:15-19; Zon 2:13-22)

⁴⁵ Loko Izesú loake, monó zagusaveú itike netá matá meina konaló vejená kimisele nahulake, ⁴⁶* láa loko lo kimimó: Ómasímo li gakó nene monó gotolaú láa liki luhuva gizinamóma neve: Není numunimú Ómasiloka loaká numunive liki litave. Láa liki gizinamóza, lekeza guminaló veta halá giki miniaká nia geha mulí lilí ikave.

⁴⁷* Loko lo kemeake, gamena gamena monó zagusaveú nene monó gakó lainim-oketamó. Lá noigo, guguni giziaká ve napagi monó mogona apí-ikimiaká vegi itó Zuta vejenalitini monó gizapa vegi keza apili hilita gapováamú vitagá amóza, ⁴⁸ vejená mukilite Izesú li gakó nene gámemé iki gili minikago, Izesuni apili hilita gapo ali utó amamó.

20

Izesuni zámuzamú loká itamó

(Mat 21:23-27; Mak 11:27-33)

¹ Lá niago, nene gamenaló Izesú nene monó zagusaveú itike monó lainim-oketoko gakó lamaná lo utó oko lo nokimigo, guguni giziaká ve napagi monó mogona apí-ikimiaká vegi monó gizapa vegi iki antiaké, ² imaneloka azozá loló ani netá nene éhini gakotó lá ane, itó éaho litó loló ape, lo lemezo. ³ Liki loká imikago, eza láa loko lo kimimó: Nezagi ámina oko gakó hamó loká oleketanogo uze, lekeza li nimilo. ⁴ Zoní monó nagamí holokimiaká hoza alimó nene, hikutí ale utó ive. Ómasímini gakotó alihe itó vejenalitini gakotó alive. ⁵ Loko loká okimikago, kezaitoka ligili hagili ake nene gakotó nana oko lo viligoko lo amitune liki gelemó nene gopa okago, láa liki gelemó: Leza Ómasilokatí ale utó imole loko litunimó nene, íi, lekeza nanamú Zonini gokoláa gili alévolé amave loko linogo noimó. ⁶ Itó vejená muki nenete Zonikumú nene Ómasímini agepagutí gakó loaká veve liki linamóma nenazo, hoza alimó nene hanuva vetinigití ale utó imole loko litunimó nene gehanitunú lipili hilingave. ⁷ Liki nigeleke Izesuni láa liki li amemó: Zoní éhitotí hoza ale utó ihe loko nenémini mogonáa gele vevesamune. ⁸ Liki likago, Izesú láa loko lo kimimó: Láa likima nene netá matá imane loló oaká nougo ángiaká niamó nene éhini gakotó lá oaká nouhe nenegi nezagi áminagó oko lo lekememinogo uve.

Vain nagá minimú anoza gakó

(Mat 21:33-46; Mak 12:1-12)

⁹* Loko loake, anoza gakó makó nene Izesú láa loko vejená lo kimimó: Ve makolímo vain nagá mini nene zuhá oake, gizapa iki nitiko meinava likimitove loko vejená makó gutá kemeake, haitó mikasiloka hotó voko gamena hána minamó. ¹⁰ Noigo gihila guzá lati gamena alitokago, gizapa nia vejená nenete mikutí nagá gihila lugáa alinitiki atave loko gelekélé izegipa makó amiselekago, vo anitekago, keza mini gizapa vemate ámina ve apiliaké nagá gihila amemake hanuva amisilikago golohá veva noitoka vimó. ¹¹ Lá okago, gelekélé izegipala makó goha amiselekago vimó. Vo anitekago keza mini gizapa vemate gopoguka litake apiliaké, hanuva amisilikago vimó. ¹² Lá okago, makóma amiselekago vimómámini agupe apilivi hukivi iake, hetoka alími ahulamó. ¹³ Lá ikago, mini amelaho láa loko limó: Neza nana itove. Ma alími lamaná itahe loko nigika amenou gipáne amiselekugo vitize. ¹⁴ Loko geleake, amiselekago voko áminaló anitekago, mitó gizapa vemate ángiaké kezaitoka láa liki ligili hagili amó: Imanémo nene mikasi amelahini gipala nenazo, áisi nene minokoko olopa ve molokoko imane hoza ale lá itimó nenazo, helisa henonima lelí loló itive loko mota apele hilitune. ¹⁵ Liki liake, nagá gihila mikutí ahelú iliki vake losé apili helemó. Lá inamó nenazo, nagá mini amelaho aniteoko ámina mikú hozaló vema nene nana oketative. ¹⁶ Áisi okoko gizapa vema kepele heleoko ámina vain mini nene haitó gizapa ve lamaná lehizeketanogo ive. Loko Izesú lokago, giliake, keza eé, lá oko nomive lamane. Liki likago, ¹⁷* geleake, gonú nokipilike láa loko lo kimimó: Láa likima monó gotolaú gakó láa liki luhuva gizinamóma nenémini mogonamú lekeza nanave liki nigeleve: Numuni giaká vete gehani napa makó ángi ahulamó nenémo geha lapusa alévoleláa loló oake noive.

¹⁸ Ve makó nenete ámina geható velehé limitamó nene ziki nogotanigave. Itó ámina gehani nenémo ve makolímini amupiló alemó zitimó nene, ámina ve nene zeko lanahana inogo ive.

* 19:46: Isa 56:7; Zel 7:11

* 19:47: Luk 21:37

* 20:9: Isa 5:1

* 20:17: Age 118:22

Kugupe meina hizeaká gakó
(Mat 22:15-22; Mak 12:13-17)

¹⁹ Loko lokago, monó mogona apí-ikimiaká vegi guguni giziaká ve napagi keza ámina anoza gakokutí gehanimú limó nene Izesuni ángo ahulunikumú lokave liki giliake, ámina gamenaló agizató alekinake nagá amitune liki lamóza, lá itunimó nene vegealite nana ilitatave liki kehelele vizimó. ²⁰ Kehelele vizekago, Izesuni apilita gamenamú gizapa iki niake keikutí ve makó kimisilikago, vake amamaka miliki minake, Izesú gakó lo gopa itikumú amamaka moloko noinake gakó makó lokiko hee lamikoma agulizaki ve napámini agizakú molokoko nagá amitave liki vevesina vegetana lilí iki minake, ²¹ Izesuni láa liki loká itamó: Tisalemaka, geza ve vená lainim-okimiaká noani gakó nene hee lokogó nego geleaká nouné. Geza vege ná mukí ángo hamó lelegí oko ángogokanike, Ómasímini gapo kelepize vevesoaká noane. ²² Geza nanave loko nogelene. Loma apatoka gamanímini agulizaki ve napa Sisani nene takisi moni ameaká nouhá nene etahe etamive. ²³ Liki lamó nene etamive loko lokikoma gamaniloka goní otatune itó vatí okove loko lokikoma Zuta vegealite gili golesa itave liki amekú miliki la gakó nogilike, láa loko lo kimimó: ²⁴ Lezeza moni makó nelepezilo. Ámina moniló noi vogunahana imanegi itó luhuva imanegi éhini neve. Loko lokago, gamani ve napa Sisani neve. ²⁵ Liki likago, láa likima nene, gamanimo voká loaká noi netá nene gamani amilo, itó Ómasímo voká loaká noi netá nene Ómasi amilo. ²⁶ Loko Izesú limó nene gámémé iki linamómámini gelehugitú lá oko avilegekago, sigaga liake kegepaló gena okago, vegealitini kovogisaló agizató alemisá amó.

Hilinitakutí otiakakumú loká itamó
(Mat 22:23-33; Mak 12:18-27)

²⁷ Lá okago, Satukaio monó vege ná keza hilinitakutí otisá amave liki liaká a vege ná lugáate Izesutoka iake, ²⁸ * láa liki loká itamó: Tisalemaka, Mosé nene luhuva láa loko gizo lemeneimóma neve: Ve makolimo vená alitimó nene, izegipa getamoko mino-loko voko helekikoma, agunalámo ámina gevoná vená alekoko uvolaho hili vemú izegipala geto molative loko luhuva gizamó neve. ²⁹ Lá okanazo, uvolaho agunala 7-a minamó. Lá iki niake ganá ve nenémo vená aleake, minoloko novike izegipa getamike helekago, ³⁰ agunala makolimo áminámini okago, ³¹ agunala makolimo áminámini okago, keza ve 7 nenete ámina vená ali volaló imaló iki minake izegipa getamake hili asú ikago, ³² ámina gevoná vená nene minake alika hilimó. ³³ Ámina ve 7-a nenete ámina vená ali volaló imaló iki minamó nenazo, hilinitakutí goha otita gamena nene ámina vená nene éhini venala minative.

³⁴ Liki likago, Izesú láa loko lo kimimó: Lezeza imane gamenaló vená aliká itó vená alimi kimiká iaká niamóza, ³⁵ Ómasímo vege ná makokumú nene alika gamenaló hilinitakutí otitátímini mututoní niave loko loketonoimóma nenete vená alisá amave, itó vená alimi kimisá amave. ³⁶ Keza ageló nenéminiki goha hilisá amave. Hilinitakutí otita vege ná nene Ómasímini mututoní miniki gosohá kemetamenigi minanigave. ³⁷ * Itó heleakakutí oteakakumú nene lo likimoto, gililo. Mosé ámina netakumú gakó makó lo lemeneimóma neve. Eza zamukutí ló guluma i gakó gizake hele vegealitini mogonamú gilike Guivahanimú nene láa loko limóma neve: Eza Avalahani Isakani Zakoaponi keí Ómasi minamó nominave. ³⁸ Loko limó nenazo, hele vege naki ha nia vege naki nene Ómasímini agómualó nene ha nia vege nakó niave loko ángo nominamó nenazo, nenemú kemení helenei vegealitini Ómasi negopa, kemená hanuva ne vegealitini Ómasi noinazo, Ómasimú gili zaginake hele vege naki hanuva nia vege naki keí Ómasi noive. ³⁹ Loko lokago, monó mogona apí-ikimiaká ve lugáate tisalemaka, gakó lamaná lokane. ⁴⁰ Liki liake, goha gámémé iki loká itakumú kehelele vizekago, loká itamisá amó.

Gologí oketative loko lo moloketa vemú loká oketamó
(Mat 22:41-46; Mak 12:35-37)

⁴¹ Lá niago, eza láa loko lo kimimó: Gologí oleketative loko lo mololeketa vemámo agulizaki ve napa Tevitini agávolaho noive liki nanamú liaká niave. ⁴² * Tevití eza Ómasi agepoka liká nama liká a gakokutí láa loko luhuva gizonimóma neve: Mezaú ve eza není Guivahaníne nene není nigizani zamagaloka minoloko voko noako, ⁴³ gala vega nene gigisa lapuvauka ahuloketanogo uve loko lo amimó neve. ⁴⁴ Tevití ámina vemú nene Guivahaníneve lokamó nenazo, gologí oleketative loko lo mololeketa vemámo nana igo Tevitini agávolahogó neitive. Tevitini guivahanigi neitive.

Monó mogona apí-ikimiaká a vemú alévolé oko lo hukonoimole
(Mat 23:1-36; Mak 12:38-40)

* 20:28: Gapo 25:5 * 20:37: Gá 3:6 * 20:42: Age 110:1

⁴⁵ Loko Izesú loake, vešená mukilite nigelego, izegipala zuha láa loko lo kimimó: ⁴⁶ Monó mogona apí-ikimiaká vemú lekeza, ehe. Keza nene luhiaká gó hána luhatakumú, itó maketiloka vešená makolite geké vaké likitatakumú, itó monó numukú numukú vešená kovogisalo minoaká holomaló minatakumú, itó nosánetá napa ninató agepaló iti mína siató minatakumú kumu heleaká noive. ⁴⁷ Keza gevoná venalitini henokanoni gumina i asú iká itó kegepatunú soza miliki Ómasi agepoka hána liki Ómasiloka liká iaká niave. Ámina ve nenete lihima napa genavagi alinivage, loko limó.

21

Gohogó vená gevonalímo moni ahulamó
(Mak 12:41-44)

¹ Izesú nene monó zagusaveú minake okenava oko ániagamó nene henóiki vešenalite moni moloaká pokisigú moni nimilago ániagamó. ² Lá noigo, gohogó vená gevoná makolímo golohá moni lositá nene áminagú nomolago, ániagoake, ³ izegipala zuha láa loko lo kimimó: Neza lamaná lo likimitoze, gililo. ⁴ Vegená imanete vai o mína monigutí ahulamóza, vená gevoná imanémo gohogó noikutí nosá meina hizitimoláa ahulo asú okamó nenazo, áisi moni ahulamó nenémo keza moni ahulamó kivilegekamó gelekave, loko limó.

Monó zausave ali golesa itakumú epoapoga limó
(Mat 24:1-2; Mak 13:1-2)

⁵ Izegipala zuha makó nenete monó zagusave nánigake gehani lamanaláatunú ginamó itó gonanalisi lamanaláa áminaló minamó nene ániagiake sigaga nilago, Izesú láa loko lo kimimó: ⁶ Lekeza imane netá itína nánigamó nene alika gamena atitó nene lova ve makolite imaneló gehani muki apiliki teke vizikiko, gehani nene amupiló amupiló iki mililiki itekuti gululupa so asú inogo ive. ⁷ Loko lokago, keza loká itiki monó gizapa velema, itína lani netá nene nanahé gamena utó itive, itó nana anosa utó okiko ániogokinake lani netá nene mota alévolé inogo ive loko litune. ⁸ Liki likago, eza láa loko limó: Ehe, lokogoka vizitakumú gizapa ilo. Vegená mukilite nanitiki nugulizató liki okulumakuti lumu ve gihila nezama nouve nilikoma, itó gamena mota ávatihá okave nilikoma, kémegetiki vamiló. ⁹ Itó mikasi makotokatí lova napa hiziki niiko, itó holutikutí lova utó noiko, lekehelele vizemino. Nenémini suni nene goí oko utó itive loko lonoimóza, mukí netá matá litá oko asú aminogo ive.

Gopoguni nimilikitiko anosa napa utó itive
(Mat 24:3-14; Mak 13:3-13)

¹⁰ Loko loake, miní amike láa loko lo kimimó: Numutó namató ve mukí nenete gala venini lova ali nikimiko, agulizaki ve makolímini zuhagi makolímini zuhagi lova hizinivage. ¹¹ Itó mukí mikasiuka imimá napa noiko haitopaitó mikasiuka gaúna gamena napa utó oko minoloko noitiko, itó vešená mukí kivise asú iti netá napa utó noiko, okulumató mulutini pou liti netaki utó noiko, anosa napa napa makó utó inogo ive. ¹² Lá itimóza, ámina suni utó onamiko likigizató aliiki gopoguni mililikitiiki monó numukuki nagá numukuki goní ilikitatave. Lá niiki není nugulizá lekelitoka minakumule liki likigizató aliiki kugulizaki ve napatini itó kiaepegini kovogisalo likilími milikiko, ¹³ lekeza není mogonamú gili alévolé inamó nenémini gakoláa li utó iki li kimitave. ¹⁴ Nenemú itína lakagata gili nivevesiki láa liki li hukalo: Goní nilikitikoma nila gakotó nanave loko lo kimitupe liki goí iki lakagata gululusi gelemilo. ¹⁵ Nénisi lekegepa ale vávani okinake gakó loakatini lekemekugo litamó nenazo, gala velinite ma lekehelú aminivage. ¹⁶ Izotike ametike uvotike lekelí zuhagutí makolite likigivetike kezagi likigizató aliiki goní ilikimikiko, lekelikutí makó lugáa likipili hilitave. ¹⁷ Lá niiki není nugulizá lekelitoka minakumule liki vešená mukilite mukahá likipilitamóza, ¹⁸ likigika makó gopa aminogo ive. Avasavagi hanuva minanogo ive. ¹⁹ Lá itimó nenazo, lekeza alévolé iki oti minatamó nene, alévolé lekemetamenigi minanivage.

Zelusale apá ali golesa itakumú epoapoga limó
(Mat 24:15-21; Mak 13:14-19)

²⁰ Lá iki niiki, Zelusale apatoka lova vetini gimisigi vete iki hizi vego niikoma, lekeza nene netá matá otuhá apatekiko, gámé loló iti gamena alitokave liki gililo. ²¹ Lá niiki nene Zutaia mikasigú nita vešená nene agokaló golisi nitiko, Zelusalega vešená nene, ámina apá nahuliko, Zelusale numutoka gahevaloka nia vešená nene nenegú iteminivage. ²² Ámina gamenaló nene netá golesáinimíni lihímaváini kimiti gamena nenazo, monó gotoláú luhuva gizinamóma utó oko alévolé o asú inogo ive. ²³ Kee, izegipa kagatupagi nita venaki izegipa namuni aminí nikimita venaki, ámina gamenaló nene nana itamó neve. Imane mikasiuka

* 21:14: Luk 12:11-12 * 21:22: Hos 9:7

genavagi netá utó okiko, Ómasímini izapaló molati netá nenémo imane mikasiuka veđená hize viginogo ive. ²⁴ Lá okiko, lugáa sopolotunú likipili hiliiki lugáa nene nagá likimiiki numutó namató likilími milikiko, hetoka vete nene Zelusale apá lisiki nogotiki miniliki viki niiko, hetoka veđenalitiini gamenaváini lutiginogo ive.

Okulumakutí limi ve gihila atiginá iti gakó

(Mat 24:29-31; Mak 13:24-27)

²⁵ * Okulumató ho sonohí ikani nenémo haitopaitó avevezaha noiko, age nagamí valahuká zeko sasa loko noiko mikasiuka veđená mukí keza anó nigiliki ininá niiki mulúini pou noliko, ²⁶ okulumató amuzavagi netá mukí nene mómoká i asú iki haitó suni alitamó nenazo, lá itakumú kehelele vizitítimo kovonana noviziko, mikasiuka alévolé suni utó inogo noítimo mulutini itinogo ive. ²⁷ * Lá okiko, okulumakutí lumu ve gihila neza zamuzánegi itó lapanánegi nene límusi amupiló nolumugo ániganigave. ²⁸ Nenemú ámina suni utó noiko, lekeza oti hee líiki okenava iki ániigiiki, gologí oletati gamena nene mota alitokave líki gililo.

Gohuna zámíni anoza gakó

(Mat 24:32-35; Mak 13:28-31)

²⁹ Loko Izesú loake, anoza gakó makó láa loko lo kimimó: Gohuna zahe za makó ahe ániigiiki gililo. ³⁰ Za agíla nene guluma sekuga lekeza ániigiake hogái gamena mota alitokave líki giliaká niave. ³¹ Ámináminoko nolu suni utó noiko Ómasímo gizapa oleketati gamena mota alitokave líki gilinigave. ³² Neza lamaná lo likimitoze, gililo. Imane gamenaló nia veđená velesá hili asú inamiko imane nolu netá mukí utó inogo ive. ³³ Okulumaki mikasigi tolova itáíha, není gakó nene, ma gopa oko tolova aminogo ive.

Gizapa iki minalo loko loketamó

³⁴ Ehe, lekeza lekemeni gizapa lamaná ilo. Negi nagi hizeaká sunímo itó negi nagamí vauva aleko noaká sunímo itó lakagata gululusi geleaká nenémo gena likivisekiko, gamena napa lekelitoka galínali utó olimikatize. ³⁵ Ámina gamena napa nenémo gelehúsígú nenéminoko imane mikasiuka numutó namató veđená mukí likipilinogo ive. ³⁶ Lekeza Ómasímo amuza lekemekiko ámina utó iti netá olové noinake okulumakutí lumu ve gihila není novogísaló ote minatune líki Ómasiloka líki gizapa iliki viki minalo.

³⁷ * Loko Izesú lo kemeake, gamena gamena nene monó numuni napagú gakó lo kemeake, holugú nene ámina apá ahuloake, zopega makó agulizá Olivi agoka nenegú iteko akoaká imó. ³⁸ Lá noigo, veđená mukí nenete neteká holugú ake monó zavusavegú nene Izesutokatí gakó gilínigi alegesá iaká amó.

22

Izesuni apílinigi lova gizamó

(Mat 26:1-5; Mak 14:1-2; Zon 11:45-53)

¹ Lulu vizemí peleti niaká a holisi agulizá napa nene avóikini asenini zeketakumú gili mina holisi nene alitokago, ² * guguni giziaká ve napagi monó mogona apí-ikimiaká vegi keza veđená mukikumú kehelele vizekago, Izesuni apíli hiliinigi gapovámú hanuva gizapa iki minamó.

Zutá Izesuni amimika lítove loko lo hutamó

(Mat 26:14-16; Mak 14:10-11)

³ Lá niago, Satá nene Izesuni veđenala zuha 12 keikutí Kalíotó numutotí ve Zutani mulunagú lemeake alémo vávani igo, ⁴ eza vike guguni giziaká ve napagi itó monó zavusavegú pilísí vegi gakó akó lake, Izesuni amimika loko keitoka alémoko atítimíni gakola ligili hagili amó. ⁵ Lá niake, keza kogoliza vizeke hutono gehani nene Zutani amitune líki lí hutamó. ⁶ Lí hutikago, Zutá nene konotó aleko mukí veđená alegesá inamiko keitoka amimika linogo amapani molamó.

Izesú izegipala zuhagi asenini zekimiaká nosá namó

(Mat 26:17-25; Mak 14:12-21; Zon 13:21-30)

⁷ Lulu vizemí peleti niaká a gamena asenini zeketakumú gele minoaká holisimule líki sipsip iza akaleva apiliaká a gamenama alitokago, ⁸ Izesú nene izegipala zuhagutí lositá nene Zonímagi Pitámagi nokimisilike láa loko limó: Lekeza viki asenini zekimiaká nosá ali vavá ikísiko leza natune. ⁹ Loko lo kemekago, keza nosánetá híkú ale vavá onetatíve loko nolane. ¹⁰ Líki líkasigo, Izesú láa loko lo kimimó: Gililizo. Lekeza nene taoniloka viki

* 21:25: Isa 13:10; Zoe 2:31; Ali 6:12-13

* 21:27: Tan 7:13; Ali 1:7

* 21:37: Luk 19:47

* 22:2: Gá 12:1-27

nanitisiko ve makolímó paisele somo nagamilagi geheneiko, gapoló hotu nilikima ámina ve ámegetiki viiki eza ititi numukú nene itilizo. ¹¹ Itiiki numuni amelahini láa liki li amilizo: Tisalémo nezagi izegipáne zuhagi avotegini asenini zeketakumú gele minoaká nosá natuni numuni agika nene hiláauka neve liki loká ilizo loko lokago lo nogumusive. ¹² Liki likisiko, numuni agika veletó nego netá matá avilisá ohá lekelepizitive. Neneló nosánatete ali vavá ilizo. ¹³ Loko lo kemekago, vasike ángasimó nene, lo kimimómáminoko nego ángikasike, asenini zekimiaká nosánatéma ali vavá asimó.

Lepa nosá apí oko kimimó

(Mat 26:26-30; Mak 14:22-26; 1 Koli 11:23-25)

¹⁴ Lá ikasigo, nosáneté nata gamena alitokago, Izesúma aposologegi minake nosáneté niki minamó. ¹⁵ Lá iki niake Izesú láa loko lo kimimó: Imane asenini zeketakumú gele minoaká nosá nene miluma velesá gelenaminake lekezagi natune loko mulúnégú lamaná geleloko voko minumó neve. ¹⁶ Lá onoi móza, makó lo likimitoze, gili minalo. Nosáneté imane goha naminake minoloko voko Ómasímo gizapa oleketatitímuni gapováa utó okiko nanogo uve. ¹⁷ Loko loake, vain goni makó aleake, Ómasi agepoka loake láa loko limó: Lekeza imane gona miliki nalo. ¹⁸ Gakó makó lo likimitoze. Imane gamenalotí veletó nene vain nagalímuni gihilagutí goha naminake, minoloko vinake Ómasímo nugulizaki vetipo loló onetati gamena utó okiko natove. ¹⁹⁻²⁰ Loko loake, peleti makó aleake, Ómasi agepoka loake gitegeko gona moloko nokimike láa loko limó: Imane není mémeláne neve. ^{21*} Lá onoi móza, ángalo. Není nimimika liti vegi holoma hamotó minusike, ligizani ahuloko nosáneté aleko noko nousive. ²² Okulumakutí lumu ve gihila neza vozo loko loneta gapoloka hilito gapogú novumóza, není nimimika liti vema nene agae, lihima genavagi alinogo ive. ²³ Loko lokago, izegipala zuha keza éaho lá itikumú nolihe liki liake kezáitoka lokatoká amó.

Éaho agulizaki ve loló itive liki lova sava amó

^{24*} Lá iake, izegipala zuhamate lelikutí éaho agulizaki ve loló itive liki lova sava amó. ^{25*} Lá ikago, Izesú láa loko lo kimimó: Mikasiuka hanuva veganalite gelekelé ikimiakae kagahisiuka limitigí iki niago kugulizaki véinite alévolekutí gizapa ikimiaká niave. Itó kugulizaki vete legepoka litave liki liaká niamóza, ^{26*} lekelitoka nene lá oko minamino. Lekelitokatí itiki minamoláate nene limiki mina veganá nenémiliki minataze. Itó lekelí gizapa ve nenete hanuva lemetigi iki gelekelé ve nenémiliki minataze. ^{27*} Lekelisi lilo. Éaho agulizaki ve noihe. Nosáneté hanuva minoko natimó nenémohe, itó nosáneté vatá oko ale vavá otati ve nenémo agulizaki ve noihe. Hanuva minoko natimó nenémo agulizaki ve noitimóza, nénisi nene lekelí holutikú nene agulizaki ve suni alemoko gelekelé izegipagitana loló oko minoaká nuvé.

²⁸ Lekeza nene gasova netalímuni agikagú nougo lekeza áminagú nilími vatí iki miniaká niave. ²⁹ Améneho veganá mukí gizapa oketatane loko lonetamó áminámuni oko neza hoza gakó nololeketuve. ^{30*} Lekeza gizapa okimiaká noutó miniki nosáneté niki lokogoliza vizitave loko itó gonanalivagi siató miniki Isilae veganalitini mulusi 12 gizapa ikitiki gona milikitianigave loko nololeketuve.

Izesú Pitá egamega otatikumú epoapoga limó

(Mat 26:31-35; Mak 14:27-31; Zon 13:36-38)

³¹ Saimon, Saimon, laisi lotuva lake gizaká iki alími etó iaká niamómáminoko Satá nene lekeza aí agizakú hilikiko gizaká oko lekelémo etó inogo lonoimóza, ³² nénisi nene gele alévolé animó nene gologolo samitive loko Ómasiloka loaká nouve. Lá onoumó nenazo, geza monó gapoló goha atiginá oko voko minokoko, gigivekagini hize lé oketozo. ³³ Loko lo amekago, Pitá láa loko lo amimó: Guivahanínemaka, geza kalapusi numukupe itó gípili hilinitamope nezagi áminagú vinogo uve. ³⁴ Loko lokago, Izesú láa loko lo amimó: Pitaga neza lo gimitoze, gelezo. Itína holugú nene okoloho nenémo velesá anó molonamiko geza nenikumú ángigonamuve loko egamega onetatanimó gamena losive makole inogo ive.

Gopoguni mililitatamó nenémuni amupiló minatunikumú ale vatí ituni gakó

^{35*} Loko loake, láa loko lo kimimó: Goí oko nolikimisuluke, moni gúeaká gó itó akiseaká gó itó likigisalo suú aliki vamilo loko lo lukumu gamenaló nene nivake netá makokumú vitagá amó nehe. Loko lokago, keza óve liki likago, ³⁶ eza láa loko lo kimimó: Lá ikamóza, itína gamenaló moni gúeaká gó ahe akiseaká gó ahe ale neiti vemámo aleko vitive. Itó sopolo

* 22:21: Age 41:9 * 22:24: Luk 9:46 * 22:25: Mat 20:25-27; Mak 10:42-44 * 22:26: Mat 23:11; Mak 9:35

* 22:27: Zon 13:12-15 * 22:30: Mat 19:28 * 22:35: Mat 10:9-10; Mak 6:8-9; Luk 9:3, 10:4

hána alenamiti vémo nene hepé golalotí moni alekoko sopoló hána meina hizitive. ^{37*} Neza lamaná lo nolukumuve. Monó gotolaú gakó makó láa liki luhuva gizinamó nene nenitoka utó inogo noive:

Netá golesa aliaká nia vetini kigivéipo noive liki aiki gatamó.

Itó monó gotolaú luhuva mukí nenikumú gizinamó nene nenitoka utó oko alévolé noive. ³⁸ Loko lokago, keza nene Guivahanitemaka, ániгоzo. Sopoló hána losi imane neve. Liki likago, eza není gakó gelemaze, áminasile loko lo kimimó.

Izesú zazuhaḡú Ómasiloka loko minamó
(Mat 26:36-46; Mak 14:32-42)

³⁹ Nenetí hetoka lemeake vike, eza goí oko aleaká imómámini oko alinogo Olivi agokaú noitigo, izegipala zuhamate ámegetiki vamó. ⁴⁰ Olivi agokaloka vo alí nolike izegipala zuha láa loko lo kimimó: Lekeza imaneló miniki lekemekú milatakumú gopa okatune liki Ómasiloka liki minalo. ⁴¹ Loko ahulokimiake, alitóisí minomo novike, alapusa nohizike Ómasiloka láa loko limó: ⁴² Améneḡa, geza lá itove loko gelekokoma genavagi gihinitata netá imane nenitokatí ale olové itane loko nogulumóza, není nigikaloka molamoko geí gigikaloka molatane loko noluve. ⁴³ Loko noligo, okulumakutí ageló makó limike utó o amike hize lé otamó. ⁴⁴ Lá okago, miluma alévolé oko nogilike, amuza moloko Ómasiloka noligo, govísí apilimó nene golani nenéminoko mikasiuka aleloko limimó. ⁴⁵ Lá noigo, Ómasiloka loko minatotí oteake, izegipala zuha niató goha oake, netá golesa utó itikumú miluma giliki kovó akinago oko ániḡoake, ⁴⁶ kelémo oteake láa loko lo kimimó: Lekeza nanamú lokovó akinave. Lekeza otiiki lekemekú milatakumú gopa okatune liki Ómasiloka liki minalo.

Izesuni amimí okago alemó
(Mat 26:47-56; Mak 14:43-50; Zon 18:3-11)

⁴⁷ Loko lo kemeko noigo, Izesuni vegenala zuhagutí ve makó Zutá áisi nene goí o kimigo vegená mukí iki Izesutoka iki alegesá amó. Lá ikago Zutá nene Izesuni agoka agepa legeko nanogo noitoka omo alí noligo, ⁴⁸ Izesú láa loko lo amimó: Zutazo, geza okulumakutí lumu ve gihila není nogoka negepa legeko nanogo nimimika linogo noape. ⁴⁹ Loko lokago, Izesuni amatoka mina vete nene utó inogo i netá nánigake Guivahanitemaka, sopolotunú kipilitupe. ⁵⁰ Liki nilake, keikutí ve makolímó nene guguni gizoaká ve napámini gelekélé izegipala nene sopolotunú apilike agata zamagaloka zeko isimó. ⁵¹ Lá okago, Izesú nenémini suni alemo loake, agizani lutoko ámina vemámini agataló ale nogilike agata alémo lamaná otamó. ⁵² Alémo lamaná omiake, guguni giziaká ve napagi monó zavusaveḡú pilisí vegi monó gizapa vegi Izesuni agizató alitune liki a vema láa loko lo kimimó: Lekeza nenikumú gelemó nene laskolí nougo sopoló hánagi gelekahosigi aliki niake nigizató alinigi niahe. ^{53*} Gamena gamena lekezagi monó zavusave napagú minoaká umó nene, nigizató alisá amamó neve. Lá ikamóza, itína nene lekelí gamena nego, límugusi amelahini Satani amuza netá mota utó okave.

Pitá Izesuni egamega otamó
(Mat 26:57-58,69-75; Mak 14:53-54,66-72; Zon 18:12-18,25-27)

⁵⁴ Loko lokago, Izesuni agizató aliake, alímiki vake guguni giziaká vetini gizapa vémini numukú alímiki ítemó. Lá niago, Pitá nene hotó otigi oko kémegetoko novigo, ⁵⁵ ámina numukú hé numunaló holotó nene ló giziake minamó. Lá iki niago, Pitá kezagi makó minamó. ⁵⁶ Eza ló hanataloka ló lotá oko noigo, gelekélé vená makolímó ániḡoake, gonukonú napilike imane ve nene Izesuki miniaká asi ve noive. ⁵⁷ Loko lokago, eza egamega ike venáage, neza ániḡonamu vemú nolane. ⁵⁸ Loko lokago, koma noigo, ve makolímó Pitani ániḡoake geza nene ámina vémini zuhagutí noane. Loko lokago, Pitá nene vémage, neza noamuve. ⁵⁹ Loko lokago, gamena koma novigo, ve makó nenémo pigi vizeko ezagi Galílaia anoki ve noinazo, lamaná ezagi makó minasimó neitive. ⁶⁰ Loko lokago, Pitá nene vémage, geza nolani gakoka ma gelemu gakó nolane. Loko noli agepagi okolohómámo anó molamó. ⁶¹ Anó molokago, Guivahanímó mino viligake avogisa o amike Pitani ániḡamó. Ániḡokago, Pitá eza Guivahanímó amunaló lota gakó nene itína okoloho nenémo anó molonamiko egamega onetatanimó nene gamena losive makole inogo ive loko lo ami gakóma goha nogilike, ⁶² agika hizekago, lemeko hetoka ive napa imó.

Izesuni gopoguka nilitake kigizanitunú apelemó
(Mat 26:67-68; Mak 14:65)

* 22:37: Isa 53:12 * 22:53: Luk 19:47, 21:37

⁶³ Lá okago, Izesuni agizató ali mina vete gopoguka nilitake kigizanitunú napeleke, ⁶⁴ agómulaló lavolavo gotunú zi hitimiake láa liki lamó: Geza lo utó oko lo lemezo. Éhao nogípilive. ⁶⁵ Liki liake, alivi letivi iki haitopaitó gakó litiki minamó.

Kansoletini kogómulaló Izesuni goni itamó
(Mat 26:59-66; Mak 14:55-64; Zon 18:19-24)

⁶⁶ Niago, neteká gó lokago, Isilae mikasiuka gizapa ve keza guguni giziaká ve napagi monó mogona apí-ikimiaká vegi alegesá iake, monó kansoletini niatoka Izesuni alímiki viake ⁶⁷ geza gologí oletative loko lo mololeta vema nookoma lo lemezo. Liki likago, eza láa loko lo kimimó: Neza lo likimitomó nene lekeza gili alévolé aminigave. ⁶⁸ Itó áminamú loká oleketatomó nene lekeza nonotó aliki li nememinigave. ⁶⁹ Lá onoimóza, imane gamenaloí veletó nene okulumakutí lumu ve gihila neza amuza ve Ómasímini agizani lamagaloka minanogo uve. ⁷⁰ Loko lokago, keza li amiki nilake láa lokoma geza Ómasímini gipala nouve loko nolape, olo. Liki likago, eza láa onoiwe liki lekezatini mota likave. ⁷¹ Loko lo kemekago, keza láa liki lamó: Aí gakola gilina vegená makó nanamú sele lokinake gakó makó gilitune. Aí agepagutí láa loko lokago mota gelekunimóma neve, liki lamó.

23

Izesuni alímiki Pilató noitoka vamó
(Mat 27:1-2,11-14; Mak 15:1-5; Zon 18:28-38)

¹ Láa liki liake, keza mukitó otiake Izesuni alímiki Pilató noitoka vamó. ² Alímiki viake, apí iki goni itake láa liki lamó: Imane vémo leza Zuta vegená lelémo gopa oaká noike, takisi moni nene Loma vegenalítini gamani agulizaki ve napa Sisani amemilo loko loake, ezámú nene nugulizaki ve napa gologí oleketatove loko lo mololeketa vema nouve loko loaká noive. ³ Liki likago, Pilató eza Izesuni loká otake geza nene Zuta vetini kugulizaki ve napáini noape. Loko loká omikago, Izesú nene gezaka lokanimole. ⁴ Loko lokago, Pilató nene guguni giziaká ve napamagi mukí vegenámagi láa loko lo kimimó: Neza imane vémini lihimaalamú vitagá umó nomive. ⁵ Loko lokago, keza pigi vizeke láa liki lamó: Eza mukí vegená kelémo otopá zemo novike Galilaia mikasiuka apí oake, Zutaia mikasiuka vo asú okoko gakó lainim-oketomo novike imaneló omo anitekave.

Izesuni Heloté noitoka alímiki vamó

⁶ Liki likago, Pilató nene gakóini geleake, imane ve nene Galilaia mikasiuka ve noihe. ⁷ Loko loká okimiake, Izesúma Heloté gizapa onoi mikasiukatí ve noigo geleake, itó Heloté nene ámina gamenaló Zelusalega minamó nenazo, Izesuni nene Heloté noitoka alímiki vilo loko amiselekago, alímiki vamó. ⁸ Lá ikago, Heloté nene Izesuni gakó gozapá geleko minamó nenazo, Izesú nene avevezaha makó okiko ánigatonazo loko agata gelekelé oko noitotí nene Izesuni ángoake agoliza goha vizimó. ⁹ Lá oko noike nene, Heloté nene Izesú oko moloko i netá mukikumú loká otamóza, Izesú nene Heloté li gakotó ma anotó aleko lo amemimó. ¹⁰ Lá noigo, guguni giziaká ve napamagi itó monó mogona apí-ikimiaká vemagi keza aí amatoka otinake amuza miliki goni itamó. ¹¹ Lá ikago, eza ve golesa noigigitana Helotege itó gimisigi véate gopoguka litamó. Gopoguka limiake, agulizaki ve napámini luhoaká gó lamanaláa luhimiake, Heloté nene Pilató noitoka goha amiselekago vimó. ¹² Lá okago, Heloteko Pilatoko keza nene gozapá gala ve lilí iki minasimóza, nenelotí goha zogo milasimó.

Izesú hilitive liki goni itamó
(Mat 27:15-26; Mak 15:6-15; Zon 18:39-19:16)

¹³ Lá ikasike, Pilató nene ve vená mukí itó guguni giziaká ve napagi monó gizapa vegi kelémo nupa oake, ¹⁴ láa loko lo kimimó: Lekeza imane ve nenitoka alímiki iake, vegená kelémo otopá zeaká noive liki lamóza, lekelí lokovogisalo aí mogonamú vitagá umó nene, gililo. Lekeza netá matá golesa alikumú goni notune liki lamóza, neza nene vitagá umó ma ale utó amuve. ¹⁵ Heloteki eza ámina oko lihimaalamú vitagá imó nene nomigo lelitoka amiselekago okave. Lá onoiwe, gililo. Eza nene netá golesa makó alilina, apele hulutilinamóza, láa oko nomimó nenazo, ¹⁶⁻¹⁷ neza lokugo uhene nagasanitunú apiliiki amisilikiko hanuva vitive. Loko lokago, ¹⁸ keza ganaganagó gamoga giki láa liki lamó: Imane ve nene agoka legesó itize. Palapasini nene gologí omikako lelitoka ino. ¹⁹ Liki lamó nene Palapasi nene Zelusale apakuka gamaniloka lova gizoko kipili vémo lova hizeko ve makó apele helekago, nagá numukú ahulikago mina vemú lamó. ²⁰ Lá noigo, Pilató nene Izesuni gologí otatove loko geleake, gakó goha lo kimimóza, ²¹ keza pigi viziki malipo zaló hilitikumule, zohota zaló hilitikumule. ²² Liki likago, Pilató goha láa loko lo kimimó: Nanamú. Nana netá golesa alekago nilave. Aí apele hilituni mogona makó ale utó amuve. Lá onoinazo, neza lokugo, uhene nogosanitunú apiliiki amisilikiko hanuva vitive. ²³ Loko

lokago, keza Pilató li gakó zivi hitivi ake pigi viziki gakó napagutí zohota zaló nagá otamane liki la gakolímó Pilatóni gakó alémo amunauka imó. ²⁴ Lá ikago, Pilató nene keza negénegeka liki lakumú keí gakó lá itove loko lo hutamó. ²⁵ Lo hukoake, amunaló emane gamaniloka lova gizake lova ale utó oko ve makó apele heleake nagá numukú mina vemú gologí otative liki loká ita vema nene gologí omiake, Izesuni nene kezáini kagata gele netá lílí itave loko gimisigi vetini kizizakú kimimó.

Izesuni zohota zaló apelemó
(Mat 27:32-44; Mak 15:21-32; Zon 19:17-27)

²⁶ Lá okago, Izesuni nene apilinigi alímiki nivago ve makó agulizá Saimon eza Apilika mikasiuka Sailini apatotí ve nene minaukatí taoniloka novike gapoló noigo ániagiake, agizató aliake zohota zama gihimikago, aginagú geheake Izesuni ámegetoko vimó. ²⁷ Lá iki nivago, mukí ve vená kémegetiki nivake, vená nenete miluma gilitake ive nama itimi vamó. ²⁸ Lá iki nivago, Izesú nene minó viligoake láa loko lo kimimó: Lekeza Zelusale venáise, nenikumú ive amiki lekezatínimú itó lekezatini izegipatinimú ive ilo. ²⁹ Gamena makó alitonoimó nene utó okiko láa liki litaze: Izegipa getinama vená itó izegipa nene aminí kininama vená keza gohuna vené nene vatí iki minikave. ³⁰ * Liki líiki ámina gamenaló nene agoka napamú nene agae, agoka vozaneka, zeko akutooko oko hitoletatapo, liki linigave. Itó agoka komamú iki zi hitilitalo liki linigave. ³¹ Loko loake, láa loko lo kimimó: Neza gosohá lokitana noumóza, není nene hanuva lokú gizatamó nenazo, lekeza osagava lokitana vejená nene nana ilikitatave.

³² Loko lokago, netá golesa aliaká asi ve losigi Izesunigi kipili hilingi kilímiki vamó. ³³ Kilímiki vake, apá makó agulizá gotóini gonosi helisa apale liki latoka anitiake, neneló Izesuni nene zohota zaló apiliki apatiake, netá golesa aliaká asi ve losima makó nene agizani sogaloka hizeke itó makó nene agizani lamagaloka apiliki apatemó. ³⁴ * Lá ikago, Izesú nene aménega, gili vevesamake gopa netá nalemó nenazo, geza lihímáini ahuloketozo, loko limó. Loko lokago, keza nene Izesuni luhoaká gola nene éaho alitihe éaho alitihe liki satu zohí amó. ³⁵ Lá noigo, vejená mukí alegesá iki ániagi minamó. Lá niago, Zuta vetini gizapa ve nenete gopoguka litake láa liki lamó: Vegená kugutó vizeaká i vema eza Ómasimo alémo etó onoi ve nene gologí oleketative loko lo mololeketa vema nouve loko loaká i vema nenazo, ezáa agutó vizino. ³⁶ Liki liake, gimisigi ve nenetegi gopoguka nilitake ekesá vain nagamí natihe liki agokaú miliake, ³⁷ geza Zuta vetini kugulizaki ve nookoma, gezaka kugutó vizezo. ³⁸ Liki li namego, velé gotolaloka luhuva makó nene imane ve nene Zuta vetini kugulizaki veninive liki gizikago minamó.

³⁹ Lá onoiago, netá golesa aliaká asi vegutí magáámo láa loko Izesuni alevo letovo oko limó: Geza gologí oletative loko lo mololeta vema noitanimó nene, gezaka kugutó novizeko lezagi lugutó vizemane. ⁴⁰ Loko lokago, maga véa nenémo gahá amike láa loko lo amimó: Ezagi lezagi goní nilitake, hilitave liki lilitinamóma nenazo, nohelenike geza Ómasimú gehelele vizemihe. ⁴¹ Loko loake, leza nene lihimatemaló apasiki lipili nihelemó nene vevesonoimóza, imane ve nene lihimavala nomi ve hakupá netá aliki apili niheleve. ⁴² Loko loake, Izesuni láa loko lo amimó: Izesuvo geza gugulizaki ve loló ooko gizapa okimiaká hoza alitani zupa nene nenikumú gele minatane loko noluve. ⁴³ Loko lokago, Izesú láa loko lo amimó: Neza lamaná lo gimitoze, gelezo. Itína nene Palatizi zazuha apakú gezagi apizeko minanogo usive.

Izesú hilimó
(Mat 27:45-56; Mak 15:33-41; Zon 19:28-30)

⁴⁴ Loko noligo, holisaka gamena nene hómíni silikakéna gopa noike mukí mikasiuka nene límgusi ze asú oake mino-loko novigo únaká ho ale zohota imó. ⁴⁵ * Lá noigo, monó zavusavémíni gatetó Ómasímíni avogisaló iteaká gatetó zi lí ika lavolavo nene zeko hou lo losi imó nene lelí gahe ale koló imó. ⁴⁶ * Lá noigo, Izesú nene gakó napagutí nolike aménega, není nemeni nene geí gizizakú nomuluve. Loko loake, ahuu lo nahulake hilimó. ⁴⁷ Lá noigo, lovámíni gala vevatini gizapa vemámo utó i netáma ániagoake, Ómasímíni agulizá ale otike lamaná imane ve nene hee loko noi ve minamó neve. ⁴⁸ Loko lokago, ámina suni ániaganí alegesá ina vejená nenete ániagiake, miluma napa giliake, kolómusaló zimí zimí atiginá iki numúitoka vamó. ⁴⁹ * Lá niago, aí agivelagegi itó Galilaia mikasigutí ámegetiki a venaki keza nene hotó otigí iki otinake ámina suni ániagamó.

Izesuni gale zitamó
(Mat 27:57-61; Mak 15:42-47; Zon 19:38-42)

* 23:30: Hos 10:8; Ali 6:16 * 23:34: Age 22:18 * 23:45: Gá 26:31-33 * 23:46: Age 31:5 * 23:49: Luk 8:2-3

⁵⁰ Lá ikago, ve makó minamó, agulizá Zosehé. Áisi nene Zutaia apá makó agulizá Alimataia loko noi numutó ve minamó. Eza ve lamaná itó veveso mina ve Zuta vetini monó kansole ve makó minamó. ⁵¹ Lá imóza, kansole lugáate Izesuni apilitune liki kagata giliake lova gizi hukakumú nene gele kememi ve nenémo Ómasímo gizapa okimiaká ve alémo utó iti gamenamú gizapa oko mina ve minamó. ⁵² Áisi nene Izesuni gonosiva alinogo Pilató noitoka vike loká omikago, gele amekago, ⁵³ zalotí apasoko aleko lemeake, gizopa gó lamanakú asapú omiake, aleko voko meikú geha mulí goló vatinakú nenegú ve vená makó gale zikitinamakú gale zetamó. ⁵⁴ Palaitegú gale zetamó, avóikini asenini zeketakumú gili mina holisi gamena alí noligo nene. ⁵⁵ Lá noigo, Galilaia mikasigutí Izesuni ámegetiki a vená nenete Izesuni gonosiváa nana oko gale zetatihe liki ániaganigi Zoseheni ámegetiki vake gonosi milimilimagú viki ániagamó. ⁵⁶ * Ániagiake, numúitoka atiginá iki vake gonosiváalo holotatune liki anuva hilina ali vavá amó.

Izesú heleneikutí otimó

(Mat 28:1-10; Mak 16:1-8; Zon 20:1-10)

Lá iake, ámina vená nenete holisigú Zuta vete li huginamómalo nene kavású viziki minamóza,

24

¹ Sategú neteká holugú nene gonosiva mola apató vinigi anuvagi hilina ali vavá iki milamóma nene aliki vamó. ² Vi anitiake ániagamó nene, geha mulí agepaló gehani napa zi hitamó nene aló ahelú i ámiginago ániagamóza, ³ keza áminagú itiake ániagamó nene Guivahani Izesuni gonosiváa ániagamó neve. ⁴ Lá iake ámina netakumú negi nagi hiziki niago, ve lositá galinali utó ikasike, iki holúikú minasimó nene, luhoaká góini nenémo gizopa vaevae loko minamó. ⁵ Lá noigo ániagiaka ámina vená nenete kehelele novizigo, mikasiuka gupá zemó. Lá niago, ámina ve losi nenetosa láa liki li kemesimó: Hele vegealitiní apakú amenigi oteko noi vemamú nanamú vitagá niave. Eza imanegú noamive. Mota otopá zeko otekave. ⁶⁻⁷ * Lekeza Galilaia mikasiuka minake okulumakutí lumu ve gihila neza netá golesa aliaakí nia vetini kigizakú nilími milikiko, zohota zaló nipili hilikiko, gamena losive makole minokinake goha otinogo uve loko lo likimi gajokumú goha lakagata giliki minalo. ⁸ Liki likasigo, keza gozapá láa loko lo kimi gakoaloka goha kagata giliake, ⁹ geha mulikú gonosi mola apáma ahuliake, goha atiginá iki vake, aí izegipala zuhagutí ileveniagi vegeaná lugáagi nene ániaga sunimú avetó iki li kememó nene, ¹⁰ Maliá eza Magatala apatotí vená itó Zonan itó Maliá magáa eza Zemusini izolaho itó vená makó lugáate nenete ámina gako avetó iki aposoloma li kememóza, ¹¹ aposolomate gako imane gihila nilave liki gili alévolé amamó. ¹² Lá niago, Pitá nene oteake gonosi mola apámaloka lolu loko vike geha mulikú gupá zeko ániagamó nene, lavolavo gó gizopa lamaná lositáma hanuva nego ániagoake, eza nene goha atiginá oko numutoka vike, ámina suni utó ikumú agata gululusi geleko minamó.

Emause numutoka nivasigo Izesú kémegetoko vimó

(Mak 16:12-13)

¹³ Lá noigo, ámina gamenaló izegipala zuhagutí ve losi nene Emause numutoka vinigi gapoló vasimó. Emause apá nene Zelusalegatí hotó otigí oko 11 kilomita nenéminoko minamó. ¹⁴ Lá iki nivasike, Izesutoka utó i netakumú ligili hagili iki nivasigo, ¹⁵ Izesú nene vogaláikutí utó oake makó vamóza, ¹⁶ kogómulaló hitonoigo, Izesú noive liki ániagi vevesamasigo, ¹⁷ eza gako nene nana onoigo ligili hagili iki nivasive loko lokago, keza nene viki notesike kogoka kegepa muhelé noigo, ¹⁸ keikutí maga ve agulizá Kiliopá ave loko noi vémo anotó aleko láa loko lo amimó: Veno ve mukí iki Zelusale apakú ali nupa niamó nenete imane gamenaló utó i sunimú gili asú inamóza, géisi ve hamó nene gelemape. ¹⁹ Loko lokago, eza nana suni utó ikumú nilasive loko loká okimikago, keza láa liki li amesimó: Nasalete numutotí ve Izesuni sunimú nolusive. Eza nene Ómasímini agepagutí gako loaká ve minake, Ómasímini agómulaló itó vegealitiní kogómulaló alévolé gako loaká ve itó alévolé suni aleaká ve minamó neve. ²⁰ Lá imó nemóza, lelí guguni giziaká vete napagi lelí monó gizapa vetegi apili ahulatave liki goní imikago, zohota zaló apiliki apeteke apili hele vemú nolusive. ²¹ Itó goi oko Isilae mikasiuka gala vetini kigizakutí lelémo atiginá itihe loko gelenounimóza, gako makó láa loko neve. Ámina suni utó ikuti nene gamena losive makole mota vokave. ²² Lá onimóza, lelí zuhagutí vená makó lugáate iki likago ininá okune. Keza neteká holugú nene gonosi milimilimaló vake, ²³ gonosiva ániagamake, ageló losi utó ikasike Izesú nene oteko agómulagi noive liki lasi gajokumú nene ámina vená nenete vamokitana ániagiake, atiginá iki iki avetó iki li lemémó. ²⁴ Lá ikago, lelikutí makolititosa viki geha mulikú

* 23:56: Gá 20:10; Gapo 5:14 * 24:6-7: Luk 9:22, 18:31-33

gonosi milimilima ángisasike, venalite iki avetó amómáminoko nego ángisasimóza, ámina ve nene agupeló ángimasimó. ²⁵ Liki likasigo, Izesú láa loko lo kimimó: Lekeza ve negi niasive. Mulutini lepa hizetigi onoigo Ómasímini agepagutí gako liaká a vete gako mukí luhuva gizinamóma nene gili zagemasive. ²⁶ Ómasímo gologí oleketative loko lo mololeketa vema nene ámina miluma netá ali gihimikiko helekoko alika nene oteoko lapanala goha alitive likigó gizinamóma neve. ²⁷ Loko loake, Moseki itó Ómasímini agepagutí gako liaká a vetegi gizona gako lo kemeloko novike, ezámú monó gotolaú gizona gako mukí nenémini mogonamú ale hee loko lo kimimó.

²⁸ Lo kemeloko novike, Emause apá ali ávatihá iake, eza nene ámina apá avilegeko vinogo noigo, ²⁹ keza agata aliki ho mota lemeake limugusi zinogo noize, lezagi makó akatune liki li amikasigo, Izesú nene gele kemekago, numukú nene makó itemó. ³⁰ Itiki minake, nosá nanigi niake, eza nene mitó minake peleti aleake, Ómasi agepoka loake, gitegeake kimimó. ³¹ Lá noigo, kogómula panava zekago, Izesuni nene ángi hee hee lasimó. Ángi hee hee nilasigo, litá oko legemage imó. ³² Lá okago, keza láa liki ligili hagili asimó: Gapoloka gako lo limike monó gotolámini mogona lo utó oko lo nolimike lelémó zaú okave. ³³ Liki ligili hagili asike, litá iki otiki Zelusalega atiginá iki vasimó. Vi anitikasike, aí izegipala zuha 11-imagi agive lugáagi alegesá iki niago ángikasigo, ³⁴ ámina ve lositá nene litá iki avetó iki Guivahanitema nene lamaná oteko noike Saimoni utó o amekave. ³⁵ Liki li kimikago, keza láa iki Izesúma gapoloka kémegetoko vike nosáneta nanigi peleti gitigitó ángi hee lasi gako nene avetó iki li kemesimó.

Izesú izegipala zuhaloka utó o kimimó
(Mat 28:16-20; Mak 16:14-18; Zon 20:19-23)

³⁶ Izegipala zuhamate ámina gako ligili hagili niago, Izesú nene galinali utó oake, ote minake hulu nene lekelitoka minino. ³⁷ Loko lokago, keza ángiake, ininá iake holosi utó okahe liki kehelele vizimó. ³⁸ Lá iki kagata nigelego, eza láa loko lo kimimó: Lekeza nanamú ininá iki lakagata losi nigeleve. ³⁹ Imane nezama lamaná utó nouve. Lekeza nigisa nigizatoka nuhúma ángialo. Itó ángiiki iki nugupeló ali giliiki ángi hee lilo. Neza nugupegi vegená lahaní utó okuve. Holosi nene nenéminiki niamave. ⁴⁰ Loko lo kemeake, agisa agizani nene kelepipimó. ⁴¹ Lá okago, keza mulúiku ágila guluma itímo velesá gili alévolé amake kagata losi nigelego, Izesú nene lekelitoka nosáneta ma nehe. ⁴² Loko loká okago, keza lotó gizona lagaha makó amiake, ⁴³ ánginago aleko namó.

⁴⁴ Itó Izesú láa loko lo kimimó: Neza lekezagi minunike Mosé lo hukoko li gakovú itó Ómasímini agepagutí gako liaká a vetini gakovú itó Ómasi agepoka liká nama liká a gakovú nenikumú epoapo gako luhuva gizamóma nene gihila ze asú inogo ive loko lo lekemeaká umóma neve. ⁴⁵ Loko loake, monó gotolaú luhuva gizikago mína gako nene gili vevesatave loko kigika kagata ale koló oake, ⁴⁶ láa loko lo kimimó: Monó gotolaú gologí oleketative loko lo mololeketa vemú nene miluma geleko heleoko gamena losive makole galegú minooko heleneitikutí otopá zeko otinogo ive liki luhuva gizinamóma neve. ⁴⁷ Itó aí agulizá nene numutó namató vegenatoka vo asú oko vokiko, vegená keza giliiki kigika ali viligikiko lihímáini ahuloketative loko lonoive. Itó ámina hoza nene Zelusale numutoka apí iki alimi vitave liki luhuva gizinamóma neve. ⁴⁸ Ámina netá ángiakumú avetó iki li kimita vegenáma lekelisi niave. ⁴⁹ * Gilinahe. Améneho Sikalahula lehizeleketatove loko lo mololeketamó nene amiselekugo liminogo ive. Lá itomó nenazo, lekeza imane apá litá iki ahulamiki ageva iki niiko velé okulumakutí zámuza lekemekiko vitave.

Izesú okulumakú itimó
(Mat 16:19-20; Apo 1:9-11)

⁵⁰ Loko loake, minake, numutotí kelémoko vike Petania numuni ali alitiki viake, agizani ale otike nónohá zeketamó. ⁵¹ Nónohá nozeketake ahuloketoko okulumakú itimó. ⁵² Lá okago, keza mulúiku ágila guluma goha igo, Zelusalega atiginá iki vake, ⁵³ guguni giziaká zavusavegú nene gamena gamena Ómasi agepoka liki minamó.

* 24:49: Apo 1:4

Izesu Kilistoni Gakó Lamaná Zoní Luhuva Gizamó

Ómasímini agepagú gakotó mina vema vejená loló imó

¹ Netá matá apí oko utó i gamena nene, Ómasímini agepagú gakotó mina vémo nene hanuva minake, mino-loko iteko minamó. Lá noike, Ómasímini amatoka minamó. Itó agepagú gakotó mina ve nenémo Ómasi minamó. ² Áisi nene apí oko Ómasiloka minamó. ³ Minoake nene, netá mukí ale utó o asú imó. Netá hámakoláa áisi minamigo utó osá amimó neve. ⁴ Eza nene alévolé oko minoakalímini amelaho loló oko minake, alévolé oko minoaká nenémo vejená hize hanatoketamó. ⁵ Lapaná nenémo límugusigú hize hanatokago, límugusi nenémo lapaná nene apele helemimó.

⁶ * Ómasímo ve makó alémo etó oake, amiselekago, voko utó imó, agulizá Zoní. ⁷ Áisi nene vejená mukí keza aí gakó giliiki gili alévolé itave loko lapaná nenémini gakoláa lo utó oko minamó. ⁸ Lá imóza, Zoní ezáa nene lapaná amelaho minamive. Eza hanuva lapaná amelahini gakoláagó lo utó oaká imó. ⁹ Lapaná amelaho eza numutó namató vejená hize sata okimiaká noi vémo gamena nene zupa mikasigú utó oake minamó. ¹⁰ Áisi nene mikasigú utó oakaláa nene utó imóza, mikasigú netá mukí nene áisi ale utó imó. Ale utó oake mino-loko novike lemeko mikasigú utó okago, mikasigú vejená keza aí ániigi hee hee lamamó. ¹¹ Lá ikago, ezáa ale utó i apakú utó imóza, vejenala zuhate lelikutí noize liake alími kamatoka amamó. ¹² Kigikagú aí ali gúemoláa nene Ómasímini izegipala zuha lilí itave loko gapo veleketamó nene aikumú gili alévolé ina vejená nenémini itave loko gele kemeaká noive. ¹³ Keza nene izóike getakutí Ómasímini vejenala lilí iki gosohá utó amave, itó lugupegú golanímini gapogú viki gosohá utó isá amave. Ómasilokatí gosohá utó iaká niave.

¹⁴ Ómasímini agepagú gakotó mina ve nenémo vejená loló oake, vogalategú minoko aleko ike, nasahilí asapulagi gakó gihilagi ale-loko límigo, ániguhá. Aí okulumakú lapaná ániGUNIMÓ nene, amelahini gipala hamokó minake amelahini lapanala lelepizigo ániGUNIMÓMA neve. ¹⁵ Aí mogonáa nene Zoní gakó napagutí láa loko lo utó imó: Nénisi ámina vemú goí oko nene neza utó amugo emane amunalotí mino-loko iteko mína ve nenazo, ámina ve alika nemegeosaló noamó áisi nene není nivilegeko noave loko lo lukumumóma neve. ¹⁶ Áisi nene vejená mukitoka netá mukí asapulagi nasahilí olimikago, hagitana alekogó minoaká noune. ¹⁷ Ómasímo lokago, Mosé eza lo hukoko li gakokó luhuva gizo límimóza, Izesu Kilistó áisi aleko iteko nasahilí nene hagitana oletake gakó gihiláa lehizeletamóma neve. ¹⁸ Ómasi nene ve makolímóhe makolímóhe ániGUNAMIVE. Gipala hamokó ezáa nene Ómasi noive. Eza amelahini amatoka minake, amelahini mogonáa aleloko limike lo utó oko lo lemekave.

Monó nagamí holokimiaká vémo lo utó i gakó

(Mat 3:1-12; Mak 1:7-8; Luk 3:15-17)

¹⁹ Zelusale numutokatí Zuta vejenalítini monó gizapa vete guguni giziaKá vegi monó zavusavegú gelekelé ve makoki kímisilikago, Zonitoka vi anitiake, géisi éaga noane, gologí oletative loko lo mololeta vema noape liki loká imikago, ²⁰ ezáa mogona egamega amike lo kimike lo utó ike neza gologí oletative loko lo mololeketa vema minamuve. ²¹ * Loko lokago, keza miní ameke goha loká itake itó géisi éagama noane. Gologí olimiaká vema velesá anitemikó okulumakutí goha ative liki lína ve Ilaizagama noape. Liki likago, eza nene Ilaizá noamuve lokago, géisi nene Ómasímini agepagutí gakó loaká ve makó Mosekitana noi ve ageva oko nominuhá vema noape. Liki likago, eza óve lokago, ²² láa lokoma geza éahoma noane. Geitoka limisilikago uhá vejenáma voko nanave loko lo kimitune. Gezacamú nanave loko nolane. ²³ * Liki likago, Zoní láa loko lo kimimó: Ómasímini agepagutí gakó loaká ve Isaiá luhuva makó láa loko gizamóma neve:

Míkasi gomopalaló ve makolímó gakó napagutí Guivahanímini gapo nene likigikagú ali hee liki vilitalo, loko nolive loko giza gakó nene nenitoka alévolé okave.

²⁴ Loko lokago, Palisaio monó vete kímisilikago Zonitoka viki anite ve nenete ²⁵ áminamú goha loká itake lamó: Geza gologí oletative loko lo mololeta vema minamane, itó Ilaizaga minamane, itó Ómasímini agepagutí gakó loaká ve ageva nominuhá vema minamanimó nenazo, nanamú vejená nene monó nagamí holokimiaká noane. ²⁶ Liki likago, Zoní láa

* 1:6: Mat 3:1; Luk 3:1-2 * 1:21: Mal 4:5; Gapo 18:15,18 * 1:23: Isa 40:3

loko lo kimimó: Neza vejená nagamikó holokimiaká noumóza, holutikú ve makó utó oake noimó nene lekeza ániġi guni isá amave. ²⁷ Áisi nene nemegetoko ova ova noive. Ámina veloka akohemunazo, aí gelekelé otoko hoza lagasó aletatomoki akohemuve. ²⁸ Loko li netá nene Petania apatoka Zota nagamí vola helegaloka Zoní monó nagamí holokimiaká noitó utó imó.

Ómasímini sipsip iza akaleva ániġalo

²⁹ Akiake gó lago, Izesú nene Zoní noitoka anitekago, hotó otigí oko volane noago ániġoake, láa loko vejenáma lo kimimó: Ániġalo. Volane áisi nene Ómasímini guguni gizoakalímini sipsip iza akaleva ġihila nene numutó namató vejenalítini lihímaváini aí amupiló itekago agohí geaká noive. ³⁰ Neza aikumú nene neza utó amugo emane amunalotí mino-loko iteko mína ve nenazo, ámina ve alika nemeġesaló noamó áisi nene není nivilegeko noive loko lo lukumómoma neve. ³¹ Neza nene gozapá aí nene ániġo hee hee lamumóza, lekeza Isilae vejenalita ámina vémini ġakola lo lukumugo ġilitave loko aniteuke monó nagamí apí oko hololeketumóma neve. ³² Loko Zoní nene loake, goha láa loko aveté ike lo kimimó: Neza Sikalahulímo okulumakutí nama luhusigitana oko lemeko ámina vémini amupiló aleneiġo ániġumóma neve. ³³ Neza gozapá aí nene ániġo hee hee lamumóza, monó nagamí hololikimiaká hozaló nimisilí vémo Sikalahú limike amupiló aleneiġo ániġatani ve áisi nene vejená nene není Sikalahú holoketanogo ive loko lo nimimóma neve. ³⁴ Loko litoka lemeko noġo ániġumole loko mogonamú nene áisi nene Ómasímini ġipala noive, loko limó.

Izesuni ġaná izegipala zuha

³⁵ Akiake gó lago, Zoní ave itó izegipala zuhagutí ve lositá ámina mikasiló minamó. ³⁶ Niago, Izesú nene apá makotoka novigo, ániġoake, izegipala losima nene láa loko lo kimimó: Ómasímini sipsip iza akaleva ániġalizo. ³⁷ Loko lokago, keza nene ġakó ġilikasike, Izesuni ámeġetiki vasimó. ³⁸ Vikasigo, Izesú nene viligoko ániġoake, lekeza nanamú niasive loko lokago, kezáini ġakokutí Laví velemaka, lelí ġakokutí nene monó ġizapa velemaka, geza hí numukú minoaká noane. ³⁹ Líki líkasigo, iki ániġalizo loko lokago, keza ámeġetiki vasike, numunáa ániġasike, ho ale zohota okago, áminaloka makó miní milasimó. ⁴⁰ Zonini ġakó ġilikasike Izesuni ámeġetasi vegutí nene makó agulizá Etulú, eza Saimon Pitani agunala. ⁴¹ Áisi nene litá oko uvolahíni Saimoni ániġoake, láa loko lo amimó: Leza Mesiani mota ániġokune. (Mesíá nene Zuta vetini ġakokutí, itó Kilistó nene Kiliki ġakokutí, ámina agulizalímini mogonáa nene ġologí oletative loko lo mololeta ve loko neve.) ⁴² Loko loake, Izesutoka alémoko vokago, Izesú nene ániġoake, láa loko lo amimó: Geza Saimoga Zonini ġipalamaka, ġeġi ġugulizá Sipasí ave loko nomuluve. (Sipasí nene Zuta vetini ġakokutí, itó Kiliki ġakokutí nene Pitá, agulizalímini mogonáa nene ġeha sepepizámo.)

Pilipoko Natanaeko Izesuni ámeġetiki vasimó

⁴³ Akiake gó lago, Izesú nene Galilaia mikasiuka vitove loko agata geleake, Piliponi ániġoake, geza nemeġetozo. ⁴⁴ Loko limó nene, Pilipó ave Etulú ave Pitá ave nene Petesaita apatokatikó minamó. ⁴⁵ Itó Pilipó nene Natanaeni ániġoake láa loko lo amimó: Mosé lo hukoko li ġakoki itó Ómasímini agepagutí ġakó liaká a vete la ġakoki luhuva ġiza vema mota ániġokune. Nasaleta apatokatí Zoseheni ġipala Izesunima. ⁴⁶ Loko lokago, Natanaé nene Nasaleta apatokatí nana netá lamaná makó utó itive. Loko lokago, Pilipó nene láa lokoma oko ániġozo, ⁴⁷ loko lokago, Natanaé nene Izesutoka vo anitekago, ániġoake, Ániġalo. Imane ve Isilae ve ġihiláa nenazo, agikagú soza ġakó minami ve noive. ⁴⁸ Loko lokago, Natanaé loká otake geza hitóma nougo ániġanimó neve. Loko lokago, Izesú nene Pilipó vevesá ġelémoko amigo, nimuza za mogonaló noako ániġumóma neve. ⁴⁹ Loko lokago, Natanaé láa loko limó: Monó ġizapa venemaka, geza lamaná Ómasímini ġipala noane. Isilae ve lelí ġugulizakí ve noane. ⁵⁰ Loko lokago, Izesú láa loko limó: Nimuza za mogonaló noako ániġumóma neve loko lo gumutó gelekanike nenikumú ġele alévolé onoaġe. Gelezo. Oko moloko umó imane nene avevezahaváa neve. Netá ġihila gohaláa nene alika ániġoko ġilinogo ane. ⁵¹ * Loko loake, miní ameko láa loko limó: Neza lamaná lo likimitoze, ġililo. Lekeza okulumá koló okiko, Ómasímini ageló keza okulumakutí lumu ve ġihila nenitoka tigá limigá niko ániġanigave, loko limó.

2

Kana numutó ve vená losima ali ġizakú vizemó

* 1:51: Apí 28:12

¹ Numuni lositá akiake, Kana numutó Galilaia mikasiuka nene ve vená losima ali agizakú vizinigi nosáneta ali vavá niago, Izesuni izolaho áminaló noigo, ² Izesú ezagi izegipala zuhagi alesa milikimikago, viki makó miniki nosáneta ninago, ³ áminagú mina vegealite vain nagamíma ni asú ikago, Izesuni izolaho nene vain nagamíma mota ni asú ikave loko lo amimó. ⁴ Loko lokago, Izesú láa loko lo amimó: Vená geza nenemú nanamú nenitoka nolane. Nene není netáma neve. Neza alévolé netá loló ito gamenaváne velesá alitonamive. ⁵ Loko lokago, izolaho nene gelekelé izegipalama nene netá makokumú lo nolikimikoma ilo, loko lo kimimó. ⁶ Itó Zuta vegealite litá litá iki kugupe nogokalavó iaká amó nenazo, ámina numukú nene nagamí goni sipisi gehanitunú lilí amó nene 6-ía minamó. Ámina goni napa hamopamó vaí itikizani nene somo ligizani luga luga asú igo ihiki lekiaká amó neve. ⁷ Lá okago, Izesú eza gelekelé izegipala nene lekeza nagamí ihiki nagamí goni napamagú lekilo. Loko lo kemekago, keza nagamí ihimi leki leki ago ago, goni napama nene vaí oake agepagó minamó. ⁸ Lá ikago, Izesú nene lekeza lugáa ihiki aliki viki nosáneta gizapa vema amilo. Loko lokago, keza ihiki aliki nivago, ⁹ ámina ha nagamilímo vain nagamí loló okago, nosá gizapa vemámo no gilimó nene laga imóza, hikutí utó ítimini mogona gele vevesamimó. Gelekelé izegipama kezáikó gili hee hee lamó. Lá igo nosá gizapa vemámo vená alimí ame vema sele loake, ¹⁰ láa loko lo amimó: Ve mukitoka nene vain nagamí lagaváa nene goí iki kimikago, niki niki kigikauka gopa okago, alika nene vain nagamí golesáa nene ihiki kimiaká niave. Nenéminokoma nemóza, géisi nene senisim okanike vain nagamí lamaná imane halá gekanike minanike minanike alika ale utó molokanimó nene vatí sunive, loko lo amimó. ¹¹ Izesú nene Kana numutoka Galilaia mikasigú nene ámina alévolé suni apí ike, ezáa hazana kelepizekago, izegipala zuha keza nene ániagiake, aikumú gili alévolé amó.

Monó zavirusave lo hukoketamó

(Mat 21:12-13; Mak 11:15-17; Luk 19:45-46)

¹² * Lá ikago, Izesú nene Kana numutó ahuloake Kapanao apatoka lemeko novigo, izolahove agunala izegipala zuha mukí keza ámegetiki vamó. Viki neneló gamena hána minamake, ¹³ * Zuta vetini avóikini asenini zeketakumú gili mina holisi alitokagove loko, Izesú nene Zelusalega iteko vimó. ¹⁴ Neneló Izesú ániagamó nene monó zavirusave hé numunaloka pulumaká iza itó nama luhusi nene Ómasi guguni gizi amitave liki aliki ake, haitó mikasigutí moniló ámina mikasigú moni kimiaká a ve keza moni holomaló gatiká iki niago, ániagoake, ¹⁵ lepa nagá límegeake nakahuni loló oake, vegeaná niamó sipsip iza pulumaká iza niamó kepeleko kimisele ahula ahula igo, nivago, haitó mikasigutí moniló ámina mikasigú moni kimiaká a vetini holoma aleko gululupa soake gatiki mina moni aleko tulu ahuloake, ¹⁶ nama luhusi miliaká a vema láa loko lo kimimó: Aménehini numuni imane ali meina numuni lilí amilo. Imane netá hatoka aliki vilo. ¹⁷ * Loko Izesú lokago, izegipala zuha leza nene geí numunimule loko mulúne gitúhiná imó nenemó nepele hilitimó okave liki monó gotoláa gizikago mina gakó goha gulunimó. ¹⁸ Lá okago, Zuta vetini monó gizapa vete láa liki lí amemó: Geza némini manámini noanímoma éahini gakotó nalene. Haitó suni makó ale utó moloko mogonaka lelepizemane. ¹⁹ * Liki likago, konotó aleko láa loko lo kimimó: Lekeza monó zavirusave imane tele vizikiko, nénisi nene gamena losive makole oko noviko, ge lutiginogo uve. ²⁰ Loko lo kemekago, keza lamó: Avotege keza monó zavirusave imane kilisimasi 46 oko novigo gi lutiginamóma neve. Itó géisi nene gamena losive makolegó noviko ge lutigitove loko nolape. ²¹ Liki lamóza, Izesú nene ezáa agupémini zavirusavégú lo vizike limó. ²² Minoko heleneikutí gamena losive makole minake mómoká oko otekago, izegipala zuha leza ámina netakumú Izesú li gakómagi monó gotolagutí gakó nenegi mota alévolé okago gelekunike, gele alévolé unimó.

Izesú ve mukilitini mogona gelekave

²³ Izesú nene avóikini asenini zeketakumú gili mina holisigú nene Zelusalega noiike, ezáa mogona utó itive loko alévolé suni haitopaitolimini loló okago, mukí vegeaná keza ániagiake, agulizaláa gili alévolé amóza, ²⁴ Izesú ezáa nene mukí vegealitini mogona ániago asú okamó nenazo, keitoka voko ale akisemimó. ²⁵ Eza ve makolimini mogona gilínogo voko vegeinatoka loká miká oketosá amimó. Ezáagó vegeaná kigikagú ániago asú oaká imó neve.

3

Izesuko Nikotemoko

* 2:12: Mat 4:13 * 2:13: Gá 12:1-27 * 2:17: Age 69:9 * 2:19: Mat 26:61, 27:40

¹ Palisaio monó vetini kigivéipo makó minamó, agulizá Nikotemó. Áisi nene Zuta vetini monó gizapa venini makó minamó. ² Ámina ve áisi límugusigú Izesú noitoka vike láa loko lo amimó: Monó gizapa velemaka, leza mogañaka geleaká noune. Géisi monó apí o lemeaká ve gihila minokanike, Ómasilokatí lemenimóma neve. Ve makó nenémo Ómasi aitoka minamiko loló oaká noani suni aleko alévolé netá loló oakaláa nene nomive. ³ Loko lokago, Izesú láa loko lo amimó: Neza lamaná lo gimitoze, gelezo. Makó nenémo okulumakutí gosohá utó amitimó nenémo Ómasimo alévolé oko gizapa olikimiaká apá áñigaminogo ive. ⁴ Loko lokago, Nikotemó láa loko limó: Íi, mota napa okatímo nana oko gosohá utó itive. Nana oko izolahini agatupagú itekiko goha getatikumú lane. ⁵ Loko lokago, Izesú láa loko lo amimó: Neza lamaná lo gimitoze. Makó eza monó nagamí holoko Sikalahulímíni agikagú vo holokoko gosohá utó amitimó nenémo Ómasimo alévolé oko gizapa olikimiaká apakú iteminogo ive. ⁶ Vegenalititokatikó utó itamó nenete vegenalitini kemetamenigi utó inigave. Sikalahulímitokatí utó itamó nenete Sikalahulímíni ametamenigi utó inigave. ⁷ Lá onoinazo, lekeza okulumakutí gosohá utó itave loko lumó nene geza gelekakó gena amino. ⁸ Hepé nene gopa aleaká noive. Lá noigo hepelimíni anó giliaká niámóza, mogañáa hitotí apí oake aleaká noive itó vike hitoka lutegeaká noihe nene gelemave. Itó Sikalahulímitokatí utó ita vegenalitini mogañáa ámináaminoko nene neve. ⁹ Loko lokago, Nikotemó nene gakó lanimó nene mogañaló gelemu gakó laninazo, nana oko utó itive. ¹⁰ Loko lokago, Izesú láa loko lo amimó: Géisi nene Isilae vetini gakó apí o kemeaká ve noanimó nenazo, gakó nolómámíni mogañáa nanamú geze gopa okane. ¹¹ Neza lamaná lo gimitoze, gelezo. Leza nene áñigoko gele nouni netá áminagó lo lekemeaká nounimóza, lekeza nene gakote gili ahuliaká niave. ¹² Neza mikasigú utó oaká noi netakumú lo lekemekugo, gili seketigí amanazo, nenemú okulumakú utó oaká noi netakumú lo likimitomó nene, nanatitotí gili seketigí itave. ¹³ Lelikikutí ve makolímó okulumakú iteko okulumakú noi netá nene keké áñigonamimóma neve. Okulumakutí lumu ve gihila nénisi Ómasilokatí lumumó nenazo, neza okulumakú noi netá nene áñigonoumóma neve. ¹⁴ * Mosé nene gozapá mikasi gomopalaló gosihakitana avevezaha netá loló oake zaló ale otimó nene gosihámate kepele vegenalite áminaló áñigiiki goha lamaná itave loko lá imó nene nenémíni okulumakutí lumu ve gihila není nene malipo zaló nilímí otinigave. ¹⁵ Nilímí otikiko nene, nenikumú gili alévolé itamoláa keza alévolé kemetamenigi minanigave, loko limó.

¹⁶ Ómasimo numutó namató vegená lelikumú milumavate gilimó nene napa napa nego gipala hamokó lehizeletamó nene aikumú gili alévolé ita vegená keza latila amiki alévolé kemetamenigi minanigave loko lá imó neve. ¹⁷ Gipala nenémo mikasiuka vegená lihima kimitove loko nomive. Kelémo kugutó vizitive loko Ómasimo amiseleka limimó neve. ¹⁸ Makó keza Ómasímíni gípalamú gili alévolé itamó nene, Ómasimo lihima kememinogo ive. Makó keza gili alévolé amitamó nenete Ómasímíni gipala hamokó aí agulizá gili alemamó nenazo, nenemú Ómasimo mota lihima kiminogo ive. ¹⁹ Lihima kemeaká nenémíni mogañáa lá oko neve: Okulumakutí lapaná nene mikasiuka vegenalitini kovogisaló ale utó okugo, keza nene netá golesa aliki miniaká amó nenazo, keza lapaná nene ahuliake, límugusímíni mututoni mini etó amó neve. ²⁰ Makó keza netá golesa aliki minatamó nenete Ómasímíni lapaná kemegeza amiiki kezáini miniki aliki amó nenémíni mogañáa utó okative liki Ómasímíni lapanató isá amave. ²¹ Makó keza netá gihila aliki minatamó nenete Ómasimo hize lé okimikago iki miliki amó nenémíni mogañáa utó itive liki lapanalámíni avogisaló anigave.

Áisi minomo iteko minatimóza nénisi minomo lemeko minanogo uve

²² Lá iki miniki, Izesú nene izegipala zuha lelémeko Zelusalega ahulokunike, Zutaia mikasiloka voko minuhá. Neneloka makó minunike nagamí holoketoko minuhá. ²³ Ámina zupa nene Zonini nene velesá nagá numukú alími mílamago, Zoní nene Salima apá agilikaloka minake, Aeno loko noi numutoka minamó. ²⁴ * Neneló nagamí mukí minokagove loko vegená anitkago, monó nagamí holoketoko minuhá.

²⁵ Lá okago, Zuta ve makolímó Zonini izegipala zuhagi nagamí holokimiaká sunimú pelevesava zemó. ²⁶ Lá iake, Zonitoka viki láa liki li amemó: Tisalemaka geza Zota nagamí vola helegaloka noako, gezagi makó minasi ve mogañáa lo utó moloko lo lemeni ve nenémo itína gamena nene vegená nagamí noholoketago, mukí vegená ahuligitiki aitoka vi asú niamole. ²⁷ Liki likago, Zoní láa loko lo kimimó; Ve makó nenémo okulumá amelaho netá matá amemikoma ezáa hagitana alitihe. ²⁸ * Neza gologí oleketative loko lo mololeketa vema minamuve loko lo lukumumóma neve. Ámina ve ale goí otoko gapova veletatane loko

* 3:14: Nam 21:9 * 3:24: Mat 14:3 * 3:28: Zon 1:20

Ómasímo nimiselekago umóma neve. ²⁹ Vená ániagi milita ve áisi vená ve loló okoko agoliza noviziko, agivelaho gelekoko alémo vatí oko mulunagú lamaná gilinoivo. Nenéminoko mukí vejená nene Izesutokagó nivago gelekuke mulúnegú agila guluma itimó nenémo hutilí oko vaí oko minative. ³⁰ Ámina vémini agulizá nene minomo iteko minatimóza, nénisi minomo lemeko minanogo uve.

Okulumakutí limi ve

³¹ Veletokatí limimó áisi livilegeko noive. Makó nene mikasigutí utó amó nenete mikasímini mututoni lílí inigave. Lá iki mikasigutí gakó linigave. Itó okulumakutí limi ve nenémo livilege asú onoive. ³² Áisi nene netá matá geleko ániagi netakumú loaká noimóza, aí gakó giliake amegesaló mila vejená mukí niamave. ³³ Gakoláa gili alitamó keza Ómasímo lokago alévolé oaká noi veve liki nene gakó hize lé iaká niave. ³⁴ Ómasímo amiselekago limi ve áisi nene Ómasímini Sikalahula gúe vaí omiake Ómasímini gakokó loaká noive. ³⁵ * Amelaho eza gipala ániagi amu heleake, mukí netá nene gipalámini agizakú molo asú okave. ³⁶ Makó nenete Ómasímini gipalamú gili alévolé itamó keza alévolé kemetameni mota alikave. Itó makó keza gipalámini gakó gili ahuliiki mihina itamó keza alévolé kemetameni aleminigave. Nenémini amupiló Ómasímini mesaha ititokó minanigave, loko limó.

4

Izesuko Samalia venako

¹ Palisaio ve keza Izesukumú láa liki gelemó: Zoní nene vejenala zuha lughakó kelémo moloko monó nagamí holokimiaká noimóza, Izesú nene vejená mukí kelémo moloake holokimiaká noive. ² Nene gakó nene hanuva lámó. Izesú nene izegipala zuha lo lemekago lezategó monó nagamí holoketunimó. Lá okago, Izesú nene gakó geleake, ³ Zutaia mikasi nene ahuloake, Galílaia mikasigú goha vimó. ⁴ Novike nene, Samalia mikasiuka vo anitimó. ⁵ * Samalia mikasigú apá makó agulizá Sika loko neneloka anitimó. Ámina apá nene ká emane amunaló Zakopó eza mikasi makó nene gipala Zoseheni amimómámini agilikaloka minamó. ⁶ Lá okago, áminaló nene Zakoponi nagamí gale minokago, Izesú nene áminaloka holínaka vo aniteake, gapo vike vitímo agizamuha zekago, ámina nagamí galeló minamó.

⁷⁻⁸ Noigo, aí izegipala zuha leza nosáneté meina hizinogo numutoka itekuko, Izesú ezáagó noitoka Samalia vená makó nagamí ihitove loko amó. Oko anitekago, Izesú nene nagamíma ihe nemezo loko lokago, ⁹ * Zuta vegí itó Samalia vegí nene otopá ziki miniaká amó nenazo, ámina vená nenémo geza Zuta ve neneka nanamú Samalia vená nenitoka nagamikumú voká nolane. ¹⁰ Loko lokago, Izesú láa loko lo amimó: Geza Ómasímo gimiti netalímini mogona gelemane. Itó nagamí ihe nemezo loko nolu ve není mogona gelemane. Geza není mogona getilina, itó alévolé oko mino-loko voakalímini nagamikumú loká atilina, gumuline. ¹¹ Loko lokago, vená nenémo láa loko limó: Ve lamanámaka, gale hána nenazo, itó geí nagamí iheaká netá nominazo, alévolé oko mino-loko voakalímini nagamí hikutí iheko nimitane. ¹² Avoteho Zakopó eza nagamí gale imane ligimó nenazo, ezáagi gipalagi iza galavagi keza áminagutikó niaká amó. Itó géisi nene Zakoponi avilegeko nagamí makó haitolímini ale utó inogo nolape. ¹³ Loko lokago, Izesú láa loko lo amimó: Nagamí imane natamóza, goha nagamikumú likivisinogo ive. ¹⁴ Není nagamí nene lakagatupa oaká nagamí neve. Makó keza nenitokatí nagamí natamó nene, goha nagamikumú kiviseminogo ive. Nénisi nene nagamí kemekugo nene kigikagú agómula minati nagamí minokiko alévolé kemetamenigi minimi itiki minanigave. ¹⁵ Loko lokago, vená nenémo ha nagamikumú nolihe loko láa loko lo amimó: Ve lamanámaka, geza ámina nagamí nemekako, nokinake nagamikumú goha nivisemiko, imaneloka gamena gamena oko nagamí iheva iheva oaká noumó nene ahulokinake navasú vizeko minatoha.

¹⁶ Loko lokago, Izesú ezáa mognamú gele hee litive loko láa loko lo amimó: Voko vaka nene alémoko ano. ¹⁷ Loko lokago, vená nenémo váne nomimó nena. Loko lokago, Izesú láa loko limó: Geza váne nomive loko lamaná lokanimóza, ¹⁸ géisi nene veló vanimó nene ligizani lugaloka asú igo vokanike animóma neve. Itó itínasa vonani ve nene geí vaka novive. Nenemú geza zoa lamane. ¹⁹ Loko lokago, vená nenémo láa loko limó: Ve lamanámaka, itínasa mota gelekuve. Geza Ómasímini agepagutí gakó loaká ve noane. ²⁰ Leza Samalia vejenalitini avotege nene imaneló Gelizim agokaló Ómasi geké limiaká amó. Itó Zuta ve lekeza Zelusalega Ómasi geké lotatune liki liaká niamóma neve. ²¹ Loko lokago, Izesú láa loko limó: Vená geza lo gimitoze, geleko alezo. Gamena makó alitokaze.

* 3:35: Mat 11:27 * 4:5: Apí 33:19; Zos 24:32 * 4:9: Eze 4:1-5; Nia 4:1-2

Nene alitokiko nene, aménehini imane agokalokó negopa, itó Zelusale numutokagó negopa, mukí apatoka gupá zi amikí monola litave. ²² Lekeza gili gopa iki nene gupá zi amiaká niaive. Lukugutó vizeaká nene Zuta ve lelitokatí utó itínazo, Zuta ve lélisi gele hee lo nounike Ómasi gupa ze ameaká nouné. ²³ Gamena makó alitanogo ive. Itó imane litá oko mota alitokaze. Nenemú veenalá zuha lamaná keza kigikatunú itó gakó gihilatunú aménehini gupá zi aminigave. Améneho nenéminiki gupá zi amita veenakumú vitagá noive. ²⁴ Ómasi nene sikalahú nenazo, leza Ómasímíni Sikalahulímíni zámuzatunú itó gakó gihilatunú gupá ze amitune. ²⁵ Loko lokago, vená nenémo láa loko lo amimó: Gologí oletative loko lo mololeta ve (leza Kilistó ave loaká nouhá ve) utó itive liki likago gelenoumó nenazo, nene mota gelekuve. Eza utó okoko netá matá mukí nene lo utó o asú inogo ive. ²⁶ Loko lokago, Izesú gakó lo nogumu ve nénisi nene noumole, loko lo amimó.

²⁷ Loko noligo, izegipala zuha leza okunike, ámina Samalia venaki gakó lasimó nenemú sigaga lomikunike, nanetakumú nolihe itó nanamú gakó lo namihe loko loká otanogo gena livisekago ahulunimó. ²⁸ Lá okago, vená nenémo nagamí goni nene ahuloake, lolu loko taoniloko vike mukí veená láa loko lo kimimó: ²⁹ Lekeza iki imane ve ángalo. Ánigonamu ve áisi nene asugunatoka oko moloko umó nene gakó lo utó molo asú onimikave. Lá imó nenazo, eza gologí oletative loko lo mololeta vema noitihe. ³⁰ Loko lokago, numutokatí lemeke Izesú noitoka anitikago, ³¹ izegipala zuha leza gala vizeko monó gizapa velemaka, nosánétá nozo. ³² Loko lokuko, eza láa loko lo limimó: Nosánétá haitolímíni nenitoka nemóza lekeza gelemave. ³³ Loko lokago, lezetetoka logele hagele unike makolímó nosánétá makó ale ma amekago lihe. ³⁴ Loko lokuko, eza limó: Nímisilimó eza lititoka molatitoka oko hoza gakó lonetamó nene nalumó nenémo nosánétáne neve. ³⁵ Lekeza ikani losive makole goloko helekiko nosánétá emolanogo ive liki liaká niamóza, lo likimitoze, gililo. Lokogómula pulusiki aménehini miní nene ángalo. Nosánétá mota omolamó nenéminí iki veená kigika mota ali vavá iki niminave. ³⁶ Loko lo nolukumu gakó nenéminí hozaváa alita ve nenete meinaváa alinígave. Alikiko veená makolite alévolé kemetameni ali luhanigave. Lá ikiko, kigikagú monó zuha atilá a vegi gihila lege vegi ali apiziiki kogoliza vizinigave. ³⁷ Lá okiko, makolímó zuhá okago, makolímó gihila lege moloaká noive liki liaká nia gakóma alévolé inogo ive. ³⁸ Lekeza ali zuhá amikíma gihiláa ligitave loko likimiselekumóma neve. Veená makolite hoza aliki ali zuhá ikago mota omolokago, lekeza hozanímíni gihila hanuva milikave.

³⁹ Loko lokago, Samalia vená nenémo netá matá oko moloko umóma lo utó molo asú onimikave loko lo kemekago, ámina apakú veená mukilite Izesukumú gili alévolé amó. ⁴⁰ Lá iake, Izesutoka vi anitiake, makó minatune liki alesá milikago, gamena lositá kezagi makó minamó. ⁴¹ Kezagi minake monó lo kimigo, mukilite gili seketigí amó. ⁴² Lá iake, ámina vená nene láa liki li amemó: Leza ganáma nene géisi aveté okako geleháma neve. Lá unimó nemóza, itínasa nene ezáa agepagutí gakó ligo gelekunike gele alévolé okune. Áisi lamaná numutó namató ve lelí lugutó vizeaká ve noive loko mota gele alévolé okune, liki lamó.

Izesú kiapé makolímíni gipala alémo zokamó

⁴³⁻⁴⁴ * Izesú ganá nene Ómasímíni agepagutí gakó liaká ve kezáini numuni apáitoka minínikoma nene, ma kilímí napa aminígave loko likumú nene Izesú eza kezagi gamena losima minoake, Galilaia mikasiuka vimó. ⁴⁵ * Galilaia mikasiuka vo anitekago, Galilaia veená keza amunaloka Zelusalega viake avóikini asenini zeketakumú gele minoaká holsigú eza hoza aligo ángamó nenazo, nenemú Izesuni alimí milamó. Lá ikago, Kana numutoka Galilaia mikasigú nene amunaló emane Izesú lokago hanuva nagamilímó vain nagamí loló i numutoka atiginá oko vimó.

⁴⁶ * Voko noigo, Kapanao numutoka kiapé makolímíni gipala avisekago, noigo, ⁴⁷ Izesú eza Zutaia mikasi ahuloko goha atiginá oko Galilaia mikasiuka oko nanitive liki likago, geleake ámina kiapé nene gipala helesakosá oko noigove loko Kapanao numutoka alémoko vitove loko Izesutoka vike negénegeka limó. ⁴⁸ Negénegeka lokago, Izesú nene lekeza lu avevezaha la avevezaha nougo, ángiake gakóne gili aliaká niahe. ⁴⁹ Loko lokago, ámina vémo limó: Ve lamanákama, gipáne helekatize, litá oko lomano. ⁵⁰ Loko lokago, Izesú nene geza hanuva vozo. Gipaka mota zokokave. Loko lo amekago, ámina vemámo Izesuni gakó gele aleake, atiginá oko vimó. ⁵¹ Novigo, gó lokago, gelekelé vemate gapoló anitiki gipaka mota zokoake noive. ⁵² Liki likago, zoka gamenamú loká oketago, keza azozá ho luseteló nego agupegú govísi alike hakalotave. ⁵³ Liki likago, gipámíni amelaho nene mogonamú lá oko gilimó: Ámina gamenaló Izesú nímisilike gipaka mota zokokave loko limóma neve.

* 4:43-44: Mat 13:57 * 4:45: Zon 2:23 * 4:46: Zon 2:1-11

Loko geleake, ezáagi vená izegipalagi Izesukumú gili alévolé amó. ⁵⁴ Izesú nene Zutaia mikasiukatí oko Galilaia mikasiuka atiginá ike lu avevezaha la avevezaha nene igo, losi imó.

5

Nonohulotó ve makó alémo zokamó

¹ Minoko Zuta vetini holisi napa makó alitokago, Izesú nene Zelusalega itimó. ² Neneló sipsip izatini gatetó nene nonohuló makó minamó, agulizaláa Petezata. Agilikaloka gaizopa numuni ligizani lugaloka asú igo minamó. ³ Ámina numukú nene kivisi vejená, kogomulaló ali vejená, kigisaló ali vejená, kigisa kigizani nakeseta vejená mukí aki miniaká amó. ⁴ Lá amó nene Guivahanímini ageló makolímó gamena makó zupa lemeaká noike ámina nagamí ale heipeí oaká itotí ámina nonohulukú ganá limi ve nene avisi netakutí zokoaká imó nenazo, keza nagamíma heipeí itikumú gizapa iki minamó. ⁵ Lá iki minakú nene ve makó agisa genisi i ve izolahó getakutí kilisimasi 38 oko novigo alímiki áminaló ahulikago minamó. ⁶ Noigo, Izesú eza ámina ve ángoake, gamena hána hána minokave loko geleake, loká otake geza zokatove loko ma gelenape. ⁷ Loko lokago, agisa genisi i vemámo limó: Ve lamanámaka, hí ve noitimó nagamí nonohulóma heipeí noiko nagamikú nelémo molokiko zokatove. Liminogo nougo, makolímó litá oko nivilegeake lemeaká noive. ⁸ Loko lokago, Izesú láa loko lo amimó: Geza oteoko avilisaka geheko gapo moloko vozo. ⁹ Loko li agepagi agisa golesa i vemámo agisa pehe lo ahuloake, oteko avilisala geheko gapo moloko vimó.

Ámina hoza nene holisi zupa alimó. ¹⁰ * Nenemú Zuta vejenalitini monó gizapa vete ve zokamó nene itína holisimágú nenazo, avilisaka ale nogehenimó nene amosá suni alekane. ¹¹ Liki li amikago, eza láa loko lo kimimó: Nelémo zoka vemámo avilisaka geheko gapo moloko vozo loko loake nimiselelago aleko nouve. ¹² Loko lokago, keza láa loko lo gimi ve agulizá éahoma neve. ¹³ Liki lamóza, Izesú nene mulusi ikú holúikú legesá oko vimó nenazo, alémo zokago mina vemámo agulizaláa gelemimó nenazo, ¹⁴ gelemuve loake, monó zavusavegú iteko noigo, Izesú minoko aí ángoake láa loko lo amimó: Gugupega mota lamaná okaze. Nenemú alika genavagi netá gizalekatanize, lihima netá goha alemo. ¹⁵ Loko lokago, ámina ve eza Izesuni ángo hee loake, vike Zuta gizapa vema ángoake nelémo zoka vémini agulizá Izesúma neve, loko lo kimimó. ¹⁶ Holisigú holisigú hoza nenémináa aleaká ikumú nene Zuta vejenalitini monó gizapa vete nenelotí apí iki gopoguni militake lovaga li amemó. ¹⁷ Lá ikago, Izesú láa loko lo kimimó: Améneho hoza aleaká noimó nene holisi gamenagi miní ameko aleaká noive. Itó nezagi áminagó oko aleaká nouve. ¹⁸ Loko lokago, Izesú nene Zuta vetini holisi ale gopa ikumú, itó Ómasimú nene aménehove like Ómasigi nezagi lelegí oko nousive loko likumú nene Zuta vetini monó gizapa vemate ámina netá lositakumú nene gili golesa goha ake, apele hilitune liki amuza golesa miliaká amó neve.

Ómasímini gipalámo lihimamú lo hukoketanogo ive

¹⁹ Lá okago, Izesú nene gakó láa loko lo kimimó: Neza lamaná lo likimitoze, gililo. Neza Ómasímini gipala noumóza, nezáne nagata geleko hoza alitomoláa nomive. Améneho alimó nene ángouke áminagó oko aleaká nouve. Améneho oko moloko noimó nene gipala neza ángouke, áminagó oko oko moloko oaká nouve. ²⁰ Améneho nene gipala neni ángo amu heleaká noike, hoza nalimó nene nelepize asú oaká noive. Itó lekeza hoza nalugo ángiaká niamó nenegó nomive. Lekeza ángiiki sigaga linitatave loko améneho eza hoza napa lekelepizitove loko neve. ²¹ Améneho eza hele vejená kelémo oti ke kelémo lamaná oaká noimó ámináminoko gipala neza aipe aipe kemetameni gosohá kimitove loko hanuva kiminogo uve. ²² Améneho eza vejenalitini lihimamú lo hukoketosá amive. Ámina hoza mukí nene gipala neni nigizakú molokamó nene ²³ vejená mukilite aménehini agulizá ali otiaká niamó nenémini iki gipala neni nugulizá ali otitave loko neve. Makó keza gipala neni nugulizá ali otema vejenalite gipala nimisilimó aménehini agulizá ali otemamó geleaká noive. ²⁴ Neza lamaná lo likimitoze, gililo. Makolímóhe makolímóhe neni gakó gelekoko nimisili vemú gele alévolé onimó nenémo alévolé ametameni mota alekave. Alike lihimalamú goha goní aminogo ive. Heleaká ametameni nene ahuloake alévolé ametameni mota aleake noive.

Izesuni mogonala li utó a ve

²⁵ Neza lamaná lo likimitoze, gililo. Gamena makó alitanogo ive. Itó imane litá oko mota alitokave. Neneloka helemó nenete Ómasímini gipala neni nonó lupa giliiki otiiki minanigave. ²⁶ Améneho eza alévolé oakalímíni mogonáa neve. Gipala neza áminagó oko

* 5:10: Nia 13:19; Zel 17:21

alévolé oakalímíni mogonáa minatane loko nimisilímó. ²⁷ Lá okago, neza okulumakutí lumu ve gihila nounazo, améneho nene mukí vegeenalitíni lihimáinimú lo hukoketatane loko lonetamóma neve. ²⁸ Imane nolu gakó giliiki nene ininá amilo. Gamena makó molamó nene hanuva neze. Nene alitokiko, gonosi apakú akinamó keza nonó lupa giliiki, ²⁹ * galegutí otinigave. Lá iiki netá lamaná aliki minamoláa keza alévolé kemetamenigi otinigave. Itó netá golesa aliki minamoláa keza otikiko, lihimá kiminogo uve.

³⁰ Lá itomóza, nezáne nagata geleko hoza alitomoláa nomive. Améneho lokiko nene, lihimamú lo hukoketanogo uve. Lá inake, lihimamú hoza alekugo, etanogo ive. Ámina hoza alitomóza, nezáne nagata geleko alemoko nimisilímó áisi lititoka molatitoka oko alinogo uve. ³¹ Nezáne mogonáne lo utó itomó nene, gihila zemitinazo, ³² makolímó mogonáne lo utó okiko gihila zinogo ive loko nene gelenouve. ³³ * Lekeza Zonitoka ve makó kimisilikago, keza loká imikago, eza gakó gihila lo utó onoimóma neve. ³⁴ Vegená neneta mogonáne ániigiiki hizi lé inítatave loko lamuve. Hanuva giliiki alévolé lekemetameni aliiki alévolé gapogú vitave loko lekelikumú nene noluve. ³⁵ Zoní eza lamaná líví napa loló oake, hize hanatoleketonoigo, lokogoliza viziki minamó neve. ³⁶ Ómasímó není hize lé onimiaká noimó nene Zonini avilegeko haitolímínoko neve. Améneho haitopaitó hoza alitane loko hoza gakó lonetamó nene ámina hozámíni gihila ale utó okugo, améneho nimiselekago lumumómámíni mogonáa utó oaká noive. ³⁷ * Améneho nimisilímó áisi mogonáne lo utó oaká noimóza, lekelisi nene aí anó lupa gilísá amamóma neve, itó aí ániGISá amamóma neve. ³⁸ Lekeza améneho nimisilí vemú gili alévolé amanazo, aí gakó nene likigikagú minamive. ³⁹ Lekeza nene monó gotola mota alenoune liake, alévolé oko minoakalímíni gakoláa nenegú neve liki giliake, agizaka hiziki miniaká niave. Itó není mogona nene ámina luhuvagú utó noimóza, ⁴⁰ lekelisi nene nenitoka iki gímiziiki alévolé lekemetamenigi itanazo, gopa ahulinimiaká niave. ⁴¹ Itó vegeenalita nugupe aliki ititave loko losá amumóza, ⁴² lekelí mogonáa nene lamaná gelenouve. Likigika nene Ómasiloka milísá amave. ⁴³ Nénisi nene aménehini gakotó moloko lekelitoka lumumopa, lekelisi nene geha zi nimísá amave. Minoko ve makó ezáa agata geleko anitekikoma nene, geha zi aminigave. ⁴⁴ Lekeza nene vegeenalite lílími napa itave liki giliake, Ómasi hamokolímó lelémó napa itive liki makó lísá amave. Lá ikanazo, nana iiki Ómasímú gili alévolé itave. ⁴⁵ Lekeza nenikumú nene Ómasi amelahini avogisaló goní oletatímó nehe liki lamilo. Lá oko nomive. Lekelisi nene Moseni gakotoka leheta iaká niave. Ámina ve Moseni gakó nenémó goní oletetanogo ive. ⁴⁶ Áisi nene luhuva gizamó nene nenikumú gizonimóma neve. Nenemú lekeza aí gakó gili alemó nelina nezamuki gili alévolé aline. ⁴⁷ Lá onoimóza, Moseni luhuva gakó gili ahulikamó nenazo, není gakó nene nana iki gili guni itamó neve, loko lo kimimó.

6

Ve 5000 nosánetá kemeko namó

(Mat 14:13-21; Mak 6:30-44; Luk 9:10-17)

¹ Izesú eza ámina gakó lo asú oake, Galilaia nonohuló agulizá makó Tipelia loko noi nonohuló likeko vo helega imó. ² Voake kivisi vegená mukí kelémó zoka zoka ike, lu avevezaha la avevezaha igo, vegeenalite ániGiake, ámegetiki víki minamó. ³ Lá niago, Izesú nene izegipala zuha lelémoko agokaú iteko minunimó. ⁴ Gamena nene zupa Zuta vetini avóikini asenini zeketakumú gili mína holisi alitokago, ⁵ Izesú nene vegená mukí aitoka nanitego, ánikogoake, Pilipóni nene loká otake nosánetá hikutí meina hizeko kimitune. Láa vegená alegesá amó imanete niko vo holoma itimó neve. ⁶ Loko limó nene Izesú eza netá matá oko moloko itimó nene nego, hanuva gimivagú moloko limó. ⁷ Lokago, Pilipó nene moní gó ligizani lugaloka asú igo ahuloko nosánetá meina hizeko kimitunimóza, ma vo aleminogo ive. ⁸ Loko lokago, izegipala zuha lelitokatí makó Saimon Pitani agunala Etulú áisi nene láa loko limó: ⁹ Imaneuka izegipa makó noimó áisi peleti ligizani lugaloka asú igo itó lagaha losítá aleneimóza, vegená mukí nianazo, ánenéatunú nana itune. ¹⁰ Loko loká okago, Izesú nene lekeza vegenáma li kimikiko mikasiló miní gesá iki minino loko lo limimó. Ámina apató nene tau lamaná minamó nenazo, neneló ve 5 tausén ale alitoko nenémíni limiki miní gesá ikago, ¹¹ Izesú nene ámina peleti aleake, Ómasi agepoka loake, alegesá iki mína vegená gona moloko kemeake, ámina oko lagahama kimimó. ¹² Kemekago, níki níki kagatupa okago, Izesú nene izegipala zuha lo limike lumatamáa minoko latíla okatize, gizaká ilo. ¹³ Loko lokago, leza peleti ligizani lugaloka asú igo kemekuko namó nenémíni lumatamáa ale nupa oko gosúveha 12 vaí okago ale mulunimó. ¹⁴ Lá okago, goli-vagi alévolé netá lá oko loló igo, vegená keza ániGiake, imane lamaná Ómasímíni agepagutí

* 5:29: Tan 12:2

* 5:33: Zon 1:19-27, 3:27-30

* 5:37: Mat 3:17

gakó loaká ve napa makó mikasigú utó itive liki lina vema noitive. ¹⁵ Liki liake, Izesuni hizi vigiake, agulizaki venini lilí itanigi ago, ániogoko geleake, ahulokimiake ezáágó agoka makotoka itimó.

Izesú nagamí amupiló liso liso vimó
(Mat 14:22-33; Mak 6:45-52)

¹⁶ Iteko noigo, únaká molokago, izegipala zuha leza nonohuló agilikaloka lemehá. ¹⁷ Lemeko Kapanao numutoka atiginá oko vinogo nagamikú lapegú noituko, límugusi lithokago, Izesú velesá amigo, lezategó vunimó. ¹⁸ Novuko, ohuhú napa alike, nagamíma valahuká napa nozigo, vunimó. ¹⁹ Leza nene kilomita 5-ahe itó 6-ahe ahulokunike novuko, Izesú nene nonohuló amupiló liso liso vike lugupeló naligo, ániogokunike, lehelele vizimó. ²⁰ Lehelele novizigo, Izesú nene lekelegesá legemino. Nénisima nouze. ²¹ Loko lokago, sipigú alémo molanogo nouko, áminasitó vitune loko luní apatoka nene vo anitunimó.

Vegenalite Izesukumú vitagá amó

²² Akunike gó lago, vegená mukí nonohuló vola helega minamoláa keza láa liki lamó: Holugú sipi hamokó imaneló nego ániGUNIMÓ. Nenegú izegipala zuha kezáikó Izesuni ahuliake vikamó nenazo, Izesú hitoka vonoitive. ²³ Liki kagata gululusi giliake niago, Tipelia apatokatí vegená makó nene sipi makokú itiake Guivahanímo Ómasi agepoka loake peleti kemekago namómalo imi anitemó. ²⁴ Anitiake, mukí vegenalite Izesuge izegipala zuha niamago, vitagá iake, ámina sipigú itiake, Izesukumú vitagá itune liki Kapanao numutoka atiginá iki vamó.

Izesú alévolé oko minoakalímíni nosáneta nóive

²⁵ Nonohuló imane helegaloka vitagá iki iki alími utó miliake Monó gizapa velemaka, geza nana oko ane. ²⁶ Liki likago, Izesú láa loko lo kimimó: Neza lamaná lo likimitoze, gililo. Lekeza lu avevezaha la avevezaha ugo ániGIAKE, nenikumú vitagá niahe. Lá oko nomive. Peleti lukumugo, niki niki lakagatupa okago vitagá niave. ²⁷ Lekeza hozaváa alilo. Haha iti nosá nenemukopa, alévolé oko minoaká nosáneta nenémíni hozaváa alilo. Okulumakutí lumu ve gihila neza Ómasi aménehini anosa alenou ve neza alévolé oko minoakalímíni nosáneta lamaná likiminogo uve. ²⁸ Loko lokago anotó aliki Ómasímo giliko lamaná itive loko nana hoza alitune. ²⁹ Liki loká ikago, láa loko lo kimimó: Ómasímo hoza alitave loko loleketonómoma nene nimisili ve nenikumú gili alévolé itave lokoma nena. ³⁰ Loko lokago, láa liki li amemó: Alévolé suni makó ale utó okako, ániGOKINAKE, geikumú gele guni itune. Nana hoza makó alitane. ³¹* Avotege keza gozapá mikasi gomopalaló minámomálo nene mana nosakó niki minámoma neve. Nenémíni luhuva gakó nene Okulumakutí nosá kimigo niki minámó neve liki gizinámoma neve.

³² Liki likago, Izesú láa loko lo kimimó: Lamaná lo likimitoze, gililo. Mosé nene okulumakutí nosá lekememímoma neve. Améneho nene likimimó. Itó okulumakutí nosá gihila lekemeaká noive. ³³ Nosáneta nene okulumakutí mikasigú limimó nenémo alévolé oko minoaká nene ale utó olekemeaká noive. Nenémo Ómasilokatí nosáneta gihila neve. ³⁴ Loko lokago, Guivahani geza nosánetakumú lanimó nene gamena gamena limitanize.

³⁵ Liki li amikago, Izesú láa loko lo kimimó: Alévolé oko minoakalímíni nosáneta nénéisi nene nouve. Makó keza nenitoka iki gímizitamó nene gaúna heleminigave. Itó nenikumú gli alévolé itamó keza nagamikumú kiviseminogo ive. ³⁶ Neza nene lo lekemeaká noumóza, lekeza nene gili ahuliake, gili alévolé amave. ³⁷ Mikasiuka vegená nene améneho nemeaká noi vegená keza mukí nene nenitoka anitinigave. Nenitoka anitita vegená nene ma kehelú aminogo uve. ³⁸ Okulumakutí lumumó není negepagú gakó hize lé itove loko lememuve. Nimisili vémo lititoka molatitoka oko hoza alitove loko lumumóma neve. ³⁹ Améneho nene nenitoka kelémo mola vegená latila ikatave loko kelémo nupa okinake gamena napaló avasavagi kelémo otekgu, otinigave. Nimisili véminí agepagutí gakó láa oko neve. ⁴⁰ Gipala ániGí hee li miniki aikumú gili alévolé itamó keza alévolé kemetameni alikiko, gamena napaló kelémo ote asú inogo uve. Aménehini gakó nenémínoko neve.

⁴¹ Loko Izesú nene okulumakutí nosáneta nénéisi nouve loko likumú nene Zuta vetini monó gizapa vete gili golesa iake géneka lake, Izesukumú láa liki lamó: ⁴² Imane ve nene Zosehenni gipalama neve. Itó izolahiko amelahiko nene ániGO NOUHÁMA nenazo, neza okulumakutí lumumóma neve loko nanamú loaká noive. ⁴³ Liki likago, Izesú láa loko lo kimíke limó: Lekeza gilíki golesa aminó. ⁴⁴ Ve makó nene kezáini kigikatunú giliiki nenitoka iki gímizeminigave. Améneho nimisilimó eza kelémoko okiko, iki anitinigave. Lá

* 6:31: Gá 16:4,15; Age 78:24

okiko, neza nene veđená nenémináa gamena napaló kelémo otinogo uve. ⁴⁵ * Ómasímíni agepagutí gako liaká a vete gako láa liki luhuva gizinamóma neve:

Ómasi ezáa veđená mukí nene monó lo kemeko apí okiminogo ive.

Liki gizinamó nenazo, améneho monó lo kimiko gilitamó keza nenitoka anitinigave. ⁴⁶ Ve makolímóhe makolímóhe aménehini ángosá amimóma neve. Ómasilokatí lumumó nénisi hamokó nounazo, nezagó áñigonouve. ⁴⁷ Neza lamaná lo likimitoze, gililo. Nenikumú gili alévolé ina veđená kéisi nene alévolé kemetameni mota alikave. ⁴⁸ Alévolé oko minoakalímíni nosá nénisi nene nouve. ⁴⁹ Avotike keza mikasi gomopalaló mana nosakó niliki nivake alika helemó. ⁵⁰ Itó okulumakutí nosá nokoko helemoakalímíni imane nenitoka nene neve. ⁵¹ Alévolé nosá okulumakutí limimó nene nénisi nene nouve. Nenemú makó keza nenitokatí nosánetá natamó nene, alévolé iki miní lúaló miliki viki minanigave. Mémelánémo nene nosánetá loló onoiwe. Numutó namató veđená lekeza alévolé lekemetamenigi minatave loko likiminogo uve.

⁵² Loko lokago, Zuta ve keza pelevesava zeke áisi nana okoko mémeláa limiko natunikumú live. ⁵³ Liki likago, Izesú ezáa zohota zaló hilitimó nenémíni gihila ali lá itakumú anoza gako láa loko lo kimimó: Neza lamaná lo nolukumuve. Lekeza okulumakutí lumu ve gihila není mémelagi golanigi namitamó nene, alévolé lekemetameni aleminigave. ⁵⁴ Makó keza není mémelagi golanigi natamó nene, alévolé kemetameni mota alikago gamena napaló kelémo otinogo uve. ⁵⁵ Není mémela nenémo nosá gihila neve. Itó není golani nenémo nagamí gihila neve. ⁵⁶ Není mémelagi golanigi ninamó nenete neniki ali akisikave. Neza ámina oko kéí ale akisekuve. ⁵⁷ Améneho alévolé vémo nimiselekago, lemekumole loko aí gelegele nominuve. Ámina iki není mémeláne nata veđenalite není gelegele minanigave. ⁵⁸ Okulumakutí limí nosalímíni mogonáa lá oko neve. Avotike gozapá namómáminoko nomive. Kéisi mana nosánetakó niliki vake alika helemóma neve. Itó není nosá imane natamó nenete miní lúaló miliki alévolé kemetamenigi minanigave. ⁵⁹ Loko Izesú eza Kapanao numutoka minake monó numukú itike, ámina monó nene lo kimi gako neve.

Alévolé oko minoaká gako

⁶⁰ Lá okago, aí veđenala zuha keikutí mukilite ámina gako nene giliake, kezáitoka nene gako imane gelehá nene gena okanazo, nene éaho gele hee loko amegesa molative. Liki goseleka likago, ⁶¹ Izesú nene agikatunú geleake, láa loko limó: Gako nene gilikago golesa okahe. ⁶² Okulumakutí lumu ve gihila neza goí oko minú apató atiginá oko noitugo, lekeza ángatamó nene, nana itamó neve. ⁶³ Lugupémíni mémela nenémo alévolé lemetameni ale utó oakaláa nomive. Alévolé lemetameni loló oaká nene Sikalahulímíni hoza neve. Itó gako lo nolukumumó nenémo alévolé lekemetameni ale utó oaká gako neve. ⁶⁴ Láa loko lo lukumumóza, lekelikutí lugáa nenete gili alévolé amave, loko limó. Izesú nene monola gili ahulata veđenala nene hozava apí i zupa mota geleimó neve. Itó amimika liti ve ámina oko geleimóma neve. ⁶⁵ Nenemú ámina gako lo kemeake, miní ameko láa loko lo kimimó: Neza nenemú láa loko lo nolukumuze, gililo: Makolímó améneho alémo vávani amiko nenitoka omo aniteakaláa nomive.

⁶⁶ Loko lokago, ámina zupa nene veđenala zuha mukilite ezagi minanigi goselé kepelekago, kemegeza amiake vikago, ⁶⁷ Izesú nene izegipala zuha 12-ama loká oletake lekezagi ámina iki ahulinimíni vitune liki nilahe. ⁶⁸ * Loko lokago, Saimon Pitá láa loko lo amimó: Guivahani geza ahulogimikinake éahitoka vitune. Geza hamokó alévolé oko minoaká gako loaká noane. ⁶⁹ Leza nene geikumú mota gele alévolé onoune. Geza Ómasilokatí apazá keké vizeko noani ve noane loko gelenoune. ⁷⁰ Loko lokago, Izesú láa loko lo kimimó: Neza izegipa 12-a lekelémo etó okumóza, lekelitokatí makó nenémo Satatoka mino molokave. ⁷¹ Loko limó nene Kalíotó numutotí Saimoni gipala Zutá eza Izesuni veđenala zuha 12 lelikutí vémo minoko amimika litikumú limó neve.

7

Izesuni agunamotamolate gili alévolé amamó

¹ Lá okago, Zelusalegatí Zuta veđenalitini monó gizapa ve keza Izesuni apele ahulatune liki amuza milikago, Zutaia mikasi nene ahuloake Galilaia mikasigukó vogá ogá oko minamó. ² * Lá oko noigo, avóike minumuni gekumú gili mina holisí alitokago, ³ Izesuni agunamotamolate láa liki li amemó: Veđenaka zuha keza lu avevezaha la avevezaha oaká noanimó nene ángatave loko imane apá ahulokokoko voko Zutaia mikasiloka loló okako ángatave. ⁴ Makó nenémo omo utó itove lokoma asuguná minoko hozaváa ma alesá amive. Geza hoza nenémináa alitove lokoma, voko veđená kovogisaló utó okoko

* 6:45: Isa 54:13 * 6:68: Mat 16:16; Mak 8:29; Luk 9:20 * 7:2: Liv 23:34; Gapo 16:13

aliko ániगतानाऒ, ⁵ liki izegipa agunamotamola keza lamó nene, aikumú gili alévolé amake láa liki likago, ⁶ Izesú nene láa loko lo kimimó: Lekeza netá matá loló itune liki litá íki lilí itamóza, Zutaia apató vito gamenaváne velesá alitamive. ⁷ Monó gelema veganalite mukahá lekepeleminigave. Neza nene miníki alíki ago golesa imoláa lo utó oaká nou netató gasó nimíaká niave. ⁸ Lekeza nene holisigú vilo. Neza nene gamenáne alitaminazo, itínasa ma tovaminogo uve. ⁹ Loko loake, Galílaia mikasiuka minamó.

Izesú minumuni holisi minamó

¹⁰ Minokago, agunamotamolate goí iki holisi minatune liki Zelusalega tivikago, ezagó nene alíka olío hizeko tovo imó. ¹¹ Notovo ígo, holisi nene alitokago, Zuta ve keza aikumú lokatoka íki hiláauka voko noitive liki vitagá amó. ¹² Lá iki mihina iki vitagá niago, mukí veganalite aikumú musímusíka liki nilake lugáate Izesú nene ve lamanáma neve liki likago, lugáate géneka liake ahulalo, áisi nene veená kelémo gopa napa oaká noive. ¹³ Liki lamóza, Zuta vetini monó gizapa vemú kehelele vízekago, gakó napagutí lamake asugunatoka lamó.

¹⁴ Lá ikago, holisi holulagú Izesú nene monó zagusavegú itike monó apí okímike limó. ¹⁵ Lá oko noigo, Zuta ve keza sigaga lake áisi nene lelí sukulu lamímóma nemóza, monó mogona hiláaukatí geleaká imó nolive. ¹⁶ Liki likago, Izesú láa loko lo kimimó: Neza monó apí olíkimiaká noumó nene nezáne geleko lo lekemesá amuve. Nímisili vémitokatí geleko lo lekemeaká nouve. ¹⁷ Makó nenete Ómasímo lititoka molatitoka oko alitune liki gilitamó nene, alíka Ómasílokati nehe nenitokatí nehe nene ámina monokumú gili hee linigave. ¹⁸ Makó nenete kezáini kagata gilitató litamó nene kugupe alíki itiki linigave. Makó nenete kímisili ve hoza amelahikumukó agupe aleko ítitune liki hozava alita ve nenete ve huluva, sozagi nomi veená niave loko litune. ¹⁹ Lekelikutí Mosé eza lo hukoko lo líkimi gakó amegesa mila veená ma níamave. Nenemú lekélisi nene nanamú nípilitune liki líaká niave. ²⁰ Loko lokago, veená mukílite lamó: Geza matuka gopa okago nolape. Éaho gípílitove noligo nolane. ²¹ Liki likago, Izesú láa loko lo kimimó: Neza holisi zupa avevezaha hamokó loló umó nene ániagiake sigaga linamó neve. ²² * Nenemú gililo. Mosé nene izegípatini kugupeló Ómasímíni anosa mílikítatave loko loleketamó nene, Mosé apí amímó. Avotíke kezáini apí amóma neve. Lá okago, ámina hoza alita gamena alitokago, holísima neve líki lamíki ámina hoza hanuva aliaká niave. ²³ * Nene Mosé lo hukoko lí gakó haha okative líki Ómasímíni anosa nene izegípatini kugupeló nene holisi gamenaló mílikímiaká nianazo, nénsi nene holisi zupa ve gepili alémo lamaná ukumú lekeza nanamú gili golesa íaká niave. ²⁴ Lekeza ániagi lamaná amíkima gakó galinali lamilo. Mogonaló gili hee hee líkigó lilo.

Ómasímo gologí oletative loko lo mololeta ve

²⁵ Loko lokago, Zelusale apá amelage luguhate láa liki lamó: Apílitune liki líaká nia vema imane nehe. ²⁶ Nana okago gakó utó nolító imane kugulizakí vele nenete géneka litamave. Keza aí mogonáa gilíki gili vevesamó Ómasímo gologí oletative loko lo mololeta vema noigo niahe. ²⁷ Lá oko nomive. Imane vémini getamoláa mota gelenoune. Gologí oletative loko lo mololeta vema utó ítimómámíni mogona ma gele vevesaminogo une. ²⁸ Liki lamó nene Izesú Nasaleta numutoka utó íhe líke gíliake láa liki likago, Izesú monó zagusavegú nene monó apí oketoko noíke gakó napagutí láa loko limó: Íi, lekeza mogonánegi není getamó mogonáagi gelenoune líki linamóza, lumumó nene nezáne nagata geleko lemémuve. Lamanalímíni amelaho noive. Áisi nímiselekago lumumóza, lekeza aikumú nene gelemave. ²⁹ Nénsi nene aí amatoka minutotí nímiselekago lemekumó nenazo, aí mogona gele vevesonouve. ³⁰ Loko lokago, Ómasílokati lumumó neve loko líkumú nagá aminígí amóza, gamenaváa alitamigove líki kígizató gena okago ahulamó. ³¹ Lá ikago, keítokatí veená mukílite aikumú gili alévolé íake láa liki lamó: Imane vémo lu avevezaha la avevezaha oaká noínazo, gologí oletative loko lo mololeta vema anítitive líki lína vemáma Izesuní avilígítihe. Óve, avilegeminogo íve.

Nagá numukú Izesuní alími mílatave líki pílisi ve kímiselemó

³² Alegesá íki mína veganalite láa líki nílago. Palísiao monó veganalite gíliake, keza guguni gízíaká a ve napagi lígíli hagíli íake Izesuní nene nagá numukú alími mílatave líki pílisi ve kímiselemó. ³³ Lá ikago, Izesú láa loko limó: Neza gamena koma lekélitoka mínínake nímisíli veloka atígíná oko vínogo uze. ³⁴ Lá okugo lekeza neníkumú vitagá ítamóza, ma ániágíminigave. Voko mínatotoka nene nana íki ítitave. Ma ítemínigave. ³⁵ Loko lokago, Zuta vete kezáitoka láa líki lígíli hagíli amó: Imane ve hítoka voko noíko vitagá

* 7:22: Liv 12:3; Apí 17:10 * 7:23: Zon 5:9

itunikumú live. Zuta vejená Kiliki mikasiuka hutilí iki viki niamoláa keitoka voko minoko monó gako apí o kemeko noiko vitagá itunikumú lihe. ³⁶ Lezeza nienikumú vitagá itamóza, ma áni gaminigave loko limó itó voko minatotoka ma iteminigave loko limó nene nana itikumú live, liki lamó.

Ligikagutí nagamí lisani nenéminoko lemeko minanogo ive

³⁷ * Zuta vejenalitini holisi napa nene asú inogo noigo, alegesá napa iki niago, Izesú oake gako napa like láa loko lo kimimó: Makó keza nagamikumú kivisekikoma, nenitokatí iki natave. ³⁸ * Itó monó gotolaú nenikumú gili alévolé ita vejenakumú nene kigikagutí monó nenémo nagamí lisani nenémini oko zeko minanogo ive liki luhuva gizinamóma neve. ³⁹ Loko Izesú limó nene ezámú gili alévolé ita vejená nene Sikalahú lehizeketatove loko limó neve. Eza okulumakú gonanalisi lapanalámini agikagú velesá itenamikeve loko Sikalahú velesá lehizeketamike limóma neve.

Vegenalite Izesukumú hizi hóu lamó

⁴⁰ Ámina gako nene vejenalite giliake, lugáate Izesukumú nene lamaná Ómasímini agepagutí gako loaká vele gako láa gelekunike ageva nouhá ve imane noive. ⁴¹ Liki likago, lugáate áisi nene Ómasímo gologí oletative loko lo mololeta vema noive liki likago, lugáate Izesukumú Galilaia mikasiuka utó ihe liki giliake pevevesava ziki láa liki lamó: Gologí oletati vema nene nana oko Galilaia mikasigutí utó itive. ⁴² * Monó gotolaú nene gologí oletative loko lo mololeta ve eza Tevitini apá gotola Petelehe apakú itó Tevitini agapilamó zuhagutí utó inogo ive liki luhuva gizinamóma neve. ⁴³ Liki liake, aikumú mini luga luga amó. ⁴⁴ Lugáate nagá amitune liki amó nene kigizató gena okago ahulamó.

Monó gizapa vete gili alévolé amamó

⁴⁵ Lá iake, monó zagusaveló pilisi ve minamó keza atiginá iki vikago, guguni giziaaká a vegi Palisaio monó vegi keza loká ikitake lekeza nanamú alímiki amave. ⁴⁶ Liki likago, pilisi vete áisi gako nolimó nenémini iki ve makolite lisá amave. ⁴⁷ Liki likago, Palisaio ve keza láa liki lamó: Lekezagi ámina oko lokogoka vizekago nilahe. ⁴⁸ Monó gizapa ve lugáagi Palisaio ve lugáagi aikumú gelemó alévolé okago nilahe. ⁴⁹ Óve. Imane li huka gako gelema vejená alegesá iki niamó nene usí vize kemenei vejenakó niave. ⁵⁰ * Liki likago, keikutí ve makó Nikotemó nene amunaló emane límugusigú Izesutoka vi vemámo láa loko lo kimimó: ⁵¹ Lekeza lilo. Ve makó nene mogonáa giliki lihimavala áni gaminigave liki liaká niahe. Monó gotolaú lá oko nomive. ⁵² Loko lokago, agivelage gahá amiki láa liki lamó: Gezagi nene ámina oko Galilaia mikasiukatí numuká ve noape. Monó gotolaú vitagá ova ova oko Galilaia mikasiukatí Ómasímini agepagutí gako loaká ve makó utó itive loko keké nomive loko gilitanize. [⁵³ Liki liake, hutilí iki numúitoka vi vi amó.]

8

Moko mogonaló noigo áni ga vená

¹ Ikago, Izesú nene Oliví agokaú itimó.

² Akiake gó lokago, ho síki noligo, monó zagusavegú goha iteko noigo, vejená mukí áisi noitoka alegesá ikago, mitó minake monó apí o kimimó. ³ Lainim-noketago, monó mogona apí ikimiaká a vegi Palisaio monó vegi keza vená makó moko mogonaló noigo áni giake Izesutoka alímiki viki alími holukú miliake láa liki lamó: ⁴ Tisalemaka, imane vená mokoló noigo áni gokunike alémoko nounimó lae. ⁵ * Itó Mosé eza lo hukoko li gakoú vená nenéminá gehanitunú kipili ahulalo loko leto noimóma nenazo, géisi nanave loko nogelene. ⁶ Liki lamó nene gako lo gopa itihe liki gimivagú miliki lamó. Gako nana oko litihe gelekinake neneló alémo moloko lokinake goní otatune liki agoka viziki lamó. Likago, Izesú gupá zeake mikasiló nene agizanitunú luhuva gizamó. ⁷ Nogizago, keza loká imiake goha loká itago, oteake láa loko lo kimimó: Lekelitokatí ve makó lihimavala nomiti vémo apí oko gehanitunú apelekiko apililo. ⁸ Loko loake, goha gupá zeake mikasiló agizanitunú luhuva makó gizamó. ⁹ Nogizago gakola giliake, améipo ale gó oko vokago, hamopamó viká viká iki vi asú amó. Vikago, ámina venáma Izesuní amatoka noigo, ¹⁰ Izesú okena oko gonú napilike loká otake vená geza gilímiki a vejená hitoka vave. Makolímó lihimakamú goní ogetamihe. ¹¹ Loko lokago, vená nenémo Guivahanímeka, lá amave. Loko lokago, Izesú limó: Nezagi ámina oko lihimakamú goní ogetamuve. Nenemú voko lihima netá goha alemo, loko lo amimó.]

Izesú numutó namató vejenalitini liví noive

* 7:37: Liv 23:36 * 7:38: Isa 58:11; Zak 14:8 * 7:42: Mik 5:2 * 7:50: Zon 3:1-2 * 8:5: Liv 20:10; Gapo 22:22-24

¹² * Alika Izesú eza vejená nene gakó miní ameko láa loko lo kimimó: Neza mikasiuka vejená lekelí liví nouve. Makó není némegetata vejená keza límugusi gapogú viki minaminigave. Alévolé lapaná aliiki minanigave. ¹³ * Loko lokago, Palisaio monó ve keza láa liki li amemó: Gezaka mognaka lo utó moloko lanimó nene leza gelekuko gihila nomive. ¹⁴ Liki likago, Izesú láa loko lo kimimó: Nezáne mognáne lo utó mulumó nene, neza hitokatí umó itó hitoka vitohe nenémini mognáa gelenouke, gakó nolumó nene gihiláa neve. Lekelisi nene nemú manamú makó gilísá amave. ¹⁵ Lekeza ha vejenalite lotuva ligiaká niató liaká niave. Neza mognataganamú lotuva legeko hozaváa itína alemumóza, ¹⁶ neza mognatagana lotuva legeko alulina nene nezánegó alitomoláa oko minamiline. Nimisili ve améneho nelémo vatí oaká noinazo, alitomoláa oko nene lotuva legeko hozaváa alitomó nene gihiláa zinogo ive. ¹⁷ Mosé lo hukoko li gakokutí láa loko nemóma neve: Ve lositalitosa ve makolímíni mogona li utó iki litái gakó nene hamó gapoló vokikoma lasi gakó nene gihiláa neve loko litune. ¹⁸ Nezáne mognáne nolugo, nimisili ve améneho nene ámina oko lo utó mononíaká noive. ¹⁹ Loko lokago, keza loká itiki amekaho hí noive liki likago, eza láa loko lo kimimó: Lekeza není mogona gili guni amake aménehinigi mogona gili guni amave. Lekeza není mogona gejelina, aménehini mognagí ámina iki gili guni aline. ²⁰ Loko Izesú límó nene eza monó zagusavegú moní miliaká a pokisi mina agilikaloka minake, monó lainim-oketoko ámina gakó límóza, gamenaváa alitamigo ve makolímó oko nagá numukú alémo molamimó neve.

Nénisi voko minatotoka ma aminigave

²¹ Izesú miní ameko láa loko lo kimimó: Neza ahulolikimikinake vokugo, lekeza vitagá iiki lihimatinigi ha miniko hilingave. Lá iki hiliiki nénisi voko minatotoka ma aminigave. ²² Loko lokago, Zuta vetini monó gizapa vete neza voko minatotoka ma aminigave loko límó nene nanamú live. Ezáa agupe ale golesa oko hilingo lihe. ²³ Liki likago, eza láa loko lo kimimó: Lekelisi nene amunalokatí niave. Nénisi veletokatí nouve. Lekeza mikasiukatí niamóza, neza mikasiukatí minamuve. ²⁴ Lá onimó nenazo, neza nenemú lihimatinigi ha miniko hilingave loko lo lekemekeve. Neza imane minoko mognáne lo nolukumumóza, lekeza Ómasilokatí lemeni ve noane liki gili alévolé amitamó nene, lihimatinigi ha miniko hilingave. ²⁵ Loko lokago, loká itiki Olo, éahoma noane. Liki likago, Izesú láa loko lo kimimó: Apí oko mikasiuka lumutotí lo lekeme-loko voaká noumó lae. ²⁶ Neza lekelí lihima gakó mukí alenoumóza, nimisili vémini gakó imane lo utó moloko lo lekemeaká nouve. ²⁷ Loko amelahikumú láa loko lo kemekago, keza gili hee lamamó. ²⁸ Nenemú Izesú miní ameko láa loko lo kimimó: Lekeza okulumakutí lumu ve gihila není nene zaló nilími otiiki, lo lekemeaká noumómámini oko noive liki gili guni inigave. Itó nezáne nagata geleko alemuke, améneho lo nimitokó loaká noive liki gili guni inigave. ²⁹ Nimisili ve eza nezagí makó noive. Neza gamena gamena netá matá oko moloko ukumú amu helekago, ma ahulonetosá amive. ³⁰ Loko lokago, vejená mukilite Ómasilokatí limi ve noive liki aikumú gili alévolé amó.

Gakó gihiláa nenémo gologí oletanogo ive

³¹ Zuta ve gili alévolé iminamoláa nene Izesú láa loko lo kimimó: Lekeza není gakotokó minatamó nene, není izegipáne gihila minanigave. ³² Lá iiki gakó gihiláa gili guni ikiko, ámina gakolímó nagakutí gologí olidikimikiko, vatí iki minatave. ³³ * Loko lokago, makolite láa liki li amemó: Leza Avalahani agapilamola nouko makolímó ezáa gopoguna lelémó molosá aminazo, geza gologí olimikako, vatí oko minatune loko nolape.

³⁴ Liki likago, Izesú láa loko lo kimimó: Neza lamaná lo likimitoze, gililo. Makó keza lihima netá aliki minatamó nene lihima netalímíni gopogu izegipa minanigave. ³⁵ Gopogunate gizapa véinímíni numukú miniki aliki aminigave. Gípalámogó nene amelahini numukú mino lúaló moloko minanogo ive. ³⁶ Nenemú Ómasímíni gipala áisi gologí olidikimikiko, lekeza lamaná nagakutí gologí olidikimikiko minanigave. ³⁷ Lekeza Avalahani agapilamola niave loko mota gelenomóza, gakónémo likigikagú minamigo, nepele hilitune liki liaká niave. ³⁸ Neza aménehini amatoka minuke ángigonou netakumukó loaká nouve. Lekeza nene lekezatini ametipitokatí ángigiki gele netakó lílí iaká niave. ³⁹ Loko lokago, ameteho nene Avalaháa noinae. Liki likago Izesú láa loko lo kimimó: Lekeza Avalahani agapilamola minalina, aí avevezahaló iki miliki minaline. ⁴⁰ Ómasilokatí gakó gihiláa gulumó nene lo lekemenoumóza, nepele hilitune liki liaká niave. Avalaháa nenémini osá amimole. ⁴¹ Lekelisi nene ametipo imó imó nene iaká niave. Loko lokago, leza gapoló izegipa minamune. Ómasi nene ameteho hamokóma noive. ⁴² Liki likago, Izesú láa loko lo kimimó: Neza Ómasi minutotí vejená nemetamenigi loló okuke lemenouve.

* 8:12: Mat 5:12; Zon 9:5

* 8:13: Zon 5:31

* 8:33: Mat 3:9; Luk 3:8

Neza nagata geleko lumumó negopa, Ómasímo nimiselekago noumó nenazo, ametipo nene Ómasi minalina, likigika nenitoka milaline. ⁴³ Není gako nana okago gili vevesamave. Neza gako nolugo gena likivisekago gilísá amamó, nenemú. ⁴⁴ Lekelisi ametipo Satá amu hiliti netá alitune liki giliaká niave. Áisi gozapá nene kepelenó kepelenó oko mino-loko noave. Agikagú gako gihila nomigo, amegesa ameaká noive. Soza gako límíni amelaho eza soza saza gako nene nosánetala loló okago, áminaló gelekelela minoaká noive. ⁴⁵ Nénisi nene gako gihiláa lo lekemeaká noumóza, lekelisi nene gili ahuliaká niave. ⁴⁶ Lekelitokati makolimo není lihima ma lo utó okiko alévolé itihe. Neza gako gihiláa lo lekemeaká noumó nenazo, nanamú gili alísá amave. ⁴⁷ Makó keza Ómasímíni gipa minatatite Ómasímíni gako gilinigave. Lekeza Ómasímíni izegipala minamake, aí gako gili ahuliaká niave.

Avalahá utó oko minamigo Izesú minamó nominave

⁴⁸ Loko lokago, monó gizapa ve keza láa liki li amemó: Geza Samalia numuká ve matuka gopa okago nolape loko gelekunike gako lamaná loaká noune. ⁴⁹ Liki likago, Izesú láa loko lo kimimó: Neza matúne gopa okago lamuve. Aménehini ale napa oko loaká nouve. Lekelisi nene není aliki mumusopa ziaká niave. ⁵⁰ Neza nugulizá vitive loko losá amuve. Nene aménehini hoza neve. Áisi nene gako lo hukoaká ve nenémo vegenalitini mogonataganáinimú lo hukanogo ive. ⁵¹ Neza gako lamaná lo likimitoze, gililo. Makó keza není gako gili alitamó nene kígikáa ma helemínogo ive. ⁵² Loko lokago, Zuta vete láa liki li amemó: Matuka lamaná gopa okave. Avalahá gozapá helekamóma neve. Itó Ómasímíni agepagutí gako liaká a ve keza ámina iki hilikamóza, makó keza není gako gili alitamó nene kígikáa ma helemínogo ive loko nolape. ⁵³ Avoteho Avalahá iteko mina ve helekamóma neve. Géisi Avalahani aviliginog nolape. Itó Ómasímíni agepagutí gako liaká a ve keza ámina iki hilikave. Geza hí ve suka loko gugupe aleko noitene. ⁵⁴ Liki likago, Izesú láa loko lo kimimó: Nezáne nugupe aleko ititómó nene etamínogo ive. Améneho Ómasíleve liki liaká nia ve áisi nene nelémo napa oaká noive. ⁵⁵ Lekeza aikumú gili vevesísá amave. Nezáne nene aikumú gelenouve. Aikumú gelemuve loko lulina nene, lekelikitana oko sozaló ve minulinamóza, lá oko nomive. Amenehikumú gelenouke gako láa gele aleaká nouve. ⁵⁶ Avotipo Avalahá neza mikasiuka lumu gamena nene vamotoka ániogoake, agoliza vizeko minamóma neve. ⁵⁷ Loko lokago, ámina gizapa ve keza li amiki géi likisimasi 50-a vaminazo Avalahani ma ánigonape. ⁵⁸ Liki likago, Izesú láa loko lo kimimó: Neza lamaná lo likimitoze, gililo. Avalahá nene utó onamigo, minumó nominuve. ⁵⁹ Loko lokago, gehani aliake apili hilinigi ago, Izesú nene unamaha oake monó zagusavegutí lemeko vimó.

9

Izolaho getakutí agómula lika ve alémo goloutotamó

¹ Gamena makó zupa nene Izesú eza gapoló novike, ve makó izolahini agatupagutí agómula liko vimó geta ve ániagamó. ² Nánigago, vegenala zuha leza loká otoko monó gizapa velemaka, éahini lihímámó agómula likamó getave. Ezáa lihímámó nehe itó izolahiko amelahiko lihímámó neve. ³ Loko loká omikuko, Izesú láa loko lo límímó: Nenémo amive. Itó izolahiko amelahiko lihímámogi amive. Ómasímíni zámouza aitoka utó itive loko nenémináa getamó neve. ⁴ Mikasiuka vegená niamó keza holisakasanagó hoza aliake, holugú nene hoza alísá amave. Ámináminoko leza nimisili vémini hoza itína alekinake, lelí hoza asú iti gamena nene hoza aveleminogo une. ^{5*} Neza mikasigú minato gohala mikasiuka vegenalitini lívi minanogo uve. ⁶ Loko loake, mikasiuka gituhú oake, mikási aleko lukená zeake agómula lika vemámíni agómulaló holomiake, ⁷ láa loko nolike amísilímó: Geza voko Siloama nonohulukú golotuvaka nagamí zezo. Ámina nagamí agulizalímíni mogonáa nene apili míla nagamíle. Láa loko lokago, ámina ve víke nagamí zeake, agómula goloutokago, atiginá oko amó. ⁸ Lá okago, agivelage ániagiake, goí oko monímú voká vokató ve minoaká imómave liki giliake, monímú voká vokató mumuzó mumuzó oko minoaká i ve imane nehe. ⁹ Liki likago, lugáate ámina vema nenaé liki likago, lugáate óve, áminagitana haitó noinogo ive. Liki likago, ámina vemámó neza ámina vema nounae. ¹⁰ Loko lokago, loká itiki nana okanike gógómula goloutane. ¹¹ Liki likago, láa loko lo kimimó: Ve makó agulizá Izesú áisi goihá loló oake nogómulaló holonimiake, Siloama nonohulukú voko nagamí zezo loko lo nemekago, neza voko novogisa nagamí zeuke nogómula pulusokave. ¹² Loko lokago, keza loká itake ámina ve hikuka noive liki likago, neza ma ániagamuve loko límó.

Palisaio monó vete agómula goloutamó nenémini mogonamú vitagá amó

¹³ Láa loko lokago, agómula ale goloutota vema nene Palisaio monó vegematoka alímiki vamó. ¹⁴ Itó Izesú nene goihatunú agómula ale goloutamó nene holisi zupa lá imó. ¹⁵ Lá

* 9:5: Mat 5:14; Zon 8:12

okago, Palisaio monó ve keza ámina iki agómula goloutakumú goha loká itiki likago, láa loko lo kimimó: Izesú nogómulaló goihá holonimikago, nagamí zekugo, nogómula goloutokamole. ¹⁶Loko lokago, Palisaio ve lugáate Izesunimú nene lelí holisigú hoza lá oko alike ale golesa oaká noinazo, ámina ve eza Ómasilokatí noamive. Liki likago, lugáate lamó: Eza ve golesa minalina, golivagi hoza nenémináa nana oko aliline. Liki liake, pelevesava ziki mini luga luga amó. ¹⁷Lá iake, agómula lika vema loká itiki gogómula ale lamaná i vemú gezaka nanave loko nolane. Liki likago, eza limó: Eza Ómasímini agepagutí gako loaká ve noitive.

¹⁸Loko lokago, Zuta vetini monó gizapa ve keza agómula lika ve minamóma agómula goloutokave liki gili seketigí amake, izolahiki amelahiki sele li kimiake, ¹⁹loká ikitiki gipatini agómula liko minamó getusimole liki nilasihe. Itó ámina gipa imane nehe. Nana oake agómula goloutave. ²⁰Liki likago, izolahiko amelahiko láa liki lasimó: Gipatema noive loko gelenousive. Itó agómula likamó getusimómave loko gelenousimóza, ²¹eza nana oake itína agómula goloutahe, itó éaho agómula ale goloutave nene gelemusive. Eza olotiva netá nenazo, ezáa loká italo lo likimititole. ²²Liki lasimó nene, Zuta vetini monó gizapa ve keza gozapá amunaló nene ve makolímó Izesukumú nene gologí oletative loko lo mololeta vema noive lokikoma monó mosetatune liki li hukamó nenazo, nenemú izolahiko amelahiko keza Zuta vetini gizapa vemú kelegesá legekago, ²³olotiva netá nenazo, loká italo liki lasimó.

²⁴Likasigo, agómula lika vema goha sele li amiake, láa liki li amemó: Geza Ómasímini avogisaló gako lamaná lamane. Leza ámina vemú nene lihima netá aleaká ve noive loko gelenounimó nenazo, aí agulizá ale otemo. ²⁵Liki likago, áisi láa loko lo kimimó: Eza nene lihima netá aleaká ve nehe nene gelenamumóza, netá hámakó gelenouve. Neza goí oko nogómula likamó minumómaha itína nogómulanema ániogokave loko lamaná gelenouve. ²⁶Loko lokago, goha loká itiki nana ogetave, gogómulaka nana oko ale goloutogetave. ²⁷Liki likago, láa loko lo kimimó: Mota lo lekemekumole. Nene gelemahe. Goha litaha gako nanamú lugo gilinigé nilave. Lekezagi aí izegipala zuha loló itune liki nilahe. ²⁸Loko lokago, lekesava amiake lamó: Géisi nene aí izegipala noane. Lélisi nene Moseni izegipala nounge. ²⁹Ómasimó nene gako makó Moseni lo amimó neve loko gelenounimóza, imane ve nene getamoláa nene gelemune. ³⁰Liki likago, ámina vémo gako láa loko lo kimimó: Nogómula ale goloutoneta vémini getamoláa gelemahe. Neza giza lo noleketuve. ³¹Ómasi eza vegeaná golesatini gakoíni geleko kelémo vatí osá amimóza, makó nenémo Ómasi geké lotoko gakola gele alitimó nene, Ómasimo alémo vatí inogo ive loko geleaká nounge. ³²Itó ganá apí oko mikasi utó itotí ká emane ve makolímó agómula likamó getamó agómula ale golouta gako ma lago gelemuháma neve. ³³Nenemú imane ve Ómasilokatí lemémimó nelina, hoza nenémináa ma alemiline. ³⁴Loko lokago, láa liki lamó: Golesa gupilizá utó animó ánenéminaka monó lo lemesaláa noape. Liki liake, ahelú i ahulamó.

Kigikámini agómula lika gako

³⁵Izesú nene amisilí ahula gako geleake, koma minake ámina ve ániogoake, loká otoko geza okulumakutí limi ve gihilamú gele alévolé onoape. ³⁶Loko lokago, ámina vémo ve lamanámaka, lani ve nelepezekako, ániogo lamaná okínake, aikumú gele alévolé itove. ³⁷Loko lokago, Izesú nene geza ániogoako gako lo nogumu ve neza imane noumole. ³⁸Loko lokago, ámina vémo Guivahanínemaka, neza mota gele alévolé onouve. Loko loake, agihúna geko akamó. ³⁹Lá okago, Izesú limó: Neza vegeanalitini mogonáini ale vevesatove loko mikasiuka lumomó nene kigikámini agómula nomimó nenete pulusiki ániगतaze, itó ligikámini agómula likamimó neve liki liaká nia vegeanalitini mogómula likokíko, ámináa minílikí vikí minatave loko neve. ⁴⁰Loko lokago, Palisaio monó ve minamoláa lugáa keza giliake, loká itiki Olo, ligikámini agómula likamó nouko nolape. ⁴¹Liki likago Izesú láa loko lo kimimó: Lekeza ligikikámini agómula likakumú gatizá minalina, lihimatini minamilinamóza, lekeza nene ligikámini agómula goloutonoive liki liaká nianazo, lihimatini ha minanogo ive, loko limó.

10

Sipsip izatini geisamú anoza gako

¹Izesú gako makó láa loko limó: Neza lamaná lo likimitoze, gililo. Makó eza sipsip izatini geisagú itinogo gatekú itemoko geisa gohalaló itekikoma, gumina vaukaló ve noive loko litune. ²Gatetó ititi vemú nene iza gizapa ve noive loko litune. ³Áisi nene anitekiko gatetó gizapa ve nenémo gahé segetanogo ive. Itó sipsip izava keza gizapa vémini anó lupamú gilinigave. Nigiliko sipsip izavatini kugulizá oko sele noloko geisa mikutí kelémoko liminogo ive. ⁴Ezáa mututoní kelémoko lemeko ale goí noigo, anó lupamú gelekune liki

ámegetanigave. ⁵ Haitó ve makolímíni anó lupamú gelemitamó nenazo, ámegetaminigave. Kelegesá legekíko, golísi inígave. ⁶ Loko Izesú anoza gako láa loko lo kemekago, keza nanamú lihe liake, gili vevesamamó.

Izesú nene sipsip izatini gizapa ve lamaná noive

⁷ Lá ikago, Izesú eza miní ameko lo kimimó: Lamaná lo likimitoze, gílo. Sipsip izatini geisagú itiaká gateni nénisi nene nouve. ⁸ Nénisi noamugo soza monó liaká ve utó amó mukító nene gumina vaukaló ve minamó. Nenemú sipsip iza keza gakoíni gili alísá amamó neve. ⁹ Gateni nénisi nene nouve. Makó keza není nivilegemiki miníki geisagú ititamó keza latila aminigave. Némegé némegé iki minumuni lamanakú mihina inígave. ¹⁰ Guminaló ve eza voko sipsip iza vauka apeleko aleko vinogogó geisagú iteaká noive. Není sipsip izate alévolé kemetamenigi minumuni lamanakú mihina iki minatave loko lumomóma neve. ¹¹ Nénisi nene sipsip izatini gizapa ve lamaná nouve. Gizapa ve lamanalímína sipsip izamule loko minoko aleko oakaláa ahulatimó neve. ¹² Gelekelé izegipa nene iza amelaho minamive, itó gizapa lamaná oko amitimó neve. Nenemú hela gala anitekíko, ángigooko sipsip iza ahulokímioko golísi inogo ive. Lá okíko, hela gala nenémoo sipsip izama kepeleko kelémo hutíli inogo ive. ¹³ Eza monimukó hoza aleaká noínazo, sipsip izamú makó gelesá amíke ahulokímioko golísi voaká noive. ¹⁴ Nénisi nene sipsip izatini gizapa ve lamaná nouve. Aménehiki nezagi ángigoko gelenousive. ¹⁵ * Ámina oko vegeanáe zuhagi nezagi ángigoko gelenoune. Nenemú není sipsip izamule loko minoko aleko oakánéa ahulanogo uve. ¹⁶ Itó sipsip izáne mulusi makó niave. Keza imane mikasígú vegeanalitini geisa mikutí niamave. Neza kelémoko okugo, nonó lupamú gílinigave. Lá ikíko, sipsip iza mulusi hamokó minanigave, itó ámina oko gizapa ve hamokó minanogo uve. ¹⁷ Neza minoko alekóne ahulanogo noukumule loko améneho agika nemeaká noive. Ahulokinake, gosohá goha alínogo uve. ¹⁸ Minoko alekónéa makolímoo ipá aminogo ive. Nene nezáne nagata geleko ahulanogo uve. Neza minoko alekóne ahulatove loko itó goha alitove loko nenémíni zámua zenítoka neve. Nenémíni itane loko améneho lonetonóimóma neve.

¹⁹ Loko Izesú némika loko lokago, Zuta vegeaná keza gíliake, goha lígí ahulígí iake, miní luga luga amó. ²⁰ Lá okago, mukílite holosí makó nene agíkgú minokago gako gopa nolínazo, nanamú gílinígí nilave. ²¹ Líki líkago, lugáate láa líki lámó: Holosí makolímoo agíkgú minatimó nene, gako nenémíniá makó laminogo ive. Itó holosí makolímoo kogómula líka vegeanalitini kogómula ma ale goloutoketaminogo ive, líki lámó.

Zuta vete Izesuni ángi ahulamó

²² Zuta vetíni monó zagusave lusa gemó nenémíni holíváa hepé gamena alitonoigo minamó. ²³ Izesú eza monó zagusave gaizopa agika makó agulízá Salomoni nenegú olío vogá ogá oko noígo, ²⁴ Zuta vetíni monó gizapa ve keza iki alímí vigiáke, láa líki lí amemó: Geza gamena hána nanamú mogonaka ale halá gekako, gele gopa oaká noune. Geza gologí oletative loko lo mololeta vema noitanimó nene lo utó molo lo lemamane. ²⁵ Líki líkago, Izesú láa loko lo kimimó: Neza lo lekemeaká noumóza, lekeza gili seketígí iki gílísá amave. Aménehíni gakotó alévolé suni loló oaká noumó nenémoo mogonáne lo utó moloaká noimole. ²⁶ Lekeza nene sipsip izáne lílí iki minamakeve líki gakóne gili seketígí amave. ²⁷ Sipsip izáne lílí iki nia vegeanalite nonó lupamú gíliaká niago, neza ángigoko geleketonougo némegeatiaká niave. ²⁸ Neza alévolé kemetameni kemekugo, latila amíki miní lúaló mílíki minanigave. Není nígzakutí ve makolímoo keí ipá aminogo ive. ²⁹ Améneho nenítoka kelémo mola ve áisi nene netá matá mukí kvilegekeko noigo, aménehíni agizakutí makolímoo ipá aminogo ive. ³⁰ Nezagi aménehíki leza hamokó nousive. ³¹ Loko lokago, Zuta vetíni monó gizapa ve keza gehani goha aliáke, apíli hílinígí niago, ³² Izesú láa loko lo kimimó: Hoza lamaná haitopaitolímíni nene aménehíni gakotó aleaká noumóza, lekeza hí hoza ángamó golesa okago gehanítunú nípíli hílinígí niave. ³³ * Loko lokago, Zuta gizapa ve keza anotó alíki láa líki lámó: Hoza lamaná aleaká noaníkumú lamune. Geza lelíkitana vema noanimóza, geza Ómasi avilegekaníke gezakamú Ómasi nouve loaká noaníkumú gehanítunú gípílinogo noune. ³⁴ * Líki líkago, Izesú láa loko lo kimimó: Lekelí monó gotolaú Ómasímo goní hoza aliaká a vemú nene lekeza ómai netá niave loko lumole loko lí gakó nene luhuva gízínámóma neve. ³⁵ Nene Ómasímíni gakó utó okímí vegeanakumú ómai netá niave loko límó nenazo, itó monó gotolaú luhuva gízínámoláa nene lemeko akatímoláa oko nomíve. ³⁶ Nenemú améneho nelémo otópá zeake nímesolekago mikasiuka lumu ve neza Ómasímíni gípaláa nouve loko lumó nenazo, nenemú lekeza nanamú Ómasi avilegeaká noane líki nilave. ³⁷ Hoza aleaká noumó nene ángígíko, aménehíni avotígí amíkoma, gakóne gíli ahulatamó nene lamaná noíve. ³⁸ Itó ángígíko, není hozagi aménehíni hozagi hamó

* 10:15: Mat 11:27; Luk 10:22 * 10:33: Liv 24:16 * 10:34: Age 82:6

lelegitó onoikoma, gakónemukopa alévolé suni loló oaká noumó nene ángalo. Ángi guni itamó nene, améneho není nene akiseneive, itó neza ámina oko aménehini akiseneive liki giliiki mogonáa gili lamaná inigave. ³⁹ Loko loake, goha nagá aminigi niakutí ahuloake vimó.

⁴⁰ * Vike Zota nagamí vola helega Zoní apí oko monó nagamí holoketa apató goha voko minamó. ⁴¹ Neneló noigo, vejená mukí aitoka anitiake, láa liki lamó: Zoní nene golivagi netá makó alemimóza, imane vemú gakola limóma mukí mota gihila zekave. ⁴² Liki liake neneló vejená mukilite Izesukumú gili alévolé amó.

11

Lasaló hilimó

¹ * Petania numutoka ve makó avisekago ako minamó, agulizá Lasaló. Aí atolage lositá áminaló minasimó, kugulizáini Maliako Matakó. ² * Maliá nene Guivahani Izesuni nene anuva lamanaki netupa holomiake gotola zopovatunú agisa gilatoko ale lamaná ota venalímimi agunala Lasaloni avisekago, ³ keza Izesutoka gakó láa liki ahulasimó: Guivahanitemaka gelezo. Zogova vema netá napa avisekago akonoive. ⁴ Liki likasigo Izesú nene gakó geleake, láa loko limó: Monéna hilitove loko gizalemive. Ómasímimi lapaná utó itive loko, itó Ómasímimi gipala není luhuva gegemá itive loko aviseneive, loko limó.

⁵ Izesú nene Lasaloki atolage Matakí Maliakimú agika kemenei vejená minamó nenazo, ⁶ nenemú Lasaloni avisi gakó geleake, ako mina numutó gamena lositá miní ameko minoake, ⁷ izegipala zuha láa loko lo limimó: Alo, Zutaia mikasiuka atiginá okó vitunize. ⁸ Loko lokago, izegipala zuha leza láa loko lo amunimó: Monó gizapa velemaka, Zuta vetini monó gizapa ve keza goí okoma vanitó gehanitunú gepele hilitune liki linámoma nenazo, goha vitune loko nolape. ⁹ Liki likago, Izesú láa loko lo limimó: Hoza gamena netekaki holisakaki únakaki vaí onoive. Makó keza holisakaláa lapanató gapo niviko, netá matá hanuva lotohá kepeleminogo ive. Neza hoza alitó gamenaváne ha neve. ¹⁰ Makó keza lapaná nomiko holugú gapo vitamó nene, lotohá kipilinogo ive. ¹¹ Loko lo lemeake, miní ameko láa loko limó: Zogole Lasaló mota ako helekamóza, neza voko alémo otinogo uve. ¹² Loko lokago, izegipala zuha leza Guivahanitemaka, avó akonoitimó nene zokanogo inae. ¹³ Loko luhá nene, Izesú eza heleakakumú anozá gakó lo limitó leza hanuva akonoikumú lihe loko gele hee lamunike lokuko, ¹⁴ Izesú lo utó moloko láa loko lo limimó: Lasaló mota helekave. ¹⁵ Neza neneloka vamuke imaneloka nougo hilikumú nene lekelikumule loko gele alévolé oakatinímimi gihila lilí itave loko mulúnégú lamaná noguluve. Nenemú áminaloka vitune. ¹⁶ Loko lokago, Tomasí agulizá makó Lopé áisi nene agivelagini láa loko lo limimó: Leza mukitoka voko ezagi hilitune.

Izesú helenosakutí oteoko alévolé oko minoaká amelaho noive

¹⁷ Loko lokago, makó vunimó. Vunike Lasaloni gale zimikago gamena losive losive oko vokago, Izesú nene Petania numutoka vo aniteake, ámina gakó gilimó. ¹⁸ Petania apá nene Zelusalegatí 3 kilomitasí minamó. ¹⁹ Nenemú Zuta vejená mukilite Matakó Maliako kugunáini helekagove liki ive nama ikitanigi vamó. ²⁰ Lá ikago, Matá eza Izesú noave lamó geleake, Maliá nene numukú noigo, vike gapoló hotu lasimó. ²¹ Izesuki hotu likasike, láa loko lo amimó: Guivahanínemaka, geza imaneló minatilina, nugunáne nene helemiline. ²² Itó itínasagi nene nemú manamú Ómasiloka voká lokako, gele gimitimóma neve loko gelenouve. ²³ Loko lokago, gugunaka nene mómoká oko otinogo ive. ²⁴ Loko lokago, Matá láa loko lo amimó: Mínoko gamena napaló Ómasímimo vejená mukí lelémó otititó nene ezagi otitimóma neve loko gelenouve. ²⁵ Loko lokago, Izesú láa loko lo amimó: Nénisi helenosakutí oteoko alévolé oko minoaká amelahina nouve. Makó keza nenikumú gili alévolé itamó nenete hiliiki goha otiki miniki aliki inigave. ²⁶ Itó makó keza kogómulaği miniki nenikumú gili alévolé itamó nenetini kigika ma heleminogo ive. Míno loko voko minanogó ive. Geza imane nolu gakó mota gele seketigí onoape. ²⁷ Loko lokago, Matá limó: oo, Guivahanínemaka, geza gologí oletatane loko lo mololeta vema Ómasímimi gipala mikasigú lemenane liki lina ve noane loko nigikatunú mota gele alévolé onouve.

Izesú ive imó

²⁸ Loko loake, mohó agunala Maliani nene sele lo ameake, musika loko monó gizapa vema oake, geikumú nolive. ²⁹ Loko lo amekago, Maliá nene geleake, litá oko oteoko Izesutoka vimó. ³⁰ Novigo, Izesú nene numutoka velesá vo anitemike, Malatani gakó lo ami apatoka minamó. ³¹ Lá noigo, Maliá eza litá oko oteoko nolimigo, Zuta vejená numunagú makó miniki ive nama itiki mina vejenalite Lasaloni militámomaloka ive inogo novihe

liki ámegetiki vamáza, ³² Maliá eza Izesú noitoka aniteake ángoake, agihúna geko akoake, Guivahanímaka, imaneloka noako nelina, nugunáne helemiline. ³³ Loko loake, ive imó. Ive noigo, Zuta vegená ámegetiki vamoláa keza ámina iki alími vatí iki ive niago, Izesú nene ángoake, mulunagú miluma napa geleake, agika hizekago, ³⁴ loká oketake hikuka gale zinave. Loko lokago, Guivahanitemaka, oko ángatane. ³⁵ Liki líkago, Izesú nene agómulagutí leke leke lokago ive imó. ³⁶ Ive okago, Zuta vegenalite ángiake lámó: Ángalo. Agika nene aí ame gikitoko amenei ve neinogo ive. ³⁷ Liki líkago, keikutí lugáate lámó: Goí oko agómula lika ve makóma ale goloutotamóma nenazo, imane ve hanuva alémo zokaline.

Lasaló heleneikutí alémo otimó

³⁸ Liki líkago, Izesú goha miluma napa geleake, matimatiló anitemó nene geha mulí minamó, itó agepaló nene gehani napa mili lí amóma nene ³⁹ Izesú ángoake, gehanima ali ahulalo loko lokago, hili vémini atolaho Matá láa loko lo amimó: Guivahanímaka, gamena losive losive minokanazo, mota anuva noinogo ive. ⁴⁰ Loko lokago, Izesú láa loko lo amimó: Nenikumú gele alévolé itanimó nene Ómasímimi zámuzalámimi luhuva utó iko ánganogane loko lo gumu gakó mota gatagatí molokahe. ⁴¹ Loko lokago, gehanima akili ahulikago, Izesú nene okena oko velekuka ángoake, láa loko limó: Aménega, geitoka lonoumó nene gelekanikeve loko gegepoka noluve. ⁴² Itó gamena gamena geitoka loaká noumó nene gelenane loko gelenoumóza, imane ali nupa nia vegenalite géisi nimiselekako limimole liki gili zagiki gilitave loko láa loko lo nogumuve. ⁴³ Loko loake, gakó napagutí sele loko Lasalo, geza oteoko lemeno. ⁴⁴ Loko lokago, helenei vémo agisa agizatoka nagá likita netá akoheminago lemekago, Izesú vínasiki ali ahulitalo loko lokago, vínasiki ali ahulitamó.

Izesuni apili hilinigi gohoni milamó

(Mat 26:1-5; Mak 14:1-2; Luk 22:1-2)

⁴⁵ Lá ikago, Zuta vegená Maliatoka anitemoláa keitokatí mukilite Izesú oko moloko i netá ángiake, aikumú gelego alévolé imóza, ⁴⁶ lugáate Palisaio monó vegenatoka vake Izesú oko moloko i gakó avetó i kememó. ⁴⁷ Avetó iki li kimikago, kezagi guguni giziaká a vegi monó kansole kilími nupa iake láa liki lámó: Imane lu avevezaha la avevezaha mukí okanazo, leza nana itune. ⁴⁸ Leza nene amanapa oko nouko, eza lá oloko vova vova noiko, mukí vegenalite lugulizaki ve napa noive liki gili zaginigave. Lá ikiko, Loma vegenalitimí ami vete iki lova ali limiiki monó zagusavele nemó vegenate niamó ali tolova inigave. ⁴⁹ Liki líkago, keitokatí makó agulizá Kaiapá ámina kilisimasi oko novigo guguni giziaká vetini gizapa ve loló i vémo láa loko lo kimimó: Lekelisi negi nagi niaze. ⁵⁰ Leza Zuta ve mukitoka latila o asú okatuninazo, ve hamokolímo lelémo nupa napa oko helekiko nenémo netá gihila ale utó oletative liki gilísá amave. ⁵¹ Loko limó nene ezáa agata geleko ligopa, eza ámina kilisimasiló nene guguni giziaká vetini ve napa minoakeve loko Izesú eza vegená mukikumule loko hiliti gakó lo kimimó. ⁵² Nene Zuta vegenakumukó lamimó. Ómasímimi vegenala zuha numutó namató nia vegená kelémo nupa okiko mulusi hamokó milíki minatave loko hilitikumú limó neve. ⁵³ Láa loko lokago guguni giziaká a ve keza ámina zupa nene Izesuni apili hilinigi apí iki lova gizamó.

⁵⁴ Lá ikago, Izesú eza Zutaia apakú vegenalitimí kogómulaló goha vo utó amike mikasi gomopalaló minamó. Nenémimi agataloka apá makó minamó, agulizá Epalaima neneloka izegipala zuhagi makó minunimó.

⁵⁵ Nouko, Zuta ve avotegini asenini zeketakumú gele minoaká holisi alitokago, apá koma kamalokatí vegená mukilite kugupe kigikáimi ali guluvitanigi goí iki Zelusalega tivamó. ⁵⁶ Viki monó zagusavele napagú itiki niake Izesú noamigo vitagá ake, ligili hagili niake lekeza nanave liki nígeleve. Ásisi nene holisigú atimó nehe amitimó neve. ⁵⁷ Liki lámó nene guguni giziaká a ve napagi Palisaio monó vegi keza ve makolímo Izesú minoko aleko noiti apá ángoko geleko onoitimó nene oko lo lemekiko, gelekinake voko nagá amitune, liki amunaló li miliki lató nene ámina gakó lámó.

12

Petania numutoka Izesuni anuva lamanaki netupa holotamó

(Mat 26:6-13; Mak 14:3-9)

¹ Asenini zeketakumú gele minoaká holisi gamena alitokago gamena 6-a veketoka ha nego, Izesú eza Petania numutoka vo anitimó. Ámina apató nene emane amunaló Lasaloni heleneikutí alémo otimó. ² Áminaló nene nosáneta gizi vatá ikago, Matá nene hizeko gona moloko ale nokimigo, Izesú nene Lasalogegi makó minake nosáneta namó. ^{3*} Niki niago, Maliá nene anuva lamanaki netupa agulizaláa nalita loko meinava iteko mina netá nene

* 12:3: Luk 7:37-38

hapu lita potologú minamó nene Izesuni agisalo holomiake, gotola zopovalatunú gilatoko ale lamaná otamó. Lá okago, numukuka anuvámo moloake minamó. ⁴ Lá okago, izegipala zuhagutí ligive makó Kaliotó numutotí ve agulizá Zutá eza minoko Izesuni amimika liti ve nenémo láa loko limó: ⁵ Anuva lamanaki netupa hanuva minatinazo. Nenémini meínava moni gó losive makole hizekoko gohogó vejená kemekuko etatinazo. ⁶ Loko limó nene gohogó vejenakumú geleko limó negopa, áisi nene lelí moniló gizapa oko noigo moni alimi namego, ale halá halá geko minoaká inazo, nenemú limó. ⁷ Loko lokago, Izesú nene limó: Ahulikalo. Helekugo gale zinitanigi anuvavagi netupa nene nugupeló hilinitatakumú geleake loló onimikave. ⁸ * Gohogó vejená keza nene lekezagi miniliki viki minaniganae. Neza nene lekezagi mino-loko voko minaminogo uve.

Lasaloni apilinigi lova gizamó

⁹ Loko lokago, Zuta ve mukilite Izesú neneloka noive liki nila gakó giliake áminalo anitemó nene Izesukumukó nomimó. Lasaloni emane amunaló heleneikutí alémo oti vegi ániganigi amó. ¹⁰⁻¹¹ Ikago, Lasaloni alémo otikumú nene Zuta vejená mukilite Zuta vetini moni gizapa ve ahulikimiake Izesutoka viki gimiziki aikumú gili alévolé amó. Nenemú guguni giziaká a ve napa keza Lasaloni apele hilitune liki lova gizamó.

Sigaga litanigi ago Izesú Zelusalega vimó

(Mat 21:1-11; Mak 11:1-11; Luk 19:28-40)

¹² Akiake gó lokago, holisiló a vejená mukilite Izesú Zelusalega noave gakó giliake, ¹³ * kokonasi agila letiki Izesú ati gapoló militanigi aliki vamó. Hotu liake sigaga litimi nivake agae, Guivahanímini gakotó anitelimikane. Ómasímo lusa gegetatize. Isilae ve lelí gugulizaki vele noane. ¹⁴ Liki nilago, Izesú eza toki iza akaleva makó ángoake, amupiló iteake vimó. Nene monó gotolaú gakó láa loko minató gele minake lá imó: ¹⁵ * Zaion agokaú vejená lekeza lekelegesá legemino. Gilinahe. Agulizaki velini nene toki iza akalevámimi amupiló iteake noave.

¹⁶ Ámina gakó nene izegipala zuha leza goí oko gele vevesamunimóza, alika Izesú nene okulumá lapanalagú atiginá oko itekago, nene gakó goha gelekunike, ámina gakó aikumú gizi milamómalo ámina avevezaha itake lá amó neve loko gele vevesanimó. ¹⁷ Itó Izesú nene Lasaloni sele lo amekago heleneikutí gonosi galegutí limigo ániga vejená mukilite keza ámina sunimú vejená lugáa aveté iki li kimiki minamó. ¹⁸ Ámina sunímimi gakó giliake, mukilite gapoloka hotu lanigi vamó. ¹⁹ Lá ikago, Palisaio monó vete kezáini ligili hagili niake lekeza gilinahe. Hizi lí itata hoza nalemó nene gihila nomigo, vejená mukitoka aitoka gimizi asú niave, liki lamó.

Kiliki ve makolite Izesunimú vitagá amó

²⁰ Ámina holisigú Ómasi geké lotatune liki Zelusale numutoka tiva vejenakutí Kiliki ve lugáa minamó. ²¹ Keza nene Galilaia mikasiuka Petesaita numutotí ve Pilipó noitoka vake, ve lamanámaka, Izesuni ánigatune loko noune. ²² Liki likago, Pilipó nene Etuluni lo amekago, ezagi makó viki Izesuni lí amikasigo, ²³ ezáa hilitikumú anoza gakó láa loko limó: Okulumakutí lumu ve gihila není lapanánegi luhuváa utó iti gamena mota alitokave. ²⁴ Lamaná lo likimitoze, gililo. Kilé zuha makó nene mikasigú hizemitunimó nene hanuvagó minanogo ive. Mikasigú hizekoko, lemeko nenegú helekoko mikasímimi nosáneté loló okoko gihila mukí zinogo ive. ²⁵ * Áminámimi oko makó keza kigika kemeníikumú gilíliko ititimó nene, alikaloka kigika kemeni gopa inogo ive. Makó keza mikasigú miniki nenikumule liki kigika kemeníikumú gilíliko lítitimó nene alévolé kemetaneni ali luhanigave. ²⁶ Ámina Kiliki vehe itó vejená makó ahe není gelekéle izegipa minatune liki gilitamó nene némegetiki ataze. Lá ikiko neza minomo ititotoka gelekéle izegipánegi makó minanogo une. Itó nasahilí initata vejenalitini gugulizá nene améneho ale otinogo ive.

Izesú ezáa hilitikumú lo kimimó

²⁷ Nigika loló oake, luvulovo zekave. Lá okazo, nenemú nanave litove. Aménega, gamenaváne alitokaze, nugupeló ititi netá molo hotó onetozo lítomó nene etamitinazo, láa loko lamitove. Miluma gilito netá mota numupiló itinogo noigo, gamenaváne okaze. ²⁸ Nenemú aménega, geza lokako, gugulizalímimi luhuva utó itive. Loko lokago, okulumakutí gakó láa loko limimó: Nugulizalímimi luhuva mota gonanalivagi utó okamóza, utó oloko voko utó okogó minanogo ive. ²⁹ Loko ligo, vejená mulusi miliki minamó keza giliake, ageló makolímo gakó lo amekave. ³⁰ Liki likago, Izesú láa loko lo kimimó: Gakóma nene nenikumule loko nomíve. Lekelikumule loko utó okave. ³¹ Itína Ómasímo imane

* 12:8: Gapo 15:11 * 12:13: Age 118:26 * 12:15: Zak 9:9 * 12:25: Mat 10:39, 16:25

mikasigú vegeñalitini lihimáinimú meina kimiti gamena mota alitokave. Itína imane mikasigú agulizaki Satani amisilinogo uve. ³² Imane mikasigutí zaló nilími otikiko, numutó namató vegeñá alesa molo kemekugo, nenitoka imi asú inigave. ³³ Loko limó nene zohota zaló hilitikumú anoza gakó limó. ³⁴ * Loko lokago, mukí mina vegeñalite láa liki li amemó: Leza monokú nene gologí oletative loko lo mololeta ve eza nene helemoko mino lúaló moloko minanogo ive liki luhuva gizina gakó gelenounimó nenazo, geza okulumakutí lumu ve gihila nene zaló nilími otikiko hilitove loko nanamú nolape. Okulumakutí limi ve haitolímínimú nolane. ³⁵ Liki likago, Izesú láa loko lo kimimó: Ló liví nene gamena komáisi holutikú hanatanogo ive. Nenemú límugusi nenémo lekelitoka sinitokatize, ló livíma lekelitoka lapaná noliko aliiki minalo. Ve makó keza límugusi gapogú vitamó nene, gapo ángi hee laminigave. ³⁶ Nenemú livíma lekelitoka miniko, ali láa ilo. Lekelisi livilímíni mututoni loló itune likima nenikumú gili alévolé ilo, loko limó.

Zuta vete gili alévolé amamó

Izesú nene gakó láa loko loake vo halá geko minamó. ³⁷ Izesú eza haitopaitó suni kogómulaló ale utó okago ángamóza, aikumú gili alévolé amamó. ³⁸ * Lá amó nene Ómasímini agepagutí gakó loaká ve Isaiá lí gakó nene alévolé itive liki lá amó. Eza lo goselé ike gakó láa loko luhuva gizamóma neve:

Guivahanínemaka, gakoka lokuko vegeñá nanakilite gili alévolé inave. Itó Guivahanímini zámuzá éahitoka utó okago gele zageneive.

³⁹ Itó Isaiáni gakó makó láa loko luhuva gizató keza gili alévolé amamó neve:

⁴⁰ * Áisi kogómula gahaga like kígika ale gopa okago, keza kogómulatunú netá matá ángi hee lisá amave. Kígika ali viligamago, kelémo lamaná itomoláa nomive.

⁴¹ Loko Isaiá limó nene Izesuni lapaná okulumakú nego ángioake limó neve. ⁴² Lá okago, Zuta vetini gizapa vegutí lugáa nenete Izesukumú gili alévolé amóza, lo utó itunimó nene, Palisaio monó ve nenete monó gapo hizi lí ilimikatave liki kehelele vizekago, lí utó amamó.

⁴³ Keza vegeñá makolite legegopa litave likigó iki miliki iaká amó neve. Ómasímo lelémo napa itive liki iki miliki isá amamó neve.

Izesú lo molonoi gakólímo alíka goní oletanogo ive

⁴⁴ Lá okago, Izesú nene gakó napagutí láa loko limó: Makó keza nenikumú gili alévolé itamó nenete nenikumukó negopa, nimisili ve aménehinimuki gili alévolé inamó geleneive.

⁴⁵ Makó keza není ángi hee litamó nenete nimisili vegí ángi hee hee linamó geleneive.

⁴⁶ Nenikumú gili alévolé ita vegeñalite límugusigú minamitave loko mikasiuka vegeñalitini liví minanogo lemenomóma neve. ⁴⁷ Makó keza gakóne imane giliiki gili ahulatamó nene, nénisigó goní oketaminogo uve. Néni sí nene mikasiuka vegeñá lihima kimitove loko negopa, numutó namató vegeñá kugutó vizitove loko lumumóma neve. ⁴⁸ Makó keza není ahuli hotó inimiiki není gakó ahulatamó nene, gakó lo mulumó nenémo gamena napaló goní oketanogo ive. ⁴⁹ Nezáne nagata geleko losá amuve. Améneho nimisili vémo lo utó itane loko lonimikago loaká nouve. ⁵⁰ Lá nouke, neza agepagutí gakó nenémo alévolé oko minoaká mogona ale utó oaká noive loko gelenouve. Gakó likemó nene améneho litoaká nouve, loko Izesú limó.

13

Izesú izegipala zuhatini kígisa nagamí zeketamó

¹ Avotegini asenini zeketakumú gele minoaká holisi alitokago, gamena hamokó veletoka ha nego, Izesú nene imane mikasi ahulokinake aménehitoka atiginá oko itito gamena mota alitokave loko geleake, imane mikasiuka aí mututoni lílí a vegeñá agika lemeneike agika limitímíni mogona lelepizinogo netá makó alimó. ² Nosánetá nanogo alegezá okuko, netá makó lá oko utó imó. Kalíotó numutotí ve Saimoni gipala Zutani agikagú nene Satá iteake alémo vávani okago, Izesuni amimí inogo gilimó. ³ Lá okago, Izesú nene améneho eza netá matá mukí nene nigzakú molonoimóma neve loko, itó Ómasilokatí lumutímína goha nene Ómasiloka atiginá oko itinogo uve loko geleneike, ⁴ nosánetá noko minuhakutí oteake, luhoaká gola hána nene gololohá oake, taulí aleko gohalaló likeake, ⁵ nagamí nene lapegú leke moloake, izegipala zuhatini ligisa nagamí zelimiká taulitunú gilatolimiká oloko vike, ⁶ Saimon Pitá noitoka vokago, eza láa loko lo amimó: Guivahanínemaka, není nigisa nene géisi nagamí zenetatove loko nolape. ⁷ Loko lokago, Izesú láa loko lo amimó: Imane loló nou suni nenémíni mogonáa itínasa gelemane. Aliká minomó iteko gilínogo ane. ⁸ Loko lokago, Pitá nene není nigisa nagamí zenetaminogo ane. Loko lokago, Izesú nene néni sí nagamí zegetamítomó nene, gezagí nezagí apizeminogo usive. ⁹ Loko lo amekago, Saimon

* 12:34: Age 110:4; Isa 9:7; Tan 7:14

* 12:38: Isa 53:1

* 12:40: Isa 6:10

Pitá láa loko lo amimó: Guivahanínemaka, láa lokoma nigisagó negopa, nigizanigi gotónegi muki nagamí zenetatane. ¹⁰ Loko lokago, Izesú anoza gakó makó láa loko lo amimó: Makó keza nagamikú akiiki alika nene kigisagó nagamí zikiko nene, kugupe nene guluvi to asú inogo ive. Lekeza nene áminagó iki likigika guluvi to asú inamóma nemóza, lekeza mukitoka guluvi to asú ikigó minamave. ¹¹ Loko limó nene ve makó hí vémo amimika litikumú geleneike, lekeza mukitoka guluvi to asú ikigó minamave loko lo limimó.

¹² Ligisa nagamí zeletó asú oake, gola nene goha ale luhoake, mitó minake láa loko lo limimó: Imane loló oleketu netalímíni mogonáa mota gili hee linahe. Olile. ¹³ Lekeza nenikumú nene Guivahaniteve itó tisaleve liki liaká niamóma vatí iki liaká niave. ¹⁴ * Itó neza Guivahanitini itó tisinimína gelekélé oleketuke likigisa nagamí zelikimikumó nenazo, lekezagi ámináminiki lukugupe alimí limíki likigisa nagamí eza zetiko eza zetiko iliki viki minalo. ¹⁵ Imane gelekélé olíkimiaká suni naleleketumó nene lekezatini ámináminiki aliliki vitave loko apí o nolukumuve. ¹⁶ * Neza lamaná lo likimitoze, gililo. Gelekélé izegipa makó nenémo golohá veva avilegeakala nene nominazo, lukugupe aliki itikatave loko noluve. ¹⁷ Itó gakó nolomó nene gilinamó nenazo, áminama amegesaló milatamó nene Ómasimo nónohá zeleketa vegená minanigave. ¹⁸ * Gakó nolomó imanémo lekelí mukitoka ale asú amive. Neza nene lekelémo etó onou vetini mogonatini gelenoumóza, monó gotolagutí gakó makó láa loko neve:

Nosánétá noko minusi ve nenémo není nehelú okave liki luhuva gizina gakó nene ve makotoka alévolé inogo ive. ¹⁹ Itó ámina netá utó okiko, lekeza lo lekemeaká nou ve noive liki gili seketigí itave loko ámina netá velesá utó onamigo lo nolukumuve. ²⁰ * Neza lamaná lo likimitoze, gililo. Makó keza amisilito ve makó nasahilí itatamó nene, hoza amelahina neniki nasahilí inítamó gilinogó ive, itó makó keza nasahilí inítamó nene nimisilí vegi nasahilí itamó gilinogó ive.

Izesú aí amimí iti vemú lo utó imó

(Mat 26:20-25; Mak 14:17-21; Luk 22:21-23)

²¹ Itó Izesú ámina gakó láa loko lo asú oake, muluna gitihiná okago, láa loko lo utó oko lo limimó: Neza lamaná lo likimitoze, gililo. Lekelikuti ve makolímó nimimika linogó ive. ²² Loko lokago, izegipala zuha leza gonú gimisi okunike nene, éahikumú live lokunike nene, gele gopa unimó. ²³ Lá okuko, eza Izesú agika nemeaká i veve liki lina vémina amatoka nougo, ²⁴ Saimon Pitá agizanitunú avevezaha ike éahikumú nolihe loká okako lo gimino loko lokago, ²⁵ neza Izesuni amatoka nouke loká otuke Guivahanínemaka, éahikumú nolane. ²⁶ Loko lokago, Izesú láa loko limó: Nosánétá nagamikú lupizeoko amekugo nati vemú noluve. Loko loake, nosánétá lupizeake, Kalitót ve Saimoní gípala Zutani nene amimó. ²⁷ Amekago, nokago, Satá nene agikagú itekago, Izesú láa loko lo amimó: Geza netá matá loló itove loko lanimó nene litá oko loló ozo. ²⁸ Láa loko lo amí gakó nene agivelage leza makó minuni vete gele hee lamunimó. ²⁹ Lá unike, lugáa nenete Zutá nene moni gotó gizapa oaká imó nenazo, nenemú holisigú nosánétá meina hizitive loko namisilihe loko nene gelehá. Itó lugáa nenete gohogó vegená nene moni gona moloko kimitive loko namisilihe loko gulunimó. ³⁰ Lá okuko, Zutá nene nosánétá noake, agupegú limugusi zekago hetoka lemeko vimó.

Gosohá lo hukoketa gakó

³¹ Hetoka lemekago, Izesú láa loko limó: Itína okulumakutí lumu ve gihila není nugulizalímíni luhuva mota gonanalivagi utó inogo ive. ³² Ómasímíni agulizalímíni luhuva gonanalivagi utó noiko, Ómasimo lokíko, nugulizalímíni luhuva nene litá oko gonanalivagi utó inogo ive. ³³ * Izegipánemata, gililo. Lekezagi gamena koma mininake vitove. Vokugo, lekeza nenikumú vitagá itamóza, amunaloka Zuta vegená lo kumumómámíni oko itínasa láa loko lo nolukumuve. Neza voko minatotoka nene lekeza aminigave. ³⁴ * Itó itínasa gosohá láa loko lo nohukoleketuve. Likigika eza amiko eza amiko ilo. Neza nigika lekemenoumó nenémíni iki likigika eza amiko eza amiko iliki vilo. ³⁵ Likigika eza amiko eza amiko itatímó nene, vegená mukilite lekelikumú nene není izegipáne zuha niave liki gilinigave.

Izesú Pitá alika egamega otatikumú limó

(Mat 26:31-35; Mak 14:27-31; Luk 22:31-34)

³⁶ Láa loko lokago, Saimon Pitá nene Guivahanitemaka, hitoka vitane. Loko lokago, Izesú láa loko limó: Apá makotoka vitomó nene itínasa némegetamitanimóza, alika némegetanogó ane. ³⁷ Loko lokago, Pitá láa loko lo amimó: Guivahanitemaka, itína neza nanamú

* 13:14: Luk 22:27 * 13:16: Mat 10:24; Luk 6:40; Zon 15:20 * 13:18: Age 41:9 * 13:20: Mat 10:40; Mak 9:37; Luk 9:48, 10:16 * 13:33: Zon 7:34 * 13:34: Zon 15:12,17; 1 Zon 3:23; 2 Zon 5

gémegetaminogo uve. Geikumule loko minoko alekóne ahulatove loko ale vatí okumóma nena. ³⁸ Loko lokago, Izesú lo amike limó: Nenikumule loko minoko alekóne ahulatove loko nolape. Íi, lamaná lo gimitoze, gelezo. Azo neteká nene okoloho nenémo anó velesá molonamiko, nenikumú nene ánigonamuve loko egamega onetatanimó nene gamena losive makole inogo ive, loko lo amimó.

14

Izesú nene Ómasiloka voaká gapo noive

¹ Izesú gakó makó láa loko limó: Mulutini lepa hiziko minalo. Lá iki miniki Ómasimú gili alévolé iki nenikumuki gili alévolé iki minalo. ² Aménehini numukú numuni agika vai oko neve. Lá oko nomilina neza voko apá makó ale vavá oleketatove loko lamuline. ³ Neza voko apá makó ale vavá olikimioko mininake, atiginá oko oko lekelémoko vokugo, nenitoka minatave. Lá niiki neza minato apakú nene lekezagi makó minanogo uve. ⁴ Neza voko minato apalímíni gapováa lekeza ániginave. ⁵ Loko lokago, Tomasí lo amike limó: Óe, Guivahanitemaka, geza voko minatani apaláa gelemune. Nenemú gapováa nana oko gilitune. ⁶ Loko lokago, Izesú láa loko lo amimó: Gapovagi itó gakó gihilagi itó alévolé oko minoakalímíni amelahina nénisi nene nouve. Není niviligíiki aménehitoka vikí antiakala nene ma nomive. ⁷ Lekeza nenikumú gili vevesalina, aménehikumuki gili vevesaline. Itína aikumú gili vevesiake, aí mota ángikave.

⁸ Loko lokago, Pilipó nene Guivahanitemaka, ametehini lelepizekako, netá makokumú loka ogetamítune. ⁹ Loko lo amekago, Izesú láa loko lo amimó: Pilipo, gamena hána lekezagi minumóza, geza není velesá ángo hee hee lamape. Ve makolímó není ángionoiti vémo aménehinigi ángo noimó gelekave. Nenemú geza nanamú ametehini lelepizezo loko nolane. ¹⁰ Améneho nene není ale akiseneive itó neza nene aménehini ale akisenouve loko géisi nene gele zagemape, olo. Gakó lo nolukumumó nene neza nagata geleko lo lekemesá amuve. Alévolé suni aleaká noumó nene nigikagú noi ve aménehini zámuzaló utó oaká noive. ¹¹ Améneho nene není akiseneive liki, itó neza aménehini akisenouve liki gili zagitave loko nolumóza, ámina gakó nigiliki gihila zemikoma alévolé suni aleaká noumó nenemú nenikumú gili alévolé ilo.

¹² Neza lamaná lo likimitoze, gililo. Nenikumú gili alévolé itamó nenete alévolé suni aleaká noumó áminagó iki alinigave. Itó nenegó nomive. Neza aménehitoka itekinake Sikalahú amisilitomó nenazo, aí zámuzatumú alévolé suni lilí itamó nene není hoza aviligiki alinigave. ¹³ Itó lekelisi nene není nugulizá ali miniki netá makokumú voká litamó nene, aménehini agulizá ale hutilí itove loko gele lekemekogó minanogo uve. ¹⁴ Není nugulizá ali miniki netá makokumú voká litamó nene gele likiminogo uve.

Sikalahula amisilínogo lo hutamó

¹⁵ Likigika nenitoka miliaká niamó nekoma nene není gakó gili alinigave. ¹⁶ Lá niiko, nénisi aménehitoka lokugo, izotipo loló oko luhusatini ale kii liti ve amiselekiko, lemeko lekezagi mino lualó moloko minanogo ive. ¹⁷ Gakó gihila gotoláa nene Sikalahukumú noluve. Nene monó gelema veenalite aí ángi hee hee lamamó, itó mogonalamú gili hee hee lamamó. Nenemú aí alemínigave. Lá onomóza, lekezagi minake likigikagú lemeko minoaká noimó nenazo, mogonala nene lekelisi gilinamóma neve.

¹⁸ Neza ahulolikimikugo, megusa lilí iki minikatave loko neza lekelitoka goha anogo uve. ¹⁹ Gamena alínipa makó neize. Nene gamena asú noiko, monó gele zagemita vejená nenete není goha ángigitamóza, lekelisi nene ángiganigave. Neza gosohá minoloko iteakalímíni amelaho nounazo, lekeza áminagó iki gosohá miniliki itinigave. ²⁰ Gamena nene zupa lekeza nene améneho není ale akiseneive itó lekelí neza ale akiseneive itó lekelisi není ali akisinave liki gili hee hee linigave. ²¹ Makó keza negepagutí gakó ali miniki gili aliaká nia vejená nene lamaná kigika niamiaká nia vejená niave. Itó kigika nimitamó nene, améneho agika kiminogo ive. Itó nezánegi nigika kiminake mogonáne lo utó oko lo kiminogo uve. ²² Loko lokago, Kalíotó numutotí ve Zutani apolaho loká otake Guivahanitemaka, geza nana okoko mogonaka lelitokagó lo utó okoko monó gelema vejenatoka halá gitane. ²³ Loko lokago, láa loko lo amimó: Ve makolímóhe agika nimitimó nenémo gakóne nene gele alekiko, améneho áminagó oko agika aminogo ive. Lá okoko nezagi lositá aitoka voko anitekisinake agikagú minoko aleko inogo usive. ²⁴ Makó keza kigika nememitamó nene, gakóne gili alemínigave. Itó gakó imane lo nolukumumó nene není gakó nomive. Améneho nimisili vémini gakó lo nolukumuve.

²⁵ Neza nene lekezagi minuke gakó imane lo lekemeaká noumóza, ²⁶ izotipo loló oko luhusatini ale kii liti ve Sikalahú nene améneho není nugulizató amiselekiko, lemeko netá mukikumú apí o lekemeko nénisi lo lukumu gakó nene ale gosohá oleketoko lo

lekemeko minanogo ive. ²⁷ Není helisa nene hulu nolukumuve. Hanuva veganalitini hulu lekememuve. Nezáne hulu nene nolukumuve. Nenemú likigika nene ololó okoko lekehelele vizemino. ²⁸ Neza voko nomininake lekelitoka goha atiginá itove loko lo nolukumugo gilinamóma neve. Likigika nenitoka miliiki minamó nelina nene, améneho nivilegeko noinazo, aménehitoka ititokumú giliiki mulutikú lamaná geleline. ²⁹ Imane netá utó okiko lekeza ánikigi nenikumú gili alévolé itave loko ámina netá utó onamigo goí oko lo nolukumuve. ³⁰ Neza nene gakó mukí miní ameko lo lekememitove. Imane mikasigú agulizaki ve Satá nenitó oko nehelú itove loko ale vatí okave. Áisi nene okoko ma nehelú aminogo imóza, ³¹ monó gelema veganalite nigika aménehini ameaká noumó itó hoza gakó lonetamó nene aleaká noumó nene ániigi hee hee litave loko imane suni aleaká nouve. Lekeza otilo. Mota vitunize, loko limó.

15

Izesú nene vain nagá mogonáa lamaná noive

¹ Izesú miní ameko láa loko lo limimó; Neza nene vain nagá mogonáa lamaná nouve. Itó améneho nene vain mini amelaho noive. ² Nenitokatí izana makolímó gihila zemitimó nene hukoko alahulanogo ive. Itó hupena makolímó gihila zekiko, gihila vauva aleko zitíve loko golesa itimoláa huko ahuloaká noive. ³ Lekeza nene monó lo lukumugo gili alévolé niatímó likigikagú mota guluvitiaká niave. ⁴ Lekelisi nene nenitoka iki apiziki minatamó nene, neza lekelitoka voko apizeko minanogo uve. Izana makolímó mogonaló apizeko minamitimó nene gihila zeakaláa ma nomive. Lekeza nene nenitoka iki apizemitamó nene, lekelitoka áminagó oko gihila ma zemínogo ive. ⁵ Vain nagá mogonáa nénisi nene nouve, itó lekeza nene izanáa niave. Makó keza nenitoka iki apiziki minatamó nene, neza áminagó oko keitoka voko apizekugo, keitoka gihila mukí zinogo ive. Lekeza nene nenitoka gímizemiki netá gihila lílí iakaláa ma nomive. ⁶ Makó keza nenitoka iki gímizemitamó nene, izanagitana oko gulugulu vizekiko, hukoko alahulanogo ive. Izanáa nene gulugulu vizekago, hukiki lokú giziaká niave. Nenitoka iki gímizema veganatoka ámina suni utó inogo ive. ⁷ Lekeza nene nezagi apiziki minatamó itó gakóne likigikagú minatímó nene, netá nemú manamú voká litamó nene, utó olíkiminogo ive. ⁸ Lekelitoka gihila mukí zekiko, lekeza lamaná není vegeanáe zuha lílí iki minatamó nenémo aménehini lapaná nene gonanalivagi utó inogo ive. ⁹ Améneho nene agika nemeaká noive. Neza ámináminoko nigika ameaká nouve. Lá okago, lekeza nene nigika lekemeaká noutímíni agikagú minalo. ¹⁰ Neza améneho loneta gakó gele alekuke, agika nemeaká noitímíni agikagú noumó neve. Ámináminiki loleketonou gakó gili alitamó nene nigika lekemeaká noutímíni agikagú minanigave. ¹¹ Není mulúnegú agila guluma oaká noi netá nene mulutikú minative loko, itó mulutikú agila guluma itímó nenémo hutílí oko vai oko minative loko gakó imane lo lekeme asú nouve.

¹² * Láa loko nololeketuve. Nigika lekemeaká noumó nenémíni lekezagí likigika eza amiko eza amiko iliki viki minalo. ¹³ Makó eza agivelaginimule loko minoko aleko imoláa ahulatímó nene, agika kimimómámini mogona utó inogo ive. Haitolímínoko agika kemeaká nenémo lá oko agika kimi suni avilegemitímó neve. ¹⁴ Lekeza loleketonou gakó ámegetatamó nene zogone milanigave. ¹⁵ Gelekelé izegipa makolímó gizapa vevámo oko moloko i netakumú gelemínazo, neza goha lekelikumú nene gelekelé izegipáneve loko lamitove. Neza nene aménehitokatí gakó gulumó nene lo utó oko lo lekeme asú okumó nenazo, itína lekelikumú zogone niave loko litove. ¹⁶ Lekelisi není nene nilími etó amave. Nénisi nene lekelémo etó okugo, lekeza viki gihila ali utó ikiko alévolé oko minova minova oko minative loko loleketumóma neve. Lá iiki není nugulizá ali miniki netá nemú manamú aménehitoka voká litató líkíminogo ive. ¹⁷ Likigika eza amiko eza amiko itave loko nololeketuve.

Monóini nomi veganalite Izesuni lova ali amiaká niave

¹⁸ Monó gelema veganalite lova ali líkímíkíma Guivahanite mikasigú noigo goí iki lova ali amemóma neve líki gili minalo. ¹⁹ Lekeza monó gelema veganalitini mulusigutí minalina, keza kigika lekemelíne. Neza nene holúikutí lekelémo etó okugo, keza iki míliki a netá nene lekeza ahulikamóma nenazo, nenemú lova ali líkímiaká niave. ²⁰ * Gelekelé izegipalaló lílí itatamó nenémo gizapa véa lílí ita netá avilegeminogo ive loko lo lukumu gakó nene lakagatí molamino. Keza není gopoguni mílinimiaká nianazo, lekezagí áminagó iki gopoguni mílikítanigave. Není gakó ali gúemamó nenazo, lekelí gakó ámináminiki ali gúeminigave. ²¹ Nímisilí ve ániigi hee lamamó nenazo, nenemú není nugulizá lekelitoka minakumule líki lá ilíkítanigave. ²² Neza keitoka lemeko utó oko gakó lo kememumó

* 15:12: Zon 13:34; 1 Zon 3:23 * 15:20: Mat 10:24; Luk 6:40; Zon 13:16

nelina, lihimáini minamiline. Lá okamóza, lo kemenoumó nenazo, lihimaváini nana iki ahulatamó neve. ²³ Lova ali nimiaká nia veenalite aménehinigi áminagó iki lova ali amiaká niave. ²⁴ Neza holúikú haitó suni golvagi nene veenalite ali utó amatímini ale utó amumó nelina, keitoka lihima nomimó minaline. Itó imane alekugo, keza áninginamó ángi ahulinake, není lova ali nimiaká niake aménehini áminagó iki lova ali nameve. ²⁵* Lá ikago monó gotolaú gakó makó láa liki luhuva gizinamó nene alévolé oko neve: Keza nene hanuvamú není lova ali nemeve.

²⁶ Izotipo loló oko luhusatini ale kii liti ve gakó gihilámini amelaho Sikalahú nene aménehitoka noive. Aí amiselekugo, aménehitokatí lemeko mogonáne lo utó inogo ive. ²⁷ Itó lekelisi nene hoza apí ukutí nezagi miniliki itinamó nenazo, lekezagi áminagó iki mogonáne li utó inigave.

16

Sikalahulímini hoza

¹ Alikaloka netá golesa nalilikitikoma, monó ahulikatave loko gakó imane lo nolukumuve. ² Lá iiki monó numutini hizi lí ilikitanigave. Itó gamena makó alitanogo ive. Lá noiko, Ómasi nasahilí notupe liki likipili hilinigave. ³ Keza nene aménehinigi nezagi ángi hee hee lamiki nene suní alinigave. ⁴ Neza goí oko imane lo nolukumu gakó nene alévolé okiko, ameteho gozapá lo limi gakóma gihila zekave liki gilinigave. Hoza apí u gamenaló lekezagi minoko aleko ituni gamena hána ha nego lo lekememumóma nemóza, ⁵ itína nene nimisili vémitoka atiginá oko vinogo ugo, lekelikutí ve makolímó hitoka vitane loko loká onetamive. ⁶ Gakó imane lo lekemekugo miluma netalímó likigikagú vaí noize. ⁷ Lá noimóza, neza gakó gihila litoze, gililo. Neza atiginá oko aménehitoka ititomó nenémo netá gihila ale utó oleketanogo ive. Ahulolikimioko itemulina, hize lé oleketati ve izotipo nene lememiline. Itekinake amiselekugo, lekelitoka liminogo ive. ⁸ Lemeko mikasiuka monóini nomí veenalitini lihimáinímini mogona itó hee loko minoko aleko oakalímini mogonamú itó lihima limititímini mogonamú lo utó okiko gili hee hee linigave. ⁹ Keza nenikumú gili alévolé amanazo, lihimáinímini mogonamú lo kemekiko gilinigave. ¹⁰ Neza aménehitoka atiginá oko itekugo, goha není áningaminigi anazo, hee loko minoko aleko oakalímini mogonamú lo kemekiko gilinigave. ¹¹ Imane mikasiuka agulizaki ve Satani lihimamú mota goní okamóma nenazo, goní oakalímini mogonamú lo kemekiko gilinigave.

¹² Gakó lo likimitomó mukí nemóza, itína litá oko lo lekeme asú okugo, gena lekepelekatize. ¹³ Gakó gihilámini amelaho Sikalahú áisi lemekoko gakó gihilagú lekelémoko vinogo ive. Nene ezáa agata geleko lo likimitigopa, nenitokatí itó aménehitokatí gakó geleoko lo likiminogo ive. Lá okoko alika utó iti netakumú lo lekeme lekeme oko minanogo ive. ¹⁴ Gakó nene nenitokatí alekoko lo nolikimioko není nugulizá ale napa inogo ive. ¹⁵ Aménehitokatí netá matá nene nenikó neme asú onoimó neve. Nenemú Sikalahulímini nenitokatí gakó alekoko lo likiminogo ive loko mota lo lekemekuve.

Miluma gilitamóza miniiki mulúikú agila guluma inogo ive

¹⁶ Lekeza gamena koma mininiki není goha áningaminigave. Nenémini veletó koma miniiki není goha áninganigave. ¹⁷ Loko lokago, veenalala zuha lugáa leza logele hagele unike gakó imane nana gakó nolive. Gamena koma mininiki není áningaminigave, itó nenémini veletó koma miniki není goha áninganigave, itó aménehitoka atiginá oko ititove loko nolimó nene nana gakó nolive. ¹⁸ Loko lunike, gamena komamú nolimó nene nana gamenamú nolive. Gakó limó nenémini mogona gelemune. ¹⁹ Loko lokunike, loka otanogo nouko Izesú geleake láa loko lo limimó: Gamena koma mininiki není áningaminigave, itó nenémini veletó koma miniki není goha áninganigave loko lo lukumumómamú ligili hagili niahe. ²⁰ Lamaná lo likimitoze, gililo. Lekeza nene ive nama iki mininiko, monó gelema veená nenete kogoliza vizinigave. Itó lekeza miluma giliki minanigave. Lá niko, ale viligokiko mulutikú agila guluma inogo ive. ²¹ Vená makolímó izegipa getati gamena alitokiko, miluma gilinogo ive. Minoko getoake, izegipala utó ikumú mulunaú agila guluma itímó miluma gilikumú agatí molanogove. ²² Lekezagi ámináminiki itína miluma gilitamóza, goha áningolikimikugo, mulutikú agila guluma inogo ive. ²³ Lá okiko, ve makolímó ipá oko ale ahulaminogo ive. ²³ Ámina gamenaló netá matakumú není voká linitaminigave. Neza lamaná lo likimitoze, gililo. Lekeza netá nemú manamú aménehitoka voká litamó nene, áisi není nugulizató likiminogo ive. ²⁴ Lekeza amunaloka miniliki itetó nene není nugulizá ali minake netá matakumú loká amamóma neve. Mulutikú agila guluma itímó nenémo hutilí oko napa oko minative liki voká liiki alinigave.

Mikasiuka netá mukí nene avilegeko nouve

* 15:25: Age 35:19, 69:4

²⁵ Gakó imane lo lekemeva lekemeva omo iteko minumó nene, anoza gakokutí lo lukumómoma neve. Gamena makó alitanogo ive. Neneleka anoza gakó goha lo lekememinogo uve. Aménehini mogona lo utó oko lo likiminogo uve. ²⁶⁻²⁷ Gamena nene zupa není nugulizá ali miniki voká litave. Neza aménehitokatí lumu gakó mota gili alévolé iake, likigika nimikakeve loko aménehiki agika lekemekave. Nenemú lekelikumú aménehitoka voká litove loko nene lo lekememuve. ²⁸ Neza aménehini ahulomikuke mikasiuka lumumó neve. Itó imane mikasi ahulokinake aménehitoka itinogo uve.

²⁹ Loko lokago, izegipala zuhate leza láa loko lo amunimó: Imane anoza lamanike lo utó oko lo lemekane. ³⁰ Nenemú itínasa geikumú nene vejená keza loká miká igitamago geza netá matá mukikumú gele asú onane loko nogulune. Geza Ómasilokatí lemenimó neve loko gele alévolé onoune. ³¹ Loko lokuko, Izesú láa loko lo limimó: Lekeza itínasa gele alévolé okune liki nilahe. ³² Gamena makó alitanogo ive. Alitokiko, není ahulinimiiki hutilí iki numutitoka ví asú inigave. Vikiko, nezánegó minanogo uve. Lá itómóza, aménehiki minanogo usive. Nenemú nezánegó minaminogo uve. Ámina gamena itína mota alitokave. ³³ Není hulu nenémo lekelitoka minative loko gakó imane lo nolukumuve. Lekeza mikasiuka nimiriko gopoguni mililitatamóza, mulutikú golesa gelemilo. Nénisi nene imane mikasiuka mukí netá avilege nou vema nouve.

17

Izesú izegipalamú Ómasiloka limó

¹ Izesú nene gakó lo asú oake, okulumakuka ánigo nomolake láa loko limó: Aménegamaka, gamena mota alitokave. Geza gipakámini lapaná ale utó molokako, gipakámina neza geí lapaná ale utó molatoze. ² Géisi numutó namató vejenalitiní améipina nelémo loló animó nene nenitoka kelémo molani vejená nene alévolé kemetameni kimitove loko lá animó neve. ³ Alévolé kemetamenimini mogona lá oko neve: Ómasi gihila hamokó geí mognaka itó nimiseleni ve gipaka Izesu Kilistó není mognáne giliniko, alévolé kemetameni nene utó o kiminogo ive. ⁴ Hoza nememimó nene, ale lutegekuke, mikasiuka geí lapaná ale utó okuve. ⁵ Kee, aménega, mikasi velesá utó amigo gezagi makó okulumá lapanánegi minumó nene itína govogisaló nougo ámina netá goha nemekako ale minatove loko noluve.

⁶ Mikasiuka vejenakutí makó nenitoka kelémo molanimoláa nene mognaka avetó oko lo kemenómoma neve. Geí mututoni nenitoka kelémo molokako, keza geí gakó gili alikave. ⁷ Itó nenitoka netá nemó nene geitokatikó neve liki mota gilinave. ⁸ Itó gakó lo nenenimó nene lo kemekugo, mota gili asú inave. Itó géisi nimiselekako geitokatí lumumó neve liki mota gili seketigí ikave. ⁹ Neza keikumule loko geitoka noluve. Monóini nomi vejenakumú lamuve. Nenenimó keza geí mututoni niamó keikumú noluve. ¹⁰ Itó není mututoni nene geí mututoni niave, itó geí mututoni nene není mututoni niave. Itó iki miliki niamó nenémo není lapaná ale utó moloaká noive. ¹¹ Neza mikasiuka minato gamena mota asú noive. Kéisi nene miní amiki niko, neza geitoka mota itinogo uve. Etó keké vizeko noani aménega, geí gugulizá kumumó nenémimi zámuzatunú ale gilitokimikako, nenémimi agikagú avasavagi minatave. Lá okiko leza ligika hámakó nemómáminoko keza kigika hámakó minatize. ¹² * Kezagi makó minuni zupa nene, nenitoka kelémo molani vejená nene gugulizámini zámuzatunú gizapa oketoko minugo, nenémimi agikagú minamó. Lá okago, gizapa okimikugo, gopa amamóma neve. Monó gotolaú luhuva gizina gakó makó alévolé itive loko lolímini mututoni hámakó nene latila imó neve. ¹³ Itína geitoka vinogo nouke, imane mikasiuka vejenáne zuhatini mulúikú agila guluma itimó nenémo hutilí oko napa oko minative loko láa loko lo nogumuve. ¹⁴ Neza gakoka lo kemenómoma neve. Neza mikasiuka mututoni minamuve. Kezagi ámina iki mikasigú mututoni minamanazo, monó gelema vejená nenete lova ali kimiaká niave. ¹⁵ Géisi není vejenáne zuha mikasiukatí kelématane loko lamuve. Ve golesa Satakumú geisa hizeko gizapa oketatane loko lo nogumuve. ¹⁶ Neza mikasigú mututoni minamuve. Itó ámina iki keza mikasigú mututoni minamave. ¹⁷ Gakó gihila kigikagú limitimoláatunú kelémo etó ozo. Geí gakó nene gihila neve. ¹⁸ Géisi nene mikasiuka hoza gakó lonetoko nimiselenimó nenémimoko mikasiuka hoza gakó lokimikuke nokimisuve. ¹⁹ Geí gakó gihilámo kigikagú nemokimo kelémo etó okiko minatave loko nezáne nigikáne nugupéne ale etó oko nomuluve.

²⁰ Itó neza keikumukó geitoka lamuve. Keza li kimikiko nenikumú gili alévolé ita vejenakumuki geitoka noluve. ²¹ Kigika hamokó miniko minatave loko lo nogumuve. Aménega, geza není akisenane, itó neza geí akisenoumó nene kezagi ámina iki akisikisiko, monóini nomi vejená keza nimiselekako lumumó neve liki gili seketigí itave loko noluve. ²² Leza ligikate hamokó neve. Ámina oko keí kigika hamokó miniko minatave loko lapanaka

* 17:12: Age 41:9; Zon 13:18

nemenimó nene ámina oko kemekuve. ²³ Lá umó nene neza nemeni kumugo, itó geza gemeni nemekako, keza kigikatunú múnahiiki hamokó lílí iki minatave loko, itó lá iki niko, monóini nomi vejená kéisi nimiselekako lumumó neve liki gili seketigí itaze, itó gigika nenitoka moloaká noanimó nene ámina oko keitoka moloaká noane lílí gili lamaná itave loko neve.

²⁴ Aménega, nenitoka kelémo molani vejená nene keza nénisi minatotoka minatave loko noluve. Neneló niiki nene mikasi utó amigo gigika nenitoka molanike okulumá lapaná lehizenetanimó nene ángi guni itave. ²⁵ Aménega gehaváamaka, monóini nomi vejená keza geí mogona gili guni amamóza, nénisi nene gelenouve, itó vejenáne zuha nenete géisi nimiselekako lumumó neve liki gilinave. ²⁶ Neza gigika není nenenimó ámina oko keitoka minative loko itó neza ámina oko kigilikaloka minatove loko keí holúikú nene mogonaka lo kemeko minanogo uve.

18

Izesuni amimí okago alemó

(Mat 26:47; Mak 14:43; Luk 22:47)

¹ Izesú eza gakó láa loko lo asú oake, ezagi vejenala zuhagi leza Kitilona nagamí gímuza vola helegaloka vunike, zazuha makokú itunimó. ² Ámina zazuhagú Izesugegi gamena gamena alegesá oaká unimó nenazo, itó amimika líti ve Zutá ezagi ámina apakumú ángionoimó nenazo, Izesú neneló noinogo ive loko geleneike, ³ guguni giziaká a ve napagi Palisaio monó vegi niatoka vike Izesuni nene kigizakú molatikumú loká okago, mulusi makokú ami vegi itó monó zagusavegú pilisi ve lugáagi kimisilikago, keza ló ligiki aleke lova hiziaká netá aleke, Zutá kelémo goí igo ámina zazuhaloka Izesú noitoka vamó. ⁴ Vi anitikago, Izesú nene aí amupiló utó iti netá mukikumú geleake, keitoka vike loká oketake lekeza éahikumú vitagá niave. ⁵ Loko lokago, keza Nasalete ve Izesunimamú vitagá nune liki likago, Izesú nene nezama imane nouve loko lo kimimó. Loko lokago, amimika li ve Zutá nene holúikú minake, ⁶ ezagi kezagi Izesú li gakokumú kemegealokatí nivake mikasiló pou liki akimi vamó. ⁷ Lá ikago, goha loká oketake lekeza éahikumú vitagá niave. Loko lokago, keza Nasalete ve Izesunimú vitagá nune liki likago, ⁸ Izesú láa loko lo kimimó: Nezama imane noumole loko mota lo lekemekuve. Nenemú nenikumú vitagá niikima, izegipáne zuha imane ahulikimikiko hanuva vitaze. ⁹ Loko lokago, nenitoka kelémo molani vegutí makó tolova amitive loko amunaloka li gakó nenémo alévolé imó. ¹⁰ Lá okago, Saimon Pitá eza sopoló aleneimó nene golagutí aleko segeake, guguni gizoaká vetini ve napámini gelekelé izegipala agulizá Malakusini apilike, zamagaloka agata zeko isimó. ¹¹ * Lá okago, Izesú nene Pitani láa loko lo amimó: Sopoló nene goha golagú ale géezo. Améneho miluma netá gihitane loko lonetonamóma nenazo, gehemitane loko lá noape, loko limó.

Guguni gizoaká veloka Izesuni alímiki vamó

¹² Lá okago, ami vegi monó gizapa veninigi Zuta vetini pilisi vegi keza Izesuni agizató aliake nagá alemó. ¹³ Nagá aliake, apí iki alímiki víki Kaiapani venalámimi amelaho Anasí noitoka alímiki vamó. Kaiapá nene ámina kilisimasi oko novigo Zuta vetini guguni giziaká vetini gizapa ve minake, ¹⁴ * amunaló emane Zuta ve kagata alike leza mukitó helekatunize, ve hamokolímo lelémo nupa napa oko helekiko nenémo netá gihila ale utó oletative loko li ve minamó.

Pitá Izesuni egamega otamó

(Mat 26:69,70; Mak 14:66-68; Luk 22:55-57)

¹⁵ Lá okago, Saimon Pitako Izesuni izegipala zuhagutí ve makó Izesuni ámegetoko vusi ve nene guguni giziaká vetini ve napa nenémo není ángionoimó nenazo, Izesuki makó vusike guguni giziaká vetini geisa mikú nanitusigo, ¹⁶ Pitá nene geisa gatetoka oteneigo, neza vuke gatetó gizapa noi venáma lo amekuke, Pitani alémoko geisa mikú itusimó. ¹⁷ Itekusigo, ámina venalímo Pitani loká otake geza nene ámina goní nita vémini izegipa zuhagutí makó noape. Loko lokago, Pitá nezama noamuve loko limó. ¹⁸ Lá okago, hepé legekago, gelekelé vegi gimisigi vegi keza lóo lotá itune liki ló lokunusa ló gizikago, Pitá nene kezagi ote minake lóo lotá oko minamó.

Guguni gizoaká ve napa nenémo Izesuni loká otamó

(Mat 26:59; Mak 14:55; Luk 22:66)

¹⁹ Lá noigo, guguni giziaká vetini ve napa nenémo izegipala zuhamuki apí o kemeaká i gakokumuki Izesuni loká otamó. ²⁰ Loká omikago, Izesú láa loko lo amimó: Neza numutó

* 18:11: Mat 26:39; Mak 14:36; Luk 22:42 * 18:14: Zon 11:49-51

namató vejená lo utó okogó lo kemeaká umóma neve. Neza nene lekelí monó numutikú itó monó zagusave napagú lekeza Zuta ve alegesá iaká niató nene gakó apí o kemeaká onouve. Neza nene asugunatoka gakó makó lo kemesá amuve. ²¹ Geza není nene nanamú loká nonetane. Není gakó gilina vejená nene lo kumu gajokumú nanave loko limó neve loko loká oketozo. Lo kemeaká nou gakó nene keza gilinave. ²² Loko lokago, pilisi ve makó áminaló ote minamó nenémo agizanitunú Izesuni napilike guguni gizoaká ve napama nene geza gakó nenémináa nanamú lo namene. ²³ Loko lokago, Izesú láa loko lo amimó: Neza gakó golesa makó lonoitomóma lo utó ozo. Gakó lamaná lo nolukumugo nanamú nonepelene. ²⁴ Loko lokago, Anasí nene nagatunú nene Izesuni agizató goha nagá zeake, guguni gizoaká vetini ve napa Kaiapá noitoka amiselekago alímiki vamó.

Pitá Izesuni goha egamega otamó

(Mat 26:71-75; Mak 14:69-72; Luk 22:56)

²⁵ Lá noigo, Saimon Pitá nene lóo lotá oko oteneigo loká itake gezagi ámina vémini izegipala zuhagutí noape. Liki likago, eza egamega ike neza aí zuhagutí noamuve. ²⁶ Loko lokago, guguni giziaaká vetini ve napámini gelekélé izegipala Pitá agata zeke isi vémini zuhagutí ve makolimo loká otake gezagi zazuahagú niasigo ániigo noumóma neve, olo. ²⁷ Loko lokago, Pitá goha egamega okago, áminaló litá oko okoloho nenémo anó molamó.

Izesuni Pilató noitó alímiki vamó

(Mat 27:1-2; Mak 15:1-5; Luk 23:1)

²⁸ Lá okago, Izesuni nene Kaiapani numukutí alími hetó iake, alímiki agulizaki vémini numutoka vamó. Viake, neteká holugú nego, avóikini asenini zeketakumú gili mina nosá nanigi niake Zuta veta amosá suni aleko hetoka ve makolímimi numukú itekinake ligika ale golotuva lokatune liki kezáini nene agulizaki vemámini numukú itemamó. ²⁹ Lá ikago, Pilató nene hetoka lemeake, loká oketake lekeza iki imane ve nanamú goní nitave. ³⁰ Loko lokago, keza láa liki lamó: Imane ve eza netá golesa aleaká ve minamillina, leza agizató aleko geitoka alémoko amutiline. ³¹ Liki likago, Pilató láa loko li kimimó: Lekezatini agizató aliiki lekezatini li huka gaktinimaló ali míliki goní italo. Loko lokago, Zuta vetini monó gizapa vete zohota zaló hilitive liki giliake láa liki li amemó: Óe, lezatete ve makó apele helesakumú nene lekelí gamanímo óe loko lo hukonoimóma neve. ³² * Liki likago, zohota zaló vejená kepele heleaká nene Loma vetini mogona minokago, Izesú nenéminoko hilitove loko amunaloka lo kimi gakó nene alévolé inogo imó.

³³ Lá okago, Pilató goha kugulizaki vetini numukú iteake Izesuni sele lo ameake loká otake geza nene Zuta vetini kugulizaki ve napa noape. ³⁴ Loko lokago, Izesú láa loko lo amimó: Gezaka gagata geleko nene gakó nolape, itó ve makolite nenikumú láa liki li gimikago nolane. ³⁵ Loko lokago, Pilató láa loko lo amimó: Neza Zuta ve nougo nolape. Gezaka vejenakagi itó guguni giziaaká ve napagi gilímiki nenitoka iminamóma neve. Geza nana netá golesa loló okako neve. ³⁶ Loko lokago, Izesú láa loko lo amimó: Neza nugulizaki ve napa noumóza, nenémini mogona nene imane mikasiú vetini suni nomive. Imane mikasiuka netá minalina, Zuta vetini kigizakú nilími milikatave liki izegipáne zuhate lova ali utó alinamóza, nugulizaki ve minato mogona nene imane mikasiú vetini suni nomive. ³⁷ Loko lokago, Pilató láa loko lo amimó: Láa lokoma geza nugulizaki ve napa nouve loko nolape. Loko lokago, Izesú láa loko lo amimó: Nene nugulizaki ve nouve loko gezaka mota lokane. Neza gakó gihila lo utó itove loko imane mikasiuka lemekuke, izóneho getokago nouve. Gakó gihila giliaaká nia vejená mukilite negepagutí gakó giliaaká niave. ³⁸ Loko lokago, Pilató nene gakó gihila nene nana gakó neve.

Loko loake, Zuta vejenatoka hetoka lemeake, láa loko lo kimimó: Imane vémini lihivalamú vitagá umó nomive. ³⁹ Lá onoimóza, lekezatini mogona lá oko neve. Avotikini asenini zeketakumú gili mina holisigú kilisimasiló kilisimasiló nene lekezatini ve makolímimi agulizá ikago, nagá numukutí ve hamopamó kimisele ahulo ahulo oaká nougo lekelitoka viaká niave. Itó imane gilíkiko etokikoma, Zuta ve lekelí agulizaki velini aseva zemikugo lekelitoka vitihe. ⁴⁰ Loko lokago, keza nene negénegeka lake gakó napagutí nene Óe, aí nomive. Palapasini aseva zetamane. Liki lamó nene Palapasí nene laskoli ve nena.

19

Izesú hilitive liki goní itamó

(Mat 27:15; Mak 15:6; Luk 23:13)

¹ Lá okago, Pilató lokago, segi nogosanitunú nene Izesuni apiliake, ² agulizaki vema nenaé liki anosa netá lilé itiake ami vete uhenagi nagatunú akilí lilí iki gotolaló hitimiae,

* 18:32: Zon 3:14, 12:32-33

ginegane hána luhuvagi okohu gó luhitamó. ³ Lá iake, amatoka hizi letiki niake, ganimak-
ilisi i ameke Oga, mokáne, Zuta vetini kugulizaki vénimave. Nilake, kigizanitunú Izesuni
agokaló zemó. ⁴ Lá ikago, Pilató nene Zuta ve niatoka goha limike láa loko limó: Ánigalo,
lihimavalamú vitagá umó nene nomive liki gilitave loko lekelitoka alémoko nouve. ⁵ Loko
lokago, Izesú nene uhenagi akilikí okohu gó luhoake keza niatoka lemeko noigo, Pilató
nene nokelepizike imane ve ánenémináa ánigalo. ⁶ Loko lokago, guguni giziaká a ve napa
keza vegeáninigi Izesuni ániagiake, gakó gamoga geke zohota zaló apele helemane. Zohota
zaló hilitinae. Liki likago, Pilató nene konotó alike láa loko limó: Neza nene lihimavalamú
vitagá umó nomize. Nenemú lekezatini alímiki viki zohota zaló apililo. ⁷ Loko lokago, Zuta
vetini monó gizapa ve keza láa liki lamó: Ezáamú Ómasímíni gipala nouve loaká noimóma
nenae. Nenemú ve nenémináa nene hilitave liki li hukilita gakokú luhuva gizinamóma
nenazo, mota hilitive. ⁸ Liki likago, Pilató nene Ómasímíni gipala noive liki lakumú alegesá
goha ligimó. ⁹ Alegesá legekago, Izesuni nene goha numukú alémoko itike loká otake géisi
hikutí utó animó neve. Loko lokago, Izesú nene anotó alemimó. ¹⁰ Anotó alemigo, Pilató
láa loko lo amimó: Geza gakó nene lo nememane. Neza lokugo hanuva minanogo ane,
itó nénisi lokugo zohota zaló hilinogo ane. Nenémíni zámuza nininamóma nenae. Nene
gelemape. ¹¹ Loko lokago, Izesú láa loko lo amimó: Není gakó litane loko veletokatí Ómasímo
zámuza gememilina geza není gakó nana oko latiline. Nene nolanimole. Nenemú nene
geitoka nelémo mola vémini lihima givilegeko napa napa neve, loko lo amimó.

¹² Pilató nene gakó geleake, Izesuni nene aseva zetatove lokago, Zuta vete ganimakilisi
ake láa liki lamó: Geza nene imane ve aseva zetatanimó nene, Loma apatoka agulizaki ve
napámíni agivelaho minaminogo ane, itó asú igitanigave. Itó makó eza ezámú nugulizaki
ve napa nouve loko litimó nene Loma apatoka agulizaki ve napa Sisani aviligitohé loko
lova gizo aminogo ive. ¹³ Liki likago, Pilató nene geleake, lokimikago, Izesuni alímiki
limikago, gakó lo hukoaká holomaló lemeko minamó agulizá nene Hipulu gakokutí nene
Gapatave liaká amó, lelí gakokutí nene geha holomave loko. ¹⁴ Itó avotegini asenini
zeketakumú azo holisi minatune liake, netá matá ali vatí niago, holisaká gamena noigo,
Pilató nene holomavaló noike, Zuta vetini gizapa ve nene agulizaki velini imane ánigalo.
¹⁵ Loko lo kemekago, keza ganimakilisi ake zohota zaló apele helemane liki likago, Pilató
láa loko limó: Íi, agulizaki velinima lekelisi likiko zohota zaló hilitive liki nilahe. Loko
lokago, guguni giziaká a ve napa keza gakó láa liki li amemó: Leza nene agulizaki vele
makó nomive. Loma apatoka agulizaki ve napa Sisá hámakó noive. ¹⁶ Liki likago, Pilató
nene ake, Izesú nene zohota zaló nilitunú ziki apilí hilitave loko kigizakú molamó.

¹⁷ Lá okago ami vemate Izesuni alímiake, zohota za amikago, gihigo, apá makó agulizá
nene gotóini gonosi helisa apale loko, itó Hipulu gakokutí Goligota loko neneloka alímiki
vamó. ¹⁸ Alímiki vake zohota zaló apiliki apatemó. Lá iake, ve golesa lositá luga luga
kipilikí apatemó. Izesuni nene holukú hizi otitamó. ¹⁹ Lá ikago, Pilató lokago nene, Izesuni
gotolaló zaló luhuva láa liki gizikago minamó: Nasaleta numutotí Zuta vetini agulizaki
venini Izesú ave. ²⁰ Nene mikasi Zelusale numuni simekaló minanazo, Zuta vegeaná mukí
vigá igá niake ámina luhuva gatamó. Nene luhuva nene Hipulu gakokutí itó Loma gakokutí
itó Kiliki gakokutí luhuva gizikago minamó. ²¹ Lá ikago, Zuta vetini guguni giziaká a ve
napa keza Pilatoni láa liki li amemó: Zuta ve lelí agulizaki veve loko luhuva gizamoko, neza
Zuta vetini nugulizaki ve nouve loko limó neve loko gizamane. ²² Liki likago, Pilató nene
mota luhuva gizokutó neze, ha minatize, loko limó.

Izesuni zohota zaló apelemó

(Mat 27:32-44; Mak 15:21-32; Luk 23:26-43)

²³ Lá okago, ami ve keza Izesuni nene zohota zaló apiliki apatiake, gineganeva gona
miliake, losive losive okago, amelaho ve lilí i asú amó. Lá ikago, gola hána miní amiki
akotamamó mukipa gó minokago, ²⁴* nenemú láa liki lamó: Hukoko alesá golesa okatize,
nenemú zohikú molokuko winititímó nene amelaho ve loló itive. Liake lá ikago, monó
gotolaló nene není ginegane ali gona miliki, nugupeló netá nene zohikú milikamó neve liki
luhuva giza gakó nene alévolé imó.

²⁵ Ami ve keza nene lá niago, Izesuni zohota za mogonagú nene vegeaná lá iki minamó:
Izolahiki atolahiki itó Kolopani venala Maliaki itó Magatala numutotí Maliá makoki.
²⁶ Neneló Izesú agika ameaaká i veve liki lina ve nezagi makó nouko, Izesú nene izolahini
láa loko lo amimó: Vená geza ániagozo. Ve imane gipaka loló noive. ²⁷ Loko loake, láa loko
lo nimimó: Vená imane ániagozo. Geí izokahove. Loko lokago, ámina gamenaló Izesuni
izolahini alémoko vuke numúneuka minoko aleko usimó.

* 19:24: Age 22:18

*Izesú hilimó**(Mat 27:45-56; Mak 15:33-41; Luk 23:44-49)*

²⁸* Izesú nene mota hoza ale asú okuve loko geleake, gihila zitive loko monó gotolaú mina gakó makó láa loko limó: Nagamikumú nivisekave. ²⁹* Loko lokago, neneló lape makokú ekesá vain nagamí lagasó ma nego, nenegú notunigitana netá nagamí ziake, zokaitunú hiziake agepagú amikago, namó. ³⁰ Vain nagamí nene noake, sele like mota hoza nene ale lutegekuve. Loko loake, gotola nene gupá zeake sikalahula ahuloake hilimó.

Izesuni alómusagú zokaitunú hizemó

³¹ Lá okago, Zuta vetini monó gizapa ve keza gó lokiko avóikini asenini zeketakumú gili miniaká a holisigú minanigi netá ali vatí niake, ámina holisi nene napa napa nenazo, itó Mosé ve makolímíni gonosiva nene límugusigú zaló minatimó etamitive loko lo mola gakó gili minake, Pilatoni láa liki li amemó: Ami ve makó kimiselekako, viki ámina vetini kígisa helisáini zi letiiki gonosíini nene zalotí aliliki limiki gale zikitatave loko nouné. ³² Liki likago, gele kemekago, ami ve keza golesa netá alesi ve Izesuki makó kepele vetosini kígisa helisa zi letiake, ³³ viki Izesuni ániagamó nene mota helekago, ániagiake, agisa helisa nene zi letamamó. ³⁴ Lá okago ami ve makolímó zokaitunú nene alómusagú hizekago, golanigi nagamiki nene áminagutí litá oko limimó. ³⁵ Nene suni nene nogómula gihilatunú ániagokuke lo utó noumó nene soza nomive. Gakó gihila neve loko gelekuke lekeza ámina gakó gili seketigí itave loko gizo nolukumuve. ³⁶* Monó gotolaú anoza gakó makó lá oko nemó nene, gihila zitive loko ámina suni utó imó:

Lekeza nene helisa nene ma zi letaminigave.

³⁷* Itó monó gotolaú gakó makó lá oko neve:

Keza nene zokaitunú hiziki hokolota ve nene ániaganigave.

*Izesuni gale zitamó**(Mat 27:57-61; Mak 15:42-47; Luk 23:50-56)*

³⁸ Lá okago, Alimataia numutotí ve Zosehé áisi Zuta vetini monó gizapa vemú ahelele vizigo minake, asuguná oko Izesuni izegipala mina vémo Izesuni gonosiváa aleko vitohé loko Pilató noitoka voko loká okago, Pilató gele amekago, gonosiváa nene zohota zalotí apasoko aleloko lemekago, ³⁹* Nikotemó nene amunaló emane límugusigú Izesutoka vi vemámo anuva netupa meseme lamanalímíni lositá ale gopa oake, sigeliló molamó genava nene 35 kilo okago, geheko vimó. ⁴⁰ Lá oake, Zosehé alémo vatí igo, Izesuni gonosiváa nene ámina netupa meseme hilimikasike, gó gizopa lamanatunú asapú itasimó nene Zuta vete gonosi miliaká a suni alesimó. ⁴¹ Itó Izesuni apele mikasí agilikaloka zazuha makó minamó. Nenegú geha mulí makó goló vatikago, nego, vege ná nenegú gale zikitamago hanuva gosohá minamó. ⁴² Lá okago, holisi gamena mota alitokamómave loko hoza alita gamena asú okago, itó ámina geha mulí nene alitó minamó nenazo, nenegú Izesuni gonosiváa milasimó.

20*Izesú heleneikutí otimó**(Mat 28:1-8; Mak 16:1-8; Luk 24:1-12)*

¹ Holisi napa Sategú nene gó lo mikasiló amigo, Magatala numutotí vená Maliá nene gonosi apató vo aniteake ániagamó nene agepaló gehani napa mili lí amóma ahelú ali ahulinago ániagoake, ² ololu loko vike Saimon Pitani nezagí ániagolimiaké, láa loko lo limimó: Guivahanímíni gonosiváa mota aliki vikave. Itó nene hikú milamó netive. Leza gelemune. ³ Loko lokago, Pitaki nezagí gonosi apatoka makó vusimó. ⁴ Gapoló ololu loko novusike, neza nene Pitani avilegeuke litá oko gonosi galeló vo anituke, ⁵ gava hizeko ániagamó nene, nagá like gokó nego ániagamóza, áminagú itemuve. ⁶ Lá okago, Saimon Pitá nene alika oake geha mulí agikagú iteko ániagamó nene, mokoná lavolavo asapú amóma nene nego, ⁷ itó gotolaló asapú ita gó nene haitó gakeko nego ániagamó. ⁸ Lá okago, nénisi goí oko anitumóma nemóza, alika áminagú itekuke, ámina netakó nego ániagouke, lamaná oteko iteko vokave loko gele seketigí umó. ⁹ Amunaloka nene monó gotolaú Izesú heleneikutí oteko ititive liki gakó gizamó nene gele hee lamusimó. ¹⁰ Itó leza nene goha numutoka atiginá oko vusimó.

*Izesú Magatala numutotí vená Maliatoka utó o amimó**(Mak 16:9-11)*

¹¹ Vokusigo, Magatala numutotí vená Maliá eza nene gonosi galeló goha vike hetoka ive oko minatotí nene galegú ániaganogo gava hizeko ániagamó nene, ¹² ageló lositá Izesuni

* 19:28: Age 22:15 * 19:29: Age 69:21 * 19:36: Gá 12:46; Nam 9:12; Age 34:20 * 19:37: Zak 12:10; Ali 1:7

* 19:39: Zon 3:1-2

gonosiváa goí oko mina galeló gó gizopa luhiki minasike mitó niasigo ángamó. Makolímo gotolaló minamó. Makolímo agisaloka minamó. ¹³ Minasike vená geza nanamú ive noane liki likasigo, iza láa loko limó: Není Guivahanímini gonosiva aliki vikago, hitoka aliki vahe loko vitagá nouve. ¹⁴ Loko loake, mino viligoko ángamó nene Izesú noigo ángamóza, agoka agepa ángo vevesamimó. ¹⁵ Ángo vevesamigo, Izesú loká otake vená geza nanamú ive noane itó éhikumú vitagá noane. Loko lokago, eza nene zazuhaḡu hoza aleaká ve noihe loko láa loko lo amimó: Ve lamanámaka, géisi nene gonosivama aleko voko makokuka molonoitanimó nene, lo nemekako aleko vitove. ¹⁶ Loko lokago, Izesú nene Maliazo lokago, eza viligoko Zuta gakokutí laponí, lelí gakokutí nene monó gizapa venemaka. ¹⁷ Loko lokago, Izesú láa loko lo amimó: Neza nene aménehitoka velesá itemumó nenazo, nenemú nunukemo. Geza nene voko izegipa nugunamotamónema není améneho nene lekelí ametipove, itó není Ómasi nene lekelí Ómasi noitoka itinogo uve loko lo kemezo. ¹⁸ Loko lokago, Magatala numutotí vená Maliá eza atiginá oko vike Izesuni vejenala zuha nene neza Guivahani ángokugo gakó láa loko lo nemekave, loko lo limimó.

Izesú izegipala zuha niatoka utó o kimimó

(Mak 16:14-18; Luk 24:36-49)

¹⁹ Loko lokago, ámina holisi napagú límugusi zekago, izegipala zuha leza Zuta vetini monó gizapa vemú lelegesá legekago, numukú itekunike gahe etoha oko gekunike nouko, Izesú nene holuteḡu utó oake ote minake hulu nene lekelitoka minino. ²⁰ Loko lo lemeake, agizani lositá nolepizike, alómusagú hize ahúma lelepizekago, izegipala zuha leza Guivahanima ángokunike muluteḡu lamaná gulune. ²¹ Lá okuko, goha láa loko limó: Hulu lekelitoka minino. Améneho nimisilimó áminagó oko lekelí nolikimisuluve. ²² Loko loake, huhu loletake, láa loko limó: Ómasímini Sikalahú alilo. ²³ * Lá iiki vejenalitini lihimáini liki ahulatamó nene, asú itive. Liki ahulamitamó nene hanuva minative, loko limó.

Tomasí Izesú goha otikumú gele alévolé amimó

²⁴ Ligiveteḡo makó agulizá Tomasí agulizá makó Lopé áisi nene makotoka noigo Izesú utó o limimó. ²⁵ Utó o lemekago, ve agivelage leza makó zupa Tomasini ángokunike aveté oko leza Guivahanima ángokune. Loko lo amekuko, eza limó: Nezáne nogómulatanú agizató ahúma ángamoko itó nigizanitunú ahúmaló ale gelemoko, itó alómusalokama ale geleko ángaminake, gakotini nene gele alévolé aminogo uve.

²⁶ Loko lokago, holisi makó alitokago, izegipala zuha leza Tomasigeḡi nene numuni makokú goha ale nupa unike gahe gekunike nouko, Izesú nene ligilikagutí utó oake noihe, hulu lekelitoka minino. ²⁷ Loko lo lemeake, Tomasini láa loko lo amimó: Gigizani hisukatunú nigizatoka nuhúma ale geleko ángozo. Itó gigizani ahuloko nolómusaloka ale gelezo. Lá okoko gagata losi gelemoko gele alévolé ozo. ²⁸ Loko lokago, Tomasí nene Guivahanínemakave, itó Ómasinemakave. ²⁹ Loko lokago, Izesú láa loko lo amimó: Géisi ángokanike gele alévolé okane. Není ángamake gili alévolé iaká nia vejenakumú gulugo lamaná okave, loko limó.

Zoní giza luhuvámini mogonáa

³⁰ Itó Izesú nene izegipala zuhatini lovogisaló lu avevezaha la avevezaha mukí loló imó nene imane luhuvagú gizo asú amumóza, ³¹ imane gizonoumoláa lekeza gatiki giliiki Izesú nene gologí oletative loko lo mololeta vema Ómasímini gipalave liki aikumú gili alévolé i miniki alévolé lekemetameni alitave loko gizonoumole.

21

Izesú izegipala zuha makoláaloka utó o kimimó

¹ Itó minoko izegipala zuha leza Tipelia nonohulotó voko nouko, Izesú nene haitó suni aleko utó o limimó. ² Saimon Pitaki lopé izegipa Tomasiki Galilaia mikasigú Kana apatotí ve Natanaeki nezagi uvónehiko losigí aí izegipala zuhagutí makó losimagi leza alegesá oko nouko, ³ * Saimon Pitá nene neza lagaha alinogo novuve. Loko lo lemekago, lezagi makó vitune loko lokunike, sipigú itekunike vunimó. Voko minunike ámina holugú lagaha alemunike lá ova ova oko nouko, ⁴ gokululuva notovo igo, Izesú nene getatoka melane minamóza, izegipala zuha leza Izesuni ameni ángo guni amuko, ⁵ Izesú loká oletake izegipaguvo, lagaha ma alehe. Loko lokago, leza Óe, alemune. ⁶ * Loko lokuko, láa loko lo limimó: Gotaha ali zamagaloka miliki ahulatamó nene lagaha alinigave. Loko lokago, gotaha ale zamagaloka molokunike, lagaha vauva aleko alunimó nene gelelehá unimóza,

* 20:23: Mat 16:19, 18:18 * 21:3: Luk 5:5 * 21:6: Luk 5:6

vai okago, keé loko ale otemuhá. ⁷ Lá okuko, Izesú ameni nemeaká i veve liki lina ve neza nene Guivahanima nena loko Pitani lo amekugo, Saimon Pitá není gako geleake, agupe zapako minatoti gineganeva ale luhoake, nagamikú olío lemeake, galanogosá zeko 100 mitagitana oko voko nagamí getatoka vo anitekago, ⁸ ve lugáa leza nagamikú lapegú lagaha gotaha gelelehá oko aleko vuhá.

⁹ Voko getatoka itekunike netá makó lá oko ánigunimó. Ló nokusa ale hitikakú lagahagi peleti makoki nego ánigunimó. ¹⁰ Nániguko, Izesú nene lagaha itína alemómaguti lugáa alikalo. ¹¹ Loko lo lemekago, Saimon Pitá nene sipigú iteake gotaha gelelehá oko getatoka ale moloake lagaha napa 153 nene gotahagú vai iki minamóza, gotaha nene alegetá vizemimó. ¹² Lá okago, Izesú nene iki neteká nosá nalo. Loko lo lemekago, izegipa leza Guivahanimave loko mota gelenounimómalo nenazo, geza éagama noane loko loká otamune. Loká otamuko, ¹³ Izesú oake, peletigi lagahagi aleake gona moloko limimó. ¹⁴ Lá imó nene Izesú heleneikutí oteake minake izegipala zuha lelitoka utó o limigo ániguni gamena neneló losive makole loló imó.

Není sipsip izaló nosánetá kemeko gizapa oketozo

¹⁵ Neteká nosá no asú okuko, Izesú nene Saimon Pitani láa loko loká otamó: Zonini gipala Pitao, gigive keza kigika nimiaká niamó nene kivilegeko gigika nemeaká noape. Loko lokago, Pitá nene Guivahaninemaka, geikumú geleaká noumó nene gelenanimole. Loko lokago, Izesú nene vejenáne zuha kigikámini nosánetá mí zeko kemeko nozo. ¹⁶ Loko lo ameake, goha lo amike Zonini gipala Pitao, geza lamaná kigika nemeaká noape. Loko lokago, Pitá nene Guivahani neza geikumú geleaká noumó nene gelenane. Loko lokago, Izesú nene vejenáne zuha lamaná oko nasahilí oketozo. ¹⁷ Loko loake, miní ameko loká otake Zonini gipala Pitao, geza nenikumú geleaká noape. Némika loko loká otamó nene gamena losive makole imó nenemú Pitá agika hizekago lo amike limó: Guivahaninemaka, mukí netakumú gelenanimole. Neza geikumú geleaká noumó nene gelenane. Loko lokago, Izesú láa loko lo amimó: Geza nene vejenáne zuha lamaná oko gizapa oketozo. ¹⁸ Lamaná lo gimitoze, gelezo. Geza gosohá ve manike holotaka nene gohakaló ze gilitokanike, gapo neloka manaloka vítove loko gagata geleanike voaká animóma neve. Lá onoimóza, minoko ozaha molokoko gigizani lutooko noako, ve makolimo holotaka zegimioko vamítove litanitoka gelémoko vinogo ive. ¹⁹ Loko Izesú nene Pitá minoko nenémini oko zohota zaló noheleko Ómasímini agulizá alémo kegesative loko anoza gakó limó. Loko loake, miní ameko némegetoko ano loko lo amimó.

Izesuni izegipala gihiláa

²⁰* Loko lokago, Pitá viligoko Izesú ameni nemeaká i veve liki lina ve není ánigamó. Neza amunaló nosá nuni zupa Izesuni amatoka minuke nene Guivahaninemaka, éaho gimimika litikumú nolane loko lu ve minomó nenazo, ²¹ Pitá nene nenikumú Izesuni loká otake imane ve nana itimó neve. ²² Loko loká omikago, Izesú láa loko lo amimó: Áisi hanuva agómulagi noiko nénisi atiginá itove loko lokugoma, geí netá nehe, olo. Geza nene hanuva némegetoko ano. ²³ Loko li gakolimo hutilí oko vokago, vejenala zuha keza nenikumú nene helemínogo ive liki gelemóza, Izesú nene gakó némika loko lamike, áisi hanuva agómulagi noiko nénisi atiginá itove loko lokugoma geí netá nehe lokogó limó.

²⁴ Itó Izesuni izegipala neza ámina netá ánigoko gelekuke, lo utó moloko aí mogonamú luhuva imane nogizuve. Leza mukilite nene imane luhuva gizonou gakó nene gihilave loko gelenoune.

²⁵ Itó Izesú oko moloko imó nene nana oko gizo asú itune. Ha nenazo, gizo asú uhá minalina, nagata gulumó mikasiuka ma asú amiline.

* 21:20: Zon 13:25

Aposolote Iki Miliki Amoláa

Sikalahú amisilitove loko lo hutamó

¹* Teopilo, goí okoma luhuva netá gizo gumumó nene Izesú apí oko hoza alimoláa itó apínapi o kimíke aleloko vimoláa ale lutigike okulumakú itimoláagi nene gizo gumumóma neve. ² Okulumakú velesá itemike aposolo lilí itave loko kelémo etó imoláa nene Ómasímini Sikalahulámo litó hoza gakó lo kimimó. ³ Zaló itike míluma geleake heleneikutí oteake nene, hanuva agómulagi minake aleloko novive liki gili hee litave loko alévolé suni mukí loló ike gamena 40-a utó okemeká tolova oká noike, Ómasímo gizapa okimiaká gakó lo kemeko minámó.

⁴* Lá oake alika nene kezagi minake, láa loko lo kimimó: Lekeza Zelusalega nene litá iki ahulamiki améneho Sikalahúne amisilitove loko lo mololikimikago lo lukumu vemú nene ageva iki minalo. ⁵* Zoní nene hanuva nagamiláa holokimiaká imóma nemóza, améneho nene gamena hána minamoko Sikalahú hololeketanogo ive, loko lo kimimó.

Izesú okulumakú itimó

(Mak 16:19-20; Luk 24:50-53)

⁶ Gamena makó zupa keza alegesá iake, Izesuni láa liki loká itamó: Guivahanitemaka, kugulizaki ve goí iki lelitoka gizapa iaká amómámini oko geza itína gamena nene gugulizaki ve loló okoko Isilae vegená lelitoka gizapa itape. ⁷ Liki likago, eza láa loko lo kimimó: Nugulizaki ve napa loló ito gamena nene améneho ezáa zámuzalaló molo gilike gamena hánahe alínipape ezáa lo hukonoimó nenazo, lekelisi ma geleminigave. ⁸* Lá onoimóza, imane gilitave. Ómasímini Sikalahú eza lekelitoka lemeko zámuzalekemekiko, gakóne nene Zelusalega apí iki liiki nene lili ali iki Zutaia apá makokuka itó Samalia mikasiuka viiki, neneti mikasi nekisa vokisauka vi asú itave, loko lo kimimó.

⁹ Láa loko lo kemekago, keza gonú napelego, vávani oko iteko novigo límusi nenémo molo hitokago, vo tolova imó. ¹⁰ Okulumakú teho lokago, izegipala zuhate okenava iki gonú inago, ve lositá nene ginaganéini mokonaki keitoka galinalí utó ikasike, ¹¹ láa liki li kemesimó: Galilaia mikasiló vese, lekeza nanamú okulumakuka gonú iki niave. Izesutipo nene ániginago ahulolikimiake okulumakú iteka ve nene okulumakú itimómáminoko alika liminogo ive, liki li kemesimó.

¹² Lá okago, keza Olivi agokalotí atiginá iki limiake gapo alínipa viki Zelusalega vi anitiake, ¹³* numuni amupiló makó gikakú miniaká a numukú nene itiki minámó. Keí kugulizáimía Pitá Zoní Zemusi Etulú Pilipó Tomasi Patolomaíó Mataiío itó Alapaioni gipala Zemusi makó itó Saimoná eza Loma vemú giligo goselé apeleaká i ve itó Zemusi makolímímini gipala Zutá. ¹⁴ Nene ve itó Izesuni izamuha hiziki miniaká a venámagi Malía Izesuni izolahiki itó Izesuni agunamotamolagi kigika mili hamó iki Ómasiloka liki minámó.

Zutani hoza agepaló aliti ve alími etó amó

¹⁵ Gamena nene zupa Izesuni vegenala zuha nene vegená 120 nenéminiki minikamó nene alegesá iki niago, Pitá nene oteake gakó láa loko lo kimimó: ¹⁶ Nigivénegita, Zutá eza ale goí igo Izesuni agizató ale vemámini mogonala nene lo likimitoze, gililo. ¹⁷ Ámina ve nene monó hoza leza nolimike ezagi amimó neve. ¹⁸* Ámina ve nene mikasi makó gomulusi gehanitunó meina hizikago, áminaloka voko minake gotolalokatí velehé limike agatupa zeko pou lokago mí aseva akúvalomó zímó. ¹⁹ Lá i gakó nene Zelusale vegená mukilite giliake ámina apá agulizá keí gakokutí Akeletama liki milinámoma neve. Itó lelí gakokutí nene gola mikasive neve.

²⁰* Itó Ómasímini Sikalahulímo agulizaki ve napa Tevitini alémo vávani okago, alika Zutá nene loló iti netakumú gakó limó nene alévolé imó. Ámina netá nene Zutatoka utó itikumú nene Ómasi agepoka liká nama liká a gakokutí láa loko luhuva gizonoiómoma neve: Numuni apala nene gámé vizekiko, numutagalagú nene ve makolímó minamitive, loko gizamó. Itó makó lá oko neve: Aí hoza agepaló nene ve makolímó alitive.

²¹⁻²²* Luhuva láa loko gizonoiómó nenazo, Guivahani Izesú nene holutejú minoko aleko noigo, ve lugáa nenete Zoní eza Izesuni nene nagamí holota gamenaló apí iki lehelukalú

* **1:1:** Luk 1:1-4 * **1:4:** Luk 24:49 * **1:5:** Mat 3:11; Mak 1:8; Luk 3:16; Zon 1:33 * **1:8:** Mat 28:19; Mak 16:15; Luk 24:47-48 * **1:13:** Mat 10:2-4; Mak 3:16-19; Luk 6:14-16 * **1:18:** Mat 27:3-10 * **1:20:** Age 69:25, 109:8
* **1:21-22:** Mat 3:16; Mak 1:9; Luk 3:21

imi nivago Ómasímo Izesuni alémoko okulumakú itimó. Ámina vegutí nene Zutani hoza agepaló alitive loko ve makó alémo etó okuko, Izesú nene galegutí otimó nene ezagi lezagi makó ániguháma nenazo, ezagi makó aveté oko lo kimitune loko noluve. ²³ Loko Pitá lo kemekago, ve lositá, makó Zosehé, agulizá koma Pasapá, agulizá makó Zustó, itó ve makó agulizá Matatí nene kilími utó miliake, ²⁴⁻²⁵ Ómasiloka láa liki agepoka lamó: Kee, Guivahanitemaka, ligika ánihoeká ve noane. Zutá nene aposolo hoza ahuloake heleake, Ómasímo ale vavá ota apatoka vokave. Lá okago, aí hoza agepaló aliti ve imane ve lositakutí alémo etó itanimoláa lelepizezo. ²⁶ Liki agepoka liake, kugulizá nene luhuva giziki ali nupa iki milakutí makó ali otikí ániagamó nene Matatiani agulizá nego, aposolo hoza amemó.

2

Sikalahú limimó

¹ * Zuta vetini avóikini asenini zeketakumú gili mina holisi asú okago, gamena 50 oko vokago, holisi makó alitokago, Izesuni vejenala zuha keza apá makokú alegesá iki niago, ² okulumakutí anó makó ohuhú nenéminoko moloko galinali lemeake, mina numuni agikagú nene iteko mino vaí imó. ³ Lá okago, ló gulumagitana netá makó utó oake mukilitini gotóitó hamopamó mino asú okago, ⁴ Ómasímini Sikalahú nene lemeko kigikagú mino vaí oake nenémini zámuzá kemekago, haitopaitó konokutí apí iki gakó lamó.

⁵ Lá niago, gamena nene zupa Zuta vejená monóinigi vejená nene vaí iki ake Zelusale numutoka minamó neve. ⁶ Niake guu loko okulumakutí limi netalímini anola giliake alegesá ake, konóikutí konóikutí gakó lí kimi kimi ago giliake, ⁷ kegepa gahava minamigo, sigaga likitake láa liki lamó: Gakó nila ve imane Galilaia mikasigutí vegó niamóza, ⁸ keza nana iake gakotegutí gakotegutí likago nogulune. ⁹ Leza nene Patia ve nouhá, itó Mitia ve nouhá, itó Elame ve nouhá, itó Mesopotamia mikasiuka ve nouhá, itó Zutaia ve nouhá, itó Kapatosia ve nouhá, itó Potu ve nouhá, Asia ve nouhá, ¹⁰ itó Pilisia ve nouhá, Pamapilia ve nouhá, Izipi mikasiuka ve nouhá, itó Lipia mikasigutí Sailini ve nouhá, itó Loma apatotí venove nouhá Zuta vegi monokumú gutá amoláagi nene, ¹¹ itó Kiliti ve itó Alapia ve leza nene ve minunike nene, Ómasímini suni alévoleáa nene lá iki lonokutí lonokutí likago gelekune. ¹² Liki liake, kigika gopa okago, gili gopa iake ligili hagili iki Agae, imane nana suni naleve. ¹³ Liki likago, lugáate gopoguka likitake vain nagamí gosohá niake matúini gopa okago lutuka nilave, liki lamó.

Pitá monó gakó lo kimimó

¹⁴ Liki likago, Pitá ave agivelage ileven-amagi oti minake gakó napagutí láa loko lo kimimó: Zelusale apá amelagita itó Zuta vejená lugáa neneta, neza gakó lo likimitoze, gili vevesiki gililo. ¹⁵ Lekeza lelikumú nene vain nagamí niake kigika gopa okago nilave liki nilamóza, gó izoha nolanazo, lá oko nomive. Sipakí gamena nomive. ¹⁶ Imane sunimú Ómasímini agepagutí gakó loaká ve Zoelé láa loko luhuva giza gakó nene mota gihila zekave:

¹⁷ * Minoko gamena napa asú iti zupa nene Sikalahúne numutó namató vejená mukitó lehizelikimikugo, izegipatini lakagapilamolite Ómasímini agepagutí gakó li nimiliko, gosohá velinite vamómáminiki nánigiko, ozahatini keza vamó ániaganigave.

¹⁸ Itó ámina zupa Sikalahúne nene lehizekimikugo, není gelekelé ve vená kezagi alikamú gakó lí milanigave.

¹⁹ Lá niko, okulumatokagi mikasilokagi golivagi netá haitopaitolimini nolekelepizugo ániaganigave.

²⁰ Guivahanímini golivagi gamena napa velesá utó amigo, mikasiuka nene golanigi loki lokilagi utó inogo ive, itó okulumató nene hómuni agómualó hitanogo ive, itó ikani nene ámina oko golakó loló inogo ive.

²¹ Lá okiko, Guivahanímini agulizá iki sele lí amita vejená nene kugutó vizinogo uve, loko Ómasímo lokave liki luhuva gizamóma neve.

²² Isilae mikasigú vese, lo likimitoze, gililo. Nasaleta numutotí ve Izesú eza holutikú minake, Ómasilokatili liki litave loko Ómasímo hize lé otago, zámuzalaló molo gilike golivagi netá mukí ale utó molamó nene lekeza gilinave. ²³ Ámina ve nene Ómasímo gozapá molo hukake gili netá aleko likigizakú molokago, lekelisi gala vevatini kigizakú milikago alími-likí vikí zaló nilitunú apilikago hilimóma neve. ²⁴ Lá ikamóza, gonosi matimatigú

* 2:1: Liv 23:15-21; Gapo 16:9-11 * 2:17: Zoe 2:28-32

minamitimó okago, miluma gilike heleneikutí Ómasímo alémo otimó. ^{25*} Agulizaki ve Tevití nene aikumú nene láa loko luhuva gizamóma neve:

Neza Guivahani ángo gisili hizekuke minoaká nouve.

Voko gopa okatove loko nigizani zamagaloka noive.

²⁶ Nenemú nigikagú laga noike,
mulúnegú agila guluma noigo noluve.

Itó nugupemú nene gele hamokó oko
gegeva oko minanogo uve.

²⁷ Není ahulonimikako nigika lamanaki nou vémina nugupéa anuva aminogo ive.

Nemenía nene hele vegeñalitiníuka ahulonetamitanikumú noluve.

²⁸ Geza alévolé nemetameki mohona ito gapo nelepizenitika,
govogisaló mulúnegú agila guluma igo minanogo uve, loko limó.

²⁹ Úvónegita aménegita, neza avoteho Tevitikumú ale akutoko lo líkimitoze. Eza helekago, gale zimikago, gonosi matimati galeva itína ha nego ángiaká niave. ^{30*} Eza Ómasímíni agepagutí gako loaká ve minoake, nénisi helekago Ómasímo nene není izegipa nugunamotamokutí makolímó není hoza agepaló agulizaki ve napa alémo loló itove loko alévolé oko lo huta gako nene geleake, ³¹ gologí oletative loko lo mololeta vema galegutí otitikumú geleake, agika lamanaki veva agupéa anuva okative loko hele vegeñalitiníuka amenía ahulotamimó neve loko limó. ³² Itó Izesuni nene Ómasímo galegutí alémo otekago, leza logómula gihilatunú ángionouháma neve. ³³ Itó Ómasímo agizani zamagaloka alémo moloake, amelaho lo mololetató nene Sikalahú molomikago, ámina Sikalahú itína nene lehizelímkago, ámina netá giliká ángiaká niave. ^{34*} Itó Tevití nene okulumakú itemimóza, eza gako makó láa loko limó neve:

Mezaú ve eza není Guivahaníne nene není nigizani lamagaloka minoloko voko noako,

³⁵ gala vega nene gigisa heumauka ahulokimikago minanigave, loko lo amimóma neve.

³⁶ Lá onoiže, Isilae vegeñá mukí lekeza alévolé iki gililo. Ámina ve apilikago hili ve Izesú nene Guivahanite gologí oletative loko lo mololeta vema noive loko Ómasímo alémo apazá noive, loko limó.

³⁷ Láa loko lo kemekago, miluma giliake Pitá ave itó aposolo lugáave loká ikitake ligivese, leza nana okoko lamaná itive. ³⁸ Liki likago, Pitá láa loko lo kimimó: Ómasímo lihimatini apaso ahuloleketative liki likigika ali viligalo. Lá ikiko, leza Izesu Kilistoni agulizató monó nagamí hololikimikuko, Ómasímo Sikalahula lehizeleketanogo ive. ³⁹ Lekezagi izegipatinígi itó hetoka nia vegeñaki sele lo kemekiko ata vegeñá mukí nene Sikalahú lehizeleketanogo lo mololeketonimóma neve. ⁴⁰ Loko Pitá loake, mukí gako miní ameko kagata aleko itína gamena ve neginagi keí holúikú ahulikimiiki ikiko Ómasímo lukugutó vizitive, loko lo kimimó.

Izesukumú gili alévolé a vegeñalitiní suni

⁴¹ Láa loko lo kemekago, aí gako gili alemoláa goha 3 tausen nene Ómasímo Izesuni vegeñalaló miní ameketago, monó nagamí hilikitamó. ⁴² Lá ikago, gamena gamena amuza míliki alegesá iake gili hamó iki aposolo apí i keme gako giliake, hanuva nosaki lepa nosaki níki Ómasiloka liki miniaká amó. ⁴³ Lá niake, aposolomate haitopaitó alévolé suni aleke golivagi netá alikago, vegeñá mukí kehelele vizigo minamó. ^{44*} Izesunimú gili alévolé iki mina vegeñalite nene netá matá ali minamó nene mukitó netáini ali minake, ⁴⁵ henokanóini makó ali minamó nene maketiló míliake moni aliake netakumú vitagá a vegeñá nene gona míliki ali volaló imaló ake, ⁴⁶ gamena gamena kígika míli hamó ake monó numuni napagú monó líká itó numúikú hanuva nosaki lepa nosaki níká iki kígika míli apiziki nosánetá gona míliki ali volaló imaló iki niake, ⁴⁷ Ómasi agepoka líki miniaká niago, vegeñá mukilite ángi kumu helemó. Lá noigo, Guivahanímo gamena gamena vegeñá makó kugutó vizike Izesuni vegeñalaló miní ameketamó.

3

Monó zagusave gatetó ve gepili alími zokasimó

¹ Gamena makó zupa Pitako Zoniko nene ho ale zohota noigo Ómasiloka loaká gamena nene monó zagusave napagú itinígi nivasigo, ² ve makó izolaho getakutí gepili minamó nenémo numuni gatetó minoko monó numukú tigá limigá a vegeñáma monimú voká loko minoaká imó. Ámina ve nene gamena gamena monó zagusave gatenáa agulizá lamanapani

* 2:25: Age 16:8-11 * 2:30: 2 Sam 7:12; Age 132:11 * 2:34: Age 110:1 * 2:44: Apo 4:32-35

loko netó nene alimi ahulimikago, ³ monimú voká loko minoaká imó. Ámina ve nene áminaló minake Pitako Zoniko monó zagusave napagú itinigi nivasigo, ángoake, monimú voká limó. ⁴ Voká lokago, Pitako Zoniko keza gonú napelesike, Pitá nene gonú lepelezo. ⁵ Loko lo amekago, ve gepili nenémo netáma niminigi nilasihe loko gituhú noake gonú kipilimó. ⁶ Lá noigo Pitá láa loko lo amimó: Moni lelitoka nomimóza, netá hamokó lelitoka nemó nene gimitoze, alezo. Nasalete numutotí ve Izesu Kilistoni gakató oteoko gapo moloko vozo. ⁷ Loko lo namike agizani lamagaloka aleko otekego, litá oko agisaguki agisa gehanaguki alévolé okago, ⁸ moí oko oteake gapo moloko olío ite ite oko Ómasi agepoka lomo lomo víke Pitako Zoniko monó zagusave napagú nene makó itemó. ⁹ Lá okago, gapo mohona noike Ómasi agepoka noligo, vegená mukilite ángiake, ¹⁰ goí oko monó numuni gateni agulizá lamanapaniveló minake monimú voká voká loko minoaká i ve noive liki ángi hee liake, agisa lamaná ikumú ininá iake sigaga lamó.

Pitá monó zagusavegú gakó lo kimimó

¹¹ Ámina vémo Pitako Zonikoló gímizekago, vegená mukí keza monó zagusaveló gaizopa makó agulizá Salomonive liki atagamó nenegú lolu liki víki alegesá iake kegepa gahava nomigo minamó. ¹² Lá niago, Pitá nene ángoake láa loko lo kimimó: Isilae mikasigú vese, ve imane ángiake sigaga sagaga nilamóza, lelí zámuzatunú itó lelí lamanatetunú oko alémo otemusinazo, gonukonú lepelemilo. ¹³ * Avotege Avalahá Isaká Zakopó keí Ómasímíni gelekelé gipala Izesuní zámuzá utó igo nánigave. Agulizaki ve Pilató eza Izesuní aseva zetatove loko noligo lekelisi nene Pilatoni agómulaló Izesuní ángi lá iake apilitave liake ami vetini kizizakú milamó. ¹⁴ * Lekelisi ámina vevesoko nomina ve agika lamanakí vema ángi lá iake, ve makó kepele hili ve noimóma aseva zetative liake, ¹⁵ minoaká amelahninima apilikago hilimóza, Ómasímo heleneikutí alémo otekago, ángionouháma neve. ¹⁶ Ámina ve Izesuní agulizá gele alévolé ominusitímo ángina vema imane alémo lamaná usigo, eza Izesukumú giligo alévolé okago zokokave.

¹⁷ Nigive nagavese, lekezagi gizapa velinigi gili hee lamake Izesuní apilinamóma neve loko gelenouve. ¹⁸ Ómasímíni agepagutí gakó liaká a vetini kegepa ale vávani okimikago gologí oletative loko lo mololeta vema miluma geleko hilitive loko nenémíni gakola lili ali vetini kegepauka lo molokago gizi mila gakóma itína mota alévolé okave. ¹⁹ Lihimavatini gilatoleketative liki likigika ali viligiiki golesa netatini ahuliiki Ómasiloka gímizilo. Lá ikiko Guivahanilokatí likigikámíni nosáneta ame íi liti gamena anogo ive. ²⁰ Lá okiko, Ómasímo eza gologí oletative loko lo mololeketa ve Izesuní alémo etó oleketonoi vema amiselekiko goha mikasiuka liminogo ive. ²¹ Izesú nene okulumalímo asapú okago noiko, Ómasímo lu netá la netá mukí goha ale lamaná iti gamena Ómasímíni agepagutí gakó liaká a vetini kegepagú lo molokago gakó li mila gamena nene alitokiko liminogo ive. ²² * Itó Izesukumú nene Mosé gakó makó láa loko limó neve:

Guivahani Ómasímo likigivetikini holúikutí nene agepagutí gakó loaká ve makó nenikitana oko alémo etó oleketatomó nenazo, némíni manámíni lo likimítí gakó mukí nene ámegetalo. ²³ Itó ámina monó lole ale véminí gakó gili alemita vegená nene, Ómasímo kehelú inogo ive, loko limó neve.

²⁴ Itó Samuelé minatotí Ómasímíni agepagutí gakó liaká a ve miniliki itemoláa mukilite imane gamenamú nene alika utó itive liki minamó. ²⁵ * Lekeza ámina vete alika utó itive liki li mila vema ali lá inamó nenazo, itó Ómasímo avotikitoka lo mola gakó nene Avalahani nene gagapilamó makolímó numutó namató vegená mukí lusa geketanogo ive loko lo ami vema ali lá inamó nenazo, likigika ali viligiiki golesa netatini ahulalo loko noluve. ²⁶ Ómasi eza gelekelé gipala alémo etó i vema lusa gelikimioko gapo golesagutí lekelémo atiginá itive loko lekeza Zuta vegenatoka amisilimóma neve.

4

Pitako Zoniko kansoletini holúikú minasimó

¹ Pitako Zoniko keza vegená gakó láa liki li kimiki niasigo, guguni giziaká vegi monó zagusavegú gizapa vegi itó Satukaio monó vegenaki keitoka ake, ² vegená nene Ómasímo Izesuní nene heleneikutí alémo otimómámíni oko vegená makó kelémo otitive liki apí ikimiki lasi gakokumú gili golesa iake, ³ kigizató aliake, límugusi mota zekago, azozá goní oketatune liki kilími kalapusi numukú milamó. Lá ikago numuni hamó akasimóza, ⁴ gakóini gelemoláagutí gili alévolé a véa 5 tausen minamó.

* 3:13: Gá 3:15

* 3:14: Mat 27:15-23; Mak 15:6-14; Luk 23:13-23; Zon 19:12-15

* 3:22: Gapo 18:15,18,19

* 3:25: Api 22:18

⁵ Akiake gó lago, Zuta vetini kugulizaki vegi monó ve lunáagi monó mogona apí ikimiaká a vegi ⁶ guguni gizoaká i ve napa Anasí itó Kaiapá itó Zoní itó Alesaté itó guguni giziaaká a zuha makoki mukí nene Zelusalega alegesá iki minake, ⁷ aposoloma kilími holúikú miliake, loká ikítake hí vémini zámuzaló itó hí vémini agulizató ve imane alími zokasive. ⁸ Liki likago, Ómasímini Sikalahulímo lemeko Pitani agikagú mino vai onoigo, láa loko lo kimimó: Uvónegita aménegita, ⁹ lekeza ve gepilima nana ikasike alími zokasimó neve liki itína netá gihila alusikumú goní hoza nilememóza, ¹⁰ lekezagi muki Isilae mikasigú vevená neneta, gakó lo likimitoze, gililo. Nasalete numutotí ve Izesu Kilistoni nene lekelisi zaló apili hilikago Ómasímo heleneikutí alémo oti vemámini zámuzaló ve imane lokogómulaló zokoake nene noive. ¹¹ * Aí mogonamú nene monó gotolaú luhuva makó láa liki gizinámoma neve: Numuni giaká vete gehani napa makó ángi ahulamó nenémo gehani lapusa alévoleláa loló oake noive, liki gizinave. Lekeza ámina numuni giaká ve niave, itó Izesukumú gehani lapusa golesave liki liake ángi ahulamóma neve. ¹² Numutó namató vevenakutí lugutó viziti ve makó noamive, itó aí agulizató lamaná itunimoláa neve, ve makó imane mikasiuka minamive, loko limó.

¹³ Lá okago, Pitako Zoniko keza kehelele vizemigo ali akutiki gakó likasigo, sukulu lamasi vematosave liki giliake nene, sigaga liake Izesuni amatoka minasi vematosá lasinae liki gelemó. ¹⁴ Lá niago, alími zokasi ve nene keí kamatoka noigo, ve lositosini konotó aliki li kimita gakoláa nomigo, vitagá amó. ¹⁵ Vitagá iake, gakó numukutí kimisili hetoka iake, kezáikó láa liki ligili hagili amó: ¹⁶ Imane ve lositáma nana oketatune. Kéisi nene netá golivagi alikasive liki Zelusale numutoka vevená mukilite gili asú ikanazo, leza nana okiko egamega oko lá oko nomive loko litune. ¹⁷ Lá onimóza, ámina gakó hutilí okiko vevená gili asú ikatave liake, Izesuni agulizató gakó goha li kememitáive liki kagata alitune liki liake, ¹⁸ goha sele li kimiake, Izesuni agulizató gakó li kimi kimi iki vevená goha apí i kememitáive liki kagata alemó. Lá ikago, ¹⁹ Pitako Zoniko keza láa liki li kemesimó: Lekeza giliki ángalo. Vevená lekelí gakó gele alekoko Ómasímini gakó gele ahulatunimó nene Ómasímo gele lamaná itihe. ²⁰ Leza ángoko geleko uni netá nene hitooko minaminogo une. ²¹ Liki likasigo, keza goha kehelele viziti gakó li kimiake, kipilita gapomú vitagá amó nene nomigo, hanuva kimisili ahulikago vasimó. ²² Lá amó nene ámina netá golivagi aliki alími zokasi vema nene kilisimasiva 40-a alahuloko minamó nenazo, vevená mukilite ámina netakumú Ómasi agepoka liki minikago, ve losima kipilitunimó nene vevenalite nana ilitatahe liki giliake gapomú vitagá iake ahulikimikago vasimó.

Izesuni vevenala zuhate genezáini ale vávani oketative liki Ómasiloka lamó

²³ Kimisili ahulikago, limikasike kigivéike niatoka vasike, guguni giziaaká ve napate itó monó ve lunáate li keme gakó nene avetó iki li kimikasigo, ²⁴ * giliake, kegepa hamó ake Ómasiloka láa liki lamó: Mezaú ve Guivahani geza okulumakuka ito mikasiuka itó age nagamikú lamó lamimó molanitika, ²⁵ * Sikalahuka nenémo gakola nene avoteho geí gelekelé ve Tevitini agepagú lo molokago, gakó láa loko limóma neve:

Hetoka vevená nene kizapaló molokago gopaga lamó neve.

Itó Zuta vevenalite netá golesa loló otatune liki gilikamóza,

hanuva geleakalágó gelemó neve.

²⁶ Mikasiuka kugulizaki ve napa nenete ali vavá iake,

itó gizapa vete ali nupa iake,

némini manámini iki Guivahanigi gologi oletative loko lo mololeta vevagi lova ale kimitune liki gona gizamole,

loko limó. ²⁷ * Lapanalagi gelekelé gipaka Izesúma lugutó vizeaká hozamú alémo etó ani vema lova ali aminigi Heloté ave Potiasi Pilató ave itó hetoka vevenaki Isilaeló gizapa vegi keza lamaná imane apatoka alegesá iake, ²⁸ géisi gosohá utó itive loko lo molani netá mukí alemóma neve. ²⁹ Lá ikamóza, Guivahanitemaka geza lehelele viziti gakó gelekoko gakó ale akutoko litune loko genezate ale vávani olimioko, ³⁰ Zámuzá lemekako vevená kelémo zokinake lapanalagi gelekelé gipaka Izesuni agulizató golivagi hoza alitune loko nolune.

³¹ Liki Ómasiloka likago, alegesá iki mina numunima guligulí oko mómoká okago, Ómasímini Sikalahú nene lemeko kigikagú mino vai oake kelémo vávani igo, limiake Ómasímini gakó ali akutiki li kimi kimi iaká amó.

Netá matá nene mukitó netáini ali minamó

* 4:11: Age 118:22 * 4:24: Gá 20:11; Nia 9:6; Age 146:6 * 4:25: Age 2:1-2 * 4:27: Mat 27:1-2; Luk 23:7-11

³² * Lá niake, Izesunimú gili alévolé iki mina vejená keza gigika mili hamó iake, geí netá není netá lamake netá matá ali minamó nene mukitó netale liki ali minamó. ³³ Lá niake, aposolote Guivahani Izesú galegutí otekago áni gune liki gakó nene alévolé iki aveté iki li kimi kimi iki minikago, Ómasímo híze lé okimikago niave liki mukí vejenalite gili minamó. ³⁴ Nenémíni gihíla nene numunihe mikasihe zazuhahe netá amelage meinaváa aliake, ³⁵ aliki víki aposolo kimikago, ve lugaáte netakumú vitagá osá amimó. ³⁶ Nenémí suni nene ve makó agulizá Zosehé eza aposolote agulizá makó Panapasí ave liki mila ve, nene agulizalímíni mogonáa lelí gakokutí nene kelémo kíi lokimiaká ve eza Livaini agávolaho Saipalasi mikasi pokologú getamó nenémo ³⁷ zazuha apala makó ale minamó nene meinava moni aleake aleko voko aposolo kimimó.

5

Ananiasiko Sapailako

¹ Lá okamóza, ve makó agulizá Ananiasí itó venala Sapailá keza ligili hagili ikasike, zazuha apá makó salimikasike, moni alikasike, ² lugaáa nene ali halá gikasike, Ananiasí nene lugalokatí aleko voko aposoloma nene áminasí alusimó neve loko lo kimimó. ³ Lá okago, Pitá láa loko lo amimó: Ananiasio, geza nanamú Satá gigika ale gopa okago Ómasímíni Sikalahú soza gakó lo amekanike mikasímíni meinava lugalokatí ale halá gekane. ⁴ Mikasiga nene gezakaloka minatínago, gezaka gagata geleko kemenimóma neve. Itó salimokanike meinava alenimó nene geza monikama nenazo, lélisi voká logetamune. Nene lotí meinava aleokoma nenetunú netá mataka meina kona itove loko itanínago, geza nana okago gezaka gigikámo gogoka vizekago nenémíni ane. Vegená soza lo lumuhe loko Ómasí soza lo amekane. ⁵ Loko noli agepági, Ananiasí nene nogilike pou loko akoake hilimó. Helekago, áni gi iake, kelegesá ligimó. ⁶ Itó lá oko helekago gosohá ve minamoláate otiki gonosiváa nene gotunú asapú iake aliki víki gale zitamó.

⁷ Gale zimikago, koma nominake, venalámo ámina gakó gelemike hanuva noihe loko anitimó. ⁸ Anitekago, Pitá nene loká otake Olo, mikasilotí meinava áminasí alesimó nehe. Loko lokago, eza oo, áminasíma nena. ⁹ Loko lokago, Pitá láa loko lo amimó: Lekeza nanamú Guivahanímíni Sikalahulímó áni gamítive liki agoka vizinigi ligili hagili ikasike asihe. Gelezo. Vakama nene gale ze vema gatetoka líti líti líti líti láze, gezagi nene áminámíni iki aliki víki gale zigitaní gave. ¹⁰ Loko noli agepági nene eza galinali agisagú pou loko akoake hilimó. Helekago, ámina gosohá ve nenete iteke gonosiváa áni gi iake, aliki víli vana gale zitató nene gale zitamó. ¹¹ Gale zikago, monó gele vejená itó gakóini gele vejená mukí keza kelegesá ligigo minamó.

Alévolé suni haitopaitolímíni ali utó amó

¹² Aposolo keza alévolé suni haitopaitolímíni mukí nene vejenalitini holúikú ali utó iminikago Izesuni vejenala zuha mukí nene monó zagusave napámíni gaizopa numuni makó agulizá Salomonive liki atagamó nenegú gigika mili hamokó iki alegesá iaká amó. ¹³ Niago, vejená lugaáte kugulizáini ali otemóza, ve vená mukilite kelegesá legekago monó gele vejenatoka víki gímizemamóza, ¹⁴ ve vená mukilite vauva aliki Guivahanímú gili alévolé iake keitoka miní amiki miniaká amó. ¹⁵ Lá iake, kivisi vejená nene gapoló kilímí miliki Pitá tizokoko kugupeló ale gelekikohe itó hanuva vogunámo avutá kepelekiko zokatave liake, uokoano nene líli iake ámina vejená nene miliki kilímí-likí iki agisauka nene ahulikimiaká amó. ¹⁶ Lá niago Zelusalega alitoka miniliki va vejenalitini kivisi vejenaki gigikagú holosi golesa mina vejenaki kilímiki ikago, kilímiki zoki asú amó.

Aposolo gopoguni milikitamó

¹⁷ Lá niago, guguni gizoaká i ve napagi izegipala zuhagi itó Satukaio monó vejená kezagi ámina suni áni gi iake, kemekugú niake kizapaló molokago, ¹⁸ aposoloma kizitató aliake kalapusi numukú kilímí milamó. ¹⁹ Lá ikago, akinago, holugú akovevé nene Guivahanímíni ageló makolímó kalapusi numukutí gahe segekimi iake, kelémoko limike láa loko lo kimimó: ²⁰ Lekeza víki monó zagusavegú itiki alévolé kemetameníni minata gakó li kimi kimi iki minalo. ²¹ Loko lo kemekago, gili iake, neteká ho noitigo monó zagusavegú itiki monó li kimi kimi iki minamó.

Lá niago, guguni gizoaká i ve napa nenémo izegipa agunamotamolagi Isilae vejenalitini monó gizapa vegi monó kansolegi kilímí nupa iake gakó ligili hagili iake, aposoloma kilímikatave liki pilisi ve makó nene kalapusi numukuka kimiselemó. ²² Kimisilikago, víki kalapusi numukú áni gamó nene, niamago, vitagá iake, atiginá iki ake lamó: ²³ Leza voko áni ghá nene kalapusi numuni gahe lopena alinago gizapa vema gateté ha minamóza,

* 4:32: Apo 2:44

leza gaha segekunike, iteko ángunimóza, ámina vejená niamago vitagá okune. ²⁴ Gakó láa liki likago, monó zagusave gizapa vegi guguni giziaká ve napagi keza gelemó gena okago, alika netá makó utó itimó nehe liake, kagata losi gelemó. ²⁵ Nigelego, ve makolímó anitike kalapusi numukú kilími mila vemate viki monó zagusavemagú monó li kimi kimi iki nianaé.

²⁶ Loko lo kemekago, monó zagusave napa gizapa ve nenémo pilisi ve kelémoko vike aposoloma kipilitunimóza ha vejenalite gehanitunú lipili hilikatave liki kehelele vizekago, hana ikisi kilímiki amó. ²⁷ Kilímiki iake monó kansoletini holúikú kilími milikago niago, guguni giziaká vetini ve napámo láa loko lo kimimó: ²⁸* Leza nene ámina vémini agulizá iki li kimi kimi amilo loko lo lekememuhá nehe, olo. Lekeza pelevesava ziake, nene gakó nene Zelusale numutoka li hutilí ikave. Lá iake, aí apili helemómámini lihima nene leli lumupiló molatune liki nilahe. ²⁹ Loko lokago, Pitá ave aposolo lugáa kezagi anotó aliki láa liki li amemó: Vegenalitari gako gele aleoko Ómasímini gako gele ahuloakala nomive. ³⁰ Lekeza Izesuni nene zohota zaló apili hilikago, avotegini Ómasímo alémo otekago otimó neve. ³¹ Ómasímo Isilae vejená lekelisi likigika ali viligikiko lihimatini apasoleketative loko ámina ve nene agulizaki vele itó lugutó vizeaká vema alémo etó oake, galegutí alémo otekago, Ómasímini amatoka noive. ³² Lá okago, Ómasímini gako gili aliaká niamoláa kemeaká noi Sikalahulímó itó lezagi ángoko gelekunike ámina gako lo lekemeaká nune, loko lo kimimó.

³³ Loko lo kemekago, giliake, kizapaló golesa molokago, aposolo kipili hilinigi li hukamóza, ³⁴ Zuta vetini kansolegutí Palisaio monó ve makó minamó, agulizá Gamalielé. Áisi nene Mosé lo hukoko li gakó lainim-okimikago vejenalite ángi lamaná a ve minamó. Áisi nene oteake aposoloma kilími hetó itave loko lokago, aposolo keza olíi hetó limiki niago, ³⁵ agivelagini láa loko lo kimimó: Isilae vese, lekeza imane vemú gili hee liiki netá matá iktalo. ³⁶ Gozapá ve makó minamó, agulizá Teutá ave loko mina vemámo nugulizaki ve napa nouve loko lokago, ve 400 aitoka gímizemóza, alika nene Teutoni apili ahulikago, vejená aitoka gímizemoláa kimisili ahulikago, hutilí iki viake apí a hoza nene ahulamó. ³⁷ Itó alika nene Galilaia mikasigutí ve makó agulizá Zutá eza lugulizá aliaká a gamenaló nene oteake, vejená gala vizeko ale goí ike lova mogoka lígo, lova apí amóza, ámina ve nene apili ahulikago, izegipa agunamotamola hutilí iki vamó neve. ³⁸ Nenemú gako imane lo líkimitoze, gillilo. Lekeza imane ve ahulikimikiko hanuva minatave. Keza gakó akó liki hoza nalemó nene kezáini kagata gilíki nalitamó nene, gopa oko haha inogo ive. ³⁹ Itó Ómasímo hize lé oketago nalitamó nene, lekeza Ómasímini hozava ali golesa itiki lova ali amikatave loko loú noko likipilinogo ive. Nenemú lakagata aleko noluve.

⁴⁰ Loko lo kemekago, keza gili aliake aposoloma kilímiki itiake segi nogosanitunú kipiliake, Izesuni agulizá nene goha aveté iki vejená li kememítave liki li hukikimiake kimiselemó. ⁴¹ Kimisilikago, nivake, Guivahanimule loko lovoza hili netá aliki lepelemóza, Ómasímo nenemú gilimó etokave liki liake, kogoliza viziki kansoletini kovogisalokatí limiake vamó. ⁴² Vake, gamena gamena monó zagusave napagú itó numúikú nene gologí oletative loko lo mololeta ve Izesuni gako lamaná ahulamake miní amiki li kimi kimi iki minamó.

6

Monó ve seven kilími etó amó

¹ Gamena nene zupa Izesuni vejenala zuha hizi hutilí niago, keikutí Zuta vejená makó Kiliki gakokutí liaká a ve nenete getó venalitari nosánetá nene gamena gamena gona miliki kememóma vo alemikumule liki Zuta gakokó liaká a ve nene gahá kememó. ² Lá ikago, aposolo 12 keza Izesuni vejenala zuha sele li kimiaké láa liki li kememó: Leza Ómasímini gako lo utó aminake lugupémíni hozagó alesá etaminogo ive. ³ Nenemú ligivetegita, lekeza lekelí holutikutí ve 7-a gotóini lamanaki itó Ómasímini Sikalahuki kigikagú mino vai oko neiko vejenalite ángi lamaná iaká nia ve kilími etó ikiko, leza ámina hoza kemekuko alitaze. ⁴ Lá ikiko leza nene Ómasi agepoka loaká itó monola loaká hoza goselekaselé aminake aleko minatune. ⁵ Liki likago, Izesuni vejenala zuha mukilite gili lamaná iake ve makó kilími etó amó, kugulizá Setepanó eza agikatunú gele alévolé oko minokago Ómasímini Sikalahú lemeko agikagú mino vai oko mina ve, itó Pilipó, itó Polokoló, itó Nikanoló, itó Timoná, itó Palamená, itó Nikolaó eza Atiokia numutotí Zuta vejenatoka monokumule liki gutá a ve. ⁶ Nene vete aposolotini kamatoka hizi letiake niago, aposolote kigizani nene gotóito milake Ómasiloka lake kilími etó amó. ⁷ Lá ikago, Ómasímini gako hutilí oko vogá ogá oko

* 5:28: Mat 27:25

minago, Izesuni vejenala zuha nene Zelusalega miní amiká amiká ago, guguni giziká a vegutí lugáate Izesuni monokumú gili alévolé amó.

Setepanoni agizató alemó

⁸ Lá okago, Ómasi eza Setepanoni hize lé omiake zámuzá mukí amekago, alévolé suni haitopaitolímíni nene vejenatoka mohona oko aleko minamó. ⁹ Lá okago, monó numuni makokutí miluma hozagutí asenini zikitamoláate Sailini apatotí itó Alesatalia apakutí itó Silisia ve itó Asia ve nenete ali nupa iake, Setepanoni pevelesava zitamóza, ¹⁰ Sikalahulímó alémo vávani okago, monó limó nenémo keí gako satamó. Satokago nene lou noko kipilímó. ¹¹ Lá okago, vejenatoka asuguná gomulusi gihikago, Setepanoni amimika lake gako láa liki lamó: Ámina ve nenémo Moseki Ómasigi alevo galatovo okago gelekune. ¹² Liki liake, numuká vejenaki olopa napagi monó mogona api-ikimiaká a vegi gala vizikago, galinali Setepanoni gohoni milake agizató aliake kansoletini numukú alímiki vamó. ¹³ Alímiki viake soza sazalo ve kilími numukú milikago, láa liki lamó: Ve imanémo lelí monó apakumú itó Mosé lo huka gakokumú alevo galatovo oko loaká noive. ¹⁴ Makó nene láa loko noligo gelenouháma neve: Nasalete numutotí ve Izesúma imane apá ale golesa okoko oko moloko oaká nouhá sunimó Mosé gizo molotó nene ale gopa napa inogo ive, liki lamó. ¹⁵ Láa liki liake ámina numukú mina ve mukitó keza Setepanoni agoka agepauka ánigamó nene, ageló makolímíni agovisagitana oko lapanalagi noigo ánigamó.

7

Setepanó ezáa mogonáamú lo kimimó

¹ Lá okago, guguni giziaká a vetini ve napa nenémo loká otake gako nilamó imane mota lamaná nilahe. ² * Loko lokago, Setepanó láa loko limó: Avónegita aménegita, gako litoze, gililo. Avoteho Avalahá eza Halana mikasiuka velesá vonamike Mesopotamia mikasiuka noigo, Ómasi eza lapanalagi vemámo utó o amike ³ láa loko lo amimó: Numuka apaka itó vejenaka zuha ahulokimioko nénisi mikasi makó gelepizitoze, neneló voko minatane. ⁴ * Loko lokago, nene gako geleake, Kalatia mikasi ahuloake, Halana mikasiuka voko minamó. Neneloka noigo, amelaho helekago, gale zemiake Ómasímo litó nene ámina mikasigutí goha gá logoko léisi nouhatoka amóma neve. ⁵ * Gá logoko okago, mikasi ma alemimóma neve. Ómasímo mikasi koma makó keké amemimóma neve. Izegipa geto molamike noigo, minoloko notike ezáagi agapilamoki miniliki itiki ámina mikasi alitave loko lo molamó. ⁶ * Ómasímo láa loko lomíake, gako makó láa loko limóma neve: Gagapilamoka keza mikasi makotoka gutá miniki gelekelé ikitiki miluma hoza aliki goselekaselé iki niko, kilisimasi 400 oko vinogo ive. ⁷ Loko loake, Ómasímo gako makó miní amike láa loko limó: Lá oko noviko, miluma hoza kiminita vejená nene goní hoza kiminogo uve. Lá okugo, gagapilamoka kimisili milikiko, imane mikasiloka iki nugulizá ali otiki gupá zinimiki minanigave, loko lo amimó. ⁸ * Láa loko lo ameake, Avalahani izegipa agapilamolatini kugupeloka Ómasímini anosa minative loko lo hukotamó. Loko lomikago, Avalahá eza gipala Isakani getoake, gamena 8-a oko vokago, ámina anosa nene agupeló molotamó. Molomikago, Isaká minoloko noitike Zakoponi getamó. Lá okago alika Zakopó nene izegipala 12-a getamó nene lelí avotege zuha minamó.

⁹ * Lá okago, avotege keza kugunáini Zosehekumú amekugú niake, aí nene Isimaeli vejenatoka salimi iki agupelotí meina alemó. Alikago, Izipi mikasiuka alímiki vikago, neneloka voko noigo, Ómasímo Zosehé noitoka minake, ¹⁰ * miluma geleko mina netá ale ahulomiake nasahilí omikago, netá mukikumú gele vevesoko minokago, Izipi mikasigú agulizaki ve Palaó ángo lamaná oake, Izipi mikasiló itó aí numuni apá izegipa agunamotamola mukitoka gizapa ve napa minative loko alémo molamó. ¹¹ * Lá okago, noigo, Izipi mikasigú itó Kenan mikasigú mukí nene gaúna napa giliki minikago, avotege ámina iki nosánetakumú vitagá amó. ¹² Minake Zakopó nene Izipi mikasiuka nosáneta neve liki lamó nene geleake, izegipala kimiselekago vamó. ¹³ * Viake atiginá ikago, goha kimiselekago goha vikago nene, Zosehé nezama noumó lae loko uvolagini nene agoka kelepezekago Palaoki ámina gako gilimó. ¹⁴ * Lá okago, Zosehé eza amelaho Zakoponi itó izegipa agunamotamolagi alo loko Izipi mikasiuka alesá molokago, ve vená 75 nene vamó. ¹⁵ *

* 7:2: Apí 12:1 * 7:4: Apí 11:31 * 7:5: Apí 12:7, 15:18, 17:8 * 7:6: Apí 15:13-14 * 7:8: Apí 17:10-14, 21:2-4, 25:26; 29:31-35:18 * 7:9: Apí 37:11; 37:28; 39:2,21 * 7:10: Apí 41:39-41 * 7:11: Apí 42:1-2 * 7:13: Apí 45:16 * 7:14: Apí 45:9-10, 17-18, 46:27 * 7:15: Apí 46:1-7, 49:33

Zakopó voko Izipi mikasiuka minake hilimó. Helekago, izegipa agapilamola avotege keza ámina iki miniake hili asú ikago, ^{16*} gonosiváini nene Sekeme apatoka aliki ake Hamoleni agapilamó zuhagutí gonosi apá Avalahá goí oko meina hizikú nene gale zikitamó.

^{17*} Lá ikago, Ómasímo Avalahani gako lo molotamó nene alévolé iti gamena alitokago, Zuta vejená keza Izipi mikasiuka hizi hutilí amó. ¹⁸ Lá iki niago, Izipi mikasiuka agulizaki ve gosohá utó imó. Áisi nene Zoseheni mogona gelemimó. ^{19*} Áisi nene avoteginimú lotoka hizike kelémo golesa galasa ike avotegini gipa getatamó nene hilitave loko leti ahuli ahuli ilo lokago, avotege ámina gipa koma leti ahuli ahuli iaká amó. ^{20*} Nene zupa nene Moseni nene izolaho getamó. Agoka agepa lamanaki utó okago, Ómasímo ániago lamaná okago, amelahini numukú ali halakipalaki iki alinago, ikani losive makole golamó. ^{21*} Alika nene apilikatave liki halá gitinago Palaoni moholámo ániagoake, gipáneve loake alémo lá imó. ²² Lá okago, Palaoni vejenala zuhate Izipi gako lí ami ami ago, gele asú oake, oko moloko ike monó anoka like alévolé oko minamó.

^{23*} Lá oko minake, kilisimasi 40 ale ahuloake, Isilae vejená nigivénegini voko ániगतove loko geleake, mulunagú lamaná geleko vimó. ²⁴ Voko ániagamó nene, Izipi ve makolímó nene Isilae ve makó napiligo ániagoake, agívelahini alémo vatí oko míluma gele minamó apasoko Izipi vema apele hilimó. ²⁵ Neza nigivénegini nene Palaoni agizakutí ipá itane loko Ómasímo nelémo etó onoimóma neve liki gili guni itahe loko Izipi vema apilimóza, keza gili hee lamamó. ²⁶ Akiake gó lago, goha nene vimó. Voko ániagamó nene, Isilae ve losi nenetosa lova nihizesigo, ániagoake alata moloketake ve loe lekeza gounama niasinazo, nanamú lova niasive. ²⁷ Loko lo kemekago, lova apí oko agívelahini apili vemámo láa loko lo amimó: Éaho gelémo gugulizaki ve loló ogimikago gonitó lelémó molanogo nolane. ²⁸ Lá okanike azozá Izipi ve makó apelenanimóma nenazo, itína ámina oko neni nipilino no lape, olo. ^{29*} Loko lokago, Mosé nene geleake ahelele vizekago golisi oko Mítiana mikasiuka voko kugupeló ve minamó. Voko minake vená aleake, gipala losima getamó.

^{30*} Minake, kilisimasi 40 goha ale ahuloake, vike mikasi gomopalaló Sinai agoka agisauka nene zamukutí ló guluma ikú ániagamó nene Guivahanímó ageló loló oake lemeko utó o amekago, ³¹ Mosé ániagoake, ininá oake nana netá utó noive loake, ániago hee hee linogo vo alitó noigo, Guivahanímíni anó lupa láa loko utó imó: ³² Neza avokage Avalahá Isaká Zakopó keí Ómasi minumó minoloko voko nominuve. Loko lokago, Mosé geleake, ininá oake luvaluvo zeko minake ahelele vizekago okenava oko ániagamimó. ³³ Lá oko noigo, Guivahanímó láa loko lo amimó: Mikasi nolisanimó nene lo hutokugo etó oko nei mikasi neve. Nenemú geí suú gololohá ozo. ³⁴ Vegenáne zuha Izipi mikasiuka niamó nene gopoguni milikitago, ive nama iki niago gelemo iteva iteva noumó mota asú okave. Itínasa nene gologí oketatove loko lemekuve. Nenemú geí nene Izipi mikasiuka nogimisułuze, vozo, loko lo amimó.

³⁵ Itó ámina ve nene éaho gelémo gugulizaki ve loló ogimikago lelémó molanogo noane liki ániagi ahula ve Moseni nene zamukutí Ómasímíni agelóma utó o amekago, Ómasímo nene gizapa ve itó kugutó vizeaká ve minative loko amisilimó. ^{36*} Amiselekago, vike vejená kelémo vike Izipi mikasiuka itó age nagamí makó agulizá golohá nagamitoka, itó mikasi gomopalaló nene alévolé suni haitopaitolímíni ale utó moloko noigo, kilisimasi 40 oko vimó. ^{37*} Ámina ve Mosé eza Isilae vejená nene Ómasímo likigivetikini holúikutí nene ezáa agepagutí gako loaká ve makó nenikitana ve alémo etó oleketanogo ive, loko lo kimimó. ^{38*} Itó avotege keza Ómasímíni monokumule liki mikasi gomopalaló alegesá iki niago, Sinai agokaloka Ómasímíni ageló itó agivelagini holúikú minake loloko vogá ogá ve minake, alévolé lemetamenímíni gako lehizeletatove loko Ómasilokatí alimó. ³⁹ Alekago, avotege keza Moseni gakola gili ahuliake, aí nene vasá ziake Izipi mikasiuka atiginá iki vinigi kigika neneloka minokago, ^{40*} Moseni uvolaho Alonani nene láa liki lí amemó: Geza avevezaha netá makó loló olimikako ámina netalímó ale goí iko leza atiginá oko Izipi mikasiuka vitune. Mosé nene Izipi mikasigutí lelemoko a ve eza voko gopa ihe itó hela hizilhe leza gelemunize. Liki liake, ^{41*} nene zupahé pulumaká akalevámíni vogunahana avevezaha netá lílí iake, guguni gizi amiki kigizanitunú lílí a netakumú kogoliza viziki minamó. ^{42*} Lá ikago Ómasímo viselekimikago, kigika gopa okago, okulumatoka hanatoaká netá mukí

* 7:16: Apí 23:2-20, 33:19, 50:7-13; Zos 24:32 * 7:17: Gá 1:7-8 * 7:19: Gá 1:10-11,22 * 7:20: Gá 2:2

* 7:21: Gá 2:3-10 * 7:23: Gá 2:11-15 * 7:29: Gá 18:3-4 * 7:30: Gá 3:1-10 * 7:36: Gá 7:3, 14:21; Nam

14:33 * 7:37: Gapo 8:15,18 * 7:38: Gá 19:1-20:17; Gapo 5:1-33 * 7:40: Gá 32:1 * 7:41: Gá 32:2-6

* 7:42: Emo 5:25-27

goliva giliki agepoka liki minamó. Nene sunimú Ómasímo li gakó nene ezáa agepagutí gakó loaká ve makolímó láa loko luhuva gizonoiómoma neve:

Isilae vejená lekeza mikasi gomopalaló minake

kilisimasi 40 oko novigo gaha nama kipiliki guguni giziaká amóza,

není makó gizi nimisá amamóma neve.

⁴³ Lekeza soza ómasilini agulizá Molokoni seli numuni komagú lilí i miliake

itó makó nene Lapanani sonohikitana makó lilí i miliake,

ámina netalímíni vogunahana goliva geleko agepoka litune liki

soza ómai netá lilí inamó nenazo,

nénisi lokugo, Papelonia apá hotoka likilímiki vinigave,

loko luhuva gizonoiómoma neve.

⁴⁴ * Mikasi gomopalaló nene Ómasímo Moseni nene monó numuni lá oko gitane loko

litokó gekago avotegitoka minamó nene seli numunigó minamó. ⁴⁵ * Lá okago, ámina

seli numuni nene omolelé amalelé iki aliki tiva tiva niago, Ómasímo ale goí ike numuká

ve kimisilikago, nivago, avotege nene iki ámina mikasi aliake ámina seli numuni nene

Zosuagegi aliki amó. Lá iki ámina numuni aliliki viva viva iki niago, agulizaki ve Tevití

utó imó. ⁴⁶ * Ómasímo Tevitini ániagamó lamaná okago, Tevití nene monó numuni nene

avolaho Zakoponi Ómasi getatove loko loká imóza, ⁴⁷ * Ómasímo géneka loake gipaka Salomó

genetative loko gele amekago eza Ómasímíni numuni getamó. ⁴⁸ Lá imóza, okulumakú

ve napa nene vejenalite ge numukú nene minoko aleko osá amive. Nenémíni gakola

Ómasímíni agepagutí gakó loaká ve makolímó láa loko luhuva gizamóma neve:

⁴⁹ * Guivahanímó láa loko nolive:

Okulumá nene není numuni apá neve.

Itó mikasiuka nene nigisa liso minuke gizapa oaká nouve.

Lá oaká nounazo, numuni nanáminiki ginimikiko etative.

Itó hí holomaló navasú vizeko minatove.

⁵⁰ Neza nigizanitunú okulumakí mikasigi netá mukí kelémo utó okumóma neve,

loko luhuva gizamóma neve.

⁵¹ * Gínikaha golesa lekeza likigika lakagata koló amimó neneta, nénisi negopa, lekelisi

nene avotike iki miliki amómáminiki niminake, Ómasímíni Sikalahú nene lova ali amiaká

niave. ⁵² Avotike Ómasímíni agepagutí gakó liaká a ve gopoguni milikitamiki asenini

zikitamó nehe. Ma nomive. Mosé itó ve heeváa utó itive liki gakó li miliki la ve lugáagi

nene kipili asú ikago, minoko lekelisi ámina ve heeváa nene utó okago amimí iki alímiki

viake apilikago hilimóma neve. ⁵³ Ómasímíni ageló nenete Ómasímo lo huka gakóma Moseni

amemó nene lekelitoka anitekamóza, lekelisi ámina gakó aliake gizapa iki gili alisá amave.

Setepanoni gehanitunú apilikago hilimó

⁵⁴ Setepanó láa loko lo kemekago, giliake, mulúikú golesa okago, kizapaló golesa

molamóza, ⁵⁵ Setepanó nene Ómasímíni Sikalahulímó lemeko agikagú mino vaí okago,

ániago okulumakuka moloake, Ómasímíni lapaná nego itó Izesú eza Ómasímíni amatoka

noigo ániagoake láa loko limó: ⁵⁶ Neza okulumá koló okago ániagamó nene Ómasilokatí limi

ve gihila Ómasímíni amatoka noigo ániagokuve. ⁵⁷ Loko lokago, keza kagataló hitinake

valala ziki hitimiake víki anukemó. ⁵⁸ Anukiake ahelukulú iliki vake alími númaseloka

miliake gehanitunú apilínigi goláa vizakiake, gosohá ve makó agulizá Sauloni agisauka

milamó. ⁵⁹ Lá iake Setepanoni nene gehanitunú napelego, hilingo noike Ómasiloka nolike

Guivahani Izesúnegamaka, není sikalahú alezo. ⁶⁰ Loko loake, alapusa hizeake sele loko

limó: Guivahani geza imane lihimáini ahuloketozo. Loko loake, hilimó. Apili hilikago,

Sauló nene mulunaú lamaná gilimó.

8

Sauló monó gele vejená gopoguni moloketamó

¹⁻² Setepanoni apili hilikago, monó ve lugáa keza Setepanoni ive nama goha itiki gale

zitamó. Ámina zupa nene Zelusale numutoka monó gele vejená apí iki gopoguni napa

milikitamó. Milikimikago hutilí iki nivake Zutaia mikasiuka itó Samalia mikasiuka vi asú

ikago, aposoloma kezáikó Zelusalega minamó. ³ * Lá niago, Sauló nene monó gele vejená

* 7:44: Gá 25:9,40 * 7:45: Zos 3:14-17 * 7:46: 2 Sam 7:1-16; 1 Iki 17:1-14 * 7:47: 1 Kug 6:1-38 * 7:49:

Isa 66:1-2 * 7:51: Isa 63:10 * 8:3: Apo 22:4-5, 26:9-11

lova ale kimike numúikú iteká lemeká noike ve vená gelelehá oloko leme leme ike nagá numukú ahuloketomo vimó.

Samalia mikasiuka monó gako li kimimi vamó

⁴ Lá noigo, hutilí i va vevenámate Ómasímíni gako li kimi kimi iki mihina iki minamó. ⁵ Minake, Pilipó nene Samalia apalímíni taoni napaló lomoko anitike Ómasímo gologí oletative loko lo mololeta ve Izesuní gako lo keme keme oko minamó. ⁶ Lo kemekago, vevená mukilite Pilipó lo kimi gako gili hamó iki amegesaló miliake, Pilipó alévolé suni haitopaitolímíni loló ígo ánígamó. ⁷ Lá noike vevenalitíni kígikagú holosi golesa minamoláa kepeleko kimisele ahulokago, gopaga liki vamó. Itó gepili napili itó genisi vevená mukí kelémo zokamó. ⁸ Lá okago ámina apakú vevená keza kogoliza vizemó.

⁹ Lá niago, ámina taoniló ve makó minamó, agulizá Saimon. Áisi gamena hána soza saza lusa geko minake, neza nugulizaki ve nouve like Samalia vevená mukí kogoka vizeaká imó. ¹⁰ Lá noigo, iti minamó limi minamó keza gelemó lamaná okago, aikumú nene Ómasímo zámuza amekago, netá matá loló okago gihila zeaká noive liki liaká amó. ¹¹ Lá iake, gamena hána aí avevezaha netakumú sigaga limiake, aí gako gili aliake aitoka viki gímizemó. ¹² Lá iki niago, Pilipó eza Ómasímíni gasovaló minoakalímíni gako lamaná itó Izesu Kilistoni gakola lo kemekago, gili alévolé iake, ve vená mukí nene monó nagamí hilamó. ¹³ Lá ikago, Saimon eza ámina oko monó gele alévolé oake nagamí holoake Pilipotoka voko gímizekago, Pilipó golivagi netá haitopaitó ale utó okago, ángoake sigaga sagaga loko minamó.

¹⁴ Itó aposolomate Samalia vevenalite Ómasímíni gako gili alemó nene gilikago, Zelusalegati nene Pitaki Zonikí áminaloka kimisilikago vasimó. ¹⁵⁻¹⁶ Neneloka anitikasike ángasimó nene Izesuní agulizatokó monó nagamí hilinamóza, Ómasímíni Sikalahú nene monó nagamí hila vevenatoka limitive liki Ómasiloka linamamó nenazo, Sikalahú nene keitoka vevesá lememigo hanuva niago ángasimó. ¹⁷ Lá okago, aposolo keza gotóitó kígizani milikasigo, Sikalahú nene keitoka limimó. ¹⁸ Lá okago, Saimon nene ángoake, keitoka moni alítáíhe loko aleko vike, ¹⁹ ve makolímíni gotolaló nigizani molokugo Sikalahú limitive liki zámuza lekelitoka nekoma makó nimilizo. ²⁰ Loko lo kemekago, Pitá láa loko lo amimó: Ómasímíni zámuza hanuva lemeaká netá nemóza géisi monitunú meina hizitove loko nolape. Nenemú geza monikagi voko lokú latila inogo ane. ²¹ Ómasímo géi gígika ánígamó nene monó nominazo, monó hoza nalusimó nene aleminogo ane. ²² Golesa netaka ale ahulokoko gígika ale viligoko Guivahanímó gígikatunú netá golesa alítove loko nogeleni netá ahulogotative loko amuza moloko aitoka lozo. ²³ Gígikagú golesa netá ekesalagí minoake gelémo golesa okago gelekuve. ²⁴ Loko lokago, Saimon nene nenikumule liki nilasi netá nenitoka utó amítive liki Ómasiloka lilizo, loko lo kimimó.

²⁵ Aposolo nenetosa Guivahanímíni gako liki Guivahani oko moloko i gako li kimikasike, Zelusalega atiginá iki nívasike Samalia apá mukitoka nene gako lamaná li kimi kimi iki mihina asimó.

Pilipoko Etiopia mikasigutí agulizaki vego

²⁶ Lá niasigo, Guivahanímíni ageló makolímó Piliponi láa loko lo amimó: Geza Zelusale numutoka ahulokoko ezega agilikaloka Gaza apatoka lomo noi gapoló mikasi gomopalaloka nene lomoko vozo. ²⁷ Loko lo amekago, Pilipó nene otake lomoko vimó. Novigo, Etiopia mikasigutí agulizaki ve makó minamó. Eza Etiopia vevenalitíni agulizaki vená napa Kataké ave liki liaká a vená nene gelekelé otoko minake aí moniló gizapa otoko minoaká imó. Eza Zelusalega Ómasímíni monó linogo iteake, ²⁸ atiginá oko nolimike hosi izate gelelehá iaká a kaligú iteake novike, Ómasímíni agepagutí gako loaká ve Isaiá luhuva giza gako nagatago, ²⁹ Sikalahulímó Piliponi nene voko kali volane vo agupeló vozo. ³⁰ Loko lokago, Pilipó nene ololu loko áminaloka vimó. Vike Isaiá giza gako nagatago geleake loká otake gako nagatanimómámíni mogonáa gelenape. ³¹ Loko lokago, ve makolímó lo utó oko lo nememitimó nene, mogonáa nana oko gilitove. Loko loake, imanegú iteko minoko lo nimítane loko Piliponi lo amekago, kaligú itekago, makó minasimó. ³² Lá niasigo monó gotolagutí gata gako lá oko minamó:

Sipsip iza kipilínigí alilíkí nívago zohenené lisá amave.

Sipsip izatíní zopova nihukago gopaga lisá amave.

Ezagi ámináminoko géneka loko gopaga lamive.

³³ Míluma netá alimiake avozagí netá lílí imiake

aí lihima nomító hanuvamú goní hoza amemole.

Mikasigú minoko aleko i gamena nene hukitamó nenazo,

* 8:32: Isa 53:7-8

oko moloko noigo ániġi mina veġenaliġini lihimáini nene ve makolimo gato asú aminogo ive.

³⁴ Loko mina ġakó nene gatoake, aġulizaki vemámo Piliponi láa loko loká otamó: Geza lo nemezo, ġilitoze. Ómasímini agepagutí ġakó loaká vemámo éahikumú nolive. Ezámú nolihé itó ve makokumú nolive. ³⁵ Loko lokago, Pilipó nene ámina monó gotolaú ġakó apí oko loloko vike Izesuni monó ġakó nene miní ameko lo utó oko lo amimó. ³⁶⁻³⁷ Lá ikasike víki nagamitó anitesimó. Anitikasike aġulizaki vemámo láa loko limó: Ániġozo. Nagamí imane nenazo, hize lí oġetati netá nomikoma monó nagamí holonetatane loko noluve. ³⁸ Loko loake, hosi izama pasimozo lokago, pasimikasike, Pilipoki aġulizaki veġi keza nagamikú lemesimó. Lemesike Pilipó nene nagamí holotamó. ³⁹ Lá ikasike nagamikutí itesimó. Itikasigo, Guivahanímini Sikalahú nenémo Piliponi alémoko vokago, aġulizaki vemámo goha aí ániġamimóza, ġapoló novike aġoliza vizitímo Pilipó legeso ikumú nene miluma ġelemimó. ⁴⁰ Itó Pilipó nene ġalinali Azoto numutoka nouve loko ġeleake, monó ġakó nene numutó namató lo keme keme oko vike Sisalia numutoka anitimó.

9

Sauló aġika ale viligamó

(Apo 22:1-16; 26:12-18)

¹ Lá noigo, Sauló eza Guivahanímini veġenala zuha kipilinogo lovaga lo kimike ġuguni ġiziaká a vetini ve napa noitoka vike láa loko lo amimó: ² Izesú ví ġapoló amegesaló miliki vína veġená vehe venape nániginake kalapusi kemeko kelémo-loko Zelusale numutoka atove loko luhuva netá ġizokoko nemekako nene aleko vinake Tamasiko numutoka monó numukú ġizapa veġená kimitove loko noluve. ³ Loko lokago, luhuva netá ġizoko amekago, aleko Tamasiko numutoka vimó. Voko ámina apá ale alitokago, okulumakutí lapaná ġalinali aitoka limike hizekago, ⁴ mikasiġú pou loko akoake ġakó makó lá oko ġilimó: Saulo, Saulo, nanamú ġopoguni nomolonetane. ⁵ Loko lokago, eza Guivahani ġeza éaġama nolane loko lokago, eza lo amike limó: ġopoguni molonimiaká noani ve neza Izesunama noluve. ⁶ Otezo, taoni napagú itekako, netá matá loló itanimó nenémini ġakola lí ġiminigi aze, oteoko aló tovozo. ⁷ Loko lokago, Sauloki makó va veġenalite veġenaláa aġupeló ániġamamóza, ġakola ligo anoláaġo ġiliake keġepa ġahava nomigo minamó. ⁸ Lá okago, Sauló eza oteake ániġamó aġómula mota ġolesa okago, netá matá ániġamimó. Lá oko ániġamigo, veġenala zuhate aġizató aliki alími Tamasiko numutoka vamó. ⁹ Lá ikago, neneloka ġamena losive makole nene aġómula pulusamigo nosánétaki nagamiki namike, hanuva ako minamó.

¹⁰ Lá okago, Tamasiko numutoka nene Izesuni ġelekelé veva makó minamó, aġulizá Ananiá. Guivahanímo vamotoka sele lokago, eza Guivahanínemaka, imane nouve lokago, ¹¹ Guivahanímo miní ameko láa loko lo amimó: Geza otekoko ġapo makó aġulizá hee lo mina ġapoló voko Zutani numukú iteko Taliso numutotí ve makó aġulizá Sauló loko noi vemú nene vitagá oko ániġozo. Eza Ómasiloka agepoka loko noive. ¹² Áisi nene vamokitana netá lá oko ániġokave. Ve makó aġulizá Ananiá ave loko noi vémo numunagú iteake goha aġómula ġoloutative loko aġizani nene gotolaló moloko Ómasiloka noligo ániġoake Ómasiloka nolive. ¹³ Loko lo amekago, Ananiá láa loko limó: Guivahanínemaka, ámina vemú ġakola aveté iaká niago ġelenou vemú nolanimae. Áisi nene Zelusale numutoka veġenaka zuhama kelémo ġolesa palasa oaká noive. ¹⁴ Itó imaneloka ġuguni ġiziaká a ve napa nenete ġeí ġugulizá alina veġená nene naġ zeko kelémoko Zelusaleġa naġa numukú itike Sauloni líki litina vema nena. ¹⁵ Loko lokago, Guivahanímo láa loko lamoko hanuva vozo loko limó. Ámina ve nenémo nigizani luhuva nene hetoka veġenaki ġugulizaki ve napagi Isilae veġenaki keitoka lole ale oko minative loko alémo etó okuve. ¹⁶ Lá noiko nénisi nene nugulizakumule loko miluma netałimímini amupiló iteko minative loko alapizinogo uve. ¹⁷ Loko lo amekago, Ananiá nene vike Zutani numunagú vo aniteake numukú itike Sauloni ániġoake aġizani nene gotolaló moloake Sauló nigivénega, ġapoló noako Guivahani Izesú utó o ġimi vemámo goha ġoġómula ġoloutokiko Ómasímini Sikalahú nene lemeko ġiġikagú mino vaí itive loko nimiselekago nouve. ¹⁸ Loko noli agepagi ġalavizakitana netá nene aġómulaġutí alemó zekago, aġómula ġoloutokago oteake monó nagamí holamó. ¹⁹ Holokago, nosánétati noake amuza goha molamó.

Sauló Tamasiko apatoka monó ġakó lo kimimó

Lá oake, Sauló nene Izesuni veġenala zuhagi ġamena ġaġasó Tamasiko numutoka nominake, ²⁰ litá oko Zuta vetini monó numukú iteko Izesuni ġakola like Izesú nene lamaná Ómasímini ġipala noive. ²¹ Loko lo kemekago, ámina ġakó ġele veġená mukilite láa líki lamó: Zelusale numutoka ámina aġulizá noli ve amegesaló mila veġená kelémo ġolesa ġalasa i

vema nehe. Áisi ámina oko imaneloka nagá kemeko kelémo-loko Zelusale numutoka guguni giziaaká a ve napa niatoka vinogo noamóma neve. Nana oake ale noviligave. ²² Liki kagata losi nigeleke lamóza, Sauló nene amuza moloko vova vova oko minake Izesú nene gologí oletative loko lo mololeta vema noive loko Tamasiko numutoka Zuta ve minamoláa ale guni oko lo kemekago, kegepa gahava nomigo minamó.

Apilinigí niago Sauló golisi vimó

²³⁻²⁴ * Lá iake Zuta vete Sauloni apili hilinigi li hukiaike, únaká neteká numuni gateté nene gohoni gohoni nomilago, Sauló nene gakó geleake lokago, ²⁵ vevenala zuhate nene holugú gosúveha makó aliage lohusi iake áminagú Sauloni ahulimiage geisa hetoka ahelí i ahulikago, lemeage mikasi makotoka golisi vimó.

Sauló Zelusalega anitimó

²⁶ Alike Sauló vike Zelusalega aniteage Izesuni vevenala zuhaloka miní amitove lokago, Izesuni izegipala loló mí nene gili guni amake aikumú kehelele vizimó. ²⁷ Lá okago, Panapasí nene ale gímizeage alémo-loko aposolo niatoka vike Sauló nene gapoló Guivahani ániaga gakó itó Guivahanimo lo ami gakó itó Tamasiko numutoka Izesuni gakola ale akutoko lo kimi gakó nene aveté oko lo kemekago, giliake ²⁸ kezagi Zelusale numutoka miniki aliki amó. ²⁹ Lá ake, Sauló eza Izesuni gakola nene alegesá legemigo vevená lo kemeaká imó. Lá oake, ezagi Zuta ve lugáa Kiliki gakokutí liaká a vevenaki monó ligili hagili ake pelevesa ziake ámina ve nenete Sauloni apele hilitune likago, ³⁰ agive keza giliake, alímiki Sisalia apatoka limiki ahulimikago, eza vike ezáa gotó apatoka Taliso numutoka anitimó. ³¹ Lá okago, monó gele vevená Zutaia itó Galilaia itó Samalia mikasiuka minamoláaloka nene nonagá iki minamó. Hulu utó okago minake, Ómasímo zámuza kemekago, gakola gili aliage, némini manámini amake Ómasímini Sikalahulímo hize lé okimikago, hizi hutilí iki minamó.

Pitá Aeniasini alémo zokamó.

³² Pitá nene Izesuni vevenala zuha ániaganogo mohona oko vike, Lita numutoka lomo voko anitimó. ³³ Aniteage, neneloka ve makó ániagamó, agulizá Aeniasí. Áisi ve gepili loake, holomaló akonoigo, kilisimasi 8-ía oko vimó. ³⁴ Lá okago, Pitá láa loko lo amimó: Aeniasizo, Izesu Kilistó gelémo nozokaze, oteoko, avilisaka gakezo. Loko li agepagí oteage avilisalagi gakeko aleko vimó. ³⁵ Lá okago, Lita numutoka itó Salona numutoka nia vevená mukilite ániagiage kigika ali viligiage, Guivahaniloka viki gímizemó.

Tolokasini heleneikutí alémo otimó

³⁶ Lá ikago, Zopa numutoka Izesuni vevenala zuhagutí vená makó minamó, agulizá Tapitá, itó Kiliki gakokutí nene agulizá Tolokasí. Eza netá gihila mukí loló ike vevená ámemena ámamana nasahilí oketoko minamó. ³⁷ Lá oake, nene gamenaló netá makó avisekago hilimó. Helekago, gonosiváa nene nagamí ziake, aliki itiki numuni amupiló makó ginakú nene ahulamó. ³⁸ Lá amó nene Lita numuni nene Zopa numutotí alitó nego, Izesuni vevenala zuha keza Pitáma Litaga noive lamó giliake, ve lositá kimisilikago, áminaloka vasimó. Vasike Pitani nene voká liki gezagi litá oko lelí numutoka vitune loko nolusive. ³⁹ Liki li amikasigo, Pitagegi makó vamó. Viki gonosima milinakú nene alímiki itémó. Iteko ániagamó nene, getokó getokó ali nupa iake ive nama ake, Tolokasí nene agómulagi minake gó haitopaitolímimi akotoketamó nene alapizi asú amó. ⁴⁰ Lá amóza, Pitá nene kimisele hetoka oake alapusa hizike Ómasiloka limó. Numuna lo asú oake, gonosima agovisa o amike Tapitazo, geza otemane. Loko lokago, agómula goloutoake, Pitani ániagoake, ote minamó. ⁴¹ Noigo, Pitá nene agizakú aleko alémo otimó. Lá oake, vená getoki Izesunimú gili alévolé a vevená lugáagi sele lo kemekago, itiki ániagamó nene heleneikutí oteage noigo ániagamó. ⁴² Lá ikago, nenémini gakola nene Zopa numutoka hutilí oko vokago, mukí vevenalite Guivahanimú gili alévolé amó. ⁴³ Lá ikago, Pitá nene ve makó pulumaká iza galupava ale lamanatamaná oaká i ve Saimoni numukú voko minamó.

10

Pitako Koneliasiko

¹ Sisalia numutoka ami vetini gizapa ve makó minamó, agulizá Koneliasí. Eza Italia mikasigutí ami ve 100 keí gizapa véini minamó. ² Eza Ómasimú alévolé oko geleko minoaká i ve monó gizapa ve minake, izegipa agunalagi Ómasi geké litiki minake, Zuta ve ámemena hize lé oketoko minake, Ómasiloka gamena gamena loko minamó. ³ Koneliasí eza nenéminoko minokago, gamena makó zupa nene ho ale zohota noigo, Ómasímini ageló makolímó vamotoka agulizá oko sele noligo, eza ániago hee loko ániagamó. ⁴ Gisili hizeko

* 9:23-24: 2 Koli 11:32-33

ánigoake, ininá oake Guivahanínemaka, nana ive loko lokago, áisi lo amike limó: Ómasiloka loaká ani netá itó ámemena hize lé okimiaká ani netáma Ómasiloka itekago gele lamaná okave. ⁵ Nenemú geza ve makó kimiselekako Zopaga viki ve makó Saimon agulizá gosohá nene Pitani alímiki atave. ⁶ Aí apolaho iza galupava ale lamanatamaná oaká vémini numuni age nagamí gahevaloka nekú noimóma alímiki atave. ⁷ Loko agelolimo lo ameake vokago, gelekelé izegipala losi itó ami vegutí nasahilí otoko mina ve Ómasimú alévolé oko geleko minoaká i ve nene sele loake, ⁸ gakó akó lo kemeake kimiselekago, Zopa numutoka vami.

⁹ Akiake gó lokago, vake apáma ali alitanigi ago, holisaká Pitá nene numuni amupiló ginakú iteko Ómasiloka loake, ¹⁰ gaúna olokago, avonana vizekago akonoike nosánetakumú lokago, vatá iki ali vatí nitago, agómula molatohe loko noike netá makó lá oko ángamó. ¹¹ Okulumá koló okago, netá makó lavolavo gizopa napa lohusi oake nagá alehá nene mikasigú ahelú okago nolimigo ángamó. ¹² Áminámini agikagú nene gaha nama iza gala haitopaitolímíni Zuta vegenalite namó namamó gopánapa netá nego ángamó. ¹³ Lá okago, áminagutí nene gakó makó láa loko utó imó: Pitazo, litá oko kepeleko namane. ¹⁴ Loko lokago, Pitá limó: Guivahanínemaka, lá oko nomive. Neza mosehá netá ligika ale golotuva loaká netá nene gopa nosá amuve. ¹⁵ Loko lokago, anotó aleko láa loko limó: Ómasimo loko nagamí zenei netá nene géisi ma moseminogo ane. ¹⁶ Loko lokago, ámina gakó nene gamena losive makole likasigo, litá oko lohuvagi gelelehá oko okulumakú iteko vimó.

¹⁷ Lá okago, Pitá nene nogómula molatohe loko nouke vamó itína ániyuhe loko giligo gena imó. Lá okago, noigo, Koneliasí kimisili ve keza Saimoni numunimú lokatoká iki vake, ali utó iake, gatetó minake, ¹⁸ sele liki lamó: Saimon agulizá gosohá Pitá loko ne vema imane numukú noihe. ¹⁹ Liki loká niago, Pitá eza vamotoka gosohá netá ángamó nene agata geleva geleva oko noigo, Sikalahulimo láa loko lo amimó: Ve losive makotele geikumú vitagá niave. ²⁰ Nénsi kimiselekago niaze, geza lemeko Zuta ve niagopa hetoka ve niakumú gagata losi gelemoko kezagi makó vilo. ²¹ Loko lokago, Pitá ve niatoka lemeeke nenikumú vitagá nitamó nene imane nouze, nanamú niave. ²² Loko lokago, ve keza láa liki li amemó: Ami ve 100 keí gizapa ve Koneliasí áisi agika lamanaki ve Ómasimú alévolé oko geleko minoaká i ve nene Zuta vegená mukílite ániyi lamaná nia ve noihe. Ómasimíni ageló makolimo gakó makó lo amekago eza kimiselekago, geí gelémoko aí numutoka vokuko, gegepagutí gakó lo lemekako gilitune loko noune. ²³ Liki likago, Pitá nene kelémo numunagú molokago akamó.

Akiake gó lago, Pitá nene Zopa numutokatí agivegi makó vamó. ²⁴ Viki gapoló akiake, gó lokago goha hía Sisalia numutoka anitiake, Koneliasí nene vegenala zuhagi zogovagi kelémo nupa oake kegeva iki niago, ángamó. ²⁵ Lá iake, Pitá nene numunagú itimó. Itekago, Koneliasí ake agisauka agihúna geake gupá zeko gekévaké lotamó. ²⁶ Lá omikago, Pitá alémo oteake lá amoko otezo, neza nene vegená nouve. ²⁷ Loko lo amekago, ligili hagili ikasike, vegená mukí alegesá iki mina numukú itesike ²⁸ Pitá nene láa loko lo kimimó: Lekeza Zuta ve lelí mogona mota gilinave. Lezagi Zuta vegená niamamolagi nonagá oko apizeko minamitune liki li hukinamóma nemóza, vegená makokumú móina ve loko loketamo loko Ómasimo mogona nelepizeko lo nemekago gelekuve. ²⁹ Nenemú lekeza nenikumú sele-sele likago, gena amuke okuve. Itína sele lamó nenémíni mogonáa likiko gilitove.

³⁰ Loko lokago, Koneliasí lo amike limó: Neza sene ho ale zohota noigo, Ómasiloka noluke ángimó nene, ve makó ginegane agovisámo lapetapé oko minamó nenémo nenitoka omo anitekago, ángive. ³¹ Nánigugo láa loko lo nimíve: Koneliasizo, Ómasiloka lanimó itó vegená ámemena hize lé oketanike noanimó nene Ómasimo mota gele lamaná okave. ³² Nenemú geza vegená kimiselekago, Zopa numutoka viki Saimon agulizá gosohá Pitani alímikatave. Áisi nene apolahini numukú pulumaká iza galupava ale lamanatamaná oaká vémini numukú age nagamí gahevaloka noinogo ive. ³³ Loko lo nemekago, nenemú litá oko kimiselekago, geitoka vikago geza gakóne gelekanike okako mulúnégú lamaná gelekuve. Itínasa nene Guivahanímo logeta gakó nene lokako gilitune loko Ómasimíni avogisaló alegesá oko imane noune.

Pitá Koneliasini numukú monó lo kimimó

³⁴ * Loko lo amekago, Pitá láa loko limó: Ómasimo mukí vegená lelí lugupelokamú giligo iteká lemeká osá amive. Nene mota gelenouve. ³⁵ Numutó namató vegenalite Ómasimú goliva giliki etati netá aliki minata vegená mukikumú giligo hamó lelegitokó neve. ³⁶ Isilae veganatoka gakó lamaná amisilimó nene lekeza mota gilinave. Izesu Kilistó eza vegená mukilitini Guivahani noi vemú gelekuko ligikagú hulu iti gakó nene, ³⁷ Zoni apí oko monó nagamí hilatave loko lo utó oko lo kemekago, Zutaia mikasiloka li hutilí amóma neve.

* 10:34: Gapo 10:17

³⁸ Itó Ómasímo eza Sikalahula amiselekago, Nasaleta numutotí ve Izesuni amatoka minake zámua amekago, Ómasímo alémo vatí igo, Izesú nene mohona mohona ike hoza gihila alike Satá kelémo golesa galasa oko minoaká i vegená kelémo lamanatamaná oko mina gakó nene lekeza mota gilinave. ³⁹ Itó Zuta ve lelí mikasiukagi itó Zelusale numutokagi oko moloko ike alimó nene ángíko gelekune. Lá onouko, zohota zaló apilikago hilimóza, ⁴⁰ heleake noigo, gamena losive makole oko vokago, Ómasímo galegutí goha alémo otimó. Alémo oteake alémo utó molake lelepizigo, ángíonouháma neve. ⁴¹ Muki vegenalite Izesuni ángígamamóza, heleneikutí oteake ezagi apiziki gitigiki niki miniaká a vegená Ómasímo lelémo etó i vegenaláagó leza ángíonouháma neve. ⁴² Itó Ómasímo lo molató gipala Izesú nene logómulagi vegenakí hele vegenakí gona mololetati ve loló i gakó nene vegená li utó iki li kimitave loko Ómasímo loletonoimóma neve. ⁴³ Ómasímíni agepagutí gakó liaká a ve mukilite ámina vémini gakoláa luhuva gizinamó nene lá oko neve: Aikumú gili alévolé ita vegená nene Ómasímo Izesukumule loko lihimáini ahuloketanogo ive, loko limó.

Ómasímíni Sikalahú hetoka vegenató limimó

⁴⁴ Pitá láa loko noli agepagi giliki mína vegenatoka Ómasímíni Sikalahú limimó. ⁴⁵ Lá oko limimó nene Ómasímo Sikalahú nene hetoka vegenatokagi lehizekimikago, ⁴⁶ haitopaitó konokutí liki Ómasi agepoka nilago, giliake Zuta vegenakutí Izesukumú gili alévolé a ve Pitakí makó a vete sigaga likitamó. Lá ikago, Pitá láa loko lo kimimó: ⁴⁷ Goi oko lelitoka Sikalahú limimó ámina oko imane hetoka vegenatoka lemekave. Nenemú monó nagamí holoketamitunimó nene etaminogo ive. ⁴⁸ Loko loake, lo kemekago, Izesu Kilistoni agulizató kilími mílake monó nagamí hilikitamó. Hilikimiaké, Pitá nene gamena lughá kezagi minoko aleko itive liki likago, makó minamó.

11

Pitá Zelusale numutoka gakó aveté oko lo kimimó

¹ Lá okago, hetoka vegenalite Ómasímíni gakotó miní ame gakó nene puu loko vokago, aposolo lugáagi kígíve Zutaia mikasiuka minamoláagi keza gelemó. ² Nenemú Pitá nene Zelusalega atiginá oko tovokago, Zuta vegenakutí Izesuni nagá minamoláate aikumú gelemó gena okago, gahá nameke, ³ láa liki li amemó: Geza nanamú Ómasímíni anosa kugupeloka minami vegenatoka voko kígizakutí nosá noaká noane. ⁴ Liki likago, Pitá nene Koneliasitoka utó i gakó nene mogonagutí apí oko ale mesamá oko lo kimike limó:

⁵ Goi oko neza Zopa numutoka Ómasiloka loko nougo, novonana vizekago, vamó netakutí lá oko ángíumó: Netá makó lavolavo napagitana nene lohuvagi nekisaloka nagá aliaké okulumakutí ahelú ikago lemeko nenitoka anitimó. ⁶ Anitekago, ángí gísili hizéko ángíumó nene, agikagú gaha nama iza gala haitopaitolímini agisa agizani nemó nomimó nego ángíumó. ⁷ Lá okago, nenitoka gakó láa loko anitimó: Pitazo, otekoko kepeleko nozo. ⁸ Loko lokago, neza láa loko lumó: Guivahanínemaka lá oko nomive. Neza ligiká ale golutuva loaká netá nene gopa nosá amuve. ⁹ Loko lokugo, okulumakutí Ómasímo gakó makó miní ameko láa loko limó: Ómasímo loko nagamí zenei netá nene géisi ma moseminogo ane. ¹⁰ Loko gamena losive makole nene ámina gakó lokusigo, gelelehá oko okulumakú iteko vimó. ¹¹ Ma gilínagalo. Ámina netá asú noigo, áminasitó Sisalia numutokatí ve losive makole lélisi nouhatoka alesa iki anitemó. ¹² Anitikago, Sikalahulímo láa loko lo nimimó: Geza ámina vegi hetoka ve niakumule loko makó vinogoma gena givisemino. Loko lokago, kígíve 6-a kezagi vunike ámina ve kimisili vémini numukú itekuko, ¹³ gakola láa loko lo limimó: Není numukú agelolímo iteko utó oake geza ve makó kimiselekako Zopa numutoka víki Saimon agulizá makó Pitá ave loko noi ve alímiki ikiko, ¹⁴ gezagi izegipa gugunamotamoki Ómasímo lukugutó vizití gakó lo lekemekiko, lamaná íngíave, loko lo nimimó. ¹⁵ Nene gakó lo nemekago, monó nene apí oko lo nokumugo, Ómasímíni Sikalahú goi oko lelitoka limimómáminoko keitoka limimó. ¹⁶ * Lemekago, ángíouke, Guivahanímo Zoní nene hanuva nagamí hololeketamóza Ómasímo nene Sikalahula hololeketanogo ive loko amunaloka li gakó nene goha nagata gulumó. ¹⁷ Leza Guivahani Izesu Kilistokumú gele alévolé okuko Sikalahú lehizeletamómáminoko keitoka limimó nenazo, neza ánéámina Ómasi pelevesava zetamosala nouve. ¹⁸ Loko lo kemekago, keza giliaké, kígíkaú hulu okago, Ómasi agepoka liki láa liki lamó: Oho, Ómasi eza hetoka vegenakí kígíka ali vilígíiki alévolé kemetameki líli itave loko gapo velekímikamóma neve, liki lamó.

Atiokia numutoka gili alévolé amoláa

* 11:16: Apo 1:5

¹⁹* Setepanoni apili hilikago, Izesukumú gili alévolé a vegená nene gopoguni milikimikago, keza golisi hutlí iki vake Pínisia mikasiuka itó Saepalasi mikasi pokolaloka itó Atiokia numutoka viki Zuta vegenakó monó li kimi kimi iki minamó. ²⁰Lá niago, holúikú Saepalasi pokolagutí itó Sailini apatokatí gili alévolé amoláa lugáate nene Atiokia numutoka aniteke Guivahani Izesuni monola nene Zuta vegenaki hetoka vegená lugáagi li kememó. ²¹Li kimikago, Guivahanímo zámuza kemekago, vegená mukilite giliake kigika ali viligiake Guivahaniloka viki gímizemó. ²²Lá ikago, ámina gakó nene Zelusalega vokago, monó gele vegenalite giliake, Panapasini amisilikago, Atiokia numutoka vimó. ²³Vo aniteake, Ómasímo hize lé oketamó nene ániogoko lamaná geleake, Guivahaniloka kigika mili alévolé itave loko kogata alimó. ²⁴Panapasi nene agika lamanaki ve Sikalahú nene lemeko agikagú mino vai okago, vegená mukilite giliake, Guivahaniloka mini amemó. ²⁵Lá ikago, Panapasi eza Sauloni ániaganogo Taliso numutoka vimó. ²⁶Voko ániogake, Atiokia numutoka alémoko vokago, monó gele vegenaki ali nupa iki minikago, vegená mukí nene monó apí i kimi kimi iki niasigó, kilisimasi hamó oko vimó. Oko novigo, Atiokia numutoka Izesuni vegenala zuhamú nene Kilistoni zuhave líki apí iki kugulizá milamó.

²⁷Gamena nene zupa Ómasímini agepagutí gakó liaká ve makó nene Zelusalegatí Atiokia numutoka lemeke, ²⁸* keitokatí ve makó agulizá Agaponi nene Ómasímini Sikalahulímo alémo vávani okago, oteake, numutó namató gaúna napa hilita gakó lo utó oko lo kimimó. Lo kemekago, alika nene agulizaki ve napa Loma apatoka minamó, agulizá Kalautió nene, gizapa oketonoigo, ámina gakó nene alévolé imó. ²⁹Lá okago, Atiokia numutoka Izesuni vegenala zuhamate ámina gakó giliake, kígive Zutaia mikasiloka minamoláaloka moni mina avotigila oko ale nupa oko kimitune líki li hukiake, ³⁰ali nupa iake Panapasinigi Saulonigi nene kimikago, keza aliki viki Zelusalega monó olotiva ve nene kemesimó.

12

Zemusini apili hiliake Pitani kalapusi amemó

¹Gamena nene zupa agulizaki ve napa Heloté nene Izesuni vegenala zuha lugáa nene lova ale kimike, ²eza lokago, Zonini uvolaho Zemusini luvana hukamó. ³Lá ikago, Zuta vegenalítini monó gizapa vete gili lamaná ikago ániogake, lá itave loko lokago, Zuta vetini avóikini asenini zeketakumú gili mina holisigú Pitani nene nagá numukú alími milamó. ⁴Ámina holisi asú okiko Zuta vetini kigizakú molokugo goní imiiki apili hilitave loko geleake, agizató aleko nagá numukú alémo moloake, losive losive iki gizapa itatave loko pilisi ve 16 kelémo molamó. ⁵Lá okago, Pitá noító nene alévolé iki gizapa iki niago, Pitá nene nagá numukú akonoigo, Izesuni vegenala zuha keza Ómasiloka alévolé iki numuna nilago, te te oko minamó.

Nagá numukutí Pitani gologí otamó

⁶Lá onoiigo, Heloté eza gó lokiko Pitani nene Zuta vegenalítini kigizakú molati gamena alitokago, ámina holugú Pitani agizani lugaloka pilisi vémini agizató zemó. Lá iake akinago, gizapa ve lugáa nene gatetó gizapa iki minamó. ⁷Lá niago, Guivahanímini ageló makolímó galinali utó oake noigo, nagá numuni agikagú nene lapaná lo asú imó. Lá okago, ageló nenémo Pitani agahaisiló zeko alémo oteko litá oko otezo loko lokago, Pitá otimó nene agizakú seni nagá apasomó zekago, ⁸ageló nenémo holotakama ale zekoko gígisaló suú ale luhozo. Loko lo amekago lá okago, goha lo amike limó: Goka hánama ale luhokoko némegetoko ano. ⁹Loko lokago, agelólímo oko moloko imó nene gele guni amike vamó nániguhe loko nogilike ámegetamó. ¹⁰Lá iki limiki gateni makotó pilisi ve niago kiviligikasike gateni makotó ámina iki niago kiviligikasike, apá napaló vevegísa aenituno atagamó nene ezáa gahe segeake koló okago, limikasike gapoloka nivasike, agelóma tolova imó. ¹¹Lá okago, Pitá nene agata kolosokago, láa loko limó: Mota gelekuve. Guivahanímo ageló makó amiselekago, limike, Heloteni agizakutí itó Zuta vegenalítini gizapa vetini mukahakutí gologí onimikave.

¹²Loko Pitá nene geleake, Zoní agulizá napa nene Makí ave loko noi vémini izolaho Maliani numutó vo anitimó. Ámina numukú vegená mukí alegesá iki minake Ómasiloka líki niago, ¹³Pitá nene gatetó hoko-hoko lokago, gelekelé mohó makó agulizá Loté nene éaho hoko-hoko nolihé loko lemeko ¹⁴gatetó nene Pitani anó lupamú geleake, gahe segemike agoliza napa vizítimo ololu loko iteko Pitá nene oko gatetó noive loko lo kemekago, ¹⁵áminagú mina vegenalite giliake gígika hize lí okago nolape. Líki li amikago, áisi nene Óe, negiga lamuve, áisima gatetó noigo noluve, loko lokago, keza vogunámo noitive. ¹⁶Líki nilago, Pitá nene hoko-hoko lokogó noigo, gahe sigiake ániagamó nene Pitá noigo

ánigiake, kegepa gahava nomigo ininá amó. ¹⁷ Ininá ikago, gako lamitave loko agizanitunú avevezaha o kemeake, numukú itemike, Guivahanímo nagá numukutí gologí oko alémo hetó i gako nene aveté oko lo kemeake láa loko limó: Lekeza imane gako viki Izesui agunala Zemusini itó monó gele vegená lugáa li kimilo loake, olío hizeko apá makotoka vimó.

¹⁸ Lá okago, akiake, gó lokago, pilisi ve keza Pitakumú vitagá amó nene nagá numukú noamigo, Pitani nana itave liake, negi-nagi hizeko lova leta leta iki minamó. ¹⁹ Lá ikago, Heloté nene vitagá itave loko lokago, vitagá iha iha alími utó milamago, pilisi ve nagá numuni gizapa vema loká miká okimiake, kipili ahuli ahuli itave loko lo hukoketamó. Lá oake, Heloté nene Zutaia mikasi ahuloake Sisalia numutoka lemeko minamó.

Heloté hilimó

²⁰ Nene zupa nene Tulo vegená itó Sitona vegenakumú Heloté izapaló molokago, lova ale kimimó. Lá okago, ámina apá amelage keza Heloté noitoka imi asú iake, Heloteni gizapa veva makó agulizá Pilasitó ave loko noi ve agata aliki likago, eza agulizaki ve napamaloka voko gakoíni nene láa loko lo amimó: Keza nosáneta ale nómonó ituni gapo hukokaninazo, gelémo hulu itune liki ikave. ²¹ Loko lokago, Heloté nene gako lo kimitove loko gamena molamó nene alitokago, vegená mukí iki niago, eza kugulizaki vetini gonanalivagi gó ale luhoake, golivagi siató iteko minake, gako hána hána like gako lo kimimó. ²² Gako lo nokimigo, vegená mukilite gako napa lake vegenalitari konó lupa nomive. Ómasi makolímimi anó lupa neve. ²³ Liki likago, géneka lamike nenikumú gekévaké lamiki Ómasi hamokó geké litalo loko láa loko lamigo, Guivahanímimi ageló makolímimo galinali anitike lokago, ámina vémini agupegú ginini hizekago hilimó.

Panapasiko Sauloko

²⁴ Itó Ómasímimi gako nenémo hutilí oko puu loko mukí apatoka vimó. ²⁵ Lá okago, Panapasiko Sauloko keza Zelusalega goí iki moni kimiki kimisele hoza kememó nene ali asú ikasike Atiokia apatoka atiginá iki vinigi niasike Zoní agulizá napa Makini nene alímiki makó vamó.

13

¹ Atiokia numutoka Ómasímimi vegenala zuhatini holúikú Ómasímimi agepagutí gako liaká a vegi monó apí i kimiaká vegi minamó, kugulizá Panapasí itó Simeó agulizá makó Anupavé, itó Lukió eza Kulena apatotí ve, itó Manaé, ezagi gizapa ve Heloteki ganagana minimi niteki napa asi ve, itó Sauló. ² Gamena makó zupa monokumule liki nosáneta mosiki minake monó numukú alegesá iki numuna nilago, Sikalahulímimo gako láa loko limó: Panapasiko Sauloko keza monó hoza alitáive loko loketumó nene nenikumule liki kilími gapo ilo. ³ Loko lokago, nosáneta mosiki minake Ómasiloka lake kigizani nene gotóitó milake lusa gikimiake, monó hozaló kimsilikago vasimó.

Aposolote Saepalasi mikasi pokolagú monó li kimimi vasimó

⁴ Ómasímimi Sikalahulímimo lá okimiake kimiselekago, vasike Selusia numukú limiviki vasimó. Vi anitikasike sipigú itikasike viki Saepalasi mikasi pokolagú anitesimó. ⁵ Apá gotola Salamisi neneló viki Zuta vetini monó numukú itiki Zoní agulizá napa Makí áisi kelémo vatí igo Ómasímimi gako li utó asike li kemesimó. ⁶ Lá ikasike pokolagú mihina i asú iake Papo numutoka anitemó. Neneloka Zuta ve soza saza lusa geaká i ve soza monó lole ale ve minamó, agulizá Pala-Izesú. ⁷ Nene vémo kiapé makó Selegió Pauloni apolaho agata koloso mina veloka hoza aleko minamó. Kiapé nenémo Ómasímimi gako gilinogo Panapasiko Sauloko alesá molo kimimó. ⁸ Alesa molo kemekago, soza saza lusa geaká i vémo agulizá makó nene Elimasi eza kiapémo giliko alévolé okative loko zevo hukovo oketamó. ⁹ Lá okago, Sauló agulizá gosohá Pauló eza Sikalahulímimo lemeko agikagú mino vai oake alémo vávani igo, Elimasini gisili hize agupe oake, ¹⁰ láa loko lo amimó: Géisi nene Satani gipalamaka netá lamaná lova ale ameká ve neneka, soza saza gakolímimo gigikagú vai oko minamó geza Guivahanímimi gapo hize lí okanike ale gopa napa oaká noani netá nene nanahé ahulatane, olo. ¹¹ Nenemú imane Guivahanímimi zámuzámimi mogona ángatanize. Geza gogómula likokiko gamena makotó lapaná ángamoko minatane. Loko noli agepági agómulagú límugusi zekago, likatiká ike akaká akaká oko mohona noike nigizató alitave loko vegená sele loiaká imó. ¹² Lá okago, kiapé nenémo ámina netá utó imó nene ángoake Guivahanímimi monokumú gilimó nene goliva hizekago, gele alévolé imó.

Pauloko Panapasiko Pisitia mikasiuka Atiokia numutoka anitesimó

¹³ Lá okago, Pauló agivelagegi keza Papo apá ahuliake sipigú itiake viki viki Pamapilia mikasiuka Pelega numutoka anitemó. Neneló Zoní ahulokimiake atiginá oko Zelusalega vimó. ¹⁴ Lá okago, keza Pelega numutotí viki Pisitia mikasiuka nene Atiokia numutoka

anitesimó. Neneló niasike Zuta vetini holisigú keí monó numukú itiki niasigo, ¹⁵ keí gizapa ve keza Mosé giza gakokutiki Ómasímini agepagutí gako liaká a vete giza gakokutiki gati kemeke gati asú iake, alesa miliake láa liki li kememó: Ligivese, lelémo kii loletati gako makó likigikagú netimó nene likisiko gilitune. ¹⁶ Liki likago, Pauló oteake, legesó iki minatave loko agizanitunú avevezaha ike láa loko lo kimimó:

Isilae vese, lekezagi Ómasimú goliva giliaká nia vejená lugáa lekelí nene lo likimitoze, gililo. ¹⁷ * Isilae ve lelí Ómasi áisi nene avotege keza Izipi mikasiuka niago, kelémo napa napa igo, hizi hutilí amó. Lá ikago, zámuzalaló molo gelekélé ike nenelokati kelémoko oake, ¹⁸ * mikasi gomopalaló keikumú goselé apelemimó nene hanuva geheake nasahilí oketoloko novigo, kilisimasi 40 oko vimó. ¹⁹ * Oko novigo, Kenan mikasigú vejená mulusi 7-a kelémo tolova oake, mikasíini nene avotegini gona moloko kemekago, ali etó etó ake alemó. Lá ikago, kilisimasi 450 oko vokago, ²⁰ * Ómasi eza gizapa ve kelémo etó omo novigo, miniliki nivago, Ómasímini agepagutí gako loaká ve Samuelé utó imó. ²¹ * Utó oake mino-loko itekago, vejená keza agulizaki ve napamú loká miká ikago, Ómasimó Pezamini agapilamó keikutí Kisini gípala Sauloni alémo etó okago, kilisimasi 40-a ale nahulake gizapa oketamó. ²² * Lá okago, Ómasimó Sauloni viselemiake Tevitini nene agulizaki ve napa alémo otimó. Lá oake aí gakola láa loko limó: Zesini gípala Tevitikumú lagava gelekuké ániño mulumó. Áisi nene litotoka molatotoka oko moloko inogo ive, loko limó. ²³ Itó Ómasimó utó itive loko lo molató Tevitini agapilamola zuhagutí Isilae ve lelitoka lugutó viziti ve Izesuni amisilimó. ²⁴ * Vegená holúikú omo utó itive loko Zoní nene Isilae vejená kígika ali viligiilí monó nagamí hilatave loko lo utó oko lo kimimó. ²⁵ * Lá oake, Zonini ami hoza nene ale lutegeake láa loko lo kimimó: Gologí oletative loko lo mololeta vema noape liki loká inimiaká nia ve nene neza minamuve. Áisi nene alika nemegesa moloko ova ova noize, neza ánéamina hoza makó alemioko aí gasa gó ate akisitotó vo akohemuve. ²⁶ Nigive nagavese, Avalahani agapilamola lekezagi itó hetoka vejená lugáa Ómasimú geké limiaká nia vese, gako litoze, gililo. Lugutó viziti gako nene lelitoka molonoimóma neve. ²⁷ Zelusale numutoka kugulizaki vegi vejená lugáa mukí keza Izesuni ániño hee lamake, Ómasímini agepagutí gako liaká a vete gizi mila gako holisi zupa zupa gatoaká nouháma gili hee lamake, Izesuni apilitave liki li hukitamó. Lá ikago, Ómasímini agepagutí gako liaká a vete aikumú luhuva gizina gako nene alévolé imó. ²⁸ * Lá okago, Izesuni apilita gakokumú vitagá iake, gakola nomigo, gopa Pilatotoka viki negénegeka lago lago gele kemekago, apili helemóma neve. ²⁹ * Lá ikago, monó gotolaú aikumú luhuva gizi mila netá nene lilí i asú ikago, zohota zalotí vínasiki aliki viki gonosi matimatí geha mulikú militamóza, ³⁰ Ómasimó heleneikutí alémo otimó. ³¹ * Alémo otekago, Galilaia mikasiukatí Zelusale numutoka ezagi makó tiva vejenatoka gamena gamena utó okemeká tolova oká igo ániñiaká a vejená nenete aí gako nene lí utó iaká ve lilí iki niave. ³² Itó avotegini nene Ómasimó lehizeketatove loko lo moloketa netakumú mulutikú lamaná gilita gako láa loko lo nolukumune: Ómasimó Izesuni alémo ititove loko lí gako nenémo kagapilamó lelitoka nene mota gihila zekave. ³³ * Alémo otikumú Ómasi agepoka liká nama liká a gakokutí lakani losigú láa loko luhuva gizonoiómoma neve:

Geza nene gipáne noanize,

neza itínasa gelémo utó molokuve.

³⁴ * Itó Izesuni nene heleneikutí alémo otekago, alikaloka goha helemínogo ive. Nenemú Ómasimó láa loko lokago luhuva gizo molonoimóma neve:

Neza Tevitini lehizetatove loko lo molotu netá nene lamaná lehizeleketanogo uve.

³⁵ * Nenemú Ómasi agepoka liká nama liká a gakokutí gako makó lá oko neve:

Neza nigíka lamanakí ve nounazo,

geza lanitoka nugupéa anuva aminogo ive, loko limó.

³⁶ Tevitini mogaána mota geleká nounge. Aí nene Ómasimó hoza gako lotamó nene vejenala zuhaloka hoza aleloko vike ale asú oake hilimó. Helekago, avolagini gonosíini milikimiakakú milimikago, agupéa anuva oko gelesa imó nenazo, nugupéa anuva aminogo ive loko lí gako nene Tevititoka gihila zemimóza, ³⁷ Ómasimó alémo oti vémini agupe anuva

* **13:17:** Gá 1:7, 12:51 * **13:18:** Nam 14:34; Gapo 1:31 * **13:19:** Gapo 7:1; Zos 14:1 * **13:20:** Gon 2:16; 1 Sam 3:20 * **13:21:** 1 Sam 8:5, 10:21 * **13:22:** 1 Sam 13:14, 16:12; Age 89:20 * **13:24:** Mak 1:4 * **13:25:** Zon 1:20,27; Mat 3:11; Mak 1:7; Luk 3:16 * **13:28:** Mat 27:22-23 * **13:29:** Mat 27:57-60 * **13:31:** Apo 1:3 * **13:33:** Age 2:7 * **13:34:** Isa 55:3 * **13:35:** Age 16:10

oko gelesamimó. ³⁸ Nenemú nigive nagavese, hehe loko lo likimitoze, gililo. Ámina vémo ale utó molokamómave loko gakolimo omo lokogovisaloka noave. ³⁹ Lihimatini nagakutí nene Mosé lo hukoko li gakolimo gologí oletosá amimóza, Izesukumú gili alévolé itamó nene lihimavatini nagakutí gologí o asú oleketanogo ive. ⁴⁰ Ómasímini agepagutí gakó liaká a vete gakó makó luhuva gizinamóma nene, lekelitoka alévolé okative loko lakagata aleko lo nolukumuze, ehe, gizapa iki minalo. Láa liki luhuva gizinamóma neve:

⁴¹ * Agae, monó gili ahuliaká ve lekeza sigaga liki liki hili minalo. Lekelí gamenavatini nene hoza haitolímíni alinogo uve. Nenémíni gakola li likimikiko gilitamóza, gili vevesiki geleminigave,
liki luhuva gizinamóma neve.

⁴² Itó Pauloko Panapasiko láa liki li kimikasigo, monó numukutí limiake alika holisigú ámina gakó goha litáihe liki loká ikitamó. ⁴³ Láa liki liake, alegesakutí limiake Zuta vejená mukí itó hetoka vejená keza Zuta vetini monokumú gutá iki mína vejená kezagi makó Pauloko Panapasiko kémegetago, Ómasímini nasahilikú alévolé iki minatave liki kagata alesimó.

⁴⁴ Lá ikasigo, holisi makó alitokago, ámina apá amelage Ómasímini gakó gilínigí vóvotiki anitemó. ⁴⁵ Anitikago, Zuta vete keza ániagiake, kemekugú niake, Pauloni gakola pelevesava ziake Pauloni alívi galatívi amó. ⁴⁶ Lá ikago, Pauloko Panapasiko ali akutíki láa liki li kemesimó: Zuta ve lekelisi ató nene Ómasímini gakó ganá apí iki gilitave liki linamóma neve. Itó imane lekezetatini ahuliake alévolé lekemetamenigí itune liki lamanazo, ahulolíkimioko Zuta ve niamamoláa hetoka vejenatoka vinogo usive. ⁴⁷ * Guivahani eza nenemú nene láa loko lo letonoimóma neve:

Kugutó vizeaká gakó nene numutó namató mohona oko lo kemeloko voko mikasi nek-
isaloka vo asú itane loko nénisi hetoka vejenalitini líví minatane loko gelémo etó onoumóma neve.

⁴⁸ Liki likasigo, hetoka vejenalite giliake, mulúikú lamaná okago, Ómasímini gakokumú sigaga litamó. Lá ikago, alévolé kemetameki minatave loko Ómasímo geleake kelémo gizaká i vejená keza Izesunimú gili alévolé amó. ⁴⁹ Lá ikago, ámina apatoka Guivahanímíni gakó puu loko vo asú imó. ⁵⁰ Lá okago, Zuta vejenalite apá neneloka monó vená iti minamoláagi numuni gizapa vegi gala viziake, ali apiziake, Pauloki Panapasiki gopoguka likitake, numuni apáinigutí kímisili ahulikago, vasimó. ⁵¹ * Vinigi nivasike vahé miliki kigisagutí mumusopa hopó ahulikasike, Ikonio numutoka vasimó. ⁵² Nivasigo, Sikalahú nene lemeko Izesuni vejenala zuhatini kigikagú mino vaí okago, mulúikú agila guluma igo minamó.

14

Pauloko Panapasiko Ikonio numutoka anitesimó

¹ Lá ikago, Ikonio numutoka anitesike ámina iki Zuta vetini monó numukú itiki monó lasimó nene gihila utó imó. Lá okago, Zuta vejenaki Kiliki vejenaki mukilite Izesunimú gili alévolé amó. ² Lá amóza, Zuta vejená lugáate monó gili ahuliake, ámina numutó nene hetoka vejená gala viziake Izesuni vejenala zuhamú gili golesa itave liki kagata alemó. ³ Lá ikago, Pauloko Panapasiko neneló gamena hána minasike, Guivahaniloka leheta inasike kehelele vizemigo ali akutiki monó li kimi-kimi iki minasimó. Lá niasigo, Guivahanímó hize lé okimiaká gakolámíni mogonáa ale utó molake zamuza kemekago, golivagi netá haitopaitó alesimó. ⁴ Lá ikasigo, ámina taoni napaló vejená hizi hou líake, lugáa nene Zuta vejenatoka gímizemó, itó lugáa keza aposololoka gímizemó. ⁵ Lá ikago, alika nene hetoka vejenaki Zuta vejenaki gizapa vegi ali nupa iake aposolo alívi letivi iki gehanítunú kepele hilitune liki li hukamó. ⁶ Li huka gakó nene gilikasike, golisi iki Likaonia mikasigú Listela numutokagi Telepe numutokagi apá lugáalokagi víki, ⁷ monó gakó lamaná líli ali iki minasimó.

Listela numutoka gehanítunú Pauloni apele hilitune líki amó

⁸ Lá niasigo, Listela numutoka agisa luga luga nakeseto ví ve makó minamó. Eza nene izolaha ámináa getokago, gapo mohona osá amike húmege húmege oko minamó. ⁹ Áisi nene Pauló nene monó noligo, geleko noigo, Pauló nene gonú apeleake, minokago, Ómasímo nelémo zokative loko gele alévolé okago, Pauló nene geleake, ¹⁰ gakó napagutí like geza ote hee lokoko minozo. Loko lokago, moí oko ote hee loake gapo mohona imó. ¹¹ Lá okago, mukí vejenalite Pauló loló i netá nene ániagiake, kegepagutí gakó napa lake Likaonia gakokutí nene ómasi keza vejená lílí ikasike lelitoka limiki netá imane lílí niasive. ¹² Liki lamó nene Panapasikumú nene Kiliki vejenalitini ómai netá napa agulizá Zusí ave líki

* 13:41: Hip 1:5 * 13:47: Isa 42:6, 49:6 * 13:51: Mat 10:14

milamó, itó Pauló eza gako akó loaká imó nenazo, aikumú nene ómai netá makó agulizá Helemé ave liki milamó. ¹³ Lá ikago, taoni napa amegesaloka Zusikumule liki ge numuni minamó. Zusini guguni gizo ameká i vémo gonanalisi netá loló oake pulumaká izatini luváikú milikimiake, numuni gatetó aleloko viake, pulumaká apiliki guguni gizikitanigi niago, ¹⁴ aposolo losima Pauloko Panapasiko keza gilikasike, ininá golesa ikasike, lihima alikataze likasike, gineganéini nene hikilikasike ololu liki vejená holúikú vasike láa liki lasimó: ¹⁵ Náa veguvo, lekelisi nene nanetá naleve. Lélisi nene lekelikitana nousive. Lekelisi nene ómailini soza sazámuni netá nene lekemegeza kimiiki alévolé Ómasiloka gímiziki minatave loko imane gako lamaná lo nolukumusive. Ómasi nene okulumaki mikasigi age nagamiki itó áminagú mina netá mukí haitopaitólímuni kelémo utó i ve noive. ¹⁶ Lá noike, omolelé amalelé iliki ite gamenaloka hetoka vejená mukí gele kemekago, kigikatunú geleke haitopaitó gapo ale utó iake miniki aliki amó. ¹⁷ Lá amóza, ániago ahuloketamimó nenazo, limugusigú minamamóma neve. Aí mogonáa gilitave loko geha zelikimike golini gamena hogai gamena minumuni gamena likimigo, niva niva iki niake lokogoliza viziaká niave. ¹⁸ Liki li kimikasigo guguni gizi kiminigi amó nene hana iki ahulamó.

¹⁹ Lá ikago, neneló niasigo, Atiokia numutokatí itó Ikonio numutokatí Zuta ve aniteke mukí vejená gala vizikago, ali nupa iake Pauloni nene gehanitunú apiliake, mota hilihe liki gelelehá iliki númaseloka vamó. ²⁰ Neneló ahulimikago, akonoigo, Izesuni vejenala zuhate iki hizi vegiake niago, oteake taoni napaloka itimó. Akiake gó lokago, Panapasigegi Telepe numutoka vasimó. ²¹ Viki taoni napaloka Izesuni gako lamaná li kimikasigo, vejená mukilite gili aliake Izesuni vejenala zuha lilí amó. Lá ikago, keza asi gapoloka atiginá iki vasike, Listela numutoka Ikonio numutoka Atiokia numutoka vi anitiká limi anitiká asike, ²² Izesuni vejenala zuhate monokú alévolé iki minatave liki kagata alimi alimi mihina asike kigikagú ali etoha ikasike láa liki li kemesimó: Gasovagi netalímuni amupiló minokogó Ómasímuni avogisalo vo holatune loko loletonoimóma neve. ²³ Liki li kimikasike, monó numutó numutó ve lunáa kilími etó etó imi vasike, monokumule liki nosáneta mosiki minasike, Ómasiloka likasike Guivahanimú gili alévolé ikanazo, áisi gizapa oletetino liki Guivahanímuni agizakú ahulikitasimó.

Silia mikasiuka Atiokia numutoka atiginá iki vasimó

²⁴ Lá ikasike, Pisitia mikasi aviligikasike viki Pamapilia mikasiuka anitesimó. ²⁵ Neneló anitesike Pelega numutó nene monó li kimikasike, Atalia numutoka limiki vasimó. ²⁶ Neneloka limiki sipigú itikasike, viki Atiokia numutoka anitesimó. Neneló goí iki ámina alesí hoza lumaló viniigi niasigo, Izesuni vejenala zuhate Ómasimo nónohá zeketative liki Ómasiloka lamó. ²⁷ Itó anitesike monó gele vejenáini zuha kilími nupa ikasike, Ómasimo hize lé oketago hoza alesí gako itó hetoka vejená gahé segekimikago gili seketigí a gako nene aveté iki li kimi asú asimó. ²⁸ Lá ikasike gamena hána otigí nene Izesuni vejenala zuhagi makó minamó.

15

Zelusale numutoka monokumú alegesá amó

¹ * Zutaia mikasiukatí ve lugáa keza Atiokia numutoka lemeke Izesuni vejenala zuha Zuta ve minamamóláa láa liki li kimi-kimi iki minamó: Lekeza Mosé loleketamómáminiki lukugupeló Ómasímuni anosa milamitamó nene Ómasimo lukugutó vizeminogo ive. ² Liki lamó nene Pauloko Panapasiko gilikasike kezagi ámina vejenaki gakatunú lova napa hizemó. Lova hizikago, Zelusalega tiviiki ámina gakokumú likiko aposolo itó ve olovitate kegepagutí gakóini gilitave liki Pauloki Panapasiki ve lugáa makoki kilími etó amó. ³ Kilími etó iake, monó gele vejenalite kilími gapo miliake, nónohá zikimikago, vamó. Viki Pinisia mikasigú itó Samalia mikasigú nene Zuta vejená minamamóláate litaha netá ahuliake, monokú viki gímize gako li kimimi nivago, kigivéike mukilite giliake kogoliza viziki minamó. ⁴ Lá ikago, viki Zelusalega anitikago, monó gele vejenaki aposoligi ve oloviva napagi kogoliza vizikimikago, Ómasimo kelémo vatí igo monó hoza nalego nene gihila zi gako nene aveté iki li kememó. ⁵ Li kimi asú ikago, Palisaio monó vejenakutí Izesukumú gili alévolé a ve lugáate otiki láa liki lamó: Hetoka vetini kugupeló Ómasímuni anosa minosá itó Mosé lo hukoko li gako gele alesá neve. Lá amitamó nene monokú vaminigave.

⁶ Liki likago, aposoligi ve oloviva napagi ámina gako litune liki alegesá amó. ⁷ * Alegesá iake gako ali viligá aligá ake, Pitá nene oteake láa loko lo kimimó: Nigivénegita, hetoka ve keza gako lamaná imane není negepaguti giliiki gili alévolé itave loko holutegutí Ómasimo gozapá likigivetipina není nelémo etó imó nene mota gilinave. ⁸ * Lá okago, ligikagú

* 15:1: Liv 12:3 * 15:7: Apo 10:1-43 * 15:8: Apo 10:44

ánigoaká ve Ómasímo Zuta veđená lelitoka Sikalahú limimó ámina oko hetoka veđená nokimike nenémini mogaána lelepizimó. ⁹ Keza aí gako gili alévolé ikago, kigika nagamí zeketoko kelémo lamaná imó. Leza nagamí zeletamómáminoko kezagi nagamí zeketamó. ¹⁰ Nenemú lekeza Ómasi gimivagú miliki genavagi netá napa aleaká unimó lezagi avotegegi Moseni gako ale amegesaló moloaká netalímimi genavagi netá ale otunimó litagani uhá nene ámina oko hetoka veđená Izesuni veđenala zuhatini kumupiló molatune liki nilahe. ¹¹ Nenémini amitune. Leza láa loko geleaká nouháma neve: Guivahani Izesú eza nasahili olimike lugutó vizimó ámina oko hetoka veđenaki kugutó vizinogo ive.

¹² Loko Pitá nene lokago, alegesá a ve muki nene gahá lamake kegepa apiziake niago, Pauloko Panapasiko keza Ómasímo hozaló ve niasigo hetoka veđenatoka golvigá netá haitopaitó ale utó imó nene avetó iki li kemesimó. ¹³ Li kimi asú ikasigo, gizapa véipo Zemusí láa loko lo kimimó: Nigivénegita, gako makó litoze, gililo. ¹⁴ Ómasímo veđenala zuha lilí itave loko hetoka veđená gapo veleketake lugáa kelémo etó imó. Ámina gako nene Saimon avetó oko lo lemekago geleháma neve. ¹⁵ Ámina gako itó Ómasímimi agepagutí gako liaká a vete luhuva gizi milina gako vo milisegeko neve. Ómasímimi agepagutí gako loaká ve makolímimi luhuva gako makó láa loko neve:

¹⁶ * Zuta veđenalite monó liaká niamó nenémo Tevitini monó seli numuni hulupa ligimok-itana noigo,

nénisi minoko atiginá oko inake ámina numutagalaló agomá aleko goha ginogo uve.

¹⁷ Lá okugo, veđená lugáate Guivahanimú sele liki vitagó itave,

itó hetoka veđená nugulizá iaká nia veđená mukí áminagó itave.

¹⁸ Guivahanímimi gako nenémináa gozapakutí lo utó omo notu vémina noluve.

¹⁹ Láa liki luhuva gizinamó nenazo, neza láa loko noguluve. Hetoka veđenakutí Ómasi gili amiaká nia veđená nene genavagi netá geheketamitune. ²⁰ * Soza ómai netáini guguni gizi kimitakutí nene namiki mokoló netá alemiki nagá itata iza namiki iza golanigi namiki mosiki keké itave loko luhuva netá gizatune loko noguluve. ²¹ Ámina mosiaká netakumú nene Mosé gako mukí gizo molokago, gozapakutí avotege omolelé amalelé iki leza Zuta vetini monó numutegú holisigú holisigú Mosé lo hukoko li gako gatiki li limiaká niago geleaká nouné.

Monó kansole vetini gako

²² Láa loko Zemusí lokago, aposologi monó ve olotivagi monó amegesaló mila veđenaki mukí keza gili lamaná iake, keitokatí ve losi kilími etó amó, makó agulizá Zutá agulizá makoláa Pasapá, itó makó Sailasí eza monokú olotiva ve. Kilími etó iake, Pauloko Panapasiko kezagi Atiokia numutoka makó vitave liki kimsilí milamó. ²³ Lá niake, luhuva netá makó láa liki giziake kimikago, aliki vamó: Ligive lagavese, leza aposologi monó ve olotivagi lekeza ligive hetoka ve lugáa Atiokia numutokagi Silia mikasigú itó Silisia mikasigú numuni apá makotó niamó nene geké lo leketoko luhuva imane gizo nolukumune. ²⁴ Leza gelemuko, imanelokatí ve lugáate lekelitoka viki gako li likimiki kilími gopa ikago, gili gopa amó. ²⁵ Lá ikago, leza gelekunike alegesá okunike, ve makó kelémo etó okunike ve losi ligika kemenouni ve Panapasiko Pauloko kezagi kimiselekuko húnane nivave. ²⁶ Ámina ve lositá keza Guivahanite Izesu Kilistokumule liki kepelemitagogitana monó hoza alesimó. ²⁷ Nenemú Zutako Sailasiko kimiselekuko, viki kegepagutí ámina gako nene li likimikisiko gilínigave. ²⁸ Sikalahuki itó lezagi nene hoza genavagi lekememinake, lá okosí hoza gako loleketatune loko lonoune. ²⁹ Lekeza soza ómai netáini guguni gizi kimitakutí namilo. Itó nagá itata izagutí namilo. Itó iza golaní namilo. Itó mokoló netá alemilo. Nene netá lekemegeza amiiki mosi keké itamó nene lamaná iki minanigave. Ánesile.

³⁰ Luhuva netá láa liki gizi kimiake, kilími gapo ikago, vamó. Viki Atiokia numutoka aniteke, monó gele veđená kilími nupa iake ámina luhuva netá kememó. ³¹ Kimikago, gatiki giliake, luhuva giza gako nenémo kelémo kii lokimikago, kogoliza viziki minamó.

³² Lá ikago, Zutako Sailasiko Ómasímimi agepagutí gako liaká ve minasinazo, gako mukí lasike, kilími huluga liki kilími kii lasimó. ³³⁻³⁴ Lá ikasike, makó minata gamena asú okago, kimisele veloka atiginá iki vinigi mulúikú gili lamaná iminasigo, kigivete kemesosoka liki kilími gapoló amó. ³⁵ Pauloko Panapasiko keza Atiokia numutoka miní amiki minasike, kezagi ve lugáagi Guivahanímimi gako li utó miliki li kimi-kimi iki minamó.

Pauloko Panapasiko otopá zesimó

³⁶ Gamena makó oko vokago, Pauló nene Panapasini láa loko lo amimó: Leza monó gapo vusike Guivahanímimi gako lo kumusitó numutó namató ligive lagave utó amó keza

nana nana iki niahe voko ániogeketátiive. ³⁷ Loko lokago, Panapasí nene Zoní agulizá napa Makí makó vinigi limóza, ³⁸ * Makí goí oko Pamapília mikasiuka gosohá hozagú aniteake ahulokimiake atiginá imó nenazo, nenemú Pauló nene áisigi vinigi giligo goselé apilimó. ³⁹ Lá okago, Panapasiki pelevesava zikasike lova leta konó imó. Lá okago, miní ezega emega asimó. Panapasí nene Makini alémoko vike sipigú itikasike Saepalasi mikasi pokolauka vasimó. ⁴⁰ Pauló nene Sailasini alémo etó okago, Izesuni vegená keza Guivahanímo nasahilí oketatiive liki Ómasiloka likago, vasimó. ⁴¹ Vasike, Silia mikasiuka itó Silisia mikasiuka anitesike Izesuni vegenala zuha kilími kii lasimó.

16

Pauloko Sailasiko Timotini alímiki vasimó

¹ Pauloko Sailasiko keza Telepe apatoka vasike, Listela apatoka anitesimó. Neneló nene Izesuni vegenala zuha makó minamó, agulizá Timotí, izolaho nene Zuta vená nagamí hola vená, amelaho nene Kiliki ve. ² Listela apatokatiki Ikonio apatokatiki monó nigele vegená keza Timotikumú gelego, itekago, Pauló nene Timotiki makó mohona itíiive loko gilimóza, ³ ámina apatoka Zuta vegená mukilite Timotini amelaho nene Kiliki mikasigú ve minamó nene gakó gili asú amó nenazo, Pauló nene mukahá ikatave loko Timotini alémoko vike Ómasímimi anosa nene agupeló molotamó. ⁴ Lá oake, numutó namató vake aposologi monó ve olotivagi keza Zelusale apatoka netá matá mositakumú li huka gakó nene gili alitave liki likítimi likítimi vamó. ⁵ Lá iki hoza nalego, Izesuni vegená mulusi mulusi milamó keza gili alévolé amó nene kígika okago, gamena gamena keitoka víki gímizi gímizi ago, mukí hizi hutilí amó.

Pauloge Masetonia mikasiuka vamó.

⁶ Lá ikago, Asia mikasiuka monó gakó loloko vitune liki niago, Ómasímimi Sikalahulímo gapo hize lí okimikago, Pilikia mikasiukagi Galesia mikasiukagi li kimi-kimi imi vamó. ⁷ Vake Misia mikasi neksaló anitiake, Pitinia mikasiuka vitune liki niago, Izesuni sikalahulámo áminagó oko gele kememigo, ⁸ Misia mikasi aviligiake limi víki age nagamí agataloka Toloa apató anitemó. ⁹ Neneló anitiake, holugú nene Pauló agika ale viligokago vamó lá oko ániagamó: Masetonia ve makolímó áisi noitoka anitike sele like geza Masetonia mikasiuka oko lelémó vatí ozo loko lo amimó. ¹⁰ Láa loko noligo, ániagoake, keza Ómasímo gakó lamaná lo kimitune loko lolimikave, liake, vinigi ali vatí amó. Ali vatí niago, neza Lukana vo gímizekugo, ¹¹ sipigú itekunike, Toloa apá ahulokunike hee hee loko vunike Samotalake mikasi pokolaló anitunimó. Akokunike, gó lago, voko voko Neapoli apatoka age nagamí gahevaloka anitehá. ¹² Neneloka sipigutí lemekunike, mikasigú voko Pilipi numutó anitunimó. Nene Masetonia mikasigú apá gotolaló Loma ve keza apá amelaho lilí iake gizapa amó. Ámina numutoka nominuko, gamena makó oko vimó. ¹³ Oko vokago, holisi nene alitokago, vegegisagutí lemekunike nagamí napaló Ómasiloka liaká apá nehe loko gelekunike, lemeko vunimó. Neneló vená makó alegesá iki niago, kelémó utó okunike, mitó minunike monó lo kumunimó. ¹⁴ Lo kemekuko, keikutí Ómasímimi gupá ze ameaaká vená minamó agulizá Litiá. Eza Tiatila numutotí vená nene okohu gó molonoigo meina hiziaká vená minamó. Guivahanímo agika ale koló igo, Pauló li gakó nene gele alimó. ¹⁵ Gele aleake, ezagi vegenala zuha aí numukú mina vegenaki monó nagamí hiliake, eza láa loko lo limimó: Lekeza ániagago Guivahanímimi mututoni okugoma není numukú itiki miniki aliki itave loko negénegeka ligo ligo itunimó.

Pilipi numutoka nagá numukú ahulikitamó

¹⁶ Gamena makó zupa Ómasiloka liaká apatoka nolumuko, sihele mohó makó noigo hotu lunimó. Nene moholímimi agikagú holosi golesa minokago, anó lupa ale haítolímimi ike kogoka vizeaká i mohó alika utó iti netakumú lo utó ike meinava moni henokanoní alike aí agupe meina hize ve kemeaká imó. ¹⁷ Nene mohoki hotu lokunike, Pauloge leza lémegetoko noake gamoga gemo gemo vike sele like láa loko limó: Ve imane Ómasi iteko mina vémini gelekelé izegipala minake, lukugutó vizeaká gapo lekelepiziaká niave. ¹⁸ Nene gakó gó lanama gó lanama gakó napagutí loaká igo, Pauló nene holosi golesámimi anó lupa geleake goselé apelekeago, viligoko holosi golesa láa loko lo amimó: Neza Izesu Kilistoni agulizató mohó agikagutí itekoko vozo loko nologetuve. Loko noligo litá oko iteake vimó.

¹⁹ Lá okago, agupémimi meinaváa aliaká a vemate aí hozalotí moni goha alemenigo uninazo liki gliiake, Pauloko Sailasiko kigizató aliake, hugumatoka gelelehá iki kiapetoka kilímiki vake, ²⁰ goní ikitate láa likí lamó: Imane Zuta ve nenetosa numuteló ikasike mulutegú hizeseke, lilímí golesa galasa iaká niasive. ²¹ Leza Loma ve amuhá suni li hukilita

* 15:38: Apo 13:13

netá alitave liki lagata aliaká niasive. ²² Liki likago, ve mukí mulusi miliki mina vete keza kizapaló molokago, lovaga ali kimaie, kiapé keza góini ali alegetá vizi ahuliake, gala vizikago, segi nakahunitunú kepelemó. ²³ Vauva aliki zivi hutivi iki kipiliake, nagá numukú kilími miliake, gizapa ve nene alévolé oko gizapa oketative liki litamó. ²⁴ Limikago, nagá numuni makó holukú nene kelémo moloake, kigisaló za moloko nagá alekimikago, akasimó.

²⁵ Holugú akovevé Pauloko Sailasiko keza Ómasiloka numuna liki nama nilasigo, nagá numukú mina ve lugáate konó lupamú nigelego, ²⁶ imimá napa galinali alimó. Alekago, nagá numuni lukesaváa mómoká okago, galinali gahe nene zeko apasoake koló okago, nagá numukú mina ve mukilitini nagá alikitamó nene vinaso asú imó. ²⁷ Lá okago, nagá numuni gizapa ve ako heleneikutí epenape zeko oteake, gateni koló o asú onoigo ángoake, nagá numukú vema mota vi asú ahe loake, sopoló gelelehá oake ezáa agupegú galutá inogo noigo, ²⁸ Pauló nene gakó napagutí like gugupega ale golesa amo, leza avasavagi noune, loko limó. ²⁹ Loko lokago, gizapa vemámo livikumú lokago, amikago, numukú ololu loko itike luvaluvo nozike Pauloko Sailasiko keí kigihúna geake, ³⁰ numukutí kelémoko limike loká oketake uvónegitosa, nana okinake lamaná itove. ³¹ Loko lokago, keza láa liki li amesimó: Guivahani Izesu Kilistokumú gele alévolé itanimó nene, gezagi mina vegeenaki lukugutó vizinogo ive. ³² Liki likasike, Guivahanímuni gakó nene ámina numukú mina vegeenaki ezagi li kemesimó. ³³ Li kimikasigo, gizapa vemámo ámina holugukó kelémoko vike segi nogosanitunú kepelemó nene, nagami zekimiake, ezagi vená izegipalagi monó nagami hilamó. ³⁴ Lá iake, aí numuni agikagú kelémo moloake, nosánetakumú lokago gizi vatá i kememó. Lá ikago, ezáagi vená izegipalagi Ómasimú gili alévolé akumú kogoliza viziki minamó.

³⁵ Akiake gó lago, kiapege keza pilisi ve láa liki kimiselemó: Ve losima gologí ikitalo. ³⁶ Liki likago, gizapa vemámo geleake, Pauloni avetó oko lo amike limó: Neza gologí olíkimikago vitáive liki kiapege keza gakó ahulikago noaze. Nenemú lekeza limiiki viki zou liki minalizo. ³⁷ Loko lokago, Pauló nene láa loko lo amimó: Leza nene Loma vetini mulusigutí getamóma nemóza, lekeza lá amoaká netá aliki gonitó lilími milamiki vegeená kovogisaló lipiliake nagá numukú lilími milamó nemóza, itínasa nene asugunatoka limísilinigi nilahe. Lá oko nomive. Kezáini iki lilímiki vikiko vitímóma neve. ³⁸ Loko lokago, pilisi vete atiginá iki vake kiapéma li kimikago, kiapege ámina ve losi keza Loma vetini mulusigutí getakutí nousive liki lasi gakó giliake, ininá amó. ³⁹ Ininá iake, ve losiloka vake kilími hulu iake, kilími hetó iake, numuni apáini ahuliiki vitáive liki loká iki kagata aliake kimiselemó. ⁴⁰ Kimisilikago, keza nagá numukutí limikasike, Litiani numukú vasike, Izesuni vegeenala zuha ángikasike, monokú ali kii likimikasike vasimó.

17

Tesalonika numutoka gopaga lamó

¹ Keza viki Amapipoli numutoka itó Polonia numutoka aviligikasike Tesalonika numutoka vi anitesimó. Neneló Zuta vetini monó numuni makó minamó. ² Pauló eza aí suni alike holisi losive makole oko novigo, monó numúikú itike minake, kezagi monó gotolagutí gatiki ligili hagili amó. ³ Lá iake, monó gakó luhuva gizamó lugáa nenémuni mogonáa like, láa loko lo kimimó: Gologí oletative loko lo mololeta vema helekoko otitive liki monokú luhuva gizi milinamóma neve. Lo nolukumú ve nene agulizá Izesú eza gologí oletative loko lo mololeta vema noive. ⁴ Loko lokago, vegeená lugáa nenete gili seketigi iake Pauloko Sailasiko keitoka viki gímizemó. Itó Kiliki ve keza Ómasi gelekelé itiki minamoláagi vená iti minamoláagi mukí kezagi viki gímizemó. ⁵ Lá ikago, Zuta vetini monó gizapa vete giliake kemekugú ninake, gohogó vegeená golesa kilími nupa iake, gala vizikago, Zasoni numukutí Pauloko Sailasiko vegeená kogovisaló kelémo molokinake nagá kimitune liki aí gahe zivi tele vizivi amó. ⁶ Lá amó nene ve losima numukú niamasigo ángiake, Zasoni itó agivelagini lugáagi kigizató aliake, gelelehá iki aliki lemeke apá gizapa veloka kilímiki milake, láa liki gopaga limi vamó: Numutó namató ve kilími gopa napa iaká niasi vema anitesigo, ⁷ Zasóma kelémo guni okave. Itó keza Loma vetini agulizaki ve napámini gakó ali ahulikikasike agulizaki ve gosohá makó Izesú utó okave liki iaká niasive. ⁸ Liki liake, apá amelagegi gizapa vegi gala vizemó. ⁹ Lá iake, Zasoki agivelagegi sele li kimiake, Pauloko Sailasiko vitáive liki kugupe meina hizilo likago, moni kememó. Kimikago, kimsili ahulamó.

Pelea numutoka vasimó

¹⁰ Lá ikago monó gele vegeenalite ámina holugú Pauloko Sailasiko kimsili ahulikago, Pelea numutoka vasimó. Neneló anitesike Zuta vetini monó numukú itiki monó li kemesimó. ¹¹ Lá ikasigo, ámina apató Zuta ve keza zouváa Tesalonika numutoka vegeenakitana

minamake, kiviligiki minake monó vávani iki giliake, Pauloko Sailasiko lasi gakó lamaná nehe soza nehe liake, gamena gamena monó gotolagutí monó mogonamú agizaka hiziki vitagá iki minamó. ¹² Lá iake, keitokatí mukilite Kiliki vená iti minamoláa lugáagi ve lugáagi keza Izesukumú gili alévolé amó. ¹³ Lá ikago, Pauló nene Pelea numutokagi Ómasímini gakó lo hutilí okago, ámina gakó nene Tesalonika numutoka vokago, Zuta veenalite giliake, Pelea numutoka ake gala vizeke lovaga lamó. ¹⁴ Lá ikago, monó gele veená keza Pauloni alími gapo ikago, ámina apá ahuloake víke age nagamí agataloka anitimóza, Sailasiko Timotiko keza Pelea numutoka minasimó. ¹⁵ Niasigo, Pauloni alímiki va veenalite Atena numutoka ahulitamó. Ahulimikago, lekeza atiginá iki víki likiko, Sailasiko Timotiko litá iki isino. Loko lokimikago, veená keza atiginá iki vamó.

Pauló Atena numutoka monó lo kimimó

¹⁶ Lá ikago, Pauló nene Atena numutoka kegeva minake ániagamó nene soza ómai netá mukí vaí oko nego, ániagoake, agikagú ló lokago, ¹⁷ Zuta vetini monó numukú itike Zuta veenaki hetoka veená Ómasimú goliva giliki minamoláa kezagi monó ligili hagili amó. Lá iake, gamena gamena maketiloka nene veená nánigake áminagó oko monó lo kimimó. ¹⁸ Lá okago, ámina apatoka veená makó minamó. Makolite Epikuleani monó giliaká amó itó makolite Sitoiki veenalitini monó giliaká amó. Ámina veená kezagi Pauloki gakó viligá aligá iake, lugáa nenete Paulokumú nene goselé gakó goha li ve imanémo nanave loko lo lemeaká noive. Liki likago, makolite láa liki lamó: Áisi nene ómai netá makolímiki gakola nolimó gelekave. Liki lamó nene Pauló eza Izesunimuki helenosakutí oteakakumuki lo utó oko lo kimikumú nene gakó lamó. ¹⁹ Láa liki liake, Pauloni agizató aleke, hugumá makó agulizá Aleopago neneló alímiki iteke lamó: Géisi gosohá gakó loaká noanimóma nene, nana gakokumú loaká noane. ²⁰ Ma gelemuni gakó neze, mogonagi lokako gilitune. ²¹ Liki lamó nene Atena apakú veenaki veno vegi keza gakó gosohá giliake ámina gakotokó miniaká amó.

²² Lá ikago, Pauló eza Aleopago gakó hugumató voko minake, veená láa loko lo kimimó: Atena apakú vese, neza mogonatini lá oko nániguve. Lekeza ómai netá mukikumú goliva goha gilikilí iaká niave. ²³ Netá makó lá oko nego ániogueke noluve. Neza numutitoka vogá ogá oko ómai netatini ániagamó nene, nama holoma makotó luhuva makó nene gelemuni ómai netá makó noitikumú neve liki gizinago gatuve. Ámina ómai netá lekeza gelemiki gopa gupá zi amiaká niamó aikumú lo likimitoze, gililo. ²⁴ * Ómasímo mikasi ale utó moloake, amupiló netá matá ale utó molo asú imó. Áisi nene okulumaki mikasigi keí Guivahani noinazo, áisi nene monó zagusave veenalite kigizatunú gekú nene minoko aleko osá amive. ²⁵ Áisi veená mukitoka sikalahúinigi netá matá mukí lehizelimiaká noinazo, áisi netá matakumú vitagá osá amive, keké. Nenemú veenalita hozava aleko netá makó ale utó o amitunimoláa oko nomive. ²⁶ Lá onoimóza, veená zuha hamokó ale utó moloake lokago, aitokatí numutó namató hize hutilí oko utó omo vunimó. Itó hize hutilí oko minatuni gamenagi lakaníagi áisigó mololetonoimóma neve. ²⁷ Nenemú nene ligikatunú vitagá iliki víki Ómasi ezáa ániगतune loko geleake, nenémini imó. Eza hotoka minamive. Likigilikagú noive. ²⁸ Leza aí agizauka minunike, oko moloko oaká nounge. Lekelitatí nama luhuva giziaká a ve lugaáte nene leza Ómasilokatí utó unimóma neve liki lamóma neve. ²⁹ Leza Ómasilokati nouninazo, Ómasímo eza veenalite kagata geleke golitunupe silivatunupe gehanitunupe lilí a netakitana noive loko laminogo une. ³⁰ Ómasímo aikumú gelemake netá golesa aliki mina gamena nene ániago ahuloake, nasahilí oketoko minamóza, itina nene numutó namató veená mukitoka kigika ali viligatave loko lokimikave. ³¹ Áisi nene numutó namató veenalita mogonate ale utó moloko lihima limiti gamena lo moloake, lelegi oko limiti vema alémo etó imó. Lá oake, numutó namató veená mukitoka aikumukó gilitave loko ámina ve nene heleneikutí alémo oteakago noive.

³² Loko Pauló nene helenosakutí oteaká gakó lokago, lugáate goselekaseleka lamó, itó lugáate nene gamena makó zupa ámina gakó goha lako gilitune liki lamó. ³³ Liki likago, Pauló nene ahulokimiake vimó. ³⁴ Vokago, veená lugáate nene aitoka víki gímiziake Izesukumú gili alévolé amó. Keitokatí Aleopago hugumató kansole makó minamó, agulizá Tionisió, ezagi vená makó agulizá Tamalí itó veená lugáagi minamó.

18

Pauló Koliti numutoka vimó

¹ Lá ikago, Pauló nene Atena apá ahuloake Koliti numutoka vimó. ² Neneloka Zuta ve makó alémo utó molamó, agulizá Akuilá. Aí nene Potu mikasiloka getamó. Itó venala

* 17:24: 1 Kug 8:27; Apo 7:48

Piliskako nene Italia mikasiuka niasigo, agulizaki ve napa Kalautiío eza Zuta vejená nene Loma apakú minamitave loko lo hukokimiake kimiseleko ale ahulokago, keza ámina apá nene ahulikasiuke, Koliti numutoka vasimó. Izoha vi nanitesigo, Pauló nene keitoka anitimó. ³ Ezagi kezagi hamokó hoza aleke seli numuni giaká a ve minamó nenazo, kei numukú iteko minake kelémo vatí igo, makó hoza alemó. ⁴ Lá niago, Pauló eza holisigú holisigú Zuta vejenalitati monó numukú iteko Zuta vegi Kiliki vegi kagata logative loko monó lo kemeaká imó.

⁵ Lá okago, Sailasiko Timotiko keza Masetonia mikasigutí asi gamena nene Pauló monó hoza amuza moloko alike, Izesú nene gologí oletative loko lo mololeta vema noive loko aí mogonáa nene Zuta vejená lo utó oko lo kemeko minamó. ⁶ Lá okago, keza nene gakola gili ahuliasike, lova ali ameke alivi letivi ikago, Pauló nene golaguti vahé moloko mumusopa atilí o ahuloake, láa loko lo kimimó: Lekeza alika latila itamó nene, nene lihima nenitoka nomive. Lekezatiniloka minanogó ive. Nenemú nemegesa lekemekinake hetoka vejenatokagó vinogó uve. ⁷ Loko loake, hetoka ve makó agulizá Titió Zusto eza Ómasi gupá ze ameko minamó. Aí numuni nene Zuta vetini monó numuni agilikaloka minamó nenazo, Pauló nene aí numukú itike minoko aleko noigo, ⁸ monó numuni gizapa ve agulizá Kilispó ezagi numunagú mina vejenaki Guivahanimú gili alévolé ikago, Koliti vejená mukilite monó gili alévolé iake, monó nagamí hilamó. ⁹⁻¹⁰ Lá ikago, gamena makó zupa holugú nene Guivahanimó Pauloni vamotoka utó o ameake láa loko lo amimó: Imane apakú vejená mukí není zuha lilí itaze, neza gizapa ogetonougo, ve makolímó ma gelémo golesa aminogó ive. Nenemú geza gelegesá legemiko monó noloko ahulamo. Aveté oko lokogó minozo. ¹¹ Loko lo amekago, geleake, neneloka nene Ómasímini gakó lo keme keme oko noigo, kilisimasi hamoki ikani 6-agi vimó.

¹² Lá okago, Akaia mikasigú agulizaki ve napa minamó, agulizá Galió. Eza gizapa onoiogo, Zuta vejenalite ali apiziasike Pauloni lova ali amiasike, goní numutoka alímiki vake, ¹³ imane ve nenémo li hukilita gakó pelevesava zeake haitolímimiki Ómasi gupá zi amitave loko lagata aleaká noive. ¹⁴ Liki likago, Pauló nene gakó linogó igo, agulizaki ve Galió eza Zuta vejená láa loko lo kimimó: Agae, Zuta vese, imane vémo lihima golesa netá genavagi ale utó ilina, gakotini nene gele lukumuline. ¹⁵ Lá onoimóza, lekelisi nene gakotinimú itó ve makolitini kugulizainimú itó li hukilikita gakokumú gakó hoza nalemo nenazo, lekeza netatinive. Není netá nomive. ¹⁶ Loko loake goní numukutí kimisele ahulokago, lemémó. ¹⁷ Limiake galinali monó numuni gizapa vema agulizá Sosteneeni nene aputá viziake agulizaki ve Galioni avogisalo apelemóza, Galió eza ángoake ángo ahulamó.

Pauló Atiokia numutoka atiginá oko vimó

^{18*} Lá okago, Pauló eza Koliti numutoka koma minomo noitike, monó amegesaló mila vejená kemesosoka loake, Piliskaki Akuilaki kelémoko vike sipigú itiasike, Silia mikasigú vinigi Kenekelea numutoka vi anitikago, Pauló gozapá Ómasímini agulizató ale moloko zopovala hukamimó nenazo, ámina gamenamú hukatove loko li gamena alitokago, neneló hukamó. ¹⁹ Lá oake sipigú itiasike vake, Epeso numutoka anitiasike, Piliskako Akuilako neneló minikasigo, Pauló eza Zuta vetini monó numukú itike, kezagi monó ligili hagili iki minamó. ²⁰ Lá iake, kezagi minatune liki likago, óe loake, ²¹ kemesosoka nolike, láa loko lo kimimó: Ómasímo giliko lamaná okikoma lekelitoka goha atiginá oko atove. Loko loake, Epeso apá ahuloake, sipigú iteake vimó.

²² Vike Sisalia mikasiuka aniteake, Zelusalega iteko vike Izesuni vejenala zuha agivelaginí ángoake, gekéváké loketamó. Lá oake, Atiokia numutoka atiginá oko lomoko vimó. ²³ Atiokia numutoka koma minake monó hozaló goha vike Galesia mikasiuka Pilikia mikasiuka numutó namató mohona ike Izesuni vejenala zuha luhusáini kelémo kii loketomo vimó.

Apoló Epeso numutoka monó lo kimimó

²⁴ Lá okago, Zuta ve makó minamó, agulizá Apoló, eza Alesatalia apató geta vémo Epeso numutoka anitimó. Ámina ve nene gakó heeváa loaká ve minoake monó gotolaú gakó gele asú imó. ²⁵ Eza Guivahanímini monó aveté iki li amikago, áminagó oko gilimó. Áisi Zoní nene vejená monó nagamí holoketa gakó, itó Zoní nene Izesukumú gili gakokó nene zazavagó gilimóza, ámina nene amuza moloko hee lokogó lo kemeko minamó. ²⁶ Lá noike Zuta vetini monó numukú itike apí oko monó ale akutoko lo kimimó. Lo nokimigo, Piliskako Akuilako keza gilikasike, alimi apazá zikasike, Ómasímini monó lugáa li amesike alapizi hee hee lasimó. ²⁷ Lá ikasigo, Apoló eza Akaia mikasiuka vitove lokago, agivelage ali kii litake Izesuni vejenala zuhaloka luhuva netá nigiziki imane ve nene lekelitoka novikoma,

* 18:18: Nam 6:18

alími lamaná ilo. Liki luhuva giziki amikago, aleko vimó. Vike Koliti numutoka aniteake, Ómasímo nasahilí oketago Izesukumú gili alévolé a vejená kelémo vatí imó. ²⁸ Lá noiké monó gotolagutí gato kemeko, Izesú nene gologi oletative loko lo mololeta vema noive loko nenémíni mogonáa vejenalítini kovogisalo lo utó ike, Zuta vetini gakó aleko limike lo kimimó.

19

Pauló Epeso numutoka monó lo kemeko minamó

¹ Apoló eza Koliti numutoka noigo, Pauló nene mikasi holutó mohona noike Epeso numutoka anitimó. Neneló vike Izesuni vejenala zuha makó ániogoake, ² loká oketake lekeza nene monó gili alévolé iake, Ómasímini Sikalahú alemó nehe. Loko loká okimikago keza láa liki lamó: Óe, Sikalahú noive loko gelemunimó nena. ³ Liki likago, goha loká oketake lá ikamóza, lekelisi nene éhíni gakó lamanató monó nagamí hilamó neve. Loko lokago, leza Zonini monó nagamí huluhá nena. ⁴ Liki likago, Pauló láa loko lo kimimó: Zoní eza nene vejenalite kígika ale viligakumú nagamí noholoketake nemegesaloka némegetoko ati ve agulizá nene Izesú anogo ize, aikumú gili alévolé itave loko lo kimimó neve. ⁵ Loko Pauló lo kemekago, giliake, Guivahani Izesuni agulizató monó nagamí hilamó. ⁶ Nagamí hilikago, Pauló nene gotóitó agizani moloko Ómasiloka loiká loiká noigo Sikalahú keitoka lemekago, haitopaitó konokutí monó li utó iká Ómasímini agepagutí gakó liká amó. ⁷ Ámina vejená 12-a minamó.

⁸ Lá ikago, Pauló eza Zuta vetini monó numuikú itike monó ale akutoko Ómasímini gizapaló minoakalímíni gakó lo keme keme oko kagata aleko noigo, ikani losive makole golamó. ⁹ Lá okago, vejená lugáate gínikaha iake Izesuni monó nene kemegesa amemó. Kemegesa amiake, mukí vejenalítini kovogisalo Izesuni monokumú alivi letivi ikago, Pauló ahulokimiake aí vejenala zuha kelémoko vike kelémo nupa oake, gamena gamena ve makó agulizá Tilanó aí gakó apí o kemeaká numukú miniki monó ligili hagili iki minamó. ¹⁰ Niago, Asia mikasiuka vejená nene Zuta vejenaki Kiliki vejenaki mukitó keza Guivahanímíni monó gili asú niago, kilisimasi lositá oko vimó.

Sikevani gipalatini gakó

¹¹ Lá noigo, Ómasímo Pauloni hize lé omikago, golivagi netá haitolímíni mukí ale utó imó. ¹² Lá okago, nenemú vejená nenete akisipi taulínitunú nene Pauloni agupelotí vemo iliki vake kivisi vejenalítini kugupeló milikago zokamó, itó kígikagutí holosi golesa itiki golisi vamó. ¹³ Lá niago, Zuta ve lusalo ve lugáa numutó namató vígiki mihina amó nenete vejenalítini kígikagutí holosi golesa kepeleko kimisilitune liki Guivahani Izesuni agulizató láa liki avevezaha iki lamó: Izesuni agulizá lamaná Pauló mohona oko loaká noi véminí agulizató golisi vitave loko nololeketune, liki lamó. ¹⁴ Nene Zuta vetini guguni gizoaká ve napa makó agulizá Sikevá aí gipala 7-a keza ámina netá aliaká amó. ¹⁵ Itó gamena makó zupa láa liki likago, holosi golesa nenémo láa loko lo kimimó: Izesuni mogonamú mota gelenouve, itó Pauloni mogonamú mota gelenoumóza, lekelisi nene hí ve niave. ¹⁶ Loko loake, holosi agikagú mina ve nenémo alegetá vizevo oko kepelekago, golanímó alemó ze ze igo, kugupa zapakó numukutí limiake golisi vamó. ¹⁷ Lá ikago, ámina gakó nene Epeso numutoka Zuta vejenaki Kiliki vejenaki keza gili asú iake kegepa gahava nomigo, Guivahani Izesuni agepoka lake sigaga litamó. ¹⁸ Lá ikago, Izesuni monola gili alévolé iki minamoláa mukilite aniteke keza litaha kemetameki minake netá golesa ali minamó nene li utó i asú amó. ¹⁹ Lá iake, gozapá lusa hoza aliaká a ve lugáate lusa giaká a puku nene gita iki aliki ake vejená kovogisalo lokú gizamó. Lá iake, ámina puku nenémíni meinava ale nupa iki gatamó nene, 10 tausen kína okago, ²⁰ mukí vejená keza nenémíni ikago, Guivahanímíni gokolímó hutilí oko vike gihila zeko alévolé imó.

Epeso numutoka gopaga lamó

²¹ Lá okago, Pauló eza Masetonia mikasiuka itó Akaiá mikasiuka vomo vomo Zelusalega vitove loko agata geleake Sikalahulímó alapizitó nene neza Zelusale numutoka anitekínake, nenelotí goha voko voko Loma apatoka vitove loko gele hamokó oake, ²² alími vatí iaká asi ve Timotiko Elastoko kimiselekago, Masetonia mikasiuka goí iki vasimó. Ezáa nene Asia mikasiuka koma makó miní ameko minamó.

²³ Nene zupa Epeso numutoka Izesuni monokumú lova napa utó imó nene lá oko neve. ²⁴ Neneló silivatunú gonanalivagi netá loló oaká i ve makó minamó, agulizá Temetelió. Áisi nene soza ómai netáini agulizá Tianani numunáámíni amenía koma koma loló oake, ezáagi izegipa agunalagi ámina hozalotí moni napa aliaká amó. ²⁵ Lá ikago, Temetelió

* 19:4: Mat 3:11; Mak 1:4-8

eza izegipa agunalagi agive agave kelémo nupa oake láa loko lo kimimó: Náavegúe, lekeza hozale nenémo moni henokanoni ale utó olemeaká noimóma nene gilinave. ²⁶ Itó ve makó amó agulizá Paulóma nene, lekeza aí mogona giliki ánginave. Áisi nene Epeso numutokatí itó Asia mikasi lugalokatí vejená mukí kagata hízeko kelémo gopa ike vejená kigizanitunú líli amó ómai netá nene, netá gihila nomive loko lo kemeaká noive. ²⁷ Láa lomo mohona iko iko, lelí hoza nene liminogo ive, itó lelí ómai netá napa Tianani zagusavemú nene vejenalita gilikiko liminogo ive. Lá okiko nene, Áisa mikasiuka vejenakí numutó namató vejenakí Tianakumú goliva gilikilí iki niminamóma nenazo, agulizá haha itihe loko nehelele vizekave.

²⁸ Loko lokago, giliake, kigikagú ló loake, kizapaló molokago, gakó napagutí láa líki lámó: Epeso vejenalita izotého Tianá nene agulizaki vená napama nena, líki lámó. ²⁹ Líki líkago, ámina apató vejená gopa napa iake alegesá hugumatoka lolu líki vake alegesá iake, Masetonia apakutí Paulogegi makó mihina iaká a ve losítá, kugulizá Gaioki Alistakoki nene kigizató aliake gelelehá líli iki líki vamó. ³⁰ Lá ikago, Pauló nene geleake, vejenalitini alegesakú vitove lokago, aí vejenala zuha keza géneka lámó. ³¹ Lá ikago, Asia mikasiuka kugulizaki ve lugáa Pauloni zogova minamó keza vejenalitini alegesakú vamitive líki gakó ahulikago, vimó. ³² Vokago, alegesá hugumató neneló vejená keza gakó gopa napa lake, haitopaitó gakó líki minamó. Lá niago, lugáate nene netakumú nilaze líki gelemake, gopa minamó. ³³ Lá iki niago, Zuta vetini kigivéipini makó agulizá Alesateni nene alími etó iake gala viziake, ámina gakó lí ami ami ikago, eza holomaló itíke Zuta vejenalitini mogonáini híze lé inogo agizanitunú alata molamóza, ³⁴ áisi nene Zuta vema nena líki giliake, kegepagutí kegepagutí lí hamó ake gakó napagutí nene Epeso vejenalita izotého Tianá nene agulizaki vená napama nena, líki nilago, gamena aowa losítá oko vimó. ³⁵ Lá okago, kansoletini gakotó gizapa vémo kelémo zou loake, láa loko lo kimimó: Epeso apakú vese, Tianate napámini zagusave napa imaneló nemó itó okulumakutí aí vogunahana netá makó limimó nenémini gizapaváa amelagita noune. Ámina gakó nene numutó namató mota gili asú inave. ³⁶ Hí vémo nenéminoko nomive loko litíve. Ma nomive. Nenemú lekeza líkigika ali hulu iiki netá golesa alemílo. ³⁷ Imaneloka kilímiki a ve nenetosa ómai netatémini monó zagusavegutí netá makó ali halake halake oaká nehe itó Tianani alívi galatívi ahe ma amasimóma neve. ³⁸ Lá okago, Temetelió itó hozaló agive agave keza ve makokumú velego golesa noigoma lihimaváimimú goní numutoka kiaepegitoka kilímiki vikiko, neneló goní gakó litave. ³⁹ Itó gakó makó minokikoma nene, kansoletini alegesakú alíki vikiko gakó hoza alíki gilitave. ⁴⁰ Lekeza itína nene gopa lova hízikamó ha akokave. Ámina gakó nene kugulizaki vemate gilitamó nene nanave loko lo kumuko giliko lamaná itíve. Ma nomive. ⁴¹ Loko gizapa vemámo loake, kimisele ahulokago vamó.

20

Pauló Masetonia mikasiukagi Kiliki mikasiukagi vimó

¹ Epeso numutoka gakó vívi vovoga lámó nene asú okago, Pauló nene Izesuni vejenala zuha sele lo kemeake, kagata aleake, ale kíi lokimiake ahulokimiake, Masetonia mikasiuka vimó. ² Vígeko ángo asú ike, monó amegesaló mila vejená minamoláa monokú ale kíi lokimiake, sipigú víke Kiliki mikasiuka anitimó. ³ Neneló ikani losive makole minoake, age nagamí agataloka lomoike, sipigú Silia mikasiuka vinogo igo, Zuta vete giliake gohoni milamó. Pauló nene geleake, Masetonia mikasiuka ale atiginá ave itó mikasigú vinogo limó. ⁴ Loko lokago, Pelea numutotí Piloni gipala Sopaté itó Tesalonika mikasigutí Alistakó ave Sekutó ave itó Telepe numutotí Gaió ave Timotí ave itó Asia mikasigutí Tikikó ave Tolopimó ave ve nenéate Paulogegi ⁵ goí iki vake Toloa numutoka legeva iki minamó. ⁶ Zuta vejenalitini avóikini asenini zeketakumú gili mina holisi asú okago, nezagi vejená makoki Pilipi numutotí sipigú itekunike gamena ligizani lugaloka asú igo oko novigo voko voko Toloa numutoka anitekunike, holisi hamó minuhá.

Toloa numutoka Pauló monó lo kimimó

⁷ Minunike, leza nene holisi gamena Sategú holugú nene lepa nosá natune loko alegesá okunike, Pauló nene gó lokiko vitove loko noiike, monó lo keme keme oko noigo, akovevé loló imó. ⁸ Numuni amupiló agika makokú minuhakutí nene líví mukí guluma oko minamó. ⁹ Lá onogo, gipa makó agulizá Eutikó áisi nene Pauló monó hána hána lokago, hepé gatetó minake ahíhí imó. Ahíhí okago, avó ako heleake, miní amiki giliki ite numuni hepé gatetotí velehé limike mikasigú akoake helekago, ali otiki ángamó nene, mota helekago, ¹⁰ Pauló limike hitoko akoake aputá novizike, vejená láa loko lo kimimó: Lekeza ive nama amilo. Hanuva noiike, sikalahú nomolave. ¹¹ Loko loake, numukuka itíke lepa nosá kemeake, nosá koma namó. Niake, gamena hána monó ligili hagili iki niago, gó

lamó. Gó lokago, Pauló nene ahulokimiae vimó. ¹² Novigo, veđená keza ámina gipa nene agómula gizoake otikumú mulúikú lamaná giliake, numunauka alímiki itemó.

Pauló Epeso numutotí monó gizapa ve ikago gako lo kimimó

¹³ Lá ikago, Pauló áisi mikasigú gapo vitove loko lokago, leza sipigú itekunike Aso numutoka voko nouko, áisi mikasigú vimó. ¹⁴ Vike Aso numutoka aniteake ániġolimikago, sipigú alémo molokunike, makó vuhá. Voko mikasi pokola makotoka Mitilena apakú vo anitehá. ¹⁵ Nenelotí sipigú gaho novuhá, gó lokago, Kio mikasi pokola agilikaloka avilegekó vunike, gó lokago, Samo pokolagú anitehá. Nenelotí goha vunike gó lago, Mileto apatoka anitekunike, ¹⁶ Pauló nene Sikalahú limi holisi nekú Zelusalega voko minanogo uve loko limó. Nenemú Asia mikasi nekisaloka noigo, Epeso numutoka vitomóza, veđenáite pasi-minimiġo gamena hána vitihe loko Epeso apá avilegeake, sipigutí lemeake, ¹⁷ mikasigú vike Mileto numutoka anitimó. Aniteake, alesa kimiselekago, Epeso numutoka vake monó gizapa ve lugáa kilímiki amó, ¹⁸ Iki anitikago, Pauló láa loko lo kimimó:

Neza Asia mikasiuka aniteuke ganá lekelitoka oko moloko minumó lekeza mogonalotí gililíki itiki minamóma neve. ¹⁹ Nénisi nene ánéámina ive nama okuke miluma guluke Guivahaniloka gelekelé otoko minumó. ²⁰ Lá uke, lekelémo vatí iti gako nene ma hitoleketosá amumóma neve. Monó gako nene veđená ali nupa iki minakú itó numutikú numutikú etó etó oko lo lekemeko minoaká umóma neve. ²¹ Zuta veđenaki Kiliki veđenaki kigika ali viligiki línaha netá ahuliiki Ómasiloka viki ġimiziki Guivahani Izesu Kilstokumú gili alévolé itave loko lakagata aleko minumóma neve.

²² Itó itína nene Sikalahulímo litó Zelusalega novuve. Elaneloka vo anitekugo, nenitoka nana netá utó itihe, nene gele vevesamumóza, ²³ Sikalahulímo numutó namató vetitoka mohona oko nougo, kalapusi nagalímo itó miluma netalímo negeva oko noive loko lo nemeaká noive. ²⁴ * Lá onomóza, neza minoko aleko oko moloko ukumú gelegugo, itemive. Guivahani Izesú gapo velenimiġe monó hoza nimimó nene aleko ale nolutiginaġe Ómasímo nasahilí olimiaká noimómámini gako lamaná lo hutilí itove loko nigikatunú gelenouve.

²⁵ Itó makó nenegi litoze, gililo. Neza Ómasímini gasovaló minoakalímimi gako lo utó omo holutikú minoko aleko ugo, lekeza ániġinamó nemóza, goha nogokaló ma ániġaminigave. ²⁶ Nenemú ale akutoko lo nolukumuze, gililo. ²⁷ Nénisi golisi gelemuke Ómasímo agata geleneimoláa lo lekeme o asú onoumó nenazo, lekelikutí makó nenémo latila itimó nene, nenémini lihima nenitoka minaminogo ive. ²⁸ Lekezatitini gizapa niiki Sikalahulímo gizapa veve loko loleketa veđená keza Guivahanímimi veđenala zuha aí golanímo meina hizi veđená nene lamaná iki gizapa ikitalo. ²⁹ Neza ahulolíkikimikugo, soza monotó veđenáite hela galagitana iki lekelitoka anitiki lekemeni apili hilinigave. ³⁰ Lá ikiko, lekelikutí ve makó utó iiki Izesuni veđenala zuhate ahulilíkimiiki keitoka viki ġimizitave líki monó ale gopa inigave. ³¹ Nenemú lekezatini gizapa alévolé iki ilo. Kilisimasi losive makole oko novigo, gamena gamena gó lanama ive nama uke lakagata alumó etó etó oko lo lekemeaká umó nene, ahulosá amumóma neve. Nenemú lekeza giliki minalo.

³² Itína nene Ómasímo hize lé oleketative loko lekelémo aí agizakú nomuluve. Áisi nene alévolé gakolatunú lekelémo kii linogo ive. Lá okiko, niiko, gosohá kigika kelémo loló i veđená mukitoka miní amelíkikimikiko apiziki minanigave. ³³ Neza moni henokanonimú mesahakosaha oleketosá amumóma neve. ³⁴ Nezánemuki veđenáne zuhamuki neni ġizánitunukó lugupémimi netá ale utó moloaká umó nene mota gilinave. ³⁵ Neza haitopaitó netá loló nouke hoza amuza moloko alinake kee lamamoláa nasahilí oketatune loko nenémini gapováġi lekelepizenoumóma neve. Nenemú lekeza ámina gapogú niviki Guivahani Izesú nene ale nómonó nenémo ġihila nomive, hanuva nasahilí oaká nenémo ġihila neve loko limóma nene gili minalo.

³⁶ Loko Pauló lo ahulokago, ezagi kalapusa hiziki Ómasiloka lamó. ³⁷ Ómasiloka liake, ive nama ake kuputá kapatá vizeke kogoka kegepa namó. ³⁸ Lá iake, lekeza nogoka goha ániġaminigave loko amunaloka li gakovumú ive nama goha iake, sipigú itekoko vitive líki alímiki getatoka lemémó.

21

Pauló Zelusale numutoka vinogo limó

¹ Itó lezagi kezagi vo ezega emega unike, sipigú hee loko voko voko Kosi mikasi pokolagú anitehá. Gó lokago, goha voko voko Lota pokolagú anitekunike, voko Patala numutoka anitehá. ² Aniteko sipigutí lemekunike sipi makó Pinisia mikasiloka vinogo ali vatí niago ániġokunike, nenegú itekunike, ³ voko Saepalasi pokola ániġokunike sogaloka nego

* 20:24: 2 Tim 4:7

avilegekunike, voko voko Silia mikasi liginaloka Tulo numutó anitehá. Neneló sipigutí nene henoni nahulago, ⁴ leza Izesuni vegenala zuhatini numúitoka iteko nouko, holisi hamó oko vimó. Oko novigo, Sikalahulímo kigikagú hoza alekago, Zelusalega vamtive liki Pauloni agisa agizató amó. ⁵ Lá ikago, neneló nouko, vituni gamena alitokago, keza vená izegipagi numu gatetoka lilími-likí vikago, getatoka lemeko lalapusa hizeko Ómasiloka lunimó. Lokunike, ligizakú ale lomala okuníke, ⁶ sipigú noituko, keza numúitoka atiginá iki vamó.

⁷ Lá ikago, Tulo numutokatí voko Tolemai numutoka anitekunike, neneló Izesuni vegenala zuhagi gekévaké lokunike numuni hamokó akunimó. ⁸ * Akokunike gó lokago, voko Sisalia numutoka aniteko Izesuni gako lamaná lo kemeaká i ve Piliponi ániogkunike, aí numukú iteko minunimó. Eza amunaloka ve 7-a monó hozaló kilími etó amómagutí ve makó minamó. ⁹ Aí mohó getola losive losive nenete Ómasímíni agepagutí gako liaká a mohó minamó. ¹⁰ * Neneló miní ameko nouko, Zutaia mikasiukatí Ómasímíni agepagutí gako loaká ve makó agulizá Agapó nene ¹¹ lelitoka oake, Pauloni holotani aleake ezáa agisa agizató nozike láa loko limó: Ómasímíni Sikalahulímo ámina holotanímíni amelahíni nene Zelusalega vo anitekiko, Zuta vete imanémíni imiiki hetoka vetitoka amisilí milíko, mogona golesa alapizínigave loko nolive. ¹² Gako láa loko lokago, lezagi ámina apá amelagegí Pauló nene Zelusalega vamtive loko negénegeka lotunimó. ¹³ Lokuko, Pauló láa loko limó: Lekeza nanamú ive nama goha niago milumatini noguluve. Neza Zelusalega nagá numukukó vitove loko nenemukopa, Guivahani Izesukumule loko hilitokumuki nígikámo vávani onoize, ahulikalo. ¹⁴ Loko lokago, agata aleko luhá nene gelemigo, ahulukunike Guivahanímó giliko alévolé ino loko lunimó.

Pauló nene Zemusí noitoka vimó

¹⁵ Loko lokunike, gamena lugáagi asú okago, Zelusalega tovo itune loko ale vatí unimó. ¹⁶ Ale vatí nouko, Sisalia numutokatí Izesuni vegenala zuha lugáa keza lilímiki víki Saepalasi mikasi pokolagutí ve makó eza Izesuni vegenala minamó, agulizá Manasó, aí numukú lilími milíkago, iteko minuhá. ¹⁷ Minokunike, nenelotí Zelusalega tovo unimó. Neneló ligivetege lilími miliake, nasahilí ilimikago, ¹⁸ akokunike gó lokago, Pauló eza monó gizapa ve napa Zemusini numukuka lelémoko itimó. Iteko nouko, monó ve olotiva imi asú amó. ¹⁹ Imi asú ikago, kizizakú aleake, Ómasímo hize lé otago hetoka vegeatoka monó hoza aligo gihila zi gako nene miní ameko avetó o kimimó. ²⁰ Nene gako avetó o keme asú okago, giliake, Ómasi agepoka liake, Pauloni láa liki li amemó: Ligivetege Paulo, Zuta vege ná tausen tausen mukí nene Izesuni vegenala zuha lilí iki niamole. Keza mukitó Mosé lo hukoko li gako amuzá miliki hizi lé iaká niave. ²¹ Lá okago, geí gako lá oko ago giliaká niave: Zuta vege ná hetoka vegeanalitini kigilikagú minimi vinamoláa keza Moseni gako ali ahulatave loko kagata ale ale oaká noane. Itó izegipáinitini kugupeló Ómasímíni anosa milikitamitave loko itó Zuta veta mogonataganate ahulatave loko lokimiaká noane. ²² Liki imane apató vegeanalite geikumú láa liki giliaká nianazo, itó géisi imaneló noani gako gilinigi nianazo, kegepauka hulu itive loko nana itune. ²³ * Nenemú leza gako makó lo gimitinimó nene itanize. Lelitoka ve losive losive niamó keza Ómasímíni agulizató netá makó loló itune liki li hukake, gotóini zopova hukamake hanuva nianazo, ²⁴ leza keitoka gelémo gímizekuko, kezagi Ómasímíni avogisaló likigika vihelé aheletoko minative loko leza aleaká nouni suni alitaze. Lá ikiko, Ómasi guguni gizi amita netá meina hizekimikako, gizi vatá niiki zopováini hukatave. Geza lá itanimó nene, ániigiiki geikumú gakoka gelemó soza gako gelekago, geza Mosé lo hukoko li gako gele aleaká noane liki gilinigave. ²⁵ * Itó hetoka vetitokatí gili alévolé amoláa keitoka luhuva netá gizoko lo hukuni gako láa loko gizunimóma neve: Soza ómai netáini guguni gizi kimitakutí namitave loko, itó iza golani namitave loko, itó nagá ita izagutí namitave loko, itó mokoló netá lilí amitave loko lo hukoketunimóma neve. ²⁶ Liki líkago, Pauló eza gakoíni geleake, ámina ve losive losiveló gímizekago, akiake gó lokago, kugupe kígika nagamí ziki ali vihelé ahelé lake, Zuta vetini monó zagusave napagú itemó. Itiake, Pauló kugupe kígika nagamí ziki ali vihelé ahelé liaká a gamena lutigiti gako itó Ómasi guguni gizi amita gamenamú nene lo kimimó.

Monó zagusavegú Pauloni agizató alemó

²⁷ Lo kemekago, netá matá ali guni a gamena 7-ama asú inogo noigo, Pauló nene monó zagusave napagú iteko noigo, Asia mikasiukatí Zuta ve makolite aí ániagiake, vege ná mukí gala vizemó. Gala vizikago, Pauloni agizató aliake, ²⁸ gamoga giki lamó: Eé, Isilae vese, iki lilími vatí amave. Imane vémo numutó namató mohona ike Zuta ve lelí lova ale limike

* 21:8: Apo 6:5, 8:5 * 21:10: Apo 11:28 * 21:23: Nam 6:13-21 * 21:25: Apo 15:29

Mosé lo hukoko li gakokumú itó lelí monó zagusavemú alevo letovo oko loaká noi vema nena. Itó lelí monó zagusavelegú Kiliki vejená kelémoko itekago, keza lelí monó numuni napa ali mumusopa zikave. ²⁹* Liki lamó nene Pauló nene Epeso numutotí hetoká ve makó Tolopimó áisigi niasigo, ángiake, Pauló nene monó zagusavegú alémoko itihe liki ámina gakó lamó. ³⁰ Láa liki likago, ámina apá amelage mukilite giliake, ololu liki iki alegesá iake, Pauloni agizató aliake, monó zagusave napagutí gelelehá iliki lemémó. Nilemego, litá iki gáhe gemó. ³¹ Lá iake, Pauloni alímiki apili hilinigi niago, gakóma nene Loma amitini gimisigi vetini gizapa ve napa aitoka vokago, láa loko gilimó: Zelusale vejená mukilite lovaga nilave, ³² loko gakó geleake, ami ve iti minamó limi minamó kelémoko vike ololu liki keitoka lemémó. Lá ikago, keza Pauloni napeletotí nene gizapa ve napamagi ami vevagi anitikago, ángiake, ahulamó. ³³ Ahulikago, gizapa ve napa nenémo anitike Pauloni aleake, goní itane loko loake, seni nagá lositatanú zitalo loko loketamó. Loketake, áisi hí ve noive itó nana netá golesa nalive loko loká oketamó. ³⁴ Loká okimikago, vejená lugáate ganimakilisi ake vivi vovoga nilakó gakó mogonáa gele hee lamike, ami vetini numukuka alímiki vilo loko loketamó. ³⁵⁻³⁶ Loko lokimikago, alímiki vake numuni akaló iake itinigi niago, vejená keza kémegetiki vake ganimakilisi iki vake imane ve asú itive liki likago, Pauloni apili hilinigi ago, ami vete aputá viziki ali milamó.

Pauló ezáa mogonagamú lo kiminogo limó

³⁷ Ami vetini numukú nene Pauloni alímiki itinigi niago, Pauló eza lova gizapa ve napama Kiliki gakokutí loká otake gakó lo gimitohe. Loko lokago, gizapa ve nenémo láa loko limó: Olo, geza Kiliki gakó gelenape. ³⁸ Gozapá Izipi ve makolimo gamani vejená lova ale kiminogo izegipa agunamotamolá 4 tausen lovámini galaváa mikasi gomopalaló kelémoko vimó nenazo, geza ámina ve noape itó haitó ve noane. ³⁹ Loko loká omikago, Pauló láa loko lo amimó: Óe, nénsi nene Silisia mikasiukatí Taliso numutoka getamó nouve. Ámina taoni napa amelahina nouve. Itó geza gele nemekako, vejená imane gakó koma lo kimitohe. ⁴⁰ Loko lokago, kiapé nenémo gele amekago, Pauló nene akaló ote minake agizanitunú alata molokago, gakó hilinago, Hipulu gakokutí láa loko lo kimimó:

22

Pauló ezáa agika ale viligakumú lo kimimó

(Apo 9:1-19; 26:12-18)

¹ Uvónegita aménegita, nezáne mogonáne lo likimitoze, gililo. ² Loko kezáini konóikutí lo nokimigo, giliki laga laga hiliake niago, miní ameko láa loko lo kimimó. ³* Neza Zuta ve Silisia mikasigú Taliso numutoka getamó noumóza, imane apatoka Gamalielé lainim-olimiaká numukú iteko minoko napa umole. Lá okuke, monó lo neme-neme igo, avónegini aménegini gakó legesó oko minuke gele asú umó. Lá okuke, itina lekezagi ámina oko Ómasímimi agulizá ale ititune loko amuza moloaká noune. ⁴* Itó lá okago, Izesuni gapoló viaká nia vejená nene gopoguni moloketuke, ámina vejená asú itave loko lova ale kumuke ve niamó vená niamó mukitoka nagá kemekuke nagá numukú kelémo moloaká umóma neve. ⁵ Guguni giziaká a vetini ve napagi monó gizapa vegi není mogonáa mota gilnamole. Keza ligive lagaveloka Tamasiko numutoka aleko vitane liki luhuva netá nimikago, elaneloka vinake Izesuni vejená nene nagá zeko kelémo Zelusale numutoka okugo nogosani kipilitave loko lokuke, aleko vumóma neve. ⁶ Gapoló novuke, Tamasiko apá ale alí nolugo, holisaká nene okulumakutí lapaná napa galinali gulugulu loko limike, osá o nugupe imó. ⁷ Osá o nugupe okago, viligoko pou loko mikasigú akonougo, anó lupa makó láa loko gulomó: Saulo, Saulo, nanamú gopoguni nomolonetane. ⁸ Loko lokago, neza Guivahani geza éagama ve. Loko lokugo, láa loko lo nimimó: Gopoguni molonimiaká noani ve Nasaleté numutotí Izesunama noluve. ⁹ Loko lokago, ve makó nezagi minamoláa keza liviláagó ángamóza, gakó lo nimimoláa gelemamó. ¹⁰ Lá okago, neza loká otoko Guivahanímaka, nana ozo loko nolonetane. Loko lokugo, Guivahanimo láa loko lo nimimó: Geza otekoko Tamasiko numutoka vokako, Omasimo netá itane loko logetamó nene li giminigave. ¹¹ Loko lokago, ló lapanalámo nogómula hize likokago, goloutamigo nene límugusi zekago, vejenáne zuhate nigizató aliki Tamasiko numutoka vamó.

Pauló nene Ananiá lo ami gakó lo kimimó

¹² Neneló ve makó minamó agulizá Ananiá. Áisi nene monolagi ve minake Mosé lo hukoko li gakó lene ale amegesaló moloko agizaka hizeko minokago, Zuta ve mukilite aikumú gelego lamaná oaká imó. ¹³ Ámina ve nenémo nenitoka oko noutó ote minake nigivénega Saulo, geza gogómula goloutozo. Loko noli agepagi nogómula goloutokago, aí

* 21:29: Apo 20:4 * 22:3: Apo 5:34 * 22:4: Apo 8:3, 26:9-11

ánigumó. ¹⁴ Nánigugo, gakó láa loko lo nimimó: Avotegini Ómasi áisi gilitimoláa nenéminoko loló itane loko, itó aí ve heeváa ángatane loko, itó aí gakola gilitane loko gelémo etó okave. ¹⁵ Geza aitokatí netá matá ángokoko geleko animó nenémini gakó nene numutó namató vejená lo kimitanize. ¹⁶ Itó itina imane hanuva nanamú minatane. Litá oko otekoko Izesuni agulizá okoko, monó nagamí holokako, lihimaka asú inogo ive.

Pauló hetoka vejenatoka viti gakó lo kimimó

¹⁷ Láa loko lo nemekago, Zelusale numutoka atiginá oko vuke, monó zagusave napagú ituke Ómasiloka nolugo, nigika viligokago, Izesuni ángumó. ¹⁸ Ángokugo, láa loko lo nimimó: Apá imaneloka keza geí gegepagutí gakóne giliiki gili ahulanigi aze, nenemú géisi Zelusalegatí litá oko ahuloko vozo. ¹⁹ Loko lokago, neza láa loko lumó: Guivahaninemaka, není mogonatanaga mukí vejenalite gili asú ikave. Neza nene geikumú gili alévolé a vejená nene nagá kemekuke monó numukú numukú itegá lemegá uke, segi nogosanitunú kupulumóma neve. ²⁰ * Lá okuke, geí gakó lo utó oaká ve Setepanoni apilinigi niake gineganéini gololohá iki milikago, gizapa noketugo, Setepanoni apili nihelego golani limimó. Golani lemekago, gelekugo, lamaná imóma nenazo, Zuta vejená monó lo kimitomó nene nigika ale viligi gakó giliiki ininá iniganae. ²¹ Loko lokugo, Guivahanimo láa loko lo nimimó: Neza mikasi gohauka hetoka vetitoka nogimisuluze, vamaane.

Ami vetini gizapa vémo Pauloni gizapa otamó

²² Vegená keza gilinago, Pauló nene gakó lugáa lo kimimóza, hetoka vetitoka vitove likumú nene anotó aliake, ganimakilisi niake ve nenémináa asú itive. Helekiko lamaná oko minatune. ²³ Liki ganimakilisi iake, kizapaló molokago, gineganéini vizakiake, usilí nizeke mumusopa gitiki nahulago, ²⁴ ami vetini gizapa ve napámo lokago, numukú alímiki ítemó. Lá ikago, vejenalite nene ganimakilisi ítamó nenémini mogonáa lo utó okiko gilitove loake, segi nogosanitunú apilitave loko loketamó. ²⁵ Lokimikago, agisa agizató nene nagá alikago, Pauló nene gizapa venini makó láa loko loká otamó: Loma ve nounazo, goníne asú amító segi nogosanitunú nipilitamó etatihe. ²⁶ Loko lokago, gizapa venini nenémo gizapa ve napa noitoka voko láa loko lo amimó: Ámina ve Loma ve gihila nenazo, nana otatune loko nogelene. ²⁷ Loko lokago, gizapa ve napa nenémo Paulotoka vike loká otake Olo, geza Loma ve noape. Loko lokago, Pauló oo lokago, ²⁸ gizapa ve napa nenémo láa loko limó: Neza haitotokatí vémina moni napa molokuke Loma ve loló umóma neve. Loko lokago, Pauló nene lá okanimóza, neza Loma mikasi amelaho getamóma nouve. ²⁹ Loko lokago, Pauloni apilitune liki amó nene litá iki ahulamó. Ahulikago, ami gizapa ve napa nenémo Pauló nene Loma veve loko likumu geleake, nagá alitakumú ahelele vizimó.

Kansoletini holúikú Pauló gakó lo kimimó

³⁰ Lá okago, gó lokago nene lova gizapa ve napa nenémo Zuta ve keza Pauloni nene nanamú goní nitamó nehe nenémini mogonáa gilitove loko guguni giziaká a ve napagi keí monó kansolegi sele lokago, mukí iki alegesá ikago, Pauloni vinasimiake alímiki hetoka lemeke kovogisaló alími milamó.

23

¹ Pauló eza kansole kivi holo minake, gakó láa loko lo kimimó: Nigivénegita, neza Ómasímini avogisaloka nigika vihelé ahelé ligo, minoloko iteko minútímina noluve. ² Loko noligo, guguni giziaká vetini ve napa Ananiá nene Pauloni amatoka minamoláa nene lekeza agepaló zemave. ³ * Loko lokimikago, Pauló láa loko lo amimó: Gigikagú guha holamó geza Ómasímo gipilinogo ive. Géisi Mosé lo hukoko li gapomaló nelémo gonitó molatove loko nolanimóza, ámina lo hukoko li gakó nanamú avutá okanike nipilitave loko gala novizene. ⁴ Loko lokago, amatoka mina vejenalite láa liki li amemó: Geza Ómasímini guguni giziaká vetini ve napama nanamú ale letoko nolane. ⁵ * Liki likago, Pauló láa loko limó: Nigive nagavese, monó gakó makó láa liki luhuva gizi milamóma neve: Geza agulizakí ve makó aleko letamo. Liki gizikago nemóma nenazo, áisi nene guguni giziaká vetini ve napama noive loko gululina, láa loko lamuline.

⁶ * Loko loake, kansole vegutí lugáa nene Satukaio monó ve itó lugáa Palisaio monó ve minakumú ángonoike, gakó napagutí láa loko lo kimimó: Nigivénegita, neza Palisaio monó ve nouve, itó asizónege avónege Palisaio monó ve minamóma neve. Heleakakutí goha oteaká neve loko nene gakó gelenoukumú gonitó nilími nimilave. ⁷ Loko lokago, Palisaio monó vejenaki Satukaio monó vejenaki liká ahuliká ake ake kogoka hotopotó imó. ⁸ * Lá amó nene Satukaio monó vejená nenete helenosakutí oteaká itó ageló itó

* 22:20: Apo 7:58 * 23:3: Mat 23:27-28 * 23:5: Gá 22:28 * 23:6: Apo 26:5 * 23:8: Mat 22:23; Mak 12:18; Luk 20:27

vogúinigi ve nenémini netá nomive liki liaká niago, Palisaio monó vegená nenete nenémini netakumú netá gihila neve liki liaká niave. ⁹ Lá okago, alegesá ikú vivi vovoga liake, Palisaio monó vegenalítini kigilikagutí monó gelemoláa lugáate otiake gakó lolagi láa liki lamó: Imane vémini lihimamú gelehá nomive. Ageló niamó vogúinigi ve niamó makolimo gakó lo ameneitimóma nene nanave loko litune. ¹⁰ Liki liake, gopa napaga likago, ami vetini gizapa ve napa nenémo Pauloni gitigi ahulatahe loko alegesá legekago, ami veloka lokago, ake alími-likí limiacle numúikuka alímiki vamó.

Pauloni apili hilinigi gohoni milamó

¹¹ Lá ikago, akiacle gó lokago, makó holugú nene Guivahanímo Paulotoka utó oake láa loko lo amimó: Geza gelegesá legemino. Zelusalega neni gakóne lo utó okane. Ámina oko Loma apatoka lo utó molanogo ane. ¹² Loko lokago, akiacle gó lokago, Zuta ve lugáagi ali apiziacle, lova gizacle láa liki Ómasímini avogisaló li hukamó: Nosá naminacle mose keké o noinacle, Pauloni apelekinacle zahí nagami natune. ¹³ Liki la ve 40-a minacle ámina gakó lova gizamó. ¹⁴ Gona giziacle, guguni giziaká a ve napagi monó gizapa vetitoka viake láa liki li kememó: Leza nosánetá naminacle mose keké onoinacle Pauloni apelekinacle nosá natune loko Ómasímini avogisaló lo hukokune. ¹⁵ Nenemú kansolegi lekezagi ami vetini gizapa ve napa noitoka gakó láa liki li milikiko, vino: Geza Pauloni lelí mulusiuka amiselekako, ino. Lá okako gakoláa lo lamaná itunize. Lekeza láa liki likiko, gakotini gelekoko lá okiko, leza Pauló nene gapoloka noiko gohoni molonoinacle apele hilitune.

¹⁶ Liki likago, Pauloni vegimivámo gohoni milata gakó nene geleacle, voko ami vetini numukú iteacle, amolahini Pauloni lo amimó. ¹⁷ Lo amekago, Pauló nene ami vetini gizapa ve napa makó noitoka alémoko vike láa loko lo amimó: Geza imane gipa nene gizapa ve napa noitoka alémoko vokako, gakó makó lo amitive. ¹⁸ Loko lokago, ámina ve nenémo gizapa ve napa noitoka alémoko vike láa loko lo amimó: Nagá numukú noi ve Pauló sele loacle gipa imane gakó lo gimitive loko lokago alémoko nouve. ¹⁹ Loko lo amekago, gizapa ve napa nenémo gipama agizató aleacle, amegesa vizitoka alémoko novike loká otacle gakó nanave loko lo nimitape, lozo. ²⁰ Loko lokago, gipa nenémo láa loko lo amimó: Zuta ve keza Pauloni azo nene kansoletitoka alémoko lomokako, aí mogona goha vitagá itune liki loká igitanigi li nihukaze. ²¹ Láa liki nilikoma gele kememo. Keí vegenakutí ve 40-a nosá naminacle mose keké onoinacle Pauloni apelekinacle nosá natune liki lova giziacle, gohoni nimilacle geí gakokumú gegeva iki gizapa iki niave. ²² Loko gipa nenémo lo amekago, gizapa ve napa nenémo lá loko nolicle amisilimó: Geza gakó lo nenenimó nene vegená makó lo kememo, keké.

Paulo kiapé napa Pelikí noitoka vimó

²³ Láa loko loacle, ami vetini gizapa ve losima sele lo kemeacle, láa loko lo kimimó: Lekeza viki likisikiko, ami ve mikasigú vitamoláa 200, itó hosi iza kemegeçaló vitamoláa 70, itó zokaitó alitamoláa nene ámina oko 200 nenémináate ali sekele viziki holugú alímiki Sisalia numutoka vitave. ²⁴ Itó Pauloni nene hosi alími miliki legesó iki gizapa iki kiapé napa Pelikinimaloka alímiki viló. ²⁵ Loko lo kemeacle, luhuva netá láa loko gizamó: ²⁶ Neza Kalautió Lisiana kiapé napa Pelikitega, geké nologetuke luhuva netá imane gizo nogumuve. ²⁷ Gugulizaki venemaka, ami ve kezate ve makó nene alímiki nivaze. Aí nene Zuta vete agizató aliacle, apilinigi ago, néni nene Loma ve noive loko gelekuke, ami ve kelémo-loko vuke, kigizakutí ipá unimó. ²⁸ Ipá okunike, gonitó alími milamó nenémini mogonáa gilitove loko keí monó kansoletini alegesá ikú alémoko lumumó. ²⁹ Alémoko lomokuke, neza láa loko gulumó: Kezáini vilí milina gapomú gonitó alími milamóza, heleaká netakumupe nagá numukú voko minoaká netakumupe nene ma lamave. ³⁰ Láa loko gelekuke, vegená lugáa keza gohoni miliake ámina ve apele hilitune lamó gelekuke, geitoka litá oko amiselekugo, núane novive. Itó gonitó alími nimila ve ámina oko kimiselekugo, geitoka viki gakoláa li gimitaze.

³¹ Luhuva netá láa loko gizokago, ámina holugú nene ami vete gizapa venini gakó gili aliacle, Pauloni nene Atipatili numutoka alímiki lemémó. ³² Limi nanitego, gó lokago, ami ve lugáa keza hosi amegesaló minamoláate Pauloni alímiki viki ³³ Sisalia numutoka anitemó. Anitiacle, luhuva netáma kiapé Pelikini nameke, Pauloni nene agulizaki vemámini agizakú milamó. ³⁴ Lá ikago, kiapé eza luhuva netá gatoacle mikasivamú loká otamó. Neza Silisia mikasigutí ve nouve lokago, ³⁵ kiapé nenémo láa loko lo amimó: Gonitó gilimi nimila ve keza ikiko, geí gakó litune. Loko loacle, ami ve kemekago, Heloteni numuni napagú ahulimiacle gizapa itiki minamó.

¹ Numuni ligizani lugaloka asú igo akiake, guguni giziaká vetini ve napa Ananiá ezagi monó gizapa ve lugáagi vevená mukilitini kegepa aleko loaká ve agulizá Telutulómagi Sisalia numutoka lemémó. Limiki kiapetoka Pauloni goní itata gakó linigi vi anitemó. ² Anitikago, kiapé eza Pauloni sele lokago, okago, Telutuló nene goní otake láa loko limó: Kiapetega Peliki, geza vatí oko gizapa oletako, nonagá oko minoaká noune. Imane nouni ve lelí lelémó vatí oaká noako, ³ numutó namató vevená mukí lélisi geikumú gelekuko, etoaká noive. ⁴ Gakó hána lokugo goselé gepelekatize, nenemú gakó lagasó lo gimitomó nene geza hulu oko gele nimitane loko noluve. ⁵ Áimane vemú lizapaló moloaká i ve noive. Áisi Zuta ve numutó namató vevená lelémó golesa ike lova hizitave loko gala vízeko loaká noive. Lá noike, Nasaleta numutotí vemámini monó liaká a vetini améipo napa noive. ⁶⁻⁷ Lá noike lelí monó zagusave napa ale mumusopa zinogo noigo, aleko noune. ⁸ Géisi gonitó alémó nomulunimó nenémini mogonáa vitagá oko gezaka loká otoko mogonáa ale utó molanogo ane. ⁹ Loko lokago, Zuta ve keza alimi vatí ake gakola hizi lé itamó.

Pauló Pelikini avogisalo ezáa mogonámú lo kimimó

¹⁰ Lá ikago, kiapé nenémó hanuva litive loko agizanitanú avevezaha o amekago, Pauló láa loko limó: Geza imane mikasiloka kiapé loló oko gizapa oletoko noako, kilisimasi mukí oko vokave. Nenemú geleneinake, gakó litove loko gena aminake linogo uve. ¹¹ Neza Zelusale numutoka Ómasi gupá ze amítove loko iteko minutotí nene gamenáa 12-asi oko vonoimole. Itó geza nenemú gagata losi gelekokoma vevená imane loká oketako li giminigave. ¹² Neza nene monó zagusave napagú itó monó numúikú itó numuni apáikú monokumú géneka háneka loko vevená keza lova hizitakumú kelémó alitó mulugo ángisá amave. ¹³ Imane vete li negú managú iake gakóne nene li nigemenazo, nenémini gihíláa ma gelepizeminigave. ¹⁴ Itó makó lo utó oko lo gimitoze, gelezo. Izesú veleleta gapo gosohakumú goselé kepeleaká noimóza, ámina gapoló mohona nouke avotegini Ómasi gupá ze ameká nouve. Itó Mosé lo hukoko li gakókí Ómasímuni agepagutí gakó liaká a vete giza gakókí mukí gele zageaká nouve. ¹⁵ Minoko vevená lamanakí golesagi nene Ómasímo helenosakutí kelémó otinogo ive loko ve imane kezagi nezagi gele zageko noune. ¹⁶ Lá unike, Ómasímuni avogisalo itó vevenalitini kovogisalo nigika vihelé ahelé liko minatove loko gizapa okogó nominuve. ¹⁷ * Lá okuke, kilisimasi mukí nene mikasi mulaloka minokuke, vevená makolíte moni ale nupa ikago Zelusale numutoka nigivénegini kimitove loko aleko umó. Okuke, guguni gizatomoláa ale etó okuke, ¹⁸ monó zagusave napagú iteko nigika nugupe ale vihelé aheletoko nougo, ángamó. Nenegú vevená mulusigú minoaká nehe itó vevená vivi vovoga loko minoaká nene nomimóza, Asia mikasigutí Zuta ve lugáa keza neneló minamó. ¹⁹ Kéisi nene není lihima ánginamó netimó nene geitoka iki goní initanazo. ²⁰ Keí kansoletini alegesató nougo, není lihima makó ánginitanomó nene imane nia vete li gimitave. ²¹ * Gakó hamokó holúikú minuke lumó nenemú gili golesa ahe. Gakó napagutí láa loko lo kumumó: Heleakakutí oteaká neve loko gele zagenoukumú gonitó nilími nilílagó itina nene gonitó nilími nilílagó nouve loko lo kumumó neve.

Pauló nagá numukú minamó

²² Láa loko lokago, kiapé Pelikí nene gosohá monolá gele hee hee lo vi ve minake, Pauloni gakó lo asú amike gohalaló ale molokago, ha minamó. Lá okago, láa lokogó lo kimimó: Ami vetini gizapa ve napa Lisiá nene Zelusalegatí lemekiko, gakotini lo asú itove. ²³ Loko loake, ami vema láa loko loketamó: Lekeza Pauloni gizapa itiki némini manámini itamiki agivelage iki nasahilí otatune nilíkoma, géneka lamilo.

²⁴ Hoza gakó láa loko loketake, gamena luguhá minoake, Pelikí eza Zuta vená Tulusilani alémoko itike makó niasike, Pauloni sele lo amekago, eza Izesu Kilistokumú gele alévolé i mogonámú lo kimimó. ²⁵ Vevesoko oko moloko minoakakumú itó ale hee hee loko aleakakumú itó gamena napaló goní oletati gakó nenemú lo kemekago, Pelikí nene ahelele vízekago, láa loko limó: Itina mota áminasí nenazo, nagató goha voko noako, gamena makó zupa sele lokugo, atane. ²⁶ Loko lo ameake, kiapé nenémó Pauló nene asene zenetatane loko moni nimitihe loko gele molo moloko minoaká ike, gamena gamena alesa moloake, gakó ligili hagili iki miniaká asimó. ²⁷ Lá iki niasigo, kilisimasi lositá oko vokago, kiapé makó agulizá Polokió Pestó áisi Pelikini hoza agepaló alimó. Lá noigo, Pelikí eza Zuta ve mulúikú ale lamaná ike Pauló nene nagá numukú noigo, ahuloake vimó.

25

Pauló agulizaki ve napámo gakola gilitive loko limó

* 24:17: Apo 21:17-28 * 24:21: Apo 23:6

¹ Pestó nene kiapé loló oake, gamena losive makolegó minoake, Sisalia numutoka minatotí mota Zelusalega itimó. ² Iteko noigo, guguni giziaká a ve napagi Zuta ve iti minamoláagi anitiake, Pauloni gakola li amemó. ³ Lá iake, gapoló gohoni molonoinake apele hilitune liki lova giziake, kiapé Pestoni láa liki gala vizezó: Mulutegú ale lamaná oko Pauloni nene Zelusalega amisilitane loko lo nogumune. ⁴ Liki likago, Pestó láa loko lo kimimó: Pauló nene Sisalia numutoka nagá numukú noive. Itó neza áminaloka litá oko lomoinogo uve. ⁵ Nenemú Pauloni mogonatagana gilinitamó nene lekelitokatí gizapa ve makoki nezagi makó liminake goní itatave.

⁶ Loko loake, gamena 8-ía nehe 10-ía nehe Zelusalega minoake, Sisalia numutoka lomoko vimó. Lá oake, gó lokago, goní numukú iteko Pauloni alímiki alo loko lokago, alímiki amó. ⁷ Alímiki itikago, Zuta ve Zelusalegatí lememoláa keza hizi vigiake vauva aliki li negú managú itiki goní itamóza, gihiláa ali utó milamamó. ⁸ Ali utó milamago, Pauló eza gakóini aleko limike láa loko limó: Neza Zuta vetini li huká gaketini neha, itó monó zagusavelini neha, itó Loma ve agulizaki ve napama neha ma aleko mumusopa zesá amuve. ⁹ Loko lokago, Pestó nene Zuta ve mulúikú ale lamaná inogo Pauloni lo amike limó: Geza Zelusalega gelémo-loko tovoko gakoka lo asú ogetatohe. ¹⁰ Loko lokago, Pauló láa loko limó: Loma agulizaki vémini goní numuni imane nemole. Nenemú není gakó imaneloka lo asú itunimó nene lamaná itive. Geza není mogonáne gelenanimole. Neza Zuta veđená netá golesa makó aleketamuve. ¹¹ Neza nipili hilita netá makó aleko ve golesa minutó nipilitive loko latilina, nugupe nehelele vizemilinamóza, keza sozagi lake gonitó nilími nimilanazo, makolimo nene mulúikú lamaná gilitave loko keí kigizakú ma nelémo molamitimó neve. Nenemú Loma apatoka agulizaki ve napamámo není gakó giliko asú itive loko noluve. ¹² Loko lokago, Pestó eza kansole vevagi ligili hagili iake, Pauloni láa loko lo amimó: Agulizaki ve napamámo gakóne gilitive loko lokanize, agulizaki ve napa Sisá noitoka vitane.

Agilipako Pelenikeko Pauloni gakó gilinigi lasimó

¹³ Loko lokago, gamena makó oko vokago, mikasi gahevalokatí agulizaki ve napa makó Agilipá itó mohó agunala Peleniké keza Pestoni agizakú alitíve liki Sisalia numutoka asimó. ¹⁴ Asike, keza gamena lughá ezagi miniki aliki niago, Pestó nene Pauloni gakoláa agulizaki vema avetó o amike láa loko lo amimó: Pelikí nene nagá numukú ve makó ahulomiake vokago, noimó nene, ¹⁵ neza Zelusalega itekugo, guguni giziaká a ve napagi Zuta vetini gizapa vetegi aí gakola makó li nimiake ámina ve nene apele ahulatune liki voká linitamó. ¹⁶ Voká linimikago, neza láa loko lo kumumó: Loma ve lelí suni lá oko nomive. Leza veđená gopa kepele ahulosá amune. Ve makó nene gakola minokikoma, ámina vegi goní itata veđenaki kelémo nupa okuko, goní itata vete likiko, ámina vémo keí gakó gelekoko uve amuve loko ezáa linogo ive. ¹⁷ Nenemú keza aí golesa netá litune liki imaneloka ikago, neza gamena hána minamuke gó lokago, goní numukú itekuke lokugo, ámina ve alímiki itemó. ¹⁸ Alímiki itikago, aí lihimavalamú ma litahe loko umóza, ¹⁹ gonitó alími mila ve keza otiake kezáini monóinimú itó Pauló nene hili ve makó agulizá Izesú nene heleneikutí oteake noive likumú lova kogoka amó. ²⁰ Lova kogoka ikago, neza gakó néminámú nagata losi gelekuke, Pauló nene Zelusale numutoka itekiko gakoláa lo asú itupe loko lo amumó. ²¹ Lo amekugo, Pauló eza Loma vetini agulizaki ve napámo gakóne lo asú onetative loko limó. Loko lokago, Pauló imaneloka nagá numukú ageva oko noiko, Loma apatoka agulizaki ve napaloka amisilito gamena alitokiko vitive loko lotumó. ²² Loko Pestó lo amekago, Agilipá lo amike neza ámina vémo gakó makó liko gilitove loko noluve. Loko lokago, Pestó nene azo gilitanize loko limó.

²³ Loko lokago, akiake gó lokago, Agilipá ave mohó agunala Peleniké ave keza sekele mamusi ikasike, alegesá numukú itikasigo, ami vetini gizapa ve napagi ámina apató ve iti minamoláagi kémegetiki itemó. Iti asú ikago, Pestó lokago, Pauloni alímiki itemó. ²⁴ Alímiki itikago, Pestó nene gakó láa loko lo kimimó: Gugulizaki ve Agilipagama itó veđenáne lugáa, gakó lo likimitoze, gililo. Ve imane nánigamó aikumú nene Zuta ve mukilite Zelusale numutokagi imanelokagi nivi niviga lake minamitive liki negénegeka likago, ²⁵ neza nene hiliti lihimavalamú vitagá okuke, Loma vetini agulizaki ve napámo gakóne gilitive loko likumule loko aitoka amisilitove loko lo hukokuve. ²⁶ Lá oko lo hukumóza, imane vémini lihimavalamú vitagá okuke, agulizaki ve napaloka luhuva netá gizatove loko gulugo, gena okave. Nenemú imane ve lekelitoka itó gugulizaki ve Agilipaga geitoka aí mogonáa vitagá oko gelekinake luhuva netá gizatove loko alémo nouve. ²⁷ Neza nagá numukú ve makó lihimavalamú vitagá oko ale utó molamoko luhuva gizaminake Loma apatoka hanuva amiselekugo vitive loko gulugo gena okave, loko limó.

26

Pauló Agilipani avogísalo ezáa mognóamú lo amimó

¹ Láa loko lokago, Agilipá eza Pauloni láa loko lo amimó: Gezaka mognaka lokako gilitune. Loko lokago, Pauló nene agizani hisú oko gakola láa loko lo kimimó: ²⁻³ Zuta vete gonitó nilími mili mili niave. Gugulizaki ve Agilipaga, géisi nene Zuta vetini monokumú lova logoka unike oko moloko oaká nouni mognate géisi geleaká noanimó nenazo, geí govogísalo litove loko mulúnegú lamaná gelekuve. Nenemú geza gelekako mulukagú hulu okiko, gakóne litoze.

⁴ Nénisi nene umaki ve komalotí Zelusalega ve nigívénégini holúikú minuke napa uke, oko moloko umó mognóaa nene Zuta vegealite gilinave. ^{5*} Neza Palisaio ve monolímíni izolahini lilí iki mina vetini holúikú minumó neve. Minugo mognóane áninganamóma nenazo, kéisi litune likima hanuva linigave. ⁶ Neza Ómasímo avotegini lo moloketa gakóma gihila zitive loko gele molo moloko noukumú imane gonitó nilími nimilago noluve. ⁷ Nene gihila zitive loko Isilae vegeaná lelí mulusi 12 leza únaká neteká Ómasi gupá ze ameko minoaká nouni. Gugulizaki venemaka, hanuva lá oko gakó lamaná nene gele zagukumú Zuta vete gonitó nilími nimilave. ⁸ Ómasímo hele vegeaná kelémo oteaká zámuzagi noikumú lekeza nanamú gilikago lá osá amimó neve liki giliaká niave. ^{9*} Itó neza Nasalete numutotí ve Izesuni monó ale golesa itove loko hoza napa alitove loko nagata geleaká umóma neve. ¹⁰ Gelekuke, Zelusalega ámina hoza apí umó. Guguni giziaká a ve napaloka lokugo, luhuva netá nimikago, Izesukumú gili ame vegeaná mukí numutó namató nene nagá kememo mohona oko minumó. Lá okuke, kipilikiko hilitave liki likago, gakóini hize lé okimiaká umóma neve. ¹¹ Zuta vetini monó numúikú numúikú nene Izesuni vegeaná zuha keza agulizá alivi letivi itahe loko nogosani kemeaká umóma neve. Lá okuke, nénisi nene lovámini galaváa minuke, apá hotokagi gopoguni moloketoloko vumóma neve.

Pauló ezáa agika ale viliga gakó lo kimimó

(Apo 9:1-19; 22:1-16)

¹² Lá oko nominugo, guguni giziaká ve napa nenete luhuva netá nimikago, keí gakató nene Tamasiko numutoka vitove loko novugo, ¹³ holínaka lokó okago, agae, gugulizaki venemaka, lapaná makolímó ho nene avilegekago áningumó. Nánigugo, ámina lapaná nenémo okulumakutí limike, nezagi vegeáne zuhagi nouhatoka hize sata olimikago, ¹⁴ mikasigú hupatoko akunimó. Akonouko, Ómasímini anó lupámo lelí Hipulu gakatutí láa loko lo nimigo gulumó: Saulo, Saulo, nanamú gopoguni nomolonetane. Sisi loaká nogosani nene eza hosímo agisatunú zitimó nene miluma gilinogo ive. Geza hosi izatini suni aleaká noanimómámo nene miluma nogelene. ¹⁵ Loko lokago, Guivahani geza éagamave. Loko lokugo, láa loko lo nimimó: Gopoguni molonimiaká noani ve Izesunama noluve. ¹⁶ Geza ote minozo. Neza gelekelé izegipáne loló itane loko utó o nogumuve. Nene itína netá áninganimó itó minomo iteko netá matá gelepizugo áninganimó nenémini gakó lo utó oko minatane loko gelémo etó nouve. ¹⁷ Zuta vegeaná imane itó hetoka vegealitiní kigizakutí gelémo ahulo ahulo ogetoko minatove. ¹⁸ Lá okinake, hetoka vegeatoka gimiselekugo, kigika gagata kolosiko, netá golesa nene kemegeza amiiki lapaná nene alitave. Lá iiki Satani agizakutí ahulimiiki Ómasímini agizakú minataze. Lá ikiko, lihimaváini ahulokimikago, nenikumú gili alévolé inakumule liki vihelé ahelé liki niamoláatini mulusigú vi hiliiki minanigave, loko lo nimimó.

Pauló monó hozavamú lo kimimó

¹⁹ Gugulizaki ve Agilipaga, neza okulumakutí vamokitana netá áningumóma gele alekuke, ^{20*} ganá apí oko Tamasiko amelage itó alika Zelusale amelage itó Zutaia mikasigú amelaho ve itó hetoka vegeaná niamó keza kigika ali viligiiki Ómasiloka víki gímiziiki kigika ale viligoakalímíni gihila ali utó itave loko nene monó lo kemeko minumóma neve. ²¹ Nenémini umómave liki Zuta ve makolite monó zagusave napagú nigizató aliake, nepele hilitune liki niago, ²² Ómasímo alata moloake nelémo vatí omo vova vova noigo, monola nene vegeaná iti minamó limi minamó mukí lo kemeaká nouve. Lá uke, Ómasímini agepagutí gakó liaká a vegi Moseki alika utó iti netakumú li mila gakó nene láa loko lo kemeaká nouve: ^{23*} Gologí oletative loko lo mololeta vema nene miluma geleko hilitive liki itó helemoláatini ale goí oketoko oteoko Zuta vegeanaki hetoka vegeanaki keitoka lapanalímíni gakó ale utó oketative liki li hukita gakó lo kemeaká nouve.

Agilipá monokumú gele alévolé itive loko agata alimó

* 26:5: Pili 3:5 * 26:9: Apo 8:3, 22:4-5 * 26:20: Apo 9:20, 28:29 * 26:23: 1 Koli 15:20; Isa 42:6, 49:6

²⁴ Pauló ezáa mogonala láa loko lo nokimigo, Pestó nene gakó napa like láa loko limó: Pauló, geza itínasa negi hizekane. Gamena gamena luhuva netá mukí gatoko minoaká anitímo itínasa negi nohizene. ²⁵ Loko lokago, Pauló láa loko lo amimó: Gugulizaki venemaka Pesto, negi gakó lamuve. Gakó lamaná gihila noluve. ²⁶ Gakó nolumó nene, agulizaki ve napa Agilipá geleneive. Aitoka nene vávani oko litove. Nolu netá imane nene asugunatoka utó amimó nenazo, agulizaki ve Agilipá gele asú onoimó neve. ²⁷ Gugulizaki ve Agilipaga, geza Ómasímini agepagutí gakó liaká a vetini gakóma mota gele alévolé onoaape. Mota gele zagenane loko gelenouve. ²⁸ Loko lokago, Agilipá nene Pauloni láa loko lo amimó: Láa loko loko mino hána aminake Kilistoni vejenala loló itane loko nolape. ²⁹ Loko lokago, Pauló láa loko limó: Gamena hána nominoko loló itape itó mino hána amoko loló itape neza gelemuve. Gezagi ve lugáagi itínasa imane gakó nologu nigelemó mukitokagi Ómasimo lekelémo vatí iko nenikitana lílí itave loko noluve. Nigizató nagá zinamó nenemú lamuve. Monokumukó noluve.

³⁰ Loko lokago, agulizaki ve napa Agilipá ezagi kiapeki mohó agunala Pelenikeki ve lugáagi otiake, ³¹ hetoka nilemeke ligili hagili niake ve imanémo hiliti netá ahe nagá numukú minati netá ahe ma alemive. ³² Liki likago, Agilipá nene Pestoni láa loko lo amimó: Ve imanémo Loma vetini agulizaki ve napámo není gakó lo asú itive loko lamilina, gologí omikuko, hanuva viline, loko limó.

27

Pauló Loma apatoka vinogo sipigú itimó

¹ Pauló nene Italia mikasigú Loma apatoka vitive liki li hukikago, Loma ami vetini gizapa ve makó minamó, agulizá Zulió. Áisi ami vetini mulusi makó agulizá Agustonive liki lamó nene mulusiló gizapa oko minamó. Lá noigo, kiapé eza nagá numukú mina ve makoki Paulonigi nene Zuloní agizakú milikago, kelémoko vike sipigú nezagi makó itunimó. ² Ámina sipi nene Atalamito apatokatí okago, Asia mikasi age nagamí agilikaloka numuni apá mukí minató vitive liki likago, áminagú itekunike, Masetonia mikasigú Tesalonika numutotí ve makó agulizá Alistakó ezagi makó vuhá. ³ Akokunike gó lokago, sipi nene Sitona numutoka vo anitekago, Zulió nene Pauloni alémo lamaná oake gele amekago, numutoka aniteake agivelagini áni gokimikago, nasahilí itamó. ⁴ Lá ikago, goha sipigú itekunike novuko, vuni gapolokatí una napa alekago, Saepalasi mikasi pokola sogaloka nego una napa alemi liginaloka avilegeko vunike vunike, ⁵ Silisia mikasi itó Pamapilia mikasi agilikaloka letoko vunike vunike, Mila numutoka Likia mikasigú anitehá. ⁶ Neneló sipigutí lemekunike Alesatalia apatokatí sipi makó oko minamó nene Italia mikasiuka vinogo noigo, ami vetini gizapa ve nenémo lelémago, ámina sipigú itekunike, ⁷ ako molo moloko silipa oko hana hana oko vunike vunike, Kinito apá liginaloka anitekuko, unámo lelémó gopa okago, numuni apá ahulukunike, Kiliti mikasi pokolámini agilikaloka una alemi liginaloka vunike, Salomone apá avilegehá. ⁸ Silipa oko vunike vunike, Lasea apá agilikaloka apá makó agulizá sipi lamaná oko minoaká i apá neneloka génopa génopa oko vo helega unimó.

Ohuhú napa alimó

⁹ Age nagamikú gamena hána vova vova oko nominuko, golini gamena alitokago nene, Pauló nene helekature loko geleake, ¹⁰ kagata aleko limó: Náavegúe, goha vitupe loko gulumóza, vamitunimoláa onoive. Sipi ateggekiko, henonigó golesa amitive. Vegenaki mukitoka age nagamikú limitupe loko gulumó, gena okago, noluve. ¹¹ Loko lokago, ami vetini gizapa vemámo Pauló li gakó gele ahuloake, sipiló aleaká i vegi itó sipi amelahiki keí gakó gele alimó. ¹² Lá okago, age nagamí ohuni áni gamó nene golini gamenagú nene sipi áminaloka minamitimó okago, nenemú Kiliti mikasi pokolaló ohuni makó minamó agulizá Poeniki nene ho nolimi agilikaloka, neneló voko nouko golini gamena asú itihe liki mukilite kagata aliki lamó. ¹³ Likago, sogalokatí una makó hana hana oko alekago, mota sipigú vitupe liki giliake, lukesava akiliki ali milikago, Kiliti pokola agilikaloka novuko, ¹⁴ vo hána amuko, ámina pokologutí ohuhú napa agulizá ezega agilikalokatí ohuhú nene amuzavagi utó oake, ¹⁵ lape ale viligatimó okago, lizamuha zekunike ahulukuko, sipima gopa gapo veleko vimó. ¹⁶ Voko pokola koma makó agulizá Kauta loko nene helegaloka nego ohuhú alemi liginaloka novuko, sipi koma makó gelelehá unimó nene nagamikú holatimó okago, génopa hoza aleko, ¹⁷ gelelehá oko sipi napamagú ale molokunike, sipi napama atigitihe loko lepa nagatunú vóvotoko alunimó. Lá okunike, getanímogó o mina apá agulizaláa Silita loko netoka vokature loko seli nene ohuhulímo aleko akúvasokative loko vinasoko ale molokuko, sipima gopa gapo veleko vimó. ¹⁸ Lá okago, ohuhúma amuzavagi aleva aleva oko minamó. Aleko noigo, gó lokago, henoni lugáa nene age nagamikú ali ahuli

ahuli amó. ¹⁹ Lá iake, gó lokago, sipímíni netá matala lugalokatí ámina oko ali ahuli ahuli amó. ²⁰ Lá iki mina gamena lugháma ohuhú napa aleva aleva oko noigo, ho ikani sonohí loko lapaná lamigo, víta gapo ángíamake voko gopa itupe liki kagata gíliake kelegesá ligimó.

Pauló kelémo huluga limó

²¹ Lá iki niake nosánetá mosiake, gamena hána minikago, Pauló nene holúikú oteake láa loko lo kimimó: Vegúe lekeza gakóne gelelina nene, itó Kiliti pokola ahulamutilina, henokanoni nene gopa amiline. ²² Itína nene lekelisi lekelegesá legemino. Vegená nene golesa aminogo une. Sipigó golesa inogo ive. ²³ Holugú neni gupá ze ameaká nou Ómasímo gelekélé izegípala noutoka ageló makó amiselekago, ²⁴ lemeake láa loko lo nemekave: Paulo, geza kelegesá legemino. Geza Loma vetini agulizaki ve napama noitoka hanuva voko anitínogo ane. Gelenape. Ómasímo geí asega zegimikoko gezagi sipigú nia vegi asenini zeketanogo ive. ²⁵ Loko lo nimimó nenazo, nenemú nigivénegita, mulutikú lamaná gíli. Ómasímo lí gakó nene haha amoakalímíni nenazo, gakó imane lo nimimó nene ámalaló molative loko gelenouve. ²⁶ Lá onoi móza, sipi nenémo mikasi pokola makotó voko hízeko lolosa ginogo ive.

Nagamikú sipima zeko atigimó

²⁷ Láa loko lokago, Atalia age nagamikú gopa gapo veleko nouko, holisi lositá oko vokago, holugú akovevé nene sipi amelage keza mikasi makó ale alitokune liki kagata gelemó. ²⁸ Gíliake, nagá ahulikago, limimó nene, ve makolímó agizani alémo sipitoko molo geleko ángíamó nene 20-a voko alekago, komama nivake goha míli gílikí ángíamó nene 15-así voko alekago, ²⁹ sipi nene gehani amupiló iteko zeko ategekatave liake, kehelele vízekago, sipi agasalokatí lukesava losive losive ahulikago, lemekago, gó la la liki niago, ³⁰ minake sipi amelage keza sipi nene ahulokinake golisi itune liki gíliake, sipi komama vínasi ahulikago, nolimigo, soza lake leza sipi agokalokatí lukesava makó ahulokoko limitive. ³¹ Liki nilago, Pauló nene ami vetini gizapa vegi vegenala zuhagi láa loko lo kimimó: Ámina ve nene sipi napagú minamitamó nene, lekeza age nagamikú simá nanígave. ³² Loko lo kemekago, ami ve keza sipi komámíni nagala hukí ahulikago, sipi koma nene age nagamikú gopa gapo veleko vímó.

³³ Lá okago, gó latihe liki ageva minikago, Pauló nene ve mukitó láa loko lo kimimó: Lekeza nosánetá namake minilíki nitíki gizapa iki niago, holisi lositá oko novigo, lukugupe ahulikave. ³⁴ Nenemú nosá natave loko noluze, pelevesava zemilo. Nosá níki ní líkíko, lekegepa vamiko, avasavagi hanuva vínogo une. ³⁵ Loko loake, mukitó ángíníago, nosánetá makó aleake, Ómasi agepoka loake, gítegeko namó. ³⁶ Nokago, ángíiake, mulúikú lamaná okago, ámina iki nosánetá namó. ³⁷ Ámina sipigú minuhaláa 276 vegená minoko, ³⁸ nosá noko lagatupa ahulokunike, sipigutí laisi gó nene hilulú iki ali ahulikago, sipi nene vávani oko ítimó.

³⁹ Lá noigo, gó lo vesamá noigo, mikasi ángíamóza, ángi hee lamake gopa iake, ohuni makotó getani gunula ángíiake, lapema neneloka voko getatoka ítitive líki gíliake, ⁴⁰ lukesava akíliake, nagala hukí ahulikago, age nagamikú lemekago, iha nagalaló vínasi kegelehá iake, seliváa ali otikago, hepélímó alike hilulú o-loko getani netoka novike, ⁴¹ senató voko híze zagekago, sipi agokáa nene mikasigú híze gíliatoake minokago, age nagamílímó valahuká zeake sipi agasaloka zeko atigimó. ⁴² Zeko ategekago, lapema ategesá okago, kalapuzi vegená keza galanogósá ziki golisi víkatave líki ami ve keza kepele hílitune líki lova gízíkago, ⁴³ gizapa veníni nenémo Paulokumle loko lo hukoketake, galanogósá zíaká amoláa keza apí iki nagamikú olíi míli míli íiki galanogósá zíki víki getatoka ítitave loko, ⁴⁴ itó galanogósá zemamoláa keza nene za gatapatoki sipi zevo ategevo imoláagi ali míli míli íiki neneló hilulú íiki víká víká ítave loko loketamó. Láa loko lokimikago, leza ámina netá alekunike mikasiló avasavagi ite asú unimó.

28

Pauloge Melita pokolaló ítemó

¹ Getatoka o asú okunike, mikasi pokola agulizá Melítave líkago, guluhá. ² Ámina pokolagú nene numuká ve keza lílími lamaná ake nasahílí ílitamó. Golíni zekago, hepé lepelekago, ló gízi limíkago, lotá nouko, ³ Pauló nene ló mosanakasana ale nupa oake, lokú nogízago, lokuti gosíhá makó lokumú golisi epenape zeake, Pauloni agizató akoheake zoleme minamó. ⁴ Lá okago, mikasi amelage keza agizató nene gosíhá akoheake zuuto minakumú láa líki lígíli hágíli iki lámó: Vegená kepele ahulo ahulo ve noitínazo, age nagamikú lemeko helemike, gunahatoka itekago, líhima naminazo, hílinogo ive. ⁵ Líki nilago, Pauló nene gosíháma aleko atohe ahulokago, lokú lemekago, gosíhálímó apelemimó

geleake minamó. ⁶ Lá noigo, keza lulu vizitihe itó pou loko akooko hilitihe liki ageva minamó. Gamena hána ageva minamó nene némuni manámuni amigo, ániagiake, genezáini ali viligiake imane ve ómai netá netive liki lamó.

⁷ Itó minuni apá agilikaloka agulizaki venini eza agulizá Pupilioni mikasi minamó. Áisi nene lelémo moloake, lamaná ike nasahilí oletago nene, aí numutó minunimó nene gamena losive makole minuhá. ⁸ Nouko, Pupilioni amelahini avisekago, matuna mesamá oká ase izapa vizeká okago, Pauló nene geleake, numunagú itike agizani nene gotolaló nomolake Ómasiloka like alémo zokamó. ⁹ Lá okago, ámina mikasi pokolaló kivisi vejená mukí lelitoka ikago, kelémo zokusimó. ¹⁰ Nenemú vejená muliikú lamaná giliake, netá mukí lehizilitamó. Lá ikago, ikani losive makole goloake helekago, vituni gamena alitokago, gapolokamú nosánetá ali vatí ilimiake, sipigú ali mili mili ilitamó.

Pauló Loma apatoka anitimó

¹¹ Ámina pokolaloka nouko, Alesatalia apatotí sipi gosohá nene golini golisi ámina pokolaloka minamó. Ámina sipímuni agokaló keí ómai netáini lopé izegipave liki avevezaha netá lilí amó. Leza nene áminagú itekunike, ¹² vunike nene, Silakusa numutoka anitunimó. Neneloka gamena losive makole minokunike, ¹³ goha sipigú itekunike, unamú zová zeko vunike, Lekio numutoka anitehá. Neneló gó lokago, lemegealokatí una aleake, lehelú oloko vigo, akokunike gó lokago gamena lositakó vunike Puteali numutó anitehá. ¹⁴ Anitekunike, áminaloka monó gele vejená ániogokimikuko, lilími milamó. Lilími milikago, gamena 7-a kezagi minunimó. Nenelotí otekunike, mikasigú vunike Loma apatoka novunike, ¹⁵ Izesuni vejenala zuhate gakote giliake, lugáa ake Apio hugumatoka hotu lunimó. Lugáa nene ake apá makó agulizá Hoteli Numuni Losive Makole netoka hotu luhá. Pauló nene ániogokimiake, mulunagú lamaná gilike Ómasi agepoka limó. ¹⁶ Nenelotí voko Loma numutoka anitekuko, kiapé makolímó gele amekago, itó gizapa ve makolímó gizapa otago, hanuva numukú minasimó.

Loma apakuka Pauló monó lo kimimó

¹⁷ Neneló numuni losive makole akoake, Zuta vetini monó gizapa venini sele lo kemekago, ikago, Pauló nene gakó láa loko lo kimimó: Nigivénegita, neza Zuta vejená nigivénegini netá golesa ma aleketamuve, itó avónegini mogonatagana ma ale golesa amumóza, keza gopa Loma vetini kigizakú nilími milikago, Zelusale numutoka kalapusí nememó. ¹⁸ Lá ikago, Loma vemate není mogonamú vitagá iake, hilitape liki amó nene hilito netá utó amigo, vinasinitanigi lamóza, ¹⁹ * Zuta ve keza géneka likago, není nigivénegikumú gakó imaneloka alekoko litove loko amumóza, keza alévoleka liake, nipilitahe loko Loma vetini agulizaki ve napámo gakóne lo hukative loko lumó. ²⁰ Nenemú nene ániogolikimikinake lekezagi logele hagele itune loko sele lo lekemekugo, ikave. Neza Isilae vejenalite ageva iki miniaká nia vemule liki nigizató nagá zikago nove. ²¹ Loko lo kemekago, keza láa liki lamó: Elaneloka Zutaia mikasiloka nia vete geí gakó luhuva netá lememave. Itó vejená makolite nenelotí iki geí mogonamú gakó golesa lago ma gelemune. ²² Nenemú geza gakó aleneitanimó nene, gezaka lokako gilitune loko nolune. Lá onoimóza, numutó namató vejenalite ámina monó gakó gosohakumú alivi letivi niago, gelenoune.

²³ Liki liake, alegesá itune liki gamena milamó nene alitokago, Zuta ve mukí nenete Paulo akoaká i numukú vauva aliki alegesá amó. Lá ikago, Ómasímó gizapa okimiakalímuni gakó lamaná nene neteká apí oake lo-loko vova vova noigo, limugusí zimó. Lo nokimike, Mosé lo hukoko li gakoki Ómasímuni agepagutí gakó liaká a vetini gakoki luhuva giza gakó gato nokimike, Izesukumú gili alévolé itave loko kagata alimó. ²⁴ Lá okago nene, lugáa nenete gakola gili alikago, lugáa nenete gili ahulamó. ²⁵ Lá iake liká ahuliká iki liminigi niago, Pauló nene gakó hamokó láa loko lo kimimó: Ómasímuni Sikalahulímó agepagutí gakó loaká i ve Isaiani alémo vávani okago, gakó gihila nene avotikini láa loko lo kimimóma neve:

²⁶ * Geza voko vejená mulusigú imane láa loko lo kemezo:
Lakagatatunú giliakaláa hanuva gilitamóza, gili hee laminigave.

Lokogómulatunú hanuva ániगतamóza, ániigi hee laminigave.

²⁷ Imane vejená keza kigika híze lí okago,
kagata molokago, kogómula likokago,
kogómulatunú netá matá ániigi hee hee lisá amave.

Kagatatunú netá matá ma gili hee lisá amave.

Kigikatunú netá makó gili hee lisá amave.

Lá iake, kigika ali viligisá amago, neza nana oko kelémo lamaná itove

²⁸ loko luhuva gizamóma nenazo, nenemú gakó makó lo likimitoze, gililo. Ómasímo lugutó vizeaká gapo vilimó nene hetoka vegenalitini mututoni neve. Kéisi vatí iki gili lamaná inigave. ²⁹ Loko Pauló lo ahulokago, keza limiake vamó.

³⁰ Pauló nene kilisimasi lositá nene Loma apatoka minake, ezáa netá matalatunú oko moloko oko minamó. Vegená keza iki viki iki minamó nene vatí iki ikave loko lo kemeake,

³¹ Ómasímini gasovaló minoakalímini gakó lo utó oko lo kímike, Guivahani Izesu Kílistoni gakó ale akutoko lo keme keme oko noigo, némini manámini itamago netá makó agupeló utó amimó.

Loma Vegenalitini Luhuva Pauló Gizo Kimimó

Loma vegená nónohá kimike gizo kimi gakó

¹ Neza Paulona Izesu Kilstó eza gelekélé veva nelémo moloake aí aposolo minatane loko sele lo nemeake, Ómasímíni gakó lamaná lo utó oko ale hutilí itane loko nelémo etó imó. ² Ámina monó nene Ómasímo alika nene utó itive loko gozapá lo moloake aí agepagutí gakó liaká a ve gala vizekago, monó gotola apazá pukugú luhuva gizamóma neve. ³ Ámina luhuva gizamó nene Ómasímíni gipala Guivahaníte Izesu Kilstokumú luhuva gizinámóma neve. Helegaloka áisi nene hanuva agupegi utó imó nene agulizaki ve Tevitini agapilámó keí holúikú utó imóma neve. ⁴ Itó helegaloka eza sikalahula gizopa lo minatímo Ómasímíni zámuzagi gipala gihila minámó nenémíni mogona nene heleake otikú nene utó o lamaná imó. ⁵ Izesu Kilstotoka gímizumómave loko Guivahanímó nasahilí onetake aposolo hoza lehizenetámó nene, monó lo kemekugo numutó namató vegená keza Ómasímú gili alévolé iki gili alitave loko nelémo etó imóma neve. ⁶ Lekelisi nene keí kigevékita niave. Izesu Kilstoni vegenala zuha lilí itave loko sele lo lekemeneimóma neve. ⁷ Loma numutoka Ómasímíni vegenala zuha lekeza mukitoka Ómasímo agika lekemeake apazá vegenala zuha lekelémo etó i vegená nene luhuva imane gizo nolukumuve.

Ameteho Ómasi itó Guivahani Izesu Kilstó aitokatí nasahilí itó hulu lekelitoka mino moloko minino.

Loma vegená ániगतove loko Ómasiloka limó

⁸ Gakó láa liki apí iki gililo. Lekeza mukitó Izesukumú gili alévolé inamó nenémíni gakola nene numutó namató vegená keza gilikago lamaná imó nenemú lekelikumú Ómasi agepoka linogo Izesu Kilstotoka loaká nouve. ⁹ Neza nene gipalámíni gakó lamaná noluke, nigikatanún Ómasi gelekélé omiaká noumó nene Ómasímo geleneive. Aí avogisalo gakó imane lokugo gililo: ¹⁰ Neza nene numuna loaká nou gamena nene lekelikumú geleaká nouve. Lá nouke, Ómasímo geleneitó netimóma nene gapo nelepezekiko, lekelitoka vitöhe lokomú Ómasiloka loaká nouve. ¹¹ Láa loko nolumó nene eza nene lekelí voko ániگoleketanogo geleaká nouve. Vokinake, monolímíni zámuzá lehizenetámó nene gona moloko lekemekugo monokú alévolé iki minatave loko noluve. ¹² Gakó lo nolukumumó nenémíni mogona lá noive: Neza lekelitoka vokugo, Izesunimú gele alévolé unimó nenémíni gihiláa eza ániگiko eza ániگiko okinake, luhusate ale kii loko minatune loko noluve.

¹³ * Nigivénegita, není mogonamú gili guni itave loko láa loko lo nolukumuve: Hetoka vegená lugáaloka oko moloko oaká noumó áminagó oko lekelitoka vinake, monó hozámíni gihila makó ale utó itohe loko geleaká noumóza, vitove loko nougo nene, netá makolímó gapo hize lí onimikago minoaká nouve. ¹⁴ Neza numuká vegenaki matúini koló o mina vegenaki, itó sukulu la vegenaki sukulu lama vegenaki monó lainim-oketatane loko lone-tamó nenazo, ámina genaváa nenitoka ha minokave. ¹⁵ Nenemú Loma vegená lekelitoka áminagó oko Izesuni gakó lamaná lo likimitove loko nigikámo vávani okave.

Gakó lamanalímíni zámuzá

¹⁶ * Ámina gakó lamaná nene Ómasímíni zámuzá nego Izesukumú gili alévolé ita vegená kugutó viginogo ive. Zuta vegená apí oko lá okimioko hetoka vegenaki lá oketanogo ive. Nenemú neza ámina gakó lamaná lo utó itokumú novoza helesá amuve. ¹⁷ * Ámina gakó lamanakú nene Ómasímíni avogisalo lihimate asú olimikago minatuni mogonáa utó oaká noive. Aí avogisalo lihimate asú olimikago minoaká nenémo gele alévolé oakakukó neve. Nenemú monó gotolaú gakó makó láa liki gizinámóma neve:

Gili alévolé ikamómave loko Ómasímíni avogisalo lihímáini asú okimikago minatamó nenete alévolé iki miniki aliki inigave.

Vegená mukitoka lihimategi nouve

¹⁸ Nenémíni mogonáa lá oko nene. Vegená kigikagú nene monó nomigo, haitopaitó netá golesa aliki minake, Ómasímíni monó gihila ali gopa napa iki miniaká niave. Lá niakumú Ómasímo izapaló molamó nenémíni mogona okulumakutí ale utó okave. ¹⁹ Ómasímíni mogona lugáa nene ezáa ale utó oketamó nenazo, kigikagú hanuva utó oaká noive. ²⁰ Ómasi áisi nene vegenalita ániگamoakalímíni mogona nene apí ike mikasi ale utó i gamenalotí ale utó imó nene aí alévolé zámuzá itó ametameni haitó apazá nemó nene utó o lamaná

* 1:13: Apo 19:21 * 1:16: Mak 8:38 * 1:17: Hip 2:4

okago, vegenalite ezáa ale utó i netalímíni luhuva ániagiake, aí mogonamú gili vevesiaká niave. Nenemú vegená lugáa keza gili gopa iki Ómasímíni mogonamú gele vevesamune liki litamoláa nomive. ²¹ * Keza Ómasímíni mogona gílinamóza, gilitigí gelemotigí iake, noamimó gelekago, agepoka lisá amave. Lá iake, kagata gelemó nene gopá napa okago, kígikagú límugusi zekago, negi hiziki mihina iaká niave. ²² Lá niake, lagatagi nouné liki liaká niamóza, negi hiziaká niave. ²³ * Lá iake, Ómasi alévolé ve nenémíni lapaná ali otiki gupá zi aminakutí kemegesa amiake, gaha namatini, itó gosihakahalitini, itó tolova iaká vegenalitini vogunahanáini líli iake, gupá zi kimiki miniaká niave.

²⁴ Nenemú Ómasímó ahulo taiza okimiake kiviholo ahulokago, kezáini kugupetunú sihana netá ali utó iake, kígika kagatámo kumu hili netá ali minake, gumesisi mokoló mogona haitopaitó ali utó ake iki míliki iki minake, ²⁵ Ómasímíni gakó gíhila kemegesa amiake, soza gakó ali gúiaká niave. Lá iake kelémo utó i ve améipini nene ahulimiake, netá matá ezáa ale utó i netá nene gupá zi amiki agepoka líli geleké imiaká niave. Kee, Ómasi agepoka loko mino lúaló moloko minatunimó nene etanogo ive. Lamaná.

²⁶ Nenemú Ómasímó ahulo hotó okimikago, kumu hilitó hilitó sihana netá ali utó amó. Lá ake, vená keza gapo Ómasímó kelepipizimó nene ahuliake, haitó gapoló vake kezáini kugupetunú alemoaká suni ali utó amó. ²⁷ Ámináminiki ve keza nene ve vená oko minoaká nene ahuliake, kígikagú gumesisi mokoló mogonamú ló napa lokago, kezáikó mihina ake sihana netá haitolímíni ali utó iki minamó. Lá iake, ali gopá napa amó nenémíni meinávaa ámina avotigitó alemó.

²⁸ Itó lá iake, Ómasímíni mogona gilitigí gelemotigí amómave loko Ómasímó ahulo hotó okimikago, kígika kagata nene gopa oakalímíni nagakú minake netá alemoakalímíni ali utó iki minamó. ²⁹ Lá ake nene, netá golesa haitopaitolímíni ali kumupiló míliake, henokanonimú molo hukahuka oaká, mukahá, kemekugú noaká, vegená kepele heleaká, lova ale utó oaká, kogoka vízeaká, aleko mumusopa zeko loaká, notuni mohona oko kemegeka loaká, ³⁰ alevo galatovo oaká, Ómasi mukahá apeleaká, kugupemú gelego iteaká, kezáini netá matánimimú kogoliza viziki kugupe ali otiaká, golesa netá nenémíni gapováa gosohá ali utó iake, izóikini améikini gakó gili ahuliake, ³¹ kígika kagata nomimó keza gakó lamó nene ha oaká noigo, kígikatunú nasahilí amake mílumaváini gíliki kígika hizi kemema vegená niave. ³² Ómasímó vegená nenémínáate nogosani natave loko lo hukoko lí gakó gílinamóza, gíli ahuliake, ámina netá golesa gopa ali minamóza, nene netakó alemave. Vegená lugáate ámina netá alikago, etokave liake, keikumú gílikago, iteaká noive.

2

Ómasímó lihimatemú ale vevesoko goní olimiaká noive

¹ * Nenemú vémage, Zuta ve noanitika itó hetoka ve noanitika, geza mogonakamú hize lí oko gakó litanimoláa nomive. Vegená lugáa keza lihima ali utó niago mogonáini lotuva legeaká noanimóza, gezagi áminagó oko golesa netá aleaká noanimó nene gezakamuki lokane. ² Ómasímó nenémíni iaká nia vegenalitini lihímáinimú ale vevesoko goní okimiaká noive loko gelenoune. ³ Lá onomóza, vémage, vegená lugáa nenete netá golesa aliaká niago mogonáini lutuva legekanike nene gakó loaká noanimóza, gezagi áminagó oko golesa netá alekanike Ómasímó asene zenetative loko gelenape, olo. ⁴ Ómasi eza nene nasahililagi huluvagi vaí o nego, litá oko nogosani gemesá amíve. Nenemú gelekako ha netá loló okahe, olo. Geza nene gígika ale viligatane loko Ómasímó asega zike hulu zou gemeaká noimó nene gelemape. ⁵ Geza negi nagí hizeko gígika hize lí okago gígika ale viligamanike, ló lónogó anike, Ómasímíni izapaló molati netá ale nupa oaká noane. Gamena napaló Ómasímó nogosani limití gamenaló nene eza lihimatemú ale vevesoko lo hukati gakó utó o lamaná noiko, nogosani giminogo ive. ⁶ * Ómasímó vegenalita oko moloko unitímíni meinava liminogo ive. ⁷ Vegená lugáa keza Ómasímíni lapaná alitune liki, itó Ómasímó lugulizá ale otitive liki, itó alévolé apá lehizeletative liki goselé kepelemigo amuza míliki mogona lamaná líli ítamó nene, alévolé kemetameni lehizeketanogo ive. ⁸ Itó Ómasímíni gakó gíhila gili ahuliaká vegená gínikaha, netá golesa palasa ali minatamó keitoka Ómasímó izapaló molokiko mukahá netá ale utó moloko nogosani kiminogo ive. ⁹ Lá noiko, gasovagi netá míluma netá nene netá golesa aliaká nia vegená mukitoka kumupiló itinogo ive. Zuta vegenatoka utó okoko nene, hetoka vegenatokagi utó inogo ive. ¹⁰ Itó vevesiki miniki mogona lamaná líli iki minatamó nene, Zuta vegenaki hetoka vegenaki mukitó lapaná itó

* 1:21: Epe 4:17-18

* 1:23: Gapo 4:16-18

* 2:1: Mak 7:1; Luk 6:37

* 2:6: Age 62:12

hulu lehezikimikoko kugulizá ale otinogo ive. ^{11*} Ómasi nenémo vejenakumú gilimó iteká lemeká osá amive. Hamolímíni okogó gona mololetanogo ive.

¹²⁻¹³ Mosé lo hukoko li gakó kagatatunukó giliaká nia vejená Ómasímo ániagamó nene vevesosá amive. Mosé lo hukoko li gakó gili alita vejená keza vevesiki minanigave loko linogo ive. Nenemú Mosé lo hukoko li gakó gelemake golesa netá aliki miniaká niamó keza mukitoka gili vevesamiki miniki gopa tolova inigave. Itó Mosé lo hukoko li gakó gilinake golesa netá aliaká nia vejená nene Mosé lo hukoko li gakokutí gona moloko goní oketanogo ive. ¹⁴ Hetoka vejená Mosé lo hukoko li gakó gelema vejená nene, kezáini kagata giliki lo hukoko li gakó nene hanuva ámegetikago, lo huka gakó kigikagú minamó nenémíni mogona utó oaká noive. ¹⁵ Mosé lo hukoko li gakokú nenémíni iki miliki itave loko Ómasímo li gakó nene kigikagú molonoimóma neve. Nenémíni mogona ali utó iaká niave. Lo hukoko li gakó nene kigikagú molokamole liki kigika nenémo ale viligá aligá ike, lugaloka géneka loaká noive, itó lugaloka ámina mogona ha lilí ilo loko loaká noive. ¹⁶ Gamena napaló ale vevesoko gona mololetanogo ive. Ómasímo Izesu Kilistoni amiselekiko, lemeko kigikagú asuguná minoaká noi gakó ale utó inogo ive. Neza Izesuni gakó lamaná loaká noutó noutó nene, áminagó oko lo utó oaká nouve.

Zuta vegi Ómasímo lo hukoko li gakoki

¹⁷ Gezakamú Zuta ve nouve loko lanitika, Mosé lo hukoko li gakó nenémo gotokaló za loló okago, leheta okanike minoaká noane. Lá okanike, neza Ómasímíni mogona gele vevesonouve loko lokanike gugupe aleko iteká noane. ¹⁸ Lá okanike, Ómasímo oko moloko itane loko gili netá nene gelekane, itó lo hukoko li gakokú apí igimikago geleaká noane. ¹⁹ Itó lá okanike gezakamú láa loko loaká noane: Nénisi nene monó gelemiki gatizá mina vejená nene hanuva gapo vitave loko kelémo lolo inogo uve loko loaká noane. Itó límugusigú niamó hize hanatokimiaká nouve loko loaká noane. ²⁰ Vegená kigika gopa imó nene kelémo hee litove loko loaká noane. Monó gelemake izegipa namunigítana iki mina vejená nene apí okimitove loko loaká noane. Neza Mosé lo hukoko li gakó alenoumó nenazo, nenegú geleakalímíni itó gakó gihilámíni ametamenía alekuke nouve loko loaká noane. ²¹ Geza láa loko loaká noanitika, vejená lugáa monó apí okemeaká noanike, gezaka gígika nene alémo hehe losá amane. Geza vejenakumú gumina alemilo loko lo kemeaká anike, géisi nene gumina alesá amape. ²² Geza nene vego venako huki ezega emega amilizo loko loaká noanike, géisi goha ze huko ezega emega oaká noape. Geza nene soza ómai netakumú aleko letoaká noanimóza, soza ómai netalímíni zagusavegutí gumina aleaká noape. ²³ Geza nene Ómasímo lo huka gakó gelenouve lokanike, gugupe aleko iteká noanimó nenazo, lo huka gakó nene gele ahulokanike, géisi nene Ómasi goihá giligili omiaká noane. ^{24*} Nenemú lekeza Zuta vejenakumú monó gotoláu luhuva láa liki gizinámóma neve:

Hetoka vejená nenete lekelisi iki miliki a suni ániagiake, Ómasi aliki letiaká niave.

²⁵ Mosé lo hukoko li gakó gele alitanimó nene gugupeló Ómasímíni anosa miligitamó nenémo gihila zinogo ive. Lo huka gakó avutá itanimó nene, gugupeló Ómasímíni anosa miligitamó nemóza, miligitamamó gilino gove. ²⁶ Lá onimó nenazo, gakó nenémíni lugaloka lá oko neve: Hetoka vejená makó keza Mosé lo hukoko li gakokú vevesoaká gakó gili alitamó nenete kugupeló Ómasímíni anosagi minamitamóza, Ómasímo keikumú gelekiko anosagi minamó gilino gove. ²⁷ Lá okiko, Ómasímíni anosagi nomi vejená keza Mosé lo huka gakó ámegetoaká noani ve Zuta ve gei mogonaka lotuva liginigave. Geza nene monó pepa ale minanike Ómasímíni anosa gugupeló minago minanike, Mosé lo huka gakó nene gele ahuloaká noanikumú gei mogonaka lotuva liginigave. ²⁸ Makó keza hanuva kugupetunú Zuta vejená kemetameni iko minatamó nene Zuta vejená gihila niamave. Itó Ómasímíni anosa kugupelokagó minatimó nenémo netá gihila nomive. ^{29*} Kigikagú Zuta ve kemetameni iki minatamó nene, Zuta vejená gihila minanigave. Lo huka gakolímíni anosa nene lugupetunukó ale minoaká nenémo netá gihila nomive. Ligikagú emane Sikalahulimíni anosa ale minoaká nenémo netá gihila neve. Ve nenémínámú vegenalita guluko lamaná oakaláa nomive. Ómasímo giligo lamaná oakaláa neve.

3

¹ Nenemú Ómasímíni agómulaló Zuta vejená leza hetoka vejená kivilegeko noupe. Itó lugupeló Ómasímíni anosa nemó nene ha hetá nehe. ² Lá oko nomive. Nenémo haitopaitolímínoko netá gihila neve. Ómasi eza Zuta vejená haitopaitó netá

* 2:11: Gapo 10:17 * 2:24: Isa 52:5 * 2:29: Gapo 30:6

lehizeletonoikutí nene Ómasímini gako lehizeletamó nenémo iteko neve. ³ Itó Zuta vejená lugáa keza Izesukumú gili alévolé amakumú nene nanave litune. Gili alévolé amatimo nene Ómasi eza nónohá zeletative loko lo mola gako ale ahulokahe. ⁴ * Óve, lá oko nomive. Vegená mukitó keza sozaló ve minatamóza, Ómasímo eza lokago alévolé oaká ve noive loko gilitune. Nenemú monó gotolaú Ómasimú láa liki gizinámoma neve: Gakó makó nolako, gelekinake, nene gihlave loko gelekinake hize lé itune.

Mogonakamú lotuva ligikikoma nene, géisi kiviliginogo ane.

⁵ Zuta vejená leza oko moloko nounimó nene hee lamitimo Ómasímini mogona hee limó nenémini mogona ale utó oaká noinazo, nenemú nanave litune. Ómasímini mogona lá oko minokanazo, nenemú eza nogosani limitimó nene etaminogo ive loko litupe. Mikasiuka vete láa liki liaká niamó nenéminoko gako láa loko nolumóza, ⁶ mogonáa lá oko nomive. Ómasímini mogona hee loko minamilina, mikasiuka vejená nana oko goní oletoko nogosani limilíne.

⁷ Loko lokugo ve makolite láa liki litave: Soza mogonate nenémo Ómasímo gako lokago alévolé oaká noitímini mogona ale utó okago Ómasímini lapaná ale oteaká noinazo, Ómasímo lihimatemú nanamú goní oletative. ⁸ Geí gako nene gihila netimó nene lihima netá golesa loló oloko vosakutí Ómasímo miluma geleletatímo lelitoka vaí okiko agepoka lituni netá lamaná goha utó itive liki litave. Nenikumú nene láa loko loaká noane liki lotoka hiziki aveté iki líli ali iaká niave. Némika liki liaká nia vejená nene Ómasímo hee loko goní oketanogo ive.

Hehe liki nia vejená ma niamave

⁹ Nenemú nana ive. Ómasímini agómulaló Zuta vejenalita hetoka vejená kivilegeko noupe. Nenémini oko nomive. Zuta vejenaki hetoka vejenaki leza mukitó lihima netalímini gelekelelóa noute loko lo utó oko lo lekemekuve. ¹⁰ * Nenémini mogonamú monó gotolaú gako makó lá oko neve:

Ve makolímó hee hee loko minamive, keké.

¹¹ Makolímó gele vevesoko minamive.

Makolímó Ómasimú sele loko vitagá osá amive.

¹² Mukitó Ómasímini kemegesa amikave.

Pisila nomimokó niave.

Makolímó hee loko oko moloko osá amive. Ma nomive keké.

¹³ * Kigikagutí gako golesa iteaká noimó nenémo gonosi anuva nenéminoko neve. Genezáini nenémo ali viligá aligá ikago, kogoka kagaka vizeaká gako iteaká noive. Kegepagutí nene gipe lakegusa gako utó oaká noive.

¹⁴ * Kegepagú nene usi vizeaká gako, ekesá gako vávani oko utó oaká noive.

¹⁵ * Lova ali utó iki kipilínigi kigisa agilaló lisiaká niave.

¹⁶ Mihina atoka vauna hizeaká noive.

¹⁷ Hulu gapo lamaná nene gili vevesisá amave.

¹⁸ * Ómasimú lelegesá ligitive liki kagata gilísá amave.

¹⁹ Itó láa loko geleaká noute: Monó gotolaú gako gizinámó nenémo Ómasímo lo huka gako amelagitoka vo aleaká noive. Lá okago nene, vejená mukitoka mogonate lotuva legekago, gako litunimoláa nomive. Itó Ómasímini avogisaló mikasigú vejená mukitoka lihimategi noute. ²⁰ * Ómasímo lo huka gako nenémo lihimateve lelepizeaká noimó nenazo, nenemú ve makolímó Ómasímo lo huka gako gele alekiko nenémo lihimateve asú omiakaláa nomive.

Gele alévolé unikumule loko lihimate asú olimikago minatune

²¹ Lá oko noimóza, itínasa nene Ómasímo lihimate asú oletati gapo ale utó onoimóza, Ómasímo lo huka gako ámegetoaká gapogutí nomive. Nene gapomú nene Moseki Ómasímini agepagutí gako líli ali vete luhuva gizi miliake hizi lé amóza, itína utó o lamaná okave.

²² * Lá oko neve: Izesu Kilistokumú gili alévolé amómave loko lihimateve asú okimikago niave loko loaká noive. Gili alévolé a vejená mukitoka lá okimiaká noive. Zuta vejenaki hetoka vejenaki mogonate haitopaitolímínoko nomive. Hamolímíni oko neve. ²³ Mukitoka netá golesa alunikeve loko gonanalivagi lapanakú vo holosá amune. ²⁴ Izesu Kilistó eza lelí lihima meina hizeletamómave loko Ómasímo hagítana oko nasahilí oletatímó lihimate asú olimikago minanogo une. ²⁵ Aí nene ale utó oko lelepizekago, Izesú eza golani lepíke

* 3:4: Age 51:4 * 3:10: Age 14:1-3, 53:1-3 * 3:13: Age 5:9, 140:3 * 3:14: Age 10:7 * 3:15: Isa 59:7-8
* 3:18: Age 36:1 * 3:20: Age 143:2; Gal 2:16 * 3:22: Gal 2:16

Ómasi guguni gizo amike, golesa netate nene nagamí zelimikago, aikumú gili alévolé ita vegená mukitoka nenémini gihiláa utó oaká noive. Itó lá imó nene Ómasímo golesa netá nene gamena hána ale-loko voko minuhá gamena zou loko minake asele zelimiake nogosani lememike mino-loko voko noitímini mogona nene vevesave loko lelepizimó. ²⁶ Lá noike Izesukumú gili alévolé itamó keza lihimáini asú okimikiko minata mogona itó ezáa vevesoko oko moloko oaká noi mogona imane gamenaló utó itive loko lá olimiaká noive.

²⁷ Mosé lo huka gakó gele aleakakú negopa, Izesukumú gele alévolé oakakú lihimate asú olimikago minatune. Nenemú lugupe aleko iteakaláa nene asú okamóma neve. Ámina gapo nene Ómasímo hize lí okamóma neve. ²⁸ Nene gakokumú láa loko gilitunize: Izesukumú gele alévolé osatímo Ómasímo gelekiko, lihimavate asú olimikiko minanogo une. Ómasímo lo huka gakó gele aleakakú nomive. ²⁹⁻³⁰ * Ómasi aí mogona nene hamokó nenazo, Zuta vegená itó hetoka vegená mukitoka Izesunimú gele alévolé unikumule loko lihima moletaminogo ive. Lá onoinazo, Ómasi eza nene Zuta vegená lelí Ómasígó nomive. Ómasi nene Zuta vegenaki hetoka vegenaki mukitó Ómasile noive. ³¹ Nenemú gele alévolé oaká gakó ale otekunike lo huka gakó pelesa zeaká noupe. Lá oko nomive, keké. Lo huka gakó nene hize lé oaká nounge.

4

Avalahá lihimate asú olimikiko minatuni gapogú ale goí imó

¹ Lihimate asú olimikiko minatuni netakumú avoteho Avalahani mogonamú lo moloko lo likimitoze. ² Aí oko molokogú nene netá lamanakó oko moloko ikumule loko Ómasi eza lihimavala asú omikave loko lilina, Avalahá ezáa agupe aleko itilinamóza, nenéminoko nomive. Ómasímini avogisaló ezáa agupe aleko itemive. ³ * Nenemú monó gotolaú gakó láa liki gizinamóma neve:

Avalahá eza Ómasimú gele alévolé okago, nenemule loko Ómasímo gelekago, lihimavala asú omikago minamó neve.

⁴ Ve hanokó eza hoza alekiko, meinaváa amitakumú nene hanuvamú namive liki laminigave. Hoza alitímini meinaváa namive liki litave. ⁵ Makó eza mogona lamaná ale-loko vitimó nenegú voko leheta amoko Ómasi eza ve golesatini lihimaváini asú okimiaká noi vemú gele alévolé itimó nene Ómasímo lihimavala ale ahulomikuve loko linogo ive. ⁶ Tevití eza nene áminagó oko Ómasímo ve makó mogona lamaná ali-liko vitakumú gelemoko lihimaváini asú okimikuve loko loketa ve makolite nene kogoliza vizitakumú láa loko luhuva gizamóma neve:

⁷ * Lihimaváini ahuloketakumú, itó golesa netáini gilatoketakumú giliake kogoliza viziaká niave.

⁸ Vegená makó nene Ómasímo lihimáini moloketonamimoláa keza kogoliza viziaká niave.

⁹ Ámina logoliza vizeaká netá nene Ómasímini anosagi nominuni ve Zuta vegená lelikó nomive. Hetoka vegenaki mukitó neve. Avalahakumú láa loko geleaká nounge: Eza nene Ómasimú gele alévolé imómave loko lihimavaka asú ogimikuve loko lotamó neve. ¹⁰ Nana gamenaló lá imó neve. Agupeló Ómasímini anosavagi noigo nehe, itó nomigo noigo nehe. Nomigo noigo lá omikamó nenazo, nenemú ámina anosa alitímo lihimala asú otamimó neve loko gelenounge. ¹¹ * Áisi nene agupeló Ómasímini anosavagi nomimó minake, Ómasimú gele alévolé okago, Ómasímo gelekago, lihima asú otamó nenémini mogona alapize asú oake, alika nene ámina anosa amimó. Avalahá eza lá ike, kugupeló Ómasímini anosa nomi vegená keza Ómasimú gili alévolé ita vegenalitini améipo loló onoinomóma neve. Kezamuki Ómasímo gelekago, lihimáini asú okimikiko minatave loko lokimikave. ¹² Lá okamóza, anosagi nounimoláa lelí ametehogi noive. Zuta vegená leza lugupeló Ómasímini anosagi nounikumule loko nomive. Gele alévolé oaká gapo nene avoteho Avalahá eza agupeló Ómasímini anosa velesá molamike apí oko veleleta gapogú vunike gele alévolé unikeve loko anosagi nounimoláa lelí ametehe noive.

Gele alévolé unikumú Ómasímo lo mololeta netá aleaká nounge.

¹³ * Ómasímo Avalahanigí agapilamolagi mikasi ali lá itave loko lo moloketamó nene, Mosé lo huka gakó ámegetakumú nomive. Ómasimú gele alévolé ikumú Ómasímo lihimavaka asú ogimikugo vevesoko minokane loko lo amimó. ¹⁴ * Mikasi ali lá itave loko lo moloketamó nene lo huka gakó ámegeta vegenalitini mututoni loló ilina, gili alévolé amó

* **3:29-30:** Gapo 6:4; Gal 3:20 * **4:3:** Apí 15:6; Gal 3:6 * **4:7:** Age 32:1-2 * **4:11:** Apí 17:10 * **4:13:** Apí 17:4-6, 22:18-19; Gal 3:29 * **4:14:** Gal 3:18

nenémo pisila minamimó loló iline, itó lo mololeta gakó nene ha netá loló iline. ¹⁵ Lo huka gakokú nene Ómasímo gili alemita vejená nene goní oketanogo ive loko lonoimóma neve. Lo hukoko li gakó nene vejenatoka nomitimó nene ámina gakó gele ahuloakaláa minaminogo ive.

¹⁶* Nenemú netá mololetamó nene alitune loko gele alévolé unimómave loko ámina netá lelitoka utó inogo ive. Nene nanamú. Áisi nasahilí olimikakeve loko, Avalahani agapilamó lelí mukitoka nene lo mola netá voko alévolé inogo ive. Lo huka gakó ámegeta vejená keikó nomive. Avalahá nene Ómasímíni avogisaló lelí mukító avoteho minake, gele alévolé oaká gapo veleletamó nene, ámina gapogú voaká nouni vejená Zuta vejenaki hetoka vejenaki leza mukító netá neve. ¹⁷* Nenemú Ómasímo Avalahani láa loko lo moloko lo ami gakó nene monó gotolaú láa liki gizinamóma neve:

Nénisi nene geza numutó namató vetini améipo minatane loko loló nogetuve.

¹⁸* Avalahá helenosakutí lelémo otitove loko hanuva lelémo oteaká noi vemú, itó utó ami netá nene aí gakotó utó oaká noi vemú gele alévolé imó neve. Itó agapilamó zuha hizi hutilí itave loko láa loko lo molota gakolímó gihila ziti mogona nomigo, Avalahá gopa gele alévolé oko agata losi gelemike gizapa oko minamó. Gagapilamó nene sonohí nenémíni utó iki minanigave loko li gakotó numutó namató ve mukilitini avóipo loló oko minatikumú agata losi gelemike ageva oko minamó. ¹⁹* Lá oake, Avalahani kilisimasiva nene 100 minake, ozaha molokago, Salá nene gelehosi moloake izegipa getati gamena asú okamóza, itó ezáa agupe gíslupa molokamóza, lá okamómave loko Ómasímú gele alévolé imó nene gologolo samimó. ²⁰ Ómasímo agapilamó zuhamú lo moloko lo ami gakó nene gelekago, haha amimó. Hanuva gele alévolé oakakú amuza moloko minake, Ómasi agepoka loko minamó. ²¹ Eza Ómasímú giligo, itekago, Ómasímo netá makó loló itove loko nogómulaló lo molonetamó nenazo, gihila zinogo ive loko gilimó. ²² Nenemú Avalahá gele alévolé imómave loko monó gotolaú Ómasímo gelekago lihimavala asú omikago minamó neve liki luhuva gizinamó neve. ²³ Itó Ómasímo gilimó nene lihimavala asú otamó neve loko li gakó nene Avalahakumukó nomive. ²⁴ Lezamuki luhuva gizamó neve. Guivahani Izesú heleneikutí alémo oti ve Ómasímú gele alévolé okuko, lelí nene ámináminoko lihimate asú olimikave loko loletanogo ive. ²⁵* Izesuni nene lelí lihimamule liki heleaká gapoló alími milamóma neve. Itó lihimate asú olimikamole loko Ómasímo alémo otimóma neve.

5

Lihimate asú olimikago nominuhatímíni gihiláa

¹ Leza Izesunimú gele alévolé unimómave loko Ómasímo lihimate asú olimikave loko gelekago, Guivahani Izesu Kilistotoka voko gímizekumike Ómasímíni hulugú nounge. ² Izesú áisi nene gahé segelimikago gele alévolé unikeve loko Ómasímíni nasahilikú nominune. Lá oko nounike, Ómasímíni lapaná alitune loko lagata losi gelemoko ageva oko logoliza vizeko nounge. ³ Itó nenegó nomive. Gasova netalímíni agikagú minoko aleko nounike logoliza novizune. Lá nounike, láa loko geleaká nounge: Gasovagi netakú minoko aleko nouhá nenémo lagele loló okiko goselé lepelemiko minanogo une. ⁴ Goselé lepelemitimó nenémo alévolé okuko, Ómasímo mogonatémú gele lamaná inogo ive. Itó mogonatémú gele lamaná itimó nenémo okulumakú henonimú lagata losi gelemoko ageva oaká netá ale utó oaká noive. ⁵ Itó Sikalahú lehizeletamó nenémo Ómasímo agika lemeaká noi netá ligikagú leke vaí imó nenazo, nenemú ageva oko minoaká nouhá netakumú nene hanuva ageva osá amune. ⁶ Ómasímo mola gamena alitokago, leza zámuzate nomigo gámémé onouko, Kilistó eza vejená golesa lelikumú hilimó. ⁷ Ve hee loko minati vemule voko vávani oko heleakaláa nomimóza, ve lamanakumule loko heleakaláa gena otigí oko utó ilinamó nemóza, ⁸ Ómasi áisi nene agika limi mogona lelepizimó nene golotuva netá ale-loko novuko Kilistó lelikumule loko nohiligo agika lelitoka mola mogona nene ale utó imóma neve. ⁹ Lá noike, Kilistó eza golani lepikave loko lelí lihimavala ahulo asú oletamó nene gihila nenazo, gamena napaló Ómasímo lihimatémíni meinava limitikutí gologí oletati gakó nene lamaná gihila neve. ¹⁰ Lélisi nene Ómasímíni gala veva nouko, gipala hilike lezagi Ómasigi goha lelémo apizimó nene gihila nenazo, lelémo apizekago, Izesú nene gosohá ametamenigi minoko aleko noitímú lugutó vizekago nounge loko gele alévolé onounge. ¹¹ Itó

* 4:16: Gal 3:7 * 4:17: Apí 17:5 * 4:18: Apí 15:5 * 4:19: Apí 17:17 * 4:25: Isa 53:4-5

nenegó nomive. Guivahanite Izesu Kilistó lugutó vizike itína Ómasigi lelémo apizekago leza Ómasimú logoliza vizeaká nouné.

Atako Kilistoko

¹² * Nenemú láa loko gilitune: Ve hamó Atakumú lihimá netá nene mikasigú utó imó, itó golesa netá alimó nenémo heleaká netá utó imó. Lá okago, vegená mukilite lihimá alinatímó heleaká netá nene vegená mukitoka puu loko vo alimó. ¹³ Mosé lo hukoko li gakó velesá utó onamigo lihimá netá golesa hanuva mino-loko iteko minamóza, lo huka gakó makó nomitimó nene lihimáinimú loakaláa nomive. ¹⁴ Lá onoimóza, heleaká netá nenémo Atatokatí apí oake vegená hizi hutilí iki minimi itemó keitoka agulizaki ve loló oketoko minamó. Loló oketoko noigo, Mosé utó imó. Atá nene Ómasimó lo hukota gakó pelevesava zimó nenéminiki alemake haitolímíniki lihimá netá ale vegeatoka heleaká netalímó agulizaki ve loló oketoko minamó.

Atá eza alika utó iti véminí avevezahaváa imóza, ¹⁵ lelegí iki minamasive. Ómasimó nasahilí oletake lihimate asú olimiaká netá hagítana lehizelimiaká noimó nenémo Atá lihimá netá alimó nene avilegeneive. Ve hámakolímó lihimá alekago vegená mukitoka heleaká netá utó o asú imó. Lá onoimóza, Ómasi eza nasahilí amelaho minoake Atá lihimá alimó nene avilegeake, ve hámakó Izesu Kilistóni nasahilíla vegená mukitoka lehizeletamó. ¹⁶ Itó Ómasimó nasahilí lehizeletamó nenémo Atá lihimá netá alimó nene avilegeake iteko neve. Hamolímínoko nomive. Ve hamolímó lihimá netá alimó nenémo puu likumule loko Ómasimó lihimá lemeaká mogona utó okamóza, vegená mukilite lihimá netá alikago, Ómasimó aí avogisaló lihimate asú olimikiko minatuní netá mukí hagítana lehizeletoimóma neve. ¹⁷ Ve hamó nenémo lihimá netá alekago heleaká netá lelitoka utó oake agulizaki ve loló imóza, ve hamó Izesu Kilistokumule loko alévolé apakú lugulizaki ve loló okínake aí lapaná izá moloko alituní netá nenémo avilegekave. Leza Ómasímíní nasahilí itó aí avogisaló lihimate asú olimikiko minatuní netá ale lá ituní vegená neneta lá inogo une.

¹⁸ Nenemú ve hamó Atá lihimá netá alekago, Ómasimó lihimá lemeaká mogona nene vegená mukitoka utó imó. Ámináminoko ve hamokolímó hee lo mina netá alikumule loko lihimate asú olimikago minoko alévolé lemetamení minatuní netá hagítana lehizeletamóma neve. ¹⁹ Ve hamolímó Ómasímíní gakó pelevesava zekago vegená mukitoka golesa o asú unimó. Ámina oko ve hamolímó amelahíní gakó gele aleko ámegetokago mukitoka lihimavate asú olimikiko minanogo une. ²⁰ Itó Mosé lo hukoko li gakó miní amekago, golesa netate holutegú puu loko vikumú gelenounimóza, golesa netá nene hutilí oko nego, Ómasímíní nasahilí nenémo avilegeke iteko neve. ²¹ Lá oake, gihila lá oko utó itive loko lihimá netá nenémo heleaká netá utó itive loko amakuka víke agulizaki ve loló imó. Ámináminí oko Ómasímíní nasahilí nenémo Ómasímíní avogisaló lihimá asú olimikago noínake, alévolé lemetamení Guivahanite Izesu Kilistotokatí alinogo une.

6

Lihima netá aleakakumú huluhá itó Kilistogegi otenouhá geleneive

¹ Nenemú nanave litune. Ómasímíní nasahilí nenémo utó oko napa oko hutilí itive loko lihimá netalímíní hozaváa aleloko vitupe. ² Eé, lá oko nomive, keké. Lihima netá aleakakumú helehá gilimó nenazo, nenemú goha nana oko miní ameko lihimá netá alitune. ³ Lekeza láa líki gilísá amahe: Monó nagamí nohulunike Izesu Kilistotoka voko miní amunimó nene hilikú miní amuháma neve. ⁴ * Nenemú ametehíní lapaná nenémo Kilistóni heleneikutí alémo mómoká okago otimóma neve. Áminagó oko lezagi oteko gosohá lemetamení minatune loko leza monó nagamí nohulunike nene, Kilistogegi heleko galegú nakuhá loló oaká noive.

⁵ Leza nene Kilistogegi apizekunike eza otimó nenéminoko lezagi otinogo une. ⁶ Láa loko geleaká nouné: Lugupeloka ligikaloka lihimá netalímíní zámuza asú itive loko, itó lihimá netalímíní gelekeleléa minamítune loko litaha ligika nene Izesugégi zohota zaló apilínamó neve. ⁷ Makó eza helekiko, lihimá netakumú mumuzó oakakutí akagá omikiko minanogo ive. ⁸ Kilistó hilitímínoko lezagi helekunike ezagi minoko aleko inogo une loko gele zagenoune. ⁹ Itó Kilistóni mogona geleaká nouné. Heleneikutí alémo otimó nenazo, goha heleinogó ive. Heleaká netalímó goha Izesu Kilistóni avilegemínogó ive. ¹⁰ Hilimó nene lihimá netakumú gamena hamó helekago, mota asú okave. Lá oake, itína minoko aleko noimó nene, Ómasímíní agulizá ale otitove loko geleneive. ¹¹ Lekezatinimú áminagó

iki láa liki gililo: Lihima netá aleakakumú helehá gilimó nenazo, nenemú Izesu Kilistogegi otekunike apizekunike Ómasímini agulizá ale otitune likigó gililo.

¹² Lugupe nene latila oaká lugupeló nene lihima netá nenémo není gelegeleléesa minatane loko oko nogímizikoma nene, gili amemilo. Itó lukugupémo nene mokoló mogonamú nogilikoma nene, gili amemilo. ¹³ Likigisa likigizani nene lihima netalímini gelegeleléesa minative liki lihima aleaká gapoló amiselemilo. Lekemeni hele minakutí otinamó nenazo, nenemú lukugupegi likigikagi Ómasi lehizitalo. Lá iiki likigisa likigizani nene Ómasi monéna lehizimikiko, netá hee lo minati netalímini gelegeleléesa minatave. ¹⁴ Lekeza nene Mosé lo huka gakolímini gelegeleléesa minamave. Ómasímini nasahililímini agikagú niave. Nenemú lihima netalímo agulizaki ve loló oleketamino.

Vevesoko minoakalímini gelegeleléesa minatune

¹⁵ Nenemú nana itune. Lo huka gakokú minamunike Ómasímini nasahilikú minunikeve loko nene golesa netá hanuva alitupe. Eé, lá oko nomive, keké. ¹⁶ Lekelisi láa liki makó gilisá amahe. Agulizaki ve makolímini gelegelelé izegipa minatune liki likigika lukugupelini lehizimiiki aí gili amitamó nene, gili amita vémini gelegeleléesa líl inigave. Lugaloka nene lihima netá nenémo agulizaki ve loló olikimikikoma, aí gelegelelé itiki miniki hiliiki lapuluva inigave. Itó lugaloka nene Ómasi gili amiiki miniki lekeza lihimavatini nomitimó minanigave. ¹⁷ Lekeza nene goí iki lihima netalímini gelegelelé itiki minamó mota asú okave. Imane gamenaló nene gakó apí ilekemeke lehizilikitinamóma neve. Áminagú likigikatunú gili aliaká niave. Nenemú Ómasi agepoka lilo. ¹⁸ Lekeza nene lihima aliakakutí gologí olikimikago, vevesoko minoakalímini gelegeleléesa niave. ¹⁹ Litaha likigika keé lamimómave loko vegenalita oko molokogú emane ale moloko gakó imane lo nolukumuve. Lekeza nene gozapá lukugupe likigika likigisa likigizani ahulikago, gumesisímini mokómini itó mukí lihima netalímini gelegeleléesa omikago, gopa napa minamóma neve. Imane gamenaló nene ámináminiki lukugupe likigika ahulikiko, vevesoko minoakalímini gelegeleléesa omikiko, likigika gizopa lo miniko miniki aliki ilo.

²⁰ Lekeza lihima netalímini gelegeleléesa mina gamenaló nene, netá lamanalímini gelegeleléesa minamamóma neve. ²¹ Lá niake, netá iki miliki amó nenémini gihiléesa zesá amimóma neve, Itó imane gamenaló ámina netakumú giliake lokovoza heleaká noive. Nenémini amupiló heleaká netá utó imóma neve. ²² Lá onoimóza, itínasa nene lihima netakumú mumuzó oakalímini nagá vinasokago, lekeza Ómasímini gelegeleléesa niave. Nenémini gihiléesa etó iki miniki nene, alika alévolé apá alinigave. ²³ Lihima netalímini meinava nene heleaká neve. Itó Ómasilokatí nasahilí hagitana lehizelimiaká noimó nenémini gihiléesa Izesu Kilistotoka miní ameko alévolé lemetameni alinogo une.

7

Ve aleve minoaká mogonamú lo moloko limó

¹ Nigivénégita, gamanímo lo huka gakó giliaká nia vegená lekelikumú nene noluve. Lekelisi láa liki gilisá amahe: Lo huka gakó nene geleva geleva noinake, hulukogó asú inogo ive. ² Nenemú nene vená makó nenémo vana agómulagi noiko ahulomiakaléesa nene nomive liki li huka gakokú nene láa liki linamó neve. Vana helekiko nene, li huka gakokú ve vená minoakakumú li hukikita gakó nene asú omiaká noive. ³ Nenemú vená makolímo vana nene agómulagi noiko, ve makotó voko gímizitimó nene, aikumú nene mokoló vená noive loko litunimóza, vana helekiko nene, li hukikita gakó nene asú omikiko, ve makotó voko gímizitimó nene, mokoló vená noive loko laminogo nene. ⁴ Nenemú nigivénégita, lekelí mogona ámináminoko neve. Kilistó hili agupeló viki gímiziakeve liki Mosé lo huka gakó ámegetiakakumú helemó gelekave. Lá niake, itína gamenaló nene Izesutoka voko gímizekunike, aí vegenala loló oko nounce. Ómasímini agulizá ale otinake hehe loko oko moloko itune loko heleneikutí oteko noi ve Izesuni mututoni loló okune. ⁵ Goí oko minoko aleko uní gamenaló litaha ligikámo litó minoko aleko unike, li huka gakolímo alémo vatí igo lumu heleaká netá nenémo loláa minoake, lugupeloka ligisa ligizatoka hozaváa aleko minake sikalahute heleaká netá ale utó imó. ⁶ Lá imóza, imane gamenaló nene hulunimó nenémini okuko, lo huka gakó ámegetoakalímini nagakutí nene Ómasímo gologí oletamole loko li huka gakolímini gizapaló minamunike, gosohá gapoló Sikalahulímo veleta gapoló vinake Ómasi gelegelelé otatune.

Ómasímo lo huka gakó itó lihima netá

⁷ * Nenemú nanave litune. Mosé lo huka gakolímó gapo golesagú lelémó moloaká nehe. Nenémínoko nomive. Lo huka gakó minamilina, netá golesa aleaká noumó nenémíni mogona gele vevesamuline. Mosé lo huka gakó nenémó geza molo hukamo loko lamilina, neza molo hukahuka oakalímíni mogona nene gele vevesamuline. ⁸ Lá okamóza, lihima netakumú mumuzó oaká nenémó lo huka gakolímó gapo velemiake litó litó nene, molo hukahuka oaká haitopaitolímíni nigikagú ale utó oaká imó. Lo huka gakó minamilina nene lihima netakumú mumuzó oaká nenémó amuza moloko minamiline. Heleaká nenémínoko minaline. ⁹ Neza gozapá nene lo huka gakó gelemuke, nigika helemihe loko gatizá minuke, gopa lamaná minoko aleko umóza, alika nene lo huka gakó nenémó nelémó utó okago, lihima netá nenémó nigikagú amuza moloko ote vevesokago, ¹⁰ nigika helekave loko gulumó. Lá okago, lo huka gakó ámegetatomó nenémó alévolé nemetameni alitohe loko nogulugo ámina netalímó nigika hili netá ale utó imó. ¹¹ * Lihima netá nenémó lo huka gakolímó gapo velemikago, nigika agoka vizeake nigika apele hilimó. ¹² Lá okago, Ómasímó lo huka gakó nenémó etó oko keké vizeko neve, itó hamopamó lo hukamó nene apazá etó oko vevesoko lamaná neve. ¹³ Nenemú lo huka gakó lamaná nenémó nigika hili netá ale utó onetamó nehe. Nenémínoko nomive, keké. Lá oko neve. Lihima netá aleaká noumó nenémíni mogona utó itive loko lihima netakumú mumuzó oaká nenémó gakó lamanatanú nigika hili netá ale utó onetamó. Lá onimikago, Ómasímó lo hukoko li gakó nenémó hozaváa alekago, lihima netakumú musi nizapa oaká noive.

Lihima netá nenémó ligikagú neve

¹⁴ Leza láa loko geleaká noute: Ómasímó lo huka gakó nene Sikalahulímíni nekisa neve. Itó nénisi nene litha nigikámíni nekisa nouve. Nénisi nene lihima netalímíni gelekeleva nouve. ¹⁵ * Neza oko moloko u netakumú gelekugo atigino vatigino oaká noive. Neza nene nivisi netá lamaná alitove loko geleaká noumóza, alesá amuve. Alevo letovo oaká nou netá nene gopa aleaká nouve. ¹⁶ Lá oaká nouke nene, Ómasímó lo huka gakó nene lamaná noive loko hize lé oaká noumó nenémíni mogonáa utó oaká noive. ¹⁷ Nenemú netá golesa aleaká noumó nene nezáne hanuva lá osá amuve. Lihima netakumú mumuzó oaká nenémó nigikagú noike nogoka vizekago lá oaká nouve. ¹⁸ Neza mogonáa láa loko geleaká nouve: Litha nigika nugupeló nene netá lamanalímíni numuni apá aleko minoko aleko osá amive. Netá lamanakumú nogulumóza, gihiláa ale utó ito zámuza nenitoka nomive. ¹⁹ Neza mogona lamaná alitohe loko nogulumóza, alesá amuve. Itó lihima netá alemítohe loko geleaká noumóza, gopa aleaká nouve. ²⁰ Lihima netá alemítohe loko nagata nogulu netáa aleaká noumó nenazo, nenemú nezáne lá osá amuve. Lihima netá nenémó nigikagú nego, ámina netá aleaká noumó nenémíni mogonáa mota utó okave.

²¹ Nenitoka mogona lá oko utó oaká noive: Mogona lamaná alitohe nogulugo, lihima netakumú mumuzó oaká nenémó nogómulaloka omo alitoaká noive. ²² Neza nigikatunú nene Ómasímó lo huka gakó nene gele laga oaká noumóza, ²³ lá nougo, nigisa nigizani nugupeloka haitó sunímó hozaváa aleaká noive. Nene sunímó nagata nogulu netá nenémó nigisa nigizató noinazo, lihima netá aleakalímíni nagakú nouve. ²⁴ Utó oká heleaká o vumoláa neza muhelé ahelelímíni mututoni loló o vumó nounazo, nenegutí éaho gologí onetative. ²⁵ Guivahanite Izesu Kilistó lá onetatikumú Ómasi agepoka loaká nouve. Nenemú nagatatanú nene Ómasímó lo huka gakó gelekelé omiaká noumóza, litha nigikatunú nene lihima netá gelekelé omiaká nouve.

8

Sikalahulámó ligikagú minoko aleko oaká noive

¹ Nenemú Izesu Kilistotoka miní ameko nouhá vegená lelitoka lihima netá aleakakumú lihima limitimoláa nomive. ² Izesu Kilistotoka voko gímizunikeve loko alévolé lemetameni lehizelimiaká noimó nene Sikalahulímó lehizelimiaká noive. Sikalahulímó gapo veleetamó nenémó lihima aleakakutí itó ligika heleakakutí gologí olimikave. ³ Litha ligikámó nene Ómasímó lo huka gakó ámegetoakalímíni zámuza nene aleko limigo, hoza alemigo, lelitoka Ómasímó alimó. Lá ike, Ómasímó hozaváa alike, litha ligikámíni golesa netalímíni zámuza apelekago, limimó. Lá noike, gípala amiselekago, lihima netató minuhá vegená lelí lemetameni ale luhoake, lelí lihima asú itive loko limimó. ⁴ Nene litha ligikámíni gapoló negopa, Sikalahulímíni gapoló novuni vegená Ómasímó lo huka gakokú hee hee loko oko moloko ituni gakó ámegetatune loko lá olimikave. ⁵ Litha gapogú viaká nia vegená keza litha ligikámó litokó iki míliki iaká niave. Itó Sikalahulímíni gapoló viaká nia vegená keza

* 7:7: Gá 20:17; Gapo 5:21

* 7:11: Apí 3:13

* 7:15: Gal 5:17

Sikalahulímo litokó iki miliki iaká niave. ⁶ Litaha ligikámo lititó oko moloko itunimó nene, latila inogo une. Itó Sikalahulímo lititó oko moloko itunimó nene, alévolé lemetameni ale luhokinake hulu oko minanogo une. ⁷ Litaha ligikámo litó oko moloko itunimó nenémo Ómasímini gala veva minanogo une. Lá nounike Ómasímo lo huka gakó ámegetosá nene ma nenémini aminogo une. ⁸ Litaha kigikámo litó iki miliki iaká nia vejená nene Ómasímo ángo amu hili netá lilí isá amave.

⁹ Lá onoimóza, Ómasímini Sikalahulímo mulutikú minoko aleko noigo, litaha likigikámini gizapaló niamave. Sikalahulímo lonoitó iki miliki iaká niave. Makó keza Kilistoni Sikalahula mulúikú niamamoláa Izesuni vejenala zuha niamave. ¹⁰ Kilistó nene mulutegú minoko aleko oaká noinazo, lugupe nenémo lihima netakumú hilititó onoimóza, ligika lemeni nenémo lihimate asú olimikago minunikumule loko helemike agómulagi noive. ¹¹ * Lá okago, Izesú heleneikutí mómoká oko alémo oti ve Ómasímini Sikalahulímo nenémo mulutikú minoko aleko oaká noikoma nene, Kilistó heleneikutí alémo oti vémini Sikalahulímo nenémo mulutikú minoko aleko oaká noitímo heleaká lukugupe nene ámina oko alémo otinogo ive.

¹² Nenemú nigivénégita, litaha ligika nenémo litó oko moloko itunimó negopa, Sikalahulímo litó oko moloko itunimó nenémini genaváa lelitoka minokave. ¹³ Litaha ligikámo litó oko moloko itunimó nene, latila inogo nounimóza, Sikalahulímini zámuzatunú lukugupémo amu heleaká noi netá golesa apili ahulatamó nene, alévolé lekemetamenigi minanigave. ¹⁴ Ómasímini Sikalahulímo gapo kelepezigo mihina iaká nia vejená keza Ómasímini izegipala zuha miniaká niave. ¹⁵ * Ómasímo Sikalahulímo likimimó nene goha lekelegesá legeaká netalímini gelekelela lilí iki minatave loko nomive. Ómasímini izegipala zuha lilí iki minatave loko lekelémo lá oaká Sikalahulímo nene lehizeleketonoimóma neve. Sikalahulímini zámuzata nenémo hize lé olimigo, ahóno aménégave loko sele loaká nounge. ¹⁶ Lelí sikalahulémo Ómasímini izegipala niave loko lo lemekago Sikalahulímo ámina gakó hize lé oko ligikagú ale hutilí okago geleaká nounge. ¹⁷ Itó izegipala zuha nouninazo, nenemú Ómasímini helisa henoni ale lá unike Kilistoni helisa henonigi ale lá oaká nouháza, Izesú imó nenéminoko gasovagi netalímini agikagú minoko miluma gilítunimó nene, aí lapaná alika ale lá inogo une.

Ómasímo lapaná ale utó oletative

¹⁸ Ómasímo okulumakú lapaná ale utó oletatimó nenémo itekave. Nenemú mikasigú miluma geleaká nounimó neneló ale moloko lokugo etaminogo ive. ¹⁹ Ómasímini izegipala zuha minunimómave loko lapaná lagámini ale utó oletatikumú nenemú kigika nomimó ha netá keza gituhú niki ageva iki miniaká niave. ²⁰ * Ómasímo ale utó i netá nene kigika nomimó heleakalímini mututoni niave. Nene kezáini kagata geletó nomive. Ómasímo lokago utó okave. ²¹ Alika gamenaló kigika nomimó ha hetá nene hulupa loko anuva oaká nagakutí vinasokimikiko, kezagi itó Ómasímini izegipala zuha lezagi nagakutí lakavasú vizeaká lapaná alitakumú kagata losi gelemiki ageva iki minatave loko lo hukoletamóma neve. ²² Leza láa loko geleaká nounge: Kigika nomimó ha hetá mukitó keza ká emane gamenalotí venalite izegipa getanigi miluma giliaká niamó nenémini iki miluma giliki miniaká niave. ²³ * Itó nene kéisigó lá isá amave. Ligika lemenigi vejená lezagi lá oaká nounge. Anosa mololetake lapaná alitunimó nenémini zazaváa minative loko Sikalahulímo lehizeleta vejená lélisi nene ligikatunú miluma geleaká nouhá nene Ómasímo lelémo lá okoko lugupémo kéé lamitímini nagakú minakutí vinasoletatikumú gizapa onounge. ²⁴ Leza nene lugutó vizekago nenémini agikagú minunike lapaná alitune loko lagata losi gelemoko ageva oaká nounimóza, ámina netá ángutilina nene miní ameko gizapa oko minamutiline. Ámina netakumú vitagá nounike nene gizapa oaká nounge. ²⁵ Ámina netá velesá utó amigo ángamunike legesó oko gizapa oko minoaká nounge.

²⁶ Sikalahulímo nenémo ámináminoko kéé lamuko lelémo vatí oaká noive. Leza nemú manamú Ómasíloka lokuko etative loko gelemuninazo, Sikalahulímo mulutegú minake vejenalite lamamó nenéminoko lelikumú geleko Ómasíloka loaká noive. ²⁷ Lá okago, Sikalahulímo Ómasímo litoka oko Ómasímini vejenala zuha lelikumú geleko Ómasíloka lo ameká noinazo, ligika ángoaká ve Ómasímo eza Sikalahulímo agata gili netá geleake lelémo vatí oaká noive. ²⁸ Itó leza láa loko geleaká nounge: Ómasímo ligika ameká nouhá vejená leza netá matá mukitó nene hize lé oletoko lelémo vatí itive lokogó ale utó olimiaká noive. Ómasímo sele lo kimitove loko gili vejená nene lá okimiaká noive. ²⁹ Ómasímo sele lo kimi vejená nene goi

* 8:11: 1 Koli 3:16 * 8:15: Gal 4:5-7; Mak 14:36 * 8:20: Apí 3:17-19 * 8:23: 2 Koli 5:2-4

oko ánigo amu heleake, gipalámini ametameni lilí itave loko, itó agunamotamola lilí itave loko sele lo kimimóma neve. ³⁰ Itó Ómasímo ganá sele lo kimimoláa kelémo etó imó neve. Itó kelémo etó imoláa nene lihimáini ale ahulokimikugo niave loko loketamó. Itó lihimáini ale ahulokimikugo niave loko loketa vegená nene gonanalivagi lapaná lehizeketamóma neve.

Netá makolímó lelémo ahelú ahulaminogo ive

³¹ Ómasímini mogonáa lá oko nenazo, miní ameko nanave litune. Ómasímo lelitoka mino moloko noikú nene makó éaho lovaga lo lemeko liviligitive. ³² Gipala hamó nene aseva zeko géneka lamike lelí mukikumú lova vetini kigizakú molamó nenazo, nenemú aikumule loko netá matá mukí hagitana lehizeletamitihe. ³³ Ómasímo ezáa lihimate asú olimikave loko loletamó nenazo, eza lelémo etó i vegenala zuha lelikuti ve makolímó goni hoza ameminogo ive. ³⁴ Izesu Kilistó ezáa hilimóza, hilimokó nomive. Mómoká oko oteake okulumakú iteko Ómasímini agizani lamagaloka noike, lelikumú negénegé oko Ómasiloka loaká noinazo, éaho lihimate limitive. ³⁵ Kilistó eza agika lemeaká noikutí éaho lelémo otopá zitive. Miluma netalímóhe, itó gasovagi netalímóhe, itó gopoguni moloakalímóhe. Gaúna gamenámohe. Gígnegepánegekumú vitagá oakakumupe. Golivagi netá utó itikumupe. Luni leko sopolotunú lugupe hukatakumupe. ³⁶* Ámina netakumú monó gotolaú gakó makó láa líki luhuva gizinamóma neve:

Geikumule líki gamena gamena gopoguni mililitiki lipili hiliaká niave. Sipsip iza apeleko hukoaká nouhá nenémíni ilimiaká niave.

³⁷ Gakó lá oko nenazo, lá ilitatamóza, netá nenémínamove loko lelémo akaminogo ive. Agika limi ve Izesuni zámuzá hize lé olimikago netá mukí avilegekunike alévolé okogó nominune. ³⁸ Nenemú láa loko gele seketigí onouve: Heleaká netalímóhe, logómulagi minoaká netalímóhe, agelolímóhe, holosímóhe, okulumakú alévolé oko minoaká netalímóhe, itó itina utó ití netalímóhe, ³⁹ itó veletokatí limití netalímóhe, amunalokatí ititi netalímóhe, némíni manámíni netalímó Ómasímo agika limike nasahilí olimiaká noikutí lelémo otopá zeminogo ive. Ámina agika lemeaká netá nene Guivahanite Izesu Kilistokumule loko lehizelimiaká noive.

9

Isilae vegená Ómasímo kelémo etó imoláa

¹ Neza Kilistoni vegenala nounazo, gakó imane soza laminake lamaná litoze, gililo. Ómasímini Sikalahú nenémo nigika ale vávani okago nigikagú gakó nenémo hize lé onetago láa loko lo nolukumuve: ² Neza Zuta vegentakumú miluma napa geleaká nouve. Zuta vegená mukí keza Izesuni ánigi ahulakumú nigikagú ahuu ahuu loaká noive. ³ Gapo koló ilina nene, Zuta vegená nigive nagave kelémo vatí itive loko Ómasímo usí vizenimitoki nezáne Kilistoni geisa mikuti liminogo vávani uline. ⁴* Kezagi itó nezagi Isilae ve nounge. Ómasímo vegenala gihila lelémo etó imó. Lá ike, mikasi gomopalaló aí lapanala lelepizimó, itó lo múnahéaká gakó itó Mosé lo hukoko li gakó lo limike, aí avogisaló minoko agepoka liliki minatave loko gapováa lelepizike gakó lamaná lo mololetamó. ⁵ Lá okago, leza avotege Avalahage Isakage monó ali mina ve keí kagapilamó zuha nounge. Kilistó nene lelí vegená lugupe aleake utó imó nene Zakoponi mulusiguti utó imó neve. Nenemú Kilistokumú gili alévolé itanazo. Kilistó eza netá matá mukilímíni Guivahani noimó nene Ómasi noive. Nenemú agepoka loko mino lúaló moloko minatunize. Lamaná.

⁶ Lá onoi móza, Ómasímo netá matá ale utó oketatove loko limó nene haha amive. Zakoponi agapilamó zuha utó amó keza Ómasímo kelémo etó i vegená gihila lilí i asú amamó.

⁷* Itó Avalahani agapilamola nounge líki linamoláate Ómasímini vegená gihila lilí i asú amamó. Nenemú Ómasímo Avalahani láa loko lo amimó: Gipaka makó negopa, Isakani agapilamola kéisigó geí mututoni inigave. ⁸ Gakó nenémíni mogonáa lá oko neve: Hanuva kugupeguti utó amó keza Ómasímini vegenala zuha lilí i asú amamó. Ómasímo netá ali lá itave loko lo moloketa gakó gili zagiaká nia vegená nene není vegenáne zuha gihila niave loko geleaká noive. ⁹* Ámina netakumú Ómasímo Avalahani agómulaló láa loko lo molotamó: Kilisimasi makó oko vokiko nene, veletó nene imane ikató goha okugo Salá eza izegipala getanogo ive.

Loko lo amimó nenazo, Avalahani lo molota gacolímíni gihila nene gipala makó Isimaletó gihila zemitive loko gilimó neve.

¹⁰ Itó nenegó nomive. Alika Lepekatoka ámina mogona utó imóma neve. Áisi nene avoteho Isakatoka lopé izegipa lositá geto molamó. ¹¹⁻¹² * Ámina izegipa nenetosa utó ikasike netá lamaná ahe golesahe velesá alinamasigo, Ómasi eza getati lopé izegipamú Lepekani láa loko lo aminó: Uvolaho nene agunalámini gelekelé otatize. Láa loko limó nene, Ómasímo vejená kelémo etó itove loko agikatunú gilimó nenémo kezáini iki miliki a netakú nene leheta oaká noimó negopa, ezáa sele lo kimi netatoka leheta oaká noi mogona lelepizimóma neve. ¹³ * Itó Lepekani láa loko lo ami gakolímo gihila zikumú nene Ómasímo li gakó nene monó gotolagú láa liki gizinamóma neve:

Neza Zakopokumú numu helekave. Uvolaho Esaukumú goselé nepelekave.

¹⁴ Nenemú nanave litune. Ómasímo lá oko oko moloko oaká noimó nenémo ma zová zeneihe. Íi, lá oko nomive. ¹⁵ * Ómasímo Moseni láa loko lo amimóma neve:

Neza nene ve makó agutó vizitove loko nene hanuva agutó vizitomó neve. Ve makó nigika hize amitove loko nene nigika hize amitomóma neve.

¹⁶ Nenemú Ómasímo sele nolítimo vejenalita amuza moloko oko moloko oakakú voko alemive. Ómasímo agika hize lemeaká noikukó voko aleaká noive. ¹⁷ * Palaoni nene Ómasímo lo ami gakó nene monó gotolaú láa liki gizinamóma neve:

Nénisi nene neni zámuzatunú gelémo golesa okugo, neni nugulizá numutó namató puu loko vitive loko gelémo etó onoumóma neve.

¹⁸ Nenemú Ómasímini mogonamú láa loko gilitunize: Áisi nene ve makó nigika hize amitove loko nene agika hize amitimóma neve. Itó Ómasímo ve makó agika hize lí itove loko nene hanuva hize lí itimóma neve.

Ómasímo izapaló moloaká itó agika hize lemeaká mogonáa

¹⁹ Lá noiko, lugaloka láa loko lo nimitanimó nehe: Nenemú Ómasímo lihimatemú giligo nanamú golesa oaká noive. Ómasi eza netá matá makó alitave loko nololetiko, vejenalite gapo hizi lí itamoláa nomive. ²⁰ * Loko litanimóza, vémage, nanakalotí Ómasímini gakó pelevesava zitane. Mikasi somogitana noane. Mikasi somo nenémo loló onoi vema ale viligoko geza volane nenéminoko loló onetataninazo loko lo amitihe. Lá oko nomive.

²¹ Mikasi somo loló oaká vémini mogona lá oko neve: Ezáa agata gilike mikasitunú somo loló oaká noimó nene etoaká noive. Hamó mikasitunú nene lugáa nene vejenalitini mututoni loló oaká noimó nene lamanalímini loló oaká noive. Itó lugáa nene galatini mututoni itive loko golesámini loló oaká noive. ²² Lá onoiomó nenazo, Ómasi eza somo nenéminiki nia vejená lugáa nene izapaló moloakalímini mututoni itó vo tolova oakalímini mututoni nia vejená keí nogosani kimitove loko geleake, alika kipilitikumú asenini zeketoloko vimó. Eza lihimáikumú izapaló moloaká noimó itó zámuzagi noimó nenémini mogona kelepizinogo lá oaká imó neve. ²³ Itó somogitana oko minatuni vejená lugaloka nene aí lapanala ale lá ituni vejená ale vatí oletonoive. Lá oletake, agika hize limi vejená nene aí lapaná ohunagi noimó nenémini mogona lelepizeaká noive. ²⁴ Nene Zuta vejená lelikó nomive. Hetoka vejenakutí sele lo kemeaká noi vejenaki lá okimiaká noive. ²⁵ *

Hetoka vejenaki sele lo kemeakakumú Ómasímo li gakó nene monó gotolaú Ómasímini agepagutí gakó lo utó oaká ve Hoseani gakola láa loko neve:

Vegená kelémo molamimoláa nene neni vejená niave loko litoze. Vegená lugáa nigika kememumoláa nene nigika lekemenouve loko litoze.

²⁶ * Ómasímini vejenala zuha niamave liki litatoka nene Ómasi alévolé vémini izegipala zuha niave liki linigave.

²⁷ * Itó Isaiá eza Isilae vejenakumú gamoga geko láa loko limó: Isilae vejená keza nene age nagamí agataloka getani nemó nenémini iki hizi hutilí itamóza, Ómasímo luguhakó kugutó vizinogo ive. ²⁸ Guivahani eza mikasigú vejená goní ita hozaváa alitove loko litá oko ale hukoko ale asú inogo ive.

²⁹ * Itó Zuta vejená mukitó asenini zeketamikumú nene Isaiá amunaloka emane anozá gakó láa loko limó nene alévolé okave:

Guivahanímo okulumakú netá matá mukitó gizapa ve eza lagapilamó zuha lugáa asenini zeketamilina, leza Soto apakú Gomola apakú mína vejenakitana oko hele asú utiline.

Isilae vejenaki Izesuni gakó lamanaki

²⁹ * Itó Zuta vejená mukitó asenini zeketamikumú nene Isaiá amunaloka emane anozá gakó láa loko limó nene alévolé okave:

Guivahanímo okulumakú netá matá mukitó gizapa ve eza lagapilamó zuha lugáa asenini zeketamilina, leza Soto apakú Gomola apakú mína vejenakitana oko hele asú utiline.

²⁹ * Itó Zuta vejená mukitó asenini zeketamikumú nene Isaiá amunaloka emane anozá gakó láa loko limó nene alévolé okave:

Guivahanímo okulumakú netá matá mukitó gizapa ve eza lagapilamó zuha lugáa asenini zeketamilina, leza Soto apakú Gomola apakú mína vejenakitana oko hele asú utiline.

²⁹ * Itó Zuta vejená mukitó asenini zeketamikumú nene Isaiá amunaloka emane anozá gakó láa loko limó nene alévolé okave:

Guivahanímo okulumakú netá matá mukitó gizapa ve eza lagapilamó zuha lugáa asenini zeketamilina, leza Soto apakú Gomola apakú mína vejenakitana oko hele asú utiline.

Isilae vejenaki Izesuni gakó lamanaki

* 9:11-12: Apí 25:23 * 9:13: Mal 1:2-3 * 9:15: Gá 33:19 * 9:17: Gá 9:16 * 9:20: Isa 29:16, 45:9 * 9:25:

Hos 2:23 * 9:26: Hos 1:10 * 9:27: Isa 10:22-23 * 9:29: Isa 1:9

³⁰ Nenemú láa loko gilitune: Hetoka vešená keza lihimate asú olimikiko minatune liki amuza milamamoláa nene Izesunimú gili alévolé ikakeve loko lihimáini asú okimikago minikave loko loketamó. ³¹ Isilae vešená keza Ómasímini avogisaló lihimate nomitimó minatune liki li huka gakó ámegetoaká gapomú vitagá iliki vamóza, ali utó amamó. ³² Nene nanamú. Keza nene Izesú veleleta gapomú gili alévolé amatímo nene lá amó. Hanuva oko moloko nouhatímo Ómasímo giliko lamaná itive liki lakumú lá amó. Lá iliki nivake nene, gapoló gehani makolímo lotohá kipilimó. ³³ * Ámina gehanimú nene Isaiá li gakó nenémo voko alévolé imó. Eza láa loko luhuva gizamóma neve:

Ángalo, Zaion apatoka gehani makó nomulumó nenémo lotohá kipilinogo ive. Itó monu gehani nomulumó neneloka kepeleko molanogo ive. Lá onoimóza, áminamú gili alévolé itamó nenete gizapa iki mina netakumú nene hanuvamú gizapa iki minaminigave.

10

¹ Nigivénegita, Zuta vešená Ómasímo kugutó vizitive loko nigikatunú lamaná gelekuke keikumú Ómasiloka loaká noumóza, ² keza nene Ómasi gelekelé otatune liki amuza miliki niago, ángokuke lamaná noluve. Lá niamóza, gapováa gili hehe lisá amave. ³ Ómasimitoka lihimáini asú okimikiko minata mogonáa gili vevesamave. Itó Ómasímini avogisaló lihimate nomitimó minatune liki kezáini iki miliki ita gapoló viake, lihimáini asú okimikiko minata gapo Ómasímo veletamó neneló visá amave. ⁴ Leza Kilistokumú gele alévolé okuko, gili alévolé amake Ómasímo lo huka gakó ámegetokuko lamaná itune liki lina vezenalitini gapováa hize lí okave. Lá okago, aikumú gili alévolé ina vešená mukitoka nene lihimáini ale ahulo asú okimikago niave.

Guivahanimú sele lita vešená mukitoka kugutó vizinogo ive

⁵ * Nenemú Mosé láa loko luhuva gizamóma neve:

Ve makó keza lo hukoko li gakó nenémini hozaváa aliliki viva viva iki ali asú itamó nenete alévolé iki minanigave.

Loko Mosé limó nene Ómasímo lo huka gakó gele alekoko lihimavate asú olimikiko minatuni mogonamú limóma neve. ⁶ * Lá onoimóza, Izesunimú gele alévolé inake lihimate asú olimikiko minatuni mogonamú nene monó gotolaú láa liki luhuva gizinamóma neve: Gigikauka nene éaho okulumakuka ititive, ⁷ itó éaho galegú limitive loko lamo.

Nenémini mogona nene itína Kilistoni aleloko limitive loko okulumakuka itesaláa nomive, itó Kilistoni nene hele vezenatokatí lugutó viziti gakó aleloko ititive loko galegú lemesaláa nomive. ⁸ Lá oko nomive. Nenemú monó gotolaú láa liki luhuva gizinamóma neve:

Monó nene hotoka nomive. Gemetoka neve. Gegepaló neve. Itó gigikagú neve.

Kilistokumú gili alévolé ita gakó lo utó oko lo lekemeaká nouhá gakó nenemú noluve. ⁹ Láa loko lo utó oaká nune: Izesú nene neni Guivahaníne noive loko gegepatunú lo utó itanimó, itó Ómasímo nene Izesú heleneikutí alémo otimó neve loko gigikatunú gele alévolé itanimó nene, Ómasímo gugutó vizinogo ive. ¹⁰ Ligikatunú gele alévolé itunimó nene, lihimate asú olimikiko minanogo une, itó legepatunú nene Izesuni agulizá lo utó itunimó nene, Ómasímo lugutó vizinogo ive. ¹¹ * Nenemú monó gotolaú luhuva gizinamó nene láa loko neve:

Aikumú gili alévolé itamó nenete hizeko kememikumú kovoza heleminogo ive.

¹² Zuta vezenaki hetoka vezenaki etó iki niamave. Hamó lelegitó loló olimiaká noive. Hamokó Guivahani nenémo ve mukilitini Guivahani noike, aí sele li amiaká nia vešená mukitoka nene vauva aleko nónohá zekimiaká noive. ¹³ * Guivahanimú sele liaká nia vešená mukitoka kugutó vizitimó neve liki monó gotolaú luhuva gizinamóma neve.

¹⁴ Lá oko nemóza, aikumú gili alévolé amitamó nene, nana iki sele li amitave. Itó aí gakó gelemitamó nene, aikumú nana iki gili alévolé itave. Itó makolímo lo utó oko aí gakola lo kememitimó nene, aí gakó nana iki gilitave. ¹⁵ * Itó Ómasímo gakó liaká ve kimiselemitimó nene, nana iki li utó iki li kimitave. Liki loká inimikikoma neza láa loko litove: Izesuni gakó li kimita vešená mota kimiseleimóma neve. Nenemú monó gotolaú gakó makó lá oko neve:

Gakó lamaná li utó iaká nia ve keza gapo niago, kigisagutí liti liti ligo, ikago, gelekunike, ligika vávani okave.

¹⁶ * Lá onoimóza, Zuta vešená mukitó ámina gakó lamaná gili alemakumú nene Isaiá luhuva láa loko gizamóma neve:

* 9:33: Isa 28:16 * 10:5: Liv 18:5 * 10:6: Gapo 30:12-14 * 10:11: Isa 28:16 * 10:13: Zoe 2:32 * 10:15: Isa 52:7 * 10:16: Isa 53:1

Guivahanínemaka, gakó lo kumunimó nene ma gili alévolé inamamóma neve.

¹⁷ Nenemú láa loko gilitune: Ómasímini gakó gelekunikegó gele alévolé oaká nune, itó Killistoní agepagutí gakó li utó niagogó gakola geleaká nune. ¹⁸ * Geza nene Zuta vegealite monó gelemamó nehe loko loká itanimó nene, neza lá oko nomive loko litoze. Monó gotolaú láa liki gizinamóma neve:

Kegepagutí gakó nenémo numutó namató vo alimó. Itó gakóini nenémo mikasi nekisa vokisauka vo alimó neve.

¹⁹ * Lá onomóza, geza nene Isilae vegealite gili vevesamamó netihe loko goha loká itanimó nene, neza lá oko nomive loko litoze. Mosé nene Ómasímo Zuta vegeaná lo kimi gakó láa loko luhuva gizamó nene apí oko gelezo:

Lekeza hetoka vegeanakumú gelemó nene ha netá lilí inamoláa kelémo molokugo, lekeza kemekugú nanigave. Ve lugáa negi hizi minamó nene sele lo kemekugo, keikumú mulutikú golesa gilingave.

²⁰ * Itó Isaiá ahelele vizemigo Ómasímo li gakó láa loko limó neve:

Nenikumú vitagá amatite není ániganigave. Nenikumú loká amake minamó keitoka anitinogo uve.

²¹ * Itó Isilae vegeanakumú Ómasímo li gakó láa liki luhuva gizinamóma neve:

Neza nene giliki amanapa iki miniaká nia vegeaná gili ahuliaká nia vegeaná gínikaha iki miniaká nia vegeaná nene gamena hána nigizani gumí zeko alo loko sele lo kumumóma neve.

11

Isilae vegeaná lughalite Ómasímini nasahilí ali alemó

¹ * Nenemú geza nene Ómasímo aí vegealita zuha Zuta vegeaná monéna ahuloketamó nehe loko loká itanimó nene, neza óe, lá oko nomive, loko litove. Nénisi nene Isilae ve nouve. Neza nene Avalahani agapilamó nouve. Neza nene Pezaminí mulusigutí noumóza, Ómasímo viselenetamive. ² Ómasi nenémo goí oko gilike kelémo etó i vegeaná viseleketamimóma neve. Lekeza nene Eliani gakó nene monó gotolaú nemó nene gatiki gilisá amahe. Isilae vegeaná goní noketake negénegeka loko Ómasi láa loko lo amimó:

³ * Guivahanínemaka, keza geí monó lili ali ve kipili hili asú iake, lónogó iki guguni giziaká a ita tele viziki ali golesa ikave. Lá ikago, imane nezagó nounazo, nezagi nipilini nilave.

⁴ * Láa lokago, Ómasímo gakó láa loko lo amimó:

Géisigó negopa, není vegeaná zuha minatave loko neza vegeaná 7 tausen soza ómai netá Pealini gupá zi amema vegeaná neve asenini zekimikuve.

⁵ Loko limó nenazo, ámináminoko itínasa gamenaló Ómasi eza nasahilí amelaho noikeve loko Zuta vegeaná lughá lelémo etó okago minokune. ⁶ Ómasímo lelémo etó oaká noimó nenémo leza oko moloko oaká nouhakú voko alemive. Aí nasahilikú nene voko aleaká noive. Leza oko molokogú voko alilina nene, soza saza nasahilí minaline.

⁷ Nenémini gihiláa lá oko neve: Isilae vegeaná mukitó keza lihímáini minamitive liki vitagá a netá ali utó amamó. Ómasímo kelémo etó i vegeaná kéisigó ali utó amó. Lugáa keza nene kigika hize lí okago, negi nagi hiziki minamó nene ⁸ * monó gotolaú luhuva láa liki gizinató utó imó neve:

Ómasímo kigika ale gopa oká itó kogómula ale gopa oká, kagata hize lí oká okago minamó ámináagi itína ha niave.

⁹ * Itó Tevití láa loko luhuva gizamóma neve:

Lova ve galinali atakumú gelemiki nosánetakumú gelego ititimó nenémo kipilitimó neve.

Lotohá kepelekiko pou liki akiiki lihímáinímini meinava alinigave.

¹⁰ Keza nene kogómula likokiko likatiká iki mihina itave.

Kemegeçaló agohí gihiki guní guní miliki mihina mihina iki mini lúaló miliki minanigave, loko limó.

Hetoka vegeaná kugutó viziti gakó

¹¹ Geza nene Isilae ve keza lotohá kepelekago monéna pou liki akamó nehe loko loká itanimó nene, neza lá oko nomive loko litoze. Keza netá golesa aliki minamómave loko Zuta vegeaná keza ánigiki kemekugú niiki Izesutoka viki gimizitave loko Ómasímo kugutó vizeaká netá nene hetoka vegeaná lehzekekimikave. ¹² Zuta vegeaná keza lihima aliki minikago monó

* 10:18: Age 19:4 * 10:19: Gapo 32:21 * 10:20: Isa 65:1 * 10:21: Isa 65:2 * 11:1: Pili 3:5 * 11:3:

1 Kug 19:10,14 * 11:4: 1 Kug 19:18 * 11:8: Gapo 29:4; Isa 29:10 * 11:9: Age 69:22-23

nene numutó namató Zuta vejená minamamoláaloka puu loko vimó. Itó Zuta vejenalite Izesukumú gili gopa amómave loko Ómasímo nene hetoka vejená kelémo lamaná oko nónohá zeketamó. Lá onimó nenazo, nenemú Ómasímo Zuta vejená gihila kelémo atiginá o asú okiko, hetoka vejenatoka gihila haitolímínoko golivagi zinogo ive.

¹³ Hetoka vejená lekeza lo líkimitove. Lekelí aposolo nouke hozanemú gulugo itekago, nogoliza novizuve. ¹⁴ Vegenáne zuha lugáa monokumú kumu helekiko giliiki lamaná itave loko ámina hoza aleloko novuve. ¹⁵ Ómasímo Isilae vejená ahuloketátímíni gihila nene hetoka vejená nene mikasi vogalaló numutó namató víki minakutí kelémo atiginá imó. Nenemú Ómasímo Isilae vejená goha kelémo molatímó nene hilinakutí atiginá itamó gilinogo ive. ¹⁶ Sikoni vatá niake, ganá nosá nene Ómasíminive líki amikago, etó oko nego, mukitoka hutilí oko etó okogó minanogo ive. Eza luhusa nenémo avasavagi etó oko noikoma, izana hazana ámináminoko etó okogó minanogo ive. Ámináminoko leza Zuta vetini avotege goí iki monokú etó iki minikago, kagapilamó zuha ámináminiki Ómasíminí vejenala minanigave. ¹⁷ Zuta vejená keza olivi za lamaná nenéminiki minamó, itó avóike Ómasímo nónohá zeketa ve nene za luhusa nenéminiki minamó, itó hetoka vejená nene ekesá olivi za nenéminiki minamó. Lá ikago, Ómasímo nene za lamanalímíni izana makó hukoko ale ahuloake, ekesá zagutí izana makó hukoake za lamaná huko ahulakú nene miní ameko hízekago, luhusáminí nogoza nenémo aminí ameká noive. ¹⁸ Nenemú hetoka vémage, goí oko huko ahula izanağitana Zuta vejenakumú gele golesa amo. Géisi nene luhusa híze lé otamane. Luhusa nenémo geí híze lé ogimiaká noinazo, nenemú gugupe aleko itemo. ¹⁹ Loko lokugo, géisi láa loko linogo ane: Ómasi nenémo není nene miní amenetanogo goí oko mína izana nene hukokave. ²⁰ Loko gakó gihila litanimóza, Zuta vejenalite monó gili alévolé amámómave loko huko ahulonimó neve. Gele alévolé anikumukó keí numutagató noane. Nenemú geza gugupe aleko itemoko gehelele viziko minozo. ²¹ Ómasi nenémo Zuta vejená olivi za lamanakitana mína vejená asenini zeketamimó nenazo, gezagi Ómasi viseletatanimó nene ámináminoko asega zegetaminogo ive. ²² Nenemú géisi nene Ómasíminí nasahililamú itó amuza molatikumú gagatí molamino. Amuza molamó nenéminí gihiláa nene monó kemegeza ame vejenatoka utó oaká noimóma neve. Itó aí nasahilikú alévolé oko minanitímíni gihiláa nene aí nasahilí lamaná geitoka utó oaká noive. Miní ameko nasahililagú minamitanimó nene, gezagi hukoko ale ahulanogo ive. ²³ Itó Ómasi nene miní ameká zámuzagi noinazo, Zuta vejená keza Izesukumú gili alévolé ama mogona ahulatamó nene, Ómasímo miní ameketatove loko hanuva goha miní ameketanogo ive. ²⁴ Hetoka vejená lekeza ekesá olivi za nenéminiki minamóma neve. Ómasímo ekesá olivi zagutí izana makó hukoake, gosohá suní alike za lamanakú miní ameko hízimó nenazo, nenemú Zuta vejená kelémo atiginá itove loko vávani oko kezáini numutagá ikú kelémo atiginá okiko, líki minanigave.

Isilae vejená mukitoka kelémo atiginá itive

²⁵ Nigivénegita, lekeza nene Zuta vejenakumú gili gopa iki lezatete kivilegeko gele vevesoaká nounge líki lukugupe aliki itikataze. Nenemú asuguná gakó makó lo lekemekugo gilitave loko geleaká nouve. Isilae vejená lugáa gínikaha iki minakú minilíki niviko hetoka vejená keza monó agikagú vi asú itamó nene, ²⁶ * alika nene Isilae vejená mukitoka kugutó vízekiko lamaná iki minanigave. Nenemú monó gotolaú gakó makó láa líki luhuva gizinamóma neve:

Zaion agokalotí lugutó vízeaká ve lamaná utó oko, Zakoponi agapilamó keitoka anuva oko ne netá nene giteko ale ahulanogo ive. ²⁷ * Itó lo múnaheaká gakó láa loko lo hukoketanogo uve: Neza nene lihímáini nagamí zekinake apizeko minatune loko Ómasímo límóma neve.

²⁸ Isilae vejená keza Izesuni gakó lamaná gili ahuliaká niakumú Ómasíminí gala ve lílí niatímó hetoka vejená lekelémo vatí oaká noive. ²⁹ Lá onimóza, Ómasímo nónohá zelimiaká noikumú itó sele lo lemeaká noikumú genezala ale viligá aligá amitimó nenazo, Zuta vejená gozapá kelémo etó oake avóikini gakó lo moloketamole loko Ómasímo agika kemeaká noi vejená niave. ³⁰ Hetoka vejená lekeza gozapá gínikaha iake nene minamóza, itína Isilae vejená keza gínikaha ikago, Ómasímo agika híze lekemeake lekelémo lamaná imóma neve.

³¹ Áminagó iki Zuta vejená itína gínikaha iki niago, Ómasímo agika híze nolikimimó nene ámináminoko goha agika híze kiminogo ive. ³² Zuta vejená niamó minamamó mukitoka

nene alika agika hize kimitove loko pevevesava ziaaká niamómámíni nagakú ahulokimikago niave.

Ómasi agepoka li gakó

³³ * Agae, Ómasímo gele asú oko minumuni lisolimiaká amelaho noive. Gele vevesoaká ohuni aítoka neve. Lo hukookala nene vegealita gelemunitímínoko neve. Hoza aleakalímíni gapováa nene vegealita vevesoakaláa nomive. ³⁴ * Nenemú monó gotoláú luhuva makó láa loko neve:

Guivahanímíni agikagú gakó nemó nene, ve éaho geleneimó neve.

Gakó akó noligo nene, éaho alémo vatí igo limó neve. Ma nomive.

³⁵ * Éaho goí oko netá makó lehizetatitó apasoko amitive. Nenéa nomive.

³⁶ * Loko limó nene netá mukí aítokatikó utó oaká noive. Itó áisigó lokago utó oaká noive. Itó netá matá mukí nene aí gelegele nenazo, ámina monó gotoláú gízina gakó nene gihila neve loko gelenoune. Nenemú nene agepoka linake miní ameko mino lúaló moloko minatune. Lamaná.

12

Lígikagi lugupegi Ómasi lehizetatunize

¹ Nenemú nigivénégita, Ómasímo agika goha hize lekemeaká noimó nenemule loko lekelémo mómoká oko gakó lo likimitoze, gililo. Ómasímo mukí loló oleketonoi netakumú gili nimíniki Ómasímíni monola ali otitamó nene lamaná itive likí gilíniki líkígika lukugupe nene guguni gizoaká netá alévolé oko minoakalímíni itó etó oko minoakalímíni Ómasímo ángo amu heleakalímíni minatave likí Ómasi lehizitalo. ² Itó iki míliki itamó nenémo monó gelema vegealitiní avevezahaló loló amino. Lekeza nene Ómasímo líkígika ale vilígokiko haitó lakagata gilíki minalo. Lá ikiko nene, Ómasímo litítoka molatitoka ití netá nene, netá lamaná itó Ómasímo laga avisiti netá itó vihelé lo minati netá nene ali lekelí itaze.

³ Ómasímo nasahilí lehizenetakumú mukitó láa loko lo nolukumuze, gililo: Lekezatinimú lakagata gilíkiko etati lelegitó áminalokó minino. Avilegeko goha itemino. Ómasimú gili alévolé ikago monolímíni zámuza lehizeleketamó nenemú gili miníki mogonatíni etó etó iki lotuva ligitaze. ⁴ * Lugupe nene hámakó neve, itó lugupémíni gelekeleláa mukí minake, haitopaitó hoza aliaká niave. ⁵ Ámináminoko vegeá nene mukí nounimóza, Kílistotoka voko gímizekunike mulusi hamokó noune, itó leza keikumú gelegele gelegele líkikumú gelegele nianazo, lugupe aleko iteakaláa nomive. ⁶ * Ómasímo nasahilí haitopaitolímíni oko lehizelimikago, lelí monó zámuza haitopaitó alenoune. Nenemú limi avotígí oko hoza alinogo une. Nenémíni agikagú makó eza Ómasímíni agepagutí gakó lo utó itimó nene, Ómasímo gakó gihila alapizi avotigitó lo utó itize. ⁷ Makó eza monokú gelekelé oketatove loko litimó nenémo ezáaloka zámuza minati avotigitó gelekelé itize. Makó eza gakó lainim-oketati hoza alitove loko ezáaloka zámuza minati polosanava nenémíni itize. ⁸ Makó eza kagata aleaká gakó litimó nene, ezáaloka zámuza minati avotigitó kagata alitize. Makó eza Ómasímíni hozaló moni ahulatove loko litimó nene, mulunagú lamaná geleko ahulatize. Makó eza monó gele vegeatoka gízapa okimiaká hoza alitove loko nene amuza moloko gízapa itize. Makó eza gohogó vegeá nasahilí oketatove loko nene agoliza vízeko nasahilí oketatize.

Gosohá oko moloko ituni gakó

⁹ Líkígika hízi kimiki nasahilí ikimiaká nene lukugupetunukó lá amilo. Netá golesamú nene musí líkízapa ino. Netá lamaná nene ali gíkitíki ali minalo. ¹⁰ Lekeza zuhaloka aliaká niamómámíni iki líkígivetikíni líkígika kimíiki nene apíziki minatamó nenémo lukumu hílino. Ve makolítíni kugulizá ali otíki golómeni gíziki eza avíliko eza avíliko okogó ale otítune líki gíliilo. ¹¹ Monó hoza alínigí nene, goselekaselé amiki amuza mílikigó alilo. Guivahani gelekelé itíki mulutíkú ahuu ahuu líko minalo. ¹² Ómasímo líkímítí netakumú lakagata losi gelemíki ageva iaká niakumú lokogoliza víziki minalo. Míluma netalímíni agikagú nimíniki hulu iki minalo. Ómasiloka loaká nene ali gíkitíki ali minalo. ¹³ Ómasímíni vegealita zuhate netakumú vítagá níikoma, kílimi vatí iki kílimi. Veno vegeá níikoma nene, kílimi míliki nasahilí íkitalo.

* 11:33: Isa 55:8 * 11:34: Isa 40:13 * 11:35: Hio 41:11 * 11:36: 1 Koli 8:6 * 12:4: 1 Koli 12:12 * 12:6: 1 Koli 12:4-11

¹⁴* Gopoguni mililikitata veđená nene Ómasiloka likiko nónohá zeketatize. Kelémo golesa itive loko negopa, nónohá zeketative liki lilo. ¹⁵ Mulúikú lamaná gilita veđená nene lekezagi lílími vatí iki mulutikú lamaná gililo. Ive iki miluma gilita veđená nene lekezagi kilími vatí iki miluma gililo. ¹⁶* Lekezatini vitagá iaká nia netá nene likigivetitokagi utó itive liki amuza milalo. Lekezatiniímú giliko ítemiko, limiki mina veđenaki iki miliki mihina ilo. Lekezatiniímú gilikiko, gele vevesoaká veđená loló amino. ¹⁷ Golesa netá eza amupiló molokiko eza amupiló molokiko amilo. Vegenalite gilikiko etati netakumukó gililo. ¹⁸ Nenémini gapováa utó neikoma, itó lekelí netá neikoma nene, numutó namató veđená mukitoka gouna ziki minalo. ¹⁹* Nigivénegita, lihimavatini mililikitatamó nene lekezatini apasikitamilo. Ómasímo mukahá olimiti gamenalokumú milalo. Nenemú monó gotoláu luhuva makó láa liki gizinámoma neve:

Guivahanímo láa loko lokave: Lihima apasoaká nene není hoza neve. Lihima apasoaká hoza nene nezáne alitove,

loko lokave. ²⁰* Lekelisi nene monó gotoláu láa liki gizina gakó nenazo, nenémini ikigó minalo:

Gala velini nene gaúna hilikikoma nosánetá kimilo. Nagamikumú kivisekikoma nagamí kimilo. Lekeza lá itamó nene, kovoza hiliko miluma gilitaze.

²¹ Golesa netá nenémo lekelí lekelémo-loko lemémimo. Nenéa nomive. Lekeza mogona lamaná nene lílí iki miniki golesa netáini nene ahulataze.

13

Gamani vegenalitini gakó gele alitave

¹ Vegená mukitoka nene gamani vegenalitini gakó gili alitave loko noluve. Gamani hoza nene Ómasímo litokó naleve, itó gamani veđená nene Ómasímini gakotó amegesaló miliki naleve. ² Nenemú makó keza gamanitini gakó gili ahulatamó nene, Ómasímo ale utó i netá pelesa zinigave. Itó gamani vegenalitini gakó pelesa zita veđená nene kezáni iki miliki ita mogonáni meinava alinigave. ³ Iki miliki ago lamaná i veđená nenete gamanimú kelegesá ligitive loko negopa, netá golesa aliki miniaká nia veđená nene kelegesá ligitive loko kelémo etó onoímoma neve. Nenemú geza nene gelegesá legemitimó minatove loko mogona lamanakó loló ozo. Mogona lamanakó loló oko minatanimó nene, geikumú gilikiko lamaná inogo ive. ⁴ Gamani veđená keza nene geikumule liki Ómasímini gelekelela niave. Gizapa nigitiko vatí oko minatane liki hoza naleve. Geza golesa netá nalekoma gehelele viziko minozo. Keza nene hanuvamú kalapusí limiaká zámuzagi minamave. Keza Ómasímini gelekelela nianazo, golesa netá aliaká nia vegenakumú Ómasímo izapaló moloaká noi netá lelepizinigí gamani veđená nene Ómasi alími vatí iki kezagi kizapaló molokago kalapusí limiaká niave. ⁵ Nenemú gamani vegenalitini gakóini gili alitave loko noluve. Gakóini gele ahulokako Ómasímo miluma hoza gimitikumukó negopa, gigikámo etokave loko lititokó itanize. ⁶* Itó gamanite Ómasi gelekelé itiki gizapa hoza naleve. Nenemú lekeza gamanite litatoka litatoka iki takisi moni kimilo. ⁷ Nenemú limitave liki lita netá nene veđená mukitó kimitaze. Takisi moni aliaká nia veđená nene takisi moni kimitaze. Itó haitó mikasiukatí netá makó atitó áminaló meinava iteko mina moni nene kimitaze. Kilími otiki kugulizá ali otita veđená nene kilími napa ilo.

Ligika kemeakalímini mogonáa lá oko neve

⁸ Lekeza netá gimilíki nimilo liki linita gamena avilegemilo. Tinamule líiki likigika kimilíki netá matá kimilíki viaká nenémini mogonámogó lekelitoka minatize. Makó keza kigikatunú nasahilí iki kigika kimitamó nenemú Ómasímo lo huka gakó mukí gili aliaká nia veve litune. ⁹* Mosé lo huka gakokú láa loko lonoímoma neve:

Vego venako lekeza huki ezega emega amilizo. Geza veđená makó apele helemo. Geza gumína amo. Geza veđená makolitini netakumú ángo lamaná amo.

Nene gakó ale nupa oko gotoláa nenémini oko neve:

Gezakamú geleaká noanimó nenémini oko gigivekaginimú geleko gigika kemezo.

¹⁰ Nasahilíki ve minatamó nenete kigivítoka kigika miliki netá golesa alikitaminigave. Nenemú veđená makotoka kigika milata vegenalite Ómasímo lo huka gakó gili ali asú iaká niave.

Kilistó atikumú gámemé o minatuni gakó

* 12:14: Mat 5:44; Luk 6:28

* 12:16: Ano 3:7

* 12:19: Gapo 32:35

* 12:20: Ano 25:21-22

* 13:6: Mat

22:21; Mak 12:17; Luk 20:25

* 13:9: Gá 20:13-17; Gapo 5:17-21; Liv 19:18

¹¹ Lekeza itína imane gamenámini mogona gilnamó nenazo, lá itave loko loleketonoumóma neve. Lovokutí ininá oko otituni gamena mota alitokave. Monó apí oko guluni gamena nene, netá golesagutí gologí oletati gamena hána otigí oko minamóza, itínasa nene mota gamena alitokave. ¹² Límugusí mota asú inogo noive. Gó lanogo okululuva notovo ive. Nenemú límugusímíni netá ahuliiki lekemeni apele helekative líki lapanalímíni gimisi magé ali vati iki minalo. ¹³ Lapanató minatunimoláa nene etó oko minatune. Nosánetalímíni lagaváa giliiki nagamí níiki meleketakeni iki gumesisi mokoló mogona haitopaitolímíni ali utó iki lova iki lova leta lava leta iki kemekugú níki amilo. ¹⁴ Guivahani Izesu Kilistotoka víki gímizemó nenémo gineganetini loló iko ali luhiki minalo. Lukugupémo amu heleko laga aviseaká noi netá alikataze, Ómasimukó giliiki minalo.

14

Líkigivetikini gakó li hukikitamilo

¹ Monokú hoe lamiki netá makó loló uko Ómasímo giliko golesa itihe líki kagata losi gilitamoláa vasá zemiki kilími milalo. Lá iki ha netakumú kagata losi giliiki lova leta lava leta itave loko noive. ² Makó eza monokú alévolé oko minatímo nosáneta múki gopa noaká noigo, makó eza monokú hoe lamike, haitopaitó nosáneta nonake, Ómasímo gele golesa okative loko izámíni mémela nosá amive. ³ * Nenemú haitopaitó nosáneta gopa noaká noi vémo agivelaho nosáneta makó moseaká noi vemú gele golesa amino. Itó iza mémela moseaká noi vémo agivelaho gopa noaká noi vemú nene aleko letoko lamino. Eza gei gelekelé izegipa negopa, Ómasi gelekelé omiaká noinazo, ezagi Ómasímíni izegipala loló onoive. ⁴ Nenemú ve makolímó Ómasi gelekelé otko monó geleneitimó nene, geza nanakalotí aí mogona lotuva legeko gilitane. Áisi monokú alévolé itimó nehe hoe lamitimó nehe nene gizapa vevámíni netá neve. Itó Guivahani eza híze lé olimiaká zámuzagi noinazo, híze lé omíkiko, alévolé oko minanogo ive.

⁵ Makó eza nene haitopaitó gamenamú gilimó nene iteká lemeká oaká noive. Makolímó gamenamú gilimó nene iteká lemeká oko nomigo, hamolímíni oko neve. Makó eza némíni manámíni itove loko nene gele alévolé onoko lá itize. ⁶ Gamena makokumú giligo ititi ve nenémo Ómasimule loko lá oaká noive. Itó nosáneta múki gopa noaká noimó nenémo Ómasimule loko noaká noive. Lá noiike nene, nosánetakumú Ómasi agepoka loaká noive. Itó nosáneta makó mosé mosé oaká noimó nenémo Ómasimú gilike lá oaká noive. Lá noiike, ezagi nosánetakumú Ómasi agepoka loaká noive. ⁷ Lelikutí makolímó ezáagó giliko lamaná itive loko minoko aleko osá amive. Itó ezáagó giliko lamaná itive loko helesá amive. ⁸ Minoko aleko oaká nouhá nene Guivahanímíni gelegele minoko aleko oaká noune. Heleaká nouhá nene Guivahanímíni gelegele heleaká noune. Nenemú nene logómulagi minoko aleko itunimó itó hilitunimó nene Guivahanímíni mututoní nounike áisi giliko lamaná itive loko lá itune. ⁹ Kilistó logómulagi nouhaki helemoláagi Guivahanite minanogo heleake otimó neve. ¹⁰ * Nenemú nanakalotí gigivekahinimú aleko letoko litane, itó gigivekahinimú nanakalotí gelekako limitive. Leza mukitó Ómasímíni avogisaló utó o asú okuko, áisi lelí gakó lo hukanogo ive. ¹¹ * Nenemú láa líki monó gotolaú luhuva gizinamóma neve:

Guivahanímó láa loko lokave: Neza minoloko voko nou vémina alévolekutí noluve. Vegená mukitó kalapusa hiziki gupá zi nimiki kepegagutí Ómasímína nugulizá ali otinigave. ¹² Nenemú leza mukitoka Ómasímíni avogisaló mognate lo utó itune loko lonoimóma neve.

Némíni manámíni oketokuko ligivetege lihíma alikataze

¹³ Nenemú eza lá igo eza lá igo niamó nene mognataganamú lo hukoaká nene ahulatlune. Imanémíni itune líki lí hukalo: Ligiveteginimú monolímíni agikagú viniko, gapo hízi lí ikimiká lihíma netakumú gala viziká oaká suni ale utó amitune. ¹⁴ Guivahani Izesuki nousitímína láa loko gele alévolé onouve: Nosá némíni manámíni nonunike, ligika lemeni ale gopa ití netá ale utó oaká netá nomive. Lá onoimóza, makó eza netá makó nonoko lá oko nehe loko golotuva netá natimó nene, agika ale gopa inogo ive. ¹⁵ Geza nene nosáneta makó gopa nokoko gigivekaho agata gululusi geleko ininá ití netá ale utó omikakoma, oko moloko oaká noanimó nene gigika kemeakalímíni gapogú vaminogo ive. Gigivekahikumú nene Kilistó aikumuki heleneimóma nenazo, geza nenemú gelekoko nene, nosánetakumule loko gigivekahini alémo golesa amo. ¹⁶ Lekeza mogona lamaná lílí itamó nenémo gigivekaho lihíma aleaká gapogú alémo molokiko vegená lugáate alíki letikataze, gizapa iki minalo. ¹⁷ Ómasímíni gizapaló minoakalímíni mognána nene nosáneta

* 14:3: Kolo 2:16 * 14:10: 2 Koli 5:10 * 14:11: Isa 45:23

makó natupe mositupe loaká nenegú nomive. Hee loko minoko aleko oaká itó hulu itó mulutegé lamaná geleaká nene Sikalahulímo ale utó moloaká noimó nenémo Ómasímíni avogisaló voakaláa neve. ¹⁸ Makó keza ámina gapoló viki Kilistóni gelekelé imíkiko, Ómasímo ániogókiko laga avisinogo ive, itó vejená lugáate giliko lamaná inogo ive. ¹⁹ Nenemú leza hulu utó itive loko itó ligika lemeni eza hize lé otiko eza hize lé otiko itune loko amuza molatune. ²⁰ Geza nosánetakumule loko Ómasímíni hoza ale golesa amo. Nosánetá mukí nene noakakó nenazo, ligika lemeni ale gopa aminogo ive. Lá onoimóza, hanuva nanogo upe lokoko gopa nokuko ligivetehehíni agikagú golesa itimó nenémo lihima alinogo une. ²¹ Geza gigivekahíni lihima alekative loko gala vizekatanize, aikumule loko goula nosá ahe vain nagamí ahe namitanímó, itó némíni manámíni amitanímó nene lamaná inogo ive. ²² Geza nuvanémíni manámíni netakumú gakó napa nolokoma nene, Ómasígi gezakagigó ali minalizo. Makó keza kigikámo laga kivisigo gili lamaná iki minata netá alítamó nene, kogoliza vizinigave. ²³ Itó makó keza Ómasímo gele golesa itihé liki kagatagú losi pasí noiko netá makó gopa natamó nene, lamaná neve liki gili zagiki namamó nenazo, lihímvagi loló inogo ive. Ne netá mana netá lamaná itive loko gele zage minoko loló amitunímó nene, lihímvagi netá loló inogo ive.

15

Lezategopa ligivetege gili laga itave loko oko moloko itune

¹ Monokú alévolé nouhá vejená leza nene kagata losi pasí giliki gili guni ama vejená gena kivisítí netá nene geheko legesó oko kelémo vatí oko alitune. Lezategó laga livisítí netá loló amitune. ² Leza ligivetegehinímú geleko lamaná itave loko, itó monokú alévolé itave loko kelémo vatí itune. ^{3*} Kilistó eza ámina oko ezáa gele lamaná i netá alenamímóma neve. Monó gotolaú ve makolímó Ómasi lo ami gakó láa loko nemó nene Izesutoka alévolé oko minamó neve:

Geí aliví galativí amó nenémo není numupiló itekave.

⁴ Itó gozapá monó gotolaú gakó makó luhuva gizinamó mukí nene lagata ale kolosiko gele guni itune liki gizinamó neve, itó ámina luhuva nenémo lelémo vávani okoko lelémo gilí noliko goselé lepelemiko Ómasímo ale vavá oleta netakumú lagata losi gelemoko gizapa oko minatune liki gizinamóma neve. ⁵ Itó Ómasímo lelémo zou loaká itó lelémo vávani oaká amelaho eza gala vizekago, lekeza Izesu Kilistó veleta gapogú lakagata hamokó gili miníki minatave. ⁶ Lá iiki likigika itó lekegepa míli hamó iiki, Guivahanite Izesu Kilistóni amelahíni agulizá ali otitave.

Izesuni gakó lamaná nene hetoka vejenakumuki neve

⁷ Nenemú Ómasímíni lapaná utó itive liki Kilistó lekelémo molamó áminámíni iki lekezagi likigivetikini kilímí milíki likigika eza amiko eza amiko iki apizi lamaná iki minalo. ⁸ Neza láa loko lo nolukumuve: Ómasi eza avotegini gakó lo hukoko lo kemenei gakó nene gihila zítive loko Ómasímo gakó gihila lamanakó loaká noimó nenazo, ámina gakó ale alévolé itove loko Kilistó eza Zuta ve lelí gelekelé oletamó. ^{9*} Lá imó nene, hetoka vejená kezagi nene Ómasímo agika hize lemeaká noikumú agepoka lítave loko lá imóma neve. Nenemú monó gotolaú ve makolímó Ómasi lo ami gakó láa liki luhuva gizinamóma neve: Hetoka vejenalítíni holúikú gegepoka linake geí gugulizá sigaga loko nama linake gegepoka loko minanogo uve.

^{10*} Itó gakó makó láa loko neve:

Hetoka vejená lekezagi nene Ómasímíni vejenala zuhagi lokogoliza viziki agepoka lilo.

^{11*} Itó gakó makó láa loko neve:

Hetoka vejená lekeza nene Guivahani agepoka liki geké lítalo.

Numutó namató vejená lekeza sigaga sagaga líki agepoka lilo.

^{12*} Itó Isaiá nene gakó makó láa loko luhuva gizamóma neve:

Zesini gípala Tevitíni agapilamó makolímó anogo ize.

Áisi nene hetoka vejenalítíni agulizaki ve loló inogo utó inogo ive.

Lá okiko, hetoka vejená keza aikumú kagata losi gelemiki ageva iki minanigave.

¹³ Lagata losi gelemoko ageva oaká amelaho Ómasi eza nene gili alévolé akumú mulutikú lamaná giliaká itó hulu ale utó olekemekiko, lekelitoka vaí oko miniko nene, Sikalahulímíni

* 15:3: Age 69:9 * 15:9: 2 Sam 22:50; Age 18:49 * 15:10: Gapo 32:43 * 15:11: Age 117:1 * 15:12: Isa 11:10

zámuzatunú hize lé olikimikiko, lakagata losi gelemiki aikumú ageva oko minoaká netá lekelitoka utó o vai oko minative.

Pauló vávani oko luhuva gizatímini mognóna

¹⁴ Nigívénégita, lekeza nene vatí iki iki miliki niave, itó monolímini mognonagi gili vevesinave, itó eza lainim-otiko eza lainim-otiko itave loko nene lekelikumú gele alévolé onouve. ¹⁵ Nenemukopa, neza Ómasímo monó lehizeneta gakokumule loko monó makokumú goha gili vevesatave loko lokovogisaló nelegesá legemigo vávani oko imane luhuva gizo nolukumuve. ¹⁶ Izesu Kilistó eza hetoka vejená lekelitoka monó hozaló nimisilimó. Neza Ómasímini gakó lamanakumule loko guguni gizoaká hoza aleaká numó nene, Sikalahú nenémo lekelémo otopá zekiko, hetoka vejená lekeza Ómasímini miguhala lílí iki minikiko, Ómasímo ánigo amu hilitive loko aleaká nouve.

¹⁷ Neza Ómasímini hoza aleaká nou vémina Izesu Kilistokumule loko hoza aleaká noukumú gelekugo iteaká noive. ¹⁸ Ámina hoza nene nana zámuzalotí aluline. Nomive. Izesu Kilistó hize lé onetago hetoka vejená keza monó gili alitave loko hoza aleko minumó nenemú vávani oko lo likimitoze, gílilo. Neza nene monó lo utó oko lo nokumuke, ¹⁹ osá amosá suni alévolé netá aleko oko moloko minuke, Sikalahutokatí zámuzá alekuke, Zelusalegatí apí okuke, Kilistoni gakó lamaná mukí lo utó o-loko vuke vuke nene mikasi ale vígeko vuke vuke alika líliliko mikasiuka vo anitumó. ²⁰ Lá nouke, litahagú goha ale gosohá okatove loko Kilistoni gakó vo anitemimó gosohá mikasigú gakó lamaná lo utó oko lo kimitove loko amuzá moloaká umóma neve. ²¹ * Monó gotolaú gakó makó láa líki luhuva gizinató nene námegetuve:

Aí gakó lo kememuhá vejená nenete gilinigave.

Gakó gelemamó nenete gili guni inigave.

Pauló Loma apatoka vitove loko gilimó

²² * Lekelitoka vitove loko umóza, ámina hoza nalugo gamena gamena gapoma lí okago, gena niviseaká imóza, ²³ minoko aleko utoka kilisimasi mukí oko novigo lekelitoka vitohe loko nigikaturú geleko minoaká nouve. Itó imane gamenaló apá lugaloka hoza makó alito apá nominazo, ²⁴ Sipena mikasiloka vinogo noumóza, ganá lekelitoka vo anitek-inake áminauka vitohe loko geleko nouve. Lekelitoka anitekugo nene, neza ángiko nene, Sipena mikasiloka vitokumú gamena koma logoliza vizinake nilími gapoló mílatave loko noluve. ²⁵ * Mota vitove loko geleaká noumóza, imane gamenaló nene Zelusale numutoka Ómasímini vejenala zuha nasahílí oketoko moni aleko kimitove loko novuve. ²⁶ Masetonia mikasiuka itó Akaiá mikasiuka Ómasímini vejenala zuha kezáini kagata geleke láa líki lí huginamóma neve: Zelusalega monó gele vejená gohogó niamó nene moni ale nupa okinake hize lé oketatune loko lo hukonouháma neve líki lamó. ²⁷ * Keza nene mulúikú lamaná geleke lá ikamó nene etokave. Itó hetoka vejená keza Zuta vetitokatí kigikámini netá gihila alemó nenazo, nenémini genaváa keitoka neve. Ámina líhima apasoko kimitune líki kugupémini netá gona miliki Zuta vejenakutí Izesuni vejenala zuha kimikiko etanogo ive.

²⁸ Lá nooinazo, nenémini gihila utó okago neza nene moni aleko voko avasavagi keme asú okinake Sipena mikasigú vinogo noinake lekelitoka vo anitino uve. ²⁹ Itó neza nene láa loko gele alévolé onouve: Zapakó lekelitoka vaminogo uve. Kilistoni nónohá nenitoka vai okiko lekelitoka vinogo uve.

³⁰ Nigívénégita, leza Guivahanite Izesu Kilistokumú itó Sikalahutokatí eza agika amigo eza agika amigo oaká nounikeve loko negénegé oko lo nolukumuze: Lekeza nenitoka miní amiki nenikumú amuzá miliki Ómasiloka lílo. ³¹ Zutaia mikasiuka Zuta vejená lugáa Ómasimú gili alévolé ama vejenalitiní kigizakutí Ómasímo gologí onetative líki Ómasiloka lílo. Itó Zelusalega monó gele vejená monima aliiki mulúikú lamaná giliki laga kivistive líki lílo. ³² Lá okiko, alika Ómasímo giliko, etokikoma, mulúnegú ágila guluma noiko lekelitoka vinake navasú vizeko hulu nivisitive líki lílo.

³³ Ómasi hulu amelaho eza lekeza mukitó minatímo minoloko voko minino.

16

Vegená mukí geké loketamó

¹ Vená ligivetehe Piopé eza Kenekilea numutoka Izesuni vejenala zuhaloka monó hoza aleaká noi vená áisi vo anitekiko nene, monokú nasahílí itatave loko mognonala hize lé oko

noluve. ² Ómasímini vegenala zuhate alikiko etatimó nenémíni iki Guivahanímule líki alími vatí itaze. Ámina vená nenémo nezagi itó vegená lúgáagi gelekélé oletoko minamó nenazo, nemú manamú navisíko alími vatí ilo.

³* Itó vanago venalago Akuilako Piliskako keza nene Izesu Kilstoni monó hozagú nilími vatí iaká niasive. Keí nene geké noloketuze, li kimilo. ⁴ Kéisi nene nenikumú kugupe latila inigasimó neve. Lá asimó nene nenikumú nomive. Numutó namató hetoka vegená Izesuni vegenala zuha miníliki vinamó kezagi keikumú mulúúki lamaná gilíki kegepoka liaká niave. ⁵ Keí numukú monokumú alegesá iaká nia vegenaki geké noloketuze, li kimilo. Asia mikasiuka ganá apí oko Kilstoni vegenala loló i ve Epainetó nigika amenou ve aikumukí geké nolotuze, li amilo. ⁶ Maliá eza lekelikumú miluma geleso monó hoza alimó. Aí geké nolotuze, li amilo. ⁷ Atolonikoki Zuniaki Zuta ve není zuha niasí ve kezagi nagá numukú makó minuháma neve. Keikumukí geké noloketuze, li kimilo. Keza aposolo vetíni holúúki kugulizakí ve niasive, itó neza hanuva nougo keza goí iki Kilstoni izegipala líli asimóma neve. ⁸ Monokú noi ve Apiliatoni geké nolotuze. Nigika aitoka neze, li amilo. ⁹ Kilstoni hozagú nelémo vatí i ve Ulupanó itó nigika amenou ve Sitaké keikumú geké noloketuze, li kimilo. ¹⁰ Kilstó mogonalamú giligo lamaná i ve Apeleni geké nolotuze, li amilo. Alistopuloni numukú nia vegenakumú geké noloketuze, li kimilo. ¹¹ Zuta ve nigivéneho Helotió itó Nalisisoni gelekélé vegenala keza Guivahanímíni vegenala zuha monokú nia vegenakumú geké noloketuze, li kimilo. ¹² Vená lositá Tilipaenaki Tiliposaki keza Guivahanímíni hoza napa aliaká niasive. Itó Peasí áminámini oko Guivahanímú miluma hoza aleaká igo nigika nagata aitoka neve. Keikumú geké noloketuze, lo kimilo. ¹³* Lupú eza Guivahanímíni vegenala zuhagutí iteko mína ve, itó izolaho nelémo vatí ike izóneho loló imó. Keikumú geké noloketuze, li kimilo. ¹⁴ Asikilitó itó Pilegon itó Helemé itó Patopá itó Helemá kezagi kigivéikinigi geké napa noloketuze, li kimilo. ¹⁵ Pilologoki venala Zuliaki itó Neleó itó atolaho Olipá itó monokú ve vená mukí kezagi makó niamó keikumukí geké noloketuze, li kimilo. ¹⁶ Lekeza nene monokú eza aputá viziko eza aputá viziko iki minalo. Kilstoni vegenala zuha numutó namató mini-líki vinamó nenete getetini nilave.

Gakó loketo asú imó

¹⁷ Nigivénegita, lekelémo mómoká uke lakagata aleko láa loko noluve. Likilími gopa napa iaká nia vegenakumú gizapa ilo. Keza hizi hóu líta gakó ali utó iki monokú vita gapo hizi lí iake monó lainim-oleketunimó nene pelevesava ziaká niamó nenazo, lekemegeza kimilo. ¹⁸ Vegená nenémínaa nenete Guivahaníte Kilstoni gelekélé itamake, kezáini kugupémo amu hili netá gelekélé nitake, kigika kagata gopa i vegená giminikú miliki kilími gopa niago, gakó lamaná nilahe lago, kogoka kagaka viziaká niave. ¹⁹ Lekeza monó gili aliaká niamómámini gakoláa numutó namató vokave. Lá okago, neza lekelikumú gelekuke nogoliza novizuve. Lá noumóza, imanémíni iki minatave loko noguluve: Netá lamanakumú gili vevesiki gili minalo. Netá golesamú giliko gena ino. ²⁰ Lá itamó nene Ómasi hulu amelaho áisi nene míni hána amiko Satani nene líkigisa heumauka zeko lana inogo ive. Guivahaníte Izesu Kilstoni nasahilí lekelitoka mínino.

²¹* Hamó hoza aleaká nousi ve Timotí itó Zuta ve nigivénege Lukió Zasó Sosipaté kezagi geké nililikítave. ²² Neza Teletiona pepa imane Pauló lo neme neme noigo luhuva gizo nolukumu vémina áminagó oko Guivahanímíni avogisaló lekelikumú geké nololeketuve. ²³⁻²⁴* Gaió eza nasahilí onimiaká noigo, nezagi itó Ómasímini vegenala zuhagi aí numukú alegesá oko monó loaká noune. Eza geké nololeketave. Elastó nene kansoletíni moniló gizapa oaká ve itó lígiveteho Kuatoki ámináminiki getetini nilasive.

Ómasi agepoka líke gizo asú imó

²⁵ Izesu Kilstoni gakó lí utó iki lí likimiaká niamó, itó Ómasímini asuguná gakola gozapá ká ela halá geloko voko minamó nene hámakó lelegítokó neve. ²⁶ Ámina gakó lamaná Ómasímó nigizakú molamó nene lo utó oko lo nokumuke lígikámini luhusala ale gikitoaká zámuzagi noi amelahnímú lo kemeaká nouve. Lá onoumóza, imane gamenaló Ómasímini agepagutí gakó lí utó iaká a vete luhuva giziki Izesukumú lína gakó lí utó ikave. Ómasi nene alévolé helisagi noi vémo lo hukonoitó nene numutó namató vegená keza gili alévolé iki Ómasi gili amitave loko ámina monó gatoko lo kemeaká noune. ²⁷ Izesu Kilstó lelémo vatí noiko Ómasi ezáagó gele vevesoko noi ve sigaga sagaga loko agepoka loko míno lúaló moloko minatune. Lamaná.

Koliti Vegenalitini Luhuva Nampa 1 Pauló Gizo Kimimó

Lusa gakó

¹ Neza Ómasímini gakató Izesu Kilistoni aposolo loló itane loko nelémo etó i ve Paulona ligiveteho Sostené ezagi makó nousike ² * Koliti numutoka Ómasímini vegenala lekelitoka luhuva netá imane gizo nolukumuve. Lekezagi vegená lugáagi numutó namató hamokó Guivahanite Izesu Kilistoni sele li amiaká niago Ómasímo lusa geleketoko Izesu Kilistotoka gimizemó nenémini agikagú nene apazá minatave loko alesa molo likimi vegená niave.

³ Ómasi ameteho aitokatí itó Guivahani Izesu Kilistó aitokatí nasahilí itó hulu lekelitoka mino-loko voko minatize.

Keitoka monolímíni zámuza utó ikumú Ómasi agepoka limó

⁴ Ómasi eza Izesu Kilistokumule loko nasahilí lehizeleketakumú neza gelekuke lekelikumú gamena gamena Ómasi agepoka loaká nouve. ⁵ Eza monó vávani oko loaká itó geleaká haitopaitolímíni hagitana lehizeleketonoimó nene, ⁶ Kilistoni gokolámo likigikagú luhusa alekago, ⁷ lekeza Guivahanite Izesu Kilistó atiginá oko atikumú ageva iki minake monolímíni zámuza makokumú vitagá isá amave. ⁸ Eza Guivahanite Izesu Kilistó anititi gamenaló lihimatini nomitimó minatave loko gizapa oleketoko noiko, gamenatini asú itive. ⁹ Ómasi eza gipala Izesu Kilistó Guivahanite nene aitoka miní amitave loko sele lo likimi vémo lokago alévolé oaká ve noive.

Koliti vegená keza monokumule liki hizi hóu lamó

¹⁰ Nigivénegita, neza Guivahanite Izesu Kilistoni agulizató lakagata aleko litoze, gililo. Lekeza gakó haitopaitó liki hizi hóu lamilo. Monokumú nigiliki likigikatini mili hamó iki minalo. ¹¹ Náa vegúe, neza likigikagú lova leta gakó utó oko nemó nene Koloeni vegenalate likago gelekuve. ¹² * Nenemú gakó láa loko noluve. Lekelitokatí makolite leza Pauloni vegenala nounge liki likago, makolite leza Apoloni vegenala nounge liki likago, makolite leza Pitani vegenala nounge liki liaká niave. Itó makolite leza Kilistoni vegenala nounge liki liaká niave. ¹³ Nenemú nana ive. Kilistó eza hize hóu loleketahé. Itó Paulona neza lekelikumule loko zohota zaló huluhe. Itó není nugulizalímo avutá okago monó nagamí hilahe. Íi, lá oko nomive. ¹⁴ * Neza lamaná monó nagamí hololeketamumóma nenazo, nenemú mulúnegú lamaná noguluve. Ve lositá Kilispoko Gaioko kezagó holoketumóma nene ¹⁵ lekelikutí ve makolímó Pauloni agulizalímo avutá nepelekago, monó nagamí hulumóma neve loko lokative loko lá umó neve. ¹⁶ * Itó gakó makó noguluze. Setepaná aí vegenala kezagi holoketumó. Lugáa monó nagamí holoketuhe nene ma gelemuve. ¹⁷ Kilistó eza vegená monó nagamí holoketatane loko nimiselemimóma neve. Aí gakó lamaná lo keme keme itane loko lonetonoimóma neve. Itó Kilistó eza zohota zaló hili gokolámíni zámuza lemekative loko lekelí likigikagú apikulú aleko gele guni oaká gakó losá amumóma neve.

Kilistó eza Ómasímini helisa itó geleakaláa noive

¹⁸ Zohota zaló hili gakola nene gapo golesagú viaká nia vegenalite gelego ha netá loló oaká noimóza, gapo lamanató novuni vegená nenete guluko, Ómasilokatí zámuzalagi gakó neve loko gelenoune. ¹⁹ * Nenemú monó gotoláú Ómasímo li gakó makó láa liki luhuva gizinamóma neve:

Leza gele guni oko matute koló onoive liki liaká nia vegenalitini gakóini ale golesa inogo uve.

Itó sukulu napa lokunike gele vevesoaká nounge liki liaká nia vegenalitini geleakáini nene gele ahulatove.

²⁰ * Ómasímo monó gelema vegenalitini geleakáinimú nene ha gakó neve loko gelekamó nenazo, nenemú gili guni iaká nia vegenalitini gakóini hí neve. Itó monó mogona apí ikimiaká nia vegenalitini gakóini hí neve. Itó itína gamenámíni mogonamú gakó hoza lita vetini gakóini nene hí neve. ²¹ Itó Ómasímini gele vevesoakalímíni zámuza utó noigo, vegená kezáini geleaká nenetunú Ómasímini mogona ániganigí ángi vevesamamó. Nenemú Ómasímo giligo etokago, monó gakola lo kemehá nene vegená makolite gelego ha netá loló

* 1:2: Apo 18:1 * 1:12: Apo 18:24 * 1:14: Apo 18:8; Lom 16:23 * 1:16: 1 Koli 16:15 * 1:19: Isa 29:14

* 1:20: Hio 12:17; Isa 19:12, 33:18, 44:25

noimó nene vejená makó lo kemekuku, gili alévolé niago, Ómasímo kugutó vizeaká noive. ²² Zuta vejená není zuha keza haitó suni utó iko ániगतune liki amuza miliaká niave. Itó Kiliki vejená keza netá mogonamú gilinigi gumonó hiziki miniaká niamóza, ²³ leza nene Kilistoni nene zohota zaló apili hele gakó lokuko, Zuta vejená keza gelego gena oaká noive, itó Kiliki vejená keza gelego, negi gakó loló oaká noimóza, ²⁴ Ómasímo kelémo mola vejená Zuta ve niamó Kiliki ve niamó keza nene Kilistó zohota zaló hili gakokumú gelemó nene, Ómasímini helisa itó Ómasímini gele vevesoakaláa nene áninagutí utó oaká noive. ²⁵ Vegená keza Ómasímini hozamú negi netá neve nilago, ámina negi netalímo vejenalitiní gelekáini avilegeaká noive. Itó Ómasímini mogonamú zámuzala nomive nilago, ámina zámuza nomi netalímo vejenalitiní zámuza avilegeaká noive.

²⁶ Nigivénegita, Ómasímo ve nanámini sele lo likimimóma neve. Nenegú ániगiki gililo. Monó gelema vejenalite lekelikumú láa liki giliaká niave: Gili vevesi minamoláa mukí minamave. Itó zámuzagi minamoláa mukí minamave. Itó getakutí itiki minamoláa mukí minamave. ²⁷ Liki linamóza, vejená kovogisalo negi niamoláa leza Ómasímo lelémo etó imó nene, gele guni onoune liki liaká a vejená kovoza hilitive loko alesá molo limimó neve. Itó vejená kovogisalo keé lamunimoláa leza Ómasímo lelémo etó imó nene, zámuzáinigi vejená keza kovoza hilitive loko alesá molo limimó neve. ²⁸ Itó vejená kovogisalo gohogó vejená nounimoláa itó vejená kovogisalo guhalehale oko nounimoláa lezagi Ómasímo sele lo limimó nene kovogisagi vejenalitiní lukesaváini akilitave loko sele lo limimó neve. ²⁹ Lá okago, mikasiuka ve makolímo Ómasímini avogisalo agupe aleko iteminogo ive. ³⁰ Ómasi eza Izesu Kilistotoka miní ameleketonoimóma neve. Kilistoni nene gele vevesatunitímini mogona minative loko, itó lihimate asú olimikiko minatunitímini mogona minative loko, itó lihimate ale ahulolimikiko ligika avova liko minatunitímini mogona minative loko, itó lelí lihimagutí gologí oletative loko amiseleletamó. ³¹ * Nenemú gakó makó monó gotoláa láa liki luhuva gizinamó nene alévolé itive: Vegená makó nenete sigaga liki agepoka linigima Guivahanimukó litaze.

2

Pauló Kilistoni apele gakokó lo kimimó

¹ Nigivénegita, neza lekelitoka anitumó nene, Ómasímini asuguná gakó lo likimitove loko nene, vejenalite sigaga líta gakó negopa, itó není gele vevesoakaláa negopa, ² neza láa loko lo hukouke vumóma neve: Neza lekelitoka vinake gakó lugáa laminake, Izesu Kilistoni zohota zaló apelemó nene gakokó lo likimitove loko vumóma neve. ³ * Itó lekelitoka voko minumó nene keé lamuke nehelele vizigo luvoluvo zeko minumó neve. ⁴ Lá oko nouke, monó gakó lumó nene lakagata alitove loko mikasiuka vejenalite gili vevesina gakokutí lo lekememuve. Ómasímini zámuzámo itó Sikalahulímo není gakó hize lé okago, gihila zeaká imole. ⁵ Lá umó nene lekeza Ómasimú gili alévolé itamó nenémo vejenalite gili vevesiakakú negopa, Ómasímini zámuzagú leheta itive loko lá umóma neve.

Ómasímini asuguná gakó Sikalahulímo lo utó oaká noive

⁶ Neza lamaná monokú olopa iki mína vejená nene gele vevesoaká gakokutí lo kemeaká noumóza, imane mikasiuka monó gelema vejenalite gili vevesiaká gakó itó kugulizaki ve hiliki haha ita ve nenete gili vevesiaká gakó liaká niamó nenéminoko losá amuve. ⁷ Neza Ómasímini asuguná gakó halá geko minamó nene lo utó oaká nouve. Ámina gakó nene vejená leza gonanalivagi loló oko minatune loko gozapá netá matá ale utó amike mína zupa Ómasímo ale vavá oko mololetamó. ⁸ Mikasiuka kugulizaki ve nenete ámina gele vevesoaká gakó mogona gili vevesamamó. Gili vevesalina nene, lelí Guivahani lapaná amelahini nene zohota zaló apelemaline. ⁹ * Lá onomóza, gakó makó láa liki luhuva gizinamóma neve:

Vegenalite ániगama netá, itó kagatatunú gelema netá, itó vejenalitiní kigikámo gelemi netá nene, Ómasímo kigika aminita vejená nene ale vavá oketonomó neve,

¹⁰ liki luhuva gizinamómáminoko Ómasímo Sikalahuni amiselekago, ámina netakumú lo utó o lemeaká noive. Sikalahulímo netá matalímini mogona itó Ómasímini mogona halá geko minamolagi geleká noive. ¹¹ Hí vémo nene agivelahini agikámini mogona geleneive. Ezáa agikámini amelahogó geleká noive. Ámináminoko Ómasímini agikámini mogona nene Ómasímini Sikalahulímo hamokó eza geleká noive. ¹² Itó Sikalahú nene monó gelema

* 1:31: Zel 9:24 * 2:3: Apo 18:9 * 2:9: Isa 64:4

vegenatokatí alemuháma neve. Leza Ómasímo monó asapulagi lehizeletamó nene gele vevesatone loko Ómasímini Sikalahula aluháma neve. ¹³ Leza monó asapulagi aluhá nenemú lolege hegele oaká nounimó nene, hanuva vegegalite kezáini geleakáimítumú li limikago negopa, Sikalahulímo lo lemekago lo kemeaká nounge. Itó Sikalahulímini anó lupamú giliaká nia vegeaná nene monó lo kemekugo giliaká niave. ¹⁴ Ve makó Sikalahuki minamita vegeaná keza Ómasímini Sikalahulímini gakó ma geleminigave. Keza nana netáinigutí gilitave. Nomive. Sikalahú alina vegegalite gilitamoláa oko nenazo, Sikalahuki minamita vegegalite giliko negi gakó loló inogo ive. ¹⁵ Sikalahuki minata vegegakó netá mukilímini mogonamú hanuva gili vevesanigi niamóza, ve makolímo kei mogonataganamú lotuva legeminogo ive. ¹⁶ * Nenemú gakó láa liki luhuva gizinamó nene gihila neve: Guivahanímini agikagú gakó nemó nene éaho gilitimó neve.

Gakó akó noligo nene hí vémo alémo vatí igo limó neve. Ma nomive. Ma nomimóza, leza nene Kilistoni geleakaláámini oko nominune.

3

Koliti vegeaná keza Ómasímini hozaló vegeaná lilí iki minamó

¹ Nigive nagavese, neza lekelitoka vuke, ve Sikalahúiniigi lo kemeaká noumola nenéminoko lo lekememuve. Lekeza monokú nene alévolé amake Kilistoni izegipa namunigitana iki niago, neza ve Sikalahunigi nomi vegeaná lo kemeakaláa nene lo lukumumó.

² * Neza likigikámini nosá alévoleláa lekememuke hanuva aminíma lukumumóma neve. Likigikámini nosá alévoleláa nene nana iki naline. Lekeza litaha lekemetamenigi ha nianazo, itúnasa nene nosá alévoleláa nata avotigi iki minamave. ³ Lekeza nenémináa miniki kemekugú niki lova leta lava leta iki hanuva vegegakitana nenéminiki litaha lekemetamenigi miniaká niave. ⁴ * Lekeza Pauloni vegegalita nounge itó Apoloni vegegalita nounge liki liaká nianazo, ve nenémináa lekeza numuká vegitana niave loko loleketanogo uve.

⁵ Lekeza lelikumú nanamú hizi hóu liaká niave. Apoloki nezagi hanuva Ómasímini gelekelé izegipalatosá Guivahanímo hoza gakó oletatíminoko monó lo lekemeko nousigo, aikumú gili alévolé inamóma neve. ⁶ * Nénisi lekelitoka hoza aleko ale zuhá umó. Apoló nene liliha aleaká imóza, Ómasímo nene lusaváa gekago gihila zeaká noive. ⁷ Nenemú ale zuhá oaká noi vemú lamitune, itó liliha aleaká noi vemú litunimó negopa, lusa gekago gihila zeaká noi ve Ómasímú hamokó litune. ⁸ Hoza aleko ale zuhá oaká nou ve itó liliha aleaká noi ve leza hamokó lelegitó nousive. Meinaváa nene hoza alusi lelegitó etó etó oko alinogo usive. ⁹ Leza Ómasímini hozaló veva nousive. Ómasímini minía nene lekelisi niave.

Itó lekeza Ómasímini numuni apala niave. ¹⁰ Ómasímo hoza lehizenetamole loko neza numuni geaká ve gihilámina simeni lapusa ale hizumó. Itó nenémini amupiló ve makolite miní amiki numuni gikaká niave. Nenémináate gili hee li minikí gitaze. ¹¹ Lapusa hizenoumó nemó nene Izesu Kilistoni aí akeleko makó hizeakaláa nomive. ¹² Itó lapusa nenémini amupiló makolímo goli silivá nenetunupe itó meinava iteko mína gehanitunupe itó zasiha lónohani ménihá nenetunú gitimó nene, minoko numuni gimó nenémini mogonáa utó inogo ive. ¹³ Minoko gamena napaló mogonala utó noitó nene ló napa guluma inogo ive. Itó ló nenémo numuni nígeke hoza alemó nenémini mogona ale utó molanogo ive. ¹⁴ Ve makolímo lapusa amupiló numuni gimó nene lolímo lo lamaná amitimó nene eza meinava alinogo ive. ¹⁵ Itó ve makolímo numuni gitó lolímo lo asú itimó nene, Ómasímo aseva zetoko lokutí agutó vizitímóza, eza meinava aleminogo ive.

¹⁶ * Lekeza nene Ómasímini monó zavusave niave, itó Ómasímini Sikalahú nene mulutikú minoko aleko oaká noimó nene gelemahe. ¹⁷ Ómasímini monó zavusave nene etó keké vizeko neve, itó aí zavusave lekelisi niave. Nenemú makó keza Ómasímini monó zavusave ali golesa itamó nene, Ómasímo ámináminoko ámina vegeaná kelémo golesa inogo ive.

¹⁸ Lekeza likigikatini agoka vizemilo. Lekelikutí makolímo monó gelema vegegalitini kovogisaló gele vevesoaká ve nouve loko agata gilitimó nene, ámina gakó gele ahulokoko monó gelema vegegalitini kovogisaló negi ve loló oko minatimó nene Ómasímini agómualaló gele vevesoaká ve minanogo ive. ¹⁹ * Mikasiuka monó gelema vegegalite vevesokave liki lita gakó nene Ómasímo gelekiko negi gakó loló inogo ive. Nenemú monó gotolaú Ómasímú gakó makó láa liki luhuva gizinamóma neve:

* 2:16: Isa 40:13 * 3:2: Hip 5:12-13 * 3:4: 1 Koli 1:12 * 3:6: Apo 18:4-11,24-28 * 3:16: 1 Koli 6:19; 2

Monó gelema vegeñalitini kogómulaló gili vevesiki mina vegeñá keza gele vevesonoune liki netá nalemó nene gelehusi gekimikago, áminámini agepagú viki apiliaká niave.

20* Itó makó lá oko neve:

Guivahanímo gele vevesonoune liki liaká nia vegeñalite kagata nigele gako nene ha netá neve loko geleneive.

21 Nenemú lekeza vegeñalitini kugupe alimi iti iti amilo. Netá matá mukí nene lekelikumule loko mololikimikago neve. 22 Paulona itó Apoló itó Pitá leza nene lekelikumule loko gizapa ahulolimikago noune. Itó mikasiuka netá matá mukí itó minoakape heleakape itó itínasa minatí netape itó alika utó iti netá mukí nene lekelí mututoni neve. 23 Itó lekeza nene Kilistoni mututoni niave, itó Kilistó nene Ómasímini mututoni noive.

4

Aposolote monó hoza alemó nenémini mogona

1 Lekeza lelikumú gilikiko, Kilistoni gelekelé ve itó Ómasímini henonímini gizapa ve itó Ómasímini asuguná gako lole ale ve loló ino. 2 Itó henonímini gizapa ve keza hoza amelaho litokó hoza alitave liki linamóma neve. 3 Lá onoimóza, nezánemú litoze. Lekelisihe itó vegeñá lugáate iki miniki není gako litamó nene gelekugo gihila loló aminogó ive. Itó nezáne mogonánemú lotuva legeminogó uve. 4 Není lihímáne netimó nene gelenamuve. Lá onoimóza, není mogona nene Guivahani hamolímó ale utó inogó inazo, nenemú lihímáne nomimó nouve loko laminogó uve. 5 Nenemú lekeza vegeñalitini mogonáminimú loakakumú nene litá iki lamilo. Guivahani ezáa atiginá oko ati gamena nene ligikagú asuguná ne netá nene ale lapanató molanogó ive. Itó vegeñá ligikagú geleká nouni gako nene ale utó o asú inogó ive. Lá okoko vegeñalitini mogonáini áñigokoko etatitokó kelémo napa inogó ive.

6 Nigivénegita, lekeza lelí mogonáa lá iki nánigiki gili hee litave loko gako nolumó nene Apoloki lezateloka lo moloko noluve. Monokú lá iki minalo loko lo mololeta gako nene avilegemiki vegeñá lugáa kilími napa iká itó lugáa alivi letivi iká amilo. 7 Éaho lokago lukugupe alimi itiaká niave. Lekelitoka netá matá mukí vaí oko nemó nene Ómasímo lekememihe. Óe, Ómasímo netá matá mukí lekeme asú onoimó nenazo, lekeza nanamú gelego Ómasímo netá lekememimó gelekago lezatete ale utó okune liki lukugupe alimi itiaká niave.

8 Lekeza lekezatinimú láa liki giliaká niave: Lagatupa okago, monolímímini netate vaí oko neve. Pauloge niamago lezategó lugulizaki ve loló oko minoaká noune liki liaká niamóza, Ómasímini avogisaló lamaná lugulizaki ve lilí itanazo. Lá iki miniki lelí limimí iki lilímiki vikiko, lekelitoka miní ameko lugulizaki vegó loló oko minatuninazo. 9 Neza láa loko nagata noguluve: Ómasímo aposolo leza vegeñalitini kigilikagú lelemoko lemeko mololetamó gelekave. Lá okago, goní ilimikago lipili ahulatakumú ageva geko nominuhá ve gelekune. Mukitoka ageloge niamó itó mikasiuka vegeñá niamó keza lelí áñigi goselé ikago nouhá gelekave. 10 Leza nene Kilistokumule loko vegeñalitini kogómulaló negi ve loló oko nounimóza, lekelisi nene Kilistotoka miní ameko gelekate vaí oko neve liki giliaká niave. Leza keé lamunimóza, lekeza alévolé oko lugulizaki ve noune liki nigelehe. Vegeñalite lamaná lelí nene alivi letivi iaká niamóza, lekelí lukugupe alimi itiaká niave. 11 Leza nene nosánetakumú zahí nagamikumú gaúna heleko nominune. Lipiliaká niago, gineganete nomimó numute nomimó minoaká noune. 12* Lugupémini netá utó itive loko lezate ligizanitunú hozaváa alunike ale utó oaká noune. Lelikumú alivi letivi ikago, nónohá zekimiaká noune. Gopoguni mililimikago mukahá osá amune. 13 Lugulizá ali mumusopa zikago, kelémo hulu oaká noune. Leza izahuza netá loló okunike, vegeñá mukilitini pipizakitana minoaká noune.

14 Neza lokovoza hilitive loko gako imane gizamuve. Neza nigika lekemenou gipáne mohóne lakagata aleko luhuva imane nogizuve. 15 Kilistoni monokú apí ikimíta ve nene vaí iki nitamóza, ametike mukí niamave. Nénisi Izesu Kilistoni monó lo lukumuke ametipina loló oko nouve. 16* Nenemú nene není nigizakagú lisiki némegetatave loko lakagata aluke noluze, gililo. 17 Neza lá itave loko Timotini amiselekugo, lekelitoka novive. Eza nigika amenou ve Guivahanímini monokú gipáne loló oko minake, mukí netá ale gapoló molokogó aleaká noive. Eza voko neza Izesu Kilistotoka gímizeuke gosohá gapoló mohona oaká noumó nene numutó namató aí vegeñala zuha lo kemeaká nou gako goha lo lekemekiko gilitaze. 18 Itó lekelikuti lugáa nenete nenikumú nene aminogó ive liki hokolizá iki gopa miniaká niamóza, 19 Guivahanímo gelekiko, lamaná okikoma, mino hána aminake lekelitoka vinake, ámina hokolizá iki mina vegeñalitini gakoláa gelekinake,

* 3:20: Age 94:11 * 4:12: Apo 18:3 * 4:16: 1 Koli 11:1; Pili 3:17

zámuzáini netihe nomitihe nenémini mogona ale utó inogo uve. ²⁰ Ómasímini gizapaló minoakalímini gapo nene gakokú nomive. Ómasímini zámuzagú nene utó oaká noive. ²¹ Itó lekeza nenikumú nanave liki liaká niave. Mukahaki ano liki nilahe, itó nigika lamanaki hulu oko ano liki liaká niave.

5

Gumesisi netakumú goní oketamó

¹ * Lekelikumú láa liki lamaná likago gelekuke ininá okuve: Lekelitoka moko netá haitolímini numuká vetitoka utó amoakalímini utó onoimó nene gipalámo amelahini venalagi mihina iaká niasive liki lakumú noluve. ² Itó lekeza netá nenémináa utó onoimó nene lokovoza hiliki lukugupeló gilísá amahe. Lá niake monó vejená nounge liki lukugupe aliki otiaká niamó nene etamive. Lekeza miluma giliki lokovoza heleaká noi netá aleaká noi vema nene ali ahulítatanazo. ³ Neza nugupetunú hotó nouke nigika lekelitoka nego ámina netá loló i vemú nene vogalitikú noukegitana láa loko lo hukumó: ⁴ Lekeza alegesá iki niiko, itó neza nigikatunú gele nolukumugo. Guivahani Izesuni agulizató itó aí zámuzaló ámina ve nene holutikufi amisili ahulataze. ⁵ Lá niiki ámina ve nene agupegú miluma geleoko eza litaha agika ahulokiko Guivahani Izesuni gamena alitokiko ámina vémini amenía aseva zetatihe liki Satani agizakú milatave loko nololeketuve.

⁶ * Monotegi vejená nounge liki lukugupetini aliki itiaká niamó nenemú gulugo golesa oaká noive. Iza ekesaláa nene netá komámo izavagú holokago gizi vatí amó nene ekesá o asú oaká noimó nene gelemahe. ⁷ * Nenemú ekesalagi ve nene gizaká iki alími ahulikiko, noviko, gihila lagámini lílí ilo. Lekelí ekesá netatini mota gilato asú okamóma neve. Leza Zuta ve avotegini asenini zeketakumú gele minoaká holisi nene sipsip iza nanogo numutegutí ekesá netá ahulo asú okunike ekesá netá nomi peleti noaká nouháza, lelí asele zelimiaká sipsip iza Kilistoni nene lelí lihimamule liki apilinamóma nenazo, ⁸ * nenémini holisiváa minatune loko musi netá hokolizá nenémini ekesá netala ahulo asú okinake, mokoná netalímini gihiláa itó gakó gihila lagáminigó ekesá netala nomimó nene ale mininake holisiváa minatune.

Mokoló vejená ahuloketature

⁹ Neza luhuva netá makó gozapá láa loko gizo lukumomóma neve: Lekeza mokoló vejenaki nosá gitigi nímaní iki apiziki minamilo, loko loleketonoumóma neve. ¹⁰ Láa loko lumó nene monó gelema vejenalítini mokoló vehe itó makolímímini netató ángo lamaná oaká vehe, itó guminaló vehe itó gipe lakegusani lugeha netá ale miniaká nia vehe, keikumú lamumóma neve. Keí nene mikasi ahulatuni zupahé ahuloketatumitó niave. ¹¹ Neza neminokomú gizo lukumomóma neve: Monó nogilí ve likigivetipo makolímó mokoló mohona itíhe itó makolímímini netató ángo lamaná oaká ve noitihe, itó gipe lakegusani lugeha netató minatihe, itó vejená kemegeka kamaagaka litihe itó negi nagamitokó mohona itíhe, itó gumina vaukalokó mohona ití ve nenémináagi apiziki miniki nosánetá namitave loko loleketonoumóma neve. ¹²⁻¹³ * Leza monó gelemiki hetoka mina vejenakumú gakó lo hukoketosá nene lelí hoza nomive. Lekeza holutikú monó nigele vejená keí lihimáinímini gakolamú litamó nene lamaná inogo ive. Itó hetoka nia vejenalítini lihimáinímini gakoláa nene Ómasímo linogo ive. Nenemú monokú gakó láa liki luhuva gizinamó nene gili minalo: Vejená golesa ahulikimikiko holutikú minamino.

6

Monóini nomi vejenalítini kovogisaló goní gakó lamilo

¹ Lekelitokatí makolímó nene agivelahini lihima ale minatimó eza gakó nene monó vejenatoka lamoko monóini nomi vejenatoka noloko goní omiaká noimó nenemú lokovoza helemihe. ² Monó vejená leza minoko monóini nomi vejenalítini gakó lo hukanogo une. Nene ma gelemahe. Itó minoko hoza nenémináa alítave loko loleketonoumóma nenazo, lekelí gakotini hutuva utó okikoma, lí hukata avotigila iki minamahe. ³ Leza minoko ageló vejenalítini gakoki lo hukanogo une. Nenemú ha netá utó okikoma, vávani oko hanuva lo hukanogo une. ⁴ Ha netá nenémini gakoláa utó okagoma, lekeza nanamú monó guluhá vejená leza guluko lemeaká noi vejená nenémináa keitoka aliki vikago, lí hukilikimiaká niave. ⁵ Lekeza gakó imane gilikiko, lokovoza hilitive loko lo nolukumuve. Lekelitokatí ve makó agatagú hee hee lo mina vema noamihe. Itó lekelitoka gakotini utó noikoma, aitoka aliki vikiko, ale hee loleketatimóza, ⁶ lekeza nenémini isá amave. Izesuni zuhagutí

* 5:1: Gapo 22:30 * 5:6: Gal 5:9 * 5:7: Gá 12:5 * 5:8: Gá 13:7; Gapo 16:3 * 5:12-13: Gapo 13:5, 17:7

makolímo agivelahini lihima utó okagoma, monóini nomi vegeatoka aleko vokago li hukimiaká niave.

⁷ Lekelisi eza goní omikago eza goní omikago iaká niamó nenémo monotini aleko lemeaká noive. Likigive lugáate netá golesa aleleketatune liki nilikoma, helegalokagó minatinazo. ⁸ Lekeza nene lekezatínigi netá ali gopa iake, gumina vauka niaká niave. Lá niake, monokú ve likigivetikínigi ámina ikimiaká niave.

⁹ Netá golesa aliaká nia vegealite Ómasímini avogisaló vi hiliakaláa nomive. Nenema gelemahe. Lekeza likigikatini agoka vizemilo. Gumesisi mokoló vegeaná itó gipe lakegusani lugeha netató vegeaná itó ve vená huki ezega emega iaká vegeaná itó vémohe venalímohe agivelahitoka gímizekiko akiaká nia vegeaná nenehe, ¹⁰ itó guminatamina vegeaná itó makolítini netató ángi lamaná iaká nia vegeaná, itó negi nagamitó mihina iaká nia vegeaná itó kemegeka kama gaka liaká nia vegeaná, itó laskoli, vegeaná nenémináate Ómasímini avogisaló vi hilaminigave. ¹¹ Itó lekelikutí vegeaná lugáa gozapá nenéminiki minamóma nemóza, itína nene likigika nagamá zelikimiake itó ale guluvitolikimiake, Guivahanite Izesu Kilistoni agulizató itó lelí Ómasímini Sikalahulímini agulizató lihimatini asú olikimikago niave.

Lukugupémo Ómasímini agulizá ale otino

¹² * Lekeza mukí netá nene gakola nominazo hanuva alesá neve liki liaká niamóza, mukí netá nenémo ma lelémo vatí aminogo ive. Itó lekeza mukí netá nene gakola nominazo hanuva alesá neve liki liaká niamóza, netá makolímo agulizaki ve loló o liminogo noiko gele amemitune. ¹³ Lekeza nene goula nosá nene lagatupámini netale itó lagatupa nene nosánetakumú neve liki liaká niamóza, minoko Ómasímo nene áminagi áminagi gizo lú nokiko haha inogo ive. Lugalémo nene moko netá aleakakumule loko nomive. Guivahanímini luhuva utó itive loko neve. Itó Guivahani eza lugupémini amelaho noive. ¹⁴ Itó Ómasímo Guivahani nene heleneikutí alémo otimó ámina oko zámuzalatunú leza lelémo otinogo ive. ¹⁵ Lukugupetinímo Kilistoni gelekelé oaká noimó nene gilísá amahe. Itó Kilistoni gelekelela eza goha ale viligokoko mokoló venalímini gelekelé otatihe, olo. Íi, lá oko nomive. ¹⁶ * Lekeza láa liki gilísá amahe: Ve makolímo mokoló vená makotoka gímizekikoma, keza kugupenini kigikáini mili hámakó iiki minatáimó neve. Nenémini luhuva gakó makó láa loko nemóma neve: Keza lositató kugupe kigika hamokó loló okiko apiziki minatáive. ¹⁷ Lá oko nemóza, makó eza Guivahaniloka gímizekiko ezagi kigikáini hamokó loló inogo ive. ¹⁸ Lá onoimó nenazo, mokolú netá golisi italo. Ve makolímo netá golesa lugáa alitíimó nenémo ezáa agupeló gímizemitimóza, mokoló netalímo netá nenémo ezáa agupe ale golesa inogo ive. ¹⁹ * Itó lekeza láa liki gilísá amahe: Lukugupe nene Sikalahulímini monó zavusave neve. Ómasímo lekelí lukugupémini agikagú minoko aleko itive loko mololeketonoimóma neve. Lekeza nene likigika lukugupémini amelage minamanazo, ²⁰ itó lekelí meina hizekamóma nenazo, nenemú lukugupémo Ómasímini agulizá ale otino.

7

Ve aleve keí gakó

¹ Lekeza luhuva netá gizi nemeke loká inita netakumú lo utó molatoze, gililo. Ve makolímo vená alemoko hanuva minatove litimó nene lamanale. ² Itó lá onoimóza, moko netakumú gimilegú moloaká netá nenémo vaí oko minokanazo, nenemú ve nene etó etó iki vená aliiki venáinigi minatamó nene vatí oko neve. Itó vená keza ámina iki etó etó iki veló viiki váinigi minatamó nene vatí oko neve. ³ Itó ve neneka gugupe nekisa nene venaka mosetamo. Itó ámina oko venalika gugupe nekisa nene vaka mosetamo. ⁴ Vená geza gupémini netá nene geí nomive. Vakámini netá neve. Itó ve geza gupémini netá nene geí nomive. Venakámini netá neve. ⁵ Vego venako lekeza lukugupetini ali amanapa amilizo. Hanuva Ómasiloka linigi goí iki ligili hagili iiki gamena miliiki mini hotó itái gamenamú litáimó nene, lamaná inogo ive. Milatái gamena asú okiko goha ali apiziiki minalizo. Milatái gamena aviligítáimó nene, Satá eza gimilikú molokative loko noluve. ⁶ Ve aleve lilí iki minatave loko lo hukoleketugopa, hanuva gele lukumuke noluve. ⁷ Nezáne noutíminiki gohuna minatave loko geleaká noumóza, Ómasímo zámuzá haitopaitó lehizeletamó nenazo, makó keza ve aleve lilí itamó, itó makó keza gohuna minatamómámini zámuzá alinamóma neve.

⁸ Getó venaki itó gohuna vegi itó gevoná venaki keí gakó nene láa loko noluve. Keza neni suni aliki veló vamiki vená alemiki minimi ititamó nene, vatí inogo ive. ⁹ Lá itamóza, gumesisi lakagata nene ve vená huko ezega emega oaká lakagata gilitamó nene, ámina

netalímini loláa nenémo lekelémo golesa okatize, ve aleve lílí iki minata sunímo vatí oko neve.

¹⁰ Ve aleve lekelí gako lítoze, gililo. Nene není gako kó nomive. Guivahanímini agepagutí gako noluve. Vená keza váini ahulikitamino. ¹¹ * Itó váini ahulikitinitamó nene, goha veló vamiki hanuva minino, itó lá amiki váimigi goha apiziki minino. Itó ve keza venáini ahulikitamino.

¹² Vegená lugáatini gako lítoze. Gilikiko, Guivahanímo lokago alika geleake nolihe líki gelemilo. Negepa ale vávani okago nololeketuve. Izesukumú gele alévolé onoití ve makolímíni venala eza monó gelemí vená minatímó nenémo vanagi apizeko minatíive loko gelekikoma, vanámo amisele ahulotamino. ¹³ Itó Izesukumú gele alévolé onoití vená makolímíni vana eza monó gelemí ve minatímó nenémo venalagi apizeko minatíive loko gelekikoma, venalámo amisele ahulotamino. ¹⁴ Monó gelema ve nene venáimilokatí lusa nenémo kezalokagi voko aleneive. Itó monó gelema vená nene vánílokátí lusa nenémo kezalokagi voko aleneive. Lá noigo, gipa mohóini nene lusaningi lílí iki niave. Keitoka lusa minamilina, izegipáini nene monó gelema vegená minaline. ¹⁵ Lá onoimóza, monó gelemítí vémohe itó monó gelemítí venalímohe vanahe itó venalahe ahulotoko vitove loko nolikoma, géneka lamilo. Ómasímo geha ziki apiziki minatave loko sele lo limimóma nenazo, nagá zeko ale minatunimó nomive. ¹⁶ Vená geza vakagi apiziki minatáimó nene, monó gapogú nene vaka alémoko atape, amitane. Nenéa gelenape, olo. Itó ve geza venakagi apiziki minatáimó nene, venaka nene monó gapogú alémoko atape, amitane. Nenéa gelenape, olo.

Guivahanímo iki miliki minatave loko loletamó nenegukó minatune

¹⁷ Lekeza etó etó iki nene Guivahanímo iki miliki minatave loko loleketamó itó Ómasímo sele lo líkimi zupa iki miliki miniaká a mogonaló nenegukó monokú minino. Neza numutó namató Izesuni vegenala zuha gako lo kemeko némika loko lo hukooká nouve. ¹⁸ Vegená makó nene Ómasímini anosa kugupeló milikimikago niago Guivahanímo sele lo kemekago imi nitamó nenete ámina anosa ahulata gapomú vitagá amitaze. Itó vegená makó nene kugupeló Ómasímini anosa nomimó niago Guivahanímo sele lo kemekago imi nitamó nenete ámina anosamú voká lamitaze. ¹⁹ Ómasímini anosa aliki minatamó itó anosa nomimó minatamó nenémo netá gihila nomive. Ómasímini agepagutí gako gili aliki minatamó nenémo gihila neve. ²⁰ Vegená lekeza nanámini mogonaló iki miliki niago Ómasímo sele lo likimimó nehe. Ámina mogonalokó minalo. ²¹ Geza megusa izegipa loló oko noako Ómasímo sele lo gemeneitimó nenemú gagata losi gelemoko áminagukó minozo. Itó megusa izegipa loló oko minoko hoza aleaká noanikutí gologí ogetatune líki nilikoma, géneka lamo. ²² Vegená makó nene megusa izegipa lílí iki niago Guivahanímo sele lo kemeneitimoláa keza Guivahanímo líhimáikutí apasoketa vegená niave. Itó ámináminoko vegená makó nene hanuva niago Guivahanímo sele lo kemeneitimoláa keza Kilistoni megusa izegipa lílí iki niave líki gili minalo. ²³ Izesú eza lekelí meina hizeneimóma neve. Nenemú mikasiuka vegenalitini gopoguni miliki gelekelé ikitamiki Izesunigó gelekelé itíki minalo. ²⁴ Nigivénegita, lekeza etó etó iki gozapá nanámini mogonaló iki miliki niago Ómasímo sele lo likimimó nehe, ámina mogonalokó itína gamenagi Ómasiloka gímiziki minalo.

Mohoki getó venaki kei gako

²⁵ Itó veló vama venakumú nene Guivahanímini agepagutí gako alenamumóza, Guivahanímo agika hize nemekago monónegi loló oko nouke, nezáne nagata nogulu gako lo líkimitomó neneló lekeza leheta itave loko noguluve. ²⁶ Itína gamena nene golesa netalímíni agikagú nounike lugupe gasova okago nouné. Nenemú ve makó keza vená alemiki gohuna minatamó nenemú gelekugo lamaná inogo ive. ²⁷ Vená aleneitanimó nene, ahulatove loko gelemo. Itó vená alemoko hanuva noitanimó nene, venakumú gelemo. ²⁸ Itó vená alitanimó nene golesa aminogo ive. Itó hanuva noití vená makolímó veló vitimó nene golesa aminogo ive. Lá onoimóza, ve aleve keza lugupémíni netakumukó giliki miluma giliki minanigave. Itó neza nenémíni gelehugitú akagá oleetatove loko noluve.

²⁹ Nigivénegita, gako imane lo nolukumumó nenémíni mogona lá oko neve: Ómasímo mola gamena mota alitokave. Itó gelekelé otatuni gamena mota alínipa okanazo, venaki ve lekeza Guivahanímini hozagú iki miliki itamó nene ve aleve lílí amamó giliko minalo. ³⁰ Itó ive nama iaká nia vegená lekeza iki miliki itamó nene ive nama amamó giliko minalo. Itó lokogoliza viziaká niamó lekeza iki miliki itamó nenémo lokogoliza vizemamó giliko minalo. Itó netá matá meina kona iki miniaká niamó nenémo henokanotini nomimó giliko minalo. ³¹ Itó nosá molosaka liaká niamó nene lá amamó gelekiko minalo. Mikasi imane

* 7:11: Mat 5:32, 19:9; Mak 10:11-12; Luk 16:18

luhuvagi nego áinigoko geleaká nouháza, mota vo tolova inogo ive. Nenemú gakó imane noluve.

³² Lekeza nene ha netakumú mulutini itemiko minatave loko gelenouke noluve. Gohuna ve nenete Guivahanímini hozamú giliki minanigave. Miniki Guivahanímo gelekiko lamaná itive likigó iki miliki inigave. ³³ Venaki ve nenete lugupémíni netakumú gilinigave. Lá niiki venáinite giliko lamaná itive likigó iki miliki inigave. ³⁴ Lá iake kagata losi giliki miniaká niave. Itó áminagó iki vená mohó getó keza Guivahanímini hozamukó giliki minanigave. Lá niiki kigika kugupe Guivahanímini loló itive likigó iki miliki inigave. Itó vegi vená nenete kugupémíni netakumukó gilinigave. Lá iiki váinite gili lamaná itave likigó gilinigave. ³⁵ Lekeza vatí iki minatave loko gakó imane lo nolukumuve. Lekelí gapo hize lí ugopa, lekeza gopa amiki likigikatini míli nupa ikiko, Guivahaniloka mukípa miniko gelekelé itatave loko noluve.

³⁶ Itó ve makó eza mohola nene veló viti gamena asú inogo noikoma, itó amelaho nene ale minanogo goselé apelekikoma, veló amisilinogo nookoma, amisilitimó nene lihima aleminogo ive. ³⁷ Lá itímóza, ve makó nenémo agikatanú mohóne nene hanuva minative loko gele hamó oko gilikoma, gena amiko, veló vamitive loko lo hukatimó nene etanogo ive. ³⁸ Nenemú ve makó eza mohola veló vitive loko gele amitimó nene, etanogo ive. Itó makó nenémo mohola amiselemoko ale minatimó nenémo iteko neve.

³⁹ Vená makolímóhe makolímóhe vanámo oko moloko ititoka ititoka oko ezaló apizeloko voko minatize. Vana helekiko nene, ve makotó vitove lokoma hanuva vitize. Lá onoimóza, gopa napa minoko nomive. Guivahanímú geleneiti veló vitive. Lá onoimóza, ⁴⁰ nagata gulumó veló vamoko hanuva minatimó nene, agoliza vizeko minanogo ive. Nene není gakó nemóza, nagata gulumó Ómasímini Sikalahú nenitoka nego noluve.

8

Ómai netalímini miguhala noaká

¹ Itó soza ómai netalímini miguhala niaká niamó nenemú lo likiminogo uve. Leza mukitó nene netá mogonatagana geleaká nounge liki liaká niamóza, mogona geleakalágó gelekunike lugupe aleko iteaká nounge. Ligika kemeko nasahílí oketoko minatunimó nenémo luhusate ale gilitolimikiko lamaná oko minanogo uve. ² Makó keza geleakate napa neve liki litamó nene geleaká gihila makó alinamave loko litune. ³ Makó keza kigika Ómasiloka míli gikí litamó keí nene Ómasímo giliko lamaná inogo ive.

⁴ Nenemú soza ómai netalímini miguhala noakakumú nene láa loko geleaká nounge: Ómai netá eza netá gihila nomive. Ómasi eza hamokó gihila noive. ⁵ Ómasi mukí nene okulumakú itó mikasigú niave liki liaká niave. Itó ómai netá guivahani sozámíni mukí niamó gelekamóza, ⁶ leza nene Ómasi ameteho hamokó noive loko gelenounge. Aitokatí netá matá mukí utó o asú onoimó, itó leza aí mututoni loló itune loko nounge. Itó Guivahani hamokó Izesu Kilistó aí agizakutí netá matá mukí utó onoimó itó leza aí agizakukó nounge. ⁷ Lá oko nemóza, vegená lugáa keza nene mogonáa lá oko noimó nene gili guni isá amave. Itó nenémináate ómai netá eza netá gihilave liki minake, sigaga litiki minake, kigika okamóma nenazo, miguhala nake goliva gelego, genavagi loló noigo, nake kigikáini ali golesa iaká niave.

Ligivetegini kigikáini ale gopa oketamitune

⁸ Ómasi eza nosánetá noaká namoakakumú giligo golesa aminogo ive. Miguhala noaká mostunimó nene gele golesa itithe. Itó nokuko gele lamaná itithe. Lá oko nomive. ⁹ Hanuva lugáa lekeza lagava giliki niaká niamoláate likigivetikini kigika losi pasi i vegená kigikáini alí gopa ikimikataze, nenemú giliko gena líkivisino. ¹⁰ Geza matuka koló ominamó neneka, ómai netalímini numukú miguhala noko noako, gígivekaho makolímó giliko gena oaká noití vémo áinigokoko láa loko linogo ive: Nonamole. Neza natomole. Loko lokoko nanogo ive. ¹¹ Natimó nene, gígivekaho monó lagasó alenei ve Kilistó nohilike meina hizenei vema geí gígikaloka vokoko hoipa loko golesa amitimó nehe. ¹² Lekeza nenémini iaká niake, likigivetikini kigika kemeni alévolé ami vegená goihá giligili níkitake, kigika ali gopa ikimiaká niave. Kigika ali gopa ikitatamó nene, Kilistoni goihá giligili itamó gilinigo ive. ¹³ Nenemú neza iza mémela nonugo, nigivéneho nenemule loko gele gopa oko lihima alekatnazo, aikumó gulugo, gena okikoma, iza mémela mose oko mininake hilitoze.

9

Aposolomate avevezaha a netá

¹ Neza nagá makokú minamuve. Nénisi vegenalitini megusa minamuve. Nénisi nene aposolo nomive líki nilahe. Nénisi nene Guivahanima ángamuhu. Hozanémini gihiláa

Guivahanímini nasahilikú utó oaká noimó nene lekelisi nene lá isá amahe. ² Nénisi nene vejená lugáatini aposolo minamugoma, aposolo hozanémini gihiláa Ómasímini lusaló utó amoláa nene lekelisi nianazo, lekelí aposolo lamaná nouve.

³ Aposolo hoza aleaká nou mogonánemú loká iaká nia vejená nene gakó imane ale viligoko láa loko lo kemeaká nouve. ⁴ Aposolo lugáa keza lekelitokatí nosáneta zahí nagamí aliki níki minikago, lelikumú nene namitaíve líki lí hukilitatahe. ⁵ Pitá itó Guivahanímini agunamotamolagi itó aposolo lugáa keza venáinigi monó hozaló nivago nosáneta kimiaaká niave. Lá niago leza áminámini okogó venategi monó hozaló vitínazo, nosáneta mosilitatamó nene etatihe, oilie. ⁶ Nezagi Panapasiki lezagó ligizanitunú hoza aleaká nousimó nene ali ahulatáíve líki líki limitamó nene etamitihe. ⁷ Gililo. Pilisí ve keza lova hizita netá kezáini moníinitunú meina hiziaká niahe. Itó ve makolímo hoza aleko zuhá itimó nene omolokiko aleko namitihe. Itó ve makolímo pulumaká iza gizapa onoitotí keí aminí namitihe. ⁸ Gakó láa loko nolumó nene imane mikasiuka vejenalitini gakó nolumóza, monó gotolau gakó makó ámináminoko utó noive. ⁹ * Mosé lo hukoko lí gakó makó láa loko lonoimóma neve:

Pulumaká nenémo hoza alegetoko ménihá gihisi nanago noikoma géneka loko agepa viseletamo.

Loko Ómasímo limó nene pulumakakumukó lamive. ¹⁰ Vegená lelikumuki lo moloko limóma neve. Hozagaza aliaká niamó nenete gihila utó iko natune líki kagata losi gelemake, zuhaina iaká niamó nene etokave. ¹¹ * Leza nene lekelitoka likigikámini netá gihila nene zuhá oaká unitó meinaváa lekelitokatí lugupémini netá alitunikumú gilikago gena okahe. ¹² Lugáa keza lekelitokatí moni henokanoni aliaká niamó nenémo etokamó nenazo, lamaná lezagi nene áminámini oko lekelitokatí alitunimó etative.

Lá onoimóza, leza apí oko hoza alumikutí emane lugupémini netá alemuháma neve. Kilistoni gakó lamanalímini gapo hize lí omikatune loko lekelitokatí moni henoni alitave líki líki liminamóza, lá amunike ahulukunike gena aleko mohona oaká noune.

Pauló meina nomi hoza aleko minamó nenémo gonanalivagi utó imó

¹³ * Monó zavusave napagú hoza alemoláa keza monó zavusavegú Ómasímini avogisaló milita nosakutí niaká niave. Itó ló lónogó iake Ómasi guguni gizi amiaká nia ve keza vejenalite Ómasímini avogisaló milita netakutí ali nímani iaká niave. Nenéa lekeza gilísá amahe. ¹⁴ * Itó monó gakó lole ale ve leza ámina gakó giliaká nia vejenakutí lugupémini lukesava alitave loko Guivahanímo lo hukoletonoimóma neve.

¹⁵ Lá onoimóza, nénisi ámina vililita gapoló vosá amuve. Itó lekeza nene ámina suni alinitatave loko gelekuke luhuva imane gizamuve. Itó ve makolímo nene neza hagitana oko monó lo lekemeaká noukumú nogoliza vizeko nugupe ale oteaká noumó nene aleko lemekative loko nenemú gulugo gena okanazo, heleaká netalímo není alitihe loko nenemú gulugo, vávani noive. ¹⁶ Gakó lamaná lo hutilí oaká nouve. Lá noumóza, ámina hozaváa nene není numupiló molonoimóma nenazo, nenemú nugupe aleko iteko sigaga loko litomó ma lamaná aminogo ive. Izesuni gakó lamaná lo hutilí amulina, nagataló nagataló igo minuline. ¹⁷ Hoza nene nezáne nagata geleko ale utó oko alulina nene, minoko meinaváa alulinamóza, nezáne nagata geleko alemumóma nenazo, mogonáa lá oko neve. Ámina hoza nene Ómasímo nemekago numupiló itekago aleaká nouve. ¹⁸ Nenemú meinaváa aleaká noumó nene lá oko neve. Neza monó hozaló novuke, Izesuni gakó lamanáma meinaváa nomimó vejená lo keme keme oaká nouve. Lá uke gakó lamaná loaká nenémini meinaváa lugupémini lukesaváa alitave líki linamó nene ale ahuloaká nouve.

Pauló eza haitopaitó vejenalitini gelekeléini minamó

¹⁹ Neza vejená makolitini megusáini minamumóza, vejená mukí nene Kilistotoka kelémo molatove loko gopa mukí vejenalitini gelekeléini loló oko nouve. ²⁰ Zuta vejená Kilistotoka kelémo molatove loko kezagi makó minunike, Zuta vetini kemetameki loló oaká nouve. Itó nezánemú Mosé lo hukoko lí gakolímíni nagakú minamumóza, lo hukoko lí gakolímíni agizakú nia vejená nene Kilistotoka kelémo molatove loko keitoka minuke, ámina lo hukoko lí gakotó gelekelé izegípa nemetamenigi loló oaká nouve. ²¹ Itó Zuta vejená minamamoláa keza Mosé lo hukoko lí gakó minami vejenaki makó minunike Kilistotoka kelémo molatove loko Mosé lo hukoko lí gakó minami nemetameki loló oaká nouve. Nene Ómasímini avogisaló eza lo mola gakó nomive lukopa, neza Kilistó lo mola gakó gele aleaká noumole. ²² Itó vejená monó kigika amimoláa Kilistotoka kelémo molatove loko ve nenémináagi makó minunike vejená monó kigika amimoláa kemetameki

* 9:9: Gapo 25:4; 1 Tim 5:18 * 9:11: Lom 15:27 * 9:13: Gapo 18:1 * 9:14: Mat 10:10; Luk 10:7

loló oaká nouve. Lugáate latila inigi niago, némini manámini oloko vinake Ómasímo lugáa kugutó vizitive loko haitopaitó vegeatoka minuke, haitopaitó kemetameki loló oaká nouve. ²³ Mukí netá nene hanuva Izesuni gakó lamaná utó oloko vitive loko loló oaká nouve. Lá nouke Ómasímo nónohá nozeketoko nezagi nónohá zenetative loko aleaká nouve.

Amuza moloko gonanalisi netá alitune

²⁴ Lekeza láa liki gilísá amahe. Zohí oaká apató nene izegípa keza mukító lolu liaká niamóza, netala nene hámakolímo goí oko vo anitike aleaká noive. Lekeza ámina iki Ómasílokátí gonanalísítini alitune liki lolu lilo. ²⁵ Lesis ita izegípa keza amuza molatune liki apínápí iki haitopaitó avevezaha iaká niave. Keza gonanalisi netá ha netakumú nenémini iaká niamóza, leza nene gonanalisi netá alévolelámú nenémini itune. ²⁶ Nezánegi nene lolu loaká nomú nene anosa netá alitove loko ángo hee lo minuke lolu loaká nouve. Itó neza hoza alumó nene ale satosá amuve. ²⁷ Neza vegeaná nene monó lo keme keme oko minoko nezáne latila okatove loko nugupéne aleko lemeko nigikámo litító ámegetative loko gizapaváa minoaká nouve.

10

Soza ómai netá gupá zi amiki gelekelé itamilo

¹ * Nigívénégita, leza avotege iki miliki amó nenemú gilitave loko lo likimitoze, gililo. Mosé eza Izípi mikasiukatí kelémoko novigo, keza mukitoka límúsímo molo hitokímikago vamó, itó mukitoka age nagamí likiki vamó. ² Lá niake, Moseni vegejala zuha lílí itave loko límúsímo itó age nagamílímo monó nagamí loló okago hilamó. ³ * Itó Sikalahulímo nosá ale utó okímikago, mukító niki minamó. ⁴ * Itó Sikalahulímo nagamí ale utó okímikago, mukító namó nene Sikalahulímíni zámuzaló gehani nenémo kémegetoko novigo ámina gehakutí nene nagamí lemekago namó. Ámina gehani nenémini agulizá Kilistó. ⁵ * Lá okamóza, Ómasímo ámina Zuta vegeaná lugáamú gele golesa okímikago, mikasi gomopalaló hili gesá amó.

⁶ * Itó Zuta vegeatoka netá lá oko utó imó nenémo lelí lagata alinogo utó imóma neve. Keza nene golesa netakumú mumuzó ikago, leza áminámini okatunize. ⁷ * Keikutí lugáa nenete soza saza ómai netá gupá zi amiake, némini netalímíni gelekelé itiki minamó. Lekelisi nenémini amilo. Nenemú monó gotolau nene luhuva láa liki gizinamóma neve: Vegená keza mító minake, nosánetá niki niki iake, otiake ómai netalímo ángo guni itive liki melekeni amó neve.

⁸ * Lá iake, mokoló netá haitopaitolímíni ali utó iki minamó nenémini okatunize. Keikutí lugáa nenete ámina netá golesa ali utó iki minake, ámina zupagó vegeaná helemó nene 23 tausen hili gesá amó. ⁹ * Itó keikutí lugáate Ómasímú agika lamanaki ve nenazo, nosánetakumú géneka litunimó nene gahá lememíthe liki liake gimivagú milikago, gosihá agulizá guimalite kipílikago, hili gesá amó. Lezagi lá okatune. ¹⁰ * Keikutí lugáate Ómasímú gahá litígí ikago, vegeaná kepeleaká ageló makolímo anitike kepele gesá imó. Lezagi lá okatune. ¹¹ Keitoka netá utó imó nenémo lelí mesaha loló okaze, nene ángatune. Mikasigi okulumaki gamenaváini asú ititó noune. Gakó imane lagata aliki nene gakokumú avetó iki luhuva gizinamóma neve. ¹² Nenemú nene ve makolímo ezámú giligo monokú alévolé oaká noitimó nenémo voko golesa okatize, nenemú legesó oko minatize. ¹³ Lekelitoka gimílikú moloaká nenémo utó omo itimó nene, numutó namató vegeaná mukitoka áminagó oko utó oaká noive. Lá onoimóza, Ómasímo lelémo vatí itove loko lokago alévolé oaká ve nenazo, gimílikú moloaká netá makolímo utó okoko lekelí zámuzá avilegekoko lekehelú itimó okíkoma, Ómasímo lekelémo vatí oko zámuzá nolekemeko zukatoni lekelepizekiko, hanuva alévolé iki minanigave.

¹⁴ Nenemú nene, nigívénégita, lugeha netá soza saza ómai netakumú mosiiki etó iki minalo. ¹⁵ Lekeza likígikagi lakagatagima niave. Nenemú gakó imane litoze, lekezatini gilíki ángi hee lilo. ¹⁶ * Gonigú nene vain nagamí Ómasímo lusa geko molamó nene nonunike, Kilistóni golanímíni lusa molamó nene izá moloko aleaká noune. Itó peleti lusa geko molamó nene nonunike Kilistóni mémelámíni lusa molamó nene izá moloko aleaká noune. ¹⁷ Lepa nosá nene hámakó peletígutí noaká noune. Ámináminoko leza monó guluhá vegeaná nenete apizeko hámakó loló oaká noune. ¹⁸ * Lekeza nene Isilae vegeanalítini sunímú gililo. Guguni giziki nosánetá niaká nia vegeanalite guguni giziaká

* **10:1:** Gá 13:21-22, 14:22-29 * **10:3:** Gá 16:35 * **10:4:** Gá 17:6; Nam 20:11 * **10:5:** Nam 14:29-30 * **10:6:** Nam 11:4 * **10:7:** Gá 32:6 * **10:8:** Nam 25:1-16 * **10:9:** Nam 21:5-6 * **10:10:** Nam 16:41-49 * **10:16:** Mat 26:26-28; Mak 14:22-24; Luk 22:19-20 * **10:18:** Liv 7:6

italó viki Ómasiloka gímiziaká niave. ¹⁹ Gakó nolomó nenémíni mogona lá oko neve. Ómai netalímíni miguhala niaká niamó nenémo netá gihila nomíve. Itó ómai netá ezagi gihila nomimóza, ^{20*} monó gelema vegealite miguhala niaká niamó nene Ómasímínimú nomíve. Holositíni miguhala niaká niave. Nenemú nénisi nene lekezagi holosigi apizítave loko gelemuve. ²¹ Lepa nosató Guivahanímíni gonigutí niiki itó holositíni gonigutí niiki itamó nene, etamítive. Ámina goni lositakutí noakaláa nomíve. Itó Guivahanímíni italotí niiki holositíni italotí noakaláa nomíve. ^{22*} Guivahanímíni izapaló molative liki niahe. Ehe, lelí zámuzámo aí nene avílegenamíve.

Némíni manámíni inígi Ómasímíni agulízá vitíve líki lá itaze

^{23*} Lekeza nene netá matá mukí nene lígika ale golesa íti netá nomígo hanuva aleakaláa neve líki liaká niamóza, mukí netá alekuko nenémo lelémó vatí aminogo íve. Netá matá mukí nene gakola nomígo hanuva aleakaláa nemóza, nene netá mukí aleloko novínake luhusate ale gílitolímiakaláa nomíve. ²⁴ Makó eza ezámukó gelemokó agívelahínímú gílino. ²⁵ Lekeza nene lekezatíko maketilótí iza góula nosá meina hízitune líkima hanuva hízitaze. Lá níikima soza saza ómai netalímíni nomukutí nehe líki gílíko, gena okatíve líki loká miká amílo. ^{26*} Nenemú monó gotoláú luhuva láa líki gízínámóma neve: Mikasígú netá matá mukí nemó nenémíni amelaho Guivahani áísígó noíve.

²⁷ Líki gízínámó nenazo, mikasiuka netá mukí nene noaká netakó neve loko gílínogo une. Nenemú monó gelemí ve makolímó nosánetakumú alesa molo lekemekíko nene, numunagú ítitune líkima ítitaze. Ítikíko, nosáneta lekemekíko nene, lakagata gílíko, gena amíko, gopa nalo. Gopa nínikí nene holositíni miguhala nehe líki loká miká amílo. ²⁸ Lá onoimóza, gopa níniko nene ve makolímó imane iza nene ómai netalímíni miguhala neve loko lo utó o lekemekíko nene, ámina vemú nene gílíko, gena okíkoma, ahulalo. ²⁹ Lekezatíni líkígíkatíni golesa ítikumú nomíve. Líkígívetípíni agíka golesa okatíve loko nolúve. Nezáne nígíkámú gulugo gena amí netakumú ve makolímó ezáa agíkatunú ale moloko neníkumú lokatíze, nenemú ahulatove. ³⁰ Neza Ómasi agepoka lokínake nosáneta natomó nenazo, Ómasi agepoka loko nato netakumú ve makolímó gele golesa oko gahá nímitímó nene etamínogo íve.

³¹ Nenemú lekeza nosáneta nanígi itó zahí nagamí nanígi itó némíni manámíni inígi Ómasímíni agulízá vitíve líki lá ilo. ³² Lekeza Zuta vegeaná ahe itó Kílíkí vegeaná ahe itó Ómasímíni vegeaná zuha keí kovogísalo gíli golesa ita netá nene alí utó amílo. ³³ Neza ámináminoko vegeaná haitopaitó keza ángínímíkíko etatíve loko mínúke, nezáne netá matáne lamaná ítíve loko nomíve. Ómasímó vegeaná mukí kugutó vízítíve loko némíni manámíni oaká nové.

11

^{1*} Neza Kílístó lísoko ví gapoló lísúke, ámegetoaká nové. Lekeza ámináminíkí není nígízagú lísíkí nèmegetalo.

Venalíte gotóitó netá hitata gakó

² Lekeza nene oko moloko umómaloka míli gílíkí neza lo hutu gakó lainím-oleketumó nene ámegetíkí míníaká niave. Nenemú gulugo lamaná okago lekegepoka loaká nové. ³ Itó gakó makó lokugo gílítaze, gílílo. Ve nene venalítíni napáa niave, itó Kílístó nene vetíni napáa noíve, itó Ómasi nene Kílístóni napáa noíve. ⁴ Nenemú ve makolímó ezáa gotolaló akílí hitonoko Ómasiloka lítimope itó Ómasímíni agepagutí gakó lo utó ítimó nene, Guivahani avoza hílítí netá alínogo íve. ⁵ Itó vená makolímó gotolaló netá hitamoko Ómasiloka lítimope, itó Ómasímíni monó gakó lo utó ítimope nene, vana avoza hílítí netá alínogo íve. Lá ítimó nene, mokoló vená lugáate gotóini zopova húkí asú íkí míníaká nía vená gílínogo íve. ⁶ Nenemú vená makó nene gotolaló netá hitamoko lá okíkoma nene, gotola zopova húkí alínípa ítalo. Itó vená makó nenemú avoza helekíkoma, gotola zopova aseva zekoko gó ale hitookó Ómasiloka líno. ^{7*} Itó ve keza nene Ómasímíni nekisa itó Ómasímíni gonanalísíva lílí ínamole. Itó vená keza nene vetíni gonanalísí niave. Nenemú ve keza monó líta gamenaló gotóitó netá alí híítíkí mínatamó etamínogo íve. ^{8*} Ómasi eza ve nene venakutí aleko loló amíve. Vená nene vegutí aleko loló ímole. ⁹ Ve nene venakumú loko alémó utó amíve. Vená nene vemú loko alémó utó ímole. ¹⁰ Nenemú monó líki níago, ageló vegealíte ángí míníaká níanazo, vená keza vetíni gízapaló niamó nenémíni anosa nene gotóitó gó alí híítíkí mínatamó nene etanogo íve. ¹¹ Lá oko nemóza, Guivahaníló

* 10:20: Gapo 32:17 * 10:22: Gapo 32:21 * 10:23: 1 Koli 6:12 * 10:26: Age 24:1 * 11:1: 1 Koli 4:16;

Pili 3:17 * 11:7: Apí 1:26-27 * 11:8: Apí 2:18-23

gímizekunike ve nene venalitini zámuza nianazo, itó vená nene vetini zámuza nianazo, nenemú Guivahanímini avogisalo nene ve vená keza haitopaitolímíni minatamó nene etaminogo ive. ¹² Vená nene vegutí aleko loló onoimóma neve, itó itína gamena ve nene venakutí utó oko ve hize hutilí oko minoaká noune, itó netá mukí nene Ómasilokatí neve. ¹³ Lekezatini giliki ángi hee lilo. Vená makolímó gotolaló netá hitamoko Ómasiloka litímó nene, etatimó nehe. ¹⁴ Itó ve makó nene gotola zopova hánagi minatimó nene etaminogo ive. Nenémíni mogona nene gozapá monó gelemake mina zupa hanuva gilinamóma neve. ¹⁵ Itó venalitini gotóini zopova hána nenémo netá hitinamó gilinogo inazo, keza zopova hánagi minatakumú nene gili lamaná iaká niave. ¹⁶ Makó nenémo imane gakó gele ahulanogo nookoma, láa loko gilino: Haitó suni nene lezagi Ómasímíni vegenala zuha lugáagi ma ale minamune.

Lepa nosató ali nupa iake ali gopa iki miniaká amó

¹⁷ Netá makokumú gulugo golesa oaká noimó nenemú lekegepoka laminake lakagata alinake lo likimitoze, gililo. Lekeza monokumú ali nupa iake likígika mili hamó amake hizi hóu iaká niave. ¹⁸ Itó monokumú ali nupa niago, lekelí likígika hóu loaká noive liki li nimikago lamaná lahe loko gelekuve. ¹⁹ Itó hizi hóu lamó nene hanuvamú nomive. Lekelikuti hí vegenalite monokumú amuza miliaká niave. Keza mini utó itave loko ámina suni utó oaká noimó netive. ²⁰ Itó lepa nosá nanigi ali nupa iki minake, nosá iaká niamó nene Guivahanímini nosá nomive. ²¹ Lekeza nosánetá aliki ake nelaga amake, lekezatini litá iki etó etó nikago, vegená lugáa gaúna hiliki miniaká niave, itó vegená lugáa nagami niki niki kígika kagata gopa oaká noive. ²² Lekeza numutini nomigo lá iaká niahe. Lekeza nosánetá natune likima numutikukó nalo. Lekeza Ómasímíni vegenala zuha makó ángigago lemekago, gohogó vegená keza golesa gele netá alikimiaká niave. Nene sunimú nanave loko lo likimitove. Lekegepoka litohe. Óe, lekegepoka laminogo uve.

Lepa nosalímíni gakó

²³ Neza Guivahanilokatí gakó aleko lukumumóma nene lá oko neve. Guivahani Izesú nene Zutá amimí i holugú nene peleti aleake, ²⁴ Ómasi agepoka loake, gitegeko nokimike limó: Není mémela imane lekelikumule loko nolukumuve. Nenikumú gili miniki niki minalo. ²⁵* Itó nosánetá niake, vain nagamí goni ámináminoko aleake, láa loko limó: Imane gonigú nene lo múnahéaká gakó gosohá ale alévolé oaká golaníne neve. Nata zupa zupa nene nenikumú gili miniki niki minalo. ²⁶ Guivahani velesá atiginá oko amiko nene lekeza imane peleti nosaki vain nagamiki nata zupa zupa nene Guivahani hili gakó li utó utó iki li kimiaká niave.

²⁷ Nenemú vegená makó keza Guivahanímini peleti nosaki vain nagamiki ali gopa iki natamó nene, Guivahanímini mémelagi golanígi ali gopa inatímíni lihima alinígave. ²⁸ Nenemú peleti nosaki vain nagamiki nanigi niikima, goí iki likígikagú gakó netikumú vitagá iiki nalo. ²⁹ Itó vegená makó nenémo Guivahanímini agupe loló uhatímíni mogona gele hee lamoko gopa natimó nene, Ómasímo lihimalamú goni otati netá nene ezáa ale utó inogo ive. ³⁰ Lekelikutí lugáate lepa nosá gopa nikago, netá kiviseaká noive, itó lugáa mota hilikave. ³¹ Leza mogonatemú vitagá oko lo utó moloko minutilina, Guivahanímo nene lihima lememiline. ³² Itó Guivahanímo mogonatemú lotuva legeaká noi zupa nene lelí mogona ale utó oko lagavutó zeaká noive. Monó gelema vegenakí gopa miniki golesa ikatave loko nenémíni olimiaká noive.

³³ Nenemú nigivénegita, lekeza lepa nosá natune liki niikima, ali nupa iki miniki vegená lugáamú kegeva iki niiko, imi asú ikiko, apí iki nalo. ³⁴ Makó nenémo nosánetakumú gaúna napa helekokoma, numunauka minoko goí oko nino. Alegesá iki ali gopa ikiko lekelitoka lihima utó okatize. Itó gakó lugáa nezáne lekelitoka vinake ale hee linogo uve.

12

Sikalahulímó monolímíni zámuza lehizelimiaká noive

¹ Nigivénegita, Sikalahulímó zámuza haitopaitolímíni lehizelimiaká noimó nenémíni mogonamú gili gopa ikataze, lo likimitoze, gililo. ² Lekeza gozapá monó gelema vegená niago, lakagata hizego, negi hiziaká netá ómai netá sozáaló víki gímiziaká amó. Nene mota gilinamó nenazo, ³ nenémíni lugáa lokugo gilitaze, gililo. Ve makó nene Ómasímíni Sikalahulímó alémo vávani iko Izesuni aleko letoko laminogo ive. Itó Sikalahulímó alémo vávani amiko nene, Izesú nene Guivahaníne noive loko laminogo ive.

⁴* Itó monolímíni zámuza haitopaitolímíni nemóza, Sikalahú hamokó nenémo lehizelimiaká noive. ⁵ Monolímíni gelekelé hoza haitopaitolímíni nemóza, hoza amelaho Guivahani

* 11:25: Gá 24:6-8 * 12:4: Lom 12:6-8

nene hamokó noive. ⁶ Itó monolímíni zámuza haitopaitotunú hoza aleaká nounimóza, Ómasi hamokó nenémo lelémó vávani igo aleaká nouné. ⁷ Sikalahú nenémo monokú lamaná iki minatave loko monolímíni zámuza mukí nene gona moloko leme asú oaká noive. ⁸ Ve makó nene Sikalahulímó alémo vávani igo gakó gele hee lo minake loaká noive. Makó nene ámina Sikalahulímogó alémo vávani igo, asuguná gakolímíni mogona loaká noive. ⁹ Itó vejená makó nene ámina Sikalahulímogó alémo vávani igo, Ómasímú gele alévolé onoikeve loko alévolé suni ale utó oaká noive. Makó nene ámina Sikalahulímogó alémo vávani igo kivisi vejená kelémó zokoaká noive. ¹⁰ Itó makó nene alévolé suni alítive loko zámuza ameaká noive. Makó nene Ómasímíni agepagutí gakó litive loko agika agata ale koló omiaká noive. Makó nene netá matá nene Ómasilokatí nemó nomimó nenémíni mogona áni go hee hee litive loko nene agika agata ale koló omiaká noive. Itó makó nene haitó vetini konokutí monó galinali litive loko agepa ale vávani omiaká noive. Makó eza haitó konokutí lina gakolímíni mogona ale viligoko lo kimitive loko agepa ale vávani omiaká noive. ¹¹ Nenémíni zámuza mukí nene Sikalahú hamolímogó ezáa agata gilike etó etó oko gona moloko lemeaká noive.

Lugupe hamó nego gelekelevá mukí neve

¹²* Vegená leza lugupe nene hámakó neve, itó lugupémíni gelekelé nita netá ligisa ligizani logoka legepa logómula lagata nene mukí neve. Keza ali nupa ikago, lugupe hámakó loló oko neve. Leza Kilistotoka gímizuni vejenatoka ámináminoko neve. ¹³ Sikalahú hamolímó lelitoka limike monokú lelémó nupa okago, lugupémíni suni aleko hamó loló oko nominune. Zuta vejená itó Kiliki vejená itó sihele vejená nouhaki itó minamuhaki leza mukitó nene hamó Sikalahú ale mulutegú molo asú unike, hamó loló okune.

¹⁴ Lugupémíni gelekelela nene hamó nomive. Mukí niave. ¹⁵ Nenemú ligisa nenémo neza agizani noamuve, nenemú agupémíni nekisa minamuve loko litikumule loko lugupe ahuloake ezáagó minoakeve loko laminogo une. ¹⁶ Itó lagata nenémo neza agómula minamuve, nenemú agupémíni nekisa minamuve loko lugupe ahuloake ezáagó minoakeve loko laminogo une. ¹⁷ Lugupeló nene logómulagó minalina, lugupe nenémo agatamú vitagá iline. Itó lagatagó minalina, agokamú vitagá iline. ¹⁸ Lá onoi móza, lá oko nomive. Ómasímó ezáa agata gele hee lo minake, lugupémíni gelekelela mukí nene hoza gakó haitopaitolímíni loketamó. ¹⁹ Lugupémíni nekisa hamokó minalina, lugupe nene golesa oko haha ilinamóza, ²⁰ itínasa nene gelekelé netá mukí niago, lugupe nene hamó neve. ²¹ Nenemú logómula nenémo geza lelí luhusate minamanize, ahulokoko vozo loko ligizani lo ameminogo ive. Itó gotote nenémo geza lelí luhusate minamanize, ahulokoko vozo loko ligisa lo ameminogo ive. ²² Lá oko nomive. Lugupémíni nekisa lugáa keé lama netá nene minamalina, leza lamaná oko minamutiline. ²³ Itó lugupémíni nekisa makokumú guluko limiki niamó nene gizapa okimiaká nouné. Itó lugupémíni lovoza hili netá nene asapú oko gonanalisi oaká nounimóza, ²⁴ lovoza helemi netá nene utó iki miniaká niave. Ómasímó nene lugupe ale utó ike, lugupémíni nekisa limiki minamoláa nene hoza napa kimimó. ²⁵ Lugupémíni nekisa keza hou líki haitopaitó minamiki lelegí iki eza gelekelé otiko eza gelekelé otiko minatave loko hoza kimimó. ²⁶ Nenemú lugupémíni nekisa makolímó gotá apelekiko miluma gilítimó nene, lugáa mukí keza miluma gilí asú inígave. Itó lugupémíni nekisa makó ali otitamó nene, lugáa mukí keza kogoliza vizi asú inígave.

²⁷ Monokú nominuhatímíni mogona ámináminoko neve. Lekeza mukí ali nupa ake Kilisti ni aguegitana iki minake aí vejenala zuha lílí iki niave. Itó etó etó nene aí nekisa lílí iki minake, gelekelé iki niave. ²⁸* Ómasímó nene vejenala zuha lelitoka lá oko lelémó etó okago nouné: Aposolo lelémó etó okago, lelí hoza itekave. Nenelotí lemeko Ómasímíni agepagutí gakó li utó iaká ve. Nenelotí lemeko monó lainim-ilimiaká ve, itó nenelotí alévolé suni haitopaitolímíni aliaká ve kelémó etó imó. Nenelotí lemeko kivisi vejená kilímí zokiaká vegí, nasahilí ikimiaká ve, gizapa ve, itó haitó konokutí galinali li utó iaká ve kelémó etó imó. ²⁹ Leza aposolugó lelémó etó imó nehe. Itó Ómasímíni agepagutí gakó li utó utó vegó kelémó etó imó nehe. Itó monó lainim-ikimiaká vegó kelémó etó imó nehe. Itó alévolé suni haitopaitolímíni ali utó iaká vegó kelémó etó imó nehe. ³⁰ Itó kivisi vejená kilímí zokiaká vegó kelémó etó imó nehe. Itó haitó konokutí galinali li utó iaká vegó kelémó etó imó nehe. Itó haitó konokutí lina gakolímíni mogona ali viligiki li kimikiaká vegó kelémó etó imó nehe. Nenémíni mogona nomive. ³¹ Lekeza monolímíni zámuza iteko minamoláa alitune líki amuza milalo. Itó neza monolímíni zámuzatunú miniki aliki ita gapováa lamaná lekelepizitoze, gililo.

* 12:12: Lom 12:4-5 * 12:28: Epe 4:11

13

Ligika kemeko nasahilí oaká gako

¹ Neza vegejalitini konokutipe itó agelogini konokutipe monó litomóza, nigika nene vegejá kememoko hanuva lá itomó nene, hoko-hoko netá pelo anó nenémini oko ha netá loló inogo ive. ² * Itó neza Ómasímini agepagutí gako loakalímini zámuzagi ve loló oko mininake, Ómasímini asuguná gacolímini mogona nene gele asú oko, itó mukí asuguná gako mogonamú gele asú oko minoko, itó neza gele alévolé onoko agoka makó akutoko alemó zitíitímini zámuzagi minoko nigika kememinake hanuva lá itomó nene, ha netá loló inogo ive. ³ Itó netá matáne mukí gohogó ve nasahilí oketoko itó nugulizá ale otitove loko nugupe lokú ahulokoko nigika kememinake hanuva lá itomó nene, ha netá nenazo, nenémo nelémo lamaná aminogo ive.

⁴ Kigika kimita vegejá nenete gínikaha amiki hulu iki minanigave. Keza kemekugú namiki kezáinimú giliko itemiko kezáini kugulizá ali oteminigave. ⁵ Keza sihana netá alemiki letenaha minamiki mukahá amiki vegejalitini lihima ali minamiki, ⁶ netá golesámo hutilí noiko kogoliza vizemikí monó sunímo hutilí noiko mulúikú lamaná gilinigave. ⁷ Kigika kimiaká vegejá nenete genavagi netá hanuva gihinigave. Mukí netá matakumú gili alévolé ikigó minanigave. Kigikatunú Ómasimú kagata losi gelemiki ageva iki miniki monokú alévolé iki minanigave.

⁸ Ligika kemeaká suni nene lutegeginogo ive. Ómasímini agepagutí gako loaká nene asú inogo ive. Itó haitó konokutí galinali loaká nene asú inogo ive. Itó asuguná gako mogona geleaká nenegi asú inogo ive. ⁹ Asuguná gako mogona geleaká itó Ómasímini agepagutí gako loaká nounimó nene veletó agilaló neve. ¹⁰ Minoko alika nene vové avetoko avasavagi netá utó noiko, veletó agilaló ne netá nene tolova inogo ive. ¹¹ Neza izegipa namuni minuke, namu gako loko minumó, itó namunite giliaaká kigika kagata geleko minumó. Itínasa nene olopa ve loló okuke, izegipa namunitini suni ahulokuve. ¹² Itínasa gamena geleaká nounó nene, gapokapolímo logoka legepa ale viligokago, ániigo hee hee losá amunimó nenéminoko neve. Alika nene gihila lamaná logómulaló utó iko, Ómasímó lelí mogonáa ániigoko gele asú oaká noimó nenéminoko leza ániigokoko gele hee hee loko gilinogo une. ¹³ Itó miniva miniva ita netá nene Ómasimú gele alévolé oaká itó lagata losi gelemoko ageva oaká, itó ligika kemeaká nene netá losive makole nemóza, ligika kemeaká nenémo iteko neve.

14

Ómasímini agepagutí gako lo utó o kemeaká nenémo iteko neve

¹ Nenemú lekeza vegejá likigika kimiki nasahilí itune liki amuza milalo. Itó monolímini zámuzá makó alitune liki amuza milalo. Lá iki miniki Ómasímini agepagutí gako li utó iakakumú gilikiko itino. ² Haitó konokutí galinali liaaká nia vegejalite vegejá li kememake Ómasi li amiaká niave. Keza nene Sikalahulímo kelémo vatí igo Ómasímini asuguná gako nilago, vegejá lugáate gili gopa iaká niamóza, ³ Ómasímini agepagutí gako li utó iaká niamó keza vegejá monokú kilími olotiva iaká niave, itó ali kii likimiaká niave, itó kilími hulu iaká niave. ⁴ Haitó konokutí liaaká nia vegejalite kezáini kigikáini hizi lé imiaká niamóza, Ómasímini agepagutí gako li utó iaká nia vegejalite Izesuni vegejala zuha mukí nene monokú kilími alévolé iaká niave. ⁵ Lekeza haitó konokutí galinali li asú itave loko geleaká nounóza, Ómasímini agepagutí gako li utó itakumú gulugo itekave. Ómasímini agepagutí gako li utó iaká nia vegejá nenete haitó konokutí liaaká nia vegejá nene kiviligikave. Lá onoinóza, ve makolímo haitó anokutí lokikoma, Izesuni vegejala zuhatini luhusáini ale gilitoketative loko makolímo ámina lonoi gacolímini mogona ale viligoko lo kimitimó nene hamó lelegitó minanigave.

⁶ Nigivénéigita, neza lekelitoka vinake Ómasímó lo utó oko lo nimi gako itó monó mogona itó Ómasímini agepagutí gako itó lainim-oleketati gako lo utó oko lo lekememinake haitó konokutikó gako lo likimitomó nene, nenémo nana oko hize lé oleketative. ⁷ Hanuva netá hololopani itó gotilisa nene lamaná iki zemitamó nene, anó lupamú nana oko gilitune. ⁸ Itó ami vémo pikuli nene lamaná oko huhu lamitimó nene, lova hizitave loko sele nolive liki viki ali vatí aminigave. ⁹ Ámináminoko lekeza haitó konokutí gako asapulagi litamó nene, vegejá lugáate mogona nana iki gilitave. Hanuvamú likago, gatotini nene hepélímo ale gopa okiko tolova inogo ive. ¹⁰ Nagata gulumó numutó namató haitopaitó konó komasí nomive, itó gilituni gakovó nemóza, ¹¹ hanuva neza haitó konokutí lina gacolímini mogonáa makó gele gopa itomó nene, ámina gacolímini amelaho nenikumú gelekiko, haitó apatotí

* 13:2: Mat 17:20, 21:21

ve loló inogo uve, itó neza ámináminoko aikumú gelekugo haitó apatotí ve loló inogo ive. ¹² Itó lekelitoka mogona ámináminoko neve. Sikalahulímíni zámuza lekelitoka utó itive liki amuza miliaká niamó nene vatí oko nemóza, Izesuni vejenala zuha monokú kilími niliko, monokú luhusatini ali alévolé itave liki amuza milalo.

¹³⁻¹⁴ Neza haitó konokutí Ómasiloka litomó nene nigikatunukó linogo uve. Nagata nenémo netá gihila ale utó aminogove ive. Nenemú haitó konokutí gakó galinali lita vejenalite mogona ali viligiki vejená li kimitatímíni zámuza alitune liki Ómasiloka líno. ¹⁵ Nenemú nana itune. Nenémíni uko etanogove. Makó zupa nene Sikalahulímó legepa ale vávani okiko haitó konokutí Omasiloka litune, itó makó zupa nene lagatatanú gele hee noloko Ómasiloka litune. Makó zupa nene Sikalahulímó legepa ale vávani okiko haitó konokutí nama litune, itó makó zupa nene lagatatanú gele hee lonoko nama litune. ¹⁶ Lá amitanimó nene, Sikalahulímó gegepa ale vávani okiko haitó konokutí Ómasi agepoka litanimó nene, geza lokako, nene sunimú gele vevesamita vejenalite geí gakó gelemítamó nenazo, keza nana iki lamanale liki litave. ¹⁷ Geza Ómasi agepoka gihila litanimoki, gígívekaho nene gele gopa noiko, nana oko monokú alémo alévolé itive. ¹⁸ Haitó konokutí gakó loaká nene nénisi likivilegeko loaká nouve. Nenemú Ómasi agepoka loaká noumóza, ¹⁹ neza nenemú gulugo, gihila loló amive. Monokumule liki alegesá niko haitó konokutí gakó hána hána litove lokoma hanuva litomóza, neza nenemú gelekugo lemekave. Nígika nagatatanú gele hee hee linake vejená lainim-oketanogove nene monó gakó luguhasí lo kemeakakumú nene gulugo, itekave.

Monokú linígima izegipa komatini suni alemilo

²⁰ Nígívenegita, izegipa komate izahuza netakumú giliaká niamó nenémíni likigika lakagatámo izegipa komatini suni alemilo. Izegipa komatini suni alinígima nene netá golesa alemilo. Itó gakó giliki ali hee hee linígima nene, olotiva vejenalitiní suni alilo. ²¹ * Monó gotoláú gakó makó láa liki luhuva gizinámóma neve:

Guivahanímó láa loko nolive: Neza haitó apatotí vejená kelémoko okugo, keza iki imane vejená nene haitó konokutí není negepagutí gakó li kimitámóza, není gakó gelemínigave.

²² Nenémíni lugáa litoze, gililo. Haitó konokutí gakó galinali loaká nenémo monó gilina vejenakumule loko haitó suni utó osá amive. Monó gelema vejenalite ininá itave loko neve. Itó Ómasímíni agepagutí gakó lo utó oko lo kemeaká nenémo monó gelema vejenakumule loko utó osá amive. Monó gakó gilina vejenalitiní luhusáini neve. ²³ Nenemú Izesuni vejenala zuha ali nupa iki miniki mukitó nene haitó konokutí gakó ganagana niliko, nene sunimú gelema vejená ahe itó monó gelema vejená ahe itiki giliiki nene, negi hizikave liki gilinígave. ²⁴ Itó lekeza mukitó nene Ómasímíni agepagutí gakó li utó iki niliko, monó gelemi vehe itó hetoka ve makolímóhe lekelitoka iteko monó gakó gilinogove. Lá itimó nene, lekeza mukitoka lina gakolímó líhimalámíni mogonala ale utó oko goní otanogove. ²⁵ Lá okiko, agikagú netá halá geko nemó nene utó okiko, eza pou loko mikasigú agoka hizeko ako minoko, Ómasi gupá ze ameko, Ómasi lamaná lekelitoka noive loko linogove.

Monokú netá mukí iki miliki itamó nene vo gunigó ino

²⁶ Nígívenegita, nenemú nana itune. Lekeza monokumú alegesá inigi niikima, lukugupegó anitísá amave. Makó nenémo monó nama aleko oaká noive. Itó makó nenémo lainim-oleketatí gakó aleko oaká noive. Makó nenémo Ómasímíni agepagutí gakó haitolímíni aleko oaká noive. Makó nenémo haitó konokutí gakó galinali loaká nene aleko oaká noive. Makó nenémo haitó gakokutí lonoi gakolímíni mogona loaká nene aleko oaká noive. Nene suni mukí alítamó nene, monokú luhusatini ale alévolé itune liki nenémíni ilo. ²⁷ Haitó konokutí gakó litamó nene mukilite lamilo. Losihe losive makolehe nenémíni hamopamó niliko, makolímó nene mogona ale viligoko lo kimino. ²⁸ Monokumú alegesá iki niiko, ve makolímó haitó konokutí linogove nookoma, mogona ale viligoko lo kimítí ve makó nomikoma ezágó nene makotoka minoko ezáaloka itó Ómasiloka líno. ²⁹ Itó Ómasímíni agepagutí gakó nene vejená losihe losive makolehe keza li utó iki niiko, lugáa keza nigiliki gona milatave. ³⁰ Makó nenémo noliko, Sikalahulímó nene ve makolímíni agikagú monó gakó molomíkiko, linogoma, goí oko li ve nene hanuva noiko líno. ³¹ Lá iki Ómasímíni agepagutí gakó litune líkima, lekeza mukitó hanuva li asú itave. Lá iki hamopamó líkiko, lugáa keza monó giliki kígika vávani itive. ³²⁻³³ Ómasi nene ale gopa oaká netakumú amu helesá ami Ómasi noive. Netá ale hee loaká nenemú amu heleaká noi Ómasi noinazo, Ómasímíni agepagutí gakó li utó ita ve nenete kezáini li utó ita gakotó gizapa iki minatave liki linamole.

* 14:21: Isa 28:11-12

Izesuni vegenala zuha lugáa nenete monokumú ali nupa niago nene, ³⁴vená nenete gakó lamake hanuva miniaká niave. Lekezagi áminámini ilo. Vená nenete monó gakó litave loko gele kemesá amune. Vená keza nenéminiki limiki minatave loko Mosé lo hukoko li gakokú nene neve. ³⁵Vená makolímó monokumú alegesá niiko gakó litimó nene, lovoza heleaká netá nenazo, vená keza netá makokumú loká inigima, hanuva numúikuka miniki váinigi kezáinigó loká ikitiko, ligili hagili itave loko noluve.

³⁶Nolu gakokumú géneka litamó nene, Ómasímini gakó lekelitokatí utó okago nilahe. Itó lekelisigó Ómasímini gakó gelemó nehe loko litove. ³⁷Lekelitokatí makolímó ezámú gelekiko, Ómasímini gakó loaká ve gihila loló itimó itó Sikalahulímini zámuzagi mína ve loló itimó nene, gakó luhuva gizo nolukumumó nene Guivahanímó lo hutamó neve loko gilino. ³⁸Vegená makó nenémó imane gakó gele ahulatimó nene, aí gakó gele ahulatune. ³⁹Nenemú nigivénegita, láa liki gililo: Ómasímini agepagutí gakó li utó itakumú amuza milalo. Haitó konokutí galinali loaká nenemú géneka likitamilo. ⁴⁰Itó monokumú alegesá iki miniki netá matá mukí iki miliki itamó nene vo lamanakó oko vo gunigó ino.

15

Izesú heleneikutí oti gakó

¹Nigivénegita, Izesuni gakó lamaná lo lekemekugo gilinamóma goha lo likimitove. Lo lekeme lekeme ugo, alikago, lukesatini loló onoimóma neve. ²Ámina gakó ali gilitiki alinitamó nene, gili zagiaká netatini alemó zeko gopa onamitimó nene, lukugutó vizinogo ive.

^{3*}Monó gakó iteko mina gakó lo nimimokó nene lo lukumuke, láa loko lo lukumumóma neve: Kilistó nene monó gotolaú alika lá oko utó inogo ive liki li milató lelí lihimatemú hilimó. ^{4*}Helekago, gale zimikago, monó gotolaú li milató gamena losive makole galegú minoake, otopá zeko otimó. ^{5*}Oteake, goí oko Pitani utó o amimó. Nenelotí izegipala zuha 12-a keitoka utó o kimimó. ⁶Nenelotí vegenala zuha 500 keza alegesá iki niago neneló utó o kemekago, ániigi asú amó. Itó keikutí mukí kogómulagi ha niamóza, lugáa mota hilikave. ⁷Nenelotí agunala Zemusini utó o amimó. Nenelotí aposolo mukí utó o kimimó. ^{8*}Alika nene neza guhalehale oko nougo utó o nimimó. ^{9*}Neza aposologutí lemeko nouve. Neza Ómasímini vegenala zuha gopoguni moloko kepeleko nougo, aposolo loló itane loko nugulizá molokago, okeha nipiligo nouve. ¹⁰Lá onoumóza, neza aposolo loló uke, není mognáné haitolímínoko nemó nene Ómasi agika lamanakímó lokago loló okuve. Itó agika lamanakímó nenitoka satamive. Neza hoza alumó nene aposolo lugáa kivilegeko alumole. Itó hoza neza nanánetunú aluline. Ómasi agika lamanakímó nenitoka minokago alumole. ¹¹Itó neza hoza alumoki itó aposolo lugáate hoza alemoki nenémó gihila nomive. Leza monó nenéminoko lo lekemekuko, lekeza gili alévolé inamó nenémó gihila neve.

Izesú heleneikutí otemeimóma nenazo, lezagi otinogo une

¹²Kilistó nene heleneikutí otopá zeko otimó. Monó láa loko lo nolukumuko, lekelikutí lugáate helenosakutí oteminogo une liki nanamú liaká niave. ¹³Heleneitunikutí otituni gakó nene gihila minamilina, Kilistó heleneikutí otimoki nene gakó gihila minamiline. ¹⁴Itó Kilistó nene otemilina, monó noluhá nene hanuvamú lokoko, lekeza hanuvamú gili alévolé aline. ¹⁵Itó nenegó nomive. Leza Ómasimú lo nouhá nene eza Kilistoni heleneikutí alémo otimó neve loko loaká nounimóza, helenosakutí otemoaká netá nelina, Kilistoni nene Ómasímó alémo otemiline. Itó nene gakó lunimó nene Ómasiloka lo mulunike sozaló ve loló oko nounimó gililine. ¹⁶Hele vegená otemitave liki liaká niamó nene gakó gihila minalina, Kilistonigi alémo otemive lokogi gakó gihila minaline. ¹⁷Itó Ómasímó nene Kilistoni heleneikutí alémo otemive liki liaká niamó nene gakó gihila minalina, gili alévolé iaká netatini nene ha netá loló iline. Itó lihimatini nene hanuva minaline. ¹⁸Itó Kilistonimú gili alévolé iake hele vegená nene viki latila aline. ¹⁹Leza mikasiukagó imane hanuvamú Kilistokumú lagata losi gelemoko ageva oko minutilina, vegená lugáa mukilite muhelete geleline.

Helenosakutí otitunimó nene ganagana otinogo une

²⁰Itó nenéminoko nomive. Kilistó nene lamaná heleneikutí otopá zeko otike, hele vegená ale goí o kimike otimó noive. ²¹Ganá ve Atá eza heleaká netá ale utó o limike hilimó ámináminoko haitó ve makolímó helenosakutí otituni netá ale utó o limike otimó. ²²Atagegi lugupe apizekoma nouninazo, nenemú hele asú oaká noune. Ámináminoko Kilistogegi

* 15:3: Isa 53:5-12 * 15:4: Age 16:8-10; Mat 12:40; Apo 2:24-32 * 15:5: Luk 24:34; Mat 28:16-17 * 15:8: Apo

lugupe apizekoma nouninazo, galegutí ote asú inogo une. ²³ Hizi letiki otitave loko lonoitokó otinogo une. Kilistó ale goí o limike oteneive. Ati gamenaló nene aí vegenala zuha leza otinogo une. ²⁴ Nenelotí alika nene Izesú eza kugulizaki ve haitopaitolímíni itó Satani amuza ve keí zámuzá aleko leme asú okoko, aí gizapaló nia vegená nene Ómasi amelahini agizakú molokiko, gizapa oletoko noiko, gamena lutiginogo ive. ²⁵* Itínasa nene Guivahanímo hozaváa aleko gizapa oletoko minoloko noviko, Ómasímo nene lova ve gala veva kelémo agisa heumauka molokiko, hozava ale asú inogo ive. ²⁶ Lá okoko, lova ve gala ve makó kepele asú okoko lova ve gala vetíni améipini napa nene alika apele hilinogo ive, agulizá nene heleaká netá. ²⁷* Izesú lá iti netakumú monó gotolaú láa liki luhuva gizinámóma neve:

Ómasímo mukí vegenaki itó netá matá mukí nene agisauka molo asú inogo ive.

Liki lina gakó nene giliiki Ómasímuki lonoi gakó nehe liki gelemilo. Ómasímo mukí netá nene Kilistoni agisauka kelémo nupa oaká noive. Eza nene Kilistoni agisauka minaminogo ive. ²⁸ Ómasímo vegená itó netá matá mukí nene gipala aí agisauka lelémo nupa okoko nouko, gipala nenémo amelahini gelekelé otanogo ive. Lá okiko, amelaho livilege asú inogo ive.

Helenosakutí oteakakumule loko genavagi hoza aleko nominu

²⁹ Lekelikutí lugáate hele vegenakumule liki monó nagamí hiliaká niave. Helenosakutí oteaká netá nomitímó nene, nanamú nihilave. ³⁰ Itó helenosakutí oteaká nene soza gakó minalina, neza nene gasovagi netalímíni amupiló genavagi minoaká noumó nene hanuvamú minaline. ³¹ Nigivénegita, Guivahanite Izesu Kilistó eza není gonaanalísí minatave loko lekelémo molamó. Nenemú gelekuke, Ómasímíni avogisaló láa loko noluve: Neza gamena gamena heleaká netalímó omo ávatíha okago nominuve. ³²* Neza Epeso numutoka gasova galagitana vegená kezagi lova hizeko minuhale nene, hanuva vegenalítíni gako-toka leheta onoko onoitomó nene, nana netá gihila utó o nimitive. Helenosakutí oteaká netá nomitímó nene, láa loko lukó etaline: Azo hilinogo unize, itínasa nosáneta iza goula apeleko lavalona natune loko lutiline.

³³ Gopa napa mihina nia vegenatoka víki gímizemilo, likilímíni gopa ikataze. Itó lamaná iki iki milíki ita netatíni nene gopa okatíve. ³⁴ Lekeza nene likígíka otopá ziko etó iki miníki gonesa netá nene lekemegeza amilo. Lekelikutí vegená lugáate Ómasímú gilísá amave. Nenemú gelekuke, lokovoza hilitíve loko noluve.

Helenosakutí haitolímínoko gileleko otinogo une

³⁵ Itó lugáate nene hele vegená keza nana iki otitave. Itó kugupe kovogisagi nanagitana ominamó utó itave. ³⁶ Liki loká ita gakó nene negiga linigave. Lekeza netá matá ali zuhá iaká niamó nene hanuva ma golasá amive. Sikú zapava hulupa legekago, goloko iteaká noive. ³⁷ Zuhá netá nene haitó agupegi neve. Itó gulúvila nene haitó agupegi neve. Gihílágó kilé ahe itó netá lugáahe zuhá oaká nounge. Itó zuhá okuko, goloakaláagi agilagi nene alika utó oaká noive. ³⁸ Itó Ómasi eza gele vevesoake lotamole loko ametameni amimó áminaló goloko iteake o moloaká noive. Itó gihila ámina oko kemetameni haitopaitolímíni utó oaká noive. ³⁹ Lugupémíni mogonáa ámina oko hamokó minamive. Vegená lelí lugupe haitó, itó iza galatíni kugupe nene haitó, itó namatíni nene haitó, itó lagahatíni nene ámina oko haitó. ⁴⁰ Itó okulumatoka netá matá mukí neve, itó mikasiloka ámina oko netá mukí nemóza, okulumatoka netá mukí nemó nene gonanalíváa haitó, itó mikasiuka netá nemó nene ámina oko gonanalíváa haitó. ⁴¹ Ho nene lapanaláa haitó, ikani eza lapanaláa haitó, sonohí keza ámina oko lapanaláa haitopaitó neve.

⁴² Helenosakutí oteakalímíni mogonáa ámina oko neve. Gale zeaká lugupe nene haha oakalímíni neve. Goloaká nenémo haha aminogo ive. ⁴³ Gale zeaká lugupe nene hutuváa neve. Goloaká nene gonanalívagi neve. Gale zeaká lugupe nene keé lamimó neve. Goloaká nene zámuzalagi neve. ⁴⁴ Gale zeaká nene mikasi lugupéa neve. Goloaká nene okulumakú lugupegi golanogo une. Mikasi lugupe nemó nene ámina oko okulumakú lugupe neve. ⁴⁵* Monó gotolaú láa liki luhuva gizinámóma neve:

Ganá ve Atá nene sikalahulagi loló oko minoaká nenémíni amelaho loló oko minamó neve. Itó alika Atá agulizá Izesú eza alévolé oko minoakalímíni amelaho loló oko minamó. ⁴⁶ Okulumakú lugupe ale goí osá amive. Mikasígú lugupe nene ale goí okago, okulumakú lugupe nene alika utó inogo ive. ⁴⁷ Ganá mikasígú ve eza nene mikasitunú loló imó, nenemú mikasígú ve minamó. Alika ve eza nene olulumakutí vema minamó. ⁴⁸ Mikasiuka vegená leza mikasiukatí ve Atá mina avevezaha oko nounge. Itó okulumakutí limi ve

* 15:25: Age 110:1 * 15:27: Age 8:6 * 15:32: Isa 22:13 * 15:45: Apí 2:7

mina avevezaha oko gosohá veđená minanogo une. ⁴⁹ Itó mikasiukatí vémini ametameni alunimó ámina oko alika okulumakutí limi vémini ametameni alinogo une.

Izesú añititi zupa okulumakú lugupe ale luhanogo une

⁵⁰ Náa vegúe, gako makó imane litoze, gililo. Mikasi lugupémo Ómasímini avogisalo vaminogo ive. Itó anuva oko haha iti lugupetunú netá alévoleláa ma aleminogo une. ⁵¹ * Gililo. Neza asuguná gako makó lo likimitoze. Leza Izesunimú gele alévolé uni veđená mukitó hilitunimó negopa logómulagi nouni veđenaki hilina veđenaki ale viligokinake gosohá lugupe nene mukitó ale luho asú inogo une. ⁵² Alika pikulima noziko, helemoláate galinali gó melevezakitana oko otiiki anuva iki haha amitamó minanigave. Itó logómulagi minatunimoláagi ale viligokinake, haitó lugupe ale luhanogo une. ⁵³ Lugupe imane anuva oko haha oaká lugupe nene gololohá oko ale ahulokinake alévolé oko minoaká nene ginegane nenéminoko ale luhanogo une. Itó heleakalímini mututona leza alévolé lugupe ale luhanogo une. ⁵⁴ * Itó anuva oakalimo alévolé oko minoaká ale luhati zupa, gako láa loko monó gotolau luhuva gizonoiómoma alévolé inogo ive:

Alévolé oko minoaká nenémo heleaká nene avilegeinómoma neve.

⁵⁵ * Avilegeake, heleaká geza lepeleaká zámuzaka hí neve. Heleaká geza gasovaka hí neve loko limó.

⁵⁶ Lihima netalimo nene heleaká netalímini gasovala loló onoiwe. Itó Ómasímo lo huka gakokutí lihima netalimo helisalagi loló onoiómoma, ⁵⁷ Ómasi eza Guivahanite Izesu Kilistoni lomikago, netá golesa avilegeaká zámuzaka lemeaká ve noinazo, nenemú agepoka litune.

⁵⁸ Nenemú náa vegúe, imane lo lekemenou gako gili miniki alévolé iki oti vevesiki minalo. Lá niiki Guivahanimule liki hozaváa naliki, ámina hozámini gihila voko sata aminogo ive liki gili miniki Guivahanímini hozaló gamena gamena amuza miliki aliliki vilo.

16

Izesuni veđenala zuhate moni ali nupa itave loko lo kimimó

¹ * Itó Zelusale apatoka Ómasímini veđenala zuhate alitave liki moni ali nupa itakumú lo likimitoze, gililo. Galesia mikasiuka monó veđená lo kumumómáminiki ilo. ² Lekeza moni nalemomámímini avevezahaló gili miniki, holisi zupa zupa Sategú nene lugáa gona miliki ali etó etó iki mili-likí viki minalo. Hanuva moni ali nupa amiki gatizá niiko, vo anitekugo, moni ali nupa inigi ligitagani ikataze. ³ Lekezaloka vokugo, veđená makó kilími etó iníta ve nene ámina hozamú gilitave loko luhuva netá kemekoko kimiselekugo, ali nupa initatotí nene Zelusalega aliki vitaze. ⁴ Itó lekeza giliko, etokikoma, nezagi makó aleko vitune.

Pauló keitoka vinogo gako lo molamó

⁵ * Neza Masetonia mikasiuka vinogo nounazo, neneloka vinake gamena koma minokinake lekelitoka vinogo uve. ⁶ Lekelitoka vinake, nenelotí nenelokahe nenelokahe vitokumú gapoló nilími vatí itave loko lekezagi gamena koma minatohe, itó hepé gamena asú itíhe loko nagata noguluve. ⁷ Neza itina gamena hanuva gopa novinake lekelí áinigomo vitomó nene etaminogo ive. Nenemú Guivahanímo gelekiko, lamaná noikoma lekelitoka voko gamena koma mininake vitove loko noluve. ⁸⁻⁹ * Neza nene imaneloka Epeso numutoka Guivahanímo monolímini gapováa velekago, hoza nalugo gihila zeaká noinazo, itó monolímini gala veva mukí nianazo, Sikalahú limi holisi velesá alitamigo imaneloka miní ameko minanogo uve.

¹⁰ * Timotí lekelitoka vo anitekiko, Guivahanímini hoza aleaká noumó nenéminoko aleaká noinazo, agupeló gelegele okatize, lamaná oko minative liki geha zi amilo. ¹¹ Lekeza gosohá ve noíve liki aikumú giliko lememino. Nezagi ligive lagave lugáagi ageva oko nounimó nenazo, lekeza legesó iki gizapa itíiki amisilikiko, geha zeko gapoló oko oko atiginá oko nenitoka atize. ¹² Itó ligivetehe Apoloni gako litove. Ligive monó ve lugáa kezagi lekelitoka vitive loko agata aleko amiseleháza, eza itnasa vinogo vávani amive. Itnasa gopa gamena makó nene viti gapo koló okikoma, lekelitoka vinogo ive.

Pauló gekéini loketake luhuva gizo asú imó

¹³ Lekeza gizapa iki monokumú gili alévolé iki minalo. Lá niiki, lekehelele vizemiko amuza miliki minalo. ¹⁴ Itó netá matá mukí lilí inigima likigika kimiiki lilí ilo.

¹⁵ * Itó nigive nagavese, gako makó lo likimitoze, gililo. Lekeza Setepanani vená izegipala keza Akaia veđenakutí ali goi iki monó giliake, kigika ali viligamó neve liki mota gilinave.

* 15:51: 1 Tes 4:15-17 * 15:54: Isa 25:8 * 15:55: Hos 13:14 * 16:1: Lom 15:25-26 * 16:5: Apo 19:21
* 16:8-9: Apo 19:8-10 * 16:10: 1 Koli 4:17 * 16:15: 1 Koli 1:16

Itó monó gele vegeatoka gelekélé hoza alekogó minatune liki kagata giliaká niave. ¹⁶ Nene lekeli nene nenémini vegeá itó lilími vatí iki monó hoza aliki miluma giliaká nia vegeá lugáagi ali lakamatoka milatave loko lakagata naluve. ¹⁷ Setepanaki Potunatoki itó Akaioki keza nenitoka ikago, Koliti vegeá lekelikumú miluma geleko noutoka mulúnegú lamaná gelekuve. ¹⁸ Lá okuke, nezagi lekezagi mukitó keí ánigo lomala unike, mulutegú geha zimó. Lekeza ve nenémináamú giliko lamaná ino.

¹⁹ * Asia mikasiuka monó gilina vegeá keza lekelikumú geké nililikitago noluve. Itó Akuilako venala Piliskako itó keí numukú monokumú alegesá iaká nia vegeá keza Guivahanimule liki lekelikumú geké nililikitago noluve. ²⁰ Lekezatitini monokú eza aputá viziko eza aputá viziko iki minalo.

²¹ Neza Paulona itínasa luhuva nogíza vémini agizakutí luhuva gizoaká nogosanima alekuke geketini loleketuke luhuva imane gizo asú nouve. ²² Makó eza Guivahani agika amemitimó nene, Ómasimo usí vize amekiko meikú mututoni loló itize. Guivahante geza ano. ²³ Guivahante Izesuni nasahilí lekelitoka mino moloko minino. ²⁴ Nigikámo Izesu Kilistonimule loko lekelitoka minoaká noive.

* 16:19: Apo 18:2

Koliti Vegenalitini Luhuva Nampa 2 Pauló Gizo Kimimó

Koliti vegená nónohá kimike gizo kimi gakó

¹ * Neza Ómasímini agepagú gakotó Izesu Kilistoni aposolo loló u ve Paulona itó ve ligiveteho Timotí ezagi makó minusike Koliti numutoka Ómasímini vegenala zuha itó Akaia mikasi lugáaloka monó gele vegená miniliki viki iki inamó lekeza luhuva netá imane gizo nolukumuke láa loko noluve; ² Ameteho Ómasi itó Guivahani Izesu Kilistó aitokatí nasahili itó hulu nene lekelitoka minoloko voko minino.

Pauló milumámini amupiló minake Ómasi agepoka limó

³ Guivahanite Izesu Kilistoni amelahini Ómasi agepoka litunize. Eza hulu ameteho itó lelémo geha zeaká ameteho minokave. ⁴ Eza milumámini mogaonáa haitopaitó utó noigo lelémo guni oaká noive. Lá okago, Ómasímo lelémo hulu oaká noi hulu nenémo leza ámina oko ligive lugáa miluma malumámini amupiló nimirinikoma kelémo geha zitunimó onoive. ⁵ Kilistó eza miluma gilimó nenémini nekisáa lelitoka vaí oko miní amekago, ámina oko Kilistoni huluváa genavagi ale utó moloaká nousive. ⁶ Helegaloka lelitoka miluma maluma utó oaká noimó nene lekelitoka geha utó itive loko itó lekelémo lamaná itive loko utó o lemeaká noive. Itó helegaloka hulu nenémo utó o lemeaká noimó nene lekelikumule loko utó o lemeaká noive. Itó hulu nenémo lekelitoka mino moloko hize lé noleketiko, miluma maluma lelitoka utó oaká noimó ámina oko lekelitoka utó noiko nene siti viziki miniki alitave loko neve. ⁷ Itó leza lekelikumú lagata losi gelemoko minoaká nounimó nene alévolé okago láa loko geleaká nune: Leza miluma geleaká nounimó nene lekezagi izá miliki miluma maluma giliki nimiriniki hulúmini gehava monéna alitave.

⁸ * Nigivénegita, nenémini gakola makó láa loko neve: Asia mikasigú milumámini amupiló minomo iteháma neve. Nenemú lakagatí molokative loko litoze, gililo. Neneloka nene genavagi netá golivagi lamaná lumupiló iteake lelémo akatimó okago, miní ameko logómula gizative loko ma gelemuháma neve. ⁹ Itó imane heleaká netá ale alitokune lokunike ligikate golasasa gimó nene lá imóza, ma utó o lemémimóma neve. Leza zámuzatemú gelekuko lemeka ha netá loló okiko, Ómasímo heleakakutí lelémo oteaká ve aitokagó leheta itune loko ámina golivagi netá utó o limimóma neve. ¹⁰ Itó áisi nene heleakakutí alata mololetoko minamó. Itó áisi minoko goha alata mololetoloko vinogo ive. Nene gakó gele seketigí o minoko aitoka leheta okune. ¹¹ Itó lekeza Ómasiloka litatímo lelémo vatí iko, Ómasi eza agika lamanaki vémove loko lokonotó aleko lugutó vizekiko, vegená mukilite kepegagutí kepegagutí lelikumú Ómasi agepoka liki geké litiki minatave.

Pauló Koliti vegenatoka vinogo noike haitó agata gilimó nenémini mogaonáa

¹² Lezatemú gulusigo lagasó iteaká noimó nene lá okomú neve: Ligika lamanatotí itó monokú nene imane mikasiuka nominuko ligikámo netá makokumú lehelú osá amive. Leza monóini nomí vegená kei kovogisáló nenémini oko minunike monó gilina vegená lekelí lokovogisáló etó oko vevesoko minoaká nune. Itó monóini nomi vegenalite gili hee likakató leheta o minoko nomive. Ómasímini nasahilitó voko leheta oko minoaká nune. ¹³⁻¹⁴ Neza gakó soza sazagi loko nomive. Gakó mogaonatagana ma hitosá amuve. Luhuva gizo lekemekugo gatiki gili guni itave lokogó gizoaká nouve loko gelenouve. Itó lekeza není mogona lugáa mota gilnamómáminiki lekeza alika gili hee liki gili asú itave loko noguluve. Lá ikiko, lekelikumú neza gulugo iteaká noimó nenémini oko lekeza Guivahani Izesuni gamena napaló nenikumú giliko ititize.

¹⁵ Gakó láa loko nolomú nene gele alévolé okuke goí oko gamena lositá lekelitoka vitomó nenémo mulutikú lamaná gilitave loko ale vavá umó. ¹⁶ * Itó voko ángolikimikinake Masetonia mikasiuka voko minokinake goha nene atiginá oko lekelitoka okugo nilími gapo iki niko Zutaia mikasiuka vitohe loko gulumole. ¹⁷ Itó neza láa loko lokugo, vávani oko haitolimíni imómave liki niláhe, olile. Itó neza nene monóini nomi vegenakítana oko nene negepatunú vitove loko lo muluke ámina gamenaló nene nigikatunú óe vamitove loko lumó nene hutuva loló okahe. ¹⁸ Ómasi eza lamanalímini amelahináa minoakeve loko gakó lo hukoko lo lekemekugo hutuváa itó gihiláa nene gamena hámakó utó onamive. ¹⁹ * Ómasímini gipala Izesu Kilistoni mogaonáa nene nezagi itó Sailasí itó Timotí leza lo lukumuhá vemámo gakó lo

* 1:1: Apo 18:1 * 1:8: 1 Koli 15:32 * 1:16: Apo 19:21 * 1:19: Apo 18:5

molokago lugáa nene gihiláa loló oaká noigo lugáa hutuva loló osá amive. Mukí gihiláagó loló oaká noive. ²⁰ Ómasímo lo mololeta gakó haitopaitolímíni nene aitokagó gihila zeaká noive. Nenemú Ómasímíni luhuva gegemá oko minative loko Izesú lelémo vatí noigo Ómasi agepoka lokusike lamanale loko loaká nousive. ²¹ Ómasímo lekezagi Kilistotoka lelémo molokago alévolé okune. Itó Ómasímo lelémo etó onoimóma neve. ²² Itó áisigó nene ligikagú anosa mololetamóma neve. Itó netá mukí alika lehizeletatítímíni izaina ike nene Sikalahú mulutegú molokago noimóma neve.

²³ Neza numutitoka voko gahá lekemeko lekelémo gopa okatove loko gulugo, gena okago, lekelitoka goha vamumóma neve. Gakó nene nigikagú ángoaká ve Ómasímo gelekago lamaná lo nolokumuve. ²⁴ Itó lekeza gili alévolé iakatinigú alévolé iki niamó nene gele-nousimó nenazo, leza monokú lugulizakí ve loló itíve loko ma lamuve. Hanuva lekelitoka mulutikú lamaná gilitave loko lekelémo vatí oko hozaváa aleaká nousive.

2

¹ Miluma gilita netá goha ale utó mololikimatove loko gulugo, gena nivisekago, lekelitoka vamítove loko nigikatunú lo hukokuve. ² Nénisi miluma netá lekemekugoma, makó éage mulúnégú ali lamaná initatave. Lekelisigó nianazo, mulutikú golesa gilikiko lá amitamó ikatave loko nenémíni aminogo uve. ³ Itó lekezatini netá matá aliaká amó ali hee litave loko luhuva netá makó gozapá gizo lukumumó nene lekelitoka vokugo, lekeza mulúnégú ali lamaná inimiaká niamómata goha mulúnégú ale golesa gilito netá alinimikatave loko nene ámina luhuva gizumóma neve. Lezatemú láa loko noguluve: Není mulúnégú lamaná gilitotímó monéna mulutikú lamaná geleaká netá ale utó mololeke-tanogo ive. ⁴ Itó mulúnégú ale golesa gelekugo itó mulúne githiná okago, lekelikumú ive napa napa uke luhuva netá gizo lukumumó nene mulutikú golesa oleetatove loko negopa, nigikáne lekelitoka alévolé oko mulumó nenémíni mogonáa lekelepizitove loko ámina luhuva gizumóma neve.

Golesa netá ali vémini lihima ahulitata gakó

⁵ Ve makokumú luhuva netá gizumó áisi nene mulutegú golesa guluni netá alimó nene nenikó ma onetamive. Lekelikutí lugáagi mulutikú golesa gele netá alimóma neve. Ale nupa oko lokugo gena okative loko mukí vejená nenémíni oletamóma neve loko lamuve. ⁶ Lekeza mukilita ámina ve nene nogosani amiki netá matá ali hee liki lili itamó nene mota áminaló asú ino. ⁷ Itína nene mulunagú golesa gelekoko monéna golesa okative loko lihimavala ahulitiki alími hulu ilo. ⁸ Nenemú alími vatí iki nasahilí i amiki likigikámíni mogona alapizitave loko lakagata aleko noluve. ⁹ Neza nenemule loko goí oko luhuva netá gizo lekemenoumóma nene gakónéa mukí gili alitáhe loko nenémíni mogonáa utó itive loko gimilikú moloko gizo lekemenoumóma neve. ¹⁰ Lekeza ve makolímíni lihimala ahulimik-ago, neza ámina oko ahulomiaká nouve. Áisi lihima ale utó molamó nene nezagi ale utó molonetamó negoma nene nezagi nahulotuve. Satá nene netá golesa aleletatove loko nogilimoláa mota gelenounimó nenazo, nenemú lekelikumú guluke Kilistoni avogisaló nene ¹¹ Satá eza logoka vizeko livilegekative loko ámina vémini lihima ahulomiaká nouve.

Pauló Toloa apatoka minake agata gululusi gili gakó

¹² * Neza Kilistoni gakó lamaná litove loko Toloa numutoka nanitugo, Guivahanímó gapova ale lologa molonimikago, gelekuke, ¹³ nigivéneho Taetasí eza lekelitokatí litá oko atiginá oko amigove loko vitagá okuke nagata gululusi geleuke lekeza mota minalo lokuke Masetonia mikasiuka vumóma neve.

Kilistoni anuvaváa noute

¹⁴ Kee, Ómasi eza Kilistotoka lelémo gímizeakeve loko aí gala veva gamena gamena kivilegeaká noikumú agoliza vizeko ganini hizeaká noive. Lá oake gala vizekago, aí mogonámíni anuva lamaná lagámíni nene sénava segekuko hutilí oko numutó namató hutilí oko novimó nenemú geké lotinake logoliza vize amitune. ¹⁵ Leza Kilistoni anu-vaváa lamanakitana nouhatita Ómasí guguni gizo amekago vejená kugutó vizeakalímíni mututoni itó lapulva oakalímíni mututoni nene anuva kepeleaká noive. ¹⁶ Lapuluvámíni mututoni lili inamó keza gelelehá i ahulikago limiki hiliaká nenémíni anuváa kepelekago hiliaká niave. Itó lugutó vizeakalímíni vejenala leza gelelehá okuko lemeko alévolé oko minoakalímíni anuváa lepeleake lelémo mómoká okago, gosohá lemetameki loló oko minoaká noute. Lelí hozámíni mogonáa lá oko nenazo, hoza nenémínáa éagama kezáini zámuzáimínutún alíki hee hee litave. ¹⁷ Lelikítana minata vejenalitegó lá itamó neve. Leza vejená lugáate iki miliki iaká niamó nenémíni osá amune. Vejená lugáa mukilité

* 2:12: Apo 20:1

Ómasímini gakokumú gelego, moni ale utó oketati netá loló okago, hozaváa aliaká niamóza, leza nene Ómasímo limiselekago ligikagú vové avé lo minago minoko Ómasímini avogisaló voko Kilistotoka gímizekunike monola loaká noune.

3

Gosohá lo múnaheaká gacolímini hozaváa aleaká noune

¹ Láa loko nolomú nene lelí lugulizate ale otítíve loko gakó nenémináa goha apí usimó nehe. Itó lekeza lelí mogonatemú gilitave loko veđená lugáate luhuva netá makó giziiki lelí lugulizá ali otiki lekelepizitahe. Itó lelí mogonamú ali otíiki lekeza makó giziiki veđená luhuva netá makó kelepizitahe. ² Nenéminoko nomive. Není hozanémini luhuva nene lekelisi niave. Itó luhuva gizoaká netá nene ligikagú luhuva gizokago, veđená mukitoka ángigiki gatiki giliakalímini nene neve. ³ Leza lekelitoka hoza alekusigo lekeza Kilistotokatí luhuva netá lílí ikago, nenémini mogonáa utó oko neve. Itó luhuva gizoaká netá nene nagamitunú gizamíve. Alévolé oko minoaká Ómasímini Sikalahulímo luhuva gizamó nene Mosé lo mola gakó gehaníló luhuva gizamómámini oko negopa, likigikagú luhuva gizokago alévolé oko neve.

⁴ Lelí mogonatemú gakó némináa nene Kilistokumule loko Ómasiloka leheta nousike lo lekemeaká nousive. ⁵ Hoza gihiláa makó lezatelokatí utó oaká noive loko itó lezate zámuzatelotí neve loko nomive. Netá matá loló okusigo lamaná oaká noimó nene Ómasilokatikó nene neve. ⁶ Ómasi áisi nene lelémo vatí okago gosohá lo múnaheaká gacolímini hozaváa aleaká nousive. Li huka gakó luhuva gizamó nene gele aleakalímini hozaváa negopa, Sikalahú gele ameakalímini hozaváa neve. Li huka gakó luhuva gizamó nenémo lemeni heleaká netá ale utó mololimiaká noive. Itó Sikalahú nenémo alévolé lemetameki minoaká netá nene ale utó mololimiaká noive.

⁷ Itó Mosé lo hukoko li gakó nene lítaha ligika lapuluva oaká ale utó moloko voakalímini nene gatapa geható luhuva gizamó nenémo gopa Ómasímini lapanalagi utó imole. Itó ámina lo hukoko li gacolímini lapaná nene minoko tolova imóza, Moseni avogisaló ámina lapaná nenémo napaló nego, Isilae veđená keza neneló anítiki agoka agepaló ángamitamó imóma neve. ⁸ Monó lítahámini lapanaláa nenéminoko minamó nenazo, Sikalahulímo monó gosohá lehizelimiaká noimó nenémini lapanaláa aleko iteko sipisi minanogo ive. ⁹ Ligika lapuluva oakalímini mututonáa voaká nenémini lo múnaheaká gacolímini lapanaláa nene lemekosí neve. Itó lihimate asú olimikago minoaká nenémini hozavámini lapanaláa nene iteko neve. ¹⁰ Itó lítaha lo múnaheaká gacolímini lapanaláa nene Moseni agoka agepaló utó imóza, gosohá lo múnaheaká gacolímini lapanala napa nenémo zemikago lovoza helekave. ¹¹ Netá voko haha inogo itímini lapanala nene napa otígí utó imó nenazo, netá minoloko voko mino lúaló moloaká nenémini lapanaláa nenémo iteko sipisi neve.

¹² Lagata losi gelemoko ageva oaká nouni netá nenéminoko minokanazo, monó gakóma lehelele vízemigo vávani oko lo kemeaká noune. ¹³ Lá nounike Mosenigitana minamune. Aí avogisaló Ómasímini lapaná sata ominamó nene asú inogo noigo, Isilae veđenalite iki ángikatave loko agoka agepaló gánoni ge hitoake minoaká imóza, gosohá lo múnaheaká gacolímini lapaná nene ze hitosá amune. ¹⁴ Itó kigikáini hize lí okago, minoloko voko itína lo múnaheaká gakó lítaha nenémo goha asapulagi loló okago, keza nagatiki gili hee líki gilisá amave. Itó asapú nene ezáa hanuva ma vínasaminogo ive, Kílistó hámakó vínasoko ale vesamá oaká noive. ¹⁵ Keza itína gamena nene Moseni luhuva gakó gatiaká niago kigikagú asapulagi ha minoaká noimóza, ¹⁶ kigikáini ali viligiki Guivahaniloka kovogisa i amitamó nene asapúma vínasoketanogo ive. ¹⁷ Guivahanimú nolomú nene Sikalahukumú noluve. Itó Guivahanímini Sikalahulámo minoaká noitoka netá makolímo nagá oletosá amive. ¹⁸ Leza nene lovogisate aitoka asapuláa minamítimó neve. Nenemú Guivahanímini lapanalámo hize hanatolimikoko lelémo viligokago, Ómasímini ametamenigi aleloko novunimó nene Guivahanímini Sikalahulímo lá oaká noive.

4

Lugupe nene mikasi somogitana eze

¹ Guivahani eza nasahílagímo hoza nenémináa oletamó nenazo, nenemú goselekaselé amitunize. ² Láa nounike, avozavagi netá itó asugunatoka aleaká netá nene lemegesa amekunike, makó sozámíni amupíló minoko Ómasímini gakó ale gopa oaká nene ma osá amune. Leza Ómasímini avogisaló monó ale akutoko lo utó moloko lo nokumuko veđená mukilite lelí mogonate gilikago hee lokogó neve. ³ Itó monó gakó lamaná loaká nounimó

* 3:3: Gá 24:12; Zel 31:33; Izi 36:26

* 3:6: Zel 31:31

* 3:7: Gá 34:29

* 3:13: Gá 34:33

nene asapulagi nolomó geleaká noikoma, lapuluvámini mututoni lilí ina vegeatokagó asapulagi nolomó geleaká noive. ⁴ Monó gili ahuliaká niamó kéisi nene imane mikasigutí agulizaki ve nenémo kígikáini hize lí okago, nana iki gakó lamanalímini lapanalímo kígikagú lemekiko Kilistó eza Ómasímini avevezahaló oko nomina vémini luhuváa ániigi hee liki ániगतave. ⁵ Leza monó nolunike lezatemú lo lekemesá amusive. Izesu Kilistó eza lelí Guivahanive itó Izesukumule loko gelekéle izegipatini mukitoka loló oko minatíive loko lo lekemeaká nousive. ⁶ * Ómasi eza gozapá mogonaloka límugusi zeake nego gó lozo loko lokago gó lamó. Itó áisigó nene lokago lígikagú monolímini lapaná utó okago Kilistoni avogisaló Ómasímini lapaná utó o lamaná okago ániigoaká nounge.

⁷ Itó ámina monó meínaváa iteko minamó ale minoaká nouni vejená leza nene ámina monó lo nokumuko lugupémo nene mikasi somogitana alévolé onamígo ámina monolímini zámuzá lelitoka negopa, Ómasilokatí noimó nenémini mogonáa utó oaká noive. ⁸ Miluma malumámímini amupiló nominuko nenémo lelémó zeko lana osá amive. Itó lagata losi gelenounike gopa nene guluko gopa osá amive. ⁹ Gopoguni netalímini amupiló nominuko, gopa nene ameteho taiza oletosá amive. Galaná mililitiki lá niago, gopa ma heleko lapuluva osá amune. ¹⁰ Nenéminoko Izesú minoko aleko oakalímini agikaváa ámina oko lugupeloka utó itive loko lugupeloka Izesuni apili hele ametameni nene aleko mohona oaká nounge. ¹¹ Vegená keza Izesukumule liki lelí gamena gohalagú imi aniti aniti iki lilímini gopa napa iki heleakakú lilímini miliaká niamó nene Izesú minoko aleko oakalímini zámuzá nene heleaká lugupeloka utó o lamaná itive loko nenéminoko utó o lemeaká noive. ¹² Lá okago, lelitoka heleaká netalímo hozaváa aleaká noive, itó lekelitoka alévolé oko minoaká netalímo hozaváa aleaká noive. ¹³ * Monó gotolaú luhuva gakó makó nene neza Guivahanímú gele alévolé oaká nounazo, monó loaká nounge loko gizonoiómóma neve. Itó leza ámina lelegitó Sikalahulímó lelémó vávani igo Guivahanímú gele alévolé oaká nounike monoláa loaká nounge. ¹⁴ Lá unike Guivahani Izesuni heleneikutí alémó oti vémo lezagi ámina oko Izesugegi helenosakutí lelémó otekoko lekezagi monéna aitoka lelémó molanogo ive loko geleaká nounge. ¹⁵ Ámina genavagi netá nene lekelikumule loko geheaká nounimó nene Ómasímini nasahilí ohunavagi nenémo hutilí oko noviko, vejená mukilite giliiki Ómasi agepoka liki niviki kogoliza vizi namiko, Ómasímini lapaná utó oloko voko minative loko neve.

Gutá apató minoko aleko oaká gakó

¹⁶ Leza nenemú láa loko gelekunike goselé ma osá amune. Lugupete gisulupa moloaká noimóza, gamena gamena ligika nene ale gosohá oaká noive. ¹⁷ Mikasiuka miluma maluma koma geleaká nounimó itó alika monéna asú itimó nenémo gonanalisi napa itó genavagi itó alévolé oko minoakalímini nene ale utó mololetanogo ive. ¹⁸ Itó ániigoaká nouni netá nene asú itimó neve. Ániagamuhá netá nene alévolé oko mino lúaló moloko minatimó nenazo, netá genavagi alilimiaká niamó nenémo negopa, asuguná netá utó o limití netatoka gonú ominoaká nounge.

5

¹ Leza láa loko geleaká nounge: Mikasi lugupe sikalahutémini gá numunáa lukokikoma Ómasímo okulumakú alévolé numuni makokitana gosohá lugupe ale utó mololetanoimó nene kígizanitunú gemamó hanuva alévolé oko minati numuni apá neve. ² Itó leza nenemú okulumakú numuni hize lelepizitive loko lagaváa gelekunike amuzá nomulunike hanuva lugupegi minoaká nounikeve loko lege zeko minoaká nounge. ³ Sikalahute zapakó minokative loko okulumakú lugupe ale luhokuko lamaná itive. ⁴ Imane mikasiuka gó numukú noinake miluma geleko gena liviseká liviseká noigo, lege zeko minoaká nounge. Leza luhooká gote litaha nene monéna vizako ahulatune loko gelesá amune. Litaha gó ha neiko amupiló gosohá netá ale luhatune lokogó geleaká nounge. Lá okunike heleakalímini mututoni loló unimó nene alévolé oko minoakalímo mikilí itive loko geleaká nounge. ⁵ Ámina netá lamaná utó o limitive loko ale vavá oletamó nene Ómasi áisi nenegó noive. Ámina netá lehizeletatimómámini izaina nene Sikalahú lehizeletamó neve.

⁶ Leza gosohá lugupe alitunikumú guluko mulutegú ale gilitolimikiko minatunize. Lá noinake láa loko nene gilitunize: Mikasi lugupegi minoaká nouni gamena nene Guivahanímú vitagá unike gutá mikasiloka minoaká nounge. ⁷ Itína gamena nene gele alévolé okogó minoko aleko oaká nounge. Gihiláa nene velesá ániigonamune. ⁸ Láa noinake gopa mulutegú ale gilitolimikago minoaká nounike lugupetunú gutá mikasiló minoaká nene ahulokinake gotó apatoka Guivahanigi makó minosakumú lagaváa geleaká nounge. ⁹⁻¹⁰ *

* 4:6: Apí 1:3 * 4:13: Age 116:10 * 5:9-10: Lom 14:10

Nenemú láa loko gelenoune: Lugupegi minoko netá matá oko moloko unimó lamaná nehe itó golesa nehe nenémini lelegi oko etó oko apasoko limitive loko leza mukitó minoko Kilistoni lo hukoaká holomaló vo anitínogo unimó nenazo, nenemú minoaká nene imane mikasiloka gutá lugupegi minoaká ahe itó mezane gotó mikasiloka minatunimó ahe nene Guivahanímó giliko lamaná itive loko legesó oko minoko aleko oaká nounge.

Ómasímo ale geha zelimikiko ezagi apizituni gakó

¹¹ Guivahanímú lehelele vizigo minoakalímíni mogonamú gelekunike vegená keza kigika ali viligatave loko kagata aleko lo kemeaká nounge. Ómasi eza mogonate ániogaká noive. Itó lekeza áminámini iki mogonate nene likigikatunú giliaká niave loko noguluve. ¹² Leza láa loko lokuko, gilikiko, leza nene miní ameko lugulizá ale otínogo gakó lo nolukumuhá gelemíno. Lekeza hanuva lelikumú giliko, itekiko, lekeza vegená lugáa kigika otópá zemiko miníki kugupémini netakumukó hokolizá iki miniaká niamoláa nene ení mogonamú li kimikiko gili lamaná itave loko noluve. ¹³ Lelikumú negi ve liki nilamóma nene Ómasímini hozavamule loko loló ino. Itó ligikate hee lokogó neve liki nilamó nene lekeza monotínigi itave loko loló ino. ¹⁴ Ve hamó eza vegená mukikumule loko helekamó nenazo, leza mukitó monéna ezagi helenouhá geleneive loko gele zagunikeve loko Kilistó eza agika lemeaká noitímó lelémó gikitokago lezate lugupe aleko itesá amune. ¹⁵ Itó vegená mukikumule loko hilimó nene logómulagi nominínake lezatemukó minoko aleko aminake lelikumú heleake oti vemule loko minoko aleko itunize.

¹⁶ Nenemú lá oko logómulagi minatuni gamenaló vegená kugupegi kemetamenigigó ániogokinake mogonataganáimimú lo hukoketaminogo une. Itó Kilistoni ámina oko gozapá agupegi ametamenigi ániogokunike eza lelikitana ve noive loko gulunimóza, ámina aveveza-haló itínasa nene goha ma lá aminogo une. ¹⁷ Nenemú vegená makó Kilistotoka gimizinitamó kéisi nene haitólímíni lili iki ninigave. Litaha netáini nene asú okimikago gosohá mogonáa utó o kemekave. ¹⁸ Ámina netá matá gihíláa nene Ómasilokatí neve. Ási nene Kilistoni zámuzaló lelémó apizekago nonagá okunike vegená lugáa nene ámina kelémó nonagá iti gakó li kimitave loko loletamóma neve. ¹⁹ Ámina gakó láa loko neve: Ómasi eza Kilistotoka minake mikasiuka vegená lezagi ale geha zeletamó. Lá oake lihimate ahulolimiake goha gatoaká nene gatosá amive. Itó ale geha ze limiaká gakó nene holutegú hize oletamóma neve. ²⁰ Nenemú leza Kilistoni gakó lole ale ve minusike Ómasímini gakó lamaná nene mololimikago, lo lekemeaká nousi gakó nene Ómasímo lo likimimó gelekago nene, Kilistokumú gelenousike lakagata aleko láa loko lo lekemeaká nousive: Ómasímo ale geha zelikimikiko ezagi apizilo. ²¹ Kilistó eza lihima ma alemi ve nene Ómasímo lelikumule loko golesa netategi loló otamó nene leza Kilistogegi apizekinake Ómasímini avogisaló hee loko minatune loko nenémini imó neve.

6

¹ Ómasi alémo vatí vatí ve leza lakagata aseva aleko láa loko lo lekemeaká nousive: Ómasímini nasahilila lehizeleketamó nene voko haha amino. ² * Nasahilí oleketakumú Ómasímo li gakó makó láa loko neve: Neza gamena lamanató geí gakó gele minumóma neve.

Itó gugutó vizeaká gamenaló gelémó lamaná umóma neve.

Gilinahe. Gamena lamaná itínasagó neve, itó lugutó vizeaká gamena nene ámina oko itína nene neve. ³ Leza ámina oko vegená keza hoza aleaká nounikumú goseleka likatave loko monokuti velehé limita netá loló osá amune. ⁴ Leza mukí netá oko moloko oaká nounike Ómasímini gelekelé ve nouni mogona ale utó moloaká nounge. Milumámini agikagú minunike, itó gasovagi netalímíni amupiló minunike, itó galana netalímíni amupiló minunike, geha zeakalímíni agikagú minoaká une. ⁵ * Segi nogosanitunú zi gilikilí niago, nagá numukú minoaká unike makilisi hiziki lipilínigi akú minoaká unimóma neve. Miluma hoza aleaká unike, lovó akamunike ote minunike nosánetá ma ale ligikagú vizeko namunike minoaká unimó neve. ⁶ Ligika gizopa lo minago minunike, netá mogona geleakalímíni minunike, mulutegú geha zigo minunike, ligive nasahilí okimiaká unike, Sikalahuki minunike ligika lamaná oko kemeaká unimó neve. ⁷ Gakó lamanakó lokunike Ómasímini zámuzá ale minoaká unimó neve. Lihimate asú olimikago minoaká nounimó nenémo gimí magete itó lagele loló okago ale minoaká nounge. ⁸ Lugulizá ali otiakakú itó lovozámíni holulagú minoaká nounge. Itó legegoka loaká itó alivi letivi ilimiaká nenémini holukú nounge. Sozaló veve liki nililitago soza lamunimó minoaká nounge. ⁹ Mogonatemú vitagá niamóza, Ómasímo mogonate gele asú onoi mole. Itó heleakalímíni agepaló minunitita

* 6:2: Isa 49:8 * 6:5: Apo 16:23

gopa logómulagi minoaká noune. Itó lipilikago hele vunimó neneta voko haha amune.
¹⁰ Itó móinata mulutegú lamaná geleko minoaká noune, itó gohogó nouhá nene gopa
 vegená mukí kelémo monokú henóiki vegená loló oaká noune. Sívosávo ovunitita ligikámíni
 henonite vai ominamó minoaká noune.

¹¹ Kee, Koliti vegenáise, nigika nene lekelitoka napaló neve. Itó negepatunú nene gakó lo
 koló oko lo nolukumuve. ¹² Nénisi nene nigikatunú alévolé oko hize lé olikimiaká noumóza,
 lekelisi nene likigika nimiaká niamó nene lagasó neve. ¹³ Lekelikumú gulugo mohóne
 gipáne lílí ikago, gakó imane lo líkimitoze. Nenémíni helega apasiki ámina iki líkigikatíni
 ali napa iki nenitoka milíkiko minative loko noluve.

Ómasímíni zavusave noune

¹⁴ Monó gelema vegená keza apizeko minatune líkí nilíkoma, lekeza lelegí oko noune
 líkí kilímí vatí iki gehemílo. Gilínahe. Lamanalímíni itó golesámíni keza nana iki apizítáive.
 Itó lapanakí itó límugusigí nana iki apizítáive. Ma apizeminigásive. ¹⁵ Itó Kilístó ezagí gala
 veva Sataki nene nana oko kígíka hamó minative. Itó monó gele alévolé uní vegenakí monó
 gelema vegenakí nana oko nonagá oko minatune. ¹⁶ Itó Ómasímíni zavusavegí soza ómai
 netalímíni zavusavegí keza nana iki apizítáive. Gilínahe. Ómasí alévolé oko minoaká véminí
 zavusave nene lélísi nene noune. Nenemú Ómasímó láa loko lonoimóma neve:
 Neza mulúiku minoko aleko inake

holutíkú mohona inogo uve.

Ómasíníni loló o kemekugo,

keza vegenáne zuha minanigave.

¹⁷* Nenemú Guivahanímó láa loko lonoimóma neve:

Monó gelemamoláa ámígíkímíni apazá minalo.

Itó musí netató nene alí gelemílo.

Lá íkíko, nénísi nene gízapa oleketoko lekelémo guni inogo uve.

¹⁸* Lá okínake ametípina nene minatove,

itó lekeza nene mohóne gipáne lílí iki minatave.

Guivahani osá amosá ve áisi gakó nene láa loko lonoimóma neve.

7

¹ Nígíka lekemenou nígvíse, netá nenémináámíni mututoni lelémo molonoimóma neve.
 Nenemú musí netá nenémo lígíkate itó lugupete ale golotuva loaká noi netakutí nene
 Ómasímú lehelele víziko lígíka nagamí zeko ale mokoná lokoko gízopa lo asú íko etó oko
 minatuníze.

Pauló kígíka alí vilígakumú agolízta vízímó

² Lekezatíni líkígíkatunú gahe sigílitalo. Leza lekelitoka minusíke netá golesa aleleketosá
 amusíve, itó ve makó alémo gopa otonamusíve, itó mulutíkú hízeko netá matatíni ma ale
 gopa amusíve. ³ Neza gakó imane mulutíkú hízítive loko loleketamuve. Neza ítínasa áimane
 lekezagí makó minoko aleko ínakehe itó hílinakehe nígíka lekelitoka minamó minanogo
 íve loko mota lo lekemeuve. ⁴ Nígíkatunú lekelitoka voko nogímízigo lekelémo napa oko
 loaká nouve. Lekeza nígíkáne alí geha zí asú íkago mílumámíni amupíló nogolízta sípísi
 novízive.

⁵* Itó Taetasínímú vítagá oko Masetonia míkasígú omo anítekuníke ma lavasú vízeko
 mínamune. Neneloka lugupémíni lovááa itó lígíkámíni lelegesaváa nenémo utó oake lelémo
 vénehékánehé lígo mínonouháma neve. ⁶ Megusa síhelení mulúini kelémo kíi lokímíaká
 ve Ómasí áisi nene Taetasíní alémo atíginá oake mulute ale gílotetamó. ⁷ Lá oake,
 atíginá ímó nenemukopa, lekeza mulunagú geha zítí gakó lí amemó nene aleko okago,
 gelekúsíke mulutegú geha zekago nousíve. Není ániganígí gílíkí míníaká niamó itó golesa
 netá utó íkumú míluma gílíkí míníaká niamó itó neníkumú hízi lé ínítíkí amúza mílíaká
 nía gakó lo nemekago, ítínasa mulúnegú lamaná aleko íteko gelekúke nouve. ⁸ Neza
 gozapá luhuva netá makó gízo lukumugo mulutíkú golesa gelemó nenemú gelekúke ítínasa
 mulúnegú golesa gelemuve. Luhuva gízu gamena nene gamena alínípáísí mulutíkú golesa
 gílíkago gelekúke, lamaná mulúnegú golesa gulumó neve. ⁹ Itó ítína nene mulúnegú
 lamaná geleko noluve. Mulutíkú golesa gelemó nenemukopa, mulutíkú golesa geletímó
 líkígíka alí vilígakumú mulúnegú lamaná noguluve. Lekeza míluma gelemó nene Ómasímó
 gílígo lamanalímíni loló okago, gílíkamole loko gakotémo ma lekelémo golesa onamíve.
¹⁰ Nenémíni mogonamú láa loko gílítune: Monokú míluma geleaká nenémo lígíka ale

* 6:16: 1 Koli 3:16, 6:19; Liv 26:12; Izi 37:27

* 6:17: Isa 52:11

* 6:18: 2 Sam 7:14; Isa 43:6; Zel 31:9

* 7:5: 2

viligoaká netá ale utó molokiko veđená lugutó vizekiko minatune. Nenemú miluma geleaká nenémináa ale utó molatítimó alika nenemú giliko golesa aminogo ive. Itó hanuva miluma geleaká nenémo negi nagi netá ale utó molokago lapuluva iaká niave. ¹¹ Ánigalo. Miluma geleaká lapa nomimó nenémo lekelitoka gihiláa lagasó ale utó molamive. Monokú lekelémo vávani oaká itó mogonatini lamaná ale utó moloaká itó golesa netá ahelú oaká sipisi itó Ómasímini mesahamú lekelegesá legeaká itó nenikumú gili guni iminíki amuza moloaká itó golesa netalímini helegáa kemeaká nene netá nenémináa ale utó molamó nene lekelitoka utó okago, lo lukumu netakumú lekelí lihima nomimó nenémini mogonáa utó okave. ¹² Gozapá luhuva netá láa loko gizo lukumumó nene golesa netá ali vema aikumule loko nomive. Itó golesa netá ale utó molota vema aikumule lokogi nomive. Gakó lo lekemekuko Ómasímini avogisaló lekeza lelitoka mulutini milatímini mogonáa utó itive loko nenemú gizo lukumómoma neve. ¹³ Itó lekeza áminámini iake mulutegú ali geha zemóma neve.

Itó mulutegú ali gililitamó nenemukó nomive. Taetasi nene lekelikumú agata gululusi nogiligo lekeza Taetasini muluna ali geha zíkago, eza mulunagú agila guluma noigo, ámina gakó nene geleko lagaváa gulunimómoma neve. ¹⁴ Neza gozapá Taetasi nene lekelitoka vínogo noigo lekelémo napa oko gakó lo amumó neve. Itó lekelikumú gakó lo amumó nenémini gihiláa utó o asú imó neve. Neza Taetasini gakó nene sozagi ma lo lekemesá amuve. Ámina oko lukugulizá ale oteko Taetasini lo amumómoma nene ma gihiláa loló onoimómoma neve. ¹⁵ Taetasi nene lekelitoka vokago, lekehelele viziki ininá iki mulutini milake nasahilí itamó itó gakoláa gili alemó nenemú geleake agika lekelitoka molamó nene napa neve. ¹⁶ Neza lekelikumú gulumó netá matatini hee lokogó nego, mulúnegú golesa amigo vatí oko minanogo uve. Nenemú mulúnegú lamaná geleko luhuva imane gizo nolukumuve.

8

Monokumule loko moni ali nupa ita gakó

¹ * Nigivénegita, Masetonia mikasiuka monó gele veđenatoka Ómasímini nasahilí nenémo gihila ale utó imó nenemú lo likimitoze, gililo. ² Keza miluma maluma nenémini agikagú minake gohogó minamó nenémo ha netá loló okago, gopa nene monolímíni kogolizaváa nene itíki alinake mulúikú lamaná geleaká netá nene veđená makó kimitune líki moni ali nupa amó nene komasí nomive. ³ Neza keí mogonatagana gele hee loko gelenouke nolomó nene lá oko neve: Kezáini kagata giliki vávani iake moni ali nupa amó nene kezáini moni milamó nenémini lelegitó milamake aviligiki milamó. ⁴ Lá iake neza kagata aleko lá amugo, kezáini geleke gala vizilitake Zelusale numutoka Ómasímini veđenatini mulúikú lamaná gilita netá ali utó miliki kilími vatí inígi moni aleko voko kimitane líki negénegeka lamó. ⁵ Lá iake, netá lagasó inígi lahe loko noguluko ganá nene Guivahaniloka kígika míli gilitiáke Ómasímo lititoka molatitoka itune líki liake lezalokagi kígika míli gilitiki minamó. ⁶ Keza nenémini ikago, Taetasí nene ámina hoza apí i ve nene lekelitoka vooko lekeza líkígika kimita hoza nenémináa ali asú itave loko gala vizunimó. ⁷ Itó gele alévolé oakatini itó monó loakatini itó gakó mogonáa gele hee loko geleakatini itó monolímíni hozavamú amuza moloakatini itó líkígika lemeaká nene netá nenémináamini gihila mukí ali utó miliákeve loko ámina mulutikú lamaná geleaká hoza aliiki moni ali nupa itakumú lekeza ámina iki vávani itave loko noluve.

⁸ Neza moni ali nupa itakumú gala vizeleketoko loleketamuve. Monó geleaká veđená lugáaloka ámina hozamú vávani ikave. Nenemú lo lekemekugo lekelí nasahilíímíni lelegiláa nana oko neve, nenémini mogona utó itive loko noluve. ⁹ Lekeza Guivahanite Izesu Kilistoni nasahililamú mota giliaká niave. Eza minumuni izolaho lekelikumule loko gohogó ve loló imó nene lekeza áminatunú monokú minumunavagi líli itave loko nenémini imó nenazo, Izesuni agizaka hiziki mihina itave loko noluve. ¹⁰ Itó gakó makó láa loko nogulumó nene lo lekemekugo, gili alíkiko, gihila utó itize. Lekeza nene litaha meleketó lekezatini litá iki moni ale nupa itune líki liake vávani iki ámina hoza apí inamómoma nene itína ámina lelegitó ali asú itamó nene lamaná inogo ive. ¹¹ Nenemú vávani iki apí amómáminiki miní amíki alíliki nivíki vávani iki ali lutigitamó nenémini gihiláa nene moni milíni lelegitó ali utó milalo. ¹² Mulutikú lamaná giliki moni milatamó nene Ómasímo gelekiko lamaná inogo ive. Leza molonomuni lelegitó negopa, netá moloununi lelegitó molokuko Ómasímo ánigago lamaná oaká noive loko noluve. ¹³ Lugáate mulúikú lamaná gilitave loko moni ale nupa oakakumú nene lekeza mikasi lukugupegi miníki lukugupeló gilitave loko nomive. ¹⁴ Lekelí minumunimó itínaa gamena nene keí gohogó amiselekiko, netá matáini nomí veđenalite netá makokumú vitagá amitave. Itó minoko gamena makó zupahé keí

* 8:1: Lom 15:26

minumunimo lekelitoka gaúna gamena amisilitive. Lá okiko nene kezagi lekezagi hamó lelegitó mini miliki minatave. ^{15*} Gona miliki kimimi vakumú nene monó gotolaú gako lá oko nemóma neve:

Mukí netá gizaká a vegeñalitiñi minumuníni napa nomimó neve.

Itó lagasó ali nupa amoláate gaúna helemamóma neve.

Taetasige monó moni aliki vita gako

¹⁶ Ómasi eza lekelémo vatí itikumú nene Taetasini alémo zaú okago, lekelikumú nagata geleaká umó ámina avevezahaló aitoka utó okago, Ómasi agepoka loaká nouve. ¹⁷ Neza lo amekugo geleneive loko nomive. Ezáa agikámo vávani o lamaná okago núane lekelitoka vinogo ive. ¹⁸ Guivahanímini vegeñala zuha mukitoka keza Izesuni gako lamanakumule loko hoza aleaká noi vemú gili lamaná iki giliaká nia ve ezagi makó amiselekugo núane nivasive. ¹⁹ Itó ámina vémini gakola makó lá oko neve: Guivahanímini vegeñá keza ámina ve nene mulúikú lamaná gilitave loko ali nupa ina moni aleko novuko, neneló kelémo vatí iko, makó vitave liki alími etó amó. Ámina hoza nene Guivahanímini agulizá otitive loko, itó mulutegú vávani igo hoza nalunimó nenémini mogona utó itive loko alinogo noune. ²⁰ Nenemú gopa gako makó utó okative loko sipisi moni nene legesó iki gizapa itave loko kimiselekugo nivasive. ²¹ Lá nounimó nene leza netá loló okuko Guivahanimo ezagó gelekiko lamaná itive loko negopa, mukí vegeñalite gilikiko lamaná itive lokogí nalune.

²² Neza nene ámina ve lositakí itó ligive makoki nene kimiselekugo núane nivaze. Ámina ve eza nene mukí zupa gimivagú moloko áñigokuko vegeñá kelémo vatí itikumú amuza moloakalímini mogonáa utó okave. Áisi nene lekelikumú giligo, alévolé okago, amuza napa nomolave. ²³ Itó Taetasini mogonamú gilitune liki nilikoma, lekelikumule loko ezagi nezagi hoza aleaká ve losi nene nousive. Itó Taetasigege makó nivasí vetini mogonáimimú gilitune liki nilikoma, keza monó gele vegeñáini zuha nenete kimisilikago núane nivasive. Itó keza Kilistoni lapaná ali utó iaká nia ve niasive. ²⁴ Neza lekelémo napa oko lo nokumumó nenémini gihiláa utó itive liki lekeza ámina ve nene víki anitikiko nasahilí ikimikiko, monó gilina vegeñá lugáa numutó numutó keza gili guni itave.

9

Zelusalega monó vegeñakumule liki moni ali nupa a gako

¹ Zelusalega Ómasímini vegeñá nasahilí ikitiki moni kimita gako nene mota gilinave. Nenemú nanave loko goha gizo likimitove. ² Ámina hozamú mulutini hukilí okago, gelekuke, lekelémo napa oko lekelí mogonamú láa loko lumó: Akaia mikasiuka monó nigele vegeñá lekeza litaha kilisimasiló litá iki vávani iake moni ali utó moloaká gapo ali utó amó nenémini gako nene Masetonia vegeñá lo kemekugo, vegeñá lugáate keza amuza miliki gakotini giliake, ámina hoza alitune liki mulúikú lamaná gelemó. ³ Neza ámina hozamú lekelémo napa oko lo kumu gako nene voko hetagá okative loko neza lumómalo nene áminaló miliki vávani iki moni ali nupa itave loko ámina ve losive makole kimiselekugo nivave. ⁴ Nezáne alika Masetonia vegeñaki vokuko, lekeza moni moloakakumú ligitagani ikikoma lekelémo napa oko lo kumu gakóne alemó zekiko, nezagi itó lekezagi lovoza helekative loko ⁵ nenemú neza gulumó etokago, nigive nagave imane gala vizeko kimiselekugo, goí iki lekelitoka núane nivave. Vi anitikiko, lekeza moni ma kimitune liki emane amunaló gako li huginamóma neve. Nenemú ganatilisi ali nupa ikigo minatize. Lá ikiko, neza lekelitoka vo anitekinake gala vizé vizé ugo moni milatamó negopa, mulutikú lamaná gili minake moni milinamó nenémini mogona lamaná utó okiko áñigatove.

⁶ Itó moni ali nupa itakumú anoza gako imane láa loko noluze, gili minalo: Leza zuha netá koma zuhá itunimó nene minoko komagó alinogo une. Itó zuha netá mukí zuhá itunimó nene minoko mukí ale minanogo une. ⁷ Nenemú imanémini itaze. Lekeza etó etó iki likigikatunú giliki gili guni iniki gilita avotigiláminiki nene moni ahulataze. Itó kogoliza viziki monó moni ahuliaká nia vegeñakumú nene Ómasimo áñigo amu heleaká noinazo, gínikahavagi neiko vegeñalite gala vizí vizí agogopa, mulutikú lamaná giliki ahulataze. ⁸ Ómasi eza minumunavagi ve noinazo, vávani oko lusa nene lukumupiló molokiko minumuni utó o likimitize. Lá okiko, lekezatini ni lakagatupa niiki vegeñá nasahilí ikitata hoza haitopaitolímini alitune likima netá makokumú ma vitagá aminigave. ^{9*} Monóinigi vegeñalite lá itakumú nene monó gotolaú gako makó láa loko nemóma neve: Keza gona miliki gohogó vegeñá nasahilí ikitake kimiaká niave.

Keí nasahilíni huko vamitimó minoloko voko minanogo ive.

^{10*} Ómasi eza zuha netá ale utó mololimikago zuhaina oaká noune. Itó gihiláa ale

* 8:15: Gá 16:18 * 9:9: Age 112:9 * 9:10: Isa 55:10

utó mololimikago minoko aleko oaká noune. Lá oaká noinazo, eza nene lekezagi minoko zuhaváa ale utó mololikimioko lusa geko ale napa okiko, nasahilitinímini gihiláa mino hutilí oko minanogo ive. ¹¹ Itó haitopaitolímini oko minumunitinigi vejená lilí iiki áminatunú vejená makó nasahilí ikimikiko, nasahilitinímini gihiláa utó okiko, keza lelikumú Ómasi agepoka litamómámini mogona lá oko neve: ¹² Lekeza Ómasímini vejenala zuha mulúikú lamaná gilita netá lilí iki moni kimikiko, nenémo gohogóini amisele ahuloke-tative lokogó negopa, nenémo Ómasi agepoka loko geké lomiaká nenémini minumuniagi ale utó molotative. ¹³ Lekeza Kilistoni gakó lamaná giliake ali gikitiki ali miniaká niamó nenémini mogonáa, itó lekeza Zelusalega monó gele vejená itó likigive lugáa mukitoka kezagi nene mulutikú lamaná giliki napa iki nasahilí ikitamó nenémini mogonáa utó okiko, Ómasímini lapaná utó o lamaná okó minative liki ali otinigave. ¹⁴ Lá ikiko, Ómasímo nasahilí haitolíminoko lekelitoka ale utó imómave liki kigika lekelitoka miliki lekelikumú Ómasiloka linigave. ¹⁵ Itó Ómasi eza nasahilí oletoko gipala lehizeletamómámini mogona lo asú oko lo utó o asú amoakalímini nenemú hanuva sigaga lotoko agepoka litune.

10

Pauló ezáa mogona hize lé imó

¹ Neza Paulona imane Kilistoni zou nagamalagi itó nasahililagi noukeve loko lakagata aleko lo likimitoze, gililo. Lugáate nenikumú láa liki liaká niave: Lelitoka oko minake ezáa amuzavagi ve minamike, gakó nagamalagi lo lemeaká imó. Lá oake, voko minake agokagutí gakó lo lemeaká noive liki liaká niave. ² Nigive nagavesse, lekelitoka voko minake vejenalite litaha kigikatunú aliaká niamómáminoko hozava aleko minoaká noive liki nenikumú liaká nia vejená nene nogokagutí gakó lo kimitove loko nene vávani oko lo kimitomóza, lekeza lugáa ámináminoko nogokagutí lo lekemekatoze, gala vizemilo. ³ Lelí mogona lá oko neve: Mikasiuka netá matate ale minunike litaha lugupegi lamaná mohona nouhá nemóza, monokumule loko lova hizeaká nouhá nene monó gelega vejenalite litaha kigikatunú lova hiziaká niamó nenéminoko nomive. ⁴ Gimisi magé ale minunike monolímini lovavagú hoza aleaká nounimó nene mikasiukatí monó gelega vejenalitiní netatunú negopa, Ómasímini zámuzalagi nounike nenetunú gala veletiní ha gakóinímini vegegisa tele vizeaká noune. Itó keí zámua zeko letokoko niiko, ⁵ Ómasímini mogonáamú gele guni oaká gapo hizi lí inígi govosi aliki letiaká gakóini apelekunike, vasá zeaká netá ali utó iaká niamó nene avilegeaká noune. Itó Kilistoni gelekelelágó utó itive loko haitopaitolímini lagata geleaká netá nene nagá ameaká noune. ⁶ Lekeza není gakó gili aliakatini vávani i asú ikiko, leza vejená lugáa gakó pelesa ziaká niamoláa nene nakahuni kimitune loko gizapa onoune.

⁷ Není mogona lokovogisalo utó noimó nene ánigalo. Lekelitokatí ve makolímóhe makolímóhe ezáamú gelekiko Kilistoni vejenala zuha loló okamó áisi láa loko gilitize: Ezáagó Kilistoni vejenala ma nomive. Lezagi Kilistoni vejenala nene nousive. ⁸ Guivahanímó hozavamú gilike zámua nimimó nene lekelémo lapuluva oakakumú negopa, hize lé olikimiakakumú nenazo, neza ámina zámuzamule loko nugupe aleko iteko lo likimitomó nene novoza helemínogo ive. ⁹ Itó luhuva netá imane gizo nolukumumó nene, nenemú giliko lekelegesá ligiti gakó gizo nolukumumó gelemino. ¹⁰ Nenikumú láa liki liaká niakumú noluve: Luhuva netakú gakó golvagi itó alévolekutí gizoaká noimóza, lovogisalo nene amuza ve minamive. Itó hutuváa gakó loaká noimó nene nagamalagi loaká noive liki liaká niave. ¹¹ Némika liki liaká nia vejená keza hotó minuke luhuva gakó gizo lekemeaká noumó nene áminámini gihiláa hamó lelegitó nene holutikú minoko ale utó molokugo ániganigave liki gilitaze.

¹² Neza vejená kugupe aliki iti iti iki miniaká nia vejenatoka gímizekinake lelegí noune loko litohe. Íi, keza není lelegitó ma minamave. Vejená nenémináa keza Ómasímo oko moloko oaká nounikumú nanave loko nogilive liki lamake, gakó gona miliki liaká niamó nene kezáini mogonáinimukó gili minake gakó gopa kezáini mogona lotuva ligiaká niave. ¹³ Neza Ómasímini hoza alitane loko lehizeneta lelegitó nelémo etó imó nene ámina oko aluke, lekelitoka anitumó nenemú gelekuke ale mo ite ite gakó losá amuve. Itó lehizeneta lelegitó gopa avilegeko ma losá amuve. ¹⁴ Neza hozanegó lelegí oko aleaká nouve. Hoza lakanite nene lamaná lekelitoka neimó nenazo, leza nene lekelitoka anituko lelí legegagutí Kilistoni gakó lamaná ganá apí iki gilinamóma neve. ¹⁵ Leza vejená lugáatini hozagú lagakilimó oko moloko leza alunimole loko lugupe aleko iteaká gakó loaká nene ma osá amune. Gele alévolé oakatini nene agizani alekiko leza lekelitoka voko hoza lakanite ale napa itune loko nenemú ligika nego minoaká noune. ¹⁶ Lá okinake lekegemesaloka mina mikasigú vejenatoka gakó lamaná lo utó oko lo kemekinake, ve makolímini hoza

lakanivagú ezáa ale utó ikumú lugupe aleko iteaká gako loaká nene ma amitune. ¹⁷ * Lugupe aleko iteakakumú nene monó gotolaú gako makó lá oko nemó neve: Makó eza netá matakumú aleko ite ite gako litove loko nookoma, Guivahanímo oko moloko i netakumú gele minoko lino. ¹⁸ Makó ezáa agupe aleko iteko nolikomá nene, monó hoza lamaná alekave loko lamitune. Guivahanímo alémo napa okago gihiláa loló okave loko litune.

11

Paulogegi soza aposolo vegi kei gako

¹ Gako lagasó makó lo nolukumugoma negi gako lokave liki goselé lekepelemino. Hanuva legesó iki gililo. ² Neza lekelikumule loko Ómasímo lekemekugú noaká noimómáminoko amuza moloaká nouve. Lekeza ve aleve suni ánigonami mohó vové avealáa nenémíniki niko, ve hamotokó vitave loko anosa mololeketumó nene Kilistó noive. ³ * Lá onomóza, gosihalímo logoka vizeakalímíni mogonamú gele hee lo minake Evani nene soza gaktotunú agoka vizimó ámina oko lekezaloka ve lugáate lokogoka vizitakumú geleakatini golosasa gekiko, vové avé liki Kilistonimukó giliaká niamó nene ahulikatave loko gulugo, gena noigo noluve. ⁴ Nenémíni mogona lá oko neve: Lekelitoka vegená makolímó aniteko Izesuni mogonáa lélisi lo lekemeaká nouhalímíni negopa, ametaméni haitolímíni makó lo lekemekago nene, itó gozapá lelitokatí alemó nenegopa, haitolímíni gosohá gako lo lekemekago nene, itó Izesuni gako lamaná lelitokatí gelemóma nenegopa, monó haitolímíni makó lo lekemekago nene, géneka lí amemíkí hanuva gili amiaká niamó nene lamaná noihe. ⁵ Nezáne mogonamú gelekugo ve napa nounge liki liaká nia aposolotini sepenauka nominumó gelesá amive. ⁶ Neza negopa gúmúsi muluke lo lekemeaká nouhe loko gelenamumóza, monolímíni mogonáa geleaká nene gelenouve. Itó nenémíni mogonáa haitopaitolímíni oko ale vesamá oko lokovogisaloka ale moloko lo lekemeaká nouve.

⁷ Itó lekelí lekelémo napa itove loko nezáne lemeko minuke Ómasímíni gako lamaná lo lukumutó meinaváa ma alesá amumó nenémo golesa ihe lamaná ive. ⁸ Lekelitoka monó hoza aleko gelekelé noleketuke Ómasímíni vegenala zuha lugáate moni henoni nimikago aleaká umó nene hagítana ipá oaká umó gelekave. ⁹ * Itó lekelitoka minuke netá makokumú vitagá uke voká makó loleketamumóma neve. Neza vitagá oko mohona nougo, Masetonia mikasigítí nigive makolite aniteke netá nimiki ali negepa miliaká amó. Lá niago lekelitoka nene hanuva minuke genavagi netá geheleketonamumóma neve. Itó minoloko iteko gohagi geheleketamitove loko noluve. ¹⁰ Kilistoni gako gihiláa nigikauka nego lamaná noluve. Ámina suni aleaká noukumú nugupe ale napa otigí oko loaká nou gapo nene Akaiá mikasigítí lekeza nia mikasiuka hizi lí aminigave. ¹¹ Nene nanamú noluve. Nigika lekememuke lá oaká nouhe. Nenémíni oko nomive. Nigika lekemeaká noumó nene Ómasímo geleneigo noluve.

¹² Netá aleaká noumó nene ale-loko voko minanogo uve. Itó nene hanuvamukopa, vegená lugáa keza Pauló hoza aleaká noimó nenémíni lelegító oko hoza nalune liki kugupenini aliki itikatave loko nene lukesaváni akeleaká nouve. ¹³ Ve nenémínáate aposolo sozámíni itó monó hoza sozámíni aliki minake, Kilistoni aposolo lelí lemetamenigítana lílí iaká niave. ¹⁴ Lá ikago netá haitolímíni makó alikave loko litupe. Lá oko nomive. Satá ezagi nene ageló vegená lapanáiki loló itove loko ali tolova oaká noinazo, ¹⁵ nenemú Satani hozaváa aliaká nia vegená keza ámina iki netá lamaná aleakalímíni gelekelelóa loló itune liki kezáini kogoka kegepa vávani iki ale tolova iaká niakumú ininá amitune. Keza miniki hoza golesa aliaká niamó nenémíni helegáa alinigave.

Pauló aposolo hoza alike miluma gili gako

¹⁶ Gako nolumó nene goha litoze. Nenikumú gelego negi ve liki loló amino. Gopa nenikumú láa liki nigílikima gili nimikiko nugupe lagasó ale napa otigí oko litoze. ¹⁷ Neza gako láa loko litomó nene Guivahanímo lonetamómáminíni oko litogopa, hanuva nugupe aleko iteko gako apí okumole loko gopa nene negi gako linogo uve. ¹⁸ Vegená mukilite lugupémíni netakumú ali napa napa iki gako liaká nianazo, neza ámina oko litove. ¹⁹ Agae, lekeza netá mogonáa geleaká nouni vegená nounge liki likamó nenazo, lugáate negi gako lí likimikago, vávani iki giliaká niave. ²⁰ Itó líkílímíni gelekelé izegipatiní milanigí niake, itó netá matatíni ipá iki nanigí niake, itó gelehusíikú apilitave liki niake, itó kugulizaki ve lílí i líkiminígí niake, itó lokogoka lekegepaló zinígí niago, nenemú lekeza gahá kememake gili kimiaká niave. ²¹ Neza nene sunimú amuza molamugo lekeza lovoza heleaká netá nalive liki nilahe.

* 10:17: Zel 9:24 * 11:3: Apí 3:1-5,13 * 11:9: Pili 4:15-18

Makó keza netá nemupe manamupe ahuu ahuu liiki nene alune liki ma niko, nezagi nene negi vegetana oko nehelele vizemigo nugupe aleko iteko litoze. ²² Ámina aposolo sozáminí nene kezáinimú Hipulu ve noute liki liaká niamóza, nezagi ámina oko Zuta ve noute. Kezáinimú Isilae veená noute liki liaká niamóza, neza ámina oko loaká noute. Keza goha ámina iki kezáinimú Avalahani agapilamola noute liki liaká niamóza, neza ámináló kámegetoko loaká noute. ²³ * Keza Kilistoni gelekelé veva noute liki liaká niamóza, neza imane gopa negi nagi gakó litoze. Neza kivilegeko Kilistoni gelekelé veva haitólímini noute. Neza hozáminí milumaváa geleaká nomó nene haitólímini noute. Itó monokumule loko nagá numukú minoaká umó, itó segi nogosanitunú nipilikago nagavú geaká imó, itó lapuluva itove loko geleaká umó nene haitó avevezahaló iteko neve. ²⁴ * Zuta ve keza gamena ligizani lugaloka asú igo uheni nakahunitunú nepelemó nene 39 igo nepelemó. ²⁵ * Gamena losive makole Loma vete segi nogosanitunú nepelemó nene. Itó gamena hamó nene gehanitunú nipilikago hilinogo umó nene. Itó gamena losive makole nagamikú lapegú nougo ámina sipi zeko ategekego age nagamikú lemesá umó nene. Itó gamena hamó nene sipima golesa okago limugusi zeko gó loko imóza, simá namoko hanuva age nagamí amupiló minumó nene. ²⁶ * Itó gamena mukí nene gapo hána hána vova vova oko mohona oko nominugo, golinimo nagamilimo okago lapuluva osá oko minoaká nenémini amupiló iteko minumó nene. Itó laskoli vetini holúikú heleakalímini amupiló minumó nene. Zuta ve nigivénegini holúikú itó Zuta ve minamamoláatini holúikú heleakalímini amupiló minumó nene. Taoni napagú itó gihisigú heleakalímini amupiló minumó nene. Age nagamikú nene sumizá noaká avevezahaló, itó monó sozaló ve ligivetegini holúikú heleakalímini amupiló mohona oko minumó nene. ²⁷ Génopa hoza alekuke nigizamuha nagavú gigo mohona uke, novoki ako lamaná amumó mohona uke, gaúna heleko zahá nagamikumú nivisigo, hepé heleko minumó nene. Gineganemú itó avilisakumú vitagá oko minumó nene. ²⁸ Itó nenegó ma nomíve. Gamena gamena mulúne gitihiná igo numutó namató Guivahanímini vevenala zuha gizapa okimiaká hozamú gulugo, gena nivisigo minoaká noute. ²⁹ Makó keza monokú ipú zemagoma, nezagi miluma gelekimiaká noute. Itó makó keza monokutí olíi hizikagoma, milumaváini geleaká noute. ³⁰ Itó neza netá makokumú nugupe ale napa itove loko nookoma, keé lamumó nenemú ale napa oko nolugo lamaná inogo ive. ³¹ Guivahani Izesuni amelaho Ómasía luhuva gegemá oloko voko mino lúaló molati ve áisi nene nenikumú lamaná nolive loko geleneive. ³² * Neza Tamasiko numutoka nougo, agulizaki ve napa Aletani kiapelimo nagá numukú nelémo molanogo lokago, numuni gatekú gohoni akamó. ³³ Lá niago, nigive nagave keza nene gosúvehagú lohusi iake vegegisa koló o minakú nehelé i ahulikago, olíi hetoka lemekuke golisi vumó nene.

12

Pauló agika ale viligokago ániqa gakó

¹ Lugupe ale napa ituni gakó losá nene ma lelémo vatí amitimóza, gopa nene litoze. Nigika ale viligokago netá ánigumó itó Guivahanímo lo vesamá oko lo nimimó nenemú itínasa aveté oko lo likimitoze, gililo. ² Neza Kilistoni vevenala makó gelenouve. Eza nene netá makó ániqa gamenalotí kilisimasi 14 oko vokave. Ve eza nene Guivahanímo galinali alémoko okulumakú itekago velé amupiló agika nekú nene itimó. Neza agupegí nehe itó agupe gileleake nehe nene gele hee lamuve. Ómasímogó geleneive. ³⁻⁴ Itó Guivahanímo ámina ve galinali alémoko itekago, Palatisi zazuhagú nene iteko gakó legepatunú lamosá itó mikasiuka veta lo utó moloko lamosá nene gilimó. Neza gelenoumóza, agupegí minake itihe itó gileleake itihe nene nénisi gelemuve. Ómasímogó geleneive. ⁵ Ámina vemule loko nugupe ale napa oko gakó litove loko nene nezáne mogonamú hize lé oko laminogo uve. Nezanemú litove loko nene keé losá amumó nenemukó ale napa oko linogo uve. ⁶ Nugupe ale napa oko gakó litove loko nelina nene, gakó lamaná lulinamó nenazo, negi nagi ve minamuline. Lá onoi móza, nenikumú gelego itekative loko nene ma laminogo uve. Netá matá lokugo itó oko moloko nougo, lekezatini ánigiki mota gliiaká niamó nenémini lelegító minanogo ive. ⁷ Okulumakú netá gosohá ánigoko moloko umó nenemú nugupe aleko itekatove loko nupugéne mémelagú emane uhenagi netá makó hizimó nene, Satani gelekelé izegipala makó eza nigikatunú gulugo itekative loko agizani lapuva nimitive loko lonoi mó nene. ⁸ Lá okago, ámina netalimo ahulonetatave loko Guivahaniloka gamena losive makole lumó nene. ⁹ Voká lokugo, láa loko lo nimimó: Není helisánémo keé losá

* 11:23: Apo 16:23 * 11:24: Gapo 25:3 * 11:25: Apo 16:22, 14:19 * 11:26: Apo 9:23, 14:5 * 11:32: Apo 9:23-25

amanikú nene napaló hize lé ogimiaká noinazo, neni nasahilínemo geitoka veleko voaká noigo, netá makokumú voká litanimoláa nomive loko lo nimimó. Nenemú Kilistoni zámuzalámo nenitoka nelémo gili litive loko keé losá amumó nenemukó ale napa oko noluke nogoliza vizeaká nouve. ¹⁰ Lá onoinazo, neza keé losá amutó nene aitoka leheta nouke amuza moloaká nounazo, Kilistokumule loko keé lamugoma, itó alivi letivi ninitagoma, itó miluma malumámini amupiló nominugoma, itó gopogunímíni itó galáinímíni amupiló nominugoma, gopa nenemú mulúnegú golesa gelesá amuve.

Pauló Koliti vejenakumú miluma gilimó

¹¹ Imane negi nagi gakó lumó nene lekelisi iki miliki amó nenémo nelémo zaú okago noluve. Lekezatini nilími napa ikiko lamaná itinazo. Neza hanuva ánéámina noumóza, lekelí aposolo iteko noune liki nila vetini kamakuka lemeko ma minamuve. ¹² Neza lekelelitoka hoza huluváa alugo, alévolé suni itó gosohá netá zámuzagi ale utó oaká umó nenémo aposolo mogonáne ale utó moloaká imó. ¹³ Itó lekeza nanetá vitagá iake Ómasímíni vejenala zuha mulusi lugáatini avevezahaló minamave. Lekeza netá hamotunukó lekelémo alínipa okuve. Netá matatini visele nómonó nene ma oleketamumóma neve. Ámina suni nene lihima napagi nego ahulínitalo loko litohe.

¹⁴ Neza lekelitoka gamena lositá vumóma neve. Itó itína nene goha vitove loko ale vatí nouve. Vinake goí oko vuke nugupémíni lukesaváaloka umómáminoko miluma hoza lekememinogo uve. Izegipa koma nenete izóikini améikini hizi lé ikitanigi moni ali nupa isá amave. Kéisi izóike améike hizi kegepa itakumukó giligili miniaká nianazo, neza lekelí moni henonimú negopa, lekelikumule loko amuza moloaká nouve. ¹⁵ Neza nene lekelikumule loko moni henokanóne itó minoko aleko oakáne nenegi nuvane ahulatove loko vávani oko nouve. Nenemú nigikatunú lekelikumú geleaká noumó nenémo aleko iteko noiko, lekeza likigikatunú nenikumú giliaká niamó nenémo aleko lemeko minatihe. ¹⁶ Vegená lugáate nenikumú láa liki liaká niave: Ezáa netá utó ezo azoga loko ipá oaká nene ma osá amimóza, asugunatoka vejená kogoka vízeko netá matáini ipá oaká onoitíhe liki liaká niave. Oliwe, neza lá umó nehe. ¹⁷ Nenemú lekeza lilo. Není gakotó nene vejenáne zuha kimiselekugo, viki netá makó lekelitokatí ipá ikahe. ¹⁸ Taetasini nene vitive loko lotumó, itó monokú ligive makó amiselekugo makó vikasigo nene, Taetasí nene voko lekelitokatí netá matá ma ipá ihe. Leza ligika molo hamó usike gapo hamotó lisoko makó vamusihe.

¹⁹ Gakó akó loaká noumó nene lekeza gelego ezáa mogona hize lé oaká nolive liki nilahe. Nenémínoko nomive. Neza Kilistoni izegipala minuke Ómasímíni avogisaló gakó loaká nouve. Itó nigive nagavese, gihila nenikumule loko lamuve. Monokú lekelémo kii litove loko loaká nouve. ²⁰ Neza lekelitoka voko ángileketatomó nene lekelikumú gulugo hehe lamitive loko, itó lekeza nenikumú ámina iki giliko hehe lamitive loko gulugo, gena nonivisive. Itó lekelitoka lova leta lava leta itó lekemekugú noaká, mesaha kosaha, itó molo alata alata oaká, itó alevo letovo oaká, lotoka lataka hizeaká, vejená kugupe aleko iteaká, ale gopánapa oaká, netá nenémínáa neko voko ángokatove loko gulugo, gena nonivisive. ²¹ Lekelitokatí lugáate emane amunaloka likigika golotuva lamó mokoló netá itó musi netá likigika napaló nego, néminí manámíni ake likigikatini makó ali viligisá amiki nenémíniki niko, lekelitoka vo anititómó nene lokovogisaló Ómasímémo nelémo-loko lemekiko, lekelí lihíamamú mulúne githíná okative loko gulugo gena niviseaká noive.

13

Kagata alike geké loketake gizo asú imó

¹ * Itína lekelitoka goha vokugo gamena losive makolehe keza ve makolímíni lihíamamú likiko utó o lamaná oko vevesanogo ive liki monó gotolaú gizina gakó nene, lekelitoka vo anitekínake ámina gakó gele minínake gakó linogo uve. ² Amunaló emane lihímatinigi minamoláa itó vejená lugáa nene lekelitoka gamena losi vu zupahé lakagata aleko lu gakó áminama nugupe hotó onigo goha imane noluve. Alika goha nene voko aselini ma zeleketaminogo uve. ³ Kilistó nene nelémo vávani igo loaká noutímíni mogonamú lekeza vitagá niamó nene ángiganigave. Kilistó eza lekelitoka hozaváa nalimó nene nekisáa nomimó neve. Zámuzalagi aleaká noive. ⁴ Gozapá nene lamaná migelelé onigo zohota zaló apelemóma nemóza, itína nene amelaho Ómasímíni zámuzalagi aleake otimó neve. Neza ámina oko eza imómáminoko migelelé ovumóza, aitoka gímizekuke Ómasímíni zámuzaló voko leheta oko minoaká noumó nenémíni mogona lekelitoka voko ale utó molanogo uve.

⁵ Lekelisi nene lamaná monokú niahe niamáhe nene likigikatini loká iki vitagá iiki nenémíni mogonáa ali utó milalo. Itó Izesu Kilistoni mulutikú alími mílikago nominámó

* 13:1: Gapo 17:6, 19:15

nenémini mogona mota gilinahe, oilile. Itó lukugupémo monó avevezaha oaká noihe. ⁶ Nénisi nene hetó nugupetunukó monó ve ma minosá amuve. Lá nougo ángatave loko geleaká nouve. ⁷ Ómasímo gizapa olikimikiko lihima ali utó milamitave loko Ómasiloka loaká nouve. Lekeza ángigikiko monó ve gihiláa loló oko minatove loko nomive. Lekeza monó gakó gili alitamó nenémo utó o lamaná itive loko noluve. Itó nenikumú nene agupetunukó monó ve noive liki gilitamó nene ha netá neve. ⁸ Leza nenémináate nana oko gakó gihila lova ale amitiíve. Hanuva hize lé otatíve loko nousive. ⁹ Leza zámuzamú vitagá okoko nousigo, lekelisi zámuzatiki minatamó nene mulutegú lamaná gilingo usive. Lá nousike likigika gizopa lative loko Ómasiloka loaká nousive. ¹⁰ Guivahanímo zámuzá nímimó nenetunú lekelí lekehelú itove loko negopa, lekelí lekelémo alévolé itove loko nemeneimóma nenazo, neza lekelitoka voko alévolé gakokutí lo lekemekatove loko ganatilisí hotó nouke lakagata aleko luhuva imane gizo nolukumuve.

¹¹ Itó nigivénegita, gakó lo asú oko láa loko litoze: Lekeza mulutikú lamaná giliki minalo. Itó lakagata aleko gakó imane nolumó giliki likigika ali guni iki alími lamanatoka milalo. Lá níiki lekeza likigikatini mili hamó iki hulugú minalo. Lá ikíko, Ómasí eza ligika kemeaká itó hulu amelaho lekelitoka minanogo ive.

¹² Lekeza monokú eza aputá viziko eza aputá viziko iki minalo. ¹³ Imaneloka monó gilina vegenalite mukitó geketini lilikimiaká niave.

¹⁴ Guivahani Izesu Kilistoni nasahílila nenémo itó Ómasímo agika lekemeaká noimó nenémo itó Sikalahulímo lekelémo apizeaká noimó nenémo lekelitoka minoloko voko minino.

Galesia Vegenalitini Luhuva Pauló Gizo Kimimó

Galesia vegená nóhóhá kimike gizo kimi gakó

¹ Neza Paulona aposolo nene ve makolímó nimiselemimó itó vegenalite hoza gakó ma linitamamó, Izesu Kilistó itó heleneikutí alémo oti ve Ómasi ametehe nene aí gakotó aposolo loló utímína, ² itó nigivénege lugáagi imaneló niamó kezagi makó nounike nene Izesuni vegenala zuha Galesia mikasiuka niató niató lekeli luhuva imane gizo nolukumuve.

³ Ómasi ametehe itó Guivahanite Izesu Kilistó aitokatí nasahilí itó hulu lekelitoka minino. ⁴ Izesú eza ametehe Ómasímíni gakotó nene itína gamena golesa netatémó lelémó golesa inogo ikutí gologí oletanogo lelí lihíamamule loko minoko aleko imoláa nene ezáa ahulamó. ⁵ Nenemú Ómasímíni lapaná ale ote-loko voko minatune. Lamaná.

Gakó lamaná haitó makó nomive

⁶ Lekeza nene Kilistoni nasahilikú miní amitave loko sele lo likimi veló miní hána amake lekemegeša amiake haitó gakó lamanakú viki lakagata miliki giliaká niakumú nene oho loko nololeketuve. ⁷ Gakó lamaná nene makó nomimóza, hanuva vegená lugáa nenete Kilistoni gakó lamaná nene ale gopa itupe liki haitó monó li likímiki likígika ali gopa ake nenémíni iaká niave. ⁸ Lá niamóza, nezahe itó okulumakutí ageló makolímóhe Izesuni gakó lamaná amunaloka lo lukumuhá nene lo lekememoko ale gopa oko haitó lo lekemesá nene lolímíni mututoni loló osató neve. ⁹ Ámína gakó nene gozapá lunimó áminagó nene goha noluve. Makolite nene gakó lamaná amunaloka lo lekemekugo gilinamó nene ali gopa iki haitólimíniki li likimitamó nene lolímíni mututoni lilí itamó neve loko goha nene noluve. ¹⁰ Gakó nolomú nene vegenalite ángi kumu hilitave loko lamuve. Ómasímó ángi amu hilitive loko noluve. Neza nene vegenalite nenikumú giliko ititive loko hoza alulina, Kilistoni gelekelé ve minamuline.

Pauló aposolo loló imómámíni mogona

¹¹ Nigivénegita, neza gakó lo likimitoze, gililo. Izesuni gakó lamaná lo lukumumó nene vegenalite kagata giliki ali utó amó nomive. ¹² Itó vegenalitikatí nomive. Itó vegenalite lainim-ínitamave. Izesu Kilistó ezáa lo utó oko lo nimimó neve. ¹³ * Neza gozapá Zuta ve minuke holúikú minokuke, netá matá oko moloko umó li likimikago nene gilinave. Neza Ómasímíni monó gele vegená nene gopoguni moloketuke kepeleko kimisele kimisele moloko, kelémó golesa galasa oaká umó nene, ¹⁴ * izegipa nahalúnegíni kivilegeko izotegini ametegini itó avotegini mogona nene haha amitive loko ámína gakolímó alévolé oko minative lokuke nene, amuza moloko lá oaká umóma neve. ¹⁵ Lá oaká umóza, Ómasi nenémó amunaloka izónehíni agatupagú nougo, ángoake, nasahilí onetake nelémó etó oake sele lo nimimó. ¹⁶ * Sele lo nimimó nene, giligo, etokago, gakola nene Zuta vegená minamamoláaloka ale hutilí itane loko gipalámíni mogona lo utó oko nelepezimó. Itó lá imóza, ámína gakokumú gele vevesonouhe loko vegená makotoka loká oketamumóma neve. ¹⁷ Itó aposolo goí iki lilí iki minamoláa keza ámína gakó lamaná nene hee liki li nimitave loko Zelusale numutoka ítemumóma neve. Ángosá ugopa, litá oko Alapia mikasigú mikasi gomopalaló voko minuke atiginá oko Tamasiko numutoka vo anitumó.

¹⁸ * Neneloka nougo, kilisimasi losive makole oko vokago, Pitani ángatove loko Zelusalega itekugo, holisi lositá makó minusimó. ¹⁹ Neneló nousike, aposolo lugáa makó ángamumó. Guivahanímíni agunala Zemusinigó ángumó, áisi monó gizapa ve napa minamó nenazo. ²⁰ Itó gakó imane luhuva nogizumó nene soza gakó nomive. Ómasímíni agovisaló lamaná noluke luhuva nogizuve. ²¹ Lá okuke nene, Silia mikasigú itó Silisia mikasigú nene voko minumó. ²² Itó Zutaia mikasigú Kilistoni vegenala zuhate není nogokaló ángamamó. ²³ Keza vegená lugáate nenikumú gakó makó likago láa liki gelemó: Gopoguni mololetake lepeleko limiseleko monó ale golesa itive loko ví vémo goha ale viligoake vegená nene monó lo nokimive. ²⁴ Láa liake, nenikumú Ómasi agepoka liki miniaká amó.

2

Aposolote Pauloni hozamú gelego lamaná imó

* 1:13: Apo 8:3, 22:4-5, 26:9-11 * 1:14: Apo 22:3 * 1:16: Apo 9:3-6, 22:6-10, 26:13-18 * 1:18: Apo 9:26-30

¹ * Lá okago, kilisimasi 14 oko vokago, Panapasiki Zelusalega goha atiginá oko itekusike, Taetasini nene ale gímizekusike makó itunimó. ² Nene hanuva lá amumó. Ómasímo gakó lo utó oko lo nimitó nene itumó. Itumó nene Zuta veená minamamoláa Izesuni gakó lamaná lo utó oko lo kemeaká noumó nene monokú kugulizaki ve kezagó alegesá iki niago avetó oko lo kumumó. Neni hozamó géneka likikoma hoza goí oko aleko minumoki itó hoza itína aleko nominumoki nene hanuvamú alumó gelekative loko lá umóma neve. ³ Lá okugo, ve lugáahe itó nezagi minusi ve Taetasí ahe eza nene Kiliki ve nenazo, nenemú Zuta ve loló itive loko agupeló nene Ómasímini anosa molotatune liki li hukitatahe loko nougo lamamóza, ⁴ emane amunaloka ve lugáa nene soza sazalo monó ve iki holutegú asugunatoka anitemó. Keza Izesu Kilistotoka voko apizeko minunike netá makolímíni nagakú minamuhá nenémíni mogona ánígatune liki Mosé lo hukoko li gakolímíni gelekelé ve lelémo molatune liki ániigi loló itune liki halá giki amó. ⁵ Nene vete lelí ale limitune liki likago, leza Izesuni gakó lamaná nenémo lekelitoka ale gilitoko alitive loko Taetasini agupeló anosa milatave liki likago keké gele kememuháma neve. ⁶ Lá okago, vegeanalite gelego monó kugulizaki ve minamó nenete lelí gapo hizi lí inígi némini manámíni inítamamóma neve. Itó keikumú gulugo haitolímíni iki minamamó neve. Ómasímo ámináminoko lugupeló ániagamó nene itetiigi lemetiigi osá amive. Zelusale numutoka itu zupahé nene ámina monó gizapaló vete haitó gakó makó lo utó oko lo kimitane liki miní amiki li nememamó. ⁷ Keza láa liki li nememake láa likigó gelemó: Ómasímo Pitani nene Zuta vegeinatoka Izesuni gakó lamaná lo utó oko lo kimitane loko lonetamó. Ámináminí oko není nene hetoka vegeinatoka gakó lamaná lo utó oko lo kimitane loko lonetamó neve liki gelemó. ⁸ Pitá nene Zuta vetini aposolo loló imó áminagó oko neza nene Ómasímini zámuzaló hetoka vegeanalitini aposolo loló umó. ⁹ Lá okago, Zemusiki Pitaki Zoniki monokú kugulizaki ve niahe liki gele ve nenete nenikumú nene Ómasímo apazá hoza lehizemikave liki gelemó. Giliake, ligiveteve liake, Panapasiki ligizakú alemó. Lá iake, lekeza hetoka vegeinatoka monó hoza nalisiko, lezate Zuta vegeinatoka naluko, oko minatune liki li hukamó. ¹⁰ Gohogó vegeaná limiki niamoláa nasahilí ikitatáive likigó li nememó. Itó ámina hoza amuza moloko alitohe loko gele minutó lave.

Atiokia numutoka Pauló Pitani gahá ami gakó

¹¹ Itó Pitá eza Atiokia numutoka okago, aitokatí netá golesa utó onoiigo, ániogokuke, aí agómulaló pelevesava zeko gakó lo amumó. ¹² Nenémíni mogonáa lá oko neve: Goí oko nene hetoka ve monó gele ve makó Zemusí kimiselekago ake Pitagegi makó minake nosáneta nene hámakokutí ninago, alika nene Zuta ve makó ikago, ániogoake, hetoka vegi kugupeló Ómasímini anosa minatave liki amuza miliaká a vema nianazo loko keikumú alegesá legekago hetoka ve nene ahulo hotó okimiake, kezagi makó minoko nosáneta namimó. ¹³ Lá oake, voko aleko oko aleko noigo, Zuta ve monokú agívelage ámináminiki genezáini losigi vegeanalitini suni aleke Pitani alími vatí ago, Panapasí eza keitoka miní ameko keí suni alimó. ¹⁴ Lá iki minake, Izesuni gakó lamanalímíni gapogú hee liki vamago nene ániogokuke, vegená lugáatani kovogisaló nene Pitani láa loko lo amumó: Geza nene Zuta ve noanímóza, Zuta ve lelí avotege li huka gakó nene ahulokanike hetoka vete iki miliki iaká niakú nene novane. Nenemú hetoka ve keza Zuta ve lelí oko molokogú vitave loko nolanimó nene etamive, loko lo amumó.

Zuta vegi hetoka vegi gili alévolé akumulé lokogó kugutó vízeaká noive

¹⁵ Leza nene hetoka ve gopa napa miniaká nia vegenakutí utó amune. Zuta ve gihila utó unimóza, ¹⁶ * láa loko geleaká nune: Mosé lo hukoko li gakó emane gele alekinake hozava ale-loko voko mininake lihimate asú olimiakaláa nomive. Izesu Kilistonimú gele alévolé okukogó lihimate asú olimikiko minanogo une. Láa loko gelekunike, lo hukoko li gakolímíni hozava aleko nominukopa, lihimate asú olimikiko minatune loko Izesu Kilistonimú mota gele alévolé okune. ¹⁷ Kilistotoka voko gímizekoko lihimate asú itive loko nouháza, lá oloko novinake hetoka vegeatana oko golesa netá aleaká vegeaná loló noukoma nenemú nanave loko litune. Kilistó golesa netá alilo loko lelémo vatí oaká noihe. Óe, lá oko nomive, keké. ¹⁸ Lihimate asú itive loko Mosé li gakotó amegesaló mololoko vituni suni mota gale zunimó nene goha apatitunimó nene, lamaná lo hukoko li gakó pelevesava zeaká nounimó nenémíni mogonáa utó inogó ive. ¹⁹ Mosé lo huka gakó nenémo áminama gele alekinake alévolé nemetameni alito gapo hize lí oake nemeni apele hilimó gelekamóza, Ómasímule loko minatove loko otekumó neve. Itó Kilistoni apili nihelego nezagi zohota zaló nipili hilikamó gelekamóza, ²⁰ itínasa minoko aleko noumó nene, nezánegó minamuve. Kilistó

* 2:1: Apo 11:30, 15:2 * 2:16: Age 143:2; Lom 3:20-22

eza mulúnegú minoko aleko noigo, nugupetunú minoko aleko noumó nene Ómasímíni gipalamú gele alévolé onouke minoko oaká nouve. Eza nene agika nenitoka moloake minoko aleko imoláa nene nenikumule loko ahulamó neve. ²¹ Lo hukoko li gako emane gele alekoko lihimate asú olimikago minoaká imó nelina nene, Kilistó nene hanuvamú hilimó loló ilinamó nenazo, Izesú nohilike Ómasímíni nasahilí lehizeletamó nene ale gopa oko ahulosá amuve.

3

Lo hukoko li gako gele alesá nehe Izesukumú gele alévolé osá neve

¹ Kee, Galesia vejená negi nagi neneta, lekeza nene éahoma lekelémo gopa napa ive. Izesu Kilistoni nene zohota zaló hili mogonáa lo lekemeko nolekelepizuko, lokogómulatunú ániagi akutiki ániagamóma neve. ² Netá hamokumú loká oleketatoze, giliki li nimilo. Lekeza Ómasímíni Sikalahú alemó nene, nana iake alemóma neve. Mosé lo hukoko li gako má gili aliake alemó nehe, itó Izesukumú gili alévolé iake alemó neve. ³ Nanamú negi nagi hiziki niave. Sikalahulímíni gapogú apí iki li-liki nivakutí nene ali viligiki litaha mogona ali miniki alévolé apakú anititune liki nigelehe, olile. ⁴ Monó lekelitó minamómave liki gopoguni mililikimikago, golivagi netá nene hanuvamú lukumupiló itimó nehe. Óe, lá oko nomive. ⁵ Ómasi eza Sikalahú lehizelikimiká itó alévolé suni lekelitoka ale utó oká noimó nene, Mosé lo hukoko li gako má gili alikago lehizelikimiaká noihe, itó Izesuni gako lamaná gili alévolé ikago lehizelikimiaká noihe.

⁶ * Monó gotolaú Avalahani mogonamú luhuva láa liki gizinamóma neve: Eza Ómasimú gele alévolé okago, nenemule loko lihimavaka asú ogimikave loko lotamó. ⁷ * Nenemú láa liki gililo: Gili alévolé iaká niamoláa keza nene Avalahani agapilamó zuha gihila niave. ⁸ * Zuta vejená minamamoláa keza Ómasimú gili alévolé ikiko nene, lihimáini ahuloke-tatikumú gozapá geleake, monó gotolaú Ómasimo gako lamaná Avalahani lo amimó nene láa liki luhuva gizinamóma neve: Geí lusa nenémo hetoka vejená mukitoka vo ale asú inogo ive. ⁹ Nenemú Avalahá gele alévolé oake lisoko vi gapoló lisiki vitamoláa keza aí lusagú vi hilanigave. ¹⁰ * Itó Mosé lo hukoko li gako má leheta iake ámegé ámegé iaká nia vejená keza lolímíni mututoni lílí inigave. Nenemú monó gotolaú láa liki luhuva gizinamóma neve: Mosé lo hukoko li gako má hize letoko gizoloko vonoi gako mukitó gili alemítamó nenete usilímíni mututoni minanigave. ¹¹ * Nenemú monó gotolaú gako mákó lá oko neve: Gili alévolé iakeve liki Ómasímíni agovisalo lihimáini asú okimikago minatamó nenete alévolé iki miniki aliki inigave liki luhuva gizinamó nenazo, Mosé lo hukoko li gako gele alekinake Ómasiloka lihima nomitímó minoakaláa nomive. Nenémíni mogonáa mota utó okave. ¹² * Itó lo hukoko li gako gele alekinake alévolé ituni mogona haitolímíni neve. Gele aleloko vova oko alévolé itunimoláa neve. Nenemú monó gotolaú láa loko luhuva gizonimóma neve: Lo hukoko li gako límíni hozaváa aliliki viva viva iki ali asú ita vejená alévolé iki minanigave loko neve. ¹³ * Itó monó gotolaú nene vejená zaló nagá ziki saína iki apatemó keza lolímíni mututoni niave liki luhuva gizinamóma neve. Itó Kilistoni ámina iki zaló saína iki apatikago, lelikumule loko usí alimó. Aleake, Mosé lo hukoko li gako límíni nagakutí guluhuletamó. ¹⁴ Lá imó nene Izesu Kilistó hoza alikumule loko Avalahatokatí lusámo numutó namató vejenatoka puu loko vo asú itive loko lá oletamó. Itó lá okiko Sikalahú lehizeletatove loko lo mololetamó nene Ómasimú gele alévolé okinake alinogo une.

Mosé lo hukoko li gakoki Ómasimo lehizeletatove loko lo mololeta gakoki

¹⁵ Nigivénegita, neza hanuva gilina netá makotó lo moloko litoze, gililo. Ve makó nenetosa keza netá matá makokumú li múnahiki luhuva gizatáimó nene, makolímó senisimoká itó velé amupiló gako mákó miní ameko loká oko luhuva gizatimoláa nomive. ¹⁶ * Itó Ómasimo nene Avalahani itó agapilamola lehizeletatove loko lo moloketoko limó nene, agapilamó zuha mukikumú lamimóma neve. Hamó Kilistokumú limóma neve. ¹⁷ * Mogona lá okomú noluve: Ómasimo gozapá monó helisa henoni lehizeletatove loko lo mololetake limó. Lá okago, kilisimasi 430 oko vokago, Mosé lo hukoko li gako nene alika utó imó. Itó ámina lo hukoko li gako nenémo Ómasimo lo molota gako avutá apeleminogo ive. ¹⁸ * Monolímíni lusa henoni nene lo hukoko li gako gele aleakakú nelina nene, Ómasimo gako lo mololetoko

* 3:6: Apí 15:6; Lom 4:3 * 3:7: Lom 4:16 * 3:8: Apí 12:3 * 3:10: Gapo 27:26 * 3:11: Hip 2:4 * 3:12: Liv 18:5 * 3:13: Gapo 21:23 * 3:16: Apí 12:7 * 3:17: Gá 12:40 * 3:18: Lom 4:14

likutí alemutiline. Lá onoimóza, nene ma nomive. Ómasímo monolímini helisa henoni nene lo molotake lonoikeve loko Avalahani hagitana lehizetamóma neve.

¹⁹ Lá onoimó nenazo, lo hukoko li gakóma nene nana netakumú neve. Pelevesava zekoko netá golesa aleaká nenémini mogona lo utó itove loko Ómasímo miní ameko molamóma neve. Itó minoloko vova vova oko noiko nene, lehizegetatove loko lo molota ve Avalahani agávolaho Izesú utó okiko asú itive loko lonoimóma neve. Itó lo hukoko li gakóma nene ageló makolíte limikí holutegú mina ve Moseni agizakú milikago limimó. ²⁰ Lá onoimóza, ve makolímo holutó ve minatimó nene, ve hamokumú minaminogo ive. Vegená mukikumú minanogo ive. Lá onoimóza, Ómasi áisi ve hamokó noinazo, eza Avalahani nene netá makó lehizegetatove loko agómulaló lo molotamó nene holúikú minati ve makokumú vitagá amike ezágó lotamó.

Mosé lo hukoko li gakó utó itímini mogonáa

²¹ Itó Mosé lo hukoko li gakó nenémo Ómasímo lehizeletatove loko lo mololeta gakó lovaga lo ameaká noihe. Lá oko nomive. Mosé lo hukoko li gakó nenémo alévolé lemetameni ale utó oakaláa nelina nene, lamaná lo hukoko li gakokutí lihimate asú olimikago minoaká gapováa utó iline. ²² Lá onoimóza, vegená mukitoka golesa netalímini nagakú nounimó nenémini mogonáa monó gotolaú li utó iki milinamóma neve. Lá okago, nenemú nene Izesu Kilistokumú gele alévolé okuko lehizeletatove loko lo mololeta netalímini gihila alitunimoláa oko neve.

²³ Zuta ve leza gozapá nene gele alévolé oaká gapo utó amigo, Mosé lo hukoko li gakó nenémo nagá lemekago, nagakú minoloko novuko, gele alévolé oakalímini gakó utó o lamaná imó. ²⁴ Itó Mosé lo hukoko li gakó nenémo lelémo vevesoaká gapo loló oko gizapa oletoloko vitó nouko, Kilistotoka lelémo molokago nene Izesunimú gele alévolé okunike lihimate asú olimikiko minanogo une. ²⁵ Lélisi nene gele alévolé oaká gapováa utó okago, neneló ámegetoko novuko, ámina lo hukoko li gakolímini gizapavaló minamune. ²⁶ Itó lekeza mukitó nene Izesu Kilistokumú gili alévolé atímo itínasa Ómasímini vegenala zuha lilí iki niave. ²⁷ Monó nagamí hiliake, Kilistotoka miní amiake, mukitoka Kilistoni ametameni ali luhikave. ²⁸ Nenemú Zuta vegená niamó itó hetoka vegená niamó, megusa lilí iki muhelé ahelé iki minamó itó hanuva miniaká niamó, ve niamó vená niamó haitopaitó miniaká amó nene ha netá loló okago, lekeza mukitoka Izesu Kilistotoka viki gímiziake mulusi hamó lilí iki niave. ²⁹ * Lekeza Kilistoni mututoni lilí inamó nenazo, nenemú Avalahani agapilamó zuha gihila lilí iki niake, Avalahani helisa henoni Ómasímo lehizetatove loko lo molotamó nene mukitó lekelí netá loló inogo ive.

4

¹ Nenémini mogona makó láa loko litoze, gililo. Izegipa namuni eza amelaho helekiko minoloko iteko helisa henoni ale lá itimóza, izegipa noinazo gopa nene megusa izegipa ametamenigi loló oko minanogo ive. ² Lá noiko, uvolagehe amelagehe keza helisa netaláa gizapa itiki minanigave. Gizapa itiki niko eza napa okoko amelaho mola gamena nene alitokiko, helisa henoni nene ale alinogo ive. ³ Ámináminoko leza gozapá monokú olopa vegetana oko minamunike, mikasímini amupiló ha netá mogonamú li huka gakolímini gelekelela otoko minuháma neve. ⁴ Lá okago, alika nene gamena molamó nene alitokago, Ómasímo eza gipala amiselekago, vená makolímo getokago, utó imó. Utó oake, eza Mosé lo hukoko li gakolímini gelekelé oko minamó. ⁵ * Leza nene lo hukoko li gakolímini nagakutí gologí olimikiko Ómasímo lelémo lá itive loko Ómasímini gipala utó imó neve. ⁶ Itó lekeza Ómasímini izegipala lilí iki niamómave loko Ómasímo gipalámini Sikalahú nene mulutegú amiselekago, lemeko noigo, aí zámuzatunú ahóno aménegave loko sele loaká noune. ⁷ Nenemú geza megusa izegipa noakopa, Ómasímini izegipala noane. Itó aí izegipala minanikeve loko Ómasímini nasahililaló aí helisa netalímini amelaho ve loló oko minoaká noane.

Pauló Galesia vegenakumú miluma gilimó

⁸ Hetoka vegená lekeza gozapá Ómasimú gili guni amake soza saza ómai netalímini agihúna giki minake keí nagakú minake, gelekelé ikitiki minamó. ⁹ Itó itínasa lekeza Ómasimú vitagá iake alími utó ikave. Itó lá onoimóza, lamaná Ómasímo lekelikumú vitagá ike lekelémo utó okamó nenazo, ha netá pisila nomimó helisa nomi netá nene nanamú goha lokovogisa amiki gelekelé nitiki nilave. ¹⁰ Lá iki nimirake, Ómasímo giliko lamaná itihe liki Zuta vete haitopaitó gamena itó haitopaitó ikani itó haitopaitó kilisimasi mili etó amó nenémini holisi

* 3:29: Lom 4:13 * 4:5: Lom 8:15-17

miniaká niave. ¹¹ Lá niago hozane nenémo lekelitoka gihila zemithe loko gulugo gena niviseaká noive.

¹² Nigivénegita, neza voká loleketoko litoze. Neza lekelilímíni oko Mosé lo hukoko li gakolímíni nagakutí nelémo otopá zekago nouve. Lekeza neni suni aliki minalo. Lekelitoka minoloko novugo, lekeza netá golesa makó lilí inítamamóma neve. ¹³ Neza gozapá miluma netá gizalekuke, ganá apí oko Izesuni gakó lamaná lo lukumómoma neve. ¹⁴ Itó nugupegú keé lamigo, gena likivisegetigí imóza, neni gopa goselé lekepelemímoma neve, itó nu likizapa onamímoma neve. Lekeza áninímiaké alesa mili nememó nene, Ómasímíni agelé ahe itó Izesu Kilistonihe keikumú alesava mili kememó gilimó neve. ¹⁵ Kee, gamena nene zupa lokogolizagó ma viziki miniaká amóma nene itínasa hikuka vokave. Lekelí moganatini lamanakumú láa loko lo likimitoze, gililo. Lekeza lokogómula gologí itune likima, hanuva gologí iiki neni nilími vatí iki nímítune liki nelina, hanuva nemeline. ¹⁶ Itó itínasa gamena nene gakó gihiláa lo nolukumukumú nene gala velini loló okuhe, olile. ¹⁷ Ve lugáate amuza miliki lekegepoka liaká niamó nene netá lamanakumú nomive. Lilími ezega emega ikiko, lekeza golisi inimiiki keí kugulizáini ali otitave liki amuza miliaká niave. ¹⁸ Netá lamanakumule loko lekegepoka loaká nene netá gihila nemóza, lekelitoka voko minu zupahekó negopa, gamena gamena lá iaká niko lamaná inogo ive. ¹⁹ Izegipánemata, neza lekelikumú miluma sipisi goha noguluve. Venalite izegipa getanigi miluma giliaká niamómáminoko miluma sipisi noguluve. Kilistoni ametameni lekelitoka utó o lamaná itive loko lekelikumú gulugo gena niviseaká noive. ²⁰ Lekelikumú nagata gululusi geleuke lekelitoka litá oko voko lokovogisalo haitolímínoko gakó lo likimitove loko geleaká nouve.

Hegako Salako kei anoza gakó

²¹ Mosé lo hukoko li gakó nenémíni gelekelé otatune liki liaká niamó neneta, loká oleketaotoze, li nimilo: Lekeza lo hukoko li gakolímíni luhuva netaláa nagatamóza, mogona gili hee lisá amahe. ²² * Áminagú nene láa liki gizi milinamóma neve: Avalahá nene gípala lositá getamó. Makó nene gelekelé mohó megusa Hegá getamó, itó makó nene alími ame vená Salá getamó. ²³ Itó gelekelé mohó megusámo geta izegípa agulizá Isimaelé nene hanuva utó imó. Itó alími ame venalímó geta izegípa agulizá Isaká nene Ómasímó alika getatane loko Avalahani lo molota gakotó getamó. ²⁴ Itó nene gakolímíni agikagú anoza makó láa loko neve: Ámina vená losi keza lo múnahi gakó lositalitini avevezahaváa lilí asimó. Lo múnahi gakó makó nene Sinai agokaú utó imó nenémíni gizapaló nia vejená nenete lo hukoko li gakolímíni gelekeleléa miniaká niave. Nenémíni avevezahaváa nene gelekelé mohó megusámo Hegá eza loló imó. ²⁵ Itó Alapia mikasiuka Sinai agokamú Hegani agokave liki liaká niave. Itó Hegá eza Zelusale apá itína hanuva nemómámíni avevezahaváa noive. Zelusale apá nene Mosé lo hukoko li gakó ámegetoko minatunímó nene Ómasímíni agómúlaló hee loko minatune liki ámina gakolímíni megusáa lilí iki nia vejenalitiní gotó apá neve. ²⁶ Itó Zelusale apá okulumakuka nemó nenémo alími ame vená Salani avevezahaló neve. Neneló minikí aliki nia vejená nene nagá makokú minamave. Nenemú ámina apá nenémo izoteho loló onoive. ²⁷ * Nenemú monó gotoláú luhuva makó láa liki gizinamóma neve:

Vegi vená geza gagapílamó lagasó getokako

gohuna vená nenémo alika izegípala gululusi nene getatímó nenazo,

gohuna vená geza izegípa getamanike minoaká noanitika geza mulukagú lamaná gelezo.

Miluma gelemanitika géisi nene gogoliza vizeko gigisa zezo.

²⁸ Nigivénegita, leza Isakanímáminoko Ómasímó lo molelota gakotó utó unimó. ²⁹ * Hanuva utó i izegípa nenémo Sikalahulímíni gakotó utó i ve Isakani gopoguni molotake lovaga lo amimó. Ámina suni itínasa nene utó okago lo hukoko li gakokú ámegé ámegé iki hoza nale ve nenete leza Sikalahutokatí utó uni vejená gopoguni mililimiaká niave. ³⁰ * Lá onoimóza, monó gotoláú gakó nana oko neve. Gelekelé moholímíni gípala nenémo helisa henoni ale lá aminogo ive. Alími ame venalímíni gípalamó ezagó alítimó nenazo, gelekelé mohó megusagi gípalagi nene kímisele ahulokiko visino loko Ómasímó Avalahani lo amimó neve liki luhuva gizinamóma neve. ³¹ Nenemú nigivénegita, leza nene Mosé lo hukoko li gakolímíni nagakú minoko gelekelé mohó megusámíni agapílamó minamune. Izesukumú gele alévolé unikeve loko alími ame venalímíni agapílamó nouninazo, Ómasímíni helisa henoni ale lá inogo une.

* 4:22: Apí 16:15, 21:2 * 4:27: Isa 54:1 * 4:29: Apí 21:9 * 4:30: Apí 21:10

5

Nagakú goha ma minamituni gakó

¹ Nagá nomimó minatave loko Kilistó eza gologí oletamóma neve. Lá okanazo, nenemú vegená lugáa nenete Mosé lo huká gacolímíni nagakú goha lekelémo molokuko gelekelé ilitatave liki nilikoma géneka liki alévolé ilo. ² Neza Paulona lo likimitoze, gililo. Lekeza Ómasímo lugutó vizítive liki lukugupeló Ómasímíni anosa milatamó nene, Kilistoni nasahilí nene lekelitoka ha netá loló inogo ive. ³ Itó goha miní ameko lo lekeme lamaná itoze, gililo: Makó keza alévolé lemetameni alitune liki kugupeló Ómasímíni anosa milatamó nenete lo huká gakó lugáa monéna kumupiló itekiko ámina gakó nene ámegé ámegé iki hoza aliliki vinigave. ⁴ Lo huká gakó gele alinake lihimate asú olimikiko minatune nilamó lekelisi Kilistogegi apiziki múnahemó nene hukiake otopá zikago ai nasahilí nene ahulikave. ⁵ Itó lélisi nene Sikalahulímíni zámuzaló gele alévolé uhakumú lihimate asú olimikiko minatune loko nenémíni gelegele munoaká nounce. ⁶ Izesu Kilistotoka voko gímizitunimó nene Ómasímíni anosagi lugupeló minoaká itó Ómasímíni anosa nomimó minoaká ale nupa napa okoko monéna gihiláa nomimó hutuváave loko litune. Izesukumú gele alévolé oaká netalímo ligikagú minokiko ligika ligivetegini kimitunimó nenemukó gihilave linogo une. ⁷ Lekeza monolímíni gapogú vatí iki ololu liki nivago ve makolímíni nene ogo gapo hize lí olíkími kago gakó gihiláa lekemegeza amiake gili alisá amave. ⁸ Sele lo likimí ve nenémo gala vizeko lá ilo loko loleketosá amive. ^{9*} Izámíni ekesaláa lagasó makó nenémo nosá netakú vo alekiko mukí ekesá o asú itimó neve. ¹⁰ Itó lekeza neni nigikagukó vitave loko gulugo gena amígo lo nolukumuve. Guivahaniló voko gímizitunimove loko Ómasímíni anosa lukugupeló netikumú neza nogulutímínoko lekeza gilitamó nene vo mili sigítive loko noguluve. Itó lekelémo gopa oaká noi ve nene Ómasímo goní otanogo ive. ¹¹ Nigivénegita, neza vegenalítini kugupeló Ómasímíni anosagi minamitimó nene Ómasímo kugutó vizemítive loko lainim-oleketumó nelina, gopogu galatakalatá nene initalaline. Ómasímíni anosa kugupeló minatave loko lo kemekogó minulina nene, Izesú zohota zaló hilimó nenémíni gakó lo nokumukumú mu kagata oaká noimó nene asú iline. ¹² Likilímíni gopa iaká nia ve kezámíni kugupeló Ómasímíni anosagó negopa, kugupenini zivi hutivi i asú itanazo.

¹³ Nigivénegita, nagakú ma minamitave loko Ómasímo sele lo likimimóma neve. Itó nagakú minamave liki lukugupémo amu heleaká noi netalímíni gelekelelása minamilo. Likigika kímíiki eza nasahilí otiko eza nasahilí otiko iki minalo. ^{14*} Mosé lo hukoko li gakó ale nupa oko gotola lá oko neve: Gezakamú geleaká noanímó nenémínoko gígívekinimú geleko gígika kemezo. ¹⁵ Lekeza lá amiki izámíni suni aliki eza akohú apíliko eza akohú apíliko iiki latila ikatave loko lakagata naluve.

Litaha ligikámíni gihiláa itó Sikalahulímíni gihiláa

¹⁶ Itó nenémíni itave loko noluve. Lekeza Sikalahulímíni lititoka lititoka iki miliki ilo. Lá iiki litaha likigikámo amu heleaká noi netalímíni hozaváa alemilo. ^{17*} Litaha ligikámíni lagavámo Sikalahú nene lovaga lo ameká noive. Itó Sikalahulímíni lagavámo litaha ligika nene lovaga lo ameká noive. Lá okago, kéisi nene lova sava ikasigo, lekeza netá matá oko moloko itune liki amó nene vávani iki isá amave. ¹⁸ Itó Sikalahulímíni lekelémo lolo ikoma Mosé lo huká gacolímíni agulizaki loló o leketaminogo ive. ¹⁹ Litaha ligikámíni hozaváa nene, asuguná netá negopa, utó oaká noive. Lá oko utó oaká noive: Mokoló netá, golutuva netá, lugupémíni avoza heleaká netá, ²⁰ itó soza ómai netá agepoka loaká, gipe lakegusani, mukahá kepeleaká, lovasava, kemekugú noaká, gulu guluga loaká, lova leta lava leta, kizapaló molooká, lugulizaki ve loló itune liki kezámíni gelego itekago amuza miliaká, itó miní ezega emega iki otopá ziki miniaká, ²¹ lelí itive loko molo hukoaká, itó piá nagamító minoaká, itó nosánetá goliiva gilikilí iki niaká, itó netá lugáa nenémínáa aliaká niamó nene ámina netá matakumú gozapá lo lekemenoumóma neve. Itó imane goha lakagata aleko lo nolukumuve. Ámina golesa netá alitamoláa nenete Ómasímíni avogisalo ví hilaminigave. ²² Itó Sikalahulímíni gihiláa nene lá oko utó oaká noive: Nasahilí oketoko ligika kemeaká, mulutegú agila guluma oaká, hulu oko legesó oko minoaká, kelémo lamaná oaká, ligika lamanaki minoaká, hozagú alévolé oaká, ²³ lemeko zou loko minoaká, itó lizapaló molooká nene, netá nenémínáa pelevesava zekoko gapo lotokogi nomive. ²⁴ Itó Izesu Kilistoni vegenala zuha leza litaha ligikámo amu heleaká netá, itó golesa netakumú mumuzó oaká netá nene apele helekuko haha onoimóma neve. ²⁵ Sikalahulímíni zámuzaló minoko aleko nouninazo, nenemú Sikalahulímíni gapogukó liso liso vitune. ²⁶ Lugupémo

* 5:9: 1 Koli 5:6 * 5:14: Liv 19:18 * 5:17: Lom 7:15-23

itekoko eza ahelú okiko eza ahelú okiko nouko mulúikú golesa gililitata netá alemitune. Itó eza amiko eza amiko kemekugú namitune.

6

Genavagi netató eza hize lé otiko eza hize lé otiko itune

¹ Nigivénegita, lekelikutí makolímo monokú migelelé onoko lihimá ale utó molokíkoma, lekeza Sikalahukí minamó neneta mulutikú hulu o minoko alími hehe lalo. Lá níiki lekezatini gimilikú mlatakumú limiki akikataze, gizapa ilo. ² Gena lekepeleaká noi netá nene eza hize lé omíkiko eza hize lé omíkiko iki miniki Kílistó lo huka gakó nene vatí iki gili alilo. ³ Vegená makó kugulizáini nomiti vegenalite kezáikumú giliko itímó nenete kezáini kígikaváini agoka vizíkiko lá inogo ive. ⁴⁻⁵ Nenemú lekeza etó etó iki mogonataganatini ániigi vevesalo. Monokú keé lamoko gopa aleaká nouni netalímíni genaváa mota gona molokago leza mukító ámina netalímíni amelahove etó etó oko loló onounímó nenazo, lekelí hozámíni mogonamú etó etó iki vitagá iki ali utó ilo. Lá ikiko lokogoliza vizeaká gakó utó itímó nene, ve makolímini mogonamú negopa, lekezatini iki miliki itamó nenémó ale utó inogo ive.

⁶ Monó giliaká nia vegená lekeza monó lainim-ilikimiaká nia vegená nene netá matá gona miliki kimilo.

⁷ Lekezatini líkígikatiní agoka vizemilo. Ómasi agoka vizeakaláa nomive. Ve makó keza hoza alitamó nene miníki ámina netalímíni gihiláagó alinígave. ⁸ Makó keza litaha kígikatanú hozaváa alitamó keza miníki litaha kígikámíni gihiláa latíla nene ali utó inígave. Itó makó keza Sikalahulímíni hozava alitamó keza miníki Sikalahulímíni gihiláa alévolé kemetamení nene alinígave. ⁹ Netá lamanakumú nene goselekaselé aminake amuza moloko oko moloko itunize. Voko akamitunímó nene Ómasímó mola gamenaló minumuni ale utó inogo une. ¹⁰ Lá onoinazo, nenemú gamenavate noiko vegená mukítoka nasahílí oketatune. Lá noinake monokú lígive lagave nene netá aleko iteko nenémíni oketatune.

Kagata alike gekéini loketamó

¹¹ Itínasa nene luhuva gizoaká nogosani nene luhuva gizoaká véminí agizakutí aleko luhuva napámíni imane nezáne nigizanitunú nogizumó nene ániigalo. ¹² Vegená lugáa keza kugupéinímó monó kemetamení okago lekezatini lukugupeloka Ómasímíni anosa minative líki amuza golesa miliaká niave. Keza Kílistó zohota zaló hili gakolímogó lugutó vizítive loko lo utó oko lo kimitunímó nene gopoguni mililitatahe líki gelego gena okago, nenémíni iaká niave. ¹³ Kugupeló Ómasímíni anosa milíkímiagó nia vegená keza Mosé lo hukoko lí gakó lugáa gíli alemake lekezagí anosagi miníiki keitoka miní amíkiko kezáini kugupenini aliki itínigí giliaká niave. ¹⁴ Nénisi nene nemupe manamupe nugupe aleko iteko lamuve. Guivahanite Izesu Kílistó zohota zaló hilimómámíni gakó nene hámakokumú sigaga lomiaká nouve. Izesú zohota zaló hilikumule loko mikasiuka netá matá hulupa loko anuva oaká netató hulumó gelekago goha gala vizemítive. Itó ámina oko monó gelema vegenalite nenikumú gilíkago mota helenoumó gelekave. ¹⁵ Lugupeló Ómasímíni anosagi minoaká nenehe itó minamoaká nenehe nenémó gihila nomive. Gosohá lemetamení minoaká netá hámakó gihiláa neve. ¹⁶ Ámina lakanígú miníki aliki iaká niamoláa lekelítoka Ómasílokátí hulu itó agika lamaná lehizeleketatímó mino-loko iteko minatímó nene Ómasímíni vegená mukítoka minino.

¹⁷ Láa loko lo nahuluve: Gopoguni milínitake nipilikago nuhú imane nego neza Izesuni megusava noumó nenémíni mogonáa utó oaká noimó nenazo, gakó imane lo nolukumumó nenémíni velé amupíló ve makolímo silípa hoza goha nememino.

¹⁸ Nigivénegita, Guivahanite Izesu Kílistotokatí nasahílílímó líkígikagú mino-loko voko minino. Lamaná.

Epeso Vegenalitini Luhuva Pauló Gizo Kimimó

Epeso vegená nónhá kimike gizo kimi gakó

¹* Neza Paulona Ómasímini gakotó Izesu Kilistoni aposolo loló utímina Epeso numutoka monó gele vegená Izesu Kilistoni monokú alévolé iki miniaká nia vegená lekeza luhuva netá imane gizo nolukumuve. ² Ameteho Ómasi itó Guivahanite Izesu Kilistó aitokatí nasahilí itó hulu lekelitoka mino moloko minatize.

Kilistotoka gímizunimómave loko monó lusa haitopaitolímíni lehizeletamó

³ Guivahanite Izesu Kilistoni amelaho Ómasi áisi nene nónhá zeletake okulumakutí monó lusa haitopaitolímíni Kilistotoka voko gímizunimómave loko lehizeletamó. Lehizelínikumú geké lotatunize. ⁴ Áisi nene gozapá ká eláa mikasímini guhaiváa utó onamigo ezáa avogisaló apazá etó iki keké vizikigó minatave loko Kilistotoka miní amitave loko lelémó etó imó. Lá ike, agika limike, ⁵ ganatilisi gelekago minakumule loko Izesu Kilistoni nasahilí oletake kelémó lá okugo aí izegipala minatave loko lo hutamó. ⁶ Eza gipala gihila áisi lapanalagi nasahililagímo hagitana oko lehizeletamó. Nenemú geké lotoko minatune. ⁷* Izesú eza golanivatunú meinavate hizelimiake gologí oletake golesa netate gilatoletamó. Nenémíni nasahililáa lelitoka ohunagí minokave. ⁸ Nene avevezahaló ohunagú ligikagú luhuvagi itó geleaká gihiláa napa oko leke vizeletamó. ⁹ Lá ike ezáa agikatanú gele minamómámíni asuguná gakó ganatilisi geleake láa loko lo hukoletake ale vesamá okave: ¹⁰ Eza gamenamú giligo minamó nene alitokiko Kilistó nene netá matá mukí okulumakú neha itó mikasiuka neha ale nupa napa nenémíni gotoláa loló itive loko lo molamó.

¹¹ Itó netá matá mukí nene Ómasímo ezáa agikatanú gilike lo hukató aleaká noi ve áisi gozapá ganá agata gilike lo hukoletató monó helisa henoní ali alitave loko lelémó etó imó. ¹² Nenemú ganá apí oko Kilistokumú lagata losi gelemoko ageva oaká uni vegená leza Ómasímini lapaná ale oteko minatune. ¹³ Itó lekeza ámina iki gakó gihiláa lukugutó vizi gakó lamaná nene giliake, Kilistokumú gili alévolé ikago, lo mololetató nene Sikalahú ganatilisi lehizelikimikago Ómasímini anosagi lilí inamóma neve. ¹⁴ Okulumakú Ómasímini monó helisa henoní ali lá itave loko gozapá lo huko mololetamómámíni zazaváa nene Sikalahú lehizeletamó. Itó aí vegenala zuha lelí meina hizelimiaká hozaváa apí imó nene aleloko voko ale lutiginogo ive. Nenémíni mogonáa gele vevesatune loko Sikalahulímíni anosagi nominune. Nenemú Ómasímini lapaná ale oteko minatune.

Epeso vegenakumú Ómasiloka límó

¹⁵ Nenemú lekeza Guivahani Izesukumú gili alévolé iake monó vegená likigivetikíni likigika kimiaká niamómámíni gakola gelekukeve loko, ¹⁶ lekelikumú Ómasi agepoka loaká noumú nene ahulosa amuve. Lekelikumú láa loko Ómasiloka loaká nouve: ¹⁷ Guivahanite Izesu Kilistoni amelaho lapanalímíni amelaho Ómasi áisi nene Sikalahú lehizeleketoko likigika alémo vávani okoko Guivahanímíni mogonáa lo lekemekiko gili guni iki netá mogonamú gili vevesiki gilitaze. ¹⁸ Lá niiki likigika lakagata ale koló okiko, Guivahanímo lekelémó otopá zimómave loko okulumakú gonanalísímú lakagata losi gelemiki ageva iaká nia netakumú gilitave. Itó vegenala zuha lekeza monó helisa henoní asaivagi ali lá itakumú gilitave. ¹⁹ Itó leza gele alévolé uhatoka amuza sipisi alévolé helisatanú hoza aleaká noimó nenémíni napavamú gilitave loko Ómasiloka loaká nouve. ²⁰* Ámina alévolé zámuza sipisitunú nene Kilistó hilikutí mómoká oko alémo oteake okulumakú agizani lamagaloka alémo molokago, ²¹ kiapege itó gamani itó ve napa itó amuza ve iti minamó haitopaitolímíni keí ve uvóipo ahulokimikago mina vegenalitini kugulizá nene lemeko noigo, aí agulizaláa mino veletó oko neve. Itó itinasagó nomive. Alike utó iti gamenaló iteko minanogo ive. ²²* Itó Ómasímo netá matá mukí nene Izesuni heumauka mulisi moloketake ámina netalímíni gotóini loló itive loko hize otemiake vegenala zuha lelitoka alémo molamó. ²³ Itó monó guluni vegená leza Izesuni agupe makó loló okoko lelitoka gizapa noletago, netá matá mukilímíni agikagú mino vaí oko noi vémini agikagú minoko aleko oaká noune.

2

Lemeni heleneikutí lelémó mómoká imó

* 1:1: Apo 18:19-21, 19:1 * 1:7: Kolo 1:14 * 1:20: Age 110:1 * 1:22: Age 8:6; Kolo 1:18

¹ * Lekeza gozapá nene hokolizá pakalizá iki lihimatinigi minikagove liki lekemeni hele vimó minamole. ² Nene gamenaló nene lekeza mikasímíni gapo golesagú nivake, vogalaló zámuzagi netá matalímíni gizapa ve golesaló gímiziake ámegetiaká amó. Aí ametamenímó itína gamena nene Ómasímíni gakola pevevesava ziaká a vegeatoka hoza aleaká noive. ³ Leza gozapá kezagitana oko minunike, litaha ligikámíni lagaváa ámegetoko loló oko lugupémíni itó geleakalímíni gakoláa gele alekunike, vegeá lugáa minamó nenémínoko Ómasímíni mesahaváámíni mututóni loló unimó. ⁴ Lá oko minuháza, Ómasi áisi nasahílila mukí minokagove loko nasahílí sipisi oletake agika limimó. ⁵ Lihimategi minunitímó lemeni heleloko vimó nominuko, Kilistogegi lelémó mómoká okago, otunimó. Gilinahe. Ómasímíni nasahílatunú lugutó vizimó. ⁶ Itó Izesu Kilistotoka lelémó gímizekago ligikáa lemeníatunú áisigi mota okulumakú minoko aleko oaká nounimó gelekave. ⁷ Nene alika gamenaló utó omo omo ití gamenaló nene agika hize limike Izesu Kilistóni nasahílila ohunagi limimó nene ale vesamá oletanogo lá imó neve. ⁸ Gilinahe. Eza lugutó vizimó nene aí nasahílitunú neve, itó Izesunimú gele alévolé unimómave loko neve. Nene lelí amuzatunú nomive. Ómasímó hagítana lehizeletamó. ⁹ Nana hoza ale minuko nenémíni oletamó neve. Nene ma nomive. Nenemú lugupe aleko iteakaláa nomive. ¹⁰ Leza Ómasímíni agizani luhuva nouko, ezáa Izesu Kilistotoka miní amunikeve loko mogona lamaná lílí itave loko lelémó utó molamó. Itó neneló lisi lisi iki vitave loko gozapá ámina gapo veleetamóma neve.

Kilistotoka miní amunikumule loko lelémó hamó onoimó

¹¹ Lekeza gozapá hetoka vegeá minamó. Itó Zuta vegeá keza kugupéitó Ómasímíni anosagi minamó nenete lekelikumú aliki mumusopa ziki anosagi nomí vegeá niave líki liaká amóza, ha kugupémíni anosamú linamóma neve. ¹² Nene gamenaló lekeza Kilistogegi apiziki minamake otópá ziki minamó neve. Itó Isilae vegeá lelí mulusigú minamake, lekeza hanuva gutá minamó neve. Itó Isilae vegeá kelémó molokago keza lo múnahi gakó lo moloketamó nene ali minikago, lekeza amegesaloka minamó. Imane mikasiuka nene netá gihílamú ageva gemake Ómasígi minamomóza, ¹³ nene gamenaló lekeza hotoka gihísigú minakutí itína gamena nene Izesutoka miní ameke Kilistóni golanímó geisa mikú lekelémó molokago imi anítiki niave. ¹⁴ Ezáa nene nonagá itave loko lelémó apizeaká ve noive. Itó leza Zuta vegeñaki lekeza hetoka vegeñaki holutegú logoka hotopotó okago minuhalímíni geisa nene aleko tele vizeake lelémó hamokú molamó neve. ¹⁵ * Itó Mosé lo hukolo lígakolímíni agikagú nene alilo alemilo líki haitopaitó gakó linamó nene ezáa agupe ahulake mukitó ipá oko ale ahulokamóma neve. Lá oake, Zuta vegeñaki hetoka vegeñaki mulusi lositá lelí holutegú minoko aitoka gímizunimómave loko ezáa lelémó gosohá vegeñá hamokó loló oake minake nonagá ale utó imó. ¹⁶ * Eza zohota zaló nohilike, vegeñá mulusi lositá lelí lovasava oko minunimó nene apele heleake, Ómasígi lelémó mukipa imó. ¹⁷ * Lá oake, gihísigú minamó hetoka vegeñá lekeza itó geisa mikú minunimó Zuta vegeñá leza mukitoka hulúmíni gakó lo lemekago gelekune. ¹⁸ Lá oake, gapo velelimikago, leza Zuta vegeñaki itó lekeza hetoka vegeñaki Sikalahú hámakolímó gapo velelimikago, ametehe noitoka vo anitesá neve. ¹⁹ Nenemú itínasa gamenaló nene lekeza hanuva hepelaloka gutá ve minamave. Lekezagi monó vegeñá lugáagi Ómasímíni apá amelage noune. Itó Ómasímíni vegeñala zuha loló oko noune. ²⁰ Aposolo itó Ómasímíni agepagutí gakó loaká ve leza lukesava loló oko nouko, nenetíni lumupiló hize lé olikimikago minílíki víki niave. Itó Izesu Kilistó nene numuni lapusaváa loló oko noive. ²¹ Numutó namató vegeñá Guivahaniloka miní amekuko, aí apazá zagusave utó oloko voko napa oaká noive. ²² Sikalahú nenémó lekezagi ámina oko aitoka lekelémó miní amekago, Ómasímíni numuni apá lílí ikago mulutikú minoko aleko oaká noive.

3

Pauló hetoka vegeñakumule loko monó hoza alimó

¹ Itó neza Paulona nenemú hetoka vegeñá lekelikumule loko Izesu Kilistóni gelekeleléa minuke nagá numukú nouve. ² Lekeza nenikumú nene Ómasímó nasahílatunú oko lekelitoka monó hoza alitane loko lonetonoimóma neve líki gilinave loko gelenouve. ³ Eza asuguná gakó amegesáa lo utó moloko lo nimimó neve líki mota gilinave. Ámina netakumú goí oko gakó alínipáisi gizo lukumumóma neve. ⁴ * Lekeza ámina gakó gatiki nigílíki neza Izesu Kilistóni asuguná gakó amegesáa nene nigikatunú gele vevesoko gelekuke ángoaká umoláa lekeza gíltave loko vesamá oko ámina luhuva gizo lukumumóma neve. ⁵ Ámina

* 2:1: Kolo 2:13 * 2:15: Kolo 2:14 * 2:16: Kolo 1:20 * 2:17: Isa 57:19 * 3:4: Kolo 1:26-27

asuguná gako amegesáa nene gozapá miniliki va vegeatoka utó amimóma neve. Apazá aposolo itó Ómasímini agepagutí gako liaká ve lelitoka alika Sikalahulímo lo utó moloko limimó nene láa loko neve: ⁶ Gako lamaná lo molamó nenémini gihiláa nene Zuta vegená minamamolaloka itó Zuta vegená lelitoka hámakó avevezahaló mulusi hámakó loló oko mininake Izesu Kilistokumule loko lehizeleketatove loko lo mololeta netá izá moloko alekuko lezi mututoni itive loko lonoimóma neve.

⁷ Itó ámina gako lamanalímini gekeleléá loló itane loko Ómasímo nasahililatunú oko aí zámuzaló moloko gele minake nenitoka ale utó molonoimóma neve. ⁸ Monó gele vegená limiki minakutí neza lemeko minumolámina Kilistotokatí minumuni gatoko gato asú amoakalímini noimó nenémini gako lamaná nene Zuta vegená minamamoláa lo utó moloko lo kimitane loko nenémini hoza gako lonetonoimóma neve. ⁹ Ómasímini asuguná gako amegesáa nenéminoko hozaváa aleko ale asú itove loko agata gili mogona nene neza lo utó molokugo vegená mukitoka gilitave loko lonetonoimóma neve. Nene Ómasi eza netá matá mukí ale utó onoi vémo ámina asuguná gako amegesáa nene ezáa agikagukó halá geloko voko minamó. ¹⁰ Láa loko Ómasímo agikatunú gilimó gihiláa nene Ómasímini vegenalá zuha leza itina ale vesamá okuko, Ómasímini gele vevesoakaláa haitopaitolímíni nene okulumakú agelóini kugulizaki ve niamó itó amuzáiki ve niamó keza ániigiiki gili guni itave loko halá geloko voko minamó nene, ¹¹ Ómasímo eza gozapá netá matá ale utó onamike agikatunú lo huko mololoko iteko minamó nenémini gihiláa nene Guivahanite Izesu Kilistoni amiseleke-ago ale utó molamó. ¹² Aikumú gele alévolé okuko gapo veleko lolovovo zeletamó nenemú lelegesá legemiko Ómasímini avogisaló vitune. ¹³ Nenemú láa loko lo likimitoze, gililo. Neza lekelikumule loko gasovagi netalímíni amupiló nominugoma, likigika lememino. Lekeza nenemú giliko gonanalisi netatini loló ino.

Kilistó agika limitímíni mogona gilitave loko Ómasiloka limó

¹⁴⁻¹⁵ Nenemú nene okulumakú miniliki vamó itó mikasiuka minoloko vunimó mukilitini ametheo gihila aí nalapusa hizeko gupá ze ameko lekelikumú numuna láa loko loaká nouve: ¹⁶ Ómasímo eza ohunagi lapanalatunú Sikalahutoka lokago lemeko zámuzá ale utó mololikimikiko, likigikatini napa alévolé itive loko, ¹⁷ itó Kilistokumú gili alévolé iminatímo eza mulutikú minoko aleko itive loko, itó agika likimitímo luhusatini ale gilitoko lukesalini loló okiko, ¹⁸ lekezagi itó monó gilina vegeiná lugáa mukitoka kezagi Kilistó agika limimó nenémo livilege zaká maká oaká noikumú gili guni iki gilitave loko, ¹⁹ itó Kilistó agika limimó nenémini mogonáa nenémo vegenalita geleká nene avilege zaká maká oko nemó nenemú hanuva gili guni ikiko, Ómasímini agikagú laga netá vaí oko noimó nene lekezatini likigikagú vaí oko minative loko Ómasiloka loaká nouve.

²⁰ Ómasi eza ligikagú hoza aleaká noi zámuzalatunú eza oko moloko oaká noitímo loká oaká nouni netá itó lagata geleká nouni netá avilege zaká maká oko golvigá netá loló iti vémini luhuva hutlí ino. ²¹ Aí vegenalá zuhalita oko moloko itunimó itó Izesu Kilistó oko moloko noimó nenémo Ómasi geké lotatunimó nene omolelé amalelé oko lagapilamotoka minoloko iteko minino. Lamaná.

4

Sikalahulímo lelémo hamó ikú minatune

¹ Neza Guivahanimule loko nagá numukú noutímína lakagata aleko lo likimitoze. Ómasímo iteko mina netató sele lo likimimó nenémini sisihetokó miniki aliki ilo. ² * Lá níiki likigika alilíki limíki mulutikú geha ziko hulugú miniki goselé likípiliti netá alilíki-tatakumú goselé lekepelemiko legesó iki likigika kimiki minalo. ³ Itó hulúminí nagalutunú múnahelaketamóma neve. Nenemú ámina nagá hukikataze, eza gizapa otiko eza gizapa otiko iki Sikalahulímo lekelémo hamó ikú nene minalo. ⁴ Ómasímo okulumakú helisa henoni hámakokumú lakagata losi gelemiki ageva iki minatave loko sele lo lekemeneimómáminoko mulusi hámakó nouhá itó Sikalahú hámakó neve. ⁵ Guivahani hámakó neve, itó monó hámakokumú gele alévolé oaká nouhá, itó monó nagamí hámakó holoaká noune. ⁶ Itó mukitó ametheo Ómasi hámakó noive. Áisi monéna mukitoka livilege zaká maká oko noive. Itó etó etó oko zámuzá limíke hize lé olímikago aí hozaváa aleaká noune. Itó eza mulutegú etó etó oko minoko aleko oaká noive. ⁷ Kilistó eza lehizeleta polosava monolímíni zámuzá etó etó oko ale minoaká noune. ⁸ * Nenemú nene monó gotoláú luhuva gako makó láa loko neve: Eza veletoka mezane noitike nagá numukú minamoláa kigizató alike kelémo otimó neve. Itó monolímíni zámuzala nene vegeiná lehizeletamóma neve.

* 4:2: Kolo 3:12-13 * 4:8: Age 68:18

⁹ Veletoka itimó nenémini mogaoná lá oko neitive. Eza mikasi agikagú lemeneikutí atiginá oko itimó. ¹⁰ Itó ámina limi ve nenémo atiginá oko okulumá avilegemo avilegemo itimó nene aí ametamenímo okulumakuki itó mikasiguki mino gikí oko minative loko iti ve noive. ¹¹ Itó monolímíni zámúza lehizeletamó nene vejená lugáa nene aposolo lelémo molamóma neve. Itó lugáa nene Ómasímíni agepagutí gako liaká ve itó lugáa nene Izesuni gako lamaná lí hutilí iaká ve itó lugáa pastoli ve itó monó tisa, ¹² keza monó gilina vejená mukitoka kelémo vatí ikiko keza monolímíni gelegeleláa minatave loko itó Kilistóni mulusi leza monokú voko napa itune loko vejená nenéminoko lelémo molamóma neve. ¹³ Lá oká lá oká oko hozaváa aluko gele alévolé oakate itó Ómasímíni gipalámíni mogaoná geleafate nene hutilí iko ligika hámakó miniko monokú alévolé oko Kilistóni ametamenígítana ale luhokinake napa oloko ititune loko ámina zámúza lehizeletoimóma neve. ¹⁴ Itó lá okiko leza namuni molokoko minaminake amúza moloko nouko logoka viziaká ve keza soza sazagi lí limikiko, soza saza gakoínímíni hepelaámo lelémo mómoká okiko neneló gímizitupe neneló gímizitupe lokatunize. ¹⁵ Leza ligika kemeko gako gihiláa loloko vinake matute loló oko noi ve Kilistotoka gímizekinake alévolé itune. ¹⁶ * Aitoka miní amekuko amelaho vémo múnahe lamaná olimikiko apize lamaná oko minínake aí agupémíni gelegelela minínake agisa agizani loló itunize. Lá noinake zámúza limi avotigí alenounimó neneló moloko lamaná oko hozaváa alínake ligika kemeakalímíni nasahilikú napa oloko vitunize.

Litaha lemetameni ahulokinake gosohá lemetameni ale luhatune

¹⁷ Nenemú neza Guivahanímíni avogisaló lakagata aleko lo likimitoze, gililo. Hetoka vejená lugáa keza kagata giliaká niamó nene ha netakumukó giliaká niave. Keikitana iki miniki aliki amilo. ¹⁸ Keza nene kigika kagata koló amigo negi nagí hiziki kigika hize lí okago niakumú Ómasilokatí alévolé kemetameni alita netá kemegeza amikave. ¹⁹ Itó kigikáini hize lí okago netá golesamú kovoza ma helesá amigo, mokoló netalímíni agikagú niake, golotuva netá haitopaitalímínimú kumu helekago goseló kepelemigú líl iaká niave. ²⁰ Lekelisi nenéminiki minatave loko Kilistóni mogona lo lekemesá amuháma neve. ²¹ Aí mogaoná lo lekemenouháma neve. Itó Kilistotoka viki gímizikago aitokatí gako gihiláa lainim-oleketuko gilinamóma neve. ²² * Litaha lekemetamenigí miniki aliki iaká ago itó lukumu hilimó nenémo soza lokoko lokogoka vizekego lapuluva oaká imó nenazo, ámina litaha likigikama golohá ilo. ²³ Itó likigika lakagata alémo gosohá líl ikiko minino. ²⁴ * Ómasímó gosohá lekemetameni ale utó imó nene ezáa ametamenigí miniki hee hee loko minogaká itó etó oko keké vizeko minogaká netá ali utó milata lekemetameni nene ali luhalo.

²⁵ * Nenemú lekeza soza saza ahulalo. Leza apize lamaná unike aí nagá loló okuháma nenazo, nenemú gako lamanakó eza lo amiko eza lo amiko iki minalo. ²⁶ * Mesahagú miniki lihima alikataze. Mesaha oká likizapaló moloká iki niko ho nene lemémíno. ²⁷ Lá itamó nene Satani nene gahe sigítaminigave. ²⁸ Gumina aliaká a vezenalita ámina netá ahuliiki likigizanitunú hozaváa amúza míliki aliiki nosánetatini henokanotini ali utó míliki vejená ámemena nasahilí okekatune líki ámina zámuzagi minalo. ²⁹ Ulinaka gako lekegepagutí makó lamilo. Gakotini gilita vejená kelémo lamaná itune líki gako lamanakó líki eza hize lé otiko eza hize lé otiko oaká gapomú vitagá ilo. ³⁰ Ómasímíni Sikalahú nene nemú manamú líki ahelulakú amilo. Aí nene gamena napaló nene asele zeletatimó nenémini zazaváa minative loko lehizeletoimóma neve. ³¹ Ekesá gako mesaha gako mukahá gako itó vivi vovoga aleko letovo oaká gako nuvane giliki gili ahulalo. Itó lova likigika amino. Itó likizapaló molamino. ³² * Lekeza likigika geha ziko likigika eza amiko eza amiko iki apizi lamaná iki minalo. Ómasímó Kilistokumule loko lihivavatini ahuleketamómáminiki eza lihivavala ahulotiko eza lihivavala ahulotiko iki minalo.

5

Lapanalímíni luhuva loló inake nenémini avevezahaló minatune

¹ Lekeza Ómasímíni izegípa gihila minatita aí avevezahaló minalo. ² * Lá niiki likigika kemeakalímíni agikagú miniki aliki ilo. Kilistó eza ámina oko agika limike lelikumule loko agupéa latila imó nene Ómasi guguni gizo amigo Ómasímó anuva giligo lamaná imó neve.

³ Lekeza monó vejená nianazo, mokoló netá itó musi netá itó mulutikú nihuniu nene lekeli holutikú utó amino. ⁴ Itó ulínaka negi gako giza zohí gako golesa litamó nene etaminogo inazo, ámina netá ahuliiki Ómasi agepoka líki minalo. ⁵ Lekeza láa líki gili alévolé iki gili minalo: Mokoló vehe itó musi netató vehe itó mulúikú nihuniuhuló ve

* 4:16: Kolo 2:19 * 4:22: Kolo 3:9 * 4:24: Kolo 3:10 * 4:25: Zak 8:16 * 4:26: Age 4:4 * 4:32: Kolo 3:13 * 5:2: Gá 29:18

mulutíki nihunihi nenémo soza ómai netá ámegetoakaláa geleneimó nenazo, ve nenémináa keza Kilistoni itó Ómasímíni avogisaló miniki aliki ita netakumú nene vitagá itamóza, ma aleminigave. ⁶ Golesa netá nenéminámú nene Ómasi gili anema vegeatoka Ómasímíni mesaha utó inogo inazo, lokogoka viziki lekelitoka soza saza gakó li likimíkiroma, giliko gihiláa loló amino. ⁷ Nenemú lekeza vegeaná nenémináagi miní apiziki minamilo. ⁸ Lekeza gozapá límugusigú minamóma nemóza, itína nene Guivahaniloka gímiziake lapanatinigi lílí iake niave. Nenemú lapanalímíni luhuvaváa lílí iiki nenéminí avevezahaló minalo. ⁹ Lapanalímíni gihiláa lá oko utó oaká noive: Ligika lamanaki minoaká itó hee loko minoaká itó gakó gihila loaká, ¹⁰ nene netá matá oko moloko itune loko Guivahanímo giliko lamaná iti netakumú vitagá ilo. ¹¹ Lúgáate límugusímíni netala itó hutuváa lílí níkoma kezagi miní apiziki minamilo. Lekeza ámina netá golesáini nene alí hanatalo. ¹² Netá asugunatoka aliaká niamó nene lovoza heleaká netá nenazo, nene gakó lamitune. ¹³ Netá nenémináa ale hanatokuko, lapanalímó hize hanatokiko, utó o lamaná inogo ive. ¹⁴ Itó utó oaká netá nenémináamo nene lapanaki loló itimó neve. Nenemú monó gakó makó láa loko nemóma neve:

Lokovó akina ve lekeza otilo.

Itó hiliníta ve lekeza mómoká iki otilo.

Kilistó nene hize hanatoleketanogo ive

líki luhuva gizinamóma neve.

¹⁵ Nenemú lekeza miniki aliki itatoka nene gizapa etoha iki minalo. Itó negi nagí hiziki minamíki gili vevesiki minalo. ¹⁶ * Itína gamena nene golesa netalímó hutilí onoinazo, nenemú netá lamaná aleaká gamena utó olíkimitimó nene ma líkivilegemino. Gamena ha okatize. ¹⁷ Negi nagí netá lílí iki minamiki, Guivahanímo lititoka molatitoka iti gapomú vitagá ilo.

¹⁸ Piá nagamikumú lekemeni zemilo. Nenémo nene líkigikatini ale gopa okatize. Ómasímíni Sikalahú nene líkigikagú mino vaí ino. ¹⁹ * Ómasi agepoka lílí iki ipá apá nama itó monó nama itó Sikalahulímó lekelémo vávani iko gosohá nama eza lo amiko eza lo amiko iki líkigikagú Guivahani agepoka lí amiki nama líki lokogoliza vizí vizí iki minalo. ²⁰ Lá níki Guivahaníte Izesu Kilistoni agulizá iki mukí netakumú gamena gamena Ómasi ametehini agepoka lílí iki minalo.

Ve aleve iki miliki ita gakó

²¹ Lekeza Kilistoni goliva gilitiki eza gelekelé otiko eza gelekelé otiko ilo. ²² * Vená lekeza vatinitini kagahaisiuka niminiki Guivahanímíni agahaisiuka niminamó loló ino. ²³ Kilistó eza vegejala zuhatini gotóini minake ale nupa oko gizapa olimiaká noive. Agisa agizani agupéa leza nene nouko eza lugutó vizeaká ve noive. Vená keza ámina iki váinitini kígnaló niave. ²⁴ Nenemú Ómasímíni vegejala zuhate Kilistoni agínaló niamó ámináminiki venatini nenete minimi limiki váinitini kagahaisiuka minataze. ²⁵ * Ve lekeza venatini nene líkigika kimitamó nene Kilistó monó gele gevenakumule loko agika limike agupe latila ike hilimómáminiki líkigika kimilo. ²⁶ Kilistó lá imó nene vegejala zuha kelémo etó okiko golotuva netá keitoka minokative loko itó monó gakolatunú nagamí zekoko lusa gekiko ²⁷ ezáaloka ale akolotake líkigika gizopa lo miníkogó líhima nomimó etó ikigó minatave loko hilimó neve. ²⁸ Itó ve lekeza lekezatini lukugupemú miluma giliaká niamó ámináminiki venatinimú milumáini giliki líkigika kimilo. Lekelikutí makolímohe makolímohe venalamú miluma geleko agika amítimó nene ezáa agupemú nene miluma giliti netá loló inogo ive. Ve makolíte kugupenini mukahá apilisá amave. ²⁹⁻³⁰ Leza lugupeva gizapa lamaná otunike nosánetá amekogó minoaká nouné. Leza Kilistoni agupe agisa agizani nekisáa nounimómave loko aí vegejala zuha ámináminoko gizapa olimiaká noive. ³¹ * Nenemú monó gotoláu gakó makó lá oko neve: Ve makolímohe makolímohe izolahíko amelahíko ahulokimíoko venalaloka voko gímizekiko keza kugupe kígika míli hámakó iki minatáive. ³² Itó ámina gakó amegesáa halá ge minamó nene Kilistó itó vegejala zuhaloka voko alekative loko noluve. ³³ Nenemú ve lekeza mukító nene lukugupelinimú giliaká niamó ámináminiki venatinimú giliki líkigika kimilo. Itó vená lekeza mukító nene vatini kugulizáini alí otiki kílimi napa ilo.

6

Izegipagi izóike améike iki miliki ita gakó

* 5:16: Kolo 4:5 * 5:19: Kolo 3:16-17 * 5:22: Kolo 3:18; 1 Pit 3:1 * 5:25: Kolo 3:19; 1 Pit 3:7 * 5:31: Apí 2:24

1 * Mohó gipa lekeza Guivahanimule liki izotikini ametikini gelekelé ikitiki keí gakoíni gili alilo. Nenémo nene lekelí gapo loló onoiwe. 2 * Geza izokahiko amekahiko kugulizá ale otezo loko li gakoímo gapo lota gakoíni nene ámina gakoíni ganá miní ameko lo mololetamómági neve. Láa loko lo mololetamómá neve: 3 Lá itanimó nene mikasigú mino lamaná oko gamena hána mino-loko voko minanogo ane, loko lonoimómá neve. 4 * Itó izóikita améikita lekeza nene mohotini izegipatini keza kizapaló molati netá lilí ikitamilo. Guivahanímini monokú gagata aliki kilími hee hee liki gakoí gilitave liki kagavutó zilo. Lá iki gizapa níkitiko monó gapogú viki napa itaze.

Gelekelé vejenaki kugulizaki vegi iki miliki ita gakoí

5 * Gelekelé izegipa lekeza mikasiuka kugulizaki velini gelekelé ikitiki gakoíni gili aliiki likigika lamaná ominiko lá ikitalo. Lá níikoma Kilistoni gelekelé nitamó nene gilinogo ive. Itó keikumú giliko gena noikoma legesó iki miniki gakoíni gililo. 6 Lekeza nene kugulizaki velini lukugupe lekememi kimiiki gelekelé níkitiko hanuva lelí ángi lamaná itave likigopa, leza Kilistoni gelekelé nenémináa minatune liiki Ómasímú lititoka molatitoka iki lá ilo. 7 Vegenakumú hoza nalune likigopa, Guivahanímú nalune liiki mulutikú lamaná giliiki hoza goselekaselé amiki alilo. 8 Lá níiki gelekelé izegipa niamó itó kugulizaki ve lilí iki niamó keza mogona lamaná lilí iki minatamó nene, Guivahanímó nenémini helegáa ámináminoko meínváa kiminogo ive liki gili minalo. 9 * Itó lukugulizaki ve lekeza gelekelé izegipatini nene ámina iki kilími lamaná iiki gamuni iki ahulikitalo. Lá níiki láa liki gililo: Gelekelé izegipatinígi itó lekezagi nene okulumakú Guivahani ametipo hamokó noiwe. Eza itiki minamó límiki minamó mukikumú giligo hamó lelegitokó niave.

Ómasilokatí gimisi magé lova netá ale ligizakú molatune

10 Lo asú oko lítoze. Guivahaniloka viki gímiziiki aí zámuza napa lekelitoka neiko nenémini agikagú minilíki viki alévolé ilo. 11 Satá nene asugunatoka logoka vizeaká suni alinogo noiko nene helisa aliiki nitatotí nene amisele ahulatune liki Ómasilokatí gimisi magé lova netá ale likigizakú míliiki gizapa iki minalo. 12 Leza hanuva lugupegi vejenaki lovasava osá amune. Kugulizaki ve napa itó guivahani alévoleláa imane límugusí gamenaló gizapa ve niamó kugupe nomímó ángiamoakalímíni golesa netá okulumá sepenauka niamó kéisi lova ali límiaká niave. 13 Lá niamó nenazo, nenemú lekeza Ómasilokatí gimisi magé lova netá ali asú iki miníiki lova golesaló amuza míliki niko gala ve keza iki lou níiki vikiko lova hizi asú itató nene lekeza áminaló alévolé iki minanígave. 14 * Lekeza lá iki otiiki minatave loko noluve: Gakó gihaláa getelini loló noiko, Ómasímíni avogisaló lihimatini asú olikimikago minatamó nenémo apitiniló geha sioti loló okiko ali luhiiki minalo. 15 * Hulúmíni gakoí lamaná ali guni iki ali minatamó nenémo likigisa suú loló okiko lisi gikiitiki minalo. 16 Lá níiki izolahináa napa nene Ómasímú gele alévolé atímó lagelini loló okiko, gamena gamena likigínagú míliiki niko, golesa netalímíni amelahóa gimisivagutí magelámo satokiko magelímíni loláa lihátize. 17 * Lá noiko, aenitunú akilitini agulizaláa lekelémo lukugutó vizeaká netá nene ali hitiiki Sikalahutokatí Ómasímíni gakoí nenémo sopoló hánalini loló okiko ali minalo. 18 Lekeza gamena gamena Sikalahulímó lekegepa ale vávani noiko Ómasiloka miní ami amiki liki voká liki minalo. Itó zogozogo vizemikí goselé lekepelemiko gizapa iki minalo. Lá níiki monó gele vejená mukitoka keikumú numuna hoza alilo. 19 Lá níiki nenikumú nene Guivahanímó negepáne ale vávani okiko Izesuni gakoí lamaná goí oko asuguná oko minamó nene negepa atilínake vávani oko lo utó molative liki lekeza numuna lilo. 20 Neza ámina gakoí lamanakumule loko gakoí lo utó utó ve nagá numukú noutímína Ómasímó lonetatímínoko nelegesá legemiko lo utó molative liki nenikumú Ómasiloka lílo.

Gekéini loketamó

21 * Minoko aleko noumó nenémini mogonáa itó hozaváa aleaká noumó nenemú gilitave loko Tikikó nene voko gakoí lo likiminogo ive. Eza ligiviteho gihila Guivahanímini gelekelé izegipala hozagú alévolé oko mina ve 22 * áisi lelí gakoílate lo lekemeko mulutikú ale lamaná itive loko amiselekugo núane novive.

23 Ómasi ameteho itó Guivahani Izesu Kilistó áisi nígive nagave hulu ale utó mololeketoko gele alévolé oakatini ale hutilí olikimiko likigika eza amiko eza amiko iki minatave loko noluve. 24 Guivahanite Izesu Kilistotoka gímizi lamaná iki likigika amiaká nia vejená lekelitoka Ómasímíni nasahilí nenémo mino moloko minino.

* 6:1: Kolo 3:20 * 6:2: Gá 20:12; Gapo 5:16 * 6:4: Kolo 3:21 * 6:5: Kolo 3:22-25 * 6:9: Kolo 4:1
* 6:14: Isa 11:5, 59:17 * 6:15: Isa 52:7 * 6:17: Isa 59:17 * 6:21: Apo 20:4; 2 Tim 4:12 * 6:22: Kolo 4:7-8

Pilipi Vegenalitini Luhuva Pauló Gizo Kimimó

Pilipi vegená nónohá kimike gizo kimi gako

¹* Neza Paulona itó Timotiki makó nousike Izesu Kilistoni gelegeleláa leza Pilipi numutoka vegená Izesu Kilistokumú gili alévolé iake Ómasímini vegenala zuha lílí ina vegená itó pastoligi itó monolímíni gelegele végi lekeli pépa imane luhuva gizo nolukumuve. ² Ómasi ameteho itó Guivahani Izesu Kilistó aitokatí nasahílí itó hulu lekelitoka minoloko voko minino.

Pilipi vegenakumú Ómasiloka límó

³ Neza lekelikumú gele-loko novuke Ómasine agepoka loaká nouve. ⁴⁻⁵ Lekeza Izesuni gako lamaná ganá apí iki giliake áminasító monó hoza aleloko vutó itó itínasa nalutó nene nilímí vatí iaká niakumú guluke lekelikumú Ómasiloka loaká noumó nene mulúnégú lamaná geleko Guivahani agepoka lomiaká nouve. ⁶ Itó hozaváa lamaná likigikagú apí i ve Ómasímo aleloko voko ale nolutigiko Izesu Kilistó anititi gamenaváa alitanogo íve loko gele seketigí oko nene gelenouve. ⁷ Neza imaneloka nagá numukú nougo itó gako lamanakumule loko gako hoza aleko hize lé oko nalugo lekezagi nezagi Ómasímini nasahílí izá moloko ale minoaká nounikumú lekeza nigikagú minamóma nenazo, neza lekeli mukikumú nagata gele lekemeaká noumó nene lamaná onoiwe. ⁸ Izesu Kilistó eza agika lemeaká noimómámini agikagú minuke neza lekelikumú milumavatini geleká noumó nene Ómasímo giligo lamaná noluve. ⁹ Itó likigika kimitatímo itó netá mogonamú geleakatínimo itó gilikí alí guni iakatínimo napa oloko vitive loko numuna loaká nouve. ¹⁰ Itó lá okiko netá gohaláa ángigiki miliki ikiko Izesu Kilistó anititi gamenaló likigika gizopa lo miniko lihima nomítimó miníkí ¹¹ Izesu Kilistoni alí gikítikí aliníko áisi nene hize lé oleketiko, hehe liki minatamó nenémini gihíláa itó minumunáa ali utó milikiko Ómasímini luhuva lapanala utó o lamaná oko minative loko Ómasiloka loaká nouve.

Kilistó nenémo minoko alekóne loló okave

¹² Nigivénegita, gili gopa ikatave loko lo likimitoze. Neza netá golesa utó o nimimó nenémo Izesuni gako lamanalímíni gapo hize lí itigopa, vo guni oko vo alitive loko utó imóma neve. ¹³* Neza Kilistokumule loko nagá numukú nou gako límó imaneloka agulizaki ve napámini pilisi ve itó vegená lugáa keí kagataló holo asú onoiwe. ¹⁴ Itó nagá numukú noumómave liki imanelokatí ligive lagave lugáa keza Guivahanímú giliake vávani ake Ómasímini gako kelegesá legemigo li utó iaká niave.

¹⁵⁻¹⁷ Lugáa Kilistoni monoláa nene eza avilegekago eza avilegekago iki liaká niave. Keza sozagi pevisá ziki nené nemekugú niake kezáini kugulizáini alilikí itínigi Kilistoni agulizá liaká niámó nene nagá numukú nominumómámini amupiló miluma hoza niminigi lá iaká niave. Itó lugáa nenete mulúikú lamaná giliki aí gako liaká niave. Keza nene Ómasímo imaneloka minoko Izesuni gako lamaná hize lé itane loko loake nelémo molamó neve liki giliake kigika nimiake lá iaká niave. ¹⁸ Itó némini manáminoko monó nene soza kigikagutí itímokí itó kigika lamanakutí alí miliki litamó nenemú lova sava amítune. Hanuva Kilistoni gako lámó hutilí oaká noikumú mulúnégú lamaná noguluve.

¹⁹ Itó lekeza nenikumú numuna liaká hoza alikiko itó Izesu Kilistoni Sikalahulímó nelémo vatí iko nagá numukutí gologí initatave. Mulúnégú láa loko gelekuke lamaná gelekogó minanogo uve. ²⁰ Itó minoakakumupe itó heleakakumupe nigika vávani ominíko nugupe nigikagi Kilistoni lehizemikugo nenémo guhekaheláa loló itive loko oloko voko minumóma neve. Itó lá oloko voko minatove loko novoza heleaká netá nene ma ale utó molaminake gele lamaná okoko nigikaturú nagata losi gelemoko ageva oko minanogo uve. ²¹ Kilistó nenémo minoko aleko netáne loló okave. Itó heleaká nenémo iteko mina netá ale utó molonetanogo íve. ²² Itó mikasiuka miní ameko minatamó nenémo není hozámíni gihíláa goha ale utó molanogo íve. Nenemú nana netakumú vávani itohe lokuke nagatagú losi pasi onoiwe. ²³ Neza makokumupe makokumupe niviseaká noiwe. Mikasi ahulokinake Kilistoni ale utó molokinake áisigi minoakakumú laga nivisekago nenémo nene netá iteko neve. ²⁴ Itó lekeza siheleni minikatave loko lekelikumule loko mikasiuka goha miní ameko minokugo lamaná itize. ²⁵ Itó nenemú nene gele seketigí oko gelenoumó nenazo, neza heleminake lekezagi mininake lekelémo vatí ugo lekeli gele alévolé oakatini itó mulutikú agila guluma noimó nenémo napa oloko vitize. ²⁶ Itó lekelitoka goha voko minugo

* 1:1: Apo 16:12 * 1:13: Apo 28:30

nenikumule liki Izesu Kilistoni geké limiaká niatita gohagi miní amiki geké litatave loko gelenouve.

²⁷ Lá onoióza, likigika mili hamó iiki múnahiki miniki gakola lamanalámini hozaváa alévolé iki naliko gihiláa ali utó nimiliko lekelitoka vinake ángatove, itó hotó mininake gakotiná gilitove loko lekeza iki miliki itamó nenémo Kilistoni gakó lamaná nenémini avevezahaló minino. ²⁸ Gala velinimú lekelegesá ma legemiko alévolé iki miniki zámuzatini golasasa gemino. Ómasímo ámina anosa kelepezekiko keza simá noakalímini mogona ali utó inigave. Itó Ómasímo lukugutó vizitimó nenémini mogona ali utó inigave. ²⁹ Lekeza Kilistokumú gili alévolé itave lokogó nomive. Aikumule liki miluma maluma netalímini amupiló minatave loko monéna gele lekemeneimóma neve. ³⁰ * Itó neza monokumule loko lovagú alévolé hoza gozapá nalugo ánginamóma neve. Itó itínasa nene nalugo gakóne giliaká niave. Itó monokumule liki ámina lovagú alévolé hoza lekezagi áminámini iki aliaká niave.

2

Kilistó ezáa agupe aleloko lemekago Ómasímo alémo oti gakó

¹ Lekeza Kilistotoka miní amekumule loko lekelémo múnahékago miniaká itó likigika kimiave liki hulu iki miniaká itó Sikalahugegi apiziki miniaká itó mulutikú hizigo miluma giliaká netá mukí lekelitoka nehe. ² Nekoma, mulúnegú lamaná iteko geleko minatane liki geleakatini ali nupa ino. Lá niiki likigika kimiaká itó likigika lakagata múnahéaká nene hamó lelegitó iteko minino. ³ Lekezatini mukó giliki lukugupe alimi iti iti netá matá makó alemilo. Lekeza likigikáa aliliki limiki miliiki likigive lakagavemú giliko itino. ⁴ Itó makólímohe makólímohe ezáa hoza lamaná itive loko gelemoko agive lugáagi lamaná itave loko gilino. ⁵ Izesu Kilistó eza lá oko geleaká imoláa ámina oko lekelitoka minino. ⁶ Eza Ómasímini ametamenigi minoko aleko oko minamóza, Ómasigi lelegí oko nousitotí nanamú ahulatove loko lamike ale gikitamike, ⁷ eza gonanaliváa ahuloake gelekelé ametameni ale luhoake, vejená lemetamenigi utó imóma neve. ⁸ Oko molokóa nene vejená lelí avevezaha oko moloko noike ezáa agikáa aleloko limike moloake, Ómasímo litokó ámegé ámegé ike heleaká netá ale alitamó nene lovoza heleakalímini itó mulizapa oakalímini geheake zohota zaló heleneimóma neve. ⁹ Lá imómave loko amelaho Ómasímo alémo ká mezanoló agulizaki ve sipisi alémo loló okago, ai agulizá nenémo iteko minokiko vejená lugulizá lemeko minative loko lotonoimóma nene, ¹⁰ * okulumakú itó mikasiuka itó mikasi agikauka minamoláa keza mukitó Izesuni agulizá iki kalapusa hiziki agepoka litave loko, ¹¹ itó kegepagutí kegepagutí nene Izesu Kilistó eza Guivahani noive liki lí gululutiki litamó nenémo iteko miniko Ómasi amelahini lapaná utó itive loko lotonoimóma neve.

Sata netató nia vejená hize hanatoketature

¹² Nenemú nigika lekemenou izegipa páne, lekeza gamena gamena gakóne gili aleakalímini minamó nenéminiki miní amiki minalo. ¹³ Ómasi ezáa nene likigikagú hozaváa nalike ezáa lititoka molatitoka niko alévolé oaká zámuzá itó gihiláa ali utó miliaká zámuzá lehizelikimiaká noinazo, lekezagi nougogó negopa, hotó nougogi nene lukugutó vizimó nenémini gihila ale utó itune liki gopa okatune liki Ómasimú goliva giliki ininá ininá iki amuza milalo. ¹⁴ Lekeza netá mukí naliki gulu-guluga líká pelevesava ziká amilo. ¹⁵ Lá niiko, lihima nomimó likigikagú gololó o minatimó minataze. Lá niiki vejená mulusi ali zová zavá ziki itó ali golesa palasa iaká nia vejenalitini límugusi kigilikagú nene lekeza Ómasímini mohola gipala likigika lamanakigó lílí iki miniki sonohí nenéminiki hizi hanatataze. ¹⁶ Lá niiki, Kilistó anitekiko nene lekelikumule loko oko moloko umó itó hozaváa gena oko alumó nene hanuvamú nomimó nenémini mogona utó okiko nogoliza vizeko mulúnegú lamaná gilitove loko hizi hanatiki alévolé kemetamenigi minoakalímini gakó ali utó mili kimiki minalo. ¹⁷ Gili alévolé iakatinimo Ómasiloka guguni gizoaká netakitana nego, nenémini amupiló nipili nihiliko golaníne lekitomó nenémo Ómasi gizo amumó gelekiko nenemuki lokogoliza viziki lekezagi mulutikú lamaná nigiliko nezagi lamaná gilinogo uve. ¹⁸ Itó lekeza ámina iki lokogoliza viziki lekezagi nezagi mulutegú gilitune loko noluve.

Timotiko Epapolotaetasiko

¹⁹ Guivahani Izesú gelekiko, vatí okikoma, Timotini litá oko lekelitoka amiselekugo voko lekelí gakó makó ale atiginá oko lo nemekiko gelekinake mulúnegú lamaná gilitove loko noluve. ²⁰ Ve nenémináa aikitana makó imaneloka niamave. Aisi lamaná lekelikumú gilike agikatunú hize lé olikimiaká noive. ²¹ Ve lugáa kezáanimukó giliki Izesu Kilistoni

* 1:30: Apo 16:19-40 * 2:10: Isa 45:23

hozaváamú ma gilísá amamóza, ²² Timotí nene minoko aleko oaká noimó nenémini mogona lamaná nego mota gilinave. Gipa makolimo amelahini alémo vatí oaká noimó nenémini oko eza Izesuni gakó lamanalímini hozaváamú nelémo vatí oaká imó neve. ²³ Itó nenitoka netá néminoko manáminoko utó itikumú nene gele guni okinake aí nene litá oko lekelitoka amiselekugo vitive loko gelenouve. ²⁴ Lá okiko, Guivahanímo gele nemekikoma, nezánegi minó hána aminake lekelitoka vinogo nene gelenouve.

²⁵ Neza netá makokumú vitagá oko nougo, lekeza Eapolotaetasini amisilikago ake nelémo kii like nelémo vatí oaká ve itó monokú ve galaváa nigivénehini loló oko minoaká noimó nene nagata nogulumó nene goha ale atiginá oleketatove loko noluve. ²⁶ Eza avisekago nenémini gakó gilinamóma neve. Eza lekelikumú miluma geleake avisi netakumú giliko mulutíni itekative loko lekelikumú giligo gena noigo noluve. ²⁷ Itó netá avisekago helesakosá imóza, Ómasímo agika hize amimó nene aikó nomive. Nenitoka mulúne githíná imó nenémini amupiló miní amekative loko eza agika hize nimike alémo zokamó. ²⁸ Nenemú lekeza aí ángiiki mulutikú lamaná gilitave loko itó neza ámina oko gulugo gena amiko minatove loko ale gikitamuke itínasa nene vávani oko amiselekugo núane novive. ²⁹⁻³⁰ Eza Kilistoni hozaváamule loko helesakosá ikutí nene lekeza hotó minake nilími vatí amisá niago gelekelé onetatove loko agupéa latila itikumú giligo gena amimó nenazo, nenemú mulutikú lamaná giliki Guivahaniloka voko gímizi ve noive liki alími lamaná ilo. Lekeza ve nenémináa mukí kilími napa iki nasahilí ikitalo.

3

Ómasímini agovisaló hee loko minoaká gihiláa

¹ Nigivénegita, gakó makó láa loko lo asú inogo uve: Guivahaniloka gímiziki niatímo mulutikú lamaná giliki minalo. Ámina gakó gohegeva gizoko goha lo likimitove loko gulúmó nene gena amive, itó lekelitoka nene mino moloko minoko ale gikitoleketatize. ² Lekeza gala kemetameki vejenakumú gizapa iki minalo. Keza netá golesa galasa aliki Ómasímini anosa kugupenitó nomulupe liki kugupenini gopa hukiaká nia vejenakumú gizapa iki minalo. ³ Sikalahulímo hize lé olimikago, Ómasi gupá ze ameaká nounimó itó Izesu Kilistotoka gímizekunike logoliza vizeaká nounimó leza lugupetunú oko moloko uni netató ma leheta osá amuhá vegená nene Ómasímini izegipala gihila nounge. Kéisi negopa lezatete Ómasímini anosagi minoaká gihiláa alenoune. ⁴ Ómasímo nugutó vizitive loko nezáne nugupetunú oko moloko u netató leheta oko minatove loko hanuva leheta oko minuline. Itó ve lugáa keza kugupelokó leheta iaká alina nene, neza ámina itove loko aleloko iteko kivilegeko leheta uline. ⁵ * Lá okomú noluve: Neza utó okuke nougo, gamena 8 oko vokago, nugupéneló Ómasímini anosa milamóma neve. Neza Isilae vetini mulusigutí Pezamini agapilamola neza Zuta ve gihila utó umóma neve. Mosé lo hukoko li gakolímíni gelekeleléa Palisaio monó ve loló oko minumó. ⁶ * Zuta vetini monokumú amuza golesa muluke Izesuni vejenala zuha lova ale kemeaká umóma neve. Mosé lo huka gakó geleko ámegetugo vejená lugáate lihímánemú vitagá amó nomive. ⁷ Lá onoimóza, neza gozapá netá ale minumó nenemú gulugo gihiláa loló oko minamóza, alika nene Kilistokumule loko ámina netakumú gulugo ha netá loló imó. ⁸ Itó nenegó nomive. Neza Guivahaníne Izesu Kilistoni mogonatagana ángikoko gulúmó nenémini meinaváa itekago, netá lugáa mukitoka nene lamaná gulugo ha netá loló okave. Neza Kilistoni ale lá itove loko aikumule loko netá matáne mukí ángigo, hutuváa loló okago, vo tolova o asú okave. ⁹ Neza aitoka gímizekuke minuke, Mosé lo hukoko li gakó gele alekuke, nezáne amuza moloko Ómasímini agovisaló hee loko minosá amuve. Kilistokumú gele alévolé okuke Ómasímini agovisaló lihímáne asú onimikago minoaká nenemú nivisekago gele alévolé oakalímíni loló oko minatove loko Ómasímo lihímánemú giligo asú itímíni agikagukó minoko aleko oaká nouve. ¹⁰ Itó neza Kilistoni mogonáa gele guni itove loko itó eza galegutí oteakalímíni zámuza nenitoka utó itive loko itó eza miluma gilitó miní ameko nezagi gilitove loko hilinogo igo iki miliki ita mogona alitove loko, ¹¹ itó lá okinake voko heleneitokutí oteaká netá ale utó itohe loko geleaká nouve.

Anosa ángo hehe lonouke ololu loaká nouve

¹² Neza ámina netá mota ale lutegekuve loko losá amuve. Itó nigikáne gizopa vové avé lokogó neve loko losá amuve. Hanuva Izesu Kilistó nelémo lá imómave loko aítokatí ámina gonanalísi netá alitove loko amuza moloko novuve. ¹³ Nigivénegita, nezánemú gulúmó nene ámina gonanalísi lamanáma mota alekuve loko lamuve. Imanéminigó oaká nouve.

* 3:5: Lom 11:1; Apo 23:6, 26:5 * 3:6: Apo 8:3, 22:4, 26:9-11

Ahulokuke u gapo nene nemegealoka nego, nenemú gelesá amuve. Nogómulaloka ne netá alitove loko nigizani vatá oaká nouve. ¹⁴ Lá nouke Ómasímo Izesu Kilistó hoza alimómave loko okulumá gapoló nelémo molake makiló ahulonimikago, gonanalisi netá alitove loko ángo vevesonouke hee loko ololu loko novuve. ¹⁵ Monokú napa unimoláa leza mukitoka ámina gonanalisi netakumukó gele zageko minatunize. Itó gakó nolomó nenemú giliko, gapóa haitolímíni noikoma, Ómasímo likigika ale hanatokiko gili vevesanigave. ¹⁶ Lá onoimóza, monokú vonouni gapolokó vitunize.

¹⁷* Nigivénegita, lekeza mukitoka nénisi ale goí oko novugo ángiiki áminalokó némegetiki alo. Vegená lugáa keza áminagó iki ali goí iki viaká niaze, keí nene ángiiki nene ámina kigizakaló vilo. ¹⁸ Lá niiki láa liki gili minalo: Neza vegená lugáamu lo lekememo ova ova umóma neve. Itínasa imane ivegutí nene goha lo nolukumuve. Keza iki miliki niamó nenémo Kilistó zohota zaló hiliimó nene lova ali amiaká niamó geleneive. ¹⁹ Vegená nenémináa keza kugupémo amu heleaká noi netá nenémo ómasinini loló oaká noive. Itó haitopaitó netá kovoza hiliti netakumú golómeni giziaká niave. Itó mikasiuka netakumukó giliaká niave. Lá niamó nenémo vo tolova oakalímíni mututoni líli niave. ²⁰ Lá iki niago, leza nene okulumá apalímíni amelahove nounike, lugutó vízeaká ve Guivahani Izesu Kilistó eza okulumakutí limitikumú ageva oko minoaká noune. ²¹ Eza netá matá mukí ale nupa napa oko ale agahaisiuka molokiko aí agisa heumaukagó kelémo moloaká zámuzatunú nene keé lami lugupe ale viligokiko, ezáa lapanalagi agupegitana loló inogo ive.

4

Kagata aseva alike loketa gakó

¹ Nenemú nigika lekemenou nigivénegita, mulúnegú geleuke lekelikumú goha nonivisive. Lekeza hozanéminí gihiláa líli ikago, lekelikumú nogoliza vízeaká nouve. Lekeza amuza miliki Guivahaniloka gímizi salakiki aí mututoni líli iki minalo.

² Itó Izuotiako Sitikako lekeza Guivahanímíni mohola líli ikasinazo, likigika míli hamó iki minatáive loko lakagata naluve. ³ Itó hozagú ve nigivénega gihiláa geza ámina vená losi kelémo vatí ozo. Kezagi itó Kelemetó itó nigivénege lugáagi Izesuni gakó lamaná nenéminí miluma hozavamú hizi lé inítinamóma neve. Kugulizá nene alévolé kemetameki nia vegenalítini kugulizá giza pukugú neve.

⁴ Lekeza Guivahaniloka gímizemó nenéminí agikagú miniki lokogoliza viziki minalo. Neza goha lakagata aleko litoze. Mulutikú agila guluma iko minalo. ⁵ Guivahani mota omo lovogisaloka inogo inazo, vegená mukí nene hulugutí néminí manámíni iaká niamómámíni mogona kelepipilo. ⁶ Nezupe manamupe giliko mulutini ítemino. Netá matakumú vitagá niiki Ómasiloka líli netakumú voká líli nene, netá mota lehizeleketakumú agepoka líli minalo. ⁷ Lá iki niko, Ómasímíni hulu nenémo vegená geleaká nene avilegeko nemó nenémo likigikatini lakagatatiniló gizapa okiko Izesu Kilistotoka alévolé iki minataze.

⁸ Itó nigivénegita, gakó makó láa loko lo nahuluve. Netá gihiláa gelekelé o ameakaláa itó netá lamaná itó hee loko minoaká netá itó gizopa vové avetoko mina netá itó ángoakalímíni lagaváa itó gele lamaná oaká netá nene, etovi netá nekoma itó agepoka loaká netá nekoma, ámina netá mukikumú lakagata gili minalo. ⁹ Neza oko moloko uke lainim-oleketuke netá matá voko ale nupa oko lekelepizeko nougo ángiki gelemó áminamalokó nene minalo. Niko, hulu amelaho Ómasímo lekezagi minanogo ive.

Agupéminí netá lehizitakumú gakó lo kimimó

¹⁰ Lekeza gamena hána hanuva miniliki iteke likigikagú lamaná okago, itína nenikumú goha giliake ali lamaná initanigi nilago, nenemú gulugo Guivahaniloka vo anitekago mulúnegú lamaná napa noguluve. Lekeza goí iki nenikumú giliakaláa gilikamóza, netá mukí alenatatupe líli gapo vitagá iake nenemú gena likivisimó. ¹¹ Neza netá néminí manámíni agikagú minuke goselé nepelemígo minatomó nenéminí mogonamú vitagá oloko vuke mota gelenoumó nenazo, neza oko molokóne itína nomigo vitagá nouke lamuve. ¹² Neza ali-líli itíiki itó ali-líli limíiki inítatamóza, hanuva lá oakaláa lá niko vatí oko minanogo uve. Itó netá no gelekelé oko minoaká itó hukonopakonó oko minoaká itó minumuni amupiló minoakape itó gaúna gamenámíni amupiló minoakape nenéminí agikagú vávani oko minoakalímíni mogonamú vitagá uke uke mota gelekuve. ¹³ Kilistó zámuzá nemekago ámina zámuzá ale minuke haitopaitó netá golesámíni lamanalímíni amupiló ale vatí okuve.

¹⁴ Lá onoimóza, lekeza nene miluma maluma geleko nougo nilími lamaná iaká amó nenemú gulugo etoaká noive. ¹⁵* Pilipi numutoka ve vená lekeza není gakó mota gilínave.

* 3:17: 1 Koli 4:16, 11:1 * 4:15: 2 Koli 11:9

Neza Izesuni gakó lamanalamú hozaváa apí u gamenaló nene Masetonia mikasi ahuloko novugo, Izesuni vejenala zuha lugáa hanuva niago lekezagó monó lusa lukumugo moni nemego oko minunimó neve. ¹⁶* Itó Tesalonika numutoka nougo, nugupémini netakumú hizi lé initiki minamóma neve. ¹⁷ Neza nene henokanonimú ma lamúve. Monolímini gihiláa lekelitoka utó okoko minoloko ititive loko noluve. ¹⁸ Itína imane netá matá ali utó miliniti asú amó vaí oko nego nenemú gilitave loko luhuva imane gizo nolukumuve. Eapolotaetasi nene lekelitokatí netá aleloko oko nemekago, henónegi ve loló okuke nouve. Lekeza lehizinita netakumú gelekugo Ómasi guguni gizi amikago anuva lamaná imó gelekave. Itó Ómasi laga avisi netá gelekave. ¹⁹ Ómasine eza minumuni ale utó oaká amelaho nene Izesu Kilstotoka miní amemómave loko netá matá lamaná avilisá olikimikiko netá makokumú ma vítagá aminigave. ²⁰ Ómasi ameteho aitoka nene agepoka loo loo nenémo mino-loko iteko alévolé oko minino. Lamaná.

Gekéini loketamó

²¹ Izesu Kilstotoka viki gímiziake Ómasímini vejenala zuha lilí iki nia vejená nene gekéini noloketuze, li kimilo. Itó nígive nagave nezagi miniaká nia vejenalitegi geketini nililikitave. ²² Monó gele vejená imane mukilite geketini lilikimiaká niamóza, agulizaki ve napa Sisani gelekelé imiaká nia vejenalite aliki itiki lá ilikimiaká niave.

²³ Guivahani Izesu Kilstoni nasahilí nenémo lekemetamekú vo holoko minino.

* 4:16: Apo 17:1

Kolosa Vegenalitini Luhuva Pauló Gizo Kimimó

Kolosa vegená nónohá kimike gizo kimi gakó

¹ Neza Paulona Ómasímíni gakató Izesu Kilistoni aposolo ve loló utímína neza itó ligivetehe Timotiki makó nousike ² Kolosa numutoka monó gele vegená ligive lagave Kilistotoka alévolé iki gímiziki nimína vegená nene luhuva netá imane gizo nolukumuve. Ómasi ameteho aitokatí nasahilí itó hulu lekelitoka mino moloko minino.

Kolosa vegenakumú Ómasiloka límó

³⁻⁵ Lekeza Izesuni gakó gihila lamaná nene lekelitoka gozapá utó okago okulumakú monó helisa henoni lekeza ali lá itave loko gozapá mololeketakumú giliake alitune liki lakagata losi gelemake ageva iki miniaká niamole liki Izesu Kilistokumú gili alévolé iaká niamó itó monó gele vegená mukitoka likigika kimiaká niamó nenémíni gakó likago gelekusike leza Guivahanite Izesu Kilistoni amelaho Ómasi nene lekelikumú gamena gamena agepoka loaká nousive. ⁶ Ámina gakó lamaná nenémo numutó namató hutilí oloko vova vova oko gihiláa ale utó oaká noimómámíni oko lekelitoka ganá apí oko anitekago Ómasímo nasahilí olimiaká noi gakó nene lamanatotí gili guni iake, nene gamenatotí lekelitoka ámina oko gihiláa utó oloko voaká noive. ⁷ * Ligivetehe ligika amenousi ve Epapalá lelikumule loko Kilistoni gelekelé izegipala lamaná áisi mota ámina gakó gihila lo lekemekago gilinámoma neve. ⁸ Áisi nene Sikalahulímó lekelémo vávani igo likigika eza amigo eza amigo iaká nia gakó geleake mota oko lo lemekave.

⁹ Leza gakatíni lamaná gelekusike áminaló apí oko Ómasímo geleakatíni ale napa okiko eza geleko moloko imoláa giliiki Sikalahulímíni gele vevesoaká gakola gili guni iki gilitave loko Ómasiloka loko nominusive. ¹⁰ Itó lekeza miníki alíki iki milíki itamó nenémo mogonatiní ale utó molokiko Guivahanímó ániogikiko lamaná itive loko, itó monokú hoza haitopaitó nalíki nenémíni gihiláa ali utó itave loko, itó láa niiki Ómasímíni mogona gili guni iki gilíki minatave loko numuna loaká nousive. ¹¹ Itó Ómasímíni zámuzá nene sigagavagi netá olíó itítimó nene víki akamíki legesó iki ali gihíiki mulutíkú ágila guluma íko minatave loko numuna loaká nousive. ¹² Itó ameteho eza veletoka lapanalagi apakú helisa henoni mololetamó nene monó gilína vegená lekezagi ízá milíki alítave loko ale vavá oko mololeketamó nenemú mulutíkú lamaná gilíki agepoka lilo. ¹³ Ómasi eza límugusi amelahíni zámuzalotí gologí olimíake ániago amu híli gipalámíni gízapaló nominuhakú lelémo molamó. ¹⁴ * Gipala áisi nene lihimate ahulolimiake gologí oletake meinavate hizimó neve.

Kilistoni ametamenigi hozavagi

¹⁵ Gipala áisi ániogamoaká ve Ómasímíni ametamenigi utó ike netá mukí avilegeko mína vémo nominave. ¹⁶ Lá oake minoakató netá mukí okulumató itó mikasiló ale utó o asú oko ale utó imó nene ániogakalímíni itó ániogamoakalímíni, vegená ahe itó ageló ahe zámuzalagi lelege loko mína netá nene helisa iteko minamó nenehe itó kugulizaki ve minamó mukí nene aí zámuzaló utó amó neve. Itó aí mututoni itave loko utó amó neve. ¹⁷ Itó netá mukí utó amigo amunalotí emane gipala eza mino-loko voko minamó. Itó netá matá mukí nene aí zámuzaló apize lamaná okave. ¹⁸ * Itó áisi nene agisa agizani loló oko nouhá vegená nene lelí gotola loló oko noive. Lá noiike apí oaká itó vegená helenosakutí ale goí oko mómoká oko oteaká amelaho minake netá mukí nenémíni lapusáváa loló imó. ¹⁹ Ómasímo ezáa ametamení nene gipalaloka mulusi moloko minative loko gelegago etamó. ²⁰ * Itó netá mukí nene okulumatoka itó mikasiloka Ómasi ezáagi goha lelémo apizimóma neve. ²³ Itó nenemú lekeza gele alévolé oakakú alévolé iki miníki luhusatíni ali kii lominago Izesuni gakola lamaná giliake monó helisa henonimú lakagata losi gelemiki ageva iaká niamó nene gopa olíkimikatize, gelegele huzá giliiki minamilo. Ámina netakumú gakó lamaná li

²¹ Lekeza gozapá Ómasígi otópá zíkí minake gala veva lílí iki minake lekemekesa amiake netá golesa haitopaitolímíni alíki miniaká amóma nemóza, ²² itína Kilistoni agupe hílimó nenémo hulu lekemekago, likigika gizopa lo miníko apazá keké víziki Ómasímíni avogisaló líhima nomímó minatave loko goha aitoka lekelémo apizimóma neve. ²³ Itó nenemú lekeza gele alévolé oakakú alévolé iki miníki luhusatíni ali kii lominago Izesuni gakola lamaná giliake monó helisa henonimú lakagata losi gelemiki ageva iaká niamó nene gopa olíkimikatize, gelegele huzá giliiki minamilo. Ámina netakumú gakó lamaná li

* 1:7: Kolo 4:12; Pile 23 * 1:14: Epe 1:17 * 1:18: Epe 1:22-23 * 1:20: Epe 2:16

likiminámoma nene lekezagó ma nomive. Numutó namató vejená li kimiliki vinamóma neve. Itó neza Paulona nenémíni gelekélé izegipala loló oko nouve.

Pauló monó gele vejenalitíni gelekéléa minamó

²⁴ Neza lekelikumulé loko miluma netalímíni amupiló nominuve. Nenemú imane gelekugo lamaná onoiwe. Kilistóni agupémíni agisa agizani líl'íki nía vejená lekelikumule loko Kilistó miluma maluma gílimóma neve. Ámína milumámíni nekisaloka miní ameko geleká netá nene není numupiló itekago ale asú ito hoza naluve. ²⁵ Neza Ómasímíni gakó híze hutíl'í oloko vítive loko monó gele vejenalitíni gelekéléa minínake lekelitoka Ómasímíni gacoláa lo lekeme-loko novoko ale lutigitane loko nelémo etó imóma neve. ²⁶ Vegená omolelé amalelé íki miní-likí nítego ámína asuguná gakó amegesáa nene vejenalite gelemítave loko halá geko minokago gelemunike hanuva minuháza, ítína gamena nene monó guluhá vejená ale vesamá oko lo lemekamóma neve. ²⁷ Itó hetoka vejenatoka gakó amegesámú minumuní lamaná minamó nene monó gele vejenala nene asuguná gacolímíni gíhíláa lo utó moloko lo limímó nene lá oko neve: Kilistó eza mulutikú minoaká noikumule líki okulumakú helisa henonímú lakagata losí gelemake ageva iaká níave. ²⁸ Ái mogona lo utó moloko numutó namató vetítoka lo kemeaká noune. Gele vevesoakatunú kagata aleko lainim-olikimíaká nounímó nene Kilistóni vejenala gíhíla líl'í íki aítoka gímíziiki líkigíkámo monokú napa omo iteko alévolé oko minative loko ²⁹ ái zámuza sipísi nenémo híze lé onímikago hozaváa nene amuza moloko aleaká nouve.

2

¹ Neza lo líkimitoze, gíliilo. Lekeza níamó itó Lautisia numutoka vejená níamó itó vejená lugáa nogoka ángíma vejená lekelikumule loko hoza aleloko vonoumó nene lagasó nomíve. ² Lekezagi líkigíkatunú amuza míliki líkigíka eza amíko eza amíko íki múnahi lamaná íiki netakumú gíli vevesíiki Ómasímíni asuguná gacolímíni mogonáa itó Kilistokumú gíli guní íki neneloka víki gímíziki minatave loko hoza aleaká nouve. ³ Aítoka nene líkigíkágu luhuva utó oakalímíni gele vevesoakaláa nenémíni ohunáa halá geneimó neve. ⁴ Ve makolímó laga líkivísítí gakó lo lekemekíko líkigíka gopa okative loko gakó imane lo nolukumumó nene ⁵ nezáne nugupetunú hotó minúke nígíkatunú lekezagi nominúke lekeza Kilistokumú gíli alévolé íake múnahi lamaná íake alévolé íki níminámó nenemú gelekúke mulúnégú lamaná geleká nouke luhuva imane gizo nolukumuve.

Kílistotoka gímízitunímó nene lígíkámíni netá makokumú vítagá aminogó une

⁶ Lekeza Izesu Kilistóni nene Guivahaníte loló o límitive líki alí mulutikú mílamómámíni lelegító nene aítoka gímízi lamaná íiki íki míliki ílo. ⁷ Lá níiki aítoka luhusatíní alekíko miní gíkítíki mínaló. Itó monó gapo lekelepízínámóma nene áminamalokó lísi lísi nívíki lehízeleketa netakumú agepoka líi líiki minatamó nenémo líkigíkágu vaí oko mínino. ⁸ Ve makolímó vejenatokatí geleká gakó itó logoka vízeaká gakó hutuváa lo lekemekíkoma, nenégú víki nagá íkataze, gízapa íki mínaló. Gakó nenémínáa nene avoteginí kígíkatutí utó okago omolelé amalelé íki mínilíki ítetoka itó míkasímíni amupíló gíhíláa nomí netakumú lí míla gakotó gímízi minake líaká nía vegutí neve. Kilistóni gakó nomíve. ⁹ Gílináhe. Ómasímíni avevezahaváa mukító nene Kilistóni agisa agizatokagi agupeló mukí mino gíkí oko neve. ¹⁰ Lekeza aítoka gímíziáke líkigíkámíni netá makokumú vítagá aminígave. Áísi nene gízapa oaká netá itó kugulízakí níamó mukílítíni gotoláa noiwe. ¹¹ Aítoka gímízíkago nene líkigíkaúka Kilistóni luhuva neve. Vegenalíte kígízanítunú lukugupeló luhuva zeakaláa nene nomíve. Mínikí alíkí íki míliki íaká amó lítaha nene gololohá í ahulíake Kílistotoka vake nene gosohá líl'í ínamóma neve. ¹² * Monó nagamí hílílíkítake áísi hílíkú miní amílíkítínámóma neve. Lá íkago eza zámuzalatunú Kílistóni alémo otí zámuzamú gíli alévolé íkago gosohá lekemetamekí miníkí alíkí ítató miní ameleketatove loko lekélémo otímóma neve. ¹³ * Lekeza gopezá líkigíkaló itó lukugupeló Ómasímíni anosa nomímó minake golesa netá gopánapa alíkí minamómave loko líkigíka hele vímó níago, Ómasí eza líhímvatíní ahuloake Kílistókí lekelémo otímó neve. ¹⁴ * Lá ímó nene gakó pelevesava zeaká uníkumú goní oletatí luhuva gizo molamó nene gílató nahulake nenémíni líhíma ale nupa okoko zohota zaló apatekago háha okamóma neve. ¹⁵ Lá noiwe kugulízakí itó amuza míli mína ve lovagú kívílegeake zámuzááni gologolo soketakumú vejená kovogísáló kovoza helepelé ímó nenémíni mogona ale utó molamóma neve.

¹⁶ * Nenemú nosánetá makokumú ahe itó soza saza holísímupe itó íkanímíni holíváahe itó holísí ale etó oko mínoakakumúpe itó mínamoakalímínímupe ve makolímó ámína netakumú

* 2:12: Lom 6:4 * 2:13: Epe 2:1-5 * 2:14: Epe 2:15 * 2:16: Lom 14:1-6

lihima alikave loko nolikoma gili amemilo. ¹⁷ Netá nenémináamú hanuva hutuváve loko litune. Gihiláa nene alika utó itive loko samapala noave loko litune. Itó gihiláa nene Kilistotoka utó oko neve. ¹⁸ Ve lugáate likimimí lakamamá iki lekezatini aliliki limiki minata gakó li likimiki iki ageló vevená gupá zi kimitave liki lakagata hiziki itó ligikate mino viligokago netá ángo vevesoaká une liki li likimikikoma, nenemú gilikiko gihila loló amino. Hanuva kagata giliakaláa nemóza, kugupéini nene hanuvamú aliki itiaká niave. Ve nenémináate monó gihilátatini ipá ilikimikataze. ¹⁹ * Keza nenémináa Kilistotoka viki gímizemó mota gologolo sokave. Áisi nene gotote noigo lélisi nene agisa agizanía nounge. Agisa agulúnaha nenémo limike luhusate ale gikitoletamó. Lá oake múnahetoko hizevo lé ovo oletake noigo zámuza Ómasilokatí alekunike utó o napa oloko voaká nounge.

Kilistó hilitó miní amekunike ligika heleneikutí otekune

²⁰ Kilistó hilimó neneló lekeza miní amiki lukugupémíni netakumú li hukina gakó gele aleakakumú mota hilikamó geleneimóma nenazo, imane mikasímíni amupiló gihiláa nomí netakumú li huka gakoláa nanamú gelekelé iaká niave. ²¹ Li huka gakóma láa loko neve: Nene ale gelemo. Volane namo. Imane no gelemo. Gakó nenémináa livi hukivi iaká niamó nenemú noluve. ²² Ale geleko nokuko asú oaká netakumú li hoipa iaká niave. Itó vevenalite hanuva kagatatunú gelemó vevesokago ali nupa napa iki liaká niave. ²³ Ve nenémináate ha vevená nenémináate kezáini kagata geleke monó nenéminiki lilo liká itó lukugupelini ali limilo liká itó lukugupe apiliki zivi hutivi ilo liká nia gakó nene gele vevesoaká gakó gihilagitana loló okamóza, netá nenémináamo gihiláa nomive. Nenémináa nene lugupémo amu heleaká netalímíni gahe ma getaminogó ive.

3

¹ * Kilistó mómoká oko otimómáminiki lekeza likigika heleneikutí otinamó neneta, veletoka Ómasímíni zamagaloka Kilistó noitoka ne netakumú nene gili minalo. ²⁻³ Lekeza netá golesa alitakumú hele vevená lilí inamó gelekago, miniki aliki ita netalímó Kilistogegi lekeza monéna Ómasímíni amatoka voko halake minamó nenazo, mikasígú netá matá nemó nenemukupa, veletó netakumukó giliki minalo. ⁴ Kilistó eza miniki aliki atímíni mogona noinazo, eza goha utó noiko lekezagi nene aí lapaná hugepavagi izá miliki alinigave.

Litaha ligikámo oko moloko imó gololohá okunike ligika gosohá ale luhokune

⁵ Nenemú netá lá okomú nene etó iki miniki lukugupémo mumuzó iti netá nene musi netá, golotuva netá, mulutini gitihiná oaká netá, mokoló mogona, itó mulutikú nihunihu loaká netá, nenémo sozaló ómai netá ámegetoaká suni nenazo, netá nenémináa apili hilikiko helegelesino. ⁶ Ámina netá mukikumú nene Ómasilokatí mesaha utó inogo ive. ⁷ Itó lekeza gozapá ámina iki netá nenémináa ali minago likigika loló imóza, ⁸ itína nene ahulalo. Mukahá pakaha, hokolizá, mesaha, hokolizá, ulínaka gakó, itó golatalaka gakó netá nenémináa nene ahuli asú iki ahulalo. ⁹ * Litaha likigikámo oko moloko i netá nene gololohá iki ali ahuliake likigika gosohá ali luhikamó nenazo, soza gakó eza lo amiko eza lo amiko amilo. ¹⁰ Aí mogonamú gili vevesatave loko gosohá lekemetameni nene ezáa ametamenigítana oko lelémó utó itímo ale lamaná ova ova oaká noive. ¹¹ Nenemú haitopaitó minuháma nene asú okamóma neve. Hetoka vevená minuhá itó Zuta vevená minuhá, lugupeló Ómasímíni anosa nemó nomimó, zauka vevená itó gihisígú vevená, megusámíni nagakú niamoláa minamamoláa monéna minamuko, Kilistó ale nupa oko lelí ve napa loló oake mulutegú mino vai oko noive.

¹² * Ómasímíni vevená lekeza ezáa agika lekemeake lekelémó etó okago apazá niamó nenazo, nenemú lekeza likigika hize kimiaká itó nasahilí ikimiaká itó likigika lamanaki minoaká itó lukugupe aliliki limiki miniaká itó likigika ale geha zekago legesó oko minoaká nenémo gineganetini loló okiko ali luhiiiki ali minalo. ¹³ * Lekeza hulu vevená miniki itó holutikú gakó utó noikoma Guivahanímó lihimatini ahulamó nenéminiki lekezagi lihimatini eza ahulotiko eza ahulotiko iki minalo. ¹⁴ Itó netá mukí nenéminí amupiló likigika kimitamó nene mukí netá ale nupa oko múnahékago mino hamó oake avasavagi minoaká netá nene ali luhiki minalo. ¹⁵ Lá okiko Kilistoni hulúmo likigikagú gizapa oletetino. Ámina hulu lekeza ali lá itave loko Ómasímíni lekelémó etó okago aí agupe hamó lilí inamóma neve. Itó lekeza lehizelikimiaká noi netakumú agepoka liki minalo. ¹⁶ * Kilistoni gakolímó likigilikagú hize hutilí oko minino. Itó Ómasímíni gele vevesoaká gakó haitopaitolímíni eza lo amiko eza lo amiko iki lekezatini lakagata aseva aliki lainim-ilikitalo. Lá niiki

* 2:19: Epe 4:16 * 3:1: Age 110:1 * 3:9: Epe 4:22; 4:24 * 3:12: Epe 4:2 * 3:13: Epe 4:32 * 3:16: Epe 5:19-20

likigikatunú Ómasi geké litiki monó nama itó ipá apá nama itó Sikalahulímo lekelémo vávani iko gosohá nama liki likigikatunú lokogoliza vizé vizé iki Ómasi agepoka lii liiki minalo. ¹⁷ Itó lekegepatunú ahe itó likigizatanunú ahe netá iki miliki inígima nene Guivahani Izesuni agulizá iki netá mukikumú Ómasi ametehini agepoka liki minalo.

Lezatete izolaho amelaho gekelelé izegipa kugulizaki ve gosohá iki miliki ita gakó

¹⁸ * Vená lekeza vatinitini kagahaisiuka limiki minalo. Guivahanímini mututoni lílí ikatita nenémini ikiko lamaná inogo ive. ¹⁹ * Ve lekeza venatini likigika kimilo. Itó alévoleka li kememilo. ²⁰ * Itó gipa mohó lekeza izotike ametike mukí gakó lítamó nene gili alilo. Lá itamó nene Guivahanímo giliko lamaná inogo ive. ²¹ * Izóikita améikita lekeza izegipatiní kizapaló moloko goselé kípiliti netá lílí ikitamilo. ²² * Itó gekelelé ve lekeza mikasiuka kugulizaki velinitini gakó nene netá matá mukikumú gili alilo. Itó keza lugupeló ángigikiko lamaná itive liki gili minikigopa, likigikagú lovaleta minamiko Guivahani Izesukumú goliva gili miniki lá ilo. ²³ Hozalini mukí nene vegeinakumule likigopa Guivahanimule liki likigikámo vávani iko iki miliki ilo. ²⁴ Lá niiki lekeza Guivahani Kilistoni gekelelé imiaká nianazo, lekelí hozámíni meinaváa okulumakú helisa henoni nemó nene Guivahanilokatí alitunimó neve liki gili miniki hoza alilo. ²⁵ * Makó keza hozaváa makó ali golesa iki alitamó nenémini helegáa alinígave. Itó Ómasímitoka iteko lemeko negopa, hamó lelegító liminogo ive.

4

¹ Lukugulizaki ve lekeza gekelelé izegipatinítini netá makó ali gopa ikitamilo. Ali hehe likítiki kimilo. Itó lekelí Guivahani okulumakú noinazo, alika lelí hozámíni mogona ale utó inogo ive liki gili minalo.

Kagata aseva aleko loketa gakó

² Lekeza goselé lekepelemiko Ómasiloka liki minalo. Itó gizapa iki niiki lehizeleketa netakumú agepoka lii lii iki minalo. ³ Itó Ómasímo monolímíni gahe segelimikiko, Kilistoni asuguná gakoaláa lo utó oko lo lamaná oko lo kimitune liki numuna lilo. Nene gakokumule loko nagá numukú nominuve. ⁴ Itó numuna loakatunú hizi lé inimikiko, neza gakó nenémini lokugo etatító nenéminoko lo utó oko lo kimitoze.

⁵ * Ómasímini geisa hetoka mína vegeñaki hotu li lomala iiki keza mikuka ititave liki netá matá ali guni iki lílí ikitalo. Netá lamaná aleaká gamena utó olíkimitimó nene ma likivilegemino. ⁶ Gakotini nene age hilimikiko lagaváa loló ino. Lá okiko vegeñá makolite gakó némini manámínámú nana oko ale viligoko lo kimitune liki ligitagani aminígave.

Geké loketamó

⁷ * Není avetó gakó nene Tikikó lo likiminogo ive. Eza ligiveteho nigika amenou ve Guivahanímini gekelelé izegipa gakó gele aleakalímíni noive. ⁸ * Eza nene minoko aleko nouhatímíni gakoaláa lo lekemekiko likigika ale hulu itive loko lekelitoka amiselekugo núane novive. ⁹ * Itó Onesímo monokú alévolé oko nomina ve ligiveteho nigika amenou ve lekelí numutokatí vema ezagi itína amiselekugo makó viki imane numutotí gakoaláa li likimi asú inigasive.

¹⁰ * Nagá numukú ahulilimikago nousi ve Alistakó itó Panapasini aholaho Makí itó Zosúa agulizaláa makó Zustó keza geketini nililikitago noluve. Makini gakoaláa goí oko lo lukumómá nenazo, áisi vo anitekikoma ali lakamatoka milalo. ¹¹ Zuta vegeñakutí Izesuni gakató ámegeta vegeñakutí ámina ve losive makole nenete kezagó Ómasímini giza-paló minoakalímíni hozavámú nilími vatí iaká niave. Lá ake mulutegú ali lamaná iaká niave. ¹² * Itó lekelí numutokatí ve makó Epapalá eza Izesu Kilistoni gekelelé izegipala makolímó nene geketini nololeketago lo nolukumuve. Áisi nene Ómasímo híze lé oleketiko lekeza Ómasímo lítitoka molatitoka gili hee liki monokú lakagata gululusi gelemiki olopagó minatave loko amuza moloko Ómasiloka loaká noive. ¹³ Neza aí mogonáa mota gelenouke lo nolukumuve: Lekelikumupe itó Leotisia numutoka itó Hielapoli numutoka monó gele vegeñakumupe miluma hoza sipisi aleaká noive. ¹⁴ * Lelí lusa ve tota nigika amenou ve Luká itó Temá keza geketini nililikitasigo lo nolukumuve. ¹⁵ Neza Leotisia numutoka monó gele vegeñá itó monó vená Nimipá itó Ómasímini vegeñala zuha aí numukú monokumú

* 3:18: Epe 5:22; 1 Pit 3:1 * 3:19: Epe 5:25; 1 Pit 3:7 * 3:20: Epe 6:1 * 3:21: Epe 6:4 * 3:22: Epe 5:6-8 * 3:25: Epe 6:9 * 4:5: Epe 5:16 * 4:7: Apo 20:4; 2 Tim 4:12 * 4:8: Epe 6:21-22 * 4:9: Pile 10-12
* 4:10: Apo 19:29, 12:12, 13:13; Pile 24 * 4:12: Kolo 1:7 * 4:14: 2 Tim 4:10-11; Pile 24

alegesá iaká nia vejenakumú gekéini noloketuze, li kimilo. ¹⁶ Lekeza luhuva netá imane vejená muki gati kimikiko gili asú iki gilikiko, Leotisia numutoka monó liaká nia vejenatoka milikiko vokiko nene gatatave. Itó keitoka luhuva makó gizumó nene áminámini iki likimikiko lekeza gatataze. ¹⁷* Alikiponi nene monó hoza Guivahanímo lehizegetamó nene legesá oko minoko ale lutegeko alezo liki li amilo.

¹⁸ Neza Paulona itínasa luhuva nogíza vémini agizakutí luhuva gizoaká nogosanima alekuke nezáne nigizanitunú nugulizáne imane nogizuve. Nagá numukú noumó nene lakagatí molokatize, nenemú gili minalo. Ómasímini nasahilí nenémo lekelitoka mino moloko minino.

* 4:17: Pile 2

Tesalonika Vegenalitini Luhuva Nampa 1 Pauló Gizo Kimimó

Tesalonika vegená nónohá kimike gizo kimi gakó

¹* Neza Paulona itó Sailasiko Timotigegi makó nounike Tesalonika numutoka Ómasímini vegenala zuha Ómasi ameteho itó Guivahanite Izesu Kilistoni vegenala zuha lekeza nene luhuva netá imane gizo nolukumuve. Nasahilí itó hulu lekelitoka mino moloko minino.

Tesalonika vegenalite Ómasimú gili alévolé ake monó gapoló vamó

² Leza gamena gamena lekelikumú Ómasi agepoka lova lova oaká nounge. Itó numuna nolunike lekelikumuki geleko loaká nounge. ³ Lekeza Ómasimú gili alévolé iaká nenémini gihila ali utó iaká niave, itó vegená nasahilí ikitake likigika kimiaká niave. Guivahanite Izesu Kilistokumú alévolé iki lakagata losi gelemiki ageva iaká niave. Nenemú gele-nounike ameteho Ómasímini avogisaló agepoka loaká nounge. ⁴ Ligivetegita, Ómasímo agika lekemeake lekelémo etó imó nenémini gihila nene ⁵ Izesuni gakó lamaná aleko voko lo lekemekuko, ha gakó loló imó negopa, amuzavagi nego, Sikalahulímo nene gihiláa neve loko lo likimimóma neve loko gelenounge. Lekelitoka minunike lekelikumule loko oko moloko unike monó hoza alunimó nene mota gilinave. ⁶* Lá okuko, oko moloko unitó nene lekeza iki miliki iake, Guivahani oko moloko itoki nene iki miliki niave. Lá ake nene, monokumule liki gopoguni nimililitago, Ómasímini Sikalahulímo lekelémo vatí igo, gakó lamanáma gili alikago, mulutikú agila guluma lamaná imó neve. ⁷ Lá iake, lekeza goí iki monó gapoló nivago Masetonia mikasiuka itó Akaia mikasiuka monó gili alévolé a vegená lekeza atímini iki iki miliki amó. ⁸ Lekelitokatí nene Guivahanímini gakó lamaná puu loko vike Masetonia mikasiukagi Akaia mikasiukagi vimó. Lá imóza, nenegó nomive. Lekeza nene Ómasimú gili alévolé amó nenémini gakó nene numutó namató vokago, nenemú lezate lo kimitunimoláa makó nomive. ⁹ Holutikú hozaváa alekuko nenémini gihiláa utó i gakola nene kezáini li limiaká niave. Lekeza nene soza ómai netá lekemegeza amiake Ómasi alévolé ve gihilaloka gímiziki gelekelé imiake, ¹⁰ gipala heneneikutí alémo oti ve Izesú minomo iteko okulumakutí limitikumú ageva iki niave liki li limikago gelenounge. Áisi nene gamena napaló mesaha olimioko nogosani limitikutí nene lugutó vizeaká ve noive.

2

Pauló Tesalonika numutoka monó hoza alimó

¹ Nigivénegita, lekelitoka vunike hoza alunimó nene ha amimole liki lekezatini gilinave. ²* Ganá nene Pilipi numutoka gopoguni mililitake alivi letivi ilitamó nene lekeza mota gilinave. Lá ikamóza, Ómasímo lukesate hize lé olimikago lova vetini holúikú lelegesá legemigo minunike Ómasímini gakó lamaná lo utó oko lo lukumuháma neve. ³ Lakagata aleko lo lekemeaká nounimó nene gele gopa napa oko, soza ligikagi nouhakutí utó osá amive, itó lokogoka vizeko lo lekemesá amune. ⁴ Ómasímo ángoletago, etokago, Izesuni gakó lamaná geleko ale gúekinake lo kimitune loko lelémo etó okago, ámina gakó nolune. Vegenalite giliko lamaná itive loko nomive. Ómasi eza ligikagú ángoaká vémo gelekiko lamaná itive loko lo lekemeaká nounge. ⁵ Lekelisi nene lelí mogona gilinave. Leza lekelitoka minunike, asungatoka moni henonimú voká linogo lekegepoka loaká gakó itó lukugupe aleko iteaká gakó ma lo lekememune. Ómasímo gelekago noluve. ⁶ Lekelisihe itó numutó namató vetehe lelikumú giliko itekiko lugulizaki ve loló itune loko lamune. ⁷ Leza Kilistoni aposolola nouninazo, nenemú netá matá makokumú voká lokuko lemelinamó nene lamaná ilinamóza, lá oko nomive. Izóike keza izegipáini kilími kava ziaká niave. Áminagó oko leza nene lekelitoka minunike lekelémo kava zeaká unimó. ⁸ Nenémini lagaváa nene ligika lekelitoka minokago Ómasímini gakó lamaná lo likimitune lokogó lamune. Ligika lemeni lekelitoka lekeme gikitatune loko ligika lekelitoka nego luháma neve.

⁹ Nenemú ligivetegita, moni henonimú nagá zeko ale minuko goselé lekepelekatíve loko únaká neteká lugupémini hoza amuza moloko itó vauva aleko minunike, Ómasímini gakó lamaná lo lekemehá mota gilinave. ¹⁰ Leza ligika hanato minago hee hee loko lihimate nomigo minunike, monó gele vegená lekelitoka oko moloko unimó lekezagi itó Ómasimogi mognate mota gilinave. ¹¹ Lá iake, ve makolímo izegipa palaloka oko moloko oaká noimo

* 1:1: Apo 17:1 * 1:6: Apo 17:5-9 * 2:2: Apo 16:19-24, 17:1-9

nene leza lekelitoka áminámini oleketunike, etó etó oko gakó lo lekeme asú unimó. ¹² Lá unike, lakagata aleko lekelémó kii loleketunike Ómasímini avogisalo itiiiki aí lapaná ali lá itave loko sele lo lekemeaká noi ve Ómasímo gelekiko lekeza iki miliki iko etative loko lo lekemeaká uháma neve liki lekeza mota gilinave.

¹³ Leza nene Ómasímini gakó lo lekemekuko, vegeñalitiñi gakó loló amimó. Lekeza nene Ómasímini gakole liki giliake ali gúinamóma neve. Itó lamaná lá oko neve. Ómasímini gakó nenémó monó gili alévolé ina vegeñá lekelitoka hoza aleaká noive. Nenemú lélisi nene Ómasi agepoka lokogó nominune. ¹⁴ * Ligivetegita, Ómasímini vegeñala zuha Zutaia mikasigú Izesu Kilistotoka viki gímize vegeñaki lekezagi hamolímíni iki iki miliki niago gasovagi netá líli ilikitamó. Keí nene Zuta vete gopogu galatakalatá ikitamómámini iki likigivetike lugáate gopoguni mililikitamó. ¹⁵ * Zuta ve keza Guivahani Izesuni itó Ómasímini agepagutí gakó liaká a ve ámina iki kipili helemó, itó leza lipiliki limiselemóma neve. Keikumú Ómasímo giligo lamaná amigo, numutó namató vegeñalitiñi lova ve líli iaká niave. ¹⁶ Lá niake, hetoka vegeñá monó lo kemekuko, lamaná ikatave liki gapo hize lí itupe liki lovaga li limiaká amó. Keza lá iva iva ikago, keí lihima nene amupiló amupiló oko iteko minokago, Ómasímo izapaló molokago, nenémíni lovváa mota keitoka anitekave.

Pauló Tesalonika numutoka goha vitove loko gilimó

¹⁷ Ligivetegita, gamena koma ahulo hotó oleketunimó nene ligikatunú nomive. Lugu-petunú lá unimó. Lekezagi minamunike, lekelí áñigatupe loko amuza moloko minoaká une. ¹⁸ Nene voko áñigatune loko lokunimóza, neza Paulona gamena gamena áñigatove loko nougo, Satá nene lelí gapo hize lí goha olimikave. ¹⁹ Lekelikú lagaváa geleaká nounimó nene lá oko neve: ²⁰ Guivahanite Izesú anititi zupa nene hí vegeñakumú mulutegú agila guluma noiko minatune. Hí vegeñakumú lagata gopa geesá amune. Lekelisigó nene lelí hozámíni gihila líli inamó neve. Itó lamaná lekelikumú agepoka loaká nounimó, itó mulutegú lamaná geleaká nounimó nenazo, nenemú lekelikumú logoliza vizeko minanogo une.

3

¹ * Lekelikumú miluma geleaká nouke, minoko aleko umó netamigo, nezagó Atena numutoka mininake, ² Timotíni amiselekugo, ahulonimioko lekelitoka vitive loko lo hukumó. Eza nene ligivetho noike Ómasímini hozaló ve minake, Kilistoni gakó lamaná loaká noi vémo monokú lekelémó vávani itive loko, itó ale kii loleketative loko, ³ itó lekelisi nene gopoguni mililikimikiko monó ahulikatave loko nene amiselekuve. Gopoguni mililimiaká niamó nenémó Ómasímo litó utó oaká noive liki lekeza mota gilinave. ⁴ Leza nene lekelitoka minunike goí oko lova nene lumupiló itinogo ive loko lo lekemenouháma neve. Ámina gakó nene alévolé okave liki mota gilinave. ⁵ Lá okago, ámina gasovagi netakumú nene gimilegú moloaká vémo gimilikú molahe, itó monó ahulahe, itó ali minaha, itó lelí hozámíni gihiláa haha okahe, monó alinamó nenémíni mogonáa gilitove loko lekelikumú miluma napa gelekuke minoko aleko umó netamigo, Timotíni amiselekugo vimóma neve.

⁶ * Itó Timotí nene lekelitokatí atiginá oko ake, gakó avetó oake lekeza gili alévolé amó itó likigika kimiake nasahilí ikimiaká niamó itó lekeza nene nenikumú lagaváa giliaká niamó itó neza lekelí áñigatove loko geleaká noumómámini iki neni áñigatune liki giliaká niamó nenémíni gakola lo leme asú okave. ⁷ Nenemú nigivénegita, gopogu galatakalatá nenémíni agikagú itó miluma geleaká nenémíni agikagú nouke, lekeza Izesukumú gili alévolé iaká niamó nenémíni gakó gelekuke mulúnegú geha zekave. ⁸ Itína lekeza nene Guivahaniloka viki gímiziiki alévolé initakumú gelekinake, ligikagú lamaná okiko, minoko aleko inogo une. ⁹ Itína Ómasímini avogisalo lekelikumú mulutegú agila guluma noimómave loko lekelikumú Ómasi agepoka loaká noune. ¹⁰ Guivahanímo gele lemekiko, lekelitoka vinake, eza áñigiko eza áñigiko inake, monó lugáa minoloko vonoimó nene miní ameko lo likimitune loko únaká netéka vauva aleko Ómasiloka loaká noune.

¹¹ Ameteho Ómasi ezáa itó Guivahanite Izesú gapo vevelimikiko lekelitoka vituninazo. ¹² Itó lekelitoka vokuko nene, Guivahanímo hoza alekiko, eza agika amiko eza agika amiko ita netalímo hutilí ino, itó ligika lekelitoka mulunimó áminámini iki likigika mukí vegeñatoka milatamó nenémó puu loko hutilí oko napa ino. ¹³ Lá okiko, Guivahanímo likigika nene ale kii lolikimikiko, Guivahanite Izesú eza vegeñala zuha mukí kelémoko ati zupa nene lekeza nene Ómasi ametehini avogisalo vihelé lo miniko etó keké viziki lihimatini nomiko minatave.

* 2:14: Apo 17:5 * 2:15: Apo 9:23,29; 13:45,50; 14:5,19 * 3:1: Apo 17:15 * 3:6: Apo 18:5

4

Oko moloko nouko Ómasímo giliko lamaná iti gakó

¹ Nigivénegita, Guivahanite Izesuni agulizató lakagata aleko gakó makó lo likimitoze, gililo. Monokú miniki aliki itamó nenémo Ómasímo giliko lamaná itimó nenémíni mogonáa lo lekemekuko giliake monokú minoakálimini iki mota niamó nene ámina iki amuza miliki minalo. ² Guivahanite Izesuni gakotó gakó lo lukumuhá nene mota gilinave. ³ Ómasímo gili agika nene lá oko neve: Mokoló netá ahuliiki likigika nene gizopa lo miniko minataze. ⁴ Itó etó etó iki likigika lamanatotikó hee hee liki vená alitaze. ⁵ Moko netakumú lukugupégú ló guluma iko nomive. Numuká vejená keza Ómasímini mogona gili hee hee lamatite lá iaká niave. ⁶ Ámina netá alita ve nene Guivahanímo áminámini meinaváa kimitive loko goí oko lakagata aseva aleko lo lekemenouháma nenazo, ve makolímo ámina suni alekoko agivelahini nene lihimavagi netá loló otamino. ⁷ Likigika golotuvagi minatave loko nomive. Likigika vové avetikó minatave loko sele lo likimimó neve. ⁸ Nenemú makó keza gakó imane gili ahulatamó nenete vejená ániagi ahulatagopa, Ómasi eza Sikalahú lekemeaká noi vema ániagi ahulanigave.

⁹ Lekeza Izesuni vejenala zuha lugáa nene likigika kimitave loko nanamú luhuva netá lekemeva lekemeva itune. Ómasi ezáa likigikatunú eza amiko eza amiko itave loko lo likimike lekelepizeneimóma neve. ¹⁰ Itó lekeza lamaná Masetonia mikasigú numutó numutó Izesuni vejenala zuha minimi vinamó nene likigika kimiaká niave. Lá iaká niamóza, goha napa iki nenémíni itave loko lakagata aleko lo nolukumune. ¹¹ Itó lo lukumunimó nenémíniki gakó vivi vovoga lamiki, numutikú legesó iki miniki, lekezatini netakumukó gili miniki, lekezatini likigizanitunú hoza alitakumú nene amuza milalo. ¹² Lá ikiko nene numuká vejenalite lekelikumú gili lamaná itave, itó ve makokumú gelegele minamiki minatave.

Guivahani atiginá iti gakó

¹³ Nigivénegita, lekeza nene hele vejenakumú nene monó gelematite okulumakú monolímíni helisa henoni alitune liki gizapa isá amamó nenémíniki miluma napa giliki ive nama ikatave loko lo likimitoze, gililo. ¹⁴ Leza Izesú heleake goha oti gakó nene gele alévolé onoune. Ámináminoko Ómasi eza Izesuni alémo atiginá iti zupahé nene, Izesukumú gili alévolé iake hele vejenaki ezagi kelémoko anogo ive. ¹⁵ * Guivahanímini gakola makó lo likiminogo uve. Mikasiuka logómulagi nouko Guivahani anititimó nene, leza nene hele vejená kivilegeminogo une. ¹⁶ Guivahani ezáa okulumakutí limitove loko gamoga geko sele lolimioko ageló vejenalitiní agulizaki venini anó lupa itó Ómasímini pikuli anó nomiliko liminogo ive. Lemekiko, Kilístokumú gili alévolé inake helemó keza goí iki otinigave. ¹⁷ Otikiko, logómulagi ha minunimoláa nene Ómasímo lelémo otopá zekiko, keitoka límusi amupiló noitinake Guivahanigi hotu lanogo une. Guivahanigi mininake mino lúaló moloko minanogo une. ¹⁸ Nenemú lekeza gakó imane ligili hagili iki eza alémo alévolé otiko eza alémo alévolé otiko iki minalo.

5

Guivahani atikumú gizapa oko minatune

¹⁻² * Ligivetegita, guminaló ve keza holugú litá iki anitiaká niave. Áminagó oko nene Guivahanímini gamena nene galinali alitanogo ive liki mota gilinaamó nenazo, nenemú Guivahanímini gamenavamú nanamú luhuva gizoko lo lekemeva lo lekemeva itune. ³ Nene gamenaló vejená keza mota hulu okave líiki legesó iki niiko, golivagi netá litá oko aniteko kumupiló itekiko goha nene inigave. Izegipa agatupagi vená makolímo litá oko galinali miluma geleko ininá oaká noimó nenémíni oko vejenatoka anitekiko, nana iki golisi itamó neve.

⁴ Lá onoi móza, ligivetegita, lekelisi nene límugusigú minamave. Nenemú Guivahanímini gamena nene guminaló ve nenémíni oko litá oko galinali anititimó nene lekeza gatzá niiki ininá itató niamave. ⁵ Lekeza lapanalímíni itó livilímíni mututoni niave. Límugusímini mututoni minamune. ⁶ Nenemú ve lugáa nenete kovó akiaká niamó nenémíni iki akamilo. Matutini gopa amiko lekezatini gizapa alévolé iki minalo. ⁷ Kovó akiaká nia vejená keza límugusigú kovó akiaká niave. Itó nagamí niaká vejená keza límugusigú níkake kígika gopa oaká noive. ⁸ * Lá onoi móza, lapanalímíni mututoni loló unimó nene ligika gopa amiko gizapa oko minatune. Lá inake Ómasimú gele alévolé itunimó itó ligika eza amiko eza amiko itunimó nenémo lagele loló itive. Ómasímo lugutó vizitikumú lagata losi gelemoko

* 4:15: 1 Koli 15:51-52 * 5:1-2: Mat 24:43; Luk 12:39; 2 Pit 3:10 * 5:8: Isa 59:17; Epe 6:13-17

ageva oaká nouhá netá nenémo lelí geha akilí loló itive. ⁹ Nenémini mogonáa lá oko neve: Ómasímo mesaha olimikoko nogosani limitove loko lelémo etó amimóma neve. Eza Guivahaníte Izesu Kilistoni lugutó vizeaká netá ali lá itave loko lelémo etó onomóma neve. ¹⁰ Guivahanímo lelikumule loko hilimó nene leza helekinakehe itó logómulagi noinakehe ati gamenaló ezagi minatune loko lá imóma neve. ¹¹ Lekeza nenemú itína aliaká niamó nenémini ikigó eza hize lé otiko eza hize lé otiko iki itó eza luhusava aliko eza luhusava aliko iki alilíki víki minalo.

Kagata alike gekéini leketamó

¹² Ligivetegita, netá makokumú amuza moloko nololeketuve. Lekelitoka monó hoza aliki lakagata aseva aliaká nia ve keza Guivahanimule liki ali goí nilíkitake líkilími hee líaká nia vemú giliko lamaná ino. ¹³ Lá iki kilími napa iki líkígika kimiiki hozaninimú gilíkiko itino. Itó lekeza nene hulu iki minalo.

¹⁴ Ligivetegita, lakagata aleko gala vizeko láa loko lo nolukumuve: Hoza alísá ama vegená nene kagata alilo. Itó kovoza helepelé iaká nia vegená kilími mómoká iki kilími kíi líkitalo. Kígika alévolé ami vegená hizi lé íkitalo. Lá iiki vegená mukikumú legesó iki hulu iki minalo. ¹⁵ Golesa netakumú pekimiiki eza apíliko eza apíliko ali volaló imaló amilo. Lá okatune liki lekezatitokagi vegená mukitoka netá lamaná oketatune líkígó amuza milíki minalo.

¹⁶ Mulutikú agila guluma ikogó minalo.

¹⁷ Ómasíloka gamena gamena numuna líki minalo. ¹⁸ Netá matá mukikumú Ómasi agepoka lilo. Nene Izesu Kilistoni mututoni lílí inamómave loko Ómasímini agikalokagó neve.

¹⁹ Ómasímini Sikalahulímini loláa zi lihamilo.

²⁰ Ómasímini agepagutí gakó lo lekemeakakumú giliko lememino. ²¹ Li líkimita gakó mukí nene gíliiki gona milíki minalo. Lamaná nehe golesa nehe líki gíliiki lamaná neko nene ali minalo. ²² Netá golesa haitopaitolímini nene lekemegeza amilo.

²³ Ómasi eza nene hulu amelaho ezáa líkígika nagamí zeko lekelémo guluví lo asú okíko líkígika lekemeni avasavagi nímíníko Guivahaníte Izesu Kílistó anítítí gamenaló líhimavatíní nomítímó minataze. ²⁴ Sele lo lekemeaká noi ve eza lo hukokago alévolé oaká noi vémo ámina hoza aleloko voko ale asú inogo ive.

²⁵ Ligivetegita, lelikumú Ómasíloka líki minalo. ²⁶ Izesuni vegenala zuha mukí nene monokú eza aputá vizíko eza aputá vizíko iki minalo.

²⁷ Neza Guivahanímini avogísaló luhuva netá imane Izesuni vegenala zuha mukí gati kímíkíko gíli asú itave loko nololeketuve.

²⁸ Guivahaníte Izesu Kílistoni nasahílí lekelitoka minoloko voko mínino.

Tesalonika Vegenalitini Luhuva Nampa 2 Pauló Gizo Kimimó

Tesalonika vegená nónohá kimike gizo kimi gakó

¹* Neza Paulona itó Sailasiko itó Timotiko makó nounike Tesalonika numutoka monó gele vegená ameteho Ómasi itó Guivahani Izesu Kilistó aí vegenala zuha nene luhuva netá imane gizo nolukumuve. ² Ómasi ameteho itó Guivahani Izesu Kilistoni hulu itó nasahilí lekelitoka vo aleko minino.

Izesú atiginá oko ati zupa goni ita gakó

³ Ligivetegita, lekelikumú Ómasi agepoka loaká nouni hoza lumupiló itekago aleaká nounimó nene lekeza Izesukumú gili alévolé iaká niamó nenémo napa oloko novigo itó likigika eza amigo eza amigo niamó nenémo napa oloko novigo ámina hoza etokave. ⁴ Lekelí gopoguni mililikitake gasova netá nimililikitago, miluma giliki miniake gili alévolé iki likigika gologolo samigo alévolé iki hanuva niave. Nene gakó gelekunike, Ómasímini vegenala zuha miniliki vamó keitoka nene lukugupe aleko iteaká nounge.

⁵ Itó lukumupiló miluma netá utó noikumú láa loko litune: Ómasímo lihimatemú gona mololetati zupa nene hee loko gona moloko limitimó nenémimi mogona lá oko utó okave. Ómasímo lekelikumú giligo etokago, aí avogisaló vi hilatakumule loko gasovagi netalímini amupiló lekezagi niave. ⁶ Nenemú minoko Ómasímo giligo, etokago, gasovagi netá ali likimiaká nia vegenatoka áminagó oko miluma netá nene ámina vegená kiminogo ive. ⁷ Lá ooko Guivahani Izesú nene amuzagi agelogege okulumakuti limita zupa nene gopoguni mililikitago miluma giliki miniaká nia vegenaki itó lezagi mino geleaká apakú lelémo molanogo ive. ⁸ Lá nooko nene ló gulumagú lemeko Ómasímini mogona gelema vegená itó Guivahanite Izesuni gakó lamaná gili alema vegená miluma hoza kiminogo ive. ⁹ Lá nooko ezáa avogisalotí itó zámuzalalotí itó lapanalalotí kehelú ahulokiko, mini golesaló iliki viki minanigave. Ómasímo miluma hoza lá oko nokimiko, ¹⁰ Izesú atiginá oko ati zupa nene aí vegenala zuhate aí gonanalivagi lapaná ali otinigave, itó monola gili alévolé ina vegenalite sigaga litanigave. Lekeza ámina gakó lo lekemekuko gili alévolé ina vegená nianazo, nenemú lekelisi ámina vegenaki minanigave.

¹¹ Nenemú leza gamena gamena lekelikumú Ómasiloka loaká nounimó nene Ómasi eza sele lo likimimó nenémimi lelegitó iki miliki itave loko, itó aí zámuzatunú hize lé olidikimikiko, netá lamaná loló itune liki gili miniaká niamó itó gili alévolé iaká niamó nenémimi hozaváa aliliki vitave loko loaká nounge. ¹² Itó lekeza lá ikiko, Ómasile itó Guivahanite Izesu Kilistó nasahilí olimiaká noimó nenazo, Guivahanite Izesuni agulizá lekelisi ali otitaze, itó ámináminoko aí lapaná lekelitoka utó noiko, eza lekelí lukugulizá ale otitive.

2

Lo huka gakó gele ahuloaká vema utó iti gakó

¹* Nigivénegita, Guivahanite Izesu Kilistó ati gamena itó aitoka lelémo nupa iti gamena nenémimi gokoláa lo likimitoze, gililo. Neza lakagata aleko láa loko lo likimitove: ² Vegená keza Ómasímini agepagutí gajokumupe itó gakó makokumupe itó luhuva netá makokumupe Pauló gizamole liki niliki Guivahanímini gamena mota okave liki nilikoma, lekeza litá iki gili gopa iiki mulutini itemino. ³ Gakó némini manámini lilikitiki likilími gopa ikataze, nenemú láa liki gililo: Apí oko Ómasi lova ali amiaká vegená utó ikiko, itó lo huka gakó gele ahuloaká ve lolímini mututoni loló inogo i vema utó okiko, Guivahanímini gamena alika utó inogo ive. ⁴* Lo huka gakó gele ahuloaká ve nenémo vegenalite gelego ómai netá loló oaká noi netá itó vegenalite gupá zí amiaká nia netá nene lova ale amekoko keí holúikutí nene ezáa agupe aleko itinogo ive. Lá okoko Ómasímini monó zagusave napagú iteko minokoko ezámú nénisi Ómasi nounge loko linogo ive.

⁵ Nénisi lekelitoka minuke, gakó láa loko lo lekemeva lekemeva umó nene lakagatí molokahe. ⁶ Itó imane gamenaló ámina vémini gapova lí oaká netá nene gilinave. Ómasímo mola gamenaló eza utó inogo ive. ⁷ Imane gamenaló netá golesa aleaká vémo asugunatoka hoza aleaká noimóza, Ómasímo ámina ati vémini gapo hize lí oaká noi vema ale ahulomikiko,

* 1:1: Apo 17:1 * 2:1: 1 Tes 4:15-17 * 2:4: Tan 11:36; Izi 28:2

eza utó inogo ive. ⁸* Ómasímo lo huka gako gele ahuloaká vema utó okiko, Guivahani Izesuni agepa múnizámo apele hilinogo ive. Guivahani anititi zupa nene lapanalagi zámuzagi nooko alémo golesa inogo ive. ⁹* Lo huka gako gele ahuloaká vemámo Satani zámuzagi aniteoko haitopaitó suni alévolé netá muki nene soza moloko ale utó inogo ive. ¹⁰ Lá okoko vejená lugáa latila oakalímíni mututoni nene haitopaitó suni golesa aleko kogoka vizinogo ive. Keza gako gihila lamanakumú kumu helemíko gili ahulatámó nenemú Ómasímo kugutó vizeminogo ive. ¹¹ Vegená keza lá iaká nitakumú Ómasímo lokiko, kogoka vizeaká izolahináa utó okiko nene, aí soza gako gili zaginigave. ¹² Lá ikiko gako gihila nene gili ahuliiki, netá golesamú laga kivisiti vejená mukitoka nene lihima napa kumupiló itinogo ive.

Lugutó vizitove loko Ómasímo lelémó etó imó

¹³ Ligivetegita, Guivahanímo agika likimi vejená lekeza Sikalahulímo likigika nagamí zelikimikakeve loko itó gako gihila gili zagikakeve loko lekelí nene apí oko lukugutó vizitove loko Ómasímo ezáa lekelémó etó ikumú nene gamena gamena Ómasi agepoka loaká hoza lumupiló itekago aleaká noune. ¹⁴ Lekeza lá itave loko gako lamanáma lo lekemekuko giliiki Guivahanite Izesu Kilistoni gonanalivagi lapaná ali lá itave loko Ómasímo lekelémó etó imó neve. ¹⁵ Nenemú ligivetegita, lekeza likigika mili alévolé iiki legepagutú gako loká itó luhuva netá ze lekemeká unike lainim-oleketunimó nene ali gikitiki ali minalo.

¹⁶ Guivahanite Izesu Kilistoki itó Ómasi ameteho eza agika lelitoka moloake nasahili oletakeve loko lelémó huluga loaká netá mino lúaló moloko minoakalímíni itó netá lamanakumú lagata losi gelemoko ageva oaká nouhá netá ale utó oleta ve ¹⁷ áisi nene likigika nagá zeko hize lé olíkíimíkiko, gako gihila loaká itó hoza gihila aleaká nene lekelitoka lemeko akamino.

3

Lelikumú Ómasiloka lilo

¹ Nigivénegita, gako makó lo asú oko lo likimitoze, gililo. Guivahanímini gako nene puu loko vitive loko, itó lekelitoka utó okago gihila zimó nene áminagó oko vejená makotoka gihila zítive loko lelikumú Ómasiloka lilo. ² Itó vejená makolite monó nene avasavagi gili asú isá amanazo, kígika golesagi vejená lihímáinigi vejenalítini kígizakutí akagá oletative líki Ómasiloka numuna lilo.

³ Guivahanímo lokago alévolé oaká i vémo luhusatini ale kii loleketoko ve golesámo lekelémó golesa okative loko lekelémó vatí oko alata mololeketanogo ive. ⁴ Lekeza nene gako loleketunimó nene gili aliaká niakumú itó gili aliiki ámegetiki minatakumú Guivahaniloka gímizekamole loko lelikumú lagata losi gelemogo une.

⁵ Guivahanímo likigika ale vávani iko, Ómasímo agika lekemeaká noikú itó Kilistó alévolé oko oko moloko ikú miní amitave loko Ómasiloka noluve.

Hoza alemoko zogozogo vizeaká gako

⁶ Nigivénegita, Guivahani Izesu Kilistoni agulizató nene hoza gako láa loko nololeketune: Izesuni vejenala zuha luguhá nenete gako lo lukumuható iki gímizemake, hoza alemake, gopa miniaká niave. Nene vejenaki apiziki minamilo. ⁷ Leza lekelitoka vuní zupa nene gapo veleleketoko hoza aleaká unimó nene mota gilinave. Lekeza ámináminiki lémegetalo. Leza lekelitoka nene hanuva minosá amuháma neve. ⁸ Lekelitokatí nosánétá meináváa nomimó hanuva noloko vova vova amuháma neve. Nagá zeko ale nominuko goselé lekepelekative loko lugupeló netá meina hizitune loko únaká neteká miluma hoza aleaká unimóma neve. ⁹ Itó lekelitokatí nosánétá alitave loko lo hukoletonoimóma nemóza, mogonáa lekelepizunike lelí ligizakagú lisatave loko hoza lá oko aleaká unimó neve. ¹⁰ Lekelitoka minunike ve makolímó hoza alemoko zogozogo vizitimó nene, nosánétá mosimíkiko namino loko lo lekemenounimóma neve. ¹¹ Itó imane lekelitokatí gako makó aliake vejená lugáate kezáini hozanini ahuliake zogozogo viziki ve makolitini hozagú gavakavató mihina iaká niave líki líkago gelekune. ¹² Vegená nenémínáa keza Guivahani Izesu Kilistoni gakató kagata aleko láa loko noloketune: Keza legesó iki hozáini alíliko, gihila utó iko nataze.

¹³ Nigivénegita, lekeza mogona lamaná loló oakakumú goselé lekepelemino.

¹⁴ Imane pepagú gako gizo nolukumumó nene makolímó gele ahulokikoma, aí mogonamú giliiki nene ahulikiko, ezágó minoko avoza hilitize. ¹⁵ Nene lova ali amitave loko lamuve. Ligivetehove líiki agata alíki alími vevesalo.

Nónohá zeketa gakó

¹⁶ Guivahani eza hulu amelaho gamena gamena haitopaitó suni aleko hulu ale utó oleketino. Guivahani nene lekelitoka minoloko voko minino.

¹⁷ Neza Paulona itínasa luhuva nogiza vémini agizakutí luhuva gizoaká nogosanima alekuke nigizanitunú luhuva imane nogizumó nene není anosave loko nene nogizuve. Neza gamena gamena není luhuva lá okogó gizoaká nouve.

¹⁸ Guivahanite Izesu Kilistoni nasahilí lekelí mukitoka mino moloko minino.

Timotini Luhuva Nampa 1 Pauló Gizo Amimó

Timotini nónohá amike gizo ami gako

¹ Neza Paulona Ómasi lugutó vizeaká vémini gakató itó Izesu Kilstokumú lagata losi gelemoko ageva oaká nouni vémini gakató neza Izesu Kilstoni aposolo noutúmina, ² * Timotiga monó gapogu gelémo muluke gelémo lá uke gipáne noane loko noluve. Gei luhuva imane gizo nogomuve. Ómasi ameteho itó Guivahanite Izesu Kilistó agika hize gemeko nasahili ogetoko hulu ale utó ogetino.

Soza saza monokumú gizapa itive loko agata alimó

³ Neza nene Masetonia mikasigú vinogo nouke gagata aleko lo gumumómámini ozo. Lá oko nene Epeso numutoka goha miní ameko minozo. Minoko vegená lugáa nenete soza saza monó api i nikememó nene ahulatave loko lokimikako ahulataze. ⁴ Makó nene gitene gako itó vegená hizi hutilí iki minimi ite gako nenémini mogona likago, nenemú iteká lemeká okago, li volaló imaló goha ikave. Lá ikago, Ómasimú gili alévolé iki gelekelé itata gapo nene utó amive. ⁵ Monó loakalímini gihiláa lá oko utó okiko etanogo ive: Ligika nagamí zeko minoko, ligikagú gako golesa makó minamiko, ligikatunú gele alévolé oko minoko ligika eza amiko eza amiko oaká nene utó itive. ⁶ Ve lugáa nenete monó gapo imane ániagi ahuliki kemegeza amiake, ha gako gihila nomimó nene ligili hagili iaká niave. ⁷ Lá iake, kezáinimú nene Mosé lo hukoko li gako lainim-oketatuve líki amuza miliaká niamóza, gako nilamó nenémini mogona itó gako makó alévoleka líki nilamó nenémini mogona gili vevesamave.

⁸ Leza nene lo hukoko li gakokumú nene láa loko gelenoune: Nene gako lamaná nemóza, Mosé lo hukoko li gako itó haitopaitó li hukina gako nene mogona lamanatokó ámegetatunimó nene lamaná onoiwe. ⁹ Leza láa loko gelenoune: Vegenalite li hukina gako nene lihimáini nomi vegenalitini mututoni nomive. Li hukina gako gili ahuliaká nia vegená, itó gínikaha ita vegená, monóini nomi vegená golesa, kigika golutuva latimó, monokumú gelema vegená, izóikini améikini itó haitó vegenaki kipili hiliaká a vegená, ¹⁰ mokoló vegená, vémohe venalímohe agivelahitoka voko gímizekiko akiaká, vegená gumina aleaká, sozaló vegená, hakupá gako li kimiaká vegená, itó netá lugáa nenémo monó gakolímini gala veva nene netá nenémináa aliaká nia vegenalitini mututoni neve. ¹¹ Ámina monó gako nenémo Ómasimó gako lamaná lehizenetamó nenegú noiwe lelí Ómasi lagámini lapanala lo utó oaká noiwe.

Ómasimó agika hize amikumú agepoka limó

¹² Zámuza lehizenetake luhúsane ale gilitoneta ve Guivahanite Izesu Kilstoni agepoka loaká nouve. Ásisi nenikumú giligo, aí gakató amegesaló moloaká ve loló nougo, gelekelé onetatane loko nelémo etó okave. ¹³ * Goí oko nene alevo letovo uke gopoguni nomolotuke agulizá ale mumusopa zeaká umó nene neza aí monó gele guni amuke gatizá minokuke, lá ukumú agika hize nemeake, ¹⁴ Guivahanitémo nasahili napa onimiake, Izesu Kilstotoka voko gímizumómave loko gele alévolé oaká itó agika nemeaká netá nene lehizenimikave. ¹⁵ Izesu Kilistó eza lihimáinigi vegená kugutó vizitove loko mikasiuka limi gako nene lamaná neve. Mukitó gele alesató neve. Itó netá golesa aliaká a vetini guivahani nénisi nene noumóza, ¹⁶ Izesu Kilistó eza asene zenetoloko vova vova imó nenémini mogona nepelizitove loko Ómasimó agika hize nimimó nene hanuvamú nomive. Vegená nenete alikaloka neni mogona ániagiiki gili alévolé iki alévolé kemetameni alitave loko lá imó neve.

¹⁷ Alévolé Guivahani napa, helemoakalímini, itó ániagamóakalímini, Ómasi hamokó aí agulizá ale otekuko, aí lapaná nenémo mino lúaló moloko minatize. Lamaná.

¹⁸ Gipáne Timotio, goí oko Ómasimímini agepagutí gako geikumú utó imó nenemú gelekuke láa loko nologetuve: Ámina gakolímó gelémo vávani okiko, lovagú iaká niamó nenéminoko monó hoza alévolé oko alezo. ¹⁹ Lá okoko, gele alévolé o minoko gigikagú némini manámini gako golesa minamiko, monó hoza alezo. Vegená lugáa nenete kigika lapanaki minoaká gako nene gili ahuliake, Ómasimú gele alévolé oakatini nene ahuliake, kigika gologolo sokago, ²⁰ latila inigi amó keikutí ve losi Haimeniaisiki Alesateki niasive. Satani agizakú vi hiliki Ómasimú alivi letivi amitái mogona gilitáive loko kimisele ahulokuve.

* 1:2: Apo 16:1 * 1:13: Apo 8:3; 9:4,5

2

Ómasiloka lituni gakó

¹ Gakó imane goí oko iteko alévolé itive loko neza gagata aleko noluve. Lekeza vejená mukikumú voká voká liki Ómasiloka liki eza hize lé oketative liki keikumú Ómasi agepoka liki minatave loko nologetuve. ² Itó lekeza legesó iki hulu iki monokú lamaná iki miníkiko, vejená nenete nemú manamú giliko lamaná itive liki kugulizaki ve napamú itó mukí gizapa vejenakumú Ómasímo hize lé oketative liki numuna hoza alilo. ³ Nenémo lamaná inogo ive. Itó lugutó vizeaká Ómasi eza nenemú giligo etoaká noive. ⁴ Eza nene vejená mukitoka kugutó vizitove loko itó gakó gihila ali lá itave loko geleaká noive. ⁵ Ómasi hamokó noive, itó Ómasi leza vejenaki agata helega helega nouko ve hamokó Izesu Kilístó holutegú ve loló i ve nene ⁶ vejená mukitoka lihimate meina hizeko gologí oletatove loko minoko aleko imoláa nene ahulamó. Ómasímo nenémíni itove loko ezáa mola gamena nene alitokago vejená mukitoka kugutó vizitove loko nogilímó nenémíni avevezahaváa utó okago gelekune. ^{7*} Ámina gakó lo utó oaká ve itó aposolo loló itane loko Ómasímo nelémo etó okago nouve. Zuta ve minamamoloka gakó gihila gele alévolé oaká gakó mogona lainim-oketatane loko nelémo etó okave. Nene soza lamuve. Lamaná noluve.

⁸ Nenemú numutó namató monó gilina vejená keza kizapaló moloko itó lova leta lava leta nomitimó kígika gizopa lo miniko kígizani ali otiki numuna litave loko noluve. ^{9*} Itó vená keza gineganéini ali lamaná iki luhiki ali hita hita iki mihina itave loko noluve. Itó ve kumu hilitune liki gotóini zopova haitopaitó gonanalisi amitave. Gonanalisi netá golivagi itó luhoaká gó luhuvagi nene luhamitamó neve. ¹⁰ Monó gilina vená nenete etati lelegító minatamómámini iki lamaná iki iki miliki itatímo gineganéini loló ino. ¹¹ Vená keza legesó iki limiki miníki kagata gili vevesi miníki gakó gilitaze. ¹² Vená neneta monó tisa lilí itampo itó ve kivilegeko gizapa oketatane litampo nenemú gele kemesá amuve. Monó litakú nene keza gakó lamiki legesó iki minataze. ^{13*} Lá itakumú nene Atani nene goí oko alémo utó okago Evani nene alika alémo utó imó. ^{14*} Itó Atani nene Satá gimivagú molamímó neve. Evani nene gimivagú molokago, gele ameake pelevesava ale utó ikumú noluve. ¹⁵ Lá okamóza, vená keza monó gili alévolé itamó itó vejená makó kígika kimitamó itó kígika gizopagi minatamó nenémíni agikagú miní amiki némíni manámíni osá nene netá golesa okatune liki kugupe gizapa iki minatamó nene, izegipa nigetikó Ómasímo kugutó vizinogo ive.

3

Pastoli hozaló minoaká gakó

¹ Makolímóhe makolímóhe pastoli minatove loko litímó nene, hoza gihilamú linogo ive. Nene gakó gihila lamaná neve. ^{2*} Itó pastoli loló iti ve nene, lihimavala nomitimó minoko ganakutí vená hamokó aleneiti vémo minatize. Némíni manámíni osá golesa okatove loko agupeva gizapa oko minatize. Legesó oko zou loko minatize. Veno vejená ikíkoma nasahilí oketoko kelémo molatize. Lainim-okímiaká hoza nene gele vevesoko ale hee loko alitize. ³ Negi nagamí mukí nokoko negi hizemitive, itó negi nagamí nokoko lovaga loko lova ale utó amitize. Eza legesó oko hulu oko minoko, moni henoniló agika molamítize. ⁴ Ezáa vená izegipala legesó oko lamaná oko gizapa oketoko kagata aleko kelémo vevesokiko, limiki miníki gelekelé itataze. ⁵ Ve makó ezáa vená izegipala lamaná oko gizapa oketamítímó nene, Ómasímíni vejenala zuha nana oko gizapa oketative. ⁶ Itó monó nagamí izoha holati ve makolímó pastoli loló amitive. Nenémo ezáa agupe aleko itekíko, Satá eza amimíka lokíko, lolímíni mututoni loló okatize. ⁷ Ómasímíni vejenala zuha lilí ama vejená keza ve makolímíni mognamú gilíko, etokíko nene, áisi nene pastoli loló itive. Aí amé zíkíko nene, Satani pelehúsígú apelekatize.

Monó gelekelé ve minoaká gakó

⁸ Ve makó keza monó gelekelé ve loló itune liki áminagó iki ve zouváa minataze. Keza genezáini losítaki minamítave. Negi nagamító ve minamítave. Moni henonímú mumuzó amítave. ⁹ Lelí monó imane asuganá oko minatotí mota utó okamó nene ali gíkitíkí miníki, kígikagú gakó golesa minamíko minataze. ¹⁰ Keí nene goí iki mulúíkú hizíkí mognáini ánigíkíko, etokíko, monó hoza nene kimíkíko monó gelekelé ve lilí itave. ¹¹ Ámináminíki venáini keza zou líkí minataze. Netá nemú manamú osá golesa okatune liki kugupeló gizapa itave. Venáini iki milíki itamó nenémo gihila loló onoi vete monó gelekelé ve

* 2:7: 2 Tim 1:11 * 2:9: 1 Pit 3:3 * 2:13: Apí 2:7 * 2:14: Apí 3:1-6 * 3:2: Tae 1:6-9

lilí itave. ¹² Keza ganakutí vená hamokó alinita ve nenete ámina hoza alitave. Vená izegipáini zuha vati iki gizapa ikitatave. ¹³ Lá iiki monó hoza alitamó nene lamaná okikoma kigikámini henoni lamaná nene keitoka minanogo ive. Izesu Kilistotoka viki gímizeakakumú gakó vávani iki li utó inigave.

Lelí monolímíni asuguná gakó

¹⁴ Neza nene noanitoka litá oko vitove loko gelekumóza, imane luhuva gizo nogumumó nene, ¹⁵ netá makolímó nagá zekiko nominugoma geza láa loko gilitane loko luhuva imane gizo nogumuve. Léisi nene alévolé ve Ómasímíni veenalá zuha aí lapusava lilí iiki aí gakó gihila hizi lé ita veenalitíni holúikú mininake, oko moloko itunimó nenémíni mogonamú luhuva imane gatokoko gilitane. ¹⁶ Lelí monolímíni asuguná gakola halá geko minamó nenémíni gihiláa Izesuni mogonamú láa liki li utó iaká niamó nene, golivagi neve:

Áisi nene lelí lugupe ale luhoake utó imó.

Sikalahulímó aí mogonáa ale utó igo hee loko minamó.

Ageló veenalite aí ángamó.

Numutó namató vete aí gakola gili asú amó.

Mikasiuka veenalite aikumú gili alévolé amó.

Okulumá lapanalaló alémoko itimó.

4

Sozaló monó ve alika utó itakumú limó

¹ Sikalahulímó lo utó oko láa loko loaká noive: Minomo noiteko alikaloka ve lugáate monó ahuliiki kilímíni gopa napa iaká nia holositíni gakó gili alinígave. Itó ámina holositíni soza saza gakotó viki gímizítave. ² Ámina soza sazaló ve nenete kigikámini gakola gili ahuliaká niago mota lí okagove liki vejená kogoka vizeke láa liki lí kimiaká niave: ³ Vená alemiki gohuna minalo, itó nosáneta lugáa namiki mosiaká ilo liki liaká niave. Ámina nosá nene Ómasímó gili alévolé iki minata veenalite itó aí gakó gihila gili zagita veenalite agepoka liki hanuva natave loko ale utó imóma neve. ⁴ Ómasilokatí utó onoi netá nene lamanakó neve. Nenemú nene agepoka loko ámina nosáneta aleko noaká noune. Nenemú moseakaláa nomive. ⁵ Ómasímó ezáa gakoláamule loko itó agepoka loko noaká nounikumule loko lusa genei netá nenazo, óe loko lonoi netá nomive.

Kilistoni gelekéle veva lamaná minoaká gakó

⁶ Gele alévolé oaká nouni gakó itó monó gakó gihilaló voko gímizenimó nenémó gígikámini nosáneta loló oko noiko, geza nene monó gele vejená gakó imane lo nogumumóma nene lo kemeko kelémo lamaná itanimó nene, Izesu Kilistoni gelekéle izegipala lamaná minanogo ane. ⁷ Gitene gakokú monola nomive. Nene gakó gemegesa amezo. Geza nene monokú voko gele alévolé oko oko moloko itove loko, gígika alémo vávani oaká hoza alezo. ⁸ Lugupe ale vávani oaká hoza nenémó lamaná otígí nemóza, monó gakokumú ligika alémo vávani oaká nenémó itína gamenaló nemó alika gamenaló nemó Ómasilokatí alévolé lemetameni lehizeletati netá nenazo, nene gihila lamaná neve. ⁹ Nenémó gihila nenazo, vejená mukitoka nenémíni gihila ali lá itave loko amuza moloko hozaváa alitune. ¹⁰ Ómasi eza numutó namató vejená mukitó kugutó viziti ve noimóza, keikutí gele alévolé unimoláa lamaná lugutó vizeaká noi ve noinazo, nenemú Ómasi alévolé ve atikumú lagata losi gelemoko ageva oaká nounimómave loko miluma hoza lumupiló itekago hoza napa aleaká noune.

¹¹ Gakó mukí lo nogumumó nene gili alitave loko monoka gele vejená lainim-oketozo. ¹² Géisi nene izegipa gosohá ve noane liki veenalite geikumú gílíko lemémíno. Geza gele alévolé o minoko gígika gizopa lo miniko, gígika kemekoko oko moloko itanitímó itó monó litanitímó gili alévolé a vejená gapo kelepizeko geí gémegetatave loko lá itanize. ¹³ Monó gotolau gakó gato kemeaká hoza itó monó mogona lo utó oaká hoza itó monó lainim-okimiaká hoza nene hozaló gígika ame gikitoko amezo. ¹⁴ Goí oko nene monó olotiva vete kigizani nene gotokaló miliki lusa nigítiki Ómasímíni agepagutí gakó makó geikumú linató nene Sikalahulímó monolímíni zámuza lehizegetamó nenémíni gihiláa gopa okatize, alévolé oko gizapa oko minozo.

¹⁵ Vejená mukilite monokú oko moloko anitímó napa omo novimó nene ángigikíko, laga kivisitive loko, nénisi lo nogumu gakó nene gígika molo gikitoko ale minozo. ¹⁶ Gezaka gugupe gizapa oko itó monó lo kimitani gakó avasavagi gizapa oko gakó lo gumumó nene alévolé oko ale minozo. Lá itanimó nene, gezagi geí gakó giliaká nia vejenaki alévolé apá alinígave.

5

Monó gilina vevená nasahilí oketatuni gakó

¹ Ozaha makó gakó lo amitove loko nene, gahá ameko lamo. Aménegave loko alémo geha zeko lo amezo. Gosohá ve nene nugunamotamóneve loko némini manámimi oketoloko voko minozo. ² Gelehosi nene izónegitave loko gizapa oketoko némini manámimi oketoloko voko minozo. Vená gosohá nene mohó nugunamotamóneve loko némini manámimi oketoloko novoko nene, gezaka gugupe gigikaloka gizapa ozo.

³ Itó gevoná vená nene kezáikó niiki muhelé ahelé iki nimirikoma, kelémo lamaná oko hize lé oketozo. ⁴ Gevoná vená makolímimi izegipagi agapilamoki keza nene goí iki kezáini numúkú nene monó hoza alítiki alími lamaná itave. Lá iki nene emane amunaloka izóipiki améipiki gizapa ikitató nene, ámina lihimá apasiki gelekélé itataze. Nenemú Ómasímo giliko lamaná inogo ive. ⁵ Gevoná vená gihila nene kezáikó miniki Ómasímú gili alévolé iake, gamena gamena únaká neteká Ómasíloka liki voká lake kagata losi gelemake ageva iaká niave. ⁶ Itó gevoná vená makolímimo mokoló minokikoma nene, aikumú nene agómulagi noihe liki lamiki ameni mota heleneive liki gililo. ⁷ Gevoná venalítini lihimáini minamítimó miniko keitoka gakó minamitive loko gakó imane lo hukoko lo kemezo. ⁸ Makó keza ke avengeináni zuha itó keí vená izegipáini nene gizapa lamaná ikitiki nasahilí ikitamitamó nene, lelí monó ahuliake monó gelema vevená kiviligiki limiki minanigave.

⁹ Gevoná vená makolímimohe makolímimohe ve hámakoki mino-loko noítiko kilisimasiva 60 minatimó nene, monó hoza koma naliko nosánetá koma ale utó oko native loko agulizá nene ámina venalítini kugulizá mina pepagú gizo molokako minino. ¹⁰ Áisi nene oko moloko igo vevenalite gili lamaná inamó noítihe, itó izegipala getokoko lamaná oko gizapa oketoko nasahilí oketamó noítihe, itó aitoka veno vevená ikago nasahilí oketoko kelémo molamó noítihe, itó áisi lemeko minake Ómasímimi vevenala zuha lugáa nasahilí oketamó noítihe, itó vevená miluma maluma gilikago kelémo lamaná imó noítihe, itó vevená nasahilí oketoko némini manámimi oketonóitithe. Magonáini nene loká miká okako, lá okogó neikoma, kugulizá gizatanize. ¹¹ Gevoná vená gosohá nenete lugulizá nene pepaló gizatane likikoma, óe loko gizamo. Veló goha vita netakumú kumu helepelé okiko, goí iki Kilistotoka viki gímizemóma ahuliake atiginá iki viaká niave. ¹² Lá iake nene, kezáini apí iki monokumú ale amegesaló molatune liki li huka gakó nene gili ahulikago, lihimáini iteko minokave. ¹³ Lá iake nene, numukú numukú itigá limigá iki hanuva gakó liki miniaká niave. Itó nenegó nomive. Keza notuni mihina ake hanuva gakó gopa napa gakó golesa liva liva ake, vevená makolítini netá matakú gavakavató mihina iaká niave. ¹⁴ Nenemú nénisi láa loko noluve: Vená gevoná gosohá keza veló goha viiki izegipáini geti miliiki, kezáini numukú makó miniki aliki ita vevená gizapa lamaná ikitataze. Lá iki niiko, lelí gala ve nenete kegepa zikiko, lelikumú gakó golesa lamitave. ¹⁵ Gevoná vená lugáa keza litá iki latila oaká gapoló vake, Satani ámegetiki viaká niave. ¹⁶ Izesukumú gele alévolé onóiti vená makolímimi zuhagutí gevoná vená makó nitamó nene, áisi nasahilí oketative. Lá noiko, monó gele vevenalítini mukitó netáikutí alemiko, monó gele vevenalite keza gevoná vená kezáikó minamoláa nene hizi lé ikitataze.

¹⁷ Monokú olotiva ve keza hoza alikiko, lamaná okikoma nene, monó vevenalite meinaváa miní amiki napa iki kimitave. Monó li kimiki lainim-ikimiaká hoza alévolé iki alita vete nenémiliki aliki itiki alitave. ¹⁸ * Meinava alitakumú nene monó gotolaú luhuva láa liki gizinamóma neve: Pulumaká nenémo hoza aleloko novike nosánetá natove loko noikoma, agepaló gahumá itamilo. Hanuva natize.

Itó gakó makó láa liki luhuva gizinamóma neve:

Ve makolítitoka hoza alita ve nenete ámina vegutí meinava alitaze.

¹⁹ * Ve hámakó nenémo monó olotiva ve makó gonitó alémo molatove loko nolikoma, litá oko gele amemo. Vevená losihe losive makolehe lá ive liki likikoma, gelekoko gakó gilitanize. ²⁰ Ve makolímimo lihimá alekikoma, lugáa keza giliiki kelegesá ligitive loko monó gele vevenalítini kovogisaló gahá amezo. ²¹ Neza Ómasímimi itó Izesu Kilistoni avogisaló itó Ómasímimo kelémo etó okago ai amatoka ageló niamó keí kovogisaló láa loko lo nohukogetuve: Gakó imane lo hukoko lo nogumumó nene gele alekoko gizapa okako lemeko akamino. Ve vená gakóini litove loko vevená lugáamú gelekako, iteko lemeko lamoko kelémo lisihé okogó noloko némini manámimi loló oketozo.

Monó hoza alita ve kilími etó ita gakó

* 5:18: Gapo 25:4; Mat 10:10; Luk 10:7 * 5:19: Gapo 17:6, 19:15

²² Ve makó keza monó hoza alitave loko litalilá oko lusa geketamo. Keí lihimáinimo geí gumupiló itekatize. Gezaka gugupe gigika gizapa okako gizopa lo minatize. ²³ Itó Timotiga, geza mulukagú akohú oká giviseká oaká noimó nene nagamikó namoko vain nagamí koma ma natane loko noluve.

²⁴ Itó ve lugáatini golesa netáinímini lihima nene Ómasímo nogosani kimiti gamena velesá alitamigo litá oko utó oaká noive. Ve lugáatini lihima nene itina asuguná nemóza, alika utó inogo ive. ²⁵ Ámináminoko vejená makolitini nasahilí hoza nene itina utó oaká noive. Itó lugaloka lá amitimó nene, asuguná halá geko minoloko voko minaminogo ive. Alika utó inogo inazo, nenemú monó hoza alita ve nene litá oko kelémo etó amitane loko noluve.

6

¹ Megusa izegipa lilí iki hagitana hoza aliki miniaká nia vejená keza nene ve napáinimú láa liki gilitaze: Vegenalite Ómasímini agulizá aliliki limiki monó aliki letikatanazo, nenemú ve napatémini kugulizá ale oteko gelekelé lamaná oketatu. ² Láa liki giliki, ve napáinimú nene kezagi lezagi hamó monó gele alévolé okunike, lishé oko minokune liiki keikumú giliko lememino. Gelekelé izegipáini hozalotí meinaváa aliaká nia vete Ómasimú gili alévolé ina ve nianazo, itó gelekelé izegipáini nene Ómasímo agika kemeaká noinazo, nenemú lamaná iki gelekelé ikitatamó nene etanogo ive.

Moni henonimú mumuzó oaká gakó

Geza nene kelémo oteko gakó imane lainim-oketozo. ³ Makó keza gakó gihila gili ahuliiki haitó monó lainim-likitatamó nene, itó Guivahanite Izesu Kilistoni gakó gili ahuliiki monó gapómini gakoki kemegeza amitamó nene, keikumú láa loko gilitune: ⁴ Kezáini kagata giliki kugupe aliki itiki gakoláa ma gili vevesamave. Gakó miní amiki liva liva iki miniaká niamó nenémo kumu helekago, kemekugú níká lova leta lava leta iká itó alivi letivi iká, itó hanuva kemegeka líki gopa gakó líká, ⁵ itó lígí ahuligi líki miniká ita netá ali utó iaká nia vejená nene kigika kagata gopa okago, gakó gihila ahuliake, monó nenémo moni henoni ale utó itihe líki giliaká nia vegenalitiní holúikú ali utó iaká niave. ⁶ Moni henonimú lugupeloka ale akalatuni netakumú mumuzó amoko mota alenouni netakumú lepa hizeko kí lo minatunimó nene monokú henonigi vejená minanogo une. ⁷ Leza láa loko gelenoune: Izotege getikago utó uni gamenaló nene, netá matá henoni ma alekamune. Itó minoko hilituni gamenaló nene lugupe zapakó vinogo une. ⁸ Nenemú nosánetá ginégane lelitoka ma nekoma nene, áminasí lelitoka neve loko hanuva zou loko minatune. ⁹ Moni henoni sipisimú kumu heleaká noi vejená noi vejená keza Satá gimínikú molokiko, Sataní gelehúsígú apilinígave. Lá níiki, ha netá negi netá kelémo gopa iti netá haitopaitokumú kumu helekiko, nenegú limiki latila iki golesa inígave. ¹⁰ Moni henonimú mumuzó oaká nenémo haitopaitó golesa netalímini mognáa neve. Vegená lugáate ámina gapoló viake, monó gele alévolé oakáini ahuliake kemegeza amiaká niave. Lá ikago, keitoka miluma netá mukí utó oaká noive.

Gele alévolé oakakumú amuza moloko hozaváa alitune

¹¹ Ómasímini hozaló ve geza netá nenémináa kemegeza kemezo. Lá okoko nene, hee loko lamaná minoko oko moloko oaká, monolagi minoaká, gele alévolé oaká, gigika kemeaká, itó gopoguní miligimiaká utó noiko amánapa oko ote minoaká, kelémo hulu oaká, nenéminoko minatove loko amuza molozo. ¹² Lá nooko, Izesukumú gele alévolé oakakumú amuza moloko hozaváa alezo. Aleloko voko alévolé gemetameni nene ale gikitoko alinogo ane. Itó gezaka lá itove loko vejená mukilitini kovogisaló monó ale lá nouve loko lo nohukako, Ómasímo ámina alévolé gemetameni ale luhatane loko sele lo gimimóma neve. ^{13*} Netá matá mukí ale utó i ve Ómasímini avogisaló itó kiapé Potiasí Pilatóni amatoka ezáa mognamú lo utó i ve Izesu Kilistoni avogisaló láa loko lo hukoko lo nogumuve: ¹⁴ Guivahanite Izesu Kilistoni gamena velesá alitamigo gilími etó a zupa lo hukogetu gakó nene gigika gizopa lo miniko lihimaka nomitimó ámegetoloko voko minozo. ¹⁵ Ái gamenava alitatimó nene, Ómasímo lokiko, utó o lamaná inogo ive. Ómasi eza mino lúaló moloko minoaká lagámini gizapa ve hámakó minake, kugulizaki vetini agulizaki venini, itó gizapa vetini gizapa venini hamokó noive. ¹⁶ Ezáagó heleakavagi nomive. Áisi lapanató minoko aleko noitó nene, leza hanuva voko aniteakaláa nomive. Ve makolímó ai agupe ángosá amimóma neve, itó ángamitimó okave. Sigaga lomíaká zámuza itó alévolé oko minoaká zámuza aitoka minino. Lamaná.

¹⁷ Geza imane mikasígú netá moni henoni mukí ali miniaká nia vejená láa loko lo hukoko lo kemezo: Kugupe aliki itiki holomaló milamítave. Tolova oaká henonimú giliko, alévolé

* 6:13: Zon 18:37

amino. Neneloka viki leheta amilo. Ómasi eza loko lisolimiaká noi veloka voko leheta itunize. ¹⁸ Geza láa loko lo hukoko lo kemezo: Netá lamaná alitakumukó giliki aliki minalo. Mogona lamaná iki miliki itamó nenémo lekelí henoni loló ino. Nasahilí iki miniki, netá matatini gona miliki ali laga laga iki aliki minalo. ¹⁹ Lá iki monó gihila ali utó itamó nenémo luhusáini loló okiko, alikaloka minoloko voko minatimó neve. Lá noiko, keza alévolé kemetameni gihila nene ali lá itave loko lo kemezo.

²⁰ Kee, Timotiga, helisa netá Ómasímo gimimó nene gizapa oko ale minozo. Itó ha gakó pisila nomimó nene vejená lugáa keza ali minake, lelí monó pelevesava ziake, mukí netá matá mogona gele asú noune liki, soza gakó liaká niave. Géisi ámina gakó gemegesa amezo.

²¹ Vegená lugáate ámina gakotó viki gimiziake, lelí monó ánigi satiake ahulikave.

Ómasímini nasahilí nene lekelitoka mino moloko minino.

Timotini Luhuva Nampa 2 Pauló Gizo Amimó

Timotini nónohá amike gizo ami gako

¹* Neza Paulona Izesu Kilistotoka voko gímizekugo alévolé lekemetamenigi minatave loko lo mololeta gakóma lo utó itove loko Ómasímini gako tó imane Izesu Kilistoni aposolo loló oko noutímína, ² Timotíga, monó gapoló gelémo muluke gelémo lá uke nigika gemenou ve luhuva imane gizo nogumuve. Ómasi ameteho itó Guivahanite Izesu Kilstó eza nasahilí ogetoko agika hize gemeko hulu ale utó ogetino.

Timotinimú Ómasi agepoka like agika ale kii lota gako

³ Avónege kígika lamanaki minake, omolelé amalelé iki Ómasi gelekélé itiki minamómáminoko nénisi nigikagú gako nomigo Ómasi gelekélé otuke agepoka loaká noumó nene, gamena gamena únaká neteká geikumú gele minuke Ómasiloka loaká nouve. ⁴ Makotoka vinogo nougo nenikumú ive nama animó nene gele minuke, voko ángogimikinake mulúnegú agila guluma napa itive loko gelekéa nouve. ⁵* Ómasimú gele alévolé oaká gihila nene geitoka nemó nene gele nominuve. Itó atekaho Loísí itó izokaho Zunísí goí iki Izesukumú gili alévolé inasigo geza ámináminoko gele alévolé onane loko gele guni onouve. ⁶ Nenemú gelekuke, lokugo, gako imane goha gilitanize. Neza gotokaló nigizani molokugo Ómasímo monolímíni zámúza lehizegetamó nene, gizapa lamaná oko ale otenako, ló guluma ino. ⁷ Lá nooko, láa loko gelezo: Ómasímo nene nemú manamú lelegesá legeakalímíni lemetameni lehizeletamímóma neve. Amúza moloko ligikatunú nasahilí oketoko ligika lugupe gizapa itave loko lemeneimóma neve.

⁸ Nenemú Guivahanitémíni gako lamaná lo utó itanikumú govoza helemíno. Lá nooko aí hozamule loko kalapusi numukú noumómave loko nenikumú govoza helemíno. Ómasi eza zámúza gemeneimó nene ale minoko, Izesuni gako lamanakumú gopoguni miligitikoma, gezagi nenémíni amupiló hanuva minozo. ⁹ Ómasi eza lugutó vizike otopá ziki etó iki keké viziki minatave loko sele lo limimó nene oko moloko uhá ma lamaná nego lá amimó. Ezáa agikatunú geleake nasahilí hagítana lehizeletamó nene eza gozapá mikasi ale utó amike Izesu Kilistoni mututoni líl itakumule loko lehizeletake, ¹⁰ gihila zítikú nene imane gamenaló lugutó vizeaká amelaho Izesu Kilstó lemekago ámina nasahilí nene utó o lamaná imó. Áisi nene heleká netá apele heleake, alévolé oko minoaká netá helemoaká nene aí gako lamanatunú ale utó oletamó neve. ¹¹* Neza ámina gako lamaná lo utó utó ve, itó aposolo itó tisá minatane loko Ómasímo nelémo etó onoimóma neve. ¹² Itó neza nenemú míluma geleká netá nene numupiló itekago kalapusi numukú noumóza, nenemú novoza helesá amive. Neza gele alévolé onou vémini mogona gelenouve, itó nagata losi gelemoko noínake eza amúza amelaho noínazo, nigika amenoumó nene gizapa onetoloko noviko, aí gamenava alitanogo ive loko gele guni onouve. ¹³ Gako gihila geza ámegetatane loko lainimó ogetonoumó nene áminagú ale minoko Izesu Kilistotoka voko miní amenikeve loko aikumú gele alévolé oaká itó gígika kemeaká nenémíni agikagú minozo. ¹⁴ Ómasímini Sikalahú mulutegú minoko aleko oaká noimó áisi izokaho loló iko Ómasímo gemenei netá nene gizapa etoha oko ale minozo.

Onesipoloni gako

¹⁵ Asia mikasiuka mukí vegealite ahuli asú inimikave. Keikutí nene Pigeloki itó Helemogenekí niasimó. Nene mota gelenane. ¹⁶ Onesipoló eza kalapusi numukú minukumú avoza helemigo gamena gamena luhúsáne ale kii lonetamó nenazo, Guivahanímó ezagi vegejala zuhagi mílumaváini geleko agika hize kimino. ¹⁷ Áisi Loma apatoka oake nenikumú vitagá ike ike nelémo utó imó. ¹⁸ Guivahanímó giliko, lamaná okikoma, gamena napaló Guivahanímó agika hize amítive loko noluve. Itó Epeso numutokagi eza nasahilí onetoko hoza aleko minamó nene komasí nomimó nene lamaná gelenane.

2

Izesuni gimisivagi ve lamaná minati gako

¹ Gipáne geza Izesu Kilistotoka voko gímizunikeve loko nasahilí lehizelimiaká noimó nenémíni agikagú minoko alévolé ozo. ² Ve mukilitini kovogisaló gako mukí lo gumumóma nene, ve lugámú gelekako alévolé ina vegeaná minikikoma, ámina gako lehizekimikako,

* 1:1: Apo 16:1 * 1:5: Apo 16:1 * 1:11: 1 Tim 2:7

ámináminiki vejená lugáa lainim-ikitataze. ³ Geza Izesu Kilistoni gimisivagi ve lamaná loló oko minoko, gezagi gopoguni miligitatakumú goselé gepelemino. ⁴ Ami ve lilí iiki hozaváa alita vete hanuva vejenalite iki miliki itatotí apazá minanigave. Ami ve lilí itave loko kelémo etó i ve agulizaki ve nenémo giliko lagaváa gilitive liki nenémini hozagó alitune liki gilitaze. ⁵ Itó lesisitakú nene ve makolímó ámina zohilímíni gizapa vevámo lesisimú lo huta gakó avutá itimó nene, gihiláa aleminogo ive. ⁶ Makó eza zuhaina oko amuza moloko miluma geleko zuhá iti vémo nosánetá omolokiko goí oko nanogo ive. ⁷ Guivahanímó gigika alémo zou lokiko nene, netá matá mukí gele vevesataninazo, anoza gakó láa loko lo nogumumó nenémini mogonáa geleko alémo etó ozo.

Pauló monokumule loko milumámini amupiló minamó

⁸ Geza Izesu Kilistokumú gele minozo. Eza Tevitíni agávolaho heleneikutí mómoká oko oti veve loko aí gakó lamaná loaká nouve. ⁹ Ámina gakó lamanakumule loko gasovagi netá noguhuke, miluma geleaká nouve. Lá nouke, galana vejitana nagá zinimikago noumóza, Ómasímíni gakó nene nagá alinamamóma neve. ¹⁰ Neza miluma hozaváa Ómasímó kelémo etó i vejenakumule loko gasovagi netá geheaká noumó nene keza Izesu Kilistó kugutó vizeaká netá itó alévolé lapanalagi ali lá itave loko lá oaká nouve. ¹¹ Gakó makó láa loko nemó nene gakó gihila neve:

Áisi hilikú miní amunimó nekoma nene,
ezagi makó minoko aleko inogo une.

¹²* Miluma netá lumupiló noitiko nene,
nenemule loko goselé lepelemiko hanuva gihitunimó nene,
alika ezagi apizeko mininake
aí hozaló gizapa inogo une.

Aikumú noamive loko egamega otatunimó nene,
eza áminámini oko egamega oletanogo ive.

¹³ Leza monokú alévolé amitunimó nene,
ezáa mogonamú egamega amitimó nenazo,
eza hanuva lonoi gakotó amegesaló moloko minanogo ive.

Ómasímó hozaló vevamú giliko lamaná iti gakó

¹⁴ Monó gilina vejená geí gizapaló niamó nene gakó imane ale gosohá oko lo kemekoko Ómasímíni avogisaló láa loko lo hukoko lo kemezo: Ha gakó pisila nomi gakó likivilege vino. Ámina gakó nenémo negénégé iki liva liva niago gele vejená nene kelémo golesa oaká noive. ¹⁵ Ómasímó geikumú gelekiko hozaló ve lamaná loló itane loko amuza moloko minoko hoza alezo. Lá oko gakó gihiláa nene ale vevesoko lo kemeko noako, geí hozamó govoza heleaká netá nene gumupiló iteminogo ive. ¹⁶ Gihila nomi gakokumú vivi vovoga nilikoma, gemegesa kemezo. Lá niamó nene láa liki niviki monó ahulanigave. ¹⁷ Soza gakóini nenémo litá oko halamé napa nenéminoko minoko vejená mukitoka napa oko vo alinogo ive. Ve nenémináa keikutí makó Haimeniasiko Pailitoko keza nene niasive. ¹⁸ Keza nene gakó gihila ángi satikasike ahulikasike, ligika nene hele minakutí mota otekamó nenazo, alika gosohá lugupegi lélemo oteakaláa nomive likasike monó gele vejená lugáa kilími gopá-napa niasive. ¹⁹ Ómasímíni vejenala zuha keza gehani lukesa hizinamó nenémini iki minikago, netá makolímó kelémo mómoká aminogo ive. Keí lukesanitó Ómasímó luhuva láa loko gizonomóma neve:

Guivahanímó ezáa vejenala zuha ángo vevesoaká noive.

Itó makó láa loko gizonomóma neve:

Guivahanímíni agulizá ali mína vejená mukitoka gopa napa netáini litá iki ahuli asú iiki kemegeza amitaze.

²⁰ Leza monó guluhá vejená nene lapegitana noune. Agulizaki ve makolímíni numuni napagú nene lape haitopaitolímíni golitunú itó silivatunú lilí inamóma itó zatunú itó mikasitunú lilí inamóma nene neve. Makó nene netá lamanakumú neve, itó makó nene ha netakumú neve. ²¹ Makó keza gopa napa netá mositamó nene kígika gizopa lokiko nene, lape gihila lilí ikiko, numuni amelaho lusa geko kelémo otopá zekiko, haitopaitó hoza nene numuni amelahini alitanigave. ²² Gosohá ve nenete kugupémo haitopaitó netakumú mumuzó oaká noikutí nene géisi míno otopá zezo. Lá okoko nene, gezagi itó kígika gizopa lo minago Guivahanímú voká voká liki sele liki miniaká nia vejenaki vevesoko minoaká, gele alévolé oaká, likígika kemeaká, hulu oko nonagá oko minoakakumú amuza milalo. ²³ Lovaga liki gemé ziki nila gakó negi gakó ha gakó nene givilege vino. Nenémini gihila nene lova leta lava leta oaká nemó nene gelenane. ²⁴ Guivahanímíni hozaló ve keza lilí ali

* 2:12: Mat 10:33; Luk 12:9

iki lova leta lava leta amiki, vegená mukí alévolekutí li kememiki hulugutí monó vevesiki lainim-ikitataze. ²⁵ Kéisi legeso iki monólímíni gala véa nene kilími vevesatave. Ómasímo kagata alekiko kígika ali vilígiki gakó lamaná ániqi vevesatahe liki lá inigave. ²⁶ Lá ikiko, monólímíni gala vetini kagata goha koló okiko, Satani gelehusigú apilínigí akutí nene gologí okimikiko, Ómasímo lititoka molatitoka iki minataze.

3

Gamena asú inogo noiko utó ita vetini mogona

¹ Geza gakó makó láa loko gele hee lozo: Gamena asú inogo noiko, golesa netá utó oko puu linogo ive. ² Vegená lá iki minanigave: Kezánimú giliko itekiko, moní henonimú kumu helepelé iko miniki, kezáini iki miliki ita netalímo kumu helepelé okiko, netá matakumú aliki letiki, kezáini kugupe ali otiki, izóikini améikini gakó gili ahuliiki, netá lamaná makó kimitató lekegepoka liki mokáneve lamiki, kígika lamanakí nomiko, ³ kígikatunú nasahílí nomimó miniki, lihima ali miniki, lotoka lataka hiziki, kugupe kígikaló gizapa amiki, gala kemetameni iki miniki, netá lamanakumú gili golesa iiki, ⁴ kimimika liaká iki, kogoka kagaka viziki, kezáini alími napa itiki, kígika nene Ómasiloka milamiki kígikáa nene kugupémo amu heleaká noi netató milanigave. ⁵ Lá iki kugupémo nene monó kugupe itimóza, monólímíni zámúza nene vasá zi ahulanigave. Lá iki nímíniko, geza ániqookoma, gemegesa kemeko kezagi apizemo. ⁶ Ve nenémínáagutí lugáa keza asugunatoka víki gopa napa mihina nia venalítini numúikú itiki kogoka viziki gakó li kimiki kiviligiaká niave. Ámina vená keza lihima napa genavagi ali minake, la netá lami netá nenémo kumu helekago, ⁷ monokú mina vetini gakó giliaká niamóza, Ómasímíni gakó gihila gili vevesisá amave. ⁸ * Ve lositá keí kugulizá Zaneke Zapeleko kéisi nene Moseni gakó pelevesava zesimó áminagó iki ámina ve kígika gopa o vimó nenete lelí monólímíni gapo ahuliake negi hiziake gopa ikave. ⁹ Zaneke Zapeleko keza negi hízesimó nenémíni mogona utó imómáminiki kéisi negi nihizemó nenémíni mogona utó okiko, vegená mukitó keza ániqi asú itamó nenazo, netá matá iki miliki niamó nene nana itotí lá imi imi ititave. Ma lá aminigave.

Timotini agata alike lo asú oko lo ami gakó

¹⁰ Lá imóza, makó minusike oko moloko umó itó monó lainim-oketumó itó oko moloko uke hoza alumó nenémíni mogona kelepipumó, itó Ómasimú gele alévolé oko minumó itó netá matakumú goselé nepelemigo legeso oko minumó, itó Izesuni vegená nigika kemeko minumó, itó gasovagi netá numupiló itigo amánapa oko ote minumó, ¹¹ * itó gopoguni nimilínitago miluma geleko minumó, itó Atiokia numutokagi Ikonio numutokagi Listela numutokagi gopoguni haitopaitó milínitago miluma netalímíni agigakú minumó nene, némegetoko anike ániqonanimóma neve. Lá oko minumóza, Guivahanimo ámina netakutí gologí onetamóma neve. ¹² Itó vegená keza Izesu Kilistotoka víki gímiziiki monó gapoló vitamó nene keza mukitoka gasovagi netá kumupiló itinogo ive. ¹³ Lá onoimóza, ve golesagi soza monó liaká vegi keza kogoka vizita vegi kogoka vizikiko iliki niva vegi nenete oko aliliki niviko napa omo itinogo ive. ¹⁴ Géisi nene gakó lo gemeaká umó nene gígika onoimóma neve. Lá okago, gakó lo gemehá vegenalítini mogona gelenanimó nenazo, nenemú ale gikitoko ale minozo. ¹⁵ Geza izegipa namutó minanike apazá pepa monó gotola gatoloko noitenike, save alekanike Izesu Kilistonimú gele alévolé anikeve loko gugutó viziti gakó gelenane. ¹⁶ Monó gotola pukugú luhuva gizinamó mukitó nene Ómasímíni Sikalahulímo kígika ale vávani okimikago ali utó inamóma neve. Nenegutí gatoko noguluko monólímíni mogona lelepizeaká noive. Lá ike, lagata aleaká noive, itó gopa gakó noluko lelémo gapoló moloaká noive, itó lagata alike lelémo vevesoaká noive, itó hee loko minoko aleko ituni gapo lelepizeko lelémo vevesokiko, ¹⁷ Ómasímíni vegenala gihila loló oko mininake monokú lepepagi avasavagi mininake, monó hoza lamaná haitopaitolímíni aleko minanogo une.

4

¹ Neza Ómasímíni avogisalo itó Izesu Kilistó eza minoko vegená logómulagi itó helemoláagi gona mololetanogo i vémini avogisalo nene Izesú amuzavagi aniteko gizapa oletatimómave loko láa loko lo hukoko lo gimitoze, gelezo. ² Geza nene monó lo utó oko lo kimitanimó nene, vegená nenemú nokivisiko nokivisemiko gopa lo kemezo. Kagata aleko kelémo vevesoko kelémo oteko goselé gepelemiko lainim-oketozo. ³ Minomo iteko gamena makó alitokiko, monó gihilamú géneka liiki ahulanigave. Lá niiki, monó nene kagatatunú giliko lagavagi

* 3:8: Gá 7:11 * 3:11: Apo 13:14-52; 14:1-7; 14:8-20

minatimó nenéminigó gilitune liki tisá kilími nupa ikiko, hanuva gopa gakó kumu hiliti gakó li kimikiko, ⁴ monó gihila nene kemegeza amiiki, gitene gakokú viki gímizinigave. ⁵ Keza lá itamóza, géisi nene gigika gagataló gizapa oko minozo. Gasovagi netá gumupiló noitikoma, alévolé ozo. Izesuni gakó lamaná lo utó oaká hoza naleko ale gúezo. Ómasímo hoza gimimó nene ale lutegeko alezo.

⁶ Nénisi hilito gamena mota alitokave. Nipili hilikiko nugupelotí miguhala nanigave. ⁷ Nénisi nene hoza lamaná aleloko vumó nene mota ale asú onouve. Zohikú eza aviligigo eza aviligigo iaká niamó nenéminoko hoza ale lutegeko makiló anitekuve. Gakó gihila gizapa umó nene gologolo samimóma neve. ⁸ Itó okulumakutí gonanalivagi akilí lamaná nene vevesiki miniki aliki iaká nia vegealitini mututoni nenémo negeva noimó nene gamena napaló Guivahani áisi ale vevesoko gona moloaká vémo nezagi mukí vegeaná eza anititi gamenamú lagata losi gelemoko ageva oaká nouhá vegeaná nene ámina akilí lehizeletanogo ive.

Vegená lugáatini gakó

⁹ Geza nene nenitoka atove loko amuza moloko litá oko atanikumú noluve. ¹⁰ * Temá áisi nene mikasigú netakumú giligo, itekago, ahulonimiake Tesalonika numutoka vokave. Keleseke eza Galesia mikasiloka vokave. Taetasí eza Talamesia mikasiuka mota vokave. ¹¹ * Leza nene Lukakigó nousive. Makí nene hozagú nelémo vatí iti ve noinazo, nenemú alémoko ano. ¹² * Tikikoni nene amiselekugo, Epeso numutoka novive. ¹³ * Anogo nookoma nene, hepekumú luhoaká gó nene Toloa numutoka Kaloponi numutó gololohá o molonoumóma alenetoko ano. Itó monó gotolánemagi itó pepa agilá makó molonoumómagi alenetoko ano.

¹⁴ * Kapatunú netá matá loló oaká ve Alesaté nene netá golesa goha alenimikaze, nenemú minoko Guivahanímo lihimala lelegí oko aminogo ive. ¹⁵ Eza amuza moloko lelí monó gakokumú pelevesava zimó nenazo, áisi gelémo gopa napa okatize, gizapa etoha oko minozo. ¹⁶ Goní nougo, ganá apí oko není mogonamú lo nokumugo, makolímó nelémo vatí oko hize lé onetamimóma neve. Keza mukitó ahuli asú inítamóma neve. Nenémini lihimá nene Ómasímo ahuloketino. ¹⁷ Guivahani nenémo nasahilí onetake hize lé onetake, aí gakola lo utó oloko vinake lo lutigitane loko itó hetoka vegeanalite gili asú itave loko luhusáne ale gilitonetamó. Lá noiike gasovagi netalímíni agepagutí asene zenetake vinasonetamole. ¹⁸ Itó Guivahani eza golesa netá nemupe manamupe nelémo vatí oko asene zenetoloko voko okulumakú aí avogisaló avasavagi nelémo molanogo ive. Aí lapaná nene mino lúaló moloko minino. Lamaná.

Gekéini loketa gakó

¹⁹ * Itó imane Piliskaki vana Akuilaki itó Onesipoloni vegejala zuhagi gekéini noloketuze, nene lo kemezo. ²⁰ * Elastó eza Koliti numutoka minamó, itó Tolopimoni avisekago Mileto numutoka ahulotonouze. ²¹ Geza nene golini gamena alitamiko atove loko amuza moloko ano. Eupuló eza gekeka nologetaze, itó Putené itó Linó itó Kalautiá kezagi ligivetege lugáagi nene geké niligitave.

²² Guivahanímo geí sikalahutoka minino. Ómasilokatí nasahilí nene lekelitoka mino moloko minino.

* **4:10:** Kolo 4:14; Pile 24; 2 Koli 8:23; Gal 2:3 * **4:11:** Apo 12:12; 13:13; 15:37-39 * **4:12:** Epe 6:21-22 * **4:13:** Apo 20:6 * **4:14:** 1 Tim 1:20; Age 62:12; Lom 2:6 * **4:19:** Apo 18:2; 2 Tim 1:16-17 * **4:20:** Apo 19:22, 20:4

Taetasini Luhuva Pauló Gizo Amimó

Taetasini nónohá amike gizo ami gako

¹ Neza Paulona Ómasímini gelekélé ve itó Izesu Kílistoni aposolo nouke hoza nimimó nene Ómasimo kelémo etó i vejená keza monokú alévolé itave loko itó nenéminiki miniki aliki itakumú gako gihila monokú nemó nene gili vevesatave loko ámina hoza nimimóma neve. ² Není hozámini mogona lá oko neve: Ómasi soza losá ami vémo gozapá mikasigi okulumaki utó ami gamenaló nene alévolé lemetameni lehizeletatove loko lo mololetoko likumú lagata losi gelemoko ageva oko minoaká nune. ³ Nene gako nene Ómasimo gamenamú giligo, etokago, aí gako li utó niago, ale utó imó. Ómasi lugutó vizeaká vémo lo hukonetató ámina hoza lehizenetamó. ⁴ * Monó gapoló gelémo muluke gelémo lá u ve Taetasiga, gezagi nezagi hamó monó gele alévolé onousi ve luhuva imane gizo nogumuze, gelezo. Ómasi ameteho itó Izesu Kílistó lugutó vizeaká ve aitokatí nasahilí itó hulu geitoka minino.

Kiliti pokolaló Taetasi monó hoza aleko minati gako

⁵ Kiliti mikasi pokolaló ahulogetumó nene hoza agepa minamó nene ale vevesoko ale apasatane loko logetumómáminoko geza numutó namató mohona oko monó gizapa ve kelémo molatane loko ahulogetumóma neve. ⁶ * Ve makolímohe makolímohe lihimavala nomitímó, ganakutí vená hamokó ale minati vémo, aí izegipala nenete Izesukumú gili alévolé itamó, itó vejená makolite aikumú giliko ha netá matató ahulo latila oaká ve hokolizá oaká ve nomitímó, ve nenémináa pastoli hozagú kelémo molatane loko logetumóma neve. ⁷ Itó Ómasímini hozaló gizapa itamó nenazo, ámina hoza alinigi nia ve nene lihimámini nomitímó minataze. Lá iki gínikaha amítamó itó litá iki alévoleka lamítamó, piá nagami vauva aliki namítamó, lova gako lamítamó, moni henonimú lagaváa gelemítamó minataze. ⁸ Lá iki veno vejená ikikoma nasahilí ikitiki kilími milatamó, itó netá lamanakumú kumu hilitímó, zou liki minatamó, hee hee liki miniki aliki itamó, kigika gizopa lo minatímó, itó kigika kugupeló gizapa itamó neve. ⁹ Lá iki monó gako nenémo hize lé oketikó, monó gihila lamaná nene vejená li kimiki kagata aliki hizi lé ikitiki, lelí monó aliki letiaká nia gako pevevesava ziki ali amunagú itave loko lo keme keme nouni gakokú nene, leza guluko alévolé noi gako ali gikitiki ali minata ve nene pastoli lilí itave. ¹⁰ Mogona lá oko nekumú noluve: Ve mukí nene gínikaha niave. Ha gakokumú li volaló imaló iki kogoka viziaká ve niave. Ómasímini anosa nene kugupeló moloakakumú amuza miliaká nia ve nenete vauva aliki lá iaká niave. ¹¹ Lá iaká nia ve nenete moni henoni alítune liki etami mogona aliki lainim-oketatune liki giliake, ve lugáa venáini izegipáinigi kilími gopa iaká niakumú kegepa apizilo loko loketatune. ¹² Kiliti mikasi pokolaló nia ve kezáikutí gako mogona gele hee lo mina ve makolímo láa loko limó neve: Kiliti vejená keza nene sozaló vejená, akohú galagitana, nosánetakumú iza galámo imómámini iaká niamó nene gasovagi vejená minake hozamú goselé kepeleaká noi vejená niave.

¹³ Neza ámina gakokumú gulugo gihila loló okave. Nenemú geza vauva aleko gahá kemeko kagata alekako, monó gako nene gili vevesiki miniiki, ¹⁴ Zuta vetini gitene gako ha gako nene gili aleminigave, itó monó gelema vegepalite gako gihilama kemegeza amiake hanuva gako li huginamó nene gili aleminigave. ¹⁵ Kigika gizopagi mina vegepalite netá matakumú gelego, gizopa loakalíminigó neve. Itó golesa netá nenémo kigikagú siholoni gekago gili alévolé ama vegepalitini kigika kagatagú siholoni gekago golotuva loaká noimó nenazo, nenemú keza netá matakumú gelego, ámináminoko siholoni geko golotuva loakalíminigó neve. ¹⁶ Keza Ómasímini mogona gelenoune liki kegepatunú liaká niamóza, iki miliki iaká niamó nenémo mogonáni lo utó oaká noigo, gihila nomive. Keza nene vejená golesa gako gili ahuliaká vejená hoza lamaná alitatímini oko nomive.

2

Monó lamanalímini agikagú gako

¹ Géisi nene monó gihila lamanalímini agikagutikó lo kemezo. ² Ve olopa keza etó iki zou liki miniki, kigika kugupe gizapa iki miniki, monó gelenouhá nene gili vevesiki itó Izesuni vejená makó kigika kimiiki itó hulu iki gasovagi netalímini agikagú alévolé iki minatave loko loketozo. ³ Áminagó oko olopa vená keza monó vená lilí iki miniki, lotoka hiziki li

* 1:4: 2 Koli 8:23; Gal 2:3; 2 Tim 4:10 * 1:6: 1 Tim 3:2-7

volaló imaló amiki, piá nagamilímini gelekeleláa minamitave loko loketozo. ⁴ Lá iki vená gosohá nene netá lamanakumú lainim-ikimikiko váinigi izegipáinigi kigika keitoka miliki gizapa lamaná ikitatave. ⁵ Itó lá iiki olopa vená keza kigika kugupe gizapa lamaná iki, mokoló minamikí, numúitó apáitó miniki netá matáini gizapa lamaná iki, kigika lamanaki miniki váini nene gelekelé lamaná ikitiko, vegená makolite ániigiiki Ómasímini gako alivi letivi amitave. ⁶ Ámináminoko gosohá ve keza kigika kugupe gizapa iki etó iki minatave loko kagata aleko lo kemezo. ⁷ Itó géisi netá lamanakumú ale etó oko zou lo minoko monó gako nene giza zohikutí lamoko lo keme-loko novoko, goí okako, ániigiiki gémegetiki vitave. ⁸ Monó nene ale vevesoko lo kemekako, nenemú pevevesava zemiko, monokumú lova ali limiaká nia vegenalite lelikumú gako golesa linigi vitagá iiki kovoza helekiko ahulatave.

⁹ Megusa izegipa lilí iki hagitana hoza aliki miniaká nia vegená nene ve napáinitini gako gili aliiki gelekelé lamaná ikitatave loko, itó ve napáini keza laga kivisitive liki ve napáinitini konotó aliki keí gako pevevesava zemitave loko loketozo. ¹⁰ Ve napáinitini netá matá gumina alemiki, netá matató gizapa lamaná iki hoza aliki iki miliki itamó nenémo vevesokiko, Ómasi lugutó vizeaká vémini monó nene némini manámini iki ali otitave.

¹¹ Nenemule loko Ómasímo numutó namató vegená kugutó vizitove loko hagitana oko nasahilí olimiaká netá ale utó okave. ¹² Lá oake, ámina nasahilí nenémo apí olimioko lelémo vevesokago, imane mikasigú ha netá golesamú lumu helepelé oaká imó nene ahulokinake, imane mikasiuka ligika lugupe gizapa lamaná oko vevesoko mininake, monó lemetameni iko minanogo une. ¹³ Lá inake, Ómasi napa lugutó vizeaká ve Izesu Kilstoni lapaná utó itikumú ageva oaká nounimó nene gonanalivagi netá nenazo, nenemú lagata losi gelemoko ageva oaká nouné. ¹⁴ * Áisi nene lelikumule loko miluma gilike, netá golesa aleaká uhakutí akagá oletatove loko minoko aleko imoláa ahulamó. Lá oake, aí vegenala zuha lelémo etó oake monó gihila amuza miliki aliiki minatave loko ligika nagamí zeko lelémo lamaná imóma neve.

¹⁵ Gako imane lo nogumumó nene ale hutilí oko lo kemezo. Monolímini zámua alenikumú gelenoko kagata aleko kelémo vevesozo. Ve makolímó geikumú giliko, lememino.

3

Lamaná oko oko moloko ituni gako

¹ Monó vegená geí gizapaló minamó nene gako ale gosohá oko láa loko lo kemezo: Keza kiaepegini itó gamani vegená iti minamoláa gelekelé ikitiki gakoíni gili alitaze. Lá iiki hoza lamanaláa haitopaitolímini alitakumú ali vatí itaze. ² Alivi letivi iki lova leta lava leta amitaze. Hulu iki miniki, vegená mukilítini kovogisaló zou liki minataze. ³ Lezate gozapá ámináminoko minunike, negi hízeko gínikaha oaká nouko, lilími gopa iaká amó. Lá okunike, lumu heleaká netá lagava geleaká uní netá nenémini gelekeleláa otoko minunike, vegená kelémo golesa unike, vegenalite iki miliki a netakumú nenéminoko minatuninaze lokunike, levé nogoza noaká unimó. Lá nouko, lelikumú gili golesa niago, keza mukahá lepelego leza mukahá kupuluko oko minoaká unimó. ⁴ Lá oko nouko, alika nene lugutó vizeaká ve Ómasímo nasahilí olimiaká itó agika lemeaká mogona ale utó oake lugutó vizimó. ⁵ Leza hee hee loko minoko oko moloko uhá ma lamaná nego, ániigoake lá amimó. Agika hize limikakeve loko, minoko aleko gosohalímini nagamí holoakakú itó Ómasímini Sikalahulímitokatí gosohá utó oaká nenémo lelémo lamaná imó. ⁶ Ómasi eza nene lugutó vizeaká ve Izesu Kilstotokatí Sikalahú nene vauva aleko lehizeletamó nene ⁷ Izesuni nasahilílamó Ómasímini avogisaló lihimate asú olimikago minoko, alévolé apakumú lagata losi gelemoko ageva oaká nounimó nene ali lá itave loko lá oletamó neve.

⁸ Gako lo nolukumumó nene lamaná gihila nenazo, gako imane amuza moloko lo kimitane loko noguluve. Lá okako, Ómasimú gili alévolé ina vegená keza netá lamaná loló itune likigó hoza vauva aliiki alitave. Lá ita netá nene netá lamaná nenazo, lá itamó nenémo vegená kelémo lamaná itimó neve. ⁹ Ha gako li volaló imaló iki miniaká niamó nene gihila nomimó, itó avóike amunaloka ve hutilí iki omolelé amalelé iki minilíki itiki mina vegenalítini kugulizakumú lova leta lava leta iaká, itó Mosé lo hukoko li gakokumú ligí ahulígí iki lova isá isá iaká niamó, nene gako nene ha gako gihila nomimó nenazo, gele ahulokoko gemegesa amezo. ¹⁰ Ve makolite monó ali golesa iki hize hoú loaká netá ali utó ikikoma, gamena hamope gamena losítá ahe kagata aleko gako lo kimitanimó nene gelemikoma, kimisele ahulokako, kezánigó viki haitotoka minatave. ¹¹ Ve nenémináa netá golesa alilíki niviki kigika gopa o vimó miniake, kezáini iki miliki amó nenémo keí mogona lo utó okave loko gele minoko nenémini oketozo.

* 2:14: Age 130:8; Gá 19:5; Gapo 4:20; 7:6; 2 Pit 2:9

Hozamú lotake vegená gekéini loketamó

¹² * Atemasinihe Tikikonihe geitoka amiselekugo, anitekiko nene, Nikopoli numutoka noitoze, nenitoka atove loko amuza molozo. Neza nene ámina numutoka golini gamena minatomó onoize. ¹³ * Ve lositá Apoloki goní gakó mognáa geleaká i ve Zenaki keza monó hozaló vitáive loko nosánetáini henokanóiki ale vatí oketatove loko amuza molozo. Lá okako, netá matakumú vitagá amitáive. ¹⁴ Vegenate zuha keza hoza lamaná aliliki niviko kigika itive. Lá okiko, lugupémíni netá hize lé omiakakumú nene nasahilí hoza aliliki niviko, monokú iki míliki itamó nenémo gihila ale utó inogo ive.

¹⁵ Nezagi makó nuni vegená keza mukitoka geikumú geké niligitave. Monokumule liki kigika limiaká nia vegená geké noloketuze, lo kemezo. Ómasilokatí nasahilí lekelitoka mino moloko minino.

* **3:12:** Apo 20:4; Epe 6:21-22; Kolo 4:7-8; 2 Tim 4:12 * **3:13:** Apo 18:24; 1 Koli 16:12

Pilemoni Luhuva Pauló Gizo Amimó

Pilemoni nónohá amike gizo ami gakó

¹ Neza Paulona Izesu Kilistokumule loko nagá numukú nou vémina itó ligivetehe Timotiki makó nousike Pilemó ligika gemenousi ve hamó hozaló ve nouninazo, nenemú luhuva netá imane gizo nogumuve. ^{2*} Itó venaka ligivetehe Apiaki monó hozagú amuza moloko alévolé oaká noi gipaka Alikipó, itó geí numukú monokumú alegesá iaká nia vegeenaki hamó luhuva gizo nolukumuve.

³ Ametehe Ómasilokatí itó Guivahanite Izesu Kilistokatí nasahilí itó hulu lekelitoka minino.

Pilemó gele alévolé oake agika kimitímini mogona

⁴ Numuna loaká nou zupa zupa nene gugulizá oko geikumú Ómasi agepoka loaká noumó nene ⁵ geza Guivahani Izesukumú gele alévolé oaká anike, Ómasímini vegeenala zuha gigika kemeaká noanimó nenémini gakola nene vegeenalite likago gelekuke ló oaká nouve. ⁶ Itó géisi nene gele alévolé oakakú emane lezagi ligika molo hamó okinake, netá lamaná mukí Kilistokatí lelitoka utó oaká noimó nene gele vevesoko gilitane loko Ómasiloka loaká nouve. ⁷ Nigivénege, geza Ómasímini vegeenala zuha nasahilí okimiaká noane. Lá oko gigika kemenikumú nene mulúnegú lamaná noguluke, nogoliza vizeaká nouve.

Pauló Onesímini goha alématihe loko Pilemoni loká imó

⁸ Nenemú etati netá alitane loko Kilistoni gakotó lo hukoko logetatomó nelina, vávani oko lo gumulinamóza, ⁹ leza monokú nouhá vegeená eza agika amigo eza agika amigo oaká nounikeve loko hagitana voká noluve. Neza Paulona Izesu Kilistoni monó gakó lolo ale vémina itó aikumule loko nagá numukú nou vémina noluve. ^{10*} Neza nagá numukú nouke, ve makó alémo monó gapoló muluke alémo lá u ve agulizá Onesímo aikumú noluve. ¹¹ Agulizalímini mogona nene lelémo vatí oaká ve nego, aísi goí oko gelémo vatí amigo etamimóza, itínasa nene gezagi nezagi lelémo vatí oaká ve loló okago etokave. ¹² Áisi nene není gomuháne noimóza, goha alémo atiginá okugo, geitoka novize. ¹³ Neza nene Izesuni gakó lamanakumule loko nagá numukú nougo, áisi nene geitó omolelé oko gelekelé onetative loko ale gilitanogo umóza, ¹⁴ geza gele nememanitó alémo lá okugo alévolekutí nemekatahe loko gelekugo, gena okago, hulugutí nimitane loko gelekuke alémo atiginá nogetuve. ¹⁵ Onesímo ahulogetamó nenémini mogona lá oko noitive: Ahulogimikikoma nene, gamena koma oko vokiko atiginá oko nene gezagi alévolé oko mino-loko voko minanogo ive. ¹⁶ Nene gelekelelé ogetamitive. Koma itetigí oko minatize. Monokú givivekaho loló okago húnane novive. Itó nigika amenou ve noimóza, geitokagi ha netakumupe Guivahanímini izegipa loló ikumupe áminámini oko itetigí oko minatimó neve.

¹⁷ Nenemú nenikumú gelekako, givivekaho noitomó nene, Onesímini alémo mulukauka molatanimó nene, gelekako, Pauloni alémo mulukauka molanimó gilitize. ¹⁸ Itó goí oko netá makó ale golesa ogetonoitimó itó geitoka lihimala ma netimó nene, ámina lihima nenitoka molatane. ¹⁹ Neza Paulona láa loko není nigizanitunú luhuva gizo nogumuve: Nezáne apasoko giminogo uve. Lá itomóza, nenitokatí alévolé gemetameni alenimó nenémini lihima napa geitoka nemó nenemú ma lamuve. ²⁰ Nenemú, nigivénege, geza Guivahanimule loko netá makó loló onetatane loko noluve. Kilistotoka gímizusimómave loko mulénegú lamaná gilitove loko naná naná onetozo. ²¹ Geza není gakó imane gele alitane loko gelenouke luhuva imane nogizuve. Itó lutíminigó negopa gigikagutí geleko netá makó loló itane loko gelenouve. ²² Itó lekeza nene nenikumú numuna nilató Ómasímo nagakutí gologí onimikiko geitoka vitove loko nene gele hamó oko gelenouve. Nenemú géisi nene akato numuni ale vavá onetozo.

Vegeená makó gekéini loketamó

^{23*} Izesu Kilistokumule loko nagá numukú minusi ve nigivénehe Epapalá geikumú geké nologetave. ^{24*} Lá oake, hamó hozaló ve Makí, Alistakó, Temá, Luká keza nene ámináminiki geké niligitave.

²⁵ Guivahani Izesu Kilistoni nasahilí likigikagú mino moloko minino.

* 1:2: Kolo 4:17 * 1:10: Kolo 4:9 * 1:23: Kolo 1:7 * 1:24: Apo 12:12,25; 13:13; 15:37-39; Kolo 4:10,14; 2 Tim 4:10-11

Hipulu Vegenalitini Luhuva Gizo Kimimó

Ómasímo gipalámíni agepa ale vávani okago gakó lo limimó

¹ Ómasi eza gozapá agepagutí gakó liaká a vetini kegepa ale vávani okimikago, keza avotegini nene gakó haitopaitolímíni itó gapováa haitopaitolímíni li kimilíki iva iva amóza, ² gamena asú inogo noigo imane gamena nene gipalámíni agepa ale vávani okago aí gakó lo utó oko lo limimó. Gipala eza mukí netá matalímíni mututonáa loló oko minative loko lota véminí zámuzatunú mukí netá ale utó imó. ³ Ómasímíni lapanalámíni gonanalívámíni luhuváa aitoka utó imó neve. Itó Ómasímo minoko aleko itímíni lelegiláa aitoka minokanazo, nenemú ezáa zámuzalaló molo gele minake loaká noi gakó nenémo netá mukí hize lé omiaká noive. Áisi nene lihimate nagamí zelimiaká hozaváa ale asú oake, vozaú véminí agizani lamagaloka voko mitó minoko gizapa oko minamó noive. ⁴ Lá noike ageló kivilege asú oko minamómámíni lelegilaló nene agelolitini kugulizáini avilegeko iteko mina agulizá alimó neve.

Gipalámo ageló kivilege asú noi gakó

⁵ * Ómasímo gakó makó gipala lo amimó nene ageló makó láa loko lo amesá amive. Makó nene gipala láa loko lo amimóma neve:

Géisi nene gipáne noanize,

nénisi nene itínasa gelémo utó nomuluve.

Itó lá okove:

Nénisi nene amelahina loló oko minatoze.

Itó áisi nene gipáne minative.

⁶ * Makó nene minoko ganá gipala amiselekago, mikasiuka liminogo noigo, gipalámíni gokoláa láa liki luhuva gizinamóma neve:

Ómasímíni ageló vegená keza mukító gupá zi amiki agepoka li amitave.

⁷ * Itó helegaloka ageló vegenakumú láa loko luhuva gizonomóma neve:

Ómasímo lokago aí ageló vegenalitini kemetameni ale viligokago hepé kemetameni ali luhiaká niave.

Keza gelekelé izegipala loló o kimikago ló guluma kemetameni ale luhiaká niave.

⁸ * Lá onimóza, gipalamú nene láa loko luhuva gizonomóma neve:

Ómasi geza geí gonanalivagi siá alévolealáló minoloko voko minanogane.

Itó geí zámuzámíni hánusaváa ale minanike geí gasovaló nene ale hehe loko gizapa oaká noane.

⁹ Geza nene hee loko minoaká netakumú giviseaká noive.

Itó netá golesamú nene gumu helesá amive. Nenemú Ómasímo geí Ómasi áisi nene gogoliza vizitani netupa hologimikago gigivekagani kivilegekane.

¹⁰ * Makó nene gipalamú ve makolímó láa loko lonoimóma neve:

Guivahani geza ganatílisi mikasímíni guhaiváa molanimóma neve.

Itó okulumakuka keza nene gigizani luhuva ma niave.

¹¹ Keza miniki haha inigave. Itó géisi nene mino alévolé oko minanogo ane.

Kéisi nene luhoaká gó nenémíniki minikanazo, litaha lanigave.

¹² Lá íki niko, géisi nene gakeko ale molanogo ane.

Lá okako, keza nene haitó kemetameki lílí inigave.

Lá itamóza, géisi nene noani gemetamenígí áminalokó minanogo ane.

Itó meleke gamenavaka nene ma asú aminogo ive.

¹³ * Itó Ómasímo gipala láa loko lo amimó neve:

Oko nigizani lamagáneloka minoloko voko noako

gala vega kelémo nupa okugo gigisa lapuvauka minanigave

loko gipala lo ami gakó nene ageló makó láa loko lo amesá amimó nenazo, ¹⁴ ageló mukí

keza sikalahuki netá Ómasímíni gelekeleléa nene lugutó vizeakalímíni gihiláa ale lá ituni vegená lílími vatí itave lokogó kimiseleaká noive, itó Izesú nene ageló kivilege asú onoive loko gelenoune.

* 1:5: Age 2:7; 2 Sam 7:14; 1 Iki 17:13 * 1:6: Gapo 32:43; Age 97:7 * 1:7: Age 104:4 * 1:8: Age 45:6-7

* 1:10: Age 102:25-27 * 1:13: Age 110:1

2

Lugutó vizeaká iteko minamó

¹ Gipalámíni mogona lá oko noínazo, leza gopa gapo golesagú gapo veleko vokatune loko gipalamú gakó gulunimóma nene goha ale gosohá oko amuza moloko alévolé oko geleko minatune. ² Agelogíni kegepagutí gakó Mosé gizamó nenémo gihila zekago, vegenalite agelogíni gakóini avutá oaká itó gele ahulokoko pelevesava zeakalímíni mogona utó okago nene, lihímvagí nenazo, nenémíni ago helegáa lihíma mota alikámóma nenazo, ³ lélisi nana oko lugutó vizeaká netá iteko minamó nene gele ahulokoko voko haha itimó neve. Ezáa Guivahanímo ganatílisi ámina lugutó vizeaká gakó lo utó molamó nene kagatatanú gili kolosiki gilina vete li limi limi ago ago, alévolé onoimóma neve. ⁴ Lá onoiço, Ómasímó ezáa haitopaitó alévolé suni itó zámuzalámíni netala netá gosohá ale utó moloake keí gakó nene hize lé otake Sikalahutokatí monolímíni zámuzá ezáa lítoka molatoka oko gona molake limimó.

Izesú lugutó vizeakalímíni Guivahani noive

⁵ Mikasi alika utó itimómámíni gakó nolumó nene Ómasímó ageló keza gizapa itave loko loketamó negopa, vegenalita gizapa itave loko loletamóma neve. ⁶ * Nenemú nene monó gotolaú ve makolímó Ómasi lo ami gakó lo utó moloko láa loko limóma neve: Géisi vegená ánenémínaa nene nanáinimú gele kemeaká noane.

Itó ve nenémínaatíni kagapílamó nanamú ángíko kelémo vatí oaká ane.

⁷ Nene gamena alínipáisi ageló vegenalitikutí limíki minatave loko lokimíkanimóza, netá golvagítunú itó lapanalámíni agulizatanú ale akoloketanímó neve.

⁸ Lá okaníke netá mukí nene kígisa lapuvauka ale molokane.

Ómasímó netá mukí nene vegenalitíni sepéikuka molamó nene gona molamíke netá mukí avasavagí lehizeko asú imó. Itína gamená nene mukí netá nene vetíni sepéikuka molonoigo ángíosa amune. ⁹ Lá noimóza, Izesúni mogonáa nene ángíko geleaká nouné. Gamena alínipa makó nene ageló vegenalitikutí lemeko minamóza, miluma gilíke hílimómave loko lapanakí itó agulizá napagí lehizetamó nene ale akíseake noive. Itó ageló vegenalitikutí lemeko minamó nene Ómasímíni nasahílí lelí limitive loko lokago, áisi nene heleaká netá ekesalímíni nene vegená mukítoka lelíkumule loko gilimó neve. ¹⁰ Ómasímó netá mukí nenémo aí gelegele minatave loko noi ve itó netá mukílímíni amelaho loló oko mína vémo mohola gipala mukí nene gonanalívagí lapaná lehizeketatove loko gilimó nene kugutó vizeakalímíni Guivahani eza miluma geleoko vo mílisegekogó minatane loko Izesúni lotamó nene etokave.

¹¹ Itó kígíka alémo mokoná loaká noi ve nemó itó kelémo mokoná lamoláa keza minamó keí améipo hamokó noize, nenemú Izesú nene ízegípa nugunamotamóneve loketatove loko gelegeko avoza helemíve. ¹² * Nenemú Izesú Ómasi lo ami gakoláa lá oko neve:

Neza vegenáe zuha geí mogonamú lo kemekinake monó gele vegenáe zuhatíni holúikú nama loko gegepoka lítove.

¹³ * Itó eza Ómasímú lí gakó makó lá okogí neve:

Neza aikumú gele zageko minanogo uve.

Itó makokí lá oko neve:

Imane nezagí itó Ómasímó ízegípala nímmoláagi leza mukítoka nouné.

¹⁴ Nenemú Ómasímíni ízegípala leza nene lugupe mémelagi vegená mínoaká nounínazo, Izesú ámináminoko lelí lugupe ale luhámó. Lá imó nene ezáa nohílike heleaká amelahíni Satani zámuzá nene apele kulutokago, ¹⁵ heleaká netakumú kehelele vizeakalímó nagá zekago miníkí alíkí a gamenavámíni nagakú mína vegená vínasoketatove loko nenémíni imóma neve. ¹⁶ Ámina netá nene ageló kelémo vatí itove loko lá osá amíve. Eza Avalahani agapílamó zuhagítana gíha vegená lekelémo vatí oaká noive líkí monó gotolaú luhava gízínámóma neve. ¹⁷ Itó Izesú eza lelí guguní gízíoká ve napa nene ageló negopa, kugupe mémelagi vegená kelémo vatí itove loko limimó nenazo, Ómasímíni avogísaló eza lítokó mínoko hoza alévolé oko aleakalímíni itó ágíka hize lemekalímíni loló itive loko, Ómasímó vegená lelí lihímatemú goha ízapaló molamítive loko nene agunamotamóla lezagí mukí netakú hamó lelegító minatave loko lotonoimóma neve. Gapováa lugáa makó minamímó neve. ¹⁸ Ezáa lelíkitana miluma gilíke lemekú míliakakú vo holamó nenazo, nenemú vegená lelítoka lemekú moloaká netá nene utó o lemekíko, lelémo vatí itimó neve.

* 2:6: Age 8:4-6 * 2:12: Age 22:22 * 2:13: Isa 8:17,18

3

Izesuni agulizalimo Moseni avilegeneive

¹ Nenemú Ómasímíni apazá vejená nigivénegita, okulumakú netá izá miliki alitave loko sele lo likimimó neneta, lekeza monó gele alévolé oaká nounitímíni lole ale ve itó guguni gizo ameaká noi ve napa Izesuni ánihi hee liki ánihalo. ² * Ómasímo ámina hoza alitave loko lo molotató áisi nene Mosé nene Ómasímíni vejenala zuha gelekélé oketamó nenéminoko Ómasímo litokó minatímínoko Ómasímíni hoza alévolé oko minoloko voko ale minamó. ³ Numuní geaká noi vémíni agulizalimo genei numunímíni agulizá avilegeaká noive. Ámináminoko Izesuni agulizalimo Moseni avilegeko lapanalagi neve. ⁴ Itó numuní ale utó moloaká nene vejenalita geaká netá nemóza, netá mukí ale utó moloaká ve nene Ómasi noive. ⁵ Itó Mosé eza Ómasímíni numunigítana lílí iki mína vejenatoka minake Ómasímo litokó gelekélé hoza alévolé oko aleko minake, Ómasímo alika Izesukumú lo utó iti gakokumú gakola lo moloaká imó. ⁶ Lá oko minamóza, Kilistó eza nene gipalámo Ómasímíni numunigítana mína vejenatoka gizapa noketake Ómasímo litokó hoza alévolé oko aleaká noive. Numuní nene lélisi nene noune. Itó nene hanuvamukopa, ale vavá oleta netakumú ageva oaká nouni netakumú gele gele minínake mulutegú lamaná nogilínake minoloko vitunimó nene Ómasímíni numuní loló oko noune loko litunize.

Ómasímíni míno gelekélé oakalagú vo holatuni gakó

⁷ * Isilae vejenalite Ómasímíni gakó gili ahuliake míno gelekélé oakalagú vi hilamakumú nene Sikalahulímo lí gakóma monó gotolaú láa líki gizinamó nene gele minatunize:

Itína nene lekeza Ómasímíni anó lupa gilínitamó nene,

⁸ mikasi gomopalaló Isilae vejenalite gínikaha iake

mesaha ake Ómasi gimivagú milamó nenéminíki líkigíka híze lí iko minamílo.

⁹ Avotike keza neneló melekeni 40 oko novigo

golivagí netá mukí loló oaká umó

nene ánihiaká amó nemóza, hokolizá i nímiaké

gimínegú míliaká amóma neve.

¹⁰ Neza nenemú mesaha okuke keza gamena gamena gopa napa kagatatunú giliaká niamó níaze,

itó není gapo ánihi vevesíki ánihisá amamóma neve loko lonoumóma neve.

¹¹ Neza mesaha oketuke keza míno gelekélé oakánegú vi hilaminigave loko alévolé oko lo hukoko lumóma neve.

¹² Nigivénegita, lekelitokatí makó líkigíka anupaki míniiki monó gili ahuliiki alévolé ve Ómasi lekemegeza amíkatave líki gizapa iki mínaló. ¹³⁻¹⁴ Leza ganá apí oko gele seketigí uni gakó nene ale gíkitoko alínake anosaló anítitunimó nene Kilístóni nasahílí izá moloko ale mínuní vejená loló itunimó nenazo, gamena itó gamenavatíní ha neíkoma golesa netalímíni gimilegú moloká aleká oaká nenémo lekelitokatí ve makó apikulú alekoko Ómasímú agíka híze lí okatíve líki, eza agata alíko eza agata alíko iki luhusatíní alí alévolé iki mínaló.

¹⁵ * Nenemú monó gotolaú gakó makó lá oko nemó nene gele alitunize:

Lekeza itína Ómasímíni anó lupa gilínitamó nene

Isilae vejená gínikaha iake mesaha amó

nenéminíki líkigíka híze lí iko lá amílo.

¹⁶ * Nene hí vejenalite Ómasímíni anó lupa gili ahuliake pelesa ziaká amó neve. Mosé ale goí oketago Izípi mikasiukatí a vejenalite lá amóma neve. ¹⁷ Itó hí vejenakumú Ómasímo izapaló molokago melekeni 40 oko vimó neve. Nene golesa netá aliaké mikasi gomopalaló hílí gesá a vejenakumú nene nenémíni imóma neve. ¹⁸ Itó hí vejenakumú míno gelekélé oakánegú vi hilaminigave loko alévolé oko lo hukoko loko límó neve. Nene gakola gili ahuliaké pelesa ziaká a vejená Isilae vejenakumú nene límó neve. ¹⁹ Nenemú lá oko gelenoune. Keza Ómasímú gili alévolé amatímo míno gelekélé oaká apalaloka vi hilamamó neve.

4

¹ Míno gelekélé oakalagú vi hilatave loko lo mololetonoi gakó nene háha amímó nenazo, nenemú lekelitokatí makolímóhe makolímóhe Isilae vejenakítana oko ámina gapoloka vo legesó okatíve loko lelegesá lígítize. ² Nene hanuvamú nomíve. Ómasímíni gakola lamaná

* 3:2: Nam 12:7 * 3:7: Age 95:7-11 * 3:15: Age 95:7-8 * 3:16: Nam 14:1-35

Mosé lo kimimó áminagó leza lagataló vo holokave. Itó keza ámina gako gelemóza, mukilite kigikagú ali milamago lemeko minamigove loko keitoka hutuvagó minamó. ^{3*} Leza monó gele alévolé oko gelenounimoláate ámina mino gelekelé oakalagú vo aniteaká noune. Nenemú Ómasímini gako gili ahulakumú láa loko limó:

Neza mesaha oketuke keza mino gelekelé oakánegú vi hilaminigave loko alévolé oko lo hukoko lumó neve.

Nene mikasímini guhaiváa molake netá mukí loló o asú onoitotí mino gelekelé oko minake, alika ámina gako limó. ^{4*} Ámina mino gelekelé oaká gamenamú nene Ómasímo netá mukí loló o asú oake gamena nampa 7 neneló mino gilimó neve liki luhuva gizina gako nene monó gotolaú neve. ^{5*} Lá okago, veletoka Isilae vejenakumú nene keza není mino gelekelé oakánegú vi hilaminigave, loko limó.

⁶ Leza Ómasímini mino gelekelé oakakú vo holatuni gapo nene ha neve. Lá onoimóza, gozapá vo holoakalímini gako lamaná lo kimi vejená keza gili ahuliake vi hilamamó nenazo, ^{7*} nenemú itína vo holatuni gamena makó moloake, mota lo lukumu gako nene alika Tevitini agepagú molokago, láa loko limó:

Lekeza itína nene Ómasímini anó lupa gilinitamó nene, likigika hize lí iko minamilo.

^{8*} Zosúa nene mino gelekelé oaká numuni apá gihiláa ale utó moloketamó nelina, Ómasímo alika haitó mino gelekelé gamenamú lamilinamó nenazo, nenemú Ómasímo haitó mino gelekelé gamenamú limó neve loko gelenoune.

⁹ Nenemú láa loko gilitunize: Ómasímini vejenala zuha lelí mino gelekelé oko minoaká holisi makó ha neve. ^{10*} Ómasímo hoza ale asú oake mino gilimó ámina iki vejená makó keza Ómasímo mino gilitó mini milatamó nene hozáini alilikí nivitakutí mini gililikí iki minamó gelekave.

¹¹ Lá onoimó nenazo, lelitokatí makolímó Ómasímini gakola gili ahulakumú vejená gozapá ginikaha gapo miliki vamó áminaló vokatinazo, Ómasímini mino gelekelé oaká apatoka vo holatune loko amuza molatunize. ¹² Ómasímini gako gele ahuloakakumú makó láa loko gilitune: Ómasímini gako nene alévolé oko minoakalímini neve. Itó amuzavagi neve. Itó amitá makó agepáa amegesaloka itó agómulaloka sánevetá nene avilegeko noimokitana nenazo, nenetunú hukomo lemeko lemenigi ligikagi itó helisate mapilihavetegi ómuvagi noko helegetoaká noive. Lá oake, áminatunú nene Ómasímo ligikámo geleakaláa itó gele laga oakalímini mogona ale utó moloaká noive. ¹³ Itó áisi netá mukí ale utó molamó nenazo, Ómasímini avogisalo nene hí netá asuguná oko minative. Aí avogisalo nene netá mukí halakeko nomíve. Itó goni hoza alinogo uní vémini avogisalo nene utó okogó neve.

Izesú lelí guguni gizoaká ve sipisite noive

¹⁴ Lelí guguni gizoaká ve sipisi iteko minamó makó minoletonoi ve Ómasímini gipala Izesú áisi nene okulumakú iteko noive. Neneló minoletonoinazo, monola loaká nounimó nene ale gikitoko ale minatunize. ¹⁵ Itó guguni gizoaká ve sipisite eza gena liviseko láa noigo áni go ámegeletosá amíve. Lelitoka lemekú moloaká netá utó oaká noimó ámináminoko aítoka haitopaitolímíni utó imóma nemóza, aítoka lihima hamoláa minamimó neve. ¹⁶ Lá onoimó nenazo, netá makolímóhe makolímóhe omo lovogisaloka noikoma, áisi nasahilí oletoko agika hize lemeko lelémo vatí itive loko leza nasahilila aleaká siá eza gizapa olimiaká noimómalo lehelele vizemiko anititune.

5

¹ Mikasiuka ve lelitokatí guguni giziaká ve napa napa keza Ómasímini vejenakumule loko Ómasiloka utó i amiiki lihímáikumú agepoka líká netá matá guguni gizi amiká amitave líki kilími etó iaká niave. ² Ve nenémináa kezagi keé lamamó minikanazo, negi nagí gatizá minunike otolova o vunimoláa lelikumú hulu iki mílumavate gilitató niave. ^{3*} Nenemú keza keé lamamómave líki, vejenalitíni lihíamamú itó kezáini lihímáikumú netá matá guguni gizi amiaká niave. ^{4*} Itó ámina hoza ite minamó nene kezáini kigikagutí gakotó negopa, guguni gizoaká ve napa keza Ómasímo kelémo etó okake ámina hoza nene kigizakú molokave. Ámina hoza amelaho Alonani nene gozapá ká emane amunaloka ámináminoko Ómasímo amimóma neve.

* 4:3: Age 95:11 * 4:4: Apí 2:2 * 4:5: Age 95:11 * 4:7: Age 95:7-8 * 4:8: Gapo 31:7; Zos 22:4 * 4:10: Apí 2:2 * 5:3: Liv 9:7 * 5:4: Gá 18:1

5 * Itó Kilistó eza ámináminoko ezáamú giligo itekago guguni gizoaká ve napa loló amimóma neve. Nene Ómasímo láa loko lomikago loló imóma neve: Geza nene gipáne noanize.

Nénisi nene itínasa nene gelémo utó nomuluve.

6* Itó gako makó láa loko lo amimó neve:

Géisi nene Melikisetekeni avevezahaló oko guguni gizo ameká ve mino lúaló moloko minanogane.

7 * Izesú eza mikasiuka mina gamenaló hilynogo noitotí alémo atiginá oaká zámuzagi mina veloka like sele napa like agómulagutí ive nogoza lemekago voká sipisi lotamó. Lá okago Ómasímíni amakuka lemeko minamómave loko gele amimó. ⁸ Eza Ómasímíni gipala minamóza, gopa nene miluma maluma geleloko vitotí Ómasímíni gako gele aleakalímíni mogonáa ángo hee limó. ⁹ Lá oake, guguni gizoaká ve napa loló itikumú vo milisegeko mina ve loló oake aí gakola gili aliaká a vejená mukitoka keí kugutó vizeaká nekisáa nomitímíni améipo loló imó nene, ¹⁰ lelí guguni gizo ameká ve sipisi Melikisetekeni avevezahaló minative loko Ómasímo lotató lá imó neve.

Monó ahulikatave loko kagata alimó

¹¹ Nenémíni gako mukí nemóza, lekelisi geleakatini alínipagi minikago, lo likimitove loko gulumó gena okave. ¹² * Lekeza gamena hána monó gililíki iva iva iki minatitegi vejená lugáatini tisá lílí alina, etalinamóza, lekeza monó avogisáa nene goha lo lekemeakató miní mílikave. Lekeza likigikámíni nosá alévoleláa namitató niave. Hanuva aminikó níki minata lelegító minikave. ¹³ Aminí niaká nia vejená nene hehe loko minoaká mogona ma gili hee lamanazo, vejená nenémínamú nene namuni niave loko loketatunize. ¹⁴ Nosánetá alévoleláa nene olopa vejenalítini mututoni neve. Kagata kígika koloso lamaná okago, netá golesámíni itó lamanalímíni mogona gili-likí nivake nenémíni mogonáa gili vevesiaká nia vejenalítini mututoni lílí inamó neve.

6

¹ Nenemú nene leza lá okove loko Kilistoni gako avogisáa apí ikú loakalímíni nene molokuko neko, gako amegesáa loloko itínake loakalímíni gapó nene miní amitunize. Monó guhaiváa litaha nene nomilinake, gihila nomi hozalotí ligika emane ale viligoaká itó Ómasímú gele alévolé oaká, ² itó nagamí holoaká gako haitopaitolímíni itó gotóitó ligizani moloko lusa geaká, itó helenosakutí oteaká, itó lihima moloketomo vova vova oaká gako nanamú goha apí itune. ³ Ómasímo gelekiko, lamaná okikoma, gako amegesáa makó miní amitunize. ⁴ Nenémíni amitunikumú láa líki gililo: Monolímó nene vejená lugáatini kígika alémo hanatokago okulumakutí nosánetá níki gilínamó, itó Sikalahú ali lá inamó, ⁵ itó Ómasímíni gako itó alika utó ití gamenámíni alévolé zámuzámíni lagaváa gilínamóza, ⁶ Ómasímíni vejená nenémínaa keza monéna monó ahulatamó nene, Ómasímíni gipala goha zohota zaló apilíiki avoza netá lílí itatamó gilitimó nenazo, kígika goha ali viligikiko kelémo atiginá oakaláa nene ma nomive. ⁷ Mikasi makó nene golinímó gamena gamena zeko minake alémo geha zekago, vejenalite áminaló zuhaina iaká niago, nosánetámíni ale utó molokimiaká noimó nene Ómasímíni lusaló nene mikasi amelahitoka gihiláa utó oaká noimóza, ⁸ * ámina mikasiloka liliha gasovagi netakó vizitítímó gohogó mikasi loló okikoma usí vizekiko lolímó latitó neve. Mikasímú lumó nene mikasímú negopa, vejenakumú lo moloko noluze, gililo.

⁹ Nígika lekemenou vejenáise, neza gako láa loko nolomó nene lekeza lapuluva itave loko geleko lamuve. Lukugutó vizimó nenémíni gihiláa lekelitoka utó oloko voko minative loko gele seketigí oko noluve. ¹⁰ Ómasi eza ma ale gopa oko lá oko osá amive. Eza hee loko mina ve noinazo, lekeza aikumule líki hozaváa aliake líkígika aminatímíni gihiláa nene vejenala zuha kilímí vatí ake nasahilí ikimíaká amó itó itína nalemó nene ezáa nenemú agatí molaminogo ive.

Ale vavá oleta netakumú ageva oko minatune

¹¹ Lekeza mukitoka hamó lelegító vávani iki lílí ikiko, lehizeletati netá ale lá itune líki ageva iki lakagatagó minoloko noitiko gamena asú itive loko gelenouve. ¹² Nenémíni gihila nene lekeza migelelé amiki vejená lugáate gili alévolé inake itó goselé kepelemigo legesó iki netá matá lo moloketamó ali aliaká nia vejenalite vilina gapoló nene kemegegaló míliki iliki vitave loko noluve. ¹³⁻¹⁴ * Nenémíni gakola makó lá oko neve: Avalahani nene

* 5:5: Age 2:7 * 5:6: Age 110:4 * 5:7: Mat 26:36-46; Mak 14:32-42; Luk 22:39-46 * 5:12: 1 Koli 3:2 * 6:8:

Ómasímo lo hutake nénisi nene lusa goha gegetoko goha gegetoko inogo uve. Itó okinake geí gagapilamó zuha hize hutilí ogimiká hize hutilí ogimiká inogo uve. Loko lo molotake ve makó iteko minamómámini agulizató lo hukatove loko gilimóza, vitagá oake ezáa agulizató ale alévolé oko lo hutamó. ¹⁵ Itó Avalahá eza Ómasímo láa loko lo molota gajokumú goselé apelemigo legesó oko minoloko itikeve loko ámina gakoímíni gihila ale lá imó. ¹⁶ Vegenalita lizizani iteko ve makolímíni avogisaló ale alévolé oko lo hukoaká gako nolínake lelikutí ite mína vémini agulizató lokuko, pelesa zeaká gako nene utó aminogo ive. ¹⁷ Ámináminoko Ómasímo eza limitove loko lo mololeta netakumú nene Ómasímo genezala ale viligoko haitó gako litihe liki kagata losi gilikatave loko agikatumú giligo alévolé okago limó neve. Nenémíni mogonáa ale utó molatove loko lo moloketa netalímíni gakoímíni amupiló ale alévolé oko lo hukoaká gako nene miní amimó. ¹⁸ Lá imó nene eza soza saza gako nomimó mína vémo ale alévolé oko gako lositá limó nene hize oteake amekago nene, aí amakuka golisi oko halá guni vegená lezagi nene netá matá ale vavá oletamó nenémíni gihilamú amuza moloko alitune loko gele minatune loko lá imó neve. ¹⁹ * Ale vavá oleta netakumú logoliza vizeko ageva oko nounitímó ligikámíni lukesavate loló oko noike guguni giziaká ve napate monó zavusavegú ímeha gó agikagú itiaká amómáminoko okulumakú Ómasímíni avogisaló lelémoko iteaká noive. ²⁰ * Neneloka lelikumule loko ale goí olimiaká ve Izesú áisi nene ale goí o mololetoko voko agikagú vo hola ve Melikisetekeni avevezahaló lelí guguni gizoaká ve loló oake alévolé oko mino lúaló moloko minanogo ive.

7

Melikiseteké Ómasímíni guguni gizo ameaká ve mína gako

¹ * Melikisetekeni mogonamú lo likimitoze, gililo. Eza nene Saleme numutoka agulizaki ve napa itó Ómasi napámíni guguni gizoaká ve minamó. Lá noigo Avalahage kugulizaki ve gala véini kipilí gízatotí atiginá niago, Melikisetekege viki gapoló hotu likasike eza Avalahani nónohá zetamó. ² Lá omikago, Avalahá lovagutí vauna netá alekamó nene gatoko gona moloake netá 10 10 minakutí hamopamó nene Melikisetekeni amimó. Itó Melikisetekeni agulizalímíni mogona lelí gakovutí nene hee loko minoakalímíni agulizaki ve napave. Itó Saleme apalímíni agulizaki ve minakeve loko, agulizá makó lelí gakovutí nene hulu Guivahanive loko neve. ³ Melikisetekeni izolahiko amelahiko itó avolage keí kugulizá nene monó gotolaú luhuva gizinamámóma neve. Keí mogonamú vitagá iki iki ali utó mílamamó neve. Eza minoko aleko imó nene apí imoláagi minamimó itó hilimoláagi minamimó nenazo, eza Ómasímíni gipalagitana minake guguni gizoaká ve miní ameko mino-loko voko minamó nominave.

⁴ Imane gili guni iki gililo. Melikiseteké nene ve napa loló oko noigo, avoteho gihila Avalahá eza ve iteko minamó nenémó lovagutí vauna netá lamanakó gatoko gona moloake netá 10 10 minakutí Melikisetekeni hamopamó amimó neve. ⁵ * Livaini agapilamola lugáa guguni giziaká ve lílí iki mína ve keza Avalahani zuha lílí amó nemóza, kigive kagavegutí netá matáini mukí omolamó 10 10 minakutí hamopamó ali alitave liki li mila gako ali nupa iki lakutí nene li hukikitiki lamó neve. ⁶ Lá onoimóza, Melikiseteké eza nene Livaini mulusigutí utó ami vémo nene Avalahani netá matala mukí 10 10 minakutí nene hamopamó gopa alimó. Lá noike, Ómasímo netá lamaná gimitove loko lo molota ve Avalahani nene nónohá zetamó. ⁷ Itó iti mína vete límí mína vegená nónohá zikimiaká niakumú nene makolímó ma gelemuve loko lamitímó nenazo, nenemú Melikiseteké eza Avalahani avilegeko ve napa minamó neve loko gelenoune. ⁸ Lugaloka nene guguni gizi amiaká nia ve keza miniki hilitamó nenete vegenalitimíni netá matáini 10 10 nekutí hamopamó aliaká niaive. Itó lugaloka ámina netá 10 10 nekutí hamopamó ali ve Melikisetekukumú nene eza híli gako itó agapilamó zuhatini gako ma nominazo, eza minoloko voko minoaká noi veve liki luhuva gizinamó gelekave. ⁹⁻¹⁰ Neza gelekugo lá okave. Livai eza avolahini agupeuka ha noigo, Melikisetekeki hotu li lomala niasigo, Avalahani livi nene ale amimó nene Livaini amimó geleneive. Lá okago, Livai eza vegenatotí henoni 10 10 nekutí netá hamopamó aliaká a vetini avóipo mína vémo Avalahani amatoka minake ámina netá nene Melikisetekeni ale amimó gelekave. Itó Livai ai agapilamó zuhagi guguni giziaká ve lílí amó mukitó nenete Melikiseteké mota Livaini avilegekave liki linamó gelekave.

¹¹ Livaini agapilamó zuhatini guguni gizoaká hozámíni gizapaló nene Ómasi eza Mosé lo hukoko li gako nene Isilae vegená kimimóza, ámina guguni giziaká ve keza gapo velemó nenémó vo milisegeko minatuni netá ale utó ilina, alika guguni gizoaká ve makó haitolímíni

* 6:19: Liv 16:2 * 6:20: Age 110:4 * 7:1: Apí 14:17-20 * 7:5: Nam 18:21

Melikisetekeni avevezahaló nanamú utó iline. Guguni giziaák ve Alonani agapilámó zuha minámó nenete lilími vatí ita lelegító minaline. Lá onoimóza, Izesú utó oake eza Alonani avevezahaló oko minamive. Eza Melikisetekeni avevezahaló utó imó neve. ¹² Nenémíni mogona makó lá oko neve: Guguni gizoaká hoza litaha senisim oko gosohá makó ale utó itove loko lonoimó nenazo, Ómasímíni avogisáló vo holoakakumú lo hukoko li gakó ámina iki senisim ikíko, gosohalímíni makó utó itive loko lonoimó neve. ¹³ Lo hukoko li gakó nenémo Izesutoka vo alekago, eza guguni giziaák zavusavegú hoza ali ve Livaini agapilamolaloka likita vetini mulusigutí utó amimó. Izesú nene haitó mulusigutí utó imó nene ámina mulusigutí ve makolímó guguni giziaák zavusavegú hoza alesá amimó neve. ¹⁴ Guivahanite eza Livaini zuhagutí negopa, agunala Zutani zuhagutí utó imó neve loko mota gele asú oko gelenoune. Itó Zutani agapilámó zuha keza guguni gizi amiaká hoza alitakumú nene Mosé gakó makó lonamimóma neve.

Izesú Melikisetekeni avevezahaló utó i gakó

¹⁵ Itó guguni gizoaká ve gosohámámíni mogona makó lá oko utó okave. Guguni gizoaká ve makó Izesú eza Melikisetekeni avevezahaló utó okave. ¹⁶ Eza guguni gizoaká ve loló imó nene Livaini agapilámó zuhagutí utó inigave liki li hukiki linató negopa, eza alévolé oko minoakalímíni zámuzaló guguni gizoaká ve minámó minokave. ¹⁷ * Aikumú nene monó gotolaú nene géisi Melikisetekeni avevezahaló guguni gizoaká ve mino lúaló moloko minanogo ane liki luhuva gizinámóma neve. ¹⁸ Nenemú Mosé lo hukoko li gakó nenémo vo milisegeko minatuni netá ma ale utó oloko vamimó nenazo, helegaloka guguni gizoakalímíni gakó gozapá limó nene amuza nomitó gihila makó utó amimole loko ale otopá zimó. ¹⁹ Itó helegaloka nenémíni avilegetigí oko guguni gizoaká gosohakutí netá lamanakumú ageva oakalímíni gihiláa ale utó molámó nenémo gapo velelimikago, Ómasímíni avogisaloka voaká noune.

²⁰ Gosohá guguni gizoaká nenémo Izesutoka utó imó nene Ómasímó ale alévolé oko lo hukotató alévolé zámuzalagi utó o amimó. Goí iki guguni giziaák ve keza Ómasímó ale alévolé oko lo hukoko lamitó guguni giziaák ve lilí iki minamóza, ²¹ * gosohá imane nene Ómasímó ale alévolé oko lo hukotató Izesú eza guguni gizoaká ve gihiláa loló oko noive. Aí luhuva gakó Ómasímó lo amimó nene lá oko neve:

Guivahanímó ale alévolé oko lo hukake géisi guguni gizoaká ve mino lúaló moloko alévolé oko minanogane loko li gakó nene ahulaminogo ive.

²² Mogonáa nenémínoko minokago, Izesú nene lo múnahaeká gakó gihilámíni ale alévolé iti ve loló imó neve.

²³ Itó goí iki guguni giziaák ve keza nene hoza miní amíki alilíki nivake hili vivi amó nenazo, ámina hoza agepaló alita ve mukí minámó. ²⁴ Lá inamóza, Izesú alévolé oko minoaká ve minoakeve loko guguni gizati hoza nene miní ameko mino lúaló moloko minanogo ive. ²⁵ Nenemú alévolé oko minoakakú noi vémo nene gamena gamena lelikumule loko Ómasiloka voká loaká noinazo, aikumú gele alévolé unikeve loko Ómasímíni avogisáló voaká nouni vegená vatí oko lugutó vizeleko voko minatimó neve.

²⁶ Lelémo guni guni oaká ve Izesú nene lelí guguni gizoaká ve napa noimó nene etokave. Eza apazá keké vizeko minoko lihima nomimó agika gizopa lo minámó eza golesa netá aliaká a vegenakutí etó oko minake, okulumá avilege asú oko nomina ve nenémínáámo hoza lá oko aleaká noimó nene etokave. ²⁷ * Áisi nene guguni giziaák ve napa lithagaitana nomive. Keza gamena gamena ganá kezáini lihímáimimú ganatilisi guguni gizi amiake alika vegenalitini lihímáimimú giziaák niámóza, hoza nenémínáa aliti mogona Izesú nene lihínavagi minamikumule loko nomimó. Eza agika agupeva nene lehizetake guguni hamó nene gizo amekago voko asú imó. ²⁸ Mosé lo hukoko li gakotó nene vegená kígikámo gopa i vegená nene guguni giziaák ve minatave loko gopa loketatómó, Mosé lo hukoko li gakó amupiló nene Ómasímó ale alévolé oko lo hukooká gakó nenémo gipala alémo etó okago, áisi nene guguni gizoaká ve minoloko voko mino lúaló moloko minatikumú vo milisegeko minámó neve.

8

Izesú lo múnahaeká gakó gosohalímíni guguni gizoaká ve noive

¹ * Gakó nolomó nenémíni gotola ale nupa oko lá oko neve. Lelí guguni gizoaká ve napa eza veletoka okulumakú Ómasímíni golvagi holomaló amakuka agizani lamagaloka voko noive. ² Eza apazá zagusave itó monó seli numuni gihiláa nenegú lelikumú Ómasiloka loaká

* 7:17: Age 110:4 * 7:21: Age 110:4 * 7:27: Liv 9:7 * 8:1: Age 110:1

noimó nenémo guguni gizoaká hoza loló okave. Ámina zagusave gihilama nene mikasi gomopalaló monó seli numuni vegealite gemokopa, Guivahani ezáa ale utó imó. ³ Guguni gizi amiaká ve napa mukitoka keza iza goula nosá gizi vatá iaká itave liki kilími etó amó nenazo, nenemú lelí guguni gizo ameká ve Izesú ezagi Ómasi guguni gizo amitive loko lonoi ve minamó. ⁴ Itó mikasiuka Mosé lo hukoko li gakotó Livaini mulusigutí guguni giziaká ve nene hanuva niamó nenazo, Izesú eza keí mulusigutí utó amimó nenazo, eza itínasa mikasigú minamó nelina, lihimatemú guguni gizoaká ve minamiline. ^{5*} Keza monó numukú hoza aliaká niamó nene hanuva avevezaha neve. Gihiláa nene okulumakuka neve. Nenémini gakola makó nene monó gotolaú lá oko neve: Mosé eza monó seli numuni gitove loko noigo, Ómasímo láa loko lo amimó: Gelenape. Agokaló noako ametamenia gelepezimó nenemáminoko netá mukí loló ozo loko lotamó. ⁶ Gosohá lo múnahi gakó iteko nemó nene ezáa gosohá lo mola gakó iteko nemó nenémo guhaiváa loló omikago ale utó molamó nenazo, ámina seli numuni gitikumú láa loko lotamóza, imane nene Izesú eza Ómasigi vegeaki kelémo apizitove loko lo múnahi gakó gosohá nenémo iteko nene neve. Áminámini oko guguni gizoaká hoza ezáa aleaká noimó nenémo iteko mukí guguni giziaká vetini hozanini kivilegekave.

⁷ Gozapá lo múnahi gakó minamó nenémo vihelé lo minamó nelina, alika makó utó itive loko gakoláa utó amiline. ^{8*} Lá onoimóza, Ómasi áisi nene Zuta vegeanakumú gele golesa oake, lo múnahi gakó gosohakumú láa loko limó nene monó gotolaú láa liki luhuva gizinamóma neve:

Minoko gamena makotó nene Isilae vegeaki itó Zuta vegeaki lo múnahaká gakó gosohá makó ale utó oketatove loko Guivahanímo loko limó neve.

⁹ Gosohá nenémo gozapá avóike Izipi mikasiukatí kelémoko atove loko kigizató alu gamena kezagi lo múnahaká gakó moloketu gakokitana nomive.

Keza lo múnahaká gakó litaha nenémini agikagú ali hehe liki minamago, nénisi ánigo ahuloketumó neve.

¹⁰ Itó alika Isilae vegeaki láa loko gakó lo múnahinogo uve: Neza lo hukoaká gakónéa kagatagú molokugo liminogo ive.

Lá okoko kigikagú luhuva gizokugo minatize.

Neza Ómasinini minatoze.

Itó keza vegeanáe zuha minataze.

¹¹ Lá okiko ámemena niamó itó iti minamó mukí keza

nenikumú gili asú iki gilitamó nenazo,

nenemú ve makolímó agivelahinihe itó ahalulahinihe

geza litá oko Guivahanímini mognáa gele hee lozo loko monó lo ameko lainimotaminogo ive.

¹² Lá okomú gilinigave: Neza nigika hize kiminake golesa netáini ahuloketanogo uve.

Itó lihimáminimú goha nagata ma gelemínogo uve loko Guivahanímo lokave.

¹³ Itó Guivahani eza lo múnahaká gakó gosohalímini gakoláa láa loko like, gozapá minamó nene mota litaha lokave loko limó neve. Itó netá litaha hulupa lo vi netalímó haha ititó neve.

9

Litaha seli numunima monó numuni makó gihiláámini avevezahaló minamó

¹ Lo múnahaká gakó lithagú nene Guivahanímini avogisaló gupá ze ameká gakó minamó, itó imane mikasiuka monó seli numuni gemó ^{2*} nenémini gakola lá oko minamó: Ámina seli numukú nene sahaza makó hizi hukamó makó avogisaló minamó, agulizá apazole liki lamó, nenegú nene lamu ló hána itó holoma agisavagi minamó, itó holoma amupiló nene Ómasímini avogisaló milina peleti nene minamó. ^{3*} Itó voko agika makó ímeha gotunú hizi hukamó minamó, agulizá apazá gihiláa etole loko minamó. ^{4*} Nenegú nene anuvagi paulá guguni gizoaká holoma makó golitunú líli amó nene minamó. Itó golitunú hitina pokisi nene lo múnahaká gakolímini pokisi minamó. Áminagú laisigitana netá agulizá mana nosalímini somo nene golitunú líli inamóma nene minamó. Itó Alonani hánusa sisiváagi nene minamó. Itó gatapa gehani losiló nene gapo lota gakó luhuva gizokago minamó. ^{5*} Veletó nene Ómasímini lapanalímini avevezaha netá kogokénagi netá ageló nenéminoko lositá keza pokisimámini amupiló lihima gilatoakakumú golani hepa

* 8:5: Gá 25:40 * 8:8: Zel 31:31-34 * 9:2: Gá 26:1-30, 25:31-40 * 9:3: Gá 26:31-33 * 9:4: Gá 30:1-6, 25:10-16, 16:33; Nam 17:8-10; Gapo 10:3-5 * 9:5: Gá 25:18-22

hepa iaká ató nene kogokénatunú ali hitikasike minasimó. Nenémíni gakola hána okative loko miní ameko lo asú amitove.

⁶* Netá nenémíni milikago, nego, numuni avogisa nenegú nene guguni giziaká a ve keza gamena gamena itiki hozanini aliki miniaká amóza, ⁷* apazá gihiláa etole loko mina numuni agikagú nene guguni giziaká vetini ve napa ezágó melebeni makolímíni agikagú nene gamena hamó zupa iteaká imó. Lá oake meme izatini itó pulumaká izatini golani aleneikégó itike ezáa lihma itó veenalítini lihimáini gopa alinamó nenemule loko lihma gilatoaká holomaló golanima hepa hepa imó. ⁸ Ámina netalímíni mogonamú nene Sikalahulímó láa loko lo nolimíve: Seli numuni nene ha neiko apazá gihila etó onoi zavusavegú Ómasímíni avogisalo vo holatuni gapo koló o gesá amimó neve. ⁹ Itó ámina seli numuni minamó nenémó imane gamenaló Izesú loló oaká noi netalímíni avevezahaváa neve. Nene ángokínake nene apazá seli numukú iza goula nosá guguni gizi vatá iaká nenémó Ómasímíni monó lituni vejená ligikagú vihelé lo miníko minatuni netá ale utó amítimó neve loko gilitune. ¹⁰ Nenémó lugupeloka li mila gakó nenegó neve. Itó zahí nagamí itó lugupe nagamí zeaká nenémíni gakoláa neve. Nene Ómasímíni gakotó utó okago, vejenalite ámegetilíki víki níko alíka Kílistó lo múnahéaká gakó gosohá utó itive loko lo hukoletamó neve.

¹¹ Lá onoimóza, Kílistó áisi nene netá gihiláa ale utó inogo molamó nenémíni guguni gizoaká ve napa utó imó. Lá oake seli numuni haitolímíni nene vo mílisegeko minamó itó gihiláa lamaná minamó itó kigizanitunú gemamó itó imane mikasiuka nomimó nenegú ítimó nene ¹² eza memegí pulumakalítiníni golani negopa, ezáa golaniagi apazá etó oko mina apakú gamena hamó itike meinavate hizeko gologí oletati gapo vilimó nenémó alévolé oko míno lúaló moloko minanogo ive. ¹³* Memegí pulumakalítiníni golani itó pulumaká akalevámíni lanía nene golutuva mogona alina vejenatoka hepa hepa iake kugupeloka holokimikago, vihelé igo minamó. ¹⁴ Lá okanazo, Kílistó eza nene míno-loko vova vova oaká Sikalahulímó hize lé otago, ezáa agíka agupe avasavagi minamó nene Ómasi lehizemiake, lélisi oko moloko oaká uhá netá hutuváa ligikagú gímizimó nene Kílistoni golanímó aleko iteko nagamí zeko lelémó vávani okíko, alévolé Ómasi gelekeleláa otanogo une.

¹⁵ Nenemú nene Kílistó eza lá oake, lo múnahéaká gakó litaha nenémíni gizapaló minunike lihma ale utó mulunikutí akagá oletatove loko hilimó neve. Lá okamó nenazo, Ómasímó sele lo kímí vejená keza alévolé oko mínoaká helisa henoni alitave loko lo moloketamó nene ali lá itave loko Ómasíni vejenaki kelémó apizeakakumú lo múnahi gakó gosohá ale utó mololimikave.

¹⁶ Helisa henonímíni gapováa lá oko neve. Izegípatini améipo hilimómámíni mogona utó o lamaná okagogó helisa henoni alita gapo koló itive. ¹⁷ Gosohá agómulagi noíko, helisa netalímíni gakó nene hanuvagó minanogo ive. Helekíko, améipini netá matakumú luhuva gízina gakó nene gihila zekíko, helisa henonima gona míliki alínigave. ¹⁸ Nenemú áminámínoko lo múnahéaká gakó litaha nenémó pulumaká ahe memetini golani lepikagógó vo alimóma neve. ¹⁹* Nenémíni mogona lá oko neve: Mosé eza lo hukoko li gakó luhuva gizamó nenémíni gakola lo keme asú oake, pulumaká izatini itó meme izatini golani nene nagamíki ale gopa oake, sagelegelegítana netató nene meme izámíni zopova goloहतunú molo lílake, nenetunú nene ahípí zeake, lo hukoko li gakolímíni pepaló itó vejenatoka hepa hepa imó. ²⁰ Lá noíke, Ómasímó lo múnahéakalímíni gakó lo hukoleketamó nene golani imanémó ale alévolé oko minative loko lo kímimó. ²¹* Mosé nene monó seli numuni nemó itó apazá hozámíni netá matá nemó nene lá oko ahípí zeto asú imó. ²²* Itó lamaná Mosé lo hukoko li gakotó netá mukí otígí nene memetini itó pulumakalítini golanitunú ale guluví loaká noimó neve. Golani lepinamató nene lihma gilatoakaláa ma nomíve.

Lihimate Kílistoni amupiló itekago agohí geake Ómasi guguni gizo amíke hilimó

²³ Netá matá gihila okulumakú nemó nenémíni avevezahaváa nene gaha-namatini golanitunú nenémíni nagamí ziki ali guluvitatave loko lonoimó nemóza, okulumakú iteakalímíni gapo gihila nene guguni gizoakalímíni etó oko haitolímínitunú nagamí zeko ale mokoná latíve loko lonoimóma neve. ²⁴ Nenemú nene Kílistó eza apazá zavusave kigizanitunú gemó itó netá gihilámíni avevezaha minamó nenegú nene vo holonamíve. Eza okulumakú iteake Ómasímíni avogisalo lelikumule loko hize lé oletati hoza nene aleaká noíve. ²⁵ Zuta vetini guguni giziaká vetini ve napa áisi meleketó meleketó gamena hamokó

* 9:6: Nam 18:2-6 * 9:7: Liv 16:2-34 * 9:13: Liv 16:15-16; Nam 19:9,17-19 * 9:19: Gá 24:6-8 * 9:21: Liv 8:15 * 9:22: Liv 17:11

zupa apazá numukú voaká noive. Lá noike, ezáa golaníatunukopa, hanuva netalímíni golanía aleake iteaká imóza, Kilistó eza agika agupéa gamena gamena ahuloletamó nelina, eza mikasímíni guhaiváa utó itotí emane heleloko ova ova oko komasí minamiline. ²⁶ Lá onoimó nenazo, Kilistó ezáa agika agupéa nene lelikumule loko ahulanogo gamena mukí itemimóma neve. Áisi nene Ómasímo mola gamena asú inogo noigo gamena hamokó ezáa agika agupéa nahuliko, lihimate asú itive loko utó imó nene asú o lamaná okave. ²⁷ Vegenalita gamena hamokó hilitune loko itó alikáa lihimatemú goní inogo uve. ²⁸ * Ámina oko Kilistó eza mukí vegenalitíni lihimaváini aí amupiló itekago, agohí geake Ómasí guguní gizo amike hilimó. Itó lihimate asú itive loko negopa, eza kogoliza viziki ageva iki miniaká nia vegená kugutó vizeaká hoza ale lutígítove loko alika goha utó inogo ive.

10

¹ Mosé lo hukoko li gakó nene makó gihiláa alika utó itítímíni avevezahaváa neve. Gihila lamaná nomive. Nenemú guguní giziaaká ve napa keza Mosé lo hukoko li gakotó kilisimasiló kilisimasiló guguní ámináminí ikigó giziaaká niamó nenémó Ómasímíni avogísaló viaká nia vegená nene monéna vo mílisegeko minoaká gapo velesá ale utó amimóma neve. ² Ómasí gupá zi amiaká nia vegená nene monéna kígika ale gízopa loketamó nelina, ligikagú lihimate nomimó nominune liake guguní gizoaká nene ahulaline. ³⁻⁴ Lá onoimóza, guguní gizoakakú memetini itó pulumakalitíni golani lekemó nenémó lihimaváini asú oakaláa ma nominazo, guguní gizoaká nene kilisimasiló kilisimasiló nigizago, lihimaváinimú goha giliaaká niave.

⁵ * Nenemú nene Kilistó mikasigú limitove loko noike ezáa agupe guguní gizatikumú nene amelahini lo amí gakó nene monó gotolaú láa líki gízínámóma neve: Guguní gizo gemeaká nene haitopaitolímínimú gumu helemive.

Lá okaninazo, nugupe ale vavá onetanímó neve.

⁶ Haitopaitó izatunú apílikí saga líki guguní giziaaká amó nene ánigo lamaná osá amane.

Lihimavate asú itive loko guguní gizoakakumú ma gelesá amane.

⁷ Lá okago, láa loko lumó: Gelenape. Ómasí geza litanitoka molatanitoka itove loko nouve.

Lo hukoko lí gakolímíni luhuvagú není gakó gizonoitó alitove loko nouve.

⁸ Iza guguní gizo gemeaká haitopaitolímínimú gelesá amane loko, itó haitopaitó izatunú apílikí gé liake lihimavate asú itive líki guguní giziaaká niamó nene ánigo lamaná osá amanímó neve loko limó nene, ámina guguní gizoaká hoza nene Mosé lo hukoko lí gakotokó giziaaká akumú limóza, ⁹ némika loake Izesú miní ameko láa loko limó: Ómasí geza litanitoka molatanitoka itove loko nouve loko limó nenazo, lihimate asú ití gapo litaha nene ale otopá zeake, gapo gosohalímíni nene ale utó imó. ¹⁰ Nenemú Ómasímíni gakotó Izesu Kilistoni agupe nenémó guguní gizokago, leza mukitoka ligika ale guluvitokago nounimó nene goha alemínogo ive. Mota alekago monéna asú onoive.

Kilistó ezáa golanitunú guguní hamó gizokago asú okave

¹¹ * Zuta vetini guguní giziaaká ve mukitoka keza gamena gamena hozanini aliki oti minake guguní gíziva gíziva iki miniaká niamóza, nenémó nene vegenalitíni lihimáini gilatoketosá amive. ¹² * Lá onoimóza, Kilistó nene lihimate asú itive loko ezáa golanitunú guguní gizokago, asú okamó nenazo, nenémíni amupiló goha lá aminogo ive. Itó lá oake, Ómasímíni agizani lamagaloka mító minamó. ¹³ Neneló Ómasímó gala veva agisa lapuvauka kelémo molatikumú ageva noive. ¹⁴ Ligika avasavagí lelémó etó oaká gapoló voaká nouhá vegená nene guguní hamó gizoake, lelémó vo mílisegeko minatuní gapoló molokago, lutegekamóma neve.

¹⁵ Itó Ómasímíni Sikalahulímó ezagí ámina gakó nene lamaná gihila neve loko lo utó oko lo lemekamóma neve. Aí gakola monó gotolaú lá oko neve:

¹⁶ * Aliká gamenaló lo múnahéaká gakó lá oko ale utó moloketatove loko Guivahanímó láa loko nolive: Neza nene lo hukoko lu gakó nene kígikagú molokimíkigo, lemekago, kagatagú luhuva gizokago minatímó neve.

¹⁷ * Loko loake, áminaló miní ameko láa loko live:

Golesa netáinimú itó lihimáinimú goha gelemínogo uve.

¹⁸ Nenemú lihimate mota ahulonoitó nene netá golesamú guguní gizoaká nene áminagó oko asú o lamaná okave.

Ómasímíni avogísaló anitinake monó ale gikitoko ale minatune

* 9:28: Isa 53:12 * 10:5: Age 40:6-8 * 10:11: Gá 29:38 * 10:12: Age 110:1 * 10:16: Zel 31:33 * 10:17: Zel 31:34

¹⁹ Nenemú nigivénegita, Izesuni golani nenémo gahe segelimikago, leza Ómasímo apazá minoaká noitoka ititunikumú ligika nene vávani oaká noive. ²⁰ Monó zavusavegú ímeha gó nene aí agupémíni avevezaha minamó nenazo, nenémo zeko hóu lo losi noigo Ómasímíni amatoka voakalímíni gapo gosohalímíni itó alévolé oko minoakalímíni ezáa ale koló oletamó nenazo, ²¹ itó eza iteko voake, guguni gizoaká vele napa loló oake, Ómasímíni vejenala zuha lelí gototeló gizapa ve noinazo, ²² * nenemú eza gele alévolé unitímó ligika vávani onoiko, soza ligikagi minaminake, itó lihimategi nominuko gena livisi netá nene aí golanitunú holomikago, ligika vávani ominíko, itó lugupe nene nagamí agómula ominatitunú nagamí zelimikiko noinake Ómasímíni avogisaló anititune. ²³ Lá noinake, leza gakó lo molató amegesaló moloaká ve noinazo, ageva nouni netá nene lagata losi pasi amoko ale gikitoko gizapa oko minatunize. ²⁴ Itó ligikatunú nasahilí oko ligika eza amiko eza amiko inake, netá gihila loló oakakumú eza alémo vatí iko eza alémo vatí iko oko minatune loko ligika ale vávani oaká gapomú vítágá oko minatune. ²⁵ Lá inake, monokumú alegesá oakakú vejená lugáate isá amake amanapa iki miniaká niamó nenémíni aminake, eza ale kii lotiko eza ale kii lotiko itunize. Guivahani ati gamena mota alitokanazo loko gele mininake amuza moloko nenémíni itunize.

²⁶ Nenémíni amitunikumú láa liki gililo: Leza Ómasímíni gakó gihiláa nenémo ligika hize hanatokiko, golesa netá nene goha lagata geleko alémo etó oko ale minukoma, lihimate asú itive loko guguni gizoakaláa makó ma nomive. ²⁷ * Nenegopa nenémíni lihimaváa golivagi napa ló agénahunámíni lehelele viziko ageva minanogo une. Ló guluma nenémo Ómasi lova ali amiaká nia vejená nene akohú kipilinogo ive. ²⁸ * Ve makolímó Mosé lo hukoko li gakó avutá okago, ve losive makolehe itó lositakó ahe aí gakola likago, aí mogona golesa utó okago, miluma gilitamake litá iki apili hiliaká niave. ²⁹ * Nenémo genavagi otígí oko nemóza, ve makolímóhe makolímóhe Ómasímíni gipala ale mumusopa zitímó, itó apizeko múnaheakalímíni gakó gosohá ale alévolé oaká golani lepímó nenémo agika ale mokoná lamó nenemú ángo ha gele gele itímó, itó nasahilí olimiaká Sikalahuni nene aleko letatímó nene, Ómasímo nana otatímó neve. Eza goní napa genavagi inogo ive. ³⁰ * Gilinahe. Lihima kemeaká nene není hozámíni ago helegáa neve, itó apasoaká nene nezáne inogo uve loko li vemú gelenoune. Itó Guivahani eza vejenala zuha keitoka gakó hoza aleko gona moloketanogo ive loko li véminí mogona geleaká nouhá nenazo, litaha gapoló atiginá oko vitunikumú goní aminogo une loko litupe. Íi. ³¹ Gamena napaló alévolé oko minoaká Ómasímíni agizakú holoaká nene genavagi netá nekumule loko noluve.

³² Lekeza gozapá Kilistoni gakó ganá gelekumú goha gililo. Gamena nene zupa likigikagú nene Ómasímíni liví nenémo hize hanatolikimikago, miluma malumámíni agikagú minake Izesukumú génope hoza aliki alévolé iki minamó. ³³ Itó lekeza miluma netalímó lukumupiló itekago, gopoguni mililikitake lokovoza hiliti netá lilí ilikitinamó. Itó gamena makó lekeza nene likígíve lakagave netá nenémíniáa lilí nikitago lekezagi miní amiki miluma gilikitamó. ³⁴ Likígíve lakagave nene monokumule liki nagá numukú ahulikimikago, keikumule liki mulutini gitihiná ímóma neve. Itó monóini nomi vejenalite henokanotini ipá i alikago nene, likigikámíni henoni lamanaláa alévolé oko mino-loko voakalímíni okulumakuka molonoune liki giliake, kokogoliza viziaká amóma neve. ³⁵ Lá iki minamó nenazo, itína nene Ómasimú gele zageakatini ahulamilo. Nenémo minoko alika meinava napa ale utó oleketanogo ive. ³⁶ Ómasímo lititoka molatitoka oko moloko inake netá ale vavá oleketamó nenémíni gihiláa alika alitune liki lekeza genavagi netalímíni agikagú hulu iki minalo. ³⁷ * Izesú lelí hozámíni meinaváa liminogo goha atikumú monó gotoláa luhuva makó láa liki gizinave:

Gamena alínipa makó neve. Nene asú noigo anogo ize.

Ative liki lina ve nene mino otoa amoko litá oko anitinoivo.

³⁸ Lihímáini nomí vejenáne nenete gili alévolé atímó alévolé iki miníki aliki inígave. Itó makó keza ahuliiki atiginá iki vítámó nene keikumú gelekugo laga niviseminogo ive loko Guivahanímo limó neve. ³⁹ Itó leza keé lamunike goselekaselé oko monó ahulunike lapuluva oaká gapómíni mututoni noamune. Lélisi nene Izesunimú gele alévolé okunike lemeni lugutó vízeakalímíni mututonáa noune.

11

Ómasimú gele alévolé oakalímíni mognáa

* 10:22: Lív 8:30; Izi 36:25 * 10:27: Isa 26:11 * 10:28: Gapo 17:6, 19:15 * 10:29: Gá 24:8 * 10:30: Gapo 32:35-36 * 10:37: Hip 2:3-4

¹ Ómasimú gele alévolé oakalímíni mogonáa lá oko neve: Netá matakumú lagata losi gelemoko ageva oaká nounimó nene alitune loko gele seketigi o minatune, itó ángamuni netakumú ageva oaká nounimó nene ale ligizakú itune loko gele hamokó itune. ² Avotege lugáa gozapá miniki aliki amó nenete Ómasimú gili alévolé iki miniaká amó nene Ómasimó ángokago lamaná oaká imó. ³ * Gozapá nene Ómasimíni gakotó mikasiuka netaki okulumakú netaki ángoaká nouni netá nene ángamosalagutí utó imó neve loko gele alévolé unikeve loko gele hee loko gelenoune.

⁴ * Ataní gipala Epoló gele alévolé oakala minakeve loko Ómasi guguni gizo amimó nene Ómasimó ángokago, lamaná okago, uvolaho Kaini nene ángo goselé imó. Epoló gele alévolé oakala nene Ómasimó ángokago lihimala minami ve minake, guguni gizo amekago alimómámíni mogona neneló ale molamó. Itó Epoló helekamóza, gopa gele alévolé oko mina gakó imane lo lemeaká noimó gelekave. ⁵ * Enokú eza gele alévolé oaká ve minamole loko Ómasi eza ángo lamaná oake heleaká nene aitoka utó amitive loko gosohá agómulagi okulumakú alémoko itimó. Lá omikago veenalite aikumú vitagá amó. Itó velesá itenamigo aí mogonamú nene Ómasimó Enokuni ángo laga imó neve loko utó onoimóma neve. ⁶ Nenemú láa loko gilitunize: Ómasi eza noive loko itó aí mogonamú amuza moloko vitagá ituni vejená nene meinava limitive loko ligikatumú gele seketigi okogó aí amatoka voakaláa nenazo, gele alévolé oakate minamitimó minokukoma, Ómasimó ángatimó ma ángo lamaná amitimó neve.

⁷ * Noá eza gele alévolé oaká ve minamómave loko Ómasimó alika ale utó iti netá velesá ángamigo, goí oko gakó agata aleko lo amekago, Noá nene Ómasimú goliva gilike vejenala zuhagi gosohá minatave loko nene loake, nagamikú lape sipisi loló imó. Lá noiike, mikasiuka vejenalitiní lihímáinimú goní ita mogonamú lo utó oake, lihima asú omikago minoakalímíni gihiláa Ómasimú gele alévolé unikeve loko aleaká unitímíni gihiláa nene ale utó imó.

⁸ * Ómasimó mikasi makó geí helisa henoni minative loko lehizegetatoze, geza mikasiga ahulokoko makotoka voko minatane loko Avalahani lo amekago, Ómasimú gele alévolé oakeve loko gele aleake mikasi nenemupe nenemupe limó nene gelemike, gele gopa oake gopa vimó. ⁹ * Gele alévolé oaká ve minoakeve loko mikasi ángo molotamó neneló vike aniteake, gutá minake, seli numuni moloake minake, ánuvanegú ako minamó. Gipala Isaká itó aí gipala Zakopó keza ámina lo moloketa netá ali lá itái ve minasike ámináminiki seli numukú miniaká asimó. ¹⁰ Avalahá eza alévolé lukesavagi apá makó utó itive loko Ómasimó vogunahana moloake ale utó mola apakumú ageva oko minamó. ¹¹ * Venala Salá eza gohuna vená noiike, Ómasimú gele alévolé oakalímíni minoakeve loko gelehosi moloake izegipala getati gamena asú okago, zámua amekago, izegipa agatupagi minamó. Ómasimó nene agómulaló lo molomikago gihila zeaká noi vemámo lo utó molokave loko gele seketigi oake nenémíni imó. ¹² * Itó nenemú nene hele vejenakitana mina ve hamokutí hize hutilí oakalímíni zámuzáa asú oakakú agapilamó zuha hizi hutilí amó keza okulumatoka sonohí minoloko voko oko noimó nenémíni avevezahaló, itó age nagamí agataló emane getani nemó nenémínoko vejenalita gatoko gato asú amoakalímíni avevezahaló utó iliki vamó.

¹³ * Ámina vejená mukitoka Ómasimú gili alévolé iki minake miniki hili vamó keza ale vavá oketa netalímíni gihila nene velesá alemake, hanuva hotó nego ángiake, kogoliza viziki ali kamatoka milamó. Lá iki minake, leza mikasiuka hanuva veno ve gutá nouné liki gelemó. ¹⁴ Gakó némika liki liaká nia vejenalite gotó apáini gihila makó ali utó milanigi kígikagú giliki minamómámíni mogona mota utó okave. ¹⁵ Lá iake, keza minamó apáini itó mikasiníni ahulakumú miluma makó giliki lá amamó. Ámina apakumú kivisekago nelina, atiginá iki anigi hanuva aline. ¹⁶ Lá onoimóza, keza nene numuni apáini lamanaláa makó alinigi nenemukó gelemó nene okulamá apakumú gelemó neve. Ómasimú nene Ómasile liki likago, gelekago agoliza napa vizekave. Nene ezáa numuni apá makó okulumakú ale utó moloketakumú geleneike agoliza vizekave loko gelenoune.

¹⁷ * Itó Avalahá eza Ómasimó amekú mola gamena nene gele alévolé oaká ve minoakeve loko gipala Isakani apeleko gizatove loko gele vávani imó. Ezáa agapilamó zuha hizi hutilí itave loko Ómasimó lo molota gakó nene ale ali ve minamóza, gipala hamó nene

* 11:3: Apí 1:1; Age 33:6; Zon 1:3 * 11:4: Apí 4:3-10 * 11:5: Apí 5:21-24 * 11:7: Apí 6:13-22 * 11:8: Apí 12:1-5 * 11:9: Apí 35:27 * 11:11: Apí 18:11-14, 21:2 * 11:12: Apí 15:5, 22:17, 32:12 * 11:13: Apí 23:4; 1 Iki 29:15; Age 39:12 * 11:17: Apí 22:1-14

apeleko gizatove loko gele hamó imó. ^{18*} Isakatokatí hizi hutilí itamoláamú gagapilamola gihila minanigave loko lota gipala minamóza, ámina gipa nene apeleko Ómasi guguni gizo amitove loko gilimó. ¹⁹ Avalahá eza Isakakumú láa loko gilimó netive: Ómasimo eza Isakani heleneikutí alémo otitove loko nenémini zámúza aleneive. Lá onoinazo, heleneikutí alémo atiginá imó gelekave loko anoza letoko limóma neve. ^{20*} Itó Isaká eza gele alévolé oakeve loko alika utó iti netalímini gako nene Zakoponi itó Esauni lo kimike nónohá zeketamó. ^{21*} Zakopó nene Ómasimú gele alévolé oaká ve minoakeve loko hilinogo noike Zoseheni gipala lositá nónohá nozeketake, hánusatunú hize gikitoake ote minake Ómasi gupá ze ameko agepoka limole. ^{22*} Zosehé eza gele alévolé ve minoakeve loko hiliti gamena alitokago, Isilae vegená miniki Izipi mikasi ahuliiki vitakumú geleake ezáa helisamú goí oko lo hukoko nene vinigi niiki není helisagi aliki vilo loko lo kimimó neve.

^{23*} Itó Mosé utó okago, izolahiko amelahiko nene Ómasimú gili alévolé iaká aleve minikasikeve liki izegipáinimú izegipate lamaná netá neve liki ánihi kumu hilikasigo, agulizaki ve Palaoni gakokumú kelegesá legemigo ikani losive makole novigo alími halá gesimó. ^{24*} Itó Mosé napa oake Ómasimú gele alévolé o minake, Palaoni moholámini gipalave liki litanigi ago óe loko gele ahulamó. ²⁵ Eza golesa netalímini lagaváa mino hána oko minamoakalímini nenemú giligo lemekago, Ómasimini vegenala zuha kezagi miluma netalímini ágikagú niago, kezagi miní ameko gilitove loko mino etó imó. ²⁶ Lá oake, eza minoko Palaoni helisa henoni ale lá ooko Izipi mikasigutí moni henokanoni itó netá matá minumuni mukí alitikumú giligo, ha netá loló okago, Ómasimo gologi oletative loko lo mololeta vemule loko miluma gilimoláa minatove loko nenemú giligo gihiláa loló imó. Eza minomo noitike okulumakú nenémini meinaváa alitove loko lá imó neve. ^{27*} Itó Mosé eza gele alévolé oakeve loko Izipi mikasi ahulamó nene agulizaki ve Palaoni izapaló molakumú nene ahelele vizimó negopa, Ómasi ánihamoakalímini aí agómulatunú ánihamó gelekago, alévolé oko minake lá imó. ^{28*} Mosé eza gele alévolé imómave loko lokago, sipsip iza apliví givi iake, vauna aleaká ageló nenémo Isilae vegenalitíni ganá gipáini nene asenini zeketative loko golaníatunú numuni gateni zaló hilitamó.

^{29*} Itó Isilae vegená keza Ómasimú gili alévolé iakeve liki age nagamí agulizá golohá nagamikú likiki vamó nene nagamí nene mino ezega emega okago gunahá mikasiló vamó, Itó Izipi ami ve keza nene ámina oko vitune liki nivago, age nagamíhamo kelémo sumizá namó. ^{30*} Itó Isilae vegená keza gili alévolé a vegená minikakeve liki Zeliko numutó nene gamena 7 oko novigo vegegisa nene ali vigikago vegegisa nenémo lemeko akamó. ^{31*} Itó gapoló mokoló vená Lahapá eza Ómasimú gele alévolé itímo ve lositosa Zosúá kimiselekago vegená kemeni ánihanigi guhu gapo vasimó nene numunagú kelémo molokago, Ómasimini gako pelesa ziaká a vegená nene Ómasimo kepeleake Lahapani nene aseva zetamó.

^{32*} Lá ikamóza, gako lugáa nanave loko lo asú itove. Giteoná itó Palaká itó Samisoní Zepitá Tevití Samuelé itó Ómasimini agepagutí gako liaká ve keí gako lo asú oko linogo nelina, loloko novugo hána iline. ^{33*} Keza Ómasimú gili alévolé a vegená mukí minikakeve liki lugáate vegená mukí nene lova ali kemeke kivilegemó, itó Isilae vegenatokagi hetoka vegenatokagi gizapa ikitiki kagata aleaká hoza aliki kilími hehe lamó, itó Ómasimo netá lehizeketatove loko lo moloketa netalímini gihiláa alemó. Itó lugáate laezoni akohú galatini kegepaló alego, ^{34*} lugáate ló gulumámini agénahuna ali geha zevo, lugáate lova amupiló nitekegi lá amóza, gosohá minamó. Keé amatite goha nene amuza milamó. Itó lugáate lovagú amuza milake mikasi lugalokatí gala venini kipiliví gizivi amó. ^{35*} Vená lugáate Ómasimú gili alévolé amómave loko Ómasimo izegipáini hilinakutí kelémo oteake goha izóikitoka kelémo gímizimó. Itó helegaloka Ómasimú gili alévolé ina vegená lugáa nogosani kepeleke gopoguni milikitamó nene monó ahulikiko aselini zeleketatupe liki li kimikago alikaloka lamaná oakakú goha otinogo une liki giliake, gili ha iake helemó. ^{36*} Ómasimú gili alévolé a vegená lugáa giza nikitake gopoguka likitake segi nogosanitunú kepelemó. Itó lugáa keza kigisa kigizató seni nagá aliake nagá numukú ahulikitamó. ^{37*} Vegená

* 11:18: Apí 21:12 * 11:20: Apí 27:27-29,39-40 * 11:21: Apí 47:31-48:20 * 11:22: Apí 50:24-25; Gá 13:19
 * 11:23: Gá 1:22, 2:2 * 11:24: Gá 2:10-12 * 11:27: Gá 2:15 * 11:28: Gá 12:21-30 * 11:29: Gá 14:21-31
 * 11:30: Zos 6:12-21 * 11:31: Zos 6:22,25, 2:1-21 * 11:32: Gon 6:11-8:32, 4:6-5:31, 13:2-16:31, 11:1-12:7; 1 Sam 16:1; 1 Kug 2:11; 1 Sam 1:1-25:1 * 11:33: Tan 6:1-27 * 11:34: Tan 3:1-30 * 11:35: 1 Kug 17:17-24; 2 Kug 4:25-37 * 11:36: 1 Kug 22:26-27; 2 Iki 18:25-26; Zel 20:2, 37:15, 38:6 * 11:37: 2 Iki 24:21

lugáa gehanitunú kipili helemó, itó lugáa nene kugupenini ziki gitegemó. Itó lugáa nene sopolotunú kipili helemó. Lugáa keza Ómasimú gili alévolé amómave liki kimisili ahulikago, keza mikasi gomopalaló itó agokauú gutá iki minake, mei tutuhunauka itó geha mulikú akiki mihina iki minamó. Lá iki minake gineganéini nomigo sipsip iza meme izatini galupaváa ali luhiake, gaúnámini amupiló minake, megusa izegipa lilí iki milumámini amupiló minamó. ³⁸ Nenéminate gevená lugáa keza nanáinilotí mikasiuka apiziki minikago hehe laline.

³⁹ Nenémináa keza mukitoka gili alévolé akumú Ómasímo áinigago lamaná imó. Lá okago, gopa nene netá lehizeketatove loko lo moloketa netalímini gihila nene kogómulagi mína gamenaló ma ali utó milamamó. ⁴⁰ Nenémini mogona lá oko neve: Ómasi eza lelitoka netá ite minamoláa mololetanogo gelekago minamó nenemú keza goí iki ámina netá alemamó. Alika nene lezagi vo milisegeko minatuni netá nene ali utó itave loko Ómasímo moloketonoiómoma neve.

12

Guivahanímo lagavutó zeaká noive

¹ Ómasimú gele alévolé oakalímini mogona li utó a vejená mukilite zohitó mulusi napa nenéminiki miniake lilími vigikamó nenazo, nenemú lesis-iaká nia vejenalite ololu iaká nia mogonamú gele mininake gena lepeleaká netá nene gololohá oko ale ahulatunize. Itó lihima netalímini nagá likimó nenegi guluhoko ale ahulatunize. Lá okinake gapo lelepizimó nenelokó goselé aminake ololu lokogó vitunize. ² Láa noinake gele alévolé oakatemú ale goí moloaká itó nenémini gihiláa ale utó moloaká ve Izesú nene makimáminoko logómulaloka noiko aitoka ánigo zage loko ololu litune. Eza agoliza nene utó o amitive loko lonoitó zohota zaló heleakalímini avoza napámini amupiló itikumú giligo ha netá loló okago, miluma gihike hilimó. Lá oake, Ómasímini gonanalivagi siató agizani lamagaloka iteake mitó noive.

³ Golesa netá itó hokolizá nene Izesuni lilí itamó nene gele ahuloake, legesó oko minamó. Lekeza aikumú nigilíki goselé amilo. Likigikatini golosasa gekatize. ⁴ Lekeza golesa netakumú gimilikú moloaká netalímo lekelémo akanogo noigo amuza miliki lova ali namego lukugupelini apilikago golani velesá amive. ⁵ * Itó Ómasímo lekelikumú izegipáneve lolikimiake luhusatini ale liki loleketake, gakó makó lo likimimó nene lakagatí moloakahe, olo. Gakó láa loko limó neve:

⁶ Guivahanímo agika kemeaká noi vejená mukitoka kagavutó zeko kelémo hehe loaká noive.

Itó aí izegipala lamaná kelémo molamó mukitoka nogosani kemeko kelémo hehe loaká noinazo,

nenemú gipáne geza Ómasímo gelémo hehe lanago gagavutó nozikoma, nenemú gelekako lememinó.

Itó golesa netakamú nogosani gemekikoma, gigika golosasa gemino.

⁷ Guivahanímo lakagavutó zekikoma, goselé amiki alévolé iki minalo. Ve makolímóhe makolímóhe gipala apeleko alémo hee lamitihe. Lá oko nomive. Kelémo hee loaká nene vejená mukilite lá iaká nianazo, Ómasímo áinigokago aí mohola gipala lilí ikago, lekelémo hehe linogo nenémini olikimiaká noive. ⁸ Itó Ómasímo izegipala mukitó kelémo hee loaká noinazo, lekeza nene lá oleketamiko minatamó nene, mohola gipala gihila lilí iki minaminigave. Nene gapoló izegipave loko loleketanogo ive. ⁹ Itó makó litoze. Mikasiuka ametege keza nene lagavutó zikago, leza géneka lamoko kelémo napa uháma nenazo, ligikámini ametehini agahaisiuka lemeko minokuko etanogo ive. Lá okinake mino lamanatoka moloko minanogo une. ¹⁰ Ametege kezáini kagata geletó nene melekeni gamena lughá oko novígo lagavutó ziki lilími hehe liki miniaká amóza, Ómasi áisi nene netá gihiláa utó o limitive loko itó ezáa apazá keké vízeko nomina mogona izá miliki alitave loko lá olimiaká noive. ¹¹ Lagavutó zeko lelémo hehe loaká netá utó okagoma, ganatilisi gelekuko laga netá negopa, milumavagi loló oaká noive. Itó alikaloka nene hehe loakakú minoaká nounimó nenémini gihiláa nene huhu lelitoka utó inogo ive.

Ómasímini nasahilí ániagi ahulikatave loko kagata alimó

¹² * Nenemú lekelisi likigika gopa o vimó likigisa likigizani akatamó lilí niikima migelelé amiki alévolé ilo. ¹³ * Monolímini gapogú vinigi niiki kigisa gepili mína vejená makó

* 12:5: Hio 5:17; Ano 3:11-12 * 12:12: Isa 35:3 * 12:13: Ano 4:26

monéna golesa i asú ikataze. Goha monokú migelelé amitave liki lekeza Ómasímíni gapoló nene ali hehe liki mihina ilo.

¹⁴ Lekeza mukí vejenaki hulu oko minatune liki amuza milalo. Kigika golotuva lovimó nenete miníki Guivahani ángamitamó nenazo, likigikagú gizopa lo miníki minatakumú amuza milalo. ¹⁵ Lekelitokatí ve makó Ómasímíni nasahilikutí vелеhé limikataze, gizapa iki minalo. Lá niiki holutikú gohege golesa makolímó sisiva isekoko loko loaká noimó nenéminoko likigikámíni ekesalámo napa okiko, vejená mukilitíni kigika gopa okatinaze, gizapa ikitiki minalo. ^{16*} Lá niiki lekelitokatí makolímóhe makolímóhe mokoló ve keza mini etó iki minamake miniaká amó nenéminoko Esauni gapoló vokatize. Esaú eza nene hamokó nosánetakumule loko ká emane alikaloka utó otati helisa netá nene ahulamóma neve. ^{17*} Lekeza aí mogona mota gilinave. Eza alika amelahitokatí lusa alitove lokago amelaho óe lokago, netá matá imó nene nana oko haha itive loko geleake, ive nama oloko viha viha voko avisa lamóma neve.

^{18*} Lekeza Isilae vejená alemó nenéminíki Sinai agoka ali giliaká avotigilaló amave. Ló gulumagú ma vi hilamamóma neve. Itó límusi sipisi hitakú itó límugusi ze minakú itó ohuhú nalikú nenéminí agikagú ma vi hilamamóma neve. ¹⁹ Lekeza Sinai agokaloka pikuli napa zimó itó Ómasímíni anó lupa napa ma gelemamóma neve. Gelemoláate nene gakó makoki gelemítune liake negénégé iki minamóma neve. ^{20*} Gakó láa loko lo molamóma nene gilikago kehelele vizimó: Vegená makó keza agokaló lisi gilíkiroma, lekeza gehanítunú kipili hilitaze. Itó izamuki ámináminíki itataze. ^{21*} Ámina golivagi netá utó okago, Mosé nene ángoake, neza nenemú nelegesá legekago luvoluvo zekuve loko limó. ²² Lekeza agoka nenémináaló negopa, lekeza Zaión agokaú alévolé oko minoaká Ómasímíni numuni apá Zelusale apakitana oko mina apá okulumakú netoka anitikave. Lá niake, ageló gatoko gato asú amoakalímíni niató, ²³ itó aí izegipala zuha gihila kugulizáini okulumakú gizo molamó keza kogoliza viziki ali nupa iki minató vi anitikave. Lá niake, vejenala mukitoka lihimatemú gona mololetati ve Ómasi noitó imi anitikave. Itó hehe liki minake hele vejená kigikagú lo vihelé minoakatoka kelémo mola vejenalítini kemetameni niatoka miní amikamóma neve. ^{24*} Itó lo múnaheaká gakó gosohá ale utó mololeta ve Izesutoka vi anitikave. Itó Epoloni golanímó nene uvolaho apele hili lihíamú apasative loko mikasiukatí limó nenelokopa, Izesú ezáa golani hepa hepa imó nenémo aleko iteko netá gihílamú sele loaká noimó neneló vi anitikave.

²⁵ Lekeza gakó lo lekemeaká noi ve Ómasímíni gakola gili ahulikatanaze, gizapa iki minalo. Gozapá Mosé nene mikasiuka minake gakó makó kagata aseva aleko lo kemekago, gakó hutuváave liki ahula vejenatoka netá golivagi utó o kimímóma neve. Lá okanazo, ítina nene okulumakú minake ehe loko lo nolimi ve nene lemegeasa amitunimó nene áminaló nogosani lemémiko ha minatupe. ²⁶ Gozapá Sinai agokaló gakó noligo mikasi mómoká imó. Lá imóza, gakoláa makó ítina logómulaló lá oko lo mololimikave: Neza minoko mikasi nene goha alémo mómoká itómóza, lá noinake okulumakí nene alémo mómoká inogo uve loko limó. ²⁷ Goha nene alémo mómoká inogo uve loko limó nenemú netá matá mukí ale utó molamó nene ale mómoká okoko ale tolova itove loko geleake limóma neve. Lá itimó nene alévolé oko minoaká netá mómoká amítí netá nene utó okoko minoloko voko minative loko lá inogo ive. ²⁸ Nenemú leza alévolé netá makó mómoká amítimó minoloko voko minoaká netá nene ale lá itunikumú Ómasi agepoka linake lehelele viziko gupá ze ameko eza gele lamaná iti netá aleko monola loko minatune. ^{29*} Nene nanamú negopa. Ómasile eza lotunú gizo lúnoaká ve noinazo.

13

Oko moloko nouko Ómasímó ángo lamaná iti gakó

¹ Monokú agunala uvolaho likigika eza amigo eza amigo iaká niamó nene lekelitoka lemémíno. ^{2*} Lugaáte keza veno vejená kilími milánigi vejená kelémo nomulupe liki ageló nene kilími milínamóma nenazo, veno vejená numuteuka kelémo molatune líkima goselekaselé amilo. ³ Likigive lakagave monokumule liki nagá numukú kilími milamolamú giliko lekezagi kilími milínamó giliko kilími vatí ilo. Lá niiki lezagi hamó lugupegi noune liki gilíki kilími golesa palasa íkitago nia vejenalite miluma giliaká nia netá nene lukumupiló itino. ⁴ Mokoló itó ve vená huki ezega emega iaká nia vejená keza Ómasímó lihima kímínogo inazo, vego venako minoaká sunimú gilíkiroma netá gihila loló ino, itó

* **12:16:** Apí 25:29-34 * **12:17:** Apí 27:30-40 * **12:18:** Gá 19:16-22, 20:18-21; Gapo 4:11-12, 5:22-27 * **12:20:** Gá 19:12-13 * **12:21:** Gapo 9:19 * **12:24:** Apí 4:10 * **12:29:** Gapo 4:24 * **13:2:** Apí 18:1-8, 19:1-3

ve aleve suni ali gopa amilo. ⁵ * Likigikatini nene moni henokanoniló vaminó. Nénisi nene ahulogetaminogo uve, itó viselegetaminogo uve loko Guivahanimo lonoimó nenazo, netatini ali minakumú mukahá makahá amiki vitagá nouni netá ale utó oletanogo ive liki hulu ikigó minalo. ⁶ * Nenemú leza amuza alekinake monó gotolaú ve makolímó gizonoi gako makó láa loko litunize:

Guivahani eza nelémo vatí oaká ve noinazo,

neza netá nemú manamú nelegesá legeminogo ive.

Vegenalite nana netá golesa alinitatakumú nehelele vizitive.

⁷ Monó gizapa velini Ómasímini gako li likimiaká a vemú giliki minalo. Lá niiki monolímíni gapovaló nivake helemoláatini kigizaka ángi zagi miniki keitoka kémegetiki niviki gili alévolé iakatinigi ali minalo. ⁸ Izesu Kilistó eza goi oko minamó itó itinagi noimó áminámini okogó mino lúaló moloko minanogo ive. ⁹ Lá onoinazo, haitopaitó gosohá monó li nilikimikoma gelemilo. Ómasímini nasahilí nenémo likigikatini ale alévolé olikimikiko nene lamaná inogo ive. Netá noakalímíni itó namoakalímínimú li hukina gako nenémo ma lelémo vatí aminogo ive. Nene gako ámegetiki vamó nenete gihila ma ali utó milinamamóma neve.

¹⁰ Izesú nohiligo ezáa agupe nene lelí guguni gizoaká netá loló okamó nenazo, Zuta vetini apazá seli numukú Ómasí gelekélé imiaká nia vegenalite ligikámini nosánétá gihila natave loko gele kemenamive. ¹¹ * Lekeza mota gilinaive. Guguni giziaaká vetini ve napa nenémo pulumaká izaha meme izaha apeleko gé loake, golani nene vegenalitiní lihímáikumú guguni gizatove loko Ómasímini apazá zavusavegú aleko itekago gahaváa nene númaseloka aliki limiki ló gizi ahuliaká niave. ¹² Itó Izesú eza ámina oko ezáa golanitunú vegená ligika ale guluvitoletatove loko Zelusale numuni númaseloka apilikago hilimó. ¹³ Nenemú leza ámina oko avotegini gako gele alekuko Ómasímo lugutó vizitihe liki liaaká nia vegená ahulokimikinake aitoka lemeko aí amupiló avoza hili netá ámina oko lumupiló itekiko gihitunize. ¹⁴ Lá noinake alévolé apá makó Zelusaletigítana imaneloka lelitoka minamize, hanuva minoko utó itimoláa nenemú nene ligikámo ageva oaká noive loko nogilinake lá itunize. ¹⁵ Nenemú legepatunú lituní netalímó Izesuní agulizá ale oteko noiko Ómasí miní ameko agepoka loko minatunimó nenémo lelí guguni gizo ameaká netate loló okiko Izesuní amekuko, Ómasí alapizitive. ¹⁶ Ómasí eza nasahilikí netá itó netá lamaná izá moloko vegená kimituní netakumú gelekago guguní gizo ameaká netá gihiláa loló oaká noinazo, ámina netá alitune liki lakagata gili minalo.

¹⁷ Monokú kugulizakí velini nene lekemetameniló gizapa ilikitiki ali hehe liki miniaká nianazo, keé gako gili aliiki keé kamatoka limiki minalo. Keza nene hozanímímini mogonamú alika gamenaló nene li utó milanigave. Lekeza hokolizá atímó miluma nigilikí ámina hoza alitamó nene lekelémo vatí ití netá lekelitoka utó amitimó nenazo, nenemú hozaváini kigika lamanatotí alitave liki gelekélé ikitiki némíni manámini ikitalo.

¹⁸ Neza etó okogó oko moloko itove loko amuza molooká noumó nenazo, nigikagú lihima netikumú vitagá oaká nouve. Lá noumómave loko nenikumú Ómasiloka liki minalo. ¹⁹ Guivahanimo není gapo hize lí noi netá ahulooko nelémo atiginá okiko lekelitoka litá oko vitove loko numuna loakatunú nilími vatí ilo loko gala vízeko lo nolukumuve.

Ómasí agepoka limó

²⁰ Hulu amelaho Ómasí eza Guivahanite Izesú ezáa golanitunú alévolé oko minoakalímíni lo múnahéaká gako ale alévolé imómave loko sipsip izaló gizapa ve napa loló i ve hilikutí alémo atiginá o lemeka ve ²¹ Ómasí áisi netá lamaná haitopaitolímíni lehizeleketoko lekelémo vávani okiko eza lititoka molatitoka gili alitave loko noluve. Lá niiko, ezáa gelekiko lamaná ití netá nene Izesu Kilistóni zámuzatunú likigikagú ale utó ino. Aí luhuva gegemá okiko agepoka loloko iteva iteva oko alévolé oko minino. Lamaná.

Vegená gekéini loketamá

²² Nigive nagavese, neza gako hána gizo lekemenamumó nenazo, lakagata aleko luhusatiní ale alévolé ití gako imane lo lukumumó nene lakagata gili hee liki gili minalo. ²³ Itó lo likimitoze, gililo. Ligiveteho Timotini mota kalapusigutí guluhimikanazo, eza litá oko okikoma, alémoko vinake ángoleketatíve liki gililo. ²⁴ Monó gizapa velini itó Ómasímini vegená lugáa mukí nene gekéini noloketuze, li kimilo. Italia mikasiukatí likigivetike imaneló niamolate gekelini nililikitagó lo nolukumuve. ²⁵ Ómasímini nasahilí nenémo lekelitoka minoloko voko minino. Lamaná.

* 13:5: Gapo 31:6,8; Zos 1:5

* 13:6: Age 118:6

* 13:11: Liv 16:27

Zemusini Luhuva

Zemusí geké loketake luhuva gizamó

1 * Neza Zemusina Ómasimini gelekélé ve itó Guivahani Izesu Kílistoni gelekélé vémina nezáne luhuva imane nogizuve. Lekeza Isilae vegená mulusi 12-a hutilí i va vegenakutí Izesuni vegenala zuha lilí amoláa geké nololeketuve.

Gele alévolé oakakumú itó lugupe ale oteakakumú

2-3 Nigive nagavese, gopoguni nimililitikoma nene, gimilikú milikiko lekeza Ómasimú alévolé iki gilinamómámíni mogona lá oko utó itive liki giliiki gili golesa amiki lokogoliza viziki minalo. Lekeza monokú alévolé itave liki gopoguni mililitikata netá nenémo lekelémo vatí inogo ive. 4 Gopoguni nimililitikoma nene, zou liki lipiziki minatamó nene, likigika lamanaki vihelé lo miniko minanigave.

5 Ómasimo nene vegená hize lé oketoko gínikaha amoko kemeaká noinazo, lekelikutí ve makolímó gele vevesoakala vitagá okokoma Ómasiloka lokiko aminogo ive. 6 Kagata losi gilita vegená nene hepé alike age nagamí valahuká zeaká noimó nenéminiki miniaká nianazo, Ómasiloka voká loko ámina netá alitohe alemitohe loko agata losi gelemoko gele hamó oko Ómasiloka litimó nene ámina netá alinogo ive. 7-8 Kagata losipasi giliaká nia vegenalite zová ziki mihina iaká nianazo, Guivahanilokatí netá ma aleminigave.

9 Gohogó vegená lekeza Ómasimo lekelémo vatí oaká noikumú nene lokogoliza viziki minalo. 10 * Itó henotiki vegená lekeza za guvava nenéminiki lutihimí zitamó nenazo, Ómasimo lekelí henonimú giligo lemeaká noikumú lokogoliza viziki minalo. 11 Ho noiteko lokiko netá guvava mikinogo ive. Lá ooko guvava legemó zekiko avogisa gopa inogo ive. Ámina iki henóiki vegenalita hozagazagú niviki tolova inigave.

Gopogunigi itó gimileguki moloakakumú

12 Gimikú mlata netá asú okiko alévolé iki minata vegenalite nene, Ómasimo kigika aitoka miliki minata vegená kimitove loko lo moloketonoitó nene gosohá kemetameni nene golivagi akilikitana alitamó nenazo, gopoguni nimililitikoma alévolé itamoláa nene kogoliza viziki minanigave. 13 Ve makolímóhe netá makolímóhe netá golesamú Ómasi gimivagú molaminogo ive, itó netá golesa makokumú Ómasimo gimilegú molosá amimó nenazo, gimilikú nimilikoma Ómasimo gimilegú nomolave liki lamilo. 14 Lumu heleaká netalímó gimilegú molokago gelehusigú apeleaká nouné. 15 Lumu nenémo ezáa nalamula molokiko gele ahulamitunimó nene lihima alinogo une. Ámina lihimate nene lulu vizeko napa napa okiko Ómasimo viselelimikiko tolova inogo une.

16 Nigika lukumu nigivénéigita, gopa amilo. Gimilegú moloaká nene Ómasilokatí nomive. 17 Mukí netá lamaná vihelé lo minoaká netakó lamaná nene Ómasilokatí neve. Ómasi ametehe eza okulumató hanatoaká netá mukí kelémo utó imó neve. Ámina netá ali viligá aligá iaká niamóza, Ómasimo nenémini osá amive. 18 Leza Ómasimini vegenala zuha ganá apí oko loló itune loko Ómasimo geleko moloko noitó aí gakó gihila gele alévolé okuko gosohá lemetameni lemekave.

Ómasimini gakó gele aleakakumú

19-20 Nigika lukumu nigivénéigita, lekeza imane gakó gililo. Lizapaló moloaká nenémo Ómasimini avogisalo hee loko oko moloko ituni netá ma ale utó amitimó nenazo, lekeza Ómasimini gakó litá iki nigiliki likizapaló molatikumú gakó makó litá iki lamilo. 21 Golotuva netá itó musi netá itó netá golesa aleaká mukí nene ahuliiki Ómasimini gakó likigigagú molamó nene ali gikitiki alilo, Ómasimini gakolímó lukugutó vizeitimó nenazo.

22 Ómasimini gakó gili ahulata vegená nene gopa inigave. Nenemú gakola nene giliiki ámegetalo. 23 Ve makolite Ómasimini gakó giliki gili alemitamó nene gapokapokú kogoka kegepa ániagiaká niamó nenéminiki minanigave. 24 Kogoka kegepa ániagiake vikí litá oko kagatí moloaká noive. 25 Lá onoimóza, Ómasimo lo huka gakó lamaná nene gologí olimiaká gakokú monolímíni mogonamú vitagá oloko vinake lagatí molamiko gele alekogó minatunimó nene, Ómasimo nónohá zelimikiko logoliza vizeko minanogo une.

* 1:1: Mat 13:55; Apo 15:13; Gal 1:19 * 1:10: Isa 40:6,7

²⁶ Makó keza monó noguluhá vejená nounge liki litamó nenete kegepa gizapa amitamó nene, monó lupe liki soza lotuváa linigave. ²⁷ Megusa izegipa itó vená getó muhelé iki niko kelémo vatí itunimó itó mikasiuka monó gelema vejenalitiní mogona nenémo lelémo golesa okative loko gizapa oko minatunimó nenémo monó lituni netá loló oko Ómasímini avogisalo hee loko lamaná minanogo ive.

2

Vegená áinigoko gona moloaká

¹ Nigive nagavese, lekeza lapanalagi Guivahani Izesu Kilistokumú mota gili alévolé nianazo, vejená makokumú sigaga nilikitake vejená makokumú ánihi ahuliaká nia netá nene ahulalo. ² Ve makolímó netá lamaná akolokoko agizató nene goli gehanitunú lílí a líni akolokoko monó numutikú noitiko, itó ve makó gohogó ve nene ginegane litaha akolokoko ititimó nene, ³ lekeza netá lamaná akolonoiti vema ánihiiki sigaga limúiki holoma lamanató alími miliiki gohogó ve neneka, omaneló voko oteko minozo itó mikasiló ha minozo liki lí amitamó nene, ⁴ lekeza vejená kugupe hetokagó ánihiake gona miliki kilími haitopaitó iake, lakagata golesa gilíki vejená gizaká iaká niave. ⁵ Nígika lukumu nigivénegita, nenemú lo likimitoze, gililo. Gohogó ve niave liki liaká nia vejená makó nene Ómasímó kelémo etó okago, Ómasímú gili alévolé nianazo, Ómasímini avogisalo nene henóiki vejená lílí ikamó neve. Lá niago, Ómasímó kígika aitoka nimíla vejená nene lo moloketonoimómáminoko aí gizapa olimiakalímíni lapaná nene lehizeketanogo ive. ⁶ Lekelisi gohogó vejená ánihi ahuliaká niamóza, henóiki vejená nenete vasá zilíkimiake goní ilíkimiaká niave. ⁷ Lekelisi Izesuní agulizakumú sigaga liaká niamóza, henóiki vejená nenete Izesuní agulizá alívi letívi iaká niave.

⁸* Monó gotoláú Ómasímó lo hukoko lí gakokutí gakó alévolela láa loko neve: Gezakamú geleaká noanimó nenéminoko gívegekaginímú geleko gígika kemezo loko limó neve. Lekeza ámina lo huká gakó gili alitamó nene netá gihila alitamóza, ⁹ vejená makokumú sigaga nilikitiki vejená makokumú ánihi goselé itamó nene lihima alitamó nenazo, Ómasímó lo huká gakó mota gili ahulikave loko linogo ive. ¹⁰⁻¹¹* Ómasímó haitó ve vená ipá i ezega emega amilo loko limó itó vejená kipili helemílo loko lo hukamó neve. Itó lekeza haitó ve vená ipá i ezega emega amiki vejená kipili hilitamó nene Ómasímó lo hukoko lí gakó mota pelevesava zikamó nenazo, ve makolímó Ómasímó lo hukoko lí gakó mukí nene gele alekoko hamokó gele ahulatímó nene, mukitoka mota avutá imó gilinogo ive. ¹² Ómasímó lo hukoko lí gakó gologí olimiaká gakó gili alitamoláagi gili ahulatamoláagi alika lelémo nupa oko gona mololetanogo ive. Nenemú gakó nilíki netá matá nalíki nolu gakokumú gili minalo. ¹³ Ve makolímó agika hizekiko vejená makó kelémo vatí amitímó nene, Ómasímó ámina oko agika hizekiko alémo vatí amiko, ámina ve goní napa inogo ive. Itó kígika hizekiko kilími vatí ita vejená nene Ómasímó ámina oko agika hizekiko kelémo vatí inogo ive, itó goní okimiakalá nene koma minanogo ive.

Geleakaláagó netá gihila nomive

¹⁴ Nigive nagavese, ve makolímó neza Izesukumú gele alévolé okuve loko litímó nenémo monokú mogona lamaná makó ale utó amitímó nene, hutuva loló inogo ive. Nenémini okogó gele alévolé oloko vitunimó nene, Ómasímó lugutó vizeminogó ive. ¹⁵ Likigivetipo ve makó ahe vená makó ahe gineganemú ahe itó nosánetakumupe vitagá noikoma, ¹⁶ lekelitokatí makolímó aló vozo, mumusí oko nooko no gagatupa oko minozo loko lo amitímóza nasahílí otamítímó nene, hutuva inogo ive. ¹⁷ Vegená makolite monó gili alévolé iiki monokú mogona lamaná makó ali utó amitámó nene, Ómasímú gili alévolé itamola mota helekave.

¹⁸ Ve makolímó nolu gakokumú géneka litímó nene, láa loko lo amitómó neve: Geza monó gele alévolé okanimóza, neza nene monokú mogona lamaná ale utó oaká nouve. Monokú mogona lamaná nelepizemoko gele alévolé oaká animokó nelepizitanímó nene, neza monokú mogona lamaná ale utó oaká noumó nene gelepizekugo, Ómasímú gele alévolé noutímíni mogona hanuva gilinogo ane loko linogo uve. ¹⁹ Lekeza nene Ómasí hámakó noíve liki liaká niamó nene gakó gihila nilamóza, holosí golesa nenete ámina iki giliake alika goní itakumú kehelele vizekago luvoluvo ziaká niave. ²⁰ Negi nagí vejenakumú litune. Vegená makó keza Ómasímú gili alévolé itamóza, monokú mogona lamaná makó ali utó amitámó nene, gele alévolé oakáini mota helekave loko litune. ²¹* Avoteho Avalahá nene gipala

* 2:8: Liv 19:18 * 2:10-11: Gá 20:13-14; Gapo 5:17-18 * 2:21: Apí 22:1-14

Isakani Ómasi guguni gizo aminogo noigo, Ómasímo geleake, novogisalo lihimauala asú omikago noive loko li gakó nene mota gilinaive. ²² Nenemú eza gele alévolé omo novike monokú mogona lamaná ale utó oaká imó, itó monokú netá lamaná ale utó oloko vitímo gele alévolé i netá nene vihelé lo minamó neve. ²³ * Nenemú monó gotolaú nene Avalahá eza Ómasimú gele alévolé okago, nenemule loko Ómasímo gelekago lihimauala asú omikago minamó neve loko li gakó nene alévolé imó. Itó vegealite Avalahakumú eza Ómasímuni zogova lamaná noive liki liaká amó. ²⁴ Lá onoiomó nenazo, gele alévolé oakatemukó gelekoko Ómasímo eza novogisalo mota lihimatini asú olikimikago niave loko lamitimóza, gele alévolé onounike monokú mogona lamaná ale utó oakakumú gelekoko novogisalo lihimatini asú olikimikago niave loko linogo ive. Nene mota gilinaive. ²⁵ * Ámináminoko Zosúa eza vegeaná guhu gapo viki asuguná iki vegeaná kemeni ániगतave loko kimiselekago, mokoló vená Lahapá noitoka ikago, áisi kelémo numukú moloake, gala vegealite ániigiiki kipilikatave loko kimisele makó gapoloka molokago vamó. Ámina mogona gihila ale utó okago, Ómasímo aikumú novogisalo lihimala asú omikago noive loko limó. ²⁶ Ve makolímuni agikagú ameni nomigo mota helekave loko litune. Ámina oko ve makolímó Ómasimú gele alévolé okoko monokú mogona lamaná ale utó amitimó nene gele alévolé oakala mota helekave loko litune.

3

Genezate

¹ Nigive nagavese, tisá mukí nene aleko iteko goní hoza napa ale liminogo inazo, lekelikutí ve mukilite monó tisá lilí amino. ² Leza mukitó gopa oaká nounge. Makó keza gakokú gopa amitamó nene, vihelé likigó minanigave. Kegepaló gizapa itamó nenete kugupeloka netá mukí hanuva gizapa lamaná itamó neve. ³ Aenitunú lilí a netá nene hosi izatini kegepa holutó moloko nagá zeko nagató aleko gelelehá nouko, gapo vinogo nounitoka viaká niave. ⁴ Ámina oko sipi nene netá napa napa nemóza, itó hepé napa nenémo alémoko voaká noimóza, sipi ale ataloaká ve nenémo iha komaló ale molo molo nogiliko ámina sipi napa nene eza gilitoka vinogo ive. ⁵ Ámina oko genezate nene netá koma nemóza, netá koma-kama oko alesá amuve loko ale napa napa oaká noive. Ló luluha koma nenémo guluma oake zazuha gihinahisi lo asú oaká noive. ⁶ Ámina oko genezate nene lokitana neve. Lugupémuni netakutí nene mikasiuka netá golesa mukilitini nogosani neve. Genezatémo lugupe ligika ale gopa o asú oaká noive. Ló luluhámo guluma oake zazuha gihinahisi lo asú oaká noimómáminoko ló apakutí Satani vegejala zuhate mikasiuka vegeaná mukitoka genezate ali viligá aligá ago gakó golesa lokuko áminalotí oko moloko nouni netá nene golesagó oloko novive. ⁷ Iza goula itó zauka gaha-nama, itó gosihá, itó nagamikú netá haitopaitolímuni mukí kilími kagata ligatamó neve, itó kilími kagata ligiaká niamóza, ⁸ genezate nene ve makolímó agata aleminogo ive. Genezate nene netá golesa noihe hanuvagi minosá amive. Ale viligá aligá oko minoaká noive. Genezate nene zahámegeta golesa heleaká netá neve. ⁹ * Helegaloka genezatetunú nene Guivahani ametehini agepoka loaká nounge, itó helegaloka Ómasi ezáagitana kelémo utó i vegeaná nene genezatetunú usí vizekimiaká nounge. ¹⁰ Ámina hamokó genezatetunú nene gakó lamaná lo kemeko kegepoka loaká nounge, itó ale viligoko usí vizekimiaká nounge. Nigivénegita, nene etami suni neve. ¹¹ Nagamí hinipiní hamokutí nene noaká nagamiki ekesá nagamiki lemeaká noihe. ¹² Itó loisi nenémo anasi golatihe, itó gizasímo nene loisi golatihe, itó age nagamikutí noaká nagamí utó itihe. Lá aminogo ive.

Ómasilokatí gele vevesoakaláa

¹³ Lekelikutí ve makó nene netakumú gele vevesoaká ve itó gele hee loaká ve noitimó nenémo zou ve minoko hee loko oko moloko itimó nene, gele vevesoakalímuni mogona ale utó inogo ive. ¹⁴ Lá onoiomóza, likigikagú gínikahagi gezaokani gezaokani liki kemekugú niki minatamó nene, sozagi likataze, lukugupe aliki itiki leza gele hee lonounge liki lamilo. ¹⁵ Ámina netá alitamó nene, gele vevesonounge liki lina gakó nene hutuváa neve. Ómasímo ámina netá alilo loko losá amive. Satá nene ámina netá alilo loko gala vizeaká noigo, litaha lemētamenitunú aleaká nounge. ¹⁶ Kigikagú kemekugú noaká netá itó gezaokani gezaokani loaká netá netitoka nene vegealite gopa netá aliki netá golesa mukí lilí inigave. ¹⁷ Ómasímo gele vevesoaká netá lehizelimiaká noimó nene, likigagú gizopa lo minago hulu vegeanakó minoko gínikaha amoko muheléini ániokoko kelémo lamanatamaná okoko lititagani oko

* 2:23: Apí 15:6; 2 Iki 20:7; Isa 41:8 * 2:25: Zos 2:1-21 * 3:9: Apí 1:26

gegezate lositaki minoko soza losá amune. ¹⁸ Vegená nene hulu vejenakó miniiki netá mukí zou líki alitamó nene, hulu utó inogo ive.

4

Monóini nomi vejená ániigi lamaná iakakumú

¹ Lekeza nene lova leta lava leta iki lova hiziaká niamómámini mogonamú lo likimitoze, gililo. Lukugupémini lukumu heleaká netalímo likigigagú vo alekago lova utó oaká noive. ² Lá iake, lukumu hili netá nene alitupe líki amuza milaha milaha alemake vejená visilikimiaká niave. Netá matá ániigi lamaná iki ali likigizakú inamake lova napa hiziaká niave. Netá matakumú Ómasiloka voká lamanazo, alisá amave. ³ Itó netá makokumú Ómasiloka voká likamóza, likigika hee loko minamitita lekeza lukugupémo amu heleaká noi netakumukó gopa Ómasiloka liaká nianazo, Ómasímo lekememinogo ive. ⁴ Gumesisiló vejenalita monó gelema vejenalite giliaká niamó nenémini iki laga likivisiti netakumukó gilitamó nene, Ómasímini gala veva lílít itave líki gelemahe. Monóini nomi vejená kumu heleaká noi netakumukó likivisitimó nene, Ómasímini vejenala minaminigave. ⁵ Ómasímo monó gotolaú nene není Sikalahú kígikagú moloketumó nene hanuvamú ahulotamuve, netá golesa alitahe loko gizapa itive loko ahulotonouve loko limó. ⁶ * Lá onoimóza, lumu heleaká netá golesa gili ahulatave loko nasahilí oletoko hize lé olimiaká noive. Nenemú monó gotolaú Ómasímo kugupe ali otiaká nia vejenalitiní lukesa akeleaká noive, itó limiki mina vejenalitiní lukesa hize lé okimiaká noive loko lonoimóma neve. ⁷ Lekeza Ómasiloka gímiziiki aí amakuka limiki minalo. Satani visilitatamó nene, golisi inogo ive. ⁸ Itó Ómasímini avogisaló vi alitatamó nene, eza ámina oko lokovogisaló omo alitanogo ive. Golesa netatini nene ahulalo. Vitupe atupe líki vénehekánehé nilamó nene ahuliiki likigika nagamí zilo. ⁹ Lekeza mogonatitoka giliki miluma giliki ive iki niviki likigika hizino. Giza iki lokogoliza vizeaká netatotí ive iki miluma giliaká netatini utó ino. ¹⁰ Guivahanímini avogisaló limiki minikikoma lekelémo otinogo ive.

Likigivetikini gakó golesa li kimiakakumú

¹¹ Nígivéhegita, lekezatiniimú alivi letivi iki gakó golesa lamilo. Makó eza agivelahinimú gakó golesa lomikiko lihima molotatimó nene Ómasímo lo huka gakokumú gakó golesa loko aleko letamó gilinoivo. Geza nene Ómasímo lo huta gakó aleko letatanimó nene, gele alemoko aleko letoko gakó gihila nomive loko litanimóza, ¹² Ómasímo ezáagó lo huka gakó ale utó oake gakó akó loko gona mololetanogo ive. Ezáagó lugutó vizitimó neve, itó lelémo tolova itimó neve. Lá noiko nene vejenalitiní mogonataganamú lotuva legeaká nene lekelí hoza nomive.

Iki miliki ita netakumú lukugupe ali otemilo

¹³ * Lekeza nene itínahe azohe apá makotoka vinake kilisimasi hamó minokinake, hoza alinake henoni ale utó itune líki liaká nia vejenalita nene gakó makó lo likimitoze. ¹⁴ Azo utó iti netá nene lekeza gilinahe nilahe, olile. Lekelisi nene miniki aliki niamó nene ló lokilagitana neve. Ló lokíla notike notike vejenalite gamena lagasó ániigikago litá oko asú oaká noive. ¹⁵ Nenemú Ómasímo giliko lamaná noikoma nene, minoko aleko oko moloko itune líki lilo. ¹⁶ Itína nene, iki miliki ita netakumú lukugupe aliki itiaká niamó nenémo etamive. ¹⁷ Makó keza netá lamaná alitune líki gilinita netá lílít amitamó nene, lihima alinigave.

5

¹ Lekeza henotiki vejenalita gakó makó lo likimitoze, gililo. Netá golivagi lekelitoka utó itimó nenaze, nenemú miluma giliki ive nama ilo. ² * Henotini mota hulupa lokago, gineganetini lamaná nene gúnakonite mota hukatató niave. ³ Lekelí monitini gaupá gímó nenémo moni aliki etoha iki ali minamómámini mogona alika utó okoko, lokitana oko lekezagi henotinigi lanogo ive. Henoni ali nupa iki milinamóza, mukí mikasiuka netá asú iti gamena mota alitokanazo, ámina gamenaló henotinímini lihima golesa alinigave. ⁴ * Gilinahe. Lekelí mikú hozaló vete govisi hoza aliki gihisi hukikago, lekeza etami suni aliki meinava kememago, hoza ale vete ive nama amó nenémo Ómasímini agataló holokago lihimatiniimú geleake láa loko nolive: ⁵ Lekeza mikasiuka imane iki miliki ake niki lagaváa giliaká niake, giliki gehatiaká niamóza, Ómasímo lekehelí iti gamena mota

* 4:6: Ano 3:34 * 4:13: Ano 27:1 * 5:2: Mat 6:19 * 5:4: Gapo 24:14-15

alitokave. ⁶ Lekeza vevesiki nia vejená nene goní ikimiake nikepelego keza lihima lova iki likipilisá amave.

Goselekaselé amoakakumú itó Ómasiloka loakakumú

⁷ Nigivénegita, Guivahani atiginá oko ati gamenamú goselekaselé amiki aí ageva iki minalo. Gilinahe. Zuhaina vete mini zuhá iake goí o golinigi itó alika golinigi zekiko minumuni omolokiko gihila lamaná aleko natune liki goselekaselé amake gizapa iki miniaká niave. ⁸ Guivahanite atiginá oko ati gamena alitokaze, nenemú lekezagi ámina iki goselekaselé amiki likigika Ómasiloka mili alévolé iki minalo.

⁹ Nigivénegita, goní oletati ve Ómasi nene alitó noive. Goní ikataze, lekeza mukahá makahá amilo. ¹⁰ Ómasímini agepagutí gakó liaká a ve gopoguni nimilikitago goselekaselé amake Guivahanímini agulizá iki miniaká a vetini kigizakáu lisiki hulu iki minalo. ¹¹ * Gilinahe. Keza alévolé iki mina vejenakumú nene Ómasímo nónohá zeketa vejenale loko loaká nune. Zopú eza miluma maluma geleko goselé amike minamoláama mota gilinahe. Miluma gili gamenava asú omikago Guivahanímo netá matá lamaná alika lehizetamó nene mota gilinahe. Nenemú Guivahanímo muhelete ángokoko agika hize lemeko hize lé oletatimóma neve loko gilitune.

¹² * Nigivénegita, alévolé gakó makó litoze, gililo. Okulumakú liví ziki likigizani itiki li hukamilo. Itó mikasiuka netá makokú liví ziki li hukamilo. Ómasiló goní ikatanazo, lekeza nene oo alitune itó óe alemitune linigima nene gakó lamanakutí lilo.

¹³ Lekelikutí makolímó eza miluma maluma geleko nominokoma Ómasiloka lino. Itó lekelikutí makolímó agoliza vizeko nominokoma Ómasi agepoka lokoko nama lino. ¹⁴ * Lekelikutí ve makó avisekikoma monó gizapa ve sele lo kemekiko, anitiki Ómasiloka liki Guivahanímini agulizá ali otiki netupagitana nagamí hilitatave. ¹⁵ Lá niiki Ómasímú gili alévolé iminiki litamó nene, Guivahanímo alémo guni okiko avisi vema nene zokanogo ive. Itó lihimavatini minatimó nene, Ómasímo ahuloketanogo ive. ¹⁶ Nenemú Ómasímo lekelémo zokatíve liki eza hize lé omikiko eza hize lé omikiko iki lihimatini li utó utó miliki Ómasiloka lilo. ¹⁷ * Vevesiki minata vejenalite numuna litamó nene, netá gihila mukí alinígave. Ilaizá nene lezagitana vemámo golini zemitive loko amuza moloko Ómasiloka lokago, kilisimasi losive makole asú oake nekisa ikani 6 oko novigo mikasiló golini zemigo, ¹⁸ * alika nene goha golini zitive loko Ómasiloka lokago, golini zekago, mikasigú netá matá goha goloko itimó.

¹⁹ Nigivénegita, lekelitokatí makolímó monokú gapo zová zavá zekiko, agivelaho makolímó alémo atiginá okikoma, ²⁰ * gakó láa liki gilitaze: Makolímó lihimavagi ve gapo golesagutí alémo atiginá itimó nene, ámina lihimavagi vémini amenía monéna tolova inogo ikutí agutó vizeko lihimala mukí ale ahulomikave liki gilitaze.

* 5:11: Hio 1:21-22, 2:10; Age 103:8 * 5:12: Mat 5:34-37 * 5:14: Mak 6:13 * 5:17: 1 Kug 17:1, 18:1 * 5:18: 1 Kug 18:42-45 * 5:20: Ano 10:12; 1 Pit 4:8

Pitani Luhuva Nampa 1

Nónohá kimike lo kimi gakó

¹ Neza Pitana Izesu Kilistoni aposolo noutímina, Ómasímo kelémo etó i vejená lekeza Zelusalegati hutili iake Potu itó Galesia itó Kapatosia itó Asia itó Pitinia mikasiuka viki gá nia vejená luhuva imane gizo nolukumuve. ² Lekeza nene Sikalahulímo lekelémo apazá zekiko Izesu Kilistoni gakó gili alitave loko itó aí golani hololeketamó nenémo likigika nagamí zekiko minatave loko Ómasi ametipo lo molonoitó minakutí lekelémo etó imóma neve.

Ómasilokatí nasahilí itó hulu lekelitoka minoloko iteko minino.

Okulumakú alévolé henonimú lagata losi gelemoko ageva oaká nounge

³ Leza Guvahanite Izesu Kilistoni amelaho Ómasi agepoka litunize. Áisi nene Izesu Kilistoni nene heleneikutí alémo otekamole loko agika napa oko hizelímkago gosohá lemetameni limigo Ómasilokatí utó okunike netá lamaná alitune loko lagata losi gelemoko ageva oaká minokoko voko minoakalímíni gihiláa geleko minoaká nounge. ⁴ Itó heleneikutí alémo otekamole loko okulumakú helisa henonite hulupa legeko lá amoakalímíni itó anuva oko gelesamoakalímíni itó helemoakalímíni ageva nounimó nene miníki okulumakú alitave loko ale vavá oletamó. ⁵ Lá oake, Ómasímo aí zámuzalatumú gizapa noleketiko aikumú gili alévolé iki niko minoko gamena asú noiko lukugutó vizeaká netá lehizeleketanogo noimó nene utó oko lamaná inogo ive.

⁶ Lá itikumú lokogoliza viziki niminamóza, Ómasímo giliko etokikoma, gamena alínipáisi gopogunímíni amupiló itiki miluma giliki miníki gopa lokogoliza viziiki minatave loko noluve. ⁷ Gilinahe. Goli gehani minoko lapuluva oaká netalímíni pipizá netá gopa netimoláa nene lolímo lo asú okíko goli gehanigó etó oko minanogo ive. Ámináminoko gele alévolé oaká netatínímíni meinava goli avilegeko iteko minamóza, gopoguni mílik-itata netalímo alémo mómoká noikoma, gele alévolé oakatini kii loko noiko, Izesu Kilstó anítiti gamenaló nene lukugulizá ali otiki lekegepoka niliko gonanaliváa lekelitoka utó inogo ive. ⁸ Lekeza Izesuni ametamená ángamatita gopa likigikatini amiaká niave. Lá niake itina gamena nene lokogómulatunú aí ángamake aikumú gopa nene gili alévolé iaká niave. Lá niake lokogoliza viziki lagaváa haitolímíni vejenalita legepatunú lo utó moloko lamoakalímíni nene giliaká niave. ⁹ Ómasímú gele alévolé oakatínímíni gihiláa nene likigikatini lukugutó vizeaká netá nene omo lokovogisaloka okaze, nenemú lokogoliza nívizeve.

¹⁰ Ámina lugutó vizeaká netá nene Ómasímíni agepagutí gakó liaká a ve keza nana okoko utó itimó neve liki gozapá vitagá iki nenémíni mogonamú agizaka hiziki minamó neve. Lá iake lekelitoka Ómasímíni nasahilí utó itive liki alikamú gakó li miliake minamó. ¹¹ Kilstó eza miluma gelekoko alika lapanalagi gonanalisi alitikumú Kilistoni Sikalahulámo gakó nene kigikagú molokago keza gamena nanahé zupa itó nana gamenaló Kilstotoka utó o amítive liake nenémíni mogonamú vitagá iki minamó. ¹² Keza hoza alemó nene kezáikumule loko nomive. Ómasímo lekelitoka utó itive loko lo utó oko lo kimimóma neve. Itó alika nenémíni gihila utó okago Ómasímíni Sikalahú amiselekego, eza okulumakutí lemeake zámuzá lehizekimikago Izesuni gakó lamaná li hutili a vete li lekemego gulinamóma neve. Ámina gakó nekisáa nene ageló keza gele guni itupe liki gili miniaká niave.

Etó oko minoko aleko ituni gakó

¹³ Nenemú lekeza likigika lakagatínímíni nagá zi gikitiki niminiki gizapa etoha iki Izesu Kilstó goha utó oko nasahilí oleetatikumú lakagata losi gelemiki ageva iki minalo. ¹⁴ Lekeza gozapá numuká vejená minake gatizá minago lukugupémo amu heleaká netá aliki minamó. Itínasa nene ámina netató iki míliki amiki Ómasi gili amilo. ¹⁵ Sele lo líkimi ve Ómasi eza apazá keké vizeko noitínimiki iki míliki níiki apazá keké vizikigó minalo. ¹⁶ Nenemú Ómasímo li gakó makó nene monó gotolaú láa liki luhuva gizinamóma neve: Neza apazá keké vizekon nounazo, lekeza ámina iki apazá keké viziki minalo.

¹⁷ Lekeza ametehove liki limiake Ómasiloka liaká niave. Eza voko aleko oko aleko itigopa, minoko aleko oko moloko ituni avotigila oko hee loko gone mololetanogo ive. Nenemú lekeza mikasiuka gá ve minata gamenaló nene lekehelele viziko minalo. ¹⁸ Lekeza láa líki gili minalo: Lekeza avotike netá gihila nomi gapoló nívago netá hutuváamo goli silivá

* 1:16: Lív 11:44-45, 19:2

nenéminímo meinavatini hízeko gologí oleketonamímóma neve. ¹⁹ Lekeza Kilistoni golani meinava iteko minamó nenetunú meina hízeko gologí oleketonoimóma neve. Eza guguni gizoaká sipsip iza agupe gololó imó itó avasavagi vové avé loko minamó nenéminoko minamóma neve. ²⁰ Itó gozapá mikasi ale utó ami gamenaló nene Ómasímo hoza gakó lomikago utó i ve nenémo alikama gamena asú inogo noigo lekelikumule loko utó imóma neve. ²¹ Lá oake, Ómasiloka lekelémo apizekago lekeza heleneikutí alémo oteake gonanalivagi lapaná ale luhota vemú gili alévolé iake gele alévolé oakatini itó lakagata losi gelemiki ageva iakatini nene Ómasilokagó neve.

²² Lekeza gakó gihila gili aliaká niago, lekelí likigikatini mokoná lamómave loko likigivetikini nene soza netá alikitamiki lamanakutí likigika kimiaká niave. Nenemule liki likigika lamanakutí eza amiko eza amiko iki múnahiki minalo. ²³ Lekeza gosohá utó amó nene avotike hiliaká amómámini zuhaváa negopa, alévolé ve Ómasilokatí utó amóma neve. Alévolé lemetameni ale utó oko alévolé oko minoaká gajokutí Ómasímíni gajokutí utó amóma neve. ^{24*} Nenémini gakó makó nene monó gotolaú láa loko nemóma neve: Vegená mukitó nene gihisi nenéminiki niave.

Itó ániagi laga hiliaká netáini nenémo netá guvava lamaná nenéminoko neve. Gihisi nene gulu gulu vizeaká noive.

Itó guvaváa nenémo lutehemó zeaká noimóza,

²⁵ Guivahanímíni gakó nene alévolé oko mino lúaló moloko minoakalímíni neve.

Ámina gakó lamaná li likimikago gilinamóma neve.

2

Guivahanímo alévolé oko minoaká gehani noigo aí apazá vegená nouné

¹ Lekeza hokolizá soza netá itó genezatini losi minoaká itó kemekugú noaká itó aleko letoaká nene ahulí asú ilo. ² Ahulí asú iiki izegipa namuni keza aminikumú kiviseaká noimó nenéminiki likigikatinímíni aminí lamanakumú likivisino. Ámina aminí lamaná niliki viki monokú napa iiki gehatikí minataze. ^{3*} Guivahanímíni nasahililamú makó lagaváa gilinita vegenalita némíni itaze.

⁴ Lekeza Guivahani minoloko voko minoaká gehanigitana noi ve vegenalite ániagi ahulamóza Ómasímo giligo meinaváa iteko mina ve alémo etó i veloka viki gímizilo. ⁵ Lá niiki sikalahutinigi gehani lilí i asú iiki miní amiki miniliki itiki Ómasímíni Sikalahulímíni monó numuni lilí ilo. Lá iiki nene apazá guguni gizi amiaká vegená niiki Ómasiloka liakatunú guguni gizi amikiko Izesu Kilstotoka vokiko, gelekoko gele laga itize. ^{6*} Izesukumú monó gotolaú gakó láa loko nemóma neve:

Neza alévolé gehani makó meinava iteko minamó nene alémo etó okuke

Zaion agokaloka geha lapusa nohizuve.

Aikumú gili alévolé itamó nenete viki netá alemamómave liki mulúikú ma mesaha aminogo ive.

^{7*} Lekeza aikumú gili alévolé iaká nia vegenatoka nene eza netá meinava iteko minoaká noive. Itó gili alévolé ama vegenakumú nene monokú láa loko lonoimóma neve:

Numuni giaká ve keza gehani makó ániagi goselé iake ali ahulamó nenémo geha lapusa loló oake noive.

^{8*} Itó aikumú monokú luhuva makó láa liki gizinamóma neve:

Ámina gehani amupilotí lotohá kipilinogo ive.

Itó ámina gehanilotí kepele molanogo ive.

Loko limó nene monó ahulakumú lotohá kipilitive loko lonoitó viki nenémini iaká niave.

^{9*} Lá onoimóza, lekeza nene lekelémo etó onoi vegená itó agulizaki ve napatémíni guguni gizi amiaká nia vegená itó Ómasímíni apazá keké viziki nia vegenala lilí ake aí zuha lilí iki niave. Lekeza limugusigutí lekelémo otopá zeake lapanalámíni silikakénaló lekelémo mola vémini gakó li hutilí ikiko hutilí itive loko sele lo likimimóma neve. ^{10*} Lekeza gozapá nene ha netá minamóza itína nene Ómasímíni vegenala zuha lilí iki niave. Gozapá nene gopa minamóza itína nene agika hize likimítímíni agikagú niave.

Ómasímíni gelekelé vegená minatune

¹¹ Nigive nagavese, neza gala vizeko lakagata aleko lo likimitoze, gililo. Lekeza mikasiuka gá niamó itó hanuva veno vegená niatita lukugupémíni laga aviseaká noi netalímo

* 1:24: Isa 40:6-8 * 2:3: Age 34:8 * 2:6: Isa 28:16 * 2:7: Age 118:22 * 2:8: Isa 8:14-15 * 2:9: Gá 19:5-6; Isa 43:20-21; Tae 2:14; Isa 9:2 * 2:10: Hos 2:23

likigika lova ale ameaká netá nene mosilo. ¹² Lá niiki monó gelema vegeanalitini holúikú etó iki minalo. Lá iki niiko, ámina vegeanalite mognataganatini ániigiki giliki golesa netá aliaká nia vegeaná niave liaká nia gakó nene ahuliiki iki miliki ita mognatini lamaná ániigiki Ómasímo gakó hoza aleketati gamenaló nene Ómasi agepoka liki minataze.

¹³ Vegeanalita gizapa ve haitopaitolimini kilimi milamó nene lekeza Guivahanimule liki gelekélé ikitalo. Gamanitini agulizaki ve napámini gakola ¹⁴ itó kiaepege kéisi li huka gakó gili alilo. Ómasímo golesa netá aliaká nia vegeaná nene nogosani kimitave loko itó gakóini giliki netá lamaná aliki miniaká nia vegeaná kegepoka litave loko gamanite kelémo etó onomóma neve. ¹⁵ Lekeza lá iki lamaná iki iki miliki itamó nenémo vegeaná negia keza lekelikumú negi gakó liaká niamó nene kegepaló gahumá ikitatave loko Ómasímo loleketonomóma neve. ¹⁶ Lekeza mukí netalímíni nagakutí mota gologí olimikamóma neve liki lamaná iki miniki aliki ilo. Itó lá iki minatamó nenémo golesa netalímíni gahumaláa loló amino. Lekeza alévolé iki miniki Ómasímini gelekélé izegipa lilí iki minalo. ¹⁷ Lekeza mukí vegeaná kilími guni ilo. Itó likigive monokú niamoláa likigika kimilo. Ómasímú lekehelele viziko minalo. Gamanitini agulizaki ve napáa nene alími napa ilo.

Kilistó miluma gilike ale goí mololetamó

¹⁸ Gelekélé izegipa lekeza gizapa velinitini kamatoka limiki miniki nasahilí ikitiki gakóini gili alilo. Itó huluváa itó kigika lamanaki mína vegeanakumukó negopa, ve lolaváa itó gínikaha ve kezagi nenémíni ikitalo. ¹⁹ Keza galana nomitó hanuvamú miluma hoza alilikitíkoma lekeza Ómasímú giliki gínikaha amiki lamaná iki niko, Ómasímo lekelikumú giliko lamaná itize. ²⁰ Itó lekeza lihima netá naliko nilikipilikoma, gínikaha amiki niko, ve makolímó geké loleketatihe. Lá aminogo ive. Nenémú lamaná iki miniko likipiliki miluma netá alilikimikíkoma legesó iki minalo. Lá itamó nene Ómasímo giliko lamaná inogo ive.

²¹ Lekeza nenémíni itave loko sele lo likimimóma neve. Kilistó eza ámina oko lekelikumule loko miluma gilike ale goí oko gapo veleleketamóma nenazo, lekeza agizaka hiziki vilo. ^{22*} Áisi nene lihima makó ale utó molamimóma neve. Itó agepagutí soza makó lamimóma neve. ^{23*} Alivi galatívi nitago eza alevo galatovo oko loketamimóma neve. Itó miluma nogilike gamuni oketamike mognataganamú ale hee loko lo hukoaká ve Ómasiloka leheta oko minamóma neve. ^{24*} Lelí lihímá aí amupiló itekago, agohí geake, zohota zaló hilimó nene netá golesa aleakakumú hele vegeanakitana iki mómoká iki otemitave loko, itó hee loko minoakakumú miniki aliki itave loko lá imóma neve. Itó aí agómuni nenémo likigikámini agómuni gimóma neve. ^{25*} Lekeza sipsip iza nenémíni hela hiziki mihina amóma nemóza, itína nene likigikámini gizapa ve nenémo lekelémo atiginá okago aitoka anitikave.

3

Ve alevetini gakó

^{1*} Vená lekeza ámina iki vatinitini kagahisiuka limiki minalo. Itó vatini lugáa nene monokumú gelemake miniaká nitamó nene monokú vi hilatave liki gakó nene li kememiki hanuva likigika lamanaki minikiko ² vatini nene lekelí iki miliki miniki aliki iaká netá nene gizopa lo miniko ániigiki kigika ali viligiki minataze. ^{3*} Lekeza lukugupémíni gonanalíváa nene nagatumó iki zopovatini ali lamaná iki gonanalisi itakumú itó likigisa likigizatoka gonanalisi iki meinava iteko mína netá milatakumú itó ginegane luhuvagi luhatakumú gilíkiko ha netá loló ino. ⁴ Lá noiko geha itó hulu iki minata netalímó likigikagú vái o lamaná oko gikí okiko gonanalisitini nene alévolé oko minoakalímíni itó litaha lamoakalímíni Ómasímo gelekiko iteko minati netá likigikagú minative. ⁵ Monóinigi vená gozapá miniliki amó keza kigikámini gonanalisi netá nenémínáa aliki miniki amó. Lá ake Ómasiloka leheta iki váinitini kagahisiuka limiki miniaká amóma neve. ^{6*} Salá eza ámináminoko vana Avalahani gakola nene gele aleake aikumú guivahaníneve loko lomiaká imó. Itó lekeza netá lamaná lilí iki netá nemú manamú lekelegesá legemiko minatamó nene Salani izegipala zuha niave loko loleketanogo une.

^{7*} Itó ve lekeza ámina iki venatinigi hamolímíni alévolé lekemetameni ali lá inamóma nenazo, Ómasiloka numuna liki akiki otikitini nenémo voko lí amitive liki venatinigi apiziki miniki zámuzáini lemeko nenaze liki gili miniki venatini nene netá matá nene likigika lamanakutikó li kimiki minalo.

Oko moloko itunitímo vo guni noiko milumámini amupiló itituni gakó

* 2:22: Isa 53:9 * 2:23: Isa 53:7 * 2:24: Isa 53:5 * 2:25: Isa 53:6 * 3:1: Epe 5:22; Kolo 3:18 * 3:3:

1 Tim 2:9 * 3:6: Apí 18:12 * 3:7: Epe 5:25; Kolo 3:19

⁸ Lá niiko lo asú oko lo likimitoze. Lekeza mukitoka likigikatini mili hamokó iki geha ziki miniki likigika eza amiko eza amiko iki likigivetikini milumáini giliki lukugupelini aliki limiki minalo. ⁹ Netá golesa nalilikitikoma, lekeza ali viligiki netá golesa alikitamilo. Alivi letivi nilikitikoma lekeza ali viligiki aliki letamiki nónohá zikitalo. Lekeza nónohá zeleketatove loko Ómasímo sele lo lekemeneimóma nenazo, lekeza ámina iki lusa gakó nene li kimilo. ¹⁰⁻¹² * Nenemú monó gotolaú gakó makó láa loko neve:

Guivahani eza hee hee liki miniaká nia vegeinatokagó agovisa kemeko aitoka liaká niakumú agata moloko gámeme noimóza,

golesa netá aliaká nia vegeaná nene Guivahanímo ániagamó ániago goselé oaká noinazo, makó keza alévolé oko minoakakumú lagaváa kivisekiko logoliza vizeko minoko aleko itune liikima genezáiniló gizapa iiki gakó golesa lamitaze.

Itó kegepatunú soza gakó makó lamitaze.

Itó golesa netá kemegeza amiiki netá lamanakó alitaze.

Hulugú miniki nenémimi hozaváa aliki amuza miliki alitaze.

Gopoguni mililitatamómámini amupiló itituni gakó

¹³ Lekeza netá lamanakumú viki gimiziiki niko hí vémo netá golesa loló oleketative. ¹⁴ * *

Itó lekeza iki miliki itatímo vo guni noiko miluma netalímini amupiló ititamó nene, Ómasímo nenemú gelekiko lokogoliza viziti netá loló inogo ive. Itó lova ali likimiki lekelegesá ligiti gakó nilikoma, likigisa likigizakutí luvoluvo zemino. Itó mulutini itemino. ¹⁵ Likigikatini ali guluvitiki ali guni ikiko Kilistó eza Guivahanitini loló o likimino. Lá okiko netá matakumú likigikatunú lakagata losi gelemiki ageva iaká niakumú loká nilikitikoma, vávani oko ámina mogona lo utó moloko lo kimítune liki ali vatí iki minalo. ¹⁶ Lá niiki gakó nene legesó iki keikumú giliko lemémiko likigigagú gakó nomiko lamaná iki lilo. Lá niko lekelikumú alivi letivi niko, Kilistogegi apiziki lamaná iki iki miliki itamó nenémo ve nenémínaa keza soza sazáinimimi mogonáini utó okiko kovoza napa hilitaze. ¹⁷ Ómasímo likipiliki nagá likimitakumú gelekiko lamaná okiko, netá lamaná lílí niko lílí ilikitamó nenémo itekave lokomú noluve. Itó lekeza lihima alikiko lílí ilikitamó nenémo lemekave.

¹⁸ Kilistó eza ámina oko hee lo mina ve miluma gilike vegeaná golesa lelikumule loko hilimó. Eza lihimate asú itive loko lelikumú gamena hámakó helekago mota asú okave.

Nene Ómasiloka lelémó molanogo loló imó nene agupegi minoakeve loko apilikago hilimó. Itó Sikalahulagi minoakeve loko goha mómoká oko otimó. ¹⁹ Oteko minake nene hiliki vamoláa keza sikalahulitini nene nagá geisagú niatoka lemeko monó lo kimimó. ²⁰ * Keza

gozapá Noá eza sipi napa loló oko noigo Ómasímo agigagú hulu ominatímove loko kigika ali viligatahe loko kegeva oko minoloko noitigo gakoláa gili ahuli ahuli imi itemó. Lá niago, ve vená 8-así nene ámina sipigú itikago, nagamílímo kelémó veletó okago hanuva minamó. ²¹ Nenémimi helegáa nene monó nagamí holoakalímo lekelémó lamaná oaká noive. Monó nagamílímo lugupémimi golotuváa nene nagamí zesá amive. Monó nagamí nohulunike

Ómasi eza ligikate nagamí zelimikiko eza gele lamaná ititó minoko aleko itune loko voká loaká nounce. Monó nagamí nohuluko Izesu Kilistoní heleneikutí alémo otekamole loko lugutó vizeaká noive. ²² Itó ezáa okulumakú iteko Ómasímimi agizani zamagaloka iteake mitó noigo ageló mukí itó vegeaná iti minamoláa zámuzagi niamoláa keza aí agahaisiuka

limiki niave.

4

Ómasímimi agepagú gakotó gele aleko minatune

¹ Kilistó agupe miluma gelekamole liki lekeza ámina iki lílí ilitave liki zámuzá aliki amuza milalo. Lá niiki makolímóhe makolímóhe monokumule loko agupe miluma geleká noitítímo golesa netá alitikumú goha mumuzó amítive loko gele minatize. ² Itó lukugupémó

minoko aleko iti gohalaló lukugupémó amu heleká noi netá alemiki Ómasímo gilitó molató nene gili aliki minalo. ³ Amunaloka hetoka vegeaná lagaváa giliake netá matá lá iki aliki minamó neve: Mokoló netá itó golotuva netá nenémimi hozaváa lílí iki minake, piá

nagamí niki sipaki niake, iza goula nosá negi nagamiki vauva aliki niki lekeméni ziki eza aviligigo eza aviligigo iki, soza ómai netá gupá zi amiki minamó. Ámina netá nene lekezagi goselé lekepelemigo iiki viki niago gamena hána hána vimó neve. Nenemú goha miní

amiki lá amilo. ⁴ Itó itína nene hetoka vegeanalite golesa netalímini agigagú minake nosáneta niki meleketakeni iki kogoliza viziki niago lekeza kezagi apiziki minake ámina netá lílí

amago, keza giliake, ininá niake lekelí nene alivi letivi iaká niave. ⁵ Lá ikamóza, hele

* 3:10-12: Age 34:12-16 * 3:14: Mat 5:10 * 3:14: Isa 8:12-13 * 3:20: Apí 6:1-7:24

vegená itó logómulagi vejená lelí mogonataganamú goní oletatove loko ale vatí oletoní ve Ómasiloka gako hoza wipisi alinogo une. ⁶ Nenemú helemoláa keza Izesuni gako lamaná lo utó oko lo kimimó nene hele vejenalitiní gapoló nivake kugupetunú lihima alikago Ómasímo keí mogonataganamú goní oketamóza, helegaloka Ómasímini gapoló wíki alévolé oko minoakakú miníki alíki itave loko ámina gako lamaná lo kimimóma neve.

Ómasímini nasahilí legesó oko ale minínake gona molatune

⁷ Netá matá mukí asú iti gamena mota alitokave. Nenemú lekeza likigika lukugupe gizapa iki gili koló iki Ómasiloka numuna loakakumú wávani iki minalo. ⁸ * Lá niiki lígika kemeaká nenémo lihima mukí eza ahulotiko eza ahulotiko oaká noimó nenazo, netá mukí kwilegeko mina netá nene lígigika eza amiko eza amiko iakakumú amuza milalo. ⁹ Lekeza goselé lekepelemiko veno vejená nene eza nasahilí otiko eza nasahilí otiko kilími numutiuka miliki kilími lamaná ilo. ¹⁰ Lekeza Ómasímini monolímíni zámúza haitopaitolímíni leheleketató nene hoza alíki lekeza mukitoka vo alítive líki Ómasímini nasahilí nene legesó iki ali miníki gona moloaká vejená minalo. ¹¹ Itó monó gako li utó itamó nenete Ómasímini gakola lamaná li utó iki li kimitaze. Itó vejená nasahilí ikitatamó nenete Ómasímo zámúza kemekiko nenetunú nasahilí ikitataze. Lekeza némini manámíni niiki Ómasímini agulizá wítive líki lá ilo. Izesu Kilístóni zámuzatunú aí luhuva utó itize, nenemú gonanalívagi lapaná itó gizapa olímiaká zámúza áitoka minatímó minoloko woko mino lúaló moloko minataze. Lamaná.

Kilístóni vejenala minúníkumule líki gopoguní milítanigave

¹² Nígika lukumu vejenáise, lekelitoka gimilikú moloaká netá agepagí netá utó noimó nene lekeza netá gosohá utó o lemekave líki hukilí amilo. ¹³ Kilístó miluma gilímó nenémini agíkgá miníki mulutíkú ágila guluma iko minalo. Lá iki miníki aí gonanalívagi lapanala utó o lekemekiko ámina oko mulutíkú ágila guluma noiko lokogoliza wíziki minalo. ¹⁴ Lekeza Kilístóni agulizá ali minakumule líki alíki letíki mumusopa nizilíktíkoma, gilíkiko nene lapanalímíni amelaho Ómasímini Sikalahú nene lekelítoka lemeko minatímíni mogona lá oko utó okave líki gili minataze. ¹⁵ Lekelítokatí ve makolímóhe makolímóhe goní omíkiko nagá numukú miluma gilítimó nene apele heleakakumupe itó guminamupe itó hokolizakumupe itó gelígeli oakakumupe itó laskoli minoakakumupe loló amino. ¹⁶ Itó helegaloka makó eza Kilístóni vejenala minakumule líki nagá amíkkíma nene, nenemú gelekiko avoza helemiko Kilístóni agulizaláa nene ale minoko Ómasi geké lo amítize. ¹⁷ Gilínahe. Ómasi eza vejenalitiní mogonataganamú gona moloketati gamena mota alitokave. Itó vejenala zuha lelitoka ámina hoza apí oko alinogo ive. Nenemú lelitoka ganatílisi napa okoko alítimó nenazo, aleloko woko Ómasímini gako lamaná gili ahuliaká nia vejenatoka woko nolutigeke nene, nanámíni oketátive. ¹⁸ Nenemú monó gotoláú gako makó láa loko neve:

Ve lamaná keza lihímáinimú goní ita gamenaló silipa oko kugutó wíziko minatamó nenazo, nenemú monó gili ahuliaká itó golesa netá aliaká nia vejená keza nana itamó neve.

¹⁹ Itó nenemú Ómasímo giliko lamaná onoi miluma malumámíni amupiló itita vejenalite kelémo utó oaká ve Ómasi eza lokago alévolé oaká wémini agizakú nene kígikáini míliiki lamaná iki iki miliki minataze.

5

Ómasímini sipsip iza mulusi gizapa oketatune

¹ Lekelítoka monó olotiva ve niamó nene ámina oko monó olotiva ve noutímína gako lo lekemekugo, gilitaze. Neza Kilístó miluma maluma gilímó nene nogómulatunú lamaná ángutímína noluve. Itó minoko gonanalívagi lapaná utó oloko woko utó noiko nene, izá moloko alito ve neza lakagata aleko gako imane lo nolukumuze, gililo. ² * Ómasímini sipsip iza mulusi lekeza gizapa ikitatave loko loleketonóimó nene alévolekutíkopa, mulutíkú lamaná ominíko gizapa lamaná ikitalo. Lá niiki moni henokanoni aleakakumú gilíki negopa, ámina hozamú mulutíkú ahuu ahuu lokiko iki miliki itaze. ³ Lá niiki ve napáini líli iki lá amilo. Sipsip izatini ali goí ikitíki monokú nene líkígizaka hizíki wítave líki kilími zou líki kilímiki wílo. ⁴ Itó minoko gizapa ve napa nenémo aníteko gonanalívagi akilí alévolé oko minoakalímíni hitólikimíkiko, hitíki minataze.

⁵ * Gosohá ve lekeza ámina iki olopa wétini kagahisúka límiki minatave loko lo nolukumuve. Lá niiki lekeza mukitoka lukugupe alíki límiki minata netalímó hoza aleaká

gineganetini loló okiko ali akaliki eza gelekelé otiko eza gelekelé otiko iki minalo. Nenemú monó gotolaú gakó makó láa loko neve:

Ómasi eza kugupenini aliki itiaká nia vegenalitini lukesa akeleaká noive. Itó kugupe aliki limiki mina vegená nene hize lé oketake nasahilí okimiaká noive.

⁶* Nenemú Ómasímini alévolé gizapaló lukugupe aliki limiki gupá zi amilo. Lá ikiko, eza mola gamenaváa alitokiko áisigó lukugulizá ale otinogo ive. ⁷Ómasímo nene vatí oko gizapa oko lekelémo guni oaká noive, nenemú lekeza netá matá gena netá lakagata gululusi giliaká nia netá mukitoka nene aí agizakú milalo.

⁸Lekeza lakagata gili koló iki gizapa iki minalo. Gala velini Satá eza akohú galagitana oko agepa á oaká noi ve eza aí akohitohe aí akohitohe loko agepa á oloko vogá ogá oaká noive. ⁹Nenemú lekeza gili alévolé i miniki vasá zilo. Lá niiki likigive lakagave monokú niamó numutó namató niamoláa keza miluma maluma ámina iki giliki miniaká niave liki gililo.

¹⁰Itó Ómasi nasahilí amelaho eza Kílistotoka gímizemómave loko gonanalivagi lapaná alévolé oko minoakalíminiloka vi hilatave loko sele lo likimi ve áisi miluma maluma gamena alínipáisi nigiliko, lekelémo vevesatí zámua lekemekoko lekelémo kii loko lukesavatini hize kii loleketanogo ive. ¹¹Nenémíni zámua nene aitokagó minamó nene minoko minoloko voko mino lúaló moloko minino. Lamaná.

Vegená makó gekéini loketamó

¹²* Neza gakó imane Sailasini nene lo ame ame nougo luhuva gizo nolikimive. Neza aikumú gulugo, nigivéneho gihila loló onoive. Neza Ómasímini nasahililamú gihila noive liki gilitave loko gakó ahaváisi lo utó moloko lo lukumuke hize lé oleketatove loko lo nolukumuve. Ámina nasahilímini agikagú alévolé iki oti minalo.

¹³* Papelonia numutokatí Ómasímini vegenala zuha lezagi lelémo etó i vegená keza geketini nililikitago noluve. Itó monokú alémo mulu ve Makí ezagi geketini nololeketave. ¹⁴Lekeza monokú apizi lamaná iki eza aputá viziko eza aputá viziko iki minalo.

Kílistotoka gímiziki nia vegenalita Ómasímini hulu lekelitoka mino moloko minino.

Pitani Luhuva Nampa 2

Nónohá kimike lo kimi gakó

¹ Neza Saimon Pitana Izesu Kilistoni gelekélé ve itó aposolo nénési nene Izesu Kilistó eza Ómasile itó lugutó vizeaká ve hee loko mina ve minoakeve loko gele alévolé oaká gihiláa lehizeletamokitana oko lehizeleketa vegeñalita luhuva imane gizo nolukumuve. ² Lekeza Ómasimú itó Guivahanite Izesukumú gili guni iki gililiki niviko nasahilí itó hulu nene lekelitoka miní ameko utó oloko voko minino.

Ómasimo lelémo etó oake sele lo limi gakó

³ Izesú ezáa lapanalagi itó lamanalagi nene izá miliki alitave loko sele lo likimi ve áñigoko gelekuko Ómasiloka gímizi miniki iki miliki itave loko ligikámini lukesaváa mukí nene Ómasímíni zámuzalámo lehizeletonoimóma neve. ⁴ Lá oake, netá gihila ite minamoláa meinaváa napagi nemó alitave loko lo mololeta netá lehizelimikago nene, alekuko, nenémíni gihiláa lelitoka utó okiko, mikasiuka gumesisímíni gihila lapuluva oaká netá nene lemegesa amekinake Ómasímíni ametamenigi itunize. ⁵ Nenemú lekeza gili alévolé iki miniaká niató amuza miliki hee liki miniatatíni nene miní amilo. Hee liki miniaká niató nene mukí netá mogonomú geleká nene miní amilo. ⁶ Netá mogonomú gelekátó nene likigika nemó lukugupe nemó gizapa oaká nene miní amilo. Nenémíni agikagú amuza milikiko, gasovagi netá utó noikoma, amanapa o minoaká nene miní amítaze. Amanapa o minoakátó nene, likigika lamanaki minoaká nene miní amilo. ⁷ Likigika lamanaki minoakátó nene likigivetikínimú miluma gelekimiaká nene miní amilo. Miluma gelekimiakátó nene, likigika kemeaká nene miní amilo. ⁸ Ámina netá matá nenémo lekelitoka minoko hize hutílí noikoma, Guivahanite Izesu Kilistoni mogonomú gelekáláa gili miniki hozaváa alikiko, hutuváa loló amoko gihiláa zinogo ive.

⁹ Itó nolu netá matá ali minamita vegeñakumú láa loko litunize: Keza kemenímíni agómula liko vimó neve. Goleša netáini goí oko Ómasimo nagamí zeketoko kelémo lamaná imó nene kagatí molokave loko litunize.

Guivahanímíni lapanaláa nene agómula gihilatunú áñigamó

¹⁰ Nigive nagavese, lekeza nenemú Ómasimo lekelémo etó oake sele lo likimimó nenémíni gihiláa lekelitoka mino alévolé itive liki amuza milalo. Lekeza lá itamó nene goselekaselé ikiko monokutí veehé lememinigave. ¹¹ Lá iki miniko Ómasimo giligo vávani olikimikiko Guivahanite lugutó vizeaká vele Izesu Kilistoni avogisaló alévolé oko minoakalímíni agikagú nene vi hilanigave.

¹² Lekeza netá matá mukikumú imane mota lo lekemekuháma neve. Itó ámina gakó gihilámíni agikagú alévolé iki niminamóza, ámina gakómaló nene ale gosohá oko lo lekeme lekeme oko minanogo uve. ¹³⁻¹⁴ Neza gamena hána minaminake mikasi nugupe ahulatove loko Guivahanite Izesu Kilistó lo utó oko lo nemekago gelenoumó nenazo, neza mikasi nugupegi nomininake gakó imane lo lekeme lekeme oko mininake lekelémo ote ote oko itove loko gulugo etokave. ¹⁵ Nenemú helekugo, lekeza gakó nene ali gosohakosohá iki mili gilikilí iki viva viva iki minata gapomú vitagá inogo uve.

¹⁶ Neza Guivahanite Izesu Kilistoni zámuzalamú itó anitití gakó lo lekemekugo nene, lekeza giliko gitene gakó loló amino. Vegenalite kagata giliki ali guni iki lakutí lo lukumumó negopa, neza Guivahanímíni golvagi lapanaláa utó noigo, nezáne nogómula gihilatunú áñigonoutófi lo lukumumóma neve. ^{17*} Nene Ómasi amelaho eza Izesuni agulizá ale otike gonanalisi lehizemikago, okulumakú lapanalagi velokatí nene imane nene nigika amu gipáne noive, aí nene áñigo laga alekuve loko limimóma neve. ¹⁸ Neza aposolo lugáagi áisigi apazá agokaló nouko, gakó némika loko okulumakutí lemekago gelenouháma neve. ¹⁹ Itó leza nenemú Ómasímíni agepagutí gakó liaká a vetini gakó gelekuko gihiláa lamaná loló oloko iteaká noive. Nenémo livikitana oko límugusigú hize hanatokamó nenazo, lekeza nenemú logogómulatunú áñigi gisilí hizikí niko, gó lo lapaná latize. Itó sonohí napa ganakomekitana oko Izesuni lapaná nenémo likigikagú hize hanatoko minatize. ²⁰⁻²¹ Ómasímíni agepagutí gakó nene vegeñalita giliki alivi hizíiki makó linamó negopa, Ómasímíni Sikalahulímo kelémo vávani noigo Ómasilokatí gakó liki miniaká amóma nenazo, nenemú ganatilisí gakó makó láa liki gili guni iki gililo: Ómasímíni agepagutí gakó liaká a

* 1:17: Mat 17:1-5; Mak 9:2-7; Luk 9:28-35

vete monó gotolaú luhuva gizi mila gakolímíni mogonáa nene ve makolite kezáini kigikagutí gili guni iake lamoakalímíni neve.

2

Monó lili ali ve sozámíni keí gako

¹ Isilae vegeatoka gako lili ali ve sozámíni nene gozapá utó iake minamó. Lekelitoka áminagó iki monó lili ali ve sozámíni utó inigave. Keza soza monó ali utó milikiko, lekelitoka hou loaká netá itó latila oaká netá nene utó inogo ive. Itó nenegó nomive. Guivahanimo nohilike lihímaváini meina hizeketa gakokumú egamega oaká nenegi alinigave. Lá ikiko, kezáini iki miliki atímo lapuluva oaká netá nene galinali kugupeló utó inogo ive. ² Vegená nenémináa keza mokoló netá naliko vegená mukilite ániigiiki kémegetanigave. Itó keikumule liki vegená lugáate monó gihílámíni gapomú aliki letanigave. ³ Lá okiko, soza monó liaká ve keza moni henokanonimú mumuzó itatímo itó kigikagutí gako utó ititímo lokogoka viziki netá matatini hanuva alinigave. Hoza lá iki alitakumú keí lihima kimitove loko Ómasímo gozapá ale vatí oketamó nene, voko haha amive. Itó vi tolova iakáini nenémini agepáa ale molamó nene ha neve.

⁴ Ve nenémináatini mogonamú láa liki gililo: Ageló lugáate netá golesa alikago Ómasímo asenini zeketamike meikú nagá zeko kehelú ahulokago, ká emane límugusi lapalapa zikú limiki niave. Neneloka goní ita gamenamú ageva iki niave. ⁵ * Itó gozapá netá matá mukí itó vegená nene Ómasímo asenini zeketamimóma neve. Makó Noá nene hee loko minoakalímíni gako loaká i vegi vegenala zuha 7 kezagigó asenini zekimikago, gosohá niago, vegená golesa keitoka nagamí veleko kepele gesá imóma neve. ⁶ * Itó Soto apatokagi Gomola apatokagi ámina oko lapuluva itave loko lokago, lokú liki mikasi amóma nene vegená golesa alikaloka utó iki minatamó nenete ámina netalímo lelitoka utó okative liki gilitave loko nenémini imóma neve. ⁷ * Itó ámina apá alémo latila inogo noike nene hokolizá ve keza mokoló netá kovoza helemigo aliki niago, hee lo mina ve Lotí eza ámina netá golesamú miluma geleko mina vema agutó vizimó. ⁸ Lotí eza monolagi ve minoakeve loko keí holúikú noigo, keza netá golesa aliki minikago gamena gamena ániogoká geleká ike, mulunagú gele golesa oko minoaká imó. ⁹ Nenemú Guivahanímíni mogonáa lá oko mota utó okamó nenazo, áisi nene monóiki mina vegená nene gimilegú moloaká netakutí lugutó vizeaká zámuzagi noive. Itó monóini nomi vegená nene gamena napaló goní oketatove loko nagá kimitikumú geleneive. ¹⁰ Litaha kigikámo amu heleaká netá golesa ámegetiake goihá gilgili iki gizapa véinitini gako gili ha gele gele iaká nia ve nene Ómasímo aleko iteko alévolé oko nagá kiminogo ive.

Ámina soza monó ve nenémináa nenete kelegesá legemigo hokolizá iki miniaká niave. Itó lapanáiki niamoláa nene alivi letivi ikitiki miniaká niave. ¹¹ Lá niago ageló keza nene zamuza itó helisa haitolímíni alinatite Guivahanímíni agovisaló ámina soza monó liaká ve nene lihímáinimú lotuva ligiki alivi letivi iki ikitisá amamóza, ¹² soza monó liaká ve nenémináa nene kigika kataga nomimó gaha nama kipiliki nia netakitana mina vegená keza netá matalímíni mogonáa gili hee liki gilinamake ámina netakumú gopa napa gako golesa liaká niave. Nenemú gaha nama tolova iaká niatímíni tolova inigave. ¹³ Lá iiki netá golesa galasa aliki miniaká niamómámíni meinaváa aliki miluma gilinigave. Keza límugusigú negopa ho napa lató nene kugupémo amu heleaká noi netá golesa amuza miliki aliaká niamó nenémo kogolizanzini loló o kemeaká noive. Holutikú musi netá itó golutuva netá líli iki niago lokovoza utó oaká noive. Nosánetató nene lekezagi niki minake ali gopa napa iki gasova vegenalitini suni aliaká niakumú kogoliza viziaká niave. ¹⁴ Kogómulatunú mokoló netá kogómula ániogaká itó netá golesa lugáa nekumú lagaváa sipisi ali miniaká nia ve keza monokú alévolé ama vegená kimimika nilake itó moni henokanoní nenéminimú amuza mililiki nivago kigikáini loló oaká noive. Ve nenémináate meinímíni mututoni líli niave. ¹⁵ * Keza gapo hee lo minamó nene kemegesa amiake olíi hiziki Posoleni gipala Palámo vi gapoló ámegetiki nivave. Palámo golesa netalímíni meinaváa alinogo mumuzó imóza, ¹⁶ Guivahanímó ámina lihínamú gahá amimó nene, toki iza gako lamoaká netalímo vegenalitini gako loake soza gako lole ale ve Palámíni negi netá lekesava amimó.

Ámina lili ali ve sozámíni mogonáini

¹⁷ Soza monó liaká ve nenémináate nagamí utamó nenéminiki minake itó hepélímo límusi huhu lokago, voko aleko oko aleko oko voaká noimó nenémini iki niave. Kegepagutí gako linamó nenémini gihila utó osá amive. Ve nenémináa keza límugusi lapalapavagú anititave

* 2:5: Apí 6:1–7:24 * 2:6: Apí 19:24 * 2:7: Apí 19:1–16 * 2:15: Nam 22:4–35

loko loketamó neve. ¹⁸ Kezáinimú gelego iteaká noi gakó ha gakó liake nene, monó giliake litaha gapo izoha nahula vejená nene kogoka viziaká niave. Lá niake mokoló netatunú kogokagú milikago, anitikago, litaha kigikámo amu heleaká noi netá aliake vejená makó keí gelehusigú apilitave liki lá iaká niave. ¹⁹ Lukugupémo amu hili netá hanuva alinigave liki li mililikimiaká niamóza, kezáini kigikáini anuva onoitímini nagakú niake némika liaká niave. Nenémini mogonamú láa loko gelenouve: Ve makolite netá makolímini gelekeleváa minatamó keza ámina netalímini nagalagú vi hiliki minanigave. ²⁰ Gilinahe. Ve makó keza Guivahanite lugutó vizeaká ve Izesu Kilistoni mogona nene lamaná iki gilikakeve liki monóini nomi vejenalítini golotuva netáini kemegeza aminitakutí ámina netalímo goha kovogisaloka okoko agulizakí ve goha loló okemekiko ámina netató gímizi lamaná itamó nene, gozapá miniki aliki amó nenémo komáisi golesa imóza, alika miniki aliki itamó nenémo golesa o lamaná inogo ive. ²¹ Ve nenémináa keza hee loko voaká gapo lamaná nene ángi lamaná amalina, golesa itigí i minaline. Itó gapo lamanató vikatitegi itó apazá gakoláa li kimikago gelemómategi goha atiginá iki gozapá litaha gapoló vitamó nene golesa o lamaná inogo ive. ²²* Ve nenémináa keitoka anoza gakó láa liki liaká niamó nene alévolé okago niave:

Gala eza nosáneta noake itó musi veleake ámináa nene goha noaká noive. Itó iza eza nagamikú akoake goha goihá holoaká noive.

3

Guivahani atiginá iti gakó

¹ Nigika lukumu vejenáise, luhuva netá goha imane gizo lukumugo losi noive. Ámina luhuva lositakú nene neza ale gosohá oko lo lekemekinake mulutini alémo otekugo giliakatiní nene lamanalíminigó minative loko gizokumó nene ²lekeza Ómasímini agepagutí gakó liaká a ve apazá minamó nenete gozapá alika utó iti netakumú lina gakó itó lekeli aposolo vejená leza Guivahanímo lo mola gakola lo lukumuhá nene gili minatave loko gizo lukumumóma neve. ³* Ganatilisi imane gili zagiki gililo. Alika gamenama alitokiko, vejená golesa utó iiki kugupémo amu heleaká noi netató ali gikitiki aliki miniki gakotini alivi letivi iki lilikitiki ⁴láa liki linigave: Guivahani atiginá itove loko lo mola gakolímini gihiláa hí neve. Gozapá avotege ámina gakó gililiki viki minake helemó. Lá okago netá matá mukí mikasi utó i gamenaló emane ámina netá minoloko iteko hanuva nemóma neve. Itó ámina okogó itína nominave liki linigave. ⁵* Keza vejená lá iki giliake gakó makó lá oko nemó nene gopa gili ámiagiaká niave: Ómasímini gakotó okulumá gozapá utó imó, itó mikasi ámina oko nagamikutí utó oake nagamilagi minamó neve. ⁶* Itó alika ámina nagamilímogó vejená itó netá matá mukí kelémo sumizá noake gepele gesá imó neve. ⁷ Itó okulumaki mikasigi ha niasimó nene ámina gakotó Ómasímo kelémo gikitokago lolímini mututonáa líli iki niasive. Vejená golesa lihímáinimú goní oketati gamena utó okiko, latila itáikumú ageva iki niasimole.

⁸* Nigika lukumu vejenáise, netá makó imanegi gili gopa napa amilo. Guivahani eza gamena hamokumú giligo melekeni 1000-igitana loló oaká noive. Itó melekeni 1000 nenemú giligo gamena hamokitana loló oaká noive. ⁹ Guivahani eza gakó lo mololetamó nenémini gihiláa utó itive loko ligitagani oko gamena molo hána osá amive. Vejená lugáate gilikago lá oaká noimóza, lá oko nomive. Eza ve lugáama latila itave loko gelesá amike vejená mukitoka kigika ali viligatave loko geleake lekelikumule loko geha zeko ageva oko minoaká noive.

¹⁰* Guivahanímini gamena nene guminaló ve nenéminoko galinali utó inogo ive. Utó okiko okulumá eza anó sipisi moloko voko tolova inogo ive. Itó okulumató nego ángikoko moloko oaká nouni netá mukitoka nene lolímo loko haha inogo ive. Lá noiko mikasigi itó mikasímini amupiló netá matá mukí nene lolímo lo asú inogo ive.

Lo asú oko lo kimi gakó

¹¹ Netá matá mukí nene nenéminoko haha o asú ititó nenazo, nenemú lekeza etó iki keké vizi miniki monokú alévolé iki miniki ali minalo. ¹² Lá niiki Ómasímini gamena napa atikumú lakagata losi gelemiki ageva iki govisi aliki letiki minalo. Ámina gamena alitokiko okulumá nene lolímo loko haha inogo ive. Itó okulumató nego ángikoko moloko nouhá netá mukí nene ló gulumagú holokiko loko gili gili molokiko asú inogo ive. ¹³* Lá onoimóza, lélisi nene okulumá gosohá itó mikasi gosohá ale utó moloko lehizeletatove loko

* 2:22: Ano 26:11 * 3:3: Zut 18 * 3:5: Apí 1:6-9 * 3:6: Apí 7:11 * 3:8: Age 90:4 * 3:10: Mat 24:43; Luk 12:39; 1 Tes 5:2; Ali 16:15 * 3:13: Isa 65:17, 66:22; Ali 21:1

lo mololetakumú agev́aa nune. Itó nenegú vegenalite mini hee liki miniaká nenémo gikí o lamaná oko minanogo ive.

¹⁴ Nigika lukumu vegenáise, lekeza netá nenémináamú ageva iki miniaká nianazo, aí agovisaló likigika geha zimó gizopa lo miniko lihimate nomimó minatune liki amuza milalo. ¹⁵ Lá niiki Guivahanitémo gamena molo hána okikoma láa liki litaze: Lelémo lugutó viziti gamena neve. Ligiveteho ligika ameká nuni ve Pauló eza Ómasilokatí geleakalagi minatímove loko lo lukumu netakumú luhuva gizo likimimóma neve. ¹⁶ Eza muki luhuva netá gizoaká noikú nene ámina netakumú gakó lo lekemeloko voko noimóma neve. Itó aí luhuva netalagú gakó lugáámini mognáa genavagi nego ve negi itó keé lamamó keza ali gopánapa iaká niamó nene aí luhuva netakó nomive. Monó gotola gakó lugáa mukitoka nene ali gopánapa iki kezáini vi tolova iaká gapoló nivake lá iaká niave.

¹⁷ Nigika lukumu vegenáise gakó imane lakagata aleko lo lekemekugo gilinamóma n-naze, vegená golesa kei gopánapa gakóini likigikagú lemekiko, likilimi gopa ikiko monokutí limiki akikataze, gizapa iki minalo. ¹⁸ Lá niiki Guivahani lugutó vizeaká vele Izesu Kilstoni nasahili itó aí mognatagana gili kolosiki gili hee liliki viki minalo. Aí lapaná itínasa utó o lamaná okoko ámina oko minoloko voko mino lúaló moloko minino. Lamaná.

Zonini Luhuva Nampa 1

Alévolé oko minoakalímíni agepagú gakotó mina ve

¹* Mukí netá apí oko utó ikutí ká emane minoloko voko minamó itó lagatatunú gulunimó itó logómulatunú ángunimó itó logómulatunú ángo gisili hízeko ángunike ligizanitunú ale geleko ángunimó nene minova minova oko minoakalímíni agepagú gakotó mina vemú luhuva imane gizo nolukumuve. ²* Minoaká gihila utó o lamaná okago ángunitita alévolé oko minoloko voko minoakalímíni gakola nene lo utó moloko lo lekemeaká nounge. Alévolé oko minoloko voko minoaká ve nene amelahitoka minoloko voko minake alika lelitoka utó imó. ³ Nenemú netá matá ángoko geleko unimóma ámina oko lo lekemeaká nounimó nene lekeza gilíkiko ligika molo hamó oko lamaná oko apizeko minatune loko nenemú loaká nounge. Itó ligika molo hamó oko lamaná oko apizeko nominuhá nene ametehitoka itó gipala Izesu Kilistotoka neve. ⁴ Nenéminoko utó okiko, mulutegú ágila guluma o asú itive loko luhuva netá imane gizo nolukumuve.

Ómasímíni lapanakú minoko aleko ituni gakó

⁵ Gakoláa nene Izesutokatí lá oko gelekuhámave loko lo lekemeaká nounge: Ómasiloka límugusi makó ma nomive. Lapaná loake molo minamó neve. ⁶ Leza límugusigú minoko aleko inake Ómasigi ligika molo hamó oko lamaná oko apizekune loko litunimó nene sozagi linogo une. Itó netá gihiláa nene ma ale minamitune. ⁷ Ezáa nene lapanakú noive. Ámina oko leza nene lapanakú minoko aleko itunimó nene ligika molo hamó oko vatí oko apizeko minanogo une, itó gipala Izesu Kilistoni golanímó lihima netate monéna nagamí zekiko ligika guluvitanogo ive. ⁸ Leza golesa netate nomive loko litunimó nene ligikate agoka vizinogo une. Itó gakó gihila gotoláa nene ligikagú ma minaminogo ive. ⁹ Itó golesa netate lo utó molatunimó nene, Ómasímó lo mololeta netá amegesaló moloaká ve netá hee lokogó aleaká noi ve noinazo, golesa netate nagamí zeko lihímavate ale ahulo asú inogo ive. ¹⁰ Golesa netá aliaká niave loko lolimiaká noinazo, leza golesa netá alesá amune loko litunimó nene Ómasímú nene sozaló veve loko lotunimó gilinogo ive. Itó aí gakoláa nene ligikagú minaminogo ive.

2

Golesa netatemú goní nouko lelitoka alemo moloaká ve Izesú

¹ Izegipánemata, netá golesa alikatave loko gakó imane gizo nolukumumóza, makó keza netá golesa alitamó nene, ametehitoka golesa netatemú goní nouko Izesu Kilistó eza hee loko mina vémo lelitoka alemo moloaká ve noive loko lo nolukumuve. ² Áisi nene lihimate asú itive loko gapo veletamó nene lelikumukó negopa, numutó namató veená mukikumukive loko monéna veletamóma neve. ³ Ómasímó lo hukoko lo gakó nene gele alekuko, aikumú gele guni unitímíni mogonáa utó okiko, gilinogo une. ⁴ Itó lo huka gakoláa gili alemítamó nenete Ómasímú gele guni o nounge litamó nene sozaló veve loko loketatunize. Ve nenémináatíni mulúikú gakó gihiláa nomive loko litunize. ⁵ Itó helegaloka Ómasímíni gakó ámegetiki minatamó keza kigika Ómasi amikamómámíni gihiláa utó o asú okave. Lá okago nene, Ómasiloka gímizi lamaná iakalímíni mogonáa utó okiko, ángoko gilitunize. ⁶ Lá oko utó itikumú noluve: Makó keza Ómasiloka gímizeko nounge litamó keza Izesú oko moloko imó nenéminí avevezahaló minanigave.

Lo hukoko li gakó gosohá

⁷* Nigika lukumu veenáise, neza lo hukoaká gakó gosohá makó lo nolukumumó negopa, litaha mogonalokatí gili-likí vikí minamóma nene, gakó li likiminamóma nenéminí lo huka gakó litaha gohakú lo lakagata naluve. ⁸ Itó gakó luhuva nogizumó imane lo hukoko li gakó gosohá noimó nogilive. Itó límugusi mota tolova noigo, lapaná gihiláa nene utó o lamaná oko noinazo, ámina gosohá lo hukoko li gakó nene Izesutoka itó lekelitoka gakó gihiláa loló oaká noive. ⁹ Itó kigivéikini mukahá kipiliaká nita veená keza nene lapanakú nounge liki litamó nene, keza límugusigú niake nilave loko litune. ¹⁰ Itó kigivéikini kigika kimiiki nasahili ikitatamó keza nene lapanakú vatí iki minanigave. Lá niiko, golesa netakumú gala vizé vizé nenémo keitoka ma utó osá aminogo ive. ¹¹ Itó makolímóhe makolímóhe agivelahini mukahá apilitimó nene límugusigú minanogo ive. Itó límugusímíni

* 1:1: Zon 1:1 * 1:2: Zon 1:14 * 2:7: Zon 13:34

gapoló vinogo ive. Eza límugusímo agikámíni agómula likokamó nenazo, ligitagani okoko gapo nene áñigo hee loko ma áñigaminogo ive.

¹² Mohóne gipáne lekeza Izesuni agulizá alinakumú lihimatini ahulolikimikamóma nenazo, nenemú gako imane gizo nolukumuve. ¹³ Améikita lekeza minoloko voko minamó noi vemú gili guni iki gilikamóma nenazo, nenemú lekelí gakoálaa imane gizo nolukumuve. Itó gosohá ve lekeza golesa netalímíni amelahináa amuza mili miliki aviligikamóma nenazo, nenemú gako imane gizo nolukumuve. ¹⁴ Itó mohóne gipáne lekeza ametipini mogonamú gili guni iki gilikamole loko luhuva imane gizo nolukumuve. Améikita lekeza minoloko voko minamó noi vemú gili guni iki gilikamómave loko gakoálaa imane gizo nolukumuve. Gosohá ve lekeza amuzaváa milamole loko itó Ómasímíni gakoálaa likigikagú nengo golesa netalímíni amelahináa aviligikamole loko gakoálaa imane gizo nolukumuve.

¹⁵ Mikasiuka Ómasígi nomi suni itó mikasímíni amupiló netá matá utó netó mulutini milikiko lukumu helemino. Makó keza mulúini nene mikasímíni amupiló ne netató milikiko minatimó keza kigika nene améipini amisá amave. ¹⁶ Gilinahe. Mikasiuka netá matá mukí nene lugupémo mumuzó oaká noi netá itó logómúlamo áñigo laga oaká netá itó ligika lugupe aleko ite ite netá nene ametehtokatí nomive. Nene mikasiukatile. ¹⁷ Itó mikasi eza gumesisivagi minoko vo otolova inogo ive. Lá itimóza, Ómasímíni agikaló mini mlamató keza miniliki víki mini lúaló miliki minanigave.

Kilistoni gala vela napámíni gako

¹⁸ Mohóne gipáne, gamena nene mota alínipa o asú okave. Nenemú lekeza Kilistoni gala ve napa utó itive líki lína gako mota gilinahe. Itó itína gala veva mukí utó iake miniliki vinave. Nenemú nene gamenaváa mota alínipa o lamaná okave loko gelenoune. ¹⁹ Kilistoni gala ve keza utó amoláa nene lelitokatí ahullimiáke vikamoláa nene lelí ligive lagave gihila lílí iki minamamó neve. Keza ligive lagave gihila lílí minalina nene, ma ahullitamaline. Itó ahullimikamole loko keza ligive gihila lílí iki minatímíni mogona utó okave. ²⁰ Lá ikamóza, lekeza mukitó nene apazá amelaho Sikalahula hololeketamole líki gako gihila geleakalímíni lílí iki niave. Nenemú luhuva imane gizo nolukumuve. ²¹ Lekeza gako gihila gelemave lokogopa gako gihila giliaká niamómave loko, itó soza saza mukí nene gako gihilámíni agikagutí ma utó osá amimole loko luhuva imane gizo nolukumuve. ²² Soza sazalo veve nene éaginimú litune. Ve makolímóhe makolímóhe Izesú eza gologí oletative loko amisili ve nomive loko nolikoma, aikumú sozaló veve loko litune. Amelahiko gipalago áñigi ahulata vejenakumú nene Kilistoni gala vejenale loko litunize. ²³ Makó keza Ómasímíni gipala áñigi ahulatamó nene amelahinigi áñigi ahulanigave. Makó keza gipalamú ali miniki litamó keza nene amelahinigi lílí kamatoka milanigave. ²⁴ Lekeza mogonalokatí emane monó gakola gililiki iki minamó nene gili zagi minalo. Monó gakoálaa gili zagi minatamó nene amelahiko gipalago keitoka gímizi lamaná inigave. ²⁵ Izesú lehizeletatove loko lo mololeta netá nene alévolé lemetamenigi minoaká nene neve.

²⁶ Likigika ali gopánapa ilikitanigi nia vejenakumú gako láa loko luhuva nogizumóza, ²⁷ lekelikumú láa loko noluve: Sikalahú mololetamó nene mulutikú minoko aleko oaká noive. Nenemú ve makolímó sozagi lamanaki nanave loko ale gizaká oko lo likimitive. Nene ma nomive. Sikalahú hololeketamó áisi gako mukí lainim-oleketoko lo lekemeaká noive. Itó aí gakola nene sozagi ma nomive. Lamanakó nenazo, nenemú Sikalahulímó lo likimi gako nene gili aliiki Kilistotoka gímiziki minalo.

²⁸ Mohóne gipáne lekeza likigika avasavagi miniko miniki Kilistó eza anititi gamenaló utó noiko agómualaló lokovoza helemitive líki Kilistotoka gímiziki minalo. ²⁹ Ómasi eza hee loko noitímó noive líki gilinitamóma nene, netá ali hee liaká nia vejená mukitó keza Ómasilokatí utó amole líki gili zagitave.

3

Ómasímíni izegipala nominune

¹* Gilinahe. Ametehe nene mohóneve gipáneve loletamó nene agika haitolímínoko limike lá oletamóma neve, itó leza lamaná aí izegipala nominune. Itó monóini nomi vejená keza Ómasímíni mogona áñigi hee lisá amanazo, nenemú lelí mogona áñigi hee lisá amave. ² Nigika lukumu vejenáise, leza itínasa nene Ómasímíni mohola gipala nounize, itó minoko nana avevezahaló utó itunimó neve. Nenémíni mogona litá oko utó o lamaná amimóza, láa loko gelenoune. Guivahani utó iti zupahé nene ametamenía áñigo gisili hizeko áñigatune, nenemú lezagi aí ametamenigitana minanogo une. ³ Itó makó keza nenemú kagata losi

* 3:1: Zon 1:12

galemiki ageva iki minata veđená nene, Guivahani eza vové aveláa noinazo, ámináminoko minatune liki kigikáa álmi guluvitanigave.

⁴ Lihima netá aleaká nenémo Ómasímo lo mola gakó ahelú oaká netá nenazo, lihima netá aliaká nia veđená keza Ómasímo lo mola gakó nene avutá iaká niave. ⁵ * Itó lekeza Izesuni mogona giliaká niave. Eza lihimate ale olové inogo utó imó. Lá oake ezáaloka nene golesa netala ma minamímó neve. ⁶ Nenemú makó keza Izesuki apiziki miniaká nia veđenalite golesa netá aliki minaminigave. Itó makó keza golesa netá aliki miniaká niamó nenete Izesuni mogonáa ániği hehe lisá amave.

⁷ Mohóne gipánemata, makolímo oko lekelémo gopa itove loko nolikoma, gili amemilo. Makó keza netá ali hehe liki nalikoma, keikumú nene hee liki miniaká nia veđenale loko litunize. Itó Izesú nominatáminiki hehe liki minataze. ⁸ Makó keza lihima netá aliki minatamó nene Satani veđenala minatave. Satá eza lihima netá nene mogonalokatí aleloko voko minamó. Itó aleko minoaká noigo, Ómasímimi gipalámo Satani hozaváa nene apeleko ale ahulanogo omo anítimó neve. ⁹ Ómasilokatí utó amó nenete Ómasímimi ametameni ali minamó nenazo, keza lihima netá aliki minaminigave. Keza Ómasilokatí utó ikamole liki lihima netá aliki minaminigave. ¹⁰ Ómasímimi izegipala itó Satani izegipala keí mogonatagana lá oko nene utó iko ániğanogo une. Makó hehe liki minamítamó keza Ómasilokatí niave loko lamitunize. Itó makó keza kigikáini nene kigivéikini kememíkoma keikumú nene ámina oko litunize.

Ligika eza amiko eza amiko oko minatune

¹¹ * Monó gakó lekeza mogonalokatí gililiki iva iva niamó nene lá oko neve: Ligika eza amiko eza amiko oko minatunize. ¹² * Atani gipala Kaini ámegetamitunize. Eza golesa netalímimi amelahináámini gipala loló oake agunala apele hilimóma neve. Lá imó nene ezáa oko moloko imoláa golesa okagove loko, itó agunalámo oko moloko imoláa lamaná okagove loko apele hilimó neve.

¹³ Nigive nagavese, monóini nomi veđenalite alivi galativi nililikitikoma, giliiki gosohá suni neve liki lamílo. ¹⁴ * Ligika nene ligivetegini kemeaká nounimó nenazo, nenemú helenouhakutí atiginá oko voko alévolekú vo holokuháma neve loko geleaká nouné. Veđená makolite kigivéikini gigika kememitamó nene kigika hele vimó minikave. ¹⁵ Itó kigivéikini mukahá kipilita veđená nene kipili hiliaká ve kigikagi niave. Itó kipili hiliaká veđená nene alévolé ketematenigi iki minamave liki lekeza giliaká niave. ¹⁶ Izesú eza lelikumule loko minoko aleko imola nahulake agika limimómámini mogona ale utó molokago ániğokune. Nenemú leza ámina oko ligiveteginimule loko minoko aleko itunimoláa ahulatave loko loletonoimóma neve. ¹⁷ Ve makolímo iza goula nosá henokanonni minumunimó vaí oko minati vémo agivelaho makó nene netá makokumú vitagá noiko ániğooko ániğogoselé itimó nene, Ómasiloka agika ma molamive loko litunize. ¹⁸ Mohóne gipáne, leza ligika nokiminake nene gakatunukó itó legepatunukó nomive. Nasahilitunú itó legepatunú ligika kemesá neve.

Ómasímimi avogisálo ligika ale hamokó molatune

¹⁹ Lá okuko, gakó gihiláámini veđenala nunitímimi mogonáa utó okiko, ániğoko gilinoگو une. Itó ligikagú losi pasi noikoma Ómasímimi avogisálo ligikagú hulu iko minatunize. ²⁰ Netá golesamú goní ituni gakó ligikagú nekoma, láa loko litunize: Ómasi eza ligikámini avevezahaló nomive. Eza haitolímínoko minake, netá matá gele kolosoko geleaká noinazo, lihimatemú oko ahuloletaminogo ive. ²¹ Nigika lukumu veđenáise, netá golesamú goní ituni gakó ligikagú nomikoma, Ómasímimi avogisálo lehelele vizelemi vatí oko minanogo une. ²² Itó gokoláa gele alekunike oko moloko oaká nouni netá nene eza gele lamaná oaká noinaze, nenemú nene aitoka netá matakumú voká lokuko lemeaká noive. ²³ * Gokoláa lo hukoko li gakó láa loko neve: Gipala Izesu Kilistonni agulizaláa gele alévolé inake loletonoimómáminoko ligika eza amiko eza amiko oko minatune. ²⁴ Lo huka gokoláa gili alita veđená keza Ómasigi apizi lamaná iki niminiko, Ómasi eza mulúitú minoko aleko inogo ive. Itó Sikalahú lehizeletamó áisi lo lemekago, Ómasi eza mulutegú minoko aleko oaká noive loko geleaká nouné.

4

Gakó makó Ómasilokatí nehe nomihe gele hee litune

* 3:5: Zon 1:29 * 3:11: Zon 13:34 * 3:12: Apí 4:8 * 3:14: Zon 5:24 * 3:23: Zon 13:34, 15:12,17

¹ Nígika lukumu vegeñáise, Sikalahulímo lelémo vávani igo loaká nounge liki liaká nia vegeñalitiní gako nigiliki mukí nene Ómasilokatí neve liki gelemilo. Gako líli ali ve sozámíni mukí utó iake hutilí ikamó nenazo, gako makó nene Ómasilokatí nehe nomihe gele hehe litune liki míli gililo. ² Ómasímíni Sikalahulímo kelémo vávani okave liki lá iki áñigataze. Izesu Kilístó nene lelí lugupe ale luhoake utó imó neve liki li utó mílíki lita vegeñá nene Ómasilokatí niave loko gilitune. ³ Itó makó keza Izesunímú láa liki lamíkoma nene, Ómasilokatí niamave. Keza Kilístoni gala ve napámíni gakató nilave loko gilitune. Aikumú nene mikasiuka utó itive líki li likimíkago gilinamóma neve. Itó itína nene mota utó okave. ⁴ Mohóne gípáne, lekeza Ómasilokatí utó iake, monó gako líli ali veva sozámíni nene amuza mílíki kiviligikamóma neve. Lekelí mulutíkuka mínoaká noi véminí zámuzalámo mikasiuka noi ve golesámíni zámuzala nene avilegeneive. ⁵ Monó líli ali ve sozámíni keza mikasímíni amupiló netakumukó liaká nianazo, monóini nomi vegeñalite gakoíni nene ali kagatagú mílíki niave. ⁶ Leza nene Ómasilokatí utó unímó nenazo, Ómasímíni mogona áñigi hee líki áñiga vegeñalite gakote giliaká niave. Ómasilokatí utó amamó nenete gakote gili ahuliaká niave. Gako gihílámíni mogona itó ale gopa oaká gakoíminí mogona lá oko utó noigo áñigo guni oaká nounge.

Ómasímíni mogona nene agika lemeakalímíni neve.

⁷ Nígika lukumu vegeñáise, lígika kemeaká suni nene Ómasilokatí nenazo, nenemú leza lígika eza amiko eza amiko oko minatunize. Makó keza kigivéikíni nene kígika kímkí nasahilí ikítatamó nene Ómasilokatí utó a vegeñá niave. Itó Ómasímíni mogona gili hee linave. ⁸ Ómasímíni mogona nene agika lemeakalímíni nenazo, makó keza vegeñá makó kígikatanú nasahilí ikítamítamó nene, Ómasímíni mogona áñigi hee lamave loko litune. ⁹ Ómasímíni gipala hamó nene alévolé oko mínoaká netá nene aítotí alítune loko mikasiuka amiselekago límítimo agika límímómámíni mogona lelitoka utó o lamaná okave. ¹⁰ Lígika kemeakalímíni mogonáa lá oko neve: Leza Ómasi lígika amehá negopa, áisi nene agika límíke gipala amiselekago límíke lihímate asú iti gapo veleletamó. ¹¹ Nígika lukumu vegeñáise, Ómasi eza haitolímínoko agika lemekamó nenazo, nenemú leza ámína oko lígika eza amiko eza amiko oko minatune. ¹²* Vegeñalita Ómasi áñigoaká nene ma áñigonamunímóza, lígika eza amiko eza amiko oaká nenegú oko moloko itunímó nene Ómasímo mulutegú mínoko aleko noítímíni mogonáa ale utó inogo ive. Itó agika lemeaká noímó nenémo vihelé loko minanogo ive.

¹³ Áisi lelí lelémo amakuka moloaká noive. Itó lelí mulutegú mínoko aleko oaká noive. Nenémíni mogona nene Sikalahula lehizeletamole loko gelenounge. ¹⁴ Ametehe numutó namató vegeñá lugutó vizítive loko gipala amiselekago límímó nene leza logómula gihílatunú áñigokunímóma neve. Itó nenemú gako ímane lo utó moloaká nounge. ¹⁵ Itó Izesú eza lamaná Ómasímíni gipala noive líki lita vegeñá keza Ómasiloka gímíziki minanigave, itó Ómasímo ámína oko mulúikú mínoko aleko inogo ive. ¹⁶ Ómasímo agika lemeaká noímó nene áñigoko gelenounge. Itó gele seketígí oko gelekune.

Ómasímíni mogona nene agika lemeakalímíni neve. Itó vegeñá makó kígika kímlíkí víki míniki alíkí ita vegeñá keza Ómasiloka gímíziki minanigave. Itó Ómasímo mulúikú mínoko aleko inogo ive. ¹⁷ Nenémínoko lígika kemeaká nouni netá nene vihelé loko minanogo ive. Lá okiko Izesú eza mikasiuka ímane mínoko aleko oaká ímómámínoko leza mínoaká nounímó nenazo, nenemú gamena napaló mulutegú hukilí amiko ote hee loko minatune. ¹⁸ Lelegesá itó lígika kemeaká keza apíziki mínísá amasive. Lígika kemeaká netá gihílámo nene lelegesá legeaká netá ahelú inogo ive. Netá makokumú lelegesá lígítímó nene ámína netalímó míluma gilituni netá lumupiló molatíhe loko lelegesá legeaká noive. Nenemú makó keza kelegesá lígítí vegeñatoka kígika kemeaká netalímó vihelé loko minamive loko litune. ¹⁹ Ómasímo ganá agika límímóma nenazo, nenemú lígika kemeaká nounge. ²⁰ Ómasi lígika ameahá nounge líki kigivéikíni mukahá kípilíta vegeñakumú nene sozaló veve loko litune. Mota gílináhe. Lígívetegíní logómulatunú áñigoaká vegeñá lígika kememítunímó nene, Ómasi áñigamoaká ve lígika amesá nomive. ²¹ Izesú láa loko lo hukoleta gako geleaká nounge: Ómasi kígika amiahá nia vegeñalite ámína iki kigivéikíni nene kígika kemeakalímíni genaváa keítoka neve.

5

Mikasiuka netá apelekuko límítí mogona

* 4:12: Zon 1:18

¹ Izesukumú nene gologí oletative loko lo mololeta veve liki gili seketigí itamó keza Ómasilokatí utó a vejená niave. Itó makó keza améipini nene kigika amitamó nene agapilamolagí kigika kimiaká niave. ² Leza Ómasi ligika ameko lo hukoleta gakó gele aleaká nounitímo Ómasímíni mohola gipala ligika kemeaká noupe loko nenémíni mogona lo utó moloaká noive. ^{3*} Ómasi ligika ameakalímíni mogona nene lo huka gakó mukí gele aleakakú neve. Ómasímo lo huka gakó ámegetoaká nene genavagi nomive. ⁴ Ómasilokatí utó unimó mukitoka leza mikasi amupiló netá golesa lisomikuko lemeaká noive. Mikasi amupiló netá golesa lisomikuko lemeaká noitímíni zámúza nene agulizaláa gele alévolé oakate nene neve. ⁵ Éage amuza miliki mikasímíni amupiló netá golesa mukí lisimikiko limitive. Izesunimú Ómasímíni gipala noive liki gili seketigí iki gilita vejenalitegó nenémíni inigave.

Ómasímo gipalámíni gakola hize lé ota gakó

⁶ Izesu Kilistó áisi nene nagamílagi golanígi utó imole. Nagamílagigó nomive. Utó imó nene monó nagamí holamoki golani lekike hilimoki neve. ⁷ Sikalahú eza gakó gihiláámíni amelaho noinazo, Sikalahulímó nene ámína mogonamú lokago, gihila zeaká noive. ⁸ Nenemú Sikalahú ezáa itó monó nagamí holamó nenémó itó golani lekike hilimó nenémó Izesuni mogona hizi lé itake hoza aliaká niave. Sikalahú itó nagamíla itó golaniva keza losive makole niatite Izesú nene Ómasímíni gipala noive liki hamó gakó liaká niave. ⁹ Goní ikitató nene vejenalita oko moloko imole liki litamó itó oko moloko amimole liki litamó nene gele seketigí itune. Lá onoinómóza, Ómasímo lí gakó nenémó avilegeko alévolé oko noive. Ómasi eza gipalámíni gakola hize lé otamó nene láa loko neve: ¹⁰ Ómasímíni gipalamú gili alévolé ita vejená keza kigikatunú gelego alévolé oaká noive. Itó Ómasímíni gakó gili alévolé amíta vejená keza Ómasímo gipalamú lí gakó gilikago hutuvagó loló onoinómó nenazo, nenemú vejená nenémínáate Ómasimú sozaló veve nilamó geleneive. ^{11*} Itó gipalámíni mogona hize lé oko gakó limó nene láa loko neve: Ómasi eza alévolé lemetameki minoaká netá ale utó molo limimó, itó alévolé oko minoakalímíni mogonáa nene gipalaló neve. ¹² Ómasímíni gipala ali gikitiki minata vejená keza alévolé kemetameni alikamó neve. Itó Ómasímíni gipalaló gímizema vejená keza alévolé oko minoaká nene alemave.

Alévolé lemetameki minoaká gakó

¹³ Ómasímíni gipalamú gili alévolé inamó lekeza alévolé lekemetameki minoaká nene mota alenoune liki gili seketigí iki gilitave loko luhuva imane gizo nolukumuve. ¹⁴ Leza láa loko Ómasímíni avogísaló gele olopá onoune: Ómasiloka netá makokumú voká lokuko nene ezáa gilitó molató noikoma gele liminogo ive. ¹⁵ Itó netá nemupe manamupe voká lokuko gele liminogo ive loko gele seketigí onounimó nenazo, netá makokumú voká lotatunimó nene litá oko ale ligizakú itune loko gelenoune.

¹⁶ Ve makó eza agivelaho makolímó golesa netá alekikoma ánikokoko lolímíni mututonáa loló oakalímíni nomíkoma, ánikokoko nene aikumú Ómasiloka lotino. Lokíkoma, Ómasímo alévolé gapoló alémo molatize. Itó golesa netalímíni nagaláa nene lolímíni alévolé nagala alemítimolamú noluve. Golesa netá makolímíni nagá nene lolímíni nagaláa nene neve. Nenémínámú numuna hoza alitave loko lamuve. ¹⁷ Netá golesa mukitoka nene lihima aleakalímíni nemóza, golesa netá lugáa nene lolímíni nagaláa alévolelagú lelémó molatitímíni nomive.

¹⁸ Leza láa loko geleaká noune: Ómasilokatí utó atite nene golesa netá aliki minaminigave. Ómasímíni gipalámó gizapa okimíkiko golesa netalímíni amelaho kugupeló ma ale geleminogo ive. ¹⁹ Leza Ómasilokatí utó unimó neve loko, itó monóini nomí vejená mukitoka keza golesa netalímíni amelahini sepenauka akiaká niave loko gelenoune. ²⁰ Itó láa lokogi gelenoune: Ómasímíni gipala eza mikasiuka lemeake gele guni oakate ale utó olimikamó nenazo, Ómasi gihilámíni mogona gele guni oko geleaká noune, itó Ómasi gihilaloka gímizekunimó nene gipala Izesu Kilistoni sepenauka minoko aleko oaká noune. Áisi nene Ómasi gihila itó alévolé oko minoakalímíni amelahóa noive. ²¹ Mohóne gipáne lekeza soza saza ómai netakumú gizapa i guni iki minalo.

* 5:3: Zon 14:15 * 5:11: Zon 3:36

Zonini Luhuva Nampa 2

Nónohá kimike gizo kimi gakó

¹ Monokú olotiva ve neza Guivahanímo alémo etó i venaki izegipalagitana mina vejená nene luhuva netá imane gizo nolukumuve. Neza nigika lekemeaká nouke gizo nolukumuve. Itó nénisigó nomive. Gakó gihiláa giliki kigikagú miliaká nia vejená mukitó kigika likimiaká niamó nene ² monó nene ligikagú noigove loko itó lezagi alévolé oko minoloko voko minatikumule loko ligika lekemeaká nune. ³ Ómasi ameteho itó amelahini gipala Izesu Kilistó eza nasahilí oletoko agika molo lemeko hulu ale utó oletoko noiko, gakó gihilámíni itó ligika kemeakalímíni agikagú minoloko voko mino lúaló moloko minatune.

Kilistó lo limi monó ale gikitatune

⁴ Mohó izegipaka lugáa keza ameteho lo hukoko li gakó lo limimó nene gili aliake gakó gihiláa ali miniaká niamó nenémíni mogona gelekuke mulúnegú lamaná geleaká nouve. ^{5*} Itó imane vená geza Guivahanímo lo hukoko li gakó makó lo gemekugo gelezo. Gakó gosohá ma nomive. Lítahama mogonalokatí emane geleloko ova ova oko nominuhá gakó nene láa loko lo gimitoze: Ligika eza amiko eza amiko oko minatune. ⁶ Ómasímo lo huka gakó gele aleaká nenémo ligika kemeaká netá loló onoive. Ómasímo lo hukoko li gakó mogonalokatí gililíki iva iva iki nímínamó nene likigika kimilíki víki minatave loko neve.

⁷ Gilinahe. Haitó monó alítave líki logoka víziaká ve mukí utó iake numutó namató hutilí ikave. Keza Izesu Kilistonímú nene mikasi lugupegi utó imóma neve loko loaká nouhá gakó nene zivi hitívi iaká niave. Ve nenémínáa nene logoka víziaká ve itó Kilistoní gala veva nene niave. ⁸ Monolímíni hozava alínamómámíni gihiláa nene gopa olíkímitatize, gizapa iki minalo. Lá níiki míníki meinava vatí iki alítaze. ⁹ Kilistoní monó lo limimó nene ali gikitamíki aviligiki gakó makó líiki ali gopa ita vejená keza Ómasi ali kamatoka aminígave. Makó keza láa lamíki Kilistoní gakó lamaná ali minatamó nenete ametehove itó gipalave ali kamatoka inígave. ¹⁰ Ve makolímóhe makolímóhe Kilistó lo limi gakó ale minamítímó nenémo lekelítoka gakó lainim-oleketatove nolíkoma, numutíkú alími milamílo. Itó alími lakamatoka milamílo. ¹¹ Ve makolímó vejená nenémínáa kelémo geha zítímó nene hoza golesa aliaká niatoka kelémo vatí noive.

Gekéini loketa gakó

¹² Gakó lugáa mukí nemóza, luhuva gizoaká nagamítunú luhuva netakú gizo líkímitove loko gelemuve. Neza lekelítoka litá oko vokugo, legepatunú logelegele oko gelekinake mulutegú agíla guluma napa itive loko gelekuve. ¹³ Geza mohó gugunaka Ómasímo alémo etó imó aí izegipala zuhagi geketini nilílikítage noluve.

* 1:5: Zon 13:34, 15:12,17

Zonini Luhuva Nampa 3

Gaioni nónohá amike gizo ami gakó

¹* Monokú olotiva ve neza nigivénega gihila Gaioga geí luhuva netá imane gizo nogumuve. Neza geikumú lamaná geleaká nouve. ² Nigivénega, gigika nene monokú vatí oko nego gelekuke, ámina oko gugupeloka miluma gelemoko némini manámini netá geitoka zeloko amiko vatí oko minatane loko Ómasiloka loaká nouve. ³ Geza gakó gihilámini gapolokó voaká noane. Nenemú ligive lugáa keza ake gakó gihiláa ale gikitoaká anikumú li nimikago gelekuke mulúnegú lamaná geleaká nouve. ⁴ Monokú kelémo molokugo mohó izegipáne lili ina vegealite gakó gihilámini gapoló viaká nia gakó gelekuke mulúnegú lamaná geleaká noumó nene haitolímínoko netá makolímó ma avilegeminogo ive.

Gaió nasahilí oketakumú agepoka limó

⁵ Nigivénega, geza ligivetegini kelémo lamaná oaká noanimó nene alitokatí negopa, hotokatí nenegi kelémo vatí oaká animó nene vatí oko loló noanize. ⁶ Imaneló Izesuni vegejala zuhatini kovogisaló nene gigika kemeko nasahilí okimiaká anikumú avetó iaká niave. Izesuni vegeená makó geitoka nivikoma, geza Ómasímini gakó lili ali iaká niakumú nasahilí oketoko kimisele molokako vitamó nenémo lamaná inogo ive. ⁷ Keza Guivahanímini agulizalamule liki mikasinini ahuliake monóini nomi vegeatatokatí moni henokanoni makó alisá amake, monó hozaló vinamó neve. ⁸ Leza ve nenémináa nasahilí o kemeko hize lé okimikuko, monó hozámíni hamó hozaló ve loló okuko gakó gihiláa hutilí itive loko letoinoimóma neve.

Tiotelepeko Temetelioko keí gakó

⁹ Neza monó gakó lili ali iaká nia vetini mogonáinimú nene Guivahanímini vegejala zuhaloka luhuva alínipa makó gizumóza, Tiotelepé eza ve uvóipina minatove loko loaká noi vémo gakóne nene gele ahuloaká nouve. ¹⁰ Nenemú neza vinake oko moloko noitítímini mogonáa ale utó molanogo uve. Eza lelikumú soza like alevo letovo oaká nouve. Itó nenegó nomive. Monó vegeená nivago eza kelémo amatoka molamike, vegeená lugáate nasahilí ikitanigi niago, gahá kemeake monó lili ali vegeenáma nene monó numúini hize lí okimiake kimisele ahuloaká nouve.

¹¹ Nigivénega gihila, vegealite golesa netá lilí níkoma áminaló kémegetamo. Netá lamaná lilí níkoma kémegetatanize. Netá lamaná aliliki vita vegeená nene Ómasilokatí utó a vegeená niave. Golesa netá aliliki vitamoláa nene Ómasímini mogona ánihi hee liki ániigama vegeená niave. ¹² Vegeená mukilite Temetelioni mogonamú nene lamanale likago gelekune. Itó monokú aí mogonáa mota utó onoimóma neve. Neza ámina oko ve lamaná nouve loko hize lé omiaká nouve. Itó aikumú soza gakó losá amumó nene mota gelenane.

Vegeená gekéini loketamó

¹³ Gakó lugáa mukí nemóza, luhuva gizoaká nagamitunú luhuva gizatove loko gelemuve. ¹⁴ Neza geitoka mota vitove loko gele minuve. Vo anitekugo legepatunú logele hagele oko gilitíize.

¹⁵ Ómasímini hulu nene geitoka míno moloko minino. Gigive gagave keza gekeka niligitave. Geza ámina oko ligive lagavetini gekéini noloketu gakó lo kemezo.

* 1:1: Apo 19:29; Lom 16:23; 1 Koli 1:14

Zutani Luhuva

Nónohá kimike gizo kimi gakó

¹* Neza Zutana Izesu Kilistoni gelegeleléa itó Zelusalega monó gizapa ve napa Zemusini agunala noutímína Ómasi ametöhe monokú sele lo lekemekeo agika lekemeaká noikú lekelémo moloko Izesu Kilistoni gizapaló lekelémo mola vejená lekeli luhuva imane gizo nolukumuve. ²Ómasímo agika hize lekemeaká itó hulu itó agika lekemeaká nene ale hutilí oleketo-loko voko mínino.

Soza monó liaká a vetini mogoánimú lo kimimó

³Nígika lukumu vejenáise, neza lugutó vizeaká nene mukí vejenalita izá moloko aleaká nouni netakumú luhuva gizo likimitove loko amuza mulumóza, monó gele vejená gele alévolé oakalímíni gakola Ómasímo lemeneimóma nene gopa okative loko lekeza mukitoka amuza miliki hozaváa alévolé iki nalíkí lova sava itakumú gala vizeko luhuva gizo likimito gamenaváne alitokave. ⁴Nenemú lo likimitoze, gililo. Ve lugáa monóini nomimó keza holutikú asuguná iki itíkí niake Ómasi nene nasahililagi ve noikeve loko gumesisi mokoló hoza aleaká nouhakumú goní oletaminogo ive líkí lí gopa niake hamokó gizapa vele Guivahanite Izesu Kilistoni nene zivi hitivi imiaká niave. Keza nene vi tolova imi tolova atímíni mogoáníni gozapá nene monó gotolaú luhuva gizinamóma neve.

⁵* Ómasímo lihímáinígí vejená makó nene gozapá goní oketa gakó nene lekeza gili asú inamóza, áminama ale gosohá oko noluve. Isilae vejená mulusi Izipi mikasigutí gologí okimiaké, alika aikumú gili alévolé ama vejená ahulokimikago, lapuluva amóma neve. ⁶Itó ageló makó keza gizapa hozanini ahuliaké numuni apáini ahuliaké, keza gamena napaló lihímáini alita gamenámíni ageváa iki minanígí alévolé sení nagá nenémo ale gikitoake límugusitunú asapú oketamó neve. ⁷* Itó Soto itó Gomola itó apá luga luga minoloko vitó mina vejená keza áminámíníki gopa iki gumesisi mokoló netá itó musi netá itó utó mílikago, ló sipisi alévolé oko minoakalímínígí ahulokimikago miníki niave. Nene ánígokuko lelegesá ligitíve loko némíni oketamó nenazo, nenemú lakagatí molamino.

⁸Itó soza monó liaká nia ve keza ámina iki vamó ánígunimole líkí kugupetunú musi netá aliaká niave. Lá niaké kugulizakí ve alívi galatívi iki lapanáiki ve ageló nene alí mumusopa ziaká niave. ⁹* Agelolitíni ve uvóipo Maikolí nene soza monó liaká vejitana minamíve. Eza Moseni gonosiváamú éaho alítíhe líkí Sataki gakotunú lova ikasíke pelesa alesá zesíke, Sataní gakó golesa lotanogo gilímó nene gena okago, Guivahanímo gahá gímínogo ive lokogó lo amímóza, ¹⁰soza monó liaká ve imane keza gili guni ama netakumú alívi letívi iki miníki niave. Iza galagítana lílí iaké kugupémo amu heleaká noi netakumú hanuva kígíkatunú gíliaké, gíli guni ina netalímó kelémo golesa okago lapuluva iaká niave. ¹¹* Agae, keza miníki nana ítamó neve. Keza Kái vi gapogú viaká niave. Itó moní henokanonímú lagaváa alí miníki soza monó loaká ve Palámíni gapogú viaká niave. Itó Kolá eza Ómasímo kelémo etó i gizapa vemú pelevésava zekamole loko lapuluva imómámíníki hokolízá iiki lapuluva íngave. ¹²Lekeza monokumule líkí alí nupa iki nosáneta nínató nene ve nenémínáa keza iza nosánetakumú ahuu ahuu líkí gihúme kovoza helemímó kezánímukó alí napa napa iki niave. Monóini nomí vejená keza nene gó zíhe zíhe líkí límusi nene hanuva hepélímo se ahulokago voko golíní zemoko haha oaká noimó, itó za makolímó nugunugu loko ítekoko gíhíla zeaká gamenaló nene gíhíla zesá amímó nenémíníki niave. Ve nenémínáa híli vamó keza asuto ahuloakató niave. ¹³Age nagamí amuzavagí valahuká zeko gítuhú galakalá golotuvagí utó oaká noíve. Soza monó liaká ve nenévínáatíní golesa netó gítuhú avozavagí nenémíni oko utó oaká noíve. Sonohí lugáa keza atohímí ziaká niamó netete gapo lelepízemínigave. Soza monó liaká ve sonohí nenémíni iki nia ve nene límugusi lapalapava alévoleléa nene Ómasímo ale vavá oketonóimóma neve.

¹⁴* Atatokatí utó ilíkí va vejená 5 utó ikago, alíka ve nampa 7 Enokú utó imó. Áisi nene ámina soza monó liaká ve utó itakumú láa loko límó: Gililo. Guivahanímo apazá ageló vejenala mulusi napa tausen mukí kelémoko anogo ive. ¹⁵Lá okoko vejená mukítoka mogoáníni lo utó moloko hokolízató vejená monóini nomimóláa keí hokolízáínímíni mogoána apasoko lihímváa kímínogo ive. Itó hokolízató ve monóini nomimó keza Ómasímú alívi letívi iki gakó golesa litamómámíni lihímváa kímínogo ive loko límó neve.

* 1:1: Mat 13:55; Mak 6:3 * 1:5: Gá 12:51; Nam 14:29-30 * 1:7: Apí 19:1-24 * 1:9: Tan 10:13,21, 12:1; Alí 12:7; Gapo 34:6; Zak 3:2 * 1:11: Apí 4:3-8; Nam 22:1-35; Nam 16:1-35 * 1:14: Apí 5:18,21-24

¹⁶ Ve nenémináa keza géneka háneka lake gínikaha gánakaha iki kugupémo amu heleaká noi netá aliki nenejú minake kezáinimú ali nupa napa iki nimina ve keza vejená lugáate netá matá limitave liki kegepoka liki gimínikú miliká aliká iaká niave.

Kagata alike gakó loketamó

¹⁷ Nigika lukumu vejenáise, lekeza gozapá Guivahanite Izesu Kilistoni aposolote li lekeme gakó giliki minalo. ¹⁸ * Keza nene gamena napa alitokiko, gumesisi mokoló hozáinimú amuza miliaká nia ve utó iiki monotínimú alivi letivi ilikitatave liki li kimiaká amóma neve. ¹⁹ Ve nenémináate hizi hóu liaká netá ali utó miliaká niave. Ómasímini Sikalahú mulúikú minamigo mikasigú mogonamú giliaká niave. ²⁰ Lá iki niamóza, nigika lukumu vejenáise, lekeza apazá monotini gihiláa nenémo likigika loló okiko alévolé iliki itiki minalo. Sikalahulímo lekelémo vávani noiko numuna liki minalo. ²¹ Lá niiki Guivahanite Izesu Kilistó eza geha ze lekemeko alévolé oko minoaká netá lehizeleketatikumú ageva iki niminiki Ómasímo agika lekemeaká noikú minalo. ²² Monó alitupe alemitupe liake, ligitagani ivamoláamú likigika hizi kimilo. ²³ Lokú hiliki haha inigi nia vejená kilími atiginá ilo. Itó vejená lugáamú likigika hizekiko kilími vatí ilo. Lá niiki keí golotuva mogonámo lekelitoka itekative liki lekehelele viziko gizapa iki minalo.

Ómasi agepoka limó

²⁴ Itó hize lé olikimikiko, akiki otiki amiki niko gonanalivagi lapanaló lihimavatini minamitimó niko lokogolizagi lekelémo molati ve ²⁵ Guivahanite Izesu Kilistoni hozatunú lugutó viziti ve Ómasi hamokó aitoka gonanalivagi lapaná itó alévolé zámuza itó gizapa oaká zámuza gozapá gamena nomitó ale minamó itó itínagi ámina oko aleneimó itó minoloko voko míno lúaló moloko minanogo ive. Lamaná.

Alika Utó Iti Netakumú Zonini Lo Ami Gakó

Izesú ale vesamá oko li gakó

¹ Imane nene Izesu Kilistó ale vesamá oko li gakó gamena hána vamiko netá matá utó itive loko Ómasímo lo mola gakó neve. Ómasímíni gelekelé vejenala zuha lo kimitive loko Izesuni lo amekago áisi agelolahini amiselekago, gelekelé veva Zonina lo nemeko nelepizekago, ² nénisi nene Ómasímíni gakó itó Izesu Kilistó lo utó i gakó nene áni go guni oko gulutíminave loko gele minuke imaneló lo utó oko luhuva nogizuve. ³ Itó luhuva imane mukító alévolé iti gamena móta alitokamó nenazo, netá matá alika utó iti gakó imane nene gatiki li kimita vejenaki itó gakó luhuva imane giliiki gili alita vejenaki Ómasímo nónohá zeketonoi vejená niave.

Ómasímíni vejenala zuha mulusi 7 nónohá kimi gakó

⁴* Neza Zonina Asia mikasiuka Ómasímíni vejenala zuha mulusi 7 niamó lekelí luhuva netá imane gizo nolukumuve. Ómasi goí oko mina ve itó itína hanuva noi ve itó atiginá oko anogo i velokatí itó zámuzáini 7 nei Sikalahú gonanalivagi siató noi velokatí ⁵* itó Izesu Kilistokatí nene nasahilí itó hulu lekelitoka mino moloko minino. Izesú áisi nene Ómasímíni gakó amegesa moloko avetó oaká ve itó ganá heleakakutí oti ve itó numutó namató vejenalitini kugulizaki véini uvóipo noive. Eza agika lemeaká noike ezáa golaníatunú lihima netategutí gologí oletake ⁶* Ómasi amelahini lehizemikugo minatave loko aí avogisaló guguni gizoaká ve lelémó molamó neve. Aitoka nene gonanalivagi itó zámuzalagi mino lúaló moloko minanogo ive. Lamaná.

⁷* Gilinahe. Límusi amupiló noago vejená mukító kogómulatunú áni ganigave. Itó galutá hize vejená kezagi áni ganigave. Itó numutó namató vejená mukí keza aí áni giiki aí gakó gili alemakumú ive nama inigave. Ámina gakó nene lá oko utó ino. Lamaná.

⁸* Guivahani Ómasi osá amosá ve eza goí oko mina ve itó itína noi ve, itó anogo i ve áisi nene nénisigó apí oaká itó ale asú oaká amelahina nouve loko nolive.

Izesuni ameni áni gamó

⁹ Likigivetipina Zonina lekezagi Izesukumule loko miluma maluma itó Ómasímo gizapa olimiaká itó genavagi netá geheko legesó oko ote minoaká netá izá moloko alekunike minoaká nouni ve neza Ómasímíni gakó itó Izesuni agulizá lo utó oko lo kumule liki Patamo mikasi pokolagú nimisili ahuli milikago minumóma neve. ¹⁰ Guivahanímíni gamenaló Sategú nene Sikalahulímo nigikámíni agómula ale panava zekago nemegesaloka gakó napa pikulí nenéminoko utó imó. ¹¹ Utó oake láa loko noligo gulumó: Netá áni ganogo animó nene pepagú luhuva gizokoko vejenáne zuha mulusi 7 kezaloka ahulokako Epeso numutoka itó Similína numutoka itó Pelagamu numutoka itó Tiatila numutoka itó Saliti numutoka itó Pilalepia numutoka itó Lautisia numutoka vitize.

¹² Itó neza gakó lo nímí vema áni gatove loko mino viliguke lamu liví 7 golitunú lilí amó nene áni gumó. ¹³* Liví holulagú makó nego áni gumó nene ametamenia vejená lemetamenigitana noigo gineganévaa hána agisaló leme minamó. Itó apinaloka holotani golitunú lilí amó nene minamó. ¹⁴* Itó gotola zopova mokoná nene límúsigitana gizopa loko minamó, itó agómula luga luga nene ló guluma nenéminoko minamó. ¹⁵* Itó agisa luga luga nene goli gehani lokú loake velu velu loaká noimó nenéminoko minamó. Itó anó lupa nene nagami lisani sipisi nenéminoko sasa loko minamó. ¹⁶ Agizani zamagaloka nene sonohí 7 ale minamó. Itó agepagutí amitá makó nene amegesaloka itó agómulaloka sánevetaláa minamó nene leme minago áni gumó. Itó agómula avogisa nene ho silikakéna nenémíni oko lapaná loko minamó.

¹⁷* Ametamenia lá oko nego áni gokuke agisagú pou loko akumó. Heleaká nenéminoko akonogo agizani zamagaloka nene numupiló moloake láa loko lo nimimó: Geza gelegesá legemino. Goí moloko itó alika moloko ¹⁸ itó alévolé amelahina neza imane nouve. Gele-nape. Neza hulúmóza, goha otekuke mino lúaló moloko minanogo uve. Itó heleakalímíni itó galémíni gahémíni kíi nénisi alenouve. ¹⁹ Nenemú netá nániganimó nene itína utó noimoláa itó alika utó itimoláa nenegi luhuva gizo asú ozo. ²⁰ Itó nigizani lamagalokagú sonohí 7-a

* 1:4: Gá 3:14; Ali 4:5 * 1:5: Isa 55:4; Age 89:27; Gá 1:6 * 1:6: Ali 5:10 * 1:7: Tan 7:13; Zon 19:34,37; Zak 12:10; Mat 24:30 * 1:8: Ali 22:13 * 1:13: Tan 7:13, 10:5 * 1:14: Tan 7:9 * 1:14: Tan 10:6 * 1:15: Izi 1:24; 43:2 * 1:17: Isa 44:6, 48:12; Ali 2:8, 22:13

itó lamu liví 7-a golutunú lilí ago ánganimó nene asuguná netalímíni mogonáa lo gimitoze, gelezo. Sonohí 7 nene Ómasímíni vejenala zuha mulusi 7 keí gizapa níkita ve ageló vejená nenémíniki niave. Itó lamu liví 7 nene monó gele vejená mulusi 7 nenetini avevezaha niave.

2

Epeso vejenatoka gakó ahulamó

¹ Miní ameko láa loko lo nimimó: Epeso numutoka Ómasímíni vejenala zuhatini ageló nenémínoko gizapa noketa vémo gakó láa loko luhuva gizo amekako lo kimitize: Sonohí 7 agizani zamagolokagú ale mina ve lamu liví 7 golutunú lilí amó nenémíni agilikagú vogá ogá oaká noi ve áisi lekelikumú láa loko nolive: ² Neza iki miliki iaká niamó nenémíni mogonáa itó hozalínímíni mogonáa goselé lekepelemigo legeso iki aliaká niamó nenémíni mogonáa gelenouve. Lekelisi vejená golesa galasa ángi mu kizapa iaká niave. Itó vejená lugáa lezagi aposolove liake soza likago sozainímíni mogonáa ali utó milikave. ³ Itó amuza miliki miníki nenikumule liki miluma malumámíni amupiló goselé lekepelemigo hulu iki miniaká niave. ⁴ Lá onoimóza, nénisi nene lekelikumú netá lá okomú gulugo golesa oaká noive. Lekeza gozapá likigika nimiaká amómámíni oko gamena imanéa nene ma minamive. ⁵ Gozapá veletó ká mezane monokú lamaná iki mihina iki minamopa itína nene mota velehé limikave. Lekeza nenemú goha giliiki likigika ali viligiiki gozapá gapoló goha lisiki vilo. Nenémíni amikoma neza lekelitoka aniteko lamu livitini nene zeko liho ahulanogo uve. ⁶ Makó nene lekelikumú gulugo lamaná oaká noive. Lekeza Nikolaoni vejenala zuha keza netá iki miliki niamó nene mukahá kipiliaká niave. Itó neza ámina oko mukahá kepeleaká nouve. ^{7*} Sikalahulímo Ómasímíni vejenala zuha gakó némika loko lo nokimimó nene lakagata koló imó neneta gili vevesiki gililo. Makó keza monokú alévolé iliki viki Satani lovaváa aviligítamoláa nene alévolé oko minoakalímíni za gihila Ómasímíni zazuhagú noimó nene natave loko gele kiminogo uve, loko limó.

Similina vejenatoka gakó ahulamó

^{8*} Itó Similina numutoka Ómasímíni vejenala zuhatini ageló nenémíni oko gizapa noketa vémo gakó láa loko luhuva gizo amekako lo kimitize: Goí moloko itó alika moloko eza heleake otí vémo lekelikumú láa loko nolive: ⁹ Lekeza miluma malumámíni amupiló likilími-likí ahulilikimikago niamó itó gohogó vejená miniaká niamó nene gelenouve. Itó lekeza monolímíni henokanotiki vejená niave. Itó Zuta vejená nouné liki liaká niamó nenete lekelikumú alivi letivi iaká niave. Nenegi gelenoumóza, keza soza likave. Zuta ve gihiláa negopa, Satani vejenala zuha niave. ¹⁰ Lekelitoka miluma maluma netá goha utó o likiminogo ive. Nenemú lekelegesá legemino. Gilinahe. Satá eza gimilikú moloaká netá utó o likimitive loko lekelitokatí lugáa nene nagá numukú kelémo molanogo ive. Lá okiko, gamena 10 oko novigo miluma giliiki minanigave. Lekelisi monó nene ale gikitiki ali miniki hilikiko, gonanalivagi akilikitana oko alévolé oko minoaká nene ale hitoleketanogo uve. ^{11*} Sikalahulímo Ómasímíni vejenala zuha gakó némika loko lo nokimimó nene lakagata koló imó neneta gili vevesiki gililo. Makó keza monokú alévolé iliki viki Satani lovaváa aviligítamoláa nene alika heleaká nenémíni ma kelémo golesa palasa aminogo ive, loko limó.

Pelagamu vejenatoka gakó ahulamó

¹² Itó Pelagamu numutoka Ómasímíni vejenala zuhatini ageló nenémíni oko gizapa noketa vémo gakó láa loko luhuva gizo amekako lo kimitize: Amitá makó amegesaloka itó agómúlaloka sánevetaláa minamó alenei vémo lekelikumú láa loko nolive: ¹³ Lekeza nimina apalímíni mogonáa gelenouve. Neneló Satani vejenala zuha niave. Lekeza gakónéa itó nugulizánéa ale gikitiki ali miniaká niave. Itó neneló Satá minoko aleko oaká noitó nene není gakó lo amutokó lo kemeaká i ve Atipasini apelego hili zupahé nenikumú gili alévolé amó nene ahulamómáa neve. ^{14*} Itó neza lekelikumú koma gulugo golesa oaká noive. Lekelí numutoka vejená lugáa niamó keza Palámíni gapogú viaká niave. Palámo eza Palakani nene Isilae vejená lo kimiti gakó lo amekago áisi gala vizekago soza ómai netalímíni miguhala níki minake mokoló minake golesa amó. ¹⁵ Áminámíniki lekeli apatoka vejená lugáa keza Nikolaoni vejenala zuhatini mogona golesa aliake áminámíni iaká niave. ¹⁶ Nenemú lekeza likigika ali viligalo. Némíni amikoma neza lekelitoka galinali aniteko ámina vejená nene negepagutí nolimi amitatunú lova ale kiminogo uve. ^{17*} Sikalahulímo Ómasímíni vejenala zuha nene gakó némika loko lo nokimimó nene lakagata

* 2:7: Apí 2:9; Ali 22:2 * 2:8: Ali 1:17 * 2:11: Ali 20:14, 21:8 * 2:14: Nam 22:5, 25:1-3 * 2:17: Gá 16:14-15, 33-34; Zon 6:48-50; Isa 62:2, 65:15

koló imó neneta gili vevesiki gililo. Makó keza monokú alévolé iliki viki Satani lovaváa aviligitamoláa nene halá ge mina mana nosá gihila kiminogo uve. Itó gehani mokoná nene etó etó oko kemekugo neneló kugulizá luhuva gosohá miniko gehani amelaho ezagó ámina agulizá gilino gove, loko limó.

Tiatila vejenatoka gakó ahulamó

¹⁸ Itó Tiatila numutoka Ómasímini vejenala zuhatini ageló nenémini oko gizapa noketa vémo gakó láa loko luhuva gizo amekako lo kimitize: Ómasímini gipala agómúláa ló guluma nenéminoko noi ve agisáa goli gehani lokú loake velu velu loaká noimómáminoko noi vémo lekelikumú láa loko nolive: ¹⁹ Neza iki miliki iaká niatímini mogona itó likigika kimiaká niatímini mogona itó Ómasimú gili alévolé iki minatímini mogona itó nasahilí ikimiaká niatímini mogona itó genavagi netalímini agikagú hulu iki niamó nenémini mogonáa gelenouve. Itó gozapá amuza miliki lagasó minamó itína nene goha itekave. Nenegi gelekuve. ²⁰ * Itó neza lekelikumú gulugo lá oko koma golesa onoiwe. Lekelisi nene Isilae vetini agulizaki vená golesa Zesepelokitana mina vená ángi ahuliaká niago áisi Ómasímini agepagutí gakó loaká vená nouve loake, vejenáne zuha gakó lo kemeaká ike kogoka vízeake gala vízekago, gumesisi mokoló hoza aleke soza ómai netalímini míguhala aliki niaká niave. ²¹ Itó agikáa ale viligative loko gamena molotumóza, áisi agikáa ale viligamike mokoló netala ahulanogo gelesá amive. ²² Gilinahe. Neza nenemú lokugo, avisi netá nene utó o amekiko ako minatize. Lá noiike, áisigi mokoló mogona lilí iaká niamó kezagitoka miluma maluma sipisi utó itize. Kigika ali viligiiki venalímini mokoló netala ahulamikoma, nenéminoko utó o kiminogo ive. ²³ * Itó ámina venalímini zigepamú lokugo, golivagi netalimo utó oko kepele gesá itize. Némini okugo, numutó namató monó gilina vejenalite nenikumú kigikámini kagatámini mogonáa ángigo hehe loko ángigonane liki gili guni iki gilitaze. Neza vejená mukí iki miliki itatímini avotigila apasoko kiminogo uve, loko limó.

²⁴ Itó Tiatila numutoka vejená lugáa lekeza ámina soza gakó gili ahuliaká niave. Lá niake, gevená lugáa keza Satani mogonatagana gele hee loko gelenouve liki liaká nia vetini gakó lekeza gilísá ama vejenalita gakó lo likimitoze, gililo. Neza genavagi netá makó nene lukumupiló molaminogo uve. ²⁵ Itó netá alinamó nene ali gikitiki ali minalo. Lá iliki niviko anititoze. ²⁶ * Makó keza monokú alévolé iliki viki Satani lovaváa aviligiki neza oko moloko noumómáminiki iki miliki iliki viki ali lutigitamoláa nene nénisi amuza kemekugo haitopaitó mikasiuka vejenaliti ve uvóike lilí iki minikiko ²⁷ aménehitokatí amuza alumó ámina oko kemekugo aeni hánusa ali miniki gizapa ikitataze. Lá niiki nogosanitunú mikasi somo zeko lana oaká nouhá nenéminiki lá ikitanigave. ²⁸ Itó sonohí gazakomé miní ameketanogo uve. ²⁹ Sikalahulímo Ómasímini vejenala zuha gakó némika loko lo nokimimó nene lakagata koló imó neneta gili vevesiki gililo.

3

Saliti vejenatoka gakó ahulamó

¹ Miní ameko láa loko lo nimimó: Saliti numutoka Ómasímini vejenala zuhatini ageló nenéminoko gizapa noketa vémo gakó láa loko luhuva gizo amekako lo kimitize: Ómasímini Sikalahú zámuza 7 alenei Sikalahú itó sonohí 7 alenei ve nenémo lekelikumú láa loko lokave: Neza iki miliki atímini mogonáa gelenouve. Vejená keza ángiolikimikago lokogómulagi niamó geleneimóza, likigikáa nene hele vimó niave. ² Nenemú lekelisi nene mómoká iki oitiki gosohá lugáa hulinigi niamó nene kigikáa emane ale kii likitalo. Neza Ómasímini avogisaló iki miliki iaká niago ángimogó nene hehe lamive. ³ * Lekeza netá matá li likimikago gilnamó nenema alími gosohá iki ali gikitiki miniki likigika ali viligalo. Ali viligiki gizapa iki minamitamó nene, lova ale likiminogo uve. Gamena nomulumó nene lekeza gelemiko guminaló ve nenéminoko litá oko anitino gove. ⁴ Saliti numutoka nene vejená lugáate gineganéini goihá zísá amave. Vejená nenémináate miniki gineganéini mokoná ali miniki nezagi mihina iki miniki aliki inigave. Lekeza nenémini ita avotigila iki niave. ⁵ * Makó keza monokú alévolé iliki viki Satani lovaváa aviligitamó nenete gineganéini mokoná lamaná kemekugo ali luhanigave. Itó kugulizá nene alévolé kemetameki nia vejenaliti kugulizáini giza pukugutí gilato ahulaminogo uve. Neza kugulizá nene aménehini avogisaló itó ageló vejenaliti kovogisaló lo utó molanogo uve. ⁶ Sikalahulímo Ómasímini vejenala zuha gakó némika loko lo nokimimó nene lakagata koló imó neneta gili vevesiki gililo.

* 2:20: 1 Kug 16:31; 2 Kug 9:22 * 2:23: Age 7:9; Zel 17:10; Age 62:12 * 2:26: Age 2:8-9 * 3:3: Mat 24:43-44; Luk 12:39-40; Ali 16:15 * 3:5: Ali 20:12; Mat 10:32; Luk 12:8

Pilatelepia vegeatoka gakó ahulamó

⁷ * Itó Pilatelepia numutoka Ómasímini vegejala zuhatini ageló nenémini oko gizapa noketa vémo gakó láa loko luhuva gizo amekako lo kimitize: Apazá noi ve itó lokago alévolé oaká noi vémo agulizaki ve Tevití gizapa oko mina apalímini kíi ale minake gahe segeneitó ve makolímó voko ale lí aminogo i ve eza ale lí noitó ve makolímó gahe segeminogo i vémo lekelikumú láa loko nolive: ⁸ Neza iki miliki iaká niatímini mogonáa gelenouve. Gilinahe. Neza lokovogisáló gahe makó segelikimikugo ve makolímó gahe geminogo ive. Lekeza amuzatini lagasóisi nemóza gopa nene gakóne ali guni iki ali minake nugulizá ahulamamó nene gelenouve. ⁹ * Gilinahe. Satani mulusigutí vegeená lugáa keza Zuta vegeená nounge liki liaká niamó nenete soza liake Zuta ve gihiláa ma minamave. Neza keí nene gala vizekugo lekelitoka anitiki kalapusa hizi likiminigave. Lá niiki lekelikumú nene nigika lekemenou vegeená niave liki gilinigave. ¹⁰ Lekeza goselekeselé amiki negeva minatave loko loleketonou gakónéa nene ali guni iki ali minamó nenazo, nenemú gimíikú moloaká gamena nene numutó namató vegeatoka zeloko vitimóza, lekelitoka zeloko vokative loko nénisi nene vegegisa hizeleketoko alata mololeketanogouve. ¹¹ Neza litá oko anitino uve. Nenemú makolímó gonanalivagi akilitini akúvasokative liki netá matá alinamó nene ale gikitiki ali minalo. ¹² * Makó keza monokú alévolé iliki viki Satani lováva aviligítamoláa nene Ómasinémini zavusavegú lapusa nenéminoko hízekimikugo keza nenegú alévolé iki miniki goha hetoka ma olíi lememinigave. Itó kumupiló Ómasinémini agulizá luhuva, itó Ómasinémini apá nene Zelusale apá gosohá okulumakutí Ómasilokatí limití apalímini agulizá itó neza nugulizá gosohalímini luhuva nene kumupiló gizanogouve. ¹³ Sikalahulímó Ómasímini vegejala zuha gakó némika loko lo nokimimó nene lakagata koló imó neneta gili vevesiki gililo.

Lautisia vegeatoka gakó ahulamó

¹⁴ Itó Lautisia numutoka Ómasímini vegejala zuhatini ageló nenémini oko gizapa noketa vémo gakó láa loko luhuva gizo amekako lo kimitize: Gakó gihiláa loakalímini mogonáa noi ve itó gakó lokago alévolé oaká noi ve Ómasilokatí netá utó imó nenémini mogonáa noi vémo lekelikumú láa loko nolive: ¹⁵ Lekeza iki miliki iaká niatímini mogonáa gelenouve. Lekeza monokumule liki amuza miliki ali mumusí isá amave, itó amuza miliki ali geha zi asú amamoláa nene gelenouve. Geha zeko minatune likima nene geha zikigó minatanazo. ¹⁶ Lekeza vogalitikú koma mumusí otigí onoimó nianazo, negepagutí musi velelikimikugo liminigave. ¹⁷ Lekeza lekezatinimú láa liki liaká niave: Ligikámini minumuni mukí lelitoka neve. Leza nana netá ma vitagá oaká nounge. Netá matakumú makó vitagá osá amune liki liaká niamóza, lekeza keé lamamó mogonalini gelemake ve ámemenáa gohogó vegeená likatiká ivamó zapakó miniaká niave. Nenemagi nene lekeza gili hee liki gilísá amave. ¹⁸ Nenemú lakagata aleko lo lekemekugo gililo. Lekeza nenitokatí golí gehani vové avetoko minamó meinaváa iteko minamó nene meina hizikiki, lamaná henotiki vegeená minanigave. Itó ginegane mokoná meina hiziki ali luhíiki, lukugupe zapakó minatímini avoza ali hitataze. Itó lokogómulámini netupaváa meinava hiziiki lokogómulaloka hilikiko goloutatize. ¹⁹ * Neza nigika kemeaká nou vegeená nene aséitó zeko kelémo hehe loaká noumó nenazo, nenemú lekeza amuza miliki likigika ali viligalo. ²⁰ Gilinahe. Neza likigikámini gahe amegesaloka otenouke hoko-hoko loaká nouve. Makó keza gakóne imane giliiki gahe siginimikiko, keí numukú itinogouve. Iteko kezagi noko minanogouve. ²¹ Neza amuza moloko Satani lováva avilegekuke, améneho nene gonanalivagi siató minoaká noitó minoaká nouve. Makó keza monokú alévolé iliki viki Satani lováva aviligítamoláa nene áminámini oko nénisi nene alesá molokugo, není gonanalivagi siató nougo, namatoka makó minanigave. ²² Sikalahulímó Ómasímini vegejala zuha gakó némika loko lo nokimimó nene lakagata koló imó neneta gili vevesiki gililo.

4*Okulumakú Ómasi agepoka liaká nia gakó*

¹ Neza netá nenéminoko ángokuke, okulumatoka ángumó nene gahe makó koló onoigo ángumó. Ángokugo nene gakó ganá utó igo gulumó nene, pikuli nenéminoko utó ike láa loko lo nimimó: Geza imaneló iteko noako netá alika utó itimó nene gelepizekugo ángatanize. ² Loko noli agepagi Sikalahulímó nigikáne ale viligokago okulumakú gonanalivagi siá makó minató ve makó noigo ángumó. ³ * Eza ametamená meinava iteko mina gehani agulizá zasípa gehani nenémini oko, itó koniliani gehani golohá

* 3:7: Isa 22:22 * 3:9: Isa 49:23, 60:14 * 3:12: Ali 21:2; Isa 62:2, 65:15 * 3:19: Hip 12:6 * 4:3: Izi 1:26-28

nenéminko lapetapé oko minamó. Lolovaloka nene hugepavalámo ametamenía nene gihisigí nenéminko lúvize távize oko nego ánígumó. ⁴ Itó gonanalivagi siá napa hizi vigiki nene gonanalivagi siá lugáa 24 nego ánígumó. Siá nenémini amupiló nene monokú olotiva ve 24 keza gineganéini mokonakó ali luhiake miniliki vamó, itó gotóitó nene akilí gonanalivagi golitunú lilí amó nene hitinago ánígumó. ^{5*} Itó gonanalivagi siá napalotí nene gó melevezá oko gó pou pou loko anó sipisivagi minamó. Itó gonanalivagi siá avogisaloka nene ló liví 7 loko minamó nene Ómasímini Sikalahú zámuzala 7 alenei Sikalahulímini liví minamó. ^{6**} Itó gonanalivagi holomámini avogisaloka nene kalasi lagámintunú lilí amó nene age nagamikítana oko minake gesá oko minamó.

Itó gonanalivagi siá napa agilika luga luga nene netá alévolé losive losive miniliki vi minamó. Keza kogómulaloka itó kemegezaloka kogómula vaí oko minamó. ⁷ Makó eza laizon akohú gala gelevimó, makó nene pulumaká akaleváagítana ametameki, makó eza avogisáa vejená ametamenigi, itó makó eza nama luipá agokéna ale talalo minamó nenémini ametameki minamó. ^{8*} Netá alévoleláa losive losive nene kogokéna 6, itó kogokéna veveléa itó amuná kogómula minamokó, itó límugusi zeko gó loko sele liki láa liki nama liaká niave: Guivahani Ómasi zámuzala ale asú oko aleaká noi ve eza goí oko mina ve, itó itina hanuva noi ve itó minoko anogo noi ve etó oko keké vizeko noive.

⁹ Itó alévolé netá losive losive keza gonanalivagi siató mino lúaló moloko minoaká noi ve alévolé oko minoaká amelahini agulizaláa ali otiki agepoka liki kogoliza vizi amiki niago, ¹⁰ monokú olotiva ve 24 keza gonanalivagi siá minoaká noitoka alévolé oko minoaká amelahini amatoka gupá zi ameke agulizá ali otiki siámámini amakuka gonanalivagi akilímini nene aktúvasi nimilake láa liki liaká niave:

¹¹ Guivahani Ómasile géisi nene netá mukí ale utó molanimó, itó geí gakotó netá matá utó o asú oake minoaká noinazo, vejenalita gonanalivagi gugulizató itó zámuzakaló ali otiki ali utó iko minati avotigila oko noane.

5

Ómasímini sipsip akalevámo pepa asaivagi alimó

^{1*} Itó gonanalivagi siató minoaká noi vémo agizani zamagaloka ali gakina pepa makó aleneigo ánígumó. Itó ámina pepa nene amegesaloka itó agómulaloka luhuva nego ánígumó. Itó huma 7-atunú ali gilitiki lilí amó. ² Itó amuzavagi ageló makó ánígumó áisi nene gakó napagutí láa loko limó: Hí ve hehe loko minatimo pepa nenémini humaváa akagá iko lamaná itimó neve. ³ Loko lokago, okulumakukahe itó mikasiukahe itó mikasi agikagú emanehe makolimo teko pepa nene humaváa akagá okoko ánígumó imó. ⁴ Lá okago, pepa nene akagá okoko ánígati avotigila oko mina ve makó nomigo, mulúnegú golesa okago ive umó. ^{5*} Ive nougo, monokú olotiva ve makolimo láa loko lo nimimó: Ive amo. Ánigozo. Zutani mulusigutí akohú gala laizonigítana mina ve eza Tevitini agapilamola nenémo Satani lovaváa avilegeake pepa nene huma 7-atunú ali lakolí amó nene akagá itimó neve.

^{6*} Loko noligo, neza nogómula ahulo moloko gonanalivagi siá minató netá alévoleláa losive losive itó monokú olotiva ve keí holúikú sipsip iza akaleva makó apilivi givi amó ametameki nego ánígumó. Sipivaláa 7 minamó, itó agómuláa ámina oko 7 minamó nene Ómasímini zámuzala 7 alenei Sikalahú nene amiselekago, mikasi nekisa vokisauka minoloko vonoimó aí avevezahaló minamó. ⁷ Itó akalevámo vike gonanalivagi siató mina vemámini agizani zamagalokatí pepa asaivagi nene alimó. ^{8*} Pepa asaivagi alekago, alévolé oko minoaká netá losive losive itó monokú olotiva ve 24 keza sipsip iza akalevamámini amakuka gupá zi amemó. Lá iake, keza nama litive liki ziaká netá napa nene ali minake, itó lape makó nene golitunú lilí amoki nene kigizakú etó etó iki ali minamó. Anuvavagi paulá Ómasiloka gizo amekakumú nene lapegú vaí o minamó nenémo monó gele vejenalite Ómasiloka liaká niatímini avevezaha neve. ^{9*} Nama gosohá makó láa liki lamó neve: Geza gipilikago helenike geí golanikatanú vejená mukí nene

mukitó nagaki itó mukitó konoki itó mukitó kugupegi itó mukitó mikasigú vejená meina hizeko gologí okimikanike Ómasi noitoka kelémo molokanimole.

^{10*} Ómasi ametehini gelekéle itatave loko
aí avogisaló guguni gizoaká ve kelémo molanimó neve.
Kelémo molokako mikasiuka gizapa iki miniki kugulizaki minanigave.

* 4:5: Ali 8:5; 11:19; 16:18; 1:4 * 4:6: Izi 1:22 * 4:6: Izi 1:5-10, 10:14 * 4:8: Isa 6:2-3; Izi 1:18, 10:12 * 5:1: Izi 2:9-10; Isa 29:11 * 5:5: Apí 29:9; Isa 11:1, 10 * 5:6: Isa 53:7; Zak 4:10 * 5:8: Age 141:2 * 5:9: Age 33:3, 98:1 * 5:10: Gá 19:6; Ali 1:6

Lá onoinazo, pepa humaváa akagá itani avotigila oko noane, liki lamóma neve.

¹¹ * Goha nogómula ahulo moloko ánimómó nene ageló mukilitini kegepagutí gako muki gulumó. Nampáini nene 100 milioni itó tausen tausen minamó. Keza nene gonanalivagi holomaló itó netá alévolé oko minoaká netá losive losive itó monokú olotiva ve minatoka hizi ve go iki minake, ¹² gako napagutí nama láa liki lamó:

Sipsip akaleva imane goí iki apili hilinamó nenémó
zámuza itó henoni itó gele vevesoaká itó amuza aliti lelegitó itó vejená mukilite
agepoka liki aí agulizá ali otikiko,
aí lapaná utó oko minati avotigila oko noive.

¹³ Liki likago, neza muki okulumakuka ne netá itó mikasigú ne netá itó mikasi emane amunagú ne netá itó age nagamí agikagú ne netá mikasi haitopaitokú nia netá nenete láa liki nama nilago gulumó:

Gonanalivagi siató minoaká noi veló itó sipsip akaleva noitoka
kegepoka itó kugulizá ale oteaká itó keí lapaná utó oaká itó zámuza
keitoka minoloko voko mino lúaló moloko minanogo ive.

¹⁴ Liki likago, netá alévolé oko minoaká netá losive losive keza konotó aliki lamanale likago, monokú olotiva ve keza kalapusa hizi amiki gupá zi amemó.

6

Sipsip akalevámó pepa humaváa 6 akagá imó

¹ Itó neza nogómula ahulo moloko ánimómó nene, sipsip akalevámó pepa humaváa 7-agutí makó nene akagá imó. Akagá noigo, alévolé oko minoaká netá 4 keitokatí makó eza gó galaketoko sele loko limó: Ano. ² * Loko lokago, ánimómó nene, hosi iza mokoná makó ago, amupiló ve makó minamó eza gimisiva itó gonanalivagi akilí ali amikago aleneike lovagú netá avilegemo vike netá muki aviliginogo novigo ánimómó.

³ Itó sipsip akaleva eza pepa humaváa nampa 2 nene akagá okago, alévolé oko minoaká netá nampa 2 áisi ano loko sele lokago, ⁴ * hosi iza golohá makó utó oake amó. Amupiló nene ve makó minamó nenémó mikasigú hulu ale olové okimikiko, vejená keza eza apele ahulokiko eza apele ahulokiko itave loko nenémíni zámuza amemó. Itó lova napa ale utó itimó nenémíni zámuza itó sopoló hána nenegi amikago ale minamó.

⁵ * Itó sipsip akaleva nenémó pepa humaváa nampa 3 nene akagá okago, netá alévolé oko minoaká nampa 3 áisi ano loko sele lokago, neza nogómula ahulo moloko ánimómó. Nánigugo, hosi iza anupá makó amó. Ve makó amupiló minamó eza sigeli makó ale minamó. ⁶ Itó netá alévolé oko minoaká keí holúikutí vejená konokitana utó oake, láa loko ligo gulumó: Muki netalímíni meinava mota iteko nenazo, laisi kapu 4 nenémíni meinaváa 2 kina, itó polisi kapu 12 nenémíni meinaváa ámina oko nemóza, olivi nogoza itó vain nagá nene vauna hizemilo loko limó.

⁷ Itó sipsip akaleva nenémó pepa humaváa nampa 4 nene akagá igo, alévolé oko minoaká netá nampa 4 nenémó ano loko sele lokago, ⁸ * nogómula ahulo moloko nánigugo, hosi iza makó agupéa goni agupe lamó nene ago, ánimómó. Itó amupiló mina véminí agulizá nene heleakalímó itó amegesaló ámegetoko a véminí agulizá nene galegú lemeakalímó, itó mikasigú vejená lakani losive losive hizi hou liki niago, mulusi makó nene lova itó gaúna napa itó vejená mukitó kivise gesá oaká netá itó zauka gaha akohú netá nene utó iki vejená lapuluva ikitatave loko nenémíni zámuza kemekago ali minasimó.

⁹ Itó sipsip akaleva nenémó pepa humaváa nampa 5 akagá okago ánimómó nene Ómasímíni gako ali minake li hutilí akumule liki kipili hele vegejalitini kemeni nene guguni gizoaká itámíni sepekuka niago, ánimómó. ¹⁰ Keza gako gamoga giki sele lake láa liki lamó: Apazá Guivahani gihila geza gamena napama ale hána okane. Geza golanitéminí lihima monóini nomi vegeinatoka noimó nene nanahé apasatane. ¹¹ Liki likago, mokoná gó hána etó etó iki kimí asú iake, láa liki lí kememó: Gelekelé izegipa likigive lugáa ámina iki kipili hilitamó keí nampáini vaí ititó neze, lakavasú viziki ageva kománetá minalo liki lamó.

¹² * Itó netá lá oko ánimómó: Sipsip akaleva eza pepa humaváa nampa 6 nene akagá okago, imimá napa imó. Lá noigo, ho nene gónupa o asú oake, ikani nene golani loló imó. ¹³ * Itó sonohí keza hepelimó naligo gohuna záminí gihila legemó zimómámíniki okulumatokatí mikasiuka ligimí zizi amó. ¹⁴ * Itó okulumá eza nene usí pepa likeaká nouhámámíni oko vimegeake, voko haha imó. Itó agoka itó mikasi pokola keza mukitó numuní apáini ahuliake haitotoka viká viká amó. ¹⁵ * Nenémínoko utó noigo, mikasigú gamani ve napa itó gizapa ve

* 5:11: Tan 7:10 * 6:2: Zak 1:8, 6:3, 6 * 6:4: Zak 1:8, 6:2 * 6:5: Zak 6:2, 6 * 6:8: Izi 14:21 * 6:12:

Ali 11:13; Zoe 2:10, 31 * 6:13: Isa 34:4 * 6:14: Ali 16:20 * 6:15: Isa 2:19-21

itó amitini ve napa itó henóiki ve itó amuza ve itó vegená lugáa mukitoka iti minamó itó limi minamó gelekelé vegená itó hanuva vegená keza geha mulikú itó agokaló gehani napámini amegesauka halá giki minamó. ^{16*} Lá iki niake, agokagi itó gehani napagi sele li kemeke láa liki lamó: Limiki zi hitilitamave. Gonanalivagi siató minoaká noi vémini avogisalo utó o amekatumize. Itó sipsip akalevamámo mukahá olimikatize. ^{17*} Mukaháinimini gamena napa utó okanazo, avogisalo éaho alévolé oko minatimó neve, liki lamó.

7

Isilae vegená 144 tausen kovogisalo Ómasímini anosa minamó

^{1*} Lá okago, neza nogómula ahulo moloko ageló losive losive áinigumó. Keza mikasi nekisa losive losiveló miniliki vinago áinigumó. Mikasiló hepé losive losive ali minamó nene mikasiukahe itó age nagamikú ahe itó veletoka hepé makó alemitive liki ali minamó. ² Itó ho noititokatí ageló makó noitigo áinigumó. Eza alévolé oko minoaká Ómasímini anosa ale minamó. Áisi nene ageló losive losivema mikasiuka itó age nagamikuka vauna alita zámuza kemeneimoláa sele lo kimike láa loko limó: ^{3*} Lekeza mikasiuka itó age nagamikuka itó veletoka litá iki vauna hizemilo. Leza goí oko Ómasímini vegenala zuhatini golihúitó nene anosa molokimikuko neze. ⁴ Loko lokago, vegená golihúitó Ómasímini anosa minamó keí nampáinimú lo nemekago lá oko gulumó: Isilae vegenalitini mulusi haitopaitó mukikutí 144 tausen nene kovogisalo Ómasímini anosa minamó. ⁵ Zutani mulusigutí 12 tausen nene anosavagi minamó. Lupeni mulusigutí 12 tausen, Kateni mulusigutí 12 tausen, ⁶ Aseloni mulusigutí ámina oko 12 tausen, Napatalini mulusigutí 12 tausen, Manaseni mulusigutí 12 tausen, ⁷ Simeoni mulusigutí 12 tausen, Livaini mulusigutí 12 tausen, Isakaloni mulusigutí 12 tausen, ⁸ Zepuloni mulusigutí 12 tausen, Zoseheni mulusigutí ámina oko 12 tausen, Pezamini mulusigutí ámina oko 12 tausen nenémináate Ómasímini anosa nene golihúitó minamó.

Haitopaitó mikasiukatí mulusi napa napa mina gakó

⁹ Lá okago, nogómula ahulo moloko áinigumó nene, numutó namatotí vegená nene mukitó kugupegi itó mukí nagaki itó mukitó konoki vegená mulusi napa napa nene ve makolímó gatoko gato asú amosalímini keza gonanalivagi sialímini avogisalo itó sipsip iza akalevámíni amatoka niago, áinigumó. Keza nene ginaganéini mokoná ali luhiake itó geké litanigi kigizakú nene kokonasi ágila letiki ali minamó. ¹⁰ Ali minake, gakó napagutí láa liki lamó: Lugutó vizeaká netá nene gonanalivagi siató minoaká noi Ómasile aitokatí itó sipsip akaleva aitokatí neve. ¹¹ Itó ageló mukí itó monokú olotiva ve itó alévolé oko minoaká netá losive losive keza gonanalivagi siá alími vigiake gonanalivagi sialímini amatoka kogoka hizínake Ómasímini agulizá ali oteke láa liki lamó: ¹² Lamaná. Nónohá zeaká itó ai lapaná itó gele vevesoaká itó agepoka loo loo itó agulizaláa ale oteaká itó helisa itó amuza nene Ómasileloka minoloko voko mino lúaló moloko minanogo ive. Lamaná.

¹³ Liki li nahulago, monokú olotiva ve makolímó loká onetake limó: Ginégane mokonaki ali luhiaká niamoláa nene éage niave, itó hitokatí niave. ^{14*} Loko loká onimikago, gakó láa loko lo amumó: Gugulizakí venemaka, géisi gelenanimole. Lo nememane. Loko lokugo, eza limó: Keza gopoguni sipisi molokimiakalímini agikagutí kegepagi amóma nena. Ginéganéini nene sipsip akalevamámíni golanitunú nagamí ziki ali mokoná linamole. ¹⁵ Nenemú keza Ómasímini gonanalivagi siá amatoka miniki únaká neteká monó zagusavéagú gelekelé itiki miniaká niave. Lá niago, gonanalivagi siató minoaká noi vemámo gizapa oketoko minanogo ive. ^{16*} Lá noiko, nosánetakumú gaúnáini ma helemínigave, itó nagamikumú kiviseminogo ive. Itó homámohe itó netá makolímó kugupéini loko vímegeminogo ive. ^{17*} Siá holuláaló sipsip akaleva noimó áisi nene gizapa venini minanogo ive. Lá oko minova minova oakalímini nagamí hinipínímaló kelémo-loko vinogo ive. Lá okiko, Ómasímo kogómula nogozáa gilato asú inogo ive, loko lo nimimó.

8

Pepa humaváa nampa 7 akagá imó

¹ Lá okago, sipsip akaleva eza pepa humaváa nampa 7 akagá okago, okulumakú mukí netá matá mómoká iki konó milamago, hapu aowa oko vimó. ² Nene asú noigo ageló 7

* **6:16:** Hos 10:8; Luk 23:30 * **6:17:** Zoe 2:11; Mal 3:2 * **7:1:** Zel 49:36; Tan 7:2 * **7:3:** Izi 9:4,6 * **7:14:** Tan 12:1; Mat 24:21; Mak 13:19 * **7:16:** Isa 49:10 * **7:17:** Age 23:2; Isa 25:8

Ómasímini amatoka oti miniaká niamó nene pikuli 7 kemekago ali minimini inago ánígumó. ^{3*} Itó ageló makolímo lape makó golutunú lili amó nene aleloko ake, guguni gizoaká ita amatoka ote minamó. Neneloka anuvavagi paulá lamaná mukí nene Ómasiloka gizative liki alimi amikago, gonanalivagi siá avogisaloka nene guguni gizoaká ita golutunú lili a netalímini amupiló anuvavagi paulá gizoake monó gele vegealite Ómasiloka numuna liaká niamó neneló miní ameketamó. ⁴ Lá noigo, agelolímini agizakutí lokila anuvavagi nenémo monó gele vegeaná kéisi Ómasiloka liaká nia netató nene miní amekimikago, Ómasiloka itimó. ^{5*} Ageló eza némini oake, guguni gizoaká italotí ló luluha aleake, lapevagú molo vaí oake, mikasigú ale tulu lo ahulokago limimó. Nolimigo, gó galaké galaké anó sipisigi nolike, gó melezá melezá oko nominago, imimá napa imó.

Ageló 7 keza pikuli huhu lamó

⁶ Lá noigo, ageló 7 keza pikuli ali minamó nenete pikuli huhu linigi ali vatí iake minamó.

^{7*} Lá okago, ageló nampa 1 áisi nene pikuli huhu lokago, golini óvisopa gihilagi loki itó golanigi ali gopa amó nenémo mikasigú zimó. Nozigo, mikasiuka lakani hize hou lo losive makole noigo, lakani makokú nene za mukí lolímo lamó, itó lakani lugáa nene gihisi mukí lolímo lo asú imó.

⁸ Itó ageló nampa 2 áisi pikuli huhu lokago, agoka napagitana netá ló gulumavagi age nagamikú apate-loko limimó. Lemekago, age nagamí hize hou lo losive makole okago, makokú nene golani loló imó. ⁹ Lá okago, age nagamikú haitopaitó netá hize hou lo losive makole okago, makokú mina netá matá nene hili gesá amó, itó nagamikú sipi mukí nene atígimi vamó.

^{10*} Itó ageló nampa 3 áisi pikuli huhu lokago, sonohí napa makó nene okulumakutí atoheake limimó nene, liví nenéminoko guluma oake nagamí lugágú limimó. ^{11*} Sonohí agulizaláa nene ekesalagive. Nagamí nene hize hou lo losive makole okago, makó nene ekesá o asú okago, ámina nagamí na vegeaná nene ekesalámo kepelekago, mukí hili gesá amó.

^{12*} Hili gesá niago, ageló nampa 4 áisi nene pikuli huhu lokago, ho ikani itó sonohí nenetini lapanáini hize hou lo losive makole okago, makolímini lapaná nene asú imó. Lapanáini koma noigo, gó soza moloko gó lamó. Itó holugú ámina oko ikani sonohí soza moloko lapaná lomo vimó.

¹³ Itó neza nogómula ahuloko nama gosúveha napa makó ánígumó. Ánígumó nene ká vazane veletó gasa geko minake, gakó napa like láa loko sele limó: Agae, agae, agae. Ageló losive makoletini pikuli ha neve. Nene huhu litató nene mikasigú vegeaná keza nanámini itamó neve loko ligo, gulumó.

9

¹ Itó ageló nampa 5 áisi nene pikuli huhu lokago, ageló makó sonohikitana minamó eza okulumatokatí lutegeake, mikasigú nolimigo ánígumó. Itó aseva nomí galémini gaheváa sigitive loko nenémini kíí amikago ale minamó. ^{2*} Itó galémini gaheva nosigigo, lokila napa itimó nene gihisi vitú okuko lokila iteaká noimó nenéminoko galegutí itimó. Lokilámo nene iteko ho agómulaló itó vogalaló ká mezane ze hitamó. ^{3*} Ze nohitago, lokilámini agikagutí ganú nene mikasigú lemémó. Kegepáa nene gámukelímini agepáa nenémini oko minamó. ^{4*} Keza mikasigú gihisi zazuha itó zagila tagila nene vauna alemitave loko lo hukoketamó. Ómasímini anosa kovogisaló minami vegeaná nene lova ali kimitave loko loketamó. ⁵ Itó kipilikiko hilitave loko nomi. Hanuva ikani ligizani lugaloka asú igo nenémini agikagú akohú nikipiliko, miluma maluma giliki minatave loko gele kimimó. Gámukelímo lepelekago, miluma maluma geleaká nounimó nenéminiki miluma gilitave loko gele kimimó. ^{6*} Ámina gamenaló vegeaná keza lá iti netakumú hilitune liki hilita gapomú vitagá itaha itaha, heleminigave. Heleaká nene sele litaha litaha, gopa ma heleminigave.

^{7*} Itó ganúmate hosi iza kemetamenigi minamó nene gala ve keza lovaló vinigi hosi iza ali vavá ikimiake aliki viaká nia kemetamenigi minake gotóitoka akilí golutunú lili amó gele vi netá nene minamó. Itó kovogisáa nene vegeaná logoka legepagitana, ^{8*} itó zopováini nene hána hána nene vená lugáatini zopovagitana, itó kegepáa nene laizon akohú galámini

* 8:3: Gá 30:1-3 * 8:5: Liv 16:12; Gá 19:16; Ali 11:19, 16:18 * 8:7: Gá 9:23-25; Izi 38:22 * 8:10: Isa 14:12

* 8:11: Zel 9:15 * 8:12: Isa 13:10; Izi 32:7; Zoe 2:10, 3:15 * 9:2: Apí 19:28 * 9:3: Gá 10:12-15 * 9:4: Izi

9:4 * 9:6: Hio 3:21; Zel 8:3 * 9:7: Zoe 2:4 * 9:8: Zoe 1:6

agepagitana, ⁹* itó apíitoka nene sioti aenitunú lílí amó gelevi netá minago, áinigumó. Itó kogokénagutí anó molamó nene hosi iza lovaló vinigi gelelehá oaká kaligi ololu liake konó napa miliaká niamó nenémíni oko minamó. ¹⁰ Kagasáa gámukelímíni agasagitana oko, kegepáa nene kagasauka minamó. Nenetunú vejená ikani ligizani lugaloka asú igo nenémíni agikagú akohú kipiliki minanigave. ¹¹ Itó ageló makó eza aseva nomi galeló gizapa oaká noimó nenémo kugulizakí veníni noive, agulizá nene Hipulu vejenalitíni gakokutí Apaton, itó Kiliki vejenalitíni gakokutí Apolion, itó lelí gakokutí nene vauna aleakató ve. ¹² Agae, genavagi miluma netá makó nene asú okamóza, lositá nene hanuva neve, loko limó.

¹³* Lá okago, ageló nampa 6 áisi nene pikuli huhu lokago, guguni gizoaká ita golitunú lílí amó Ómasímíni avogisaló minoaká nemómámíni sipiva losive losive nenelotí ve makolímíni anó lupa makolímó iteake, ¹⁴ ageló nampa 6 nene láa loko lo amimó: Zupaletis nagamí napaló ageló losive losive nagá zekimikamóma nene gologí oketozo. ¹⁵ Loko lokago, ageló losive losive keza ámina kilisimasiló itó ámina ikató ámina gamenaló itó ámina aowa ahaváisi nene mikasigú vejená hizi hóu lí losive makole iliki niko, mulusi makó nene kipili gesá itave loko kegeva iki minamoláa nene gologí oketamó. ¹⁶ Itó ami ve hosi izatíni kemegesaló mina vetíni napáini 200 milionive liki lago, gulumó. ¹⁷ Vejenaki hosi izagi keí kemetameni nene, neza vamokitana áinigumó nene láa iki minamó: Apíitoka siotigítana netá aenitunú lílí amó nene golohá itó gumugumusi itó gihuká nenémíni iki luhiki minamó. Itó hosi izatíni gotóini nene laizon akohú galámíni gotola nenémínoko noigo, kegepagutí nene loki itó lokilagi itó gihuká gehani ló nolago limimó. ¹⁸ Hosi izámíni agepagutí nene loki itó lokilagi itó gihuká gehani ló nolago limimó nenémo mikasiuka vejená hize hóu lo losive makole oake noigo, mulusi makó nene kepele gesá imó. ¹⁹ Ámina hosi izatíni zámuzáini nene kegepagú itó kagalaloka minamó. Kagasa nene gosihá nenémínoko gotóinigi noigo, nenetunú vejená miluma netá lílí i kimiaká niave.

²⁰* Itó ámina vejená mukitoka kivise asú iti netalímó vejená lugáa kepele helemo novigo, lugáa aseníni zeketamoláa keza kigikáa ali viligamake, keza soza netá lílí iake ali miní miní amó nene ali ahulamamó. Soza ómai netá golitunú itó silivatunú itó aenitunú itó gehanitunú itó zatunú lílí a netá áinigoko geleaká nomimoláa itó gapo moloko vamoakalímíni nene miní amiki gupá zi kimiki minamó. ²¹ Láa iki minake vejená kepele heleaká itó soza lusa geaká itó gumesisi mokoló netá itó gumina nene ahulamamóma neve.

10

Ageló makolímó pepa koma ale gakinakutí ale atalo minamó

¹ Itó amuzavagi ageló makóma okulumakutí limigo áinigumó nene agupeloka límusi leto voko minamó, itó gotolaló nene hugepa lo minamó, itó avogisaló nene ho silikakéna ahuloko minamó. Itó agisa luga luga nene lapusagitana oko ló guluma oko minamó. ² Agizakú nene pepa koma makó ale minake nene ale gakinakutí ale atalo minamó. Agisa sogalokatí nene age nagamí amupiló liso minamó. Agisa zamagalokatí nene mikasiloka liso minamó. ³ Láa oko noi ke laizon akohú galámo anó sipisi molamó nenémíni oko gakó napagutí sele litó nene gó galaké 7 nenete konó milamó. ⁴ Konó milikago, gelekuke gakóini nene luhuva gizanogo nougo, okulumakutí anó lupa makó galinali nenitoka láa loko limimó: Gó galaké 7 keza gakó lamó nene, luhuva gizo molamo. Hanuva gígikagú minino. ⁵* Loko lokago age nagamí amupiló itó mikasiloka liso mina agelómámo agizani zamagaloka nene okulumatoka ale otimó. ⁶ Ale otike mino lúaló moloko alévolé oko minanogo noi vémo okulumatoka itó mikasiuka itó age nagamikú netá matala ale utó molo asú i ve Ómasímíni agulizató gakó láa loko lo hukamó: Gamena makó ageva minaminogo une. ⁷ Ageló nampa 7 áisi pikuli huhu lokiko anó napa molanogo ive. Nene zupahé Ómasímíni agepagutí gakó liaká ve keza gelekelé itiki mina vejená nene emane Ómasímó asuganá gakó lo kimimómámíni gihiláa utó o asú oko utó inogo ive.

⁸* Loko noligo, okulumakutí anó lupa goí oko gulumóma ámina oko goha utó oake, láa loko lo nimimó: Geza voko age nagamí amupiló itó mikasiló lisoko noi agelómámíni agizakutí luhuva netá ale gakinakutí ale atalo minamóma nene alezo. ⁹ Loko lokago, neza ageló noitoka voko pepa koma ale minamó nene nimitive loko lokugo, láa loko lo nimimó: Alekoko nozo. Nokako, ale gegepaló nomolako nene, himoni nogozamámínoko laga givisitímóza, gígikauka ekesá inogo ive. ¹⁰ Loko loake, pepa nene nemekago numó. Nokuke, negepaló nene himoni nogozamámínoko oake, laga imóza, no mikilí okugo,

* 9:9: Zoe 2:5 * 9:13: Gá 30:1-3 * 9:20: Age 115:4-7, 135:15-17; Tan 5:23 * 10:5: Gapo 32:40; Tan 12:7

* 10:8: Izi 2:8-3:3

nigikauka ekesá imó. ¹¹ Lá okago, geza vejená mulusi mukí kugupe haitopaitoki itó gakóini haitopaitó itó kugulizaki ve haitopaitó keí sala gakó makó nenegi goha lozo loko lo nimimó.

11

Ómasímini gakola li utó utó ve lositosini gakó

¹ * Itó ageló makolímó molo geleaká nogosani hánusagitana makó nemeake, láa loko lo nimimó: Geza oteko Ómasímini zagusavegi guguni gizoaká itagi molo geleko agikagú Ómasi gupá zi amiki nia vejenáma gatozo. ² * Itó zagusavémini apaláa nene molo geleko ániagamoko hanuva ahuloikozo. Nene hetoka vejená keile loko hize huko ahulonoimó neze. Keza neneló apazá apáne Zelusalega nene ikani 42 nenémini agikagú lisi lana iki minatamó neve. ³ Itó neza gakóne li utó utó ve lositá lokimikugo, ginegane lítaha ali luhiiiki vejená nene gakóne li kimi kimi iki niminisiko, ikani 42 goloko hilinogo ive.

⁴ * Keza olivi za lositáma itó liví lositáma mikasímini Guivahanímini avogisaló niminasimó nene gakóne li utó utó ve lositámámini avevezahaló niasive. ⁵ Ve makolímóhe makolímóhe ámina ve lova ale kimitimó nene, kegepagutí vele limiti lolímó líki vímiginigave. Nenéminoko ve makolímóhe makolímóhe lova ale kimitimó nene, ezáa lapuluva inogo ive. ⁶ * Goliniló gizapa itái zámúza kemeneimó nenazo, Ómasímini gakola li kimiki niminisiko, golini zemínogo ive. Itó likisiko, mukí nagamí hinipinilímó golani loló inogo ive. Nenémini zámúza kemeneimóma neve. Itó mikasigú vejenatoka kivise asú iti netá haitopaitolímíni utó itive líki likisiko, utó inogo ive. ⁷ * Itó monó litái gamenaló asú okiko, aseva nomi galegutí akohú netá golivagi netá itinogo ive. Iteko lova ale kemeko kivilegeko kepelekiko hilinigasive. ⁸ Hilikisiko, vejená keza gonosíini ahulikiko, taoní napámini gapoló aki minanigasive. Guivahanímini nene gozapá ámina apató zohota zaló apilikago hilmómá neve. Apá nenémini agulizaláa anoza gakoútí Sotove itó Izipive líki liaká niave. ⁹ Lá okiko, numutó namató vejená lugáa kemetameni haitopaitoki itó haitopaitó nagaki itó gakóini haitopaitoki nene gonosiváa gamena losive makole itó nekisáagi nenegú ánikigiki minanigave. Lá niiko, lugáate gale zeketatune líki líkiko, géneka li kiminigave. ¹⁰ Itó ámina monó líli ali ve nenetosa mikasiuka vejená nene miluma netá sipisi kimiaká asimó nenazo, helesikumú kogoliza viziki iza lulú giki ali helega helega inigave. ¹¹ * Itó gamena losive makole itó nekisáa oko vokiko, Ómasilokatí gosohá minoaká netá ale utó moloaká sikalahú nenémo gonosíiki nene lemekiko, mómoká iki otinigasive. Otikisiko, vejená keza ániigiiki kehelele goha vizekiko, gakó laminigave. ¹² Lá okiko, okulumatotí anó lupa napa makó láa loko limitive: Kee, imaneloka itilizó. Loko lokiko, gala velini keza áninigiko, límusímó asapú okimikiko okulumakú itinigasive. ¹³ * Itó okulumakú nitisiko, áminasitó imimá napa nene itive. Noiko, ámina numutoka apá hamó golesa okiko, apá lugáa 9 ha minative. Itó imimalímó vejená 7 tausen kepelekiko, hili gesá inigave. Itó gosohá minatamoláa keza kelegesá legekiko, Ómasi okulumá amelahini lapaná ali otinigave. ¹⁴ Agae, genavagi miluma netá lositá nene mota utó okamóza, hamó nene mota utó inogo inae.

Pikuli nampa 7 huhu lamó

¹⁵ * Lá okago, ageló nampa 7 áisi pikuli huhu lokago, okulumakú nene konó lupa napa lake láa líki lamó: Itína nene numutó namató kugulizaki vetini gizapa okimiaká zámúza nene Guivahanitémini itó gologí oketative loko lo moloketa vémini agizakú noigo, eza gizapa oketoko kugulizaki venini minoloko voko mino lúaló moloko minanogo ive. ¹⁶ Líki líkago, monokú olotiva ve 24 Ómasímini avogisaló gonanalivagi siató mino vete lemeko gupá zeke Ómasi láa líki agepoka lamó:

¹⁷ Guivahani Ómasi osá amosá ve neneka, geza minanimó itó itínagi nominane.

Amuzaka napa ale atalokanike gugulizaki minoko gizapa okimiaká hozaga apí oko ale utó nomolanikumú gegepoka nolune.

¹⁸ * Mukí numutó namató vejená kizapaló golesa molamó neve.

Mesaha oketataní gamena alitokago,

hele vejenalitíni lihímamú goní oketataní gamena utó okave.

Itó gelekelé izegipaka geí gegepagutí gakó liaká a ve

itó monó gele vejená lugáa itó geí zámuzamú gili olopá iki niamó iti minamó itó limi minamó

* **11:1:** Izi 40:3; Zak 2:1-2 * **11:2:** Luk 21:24 * **11:4:** Zak 4:3,11-14 * **11:6:** Gá 7:17-19; 1 Sam 4:8 * **11:7:** Tan 7:7,21; Ali 13:5-7, 17:8
* **11:11:** Izi 37:10 * **11:13:** Ali 6:12, 16:18 * **11:15:** Gá 15:18; Tan 2:44, 7:14
* **11:18:** Age 115:13

keza meinaváini kimitani gamena alitokave.

Itó mikasiuka netá ali gopa iaká nia vejená kelémo lapuluva itani gavenaváagi mota alitokave.

¹⁹ * Liki agepoka likago, okulumauka Ómasímini zagusave koló okago, lo múnahéaká gacolímíni pokisi nene zagusave agikagú utó imó. Itó gó melevezá itó konó lupa napa itó gó galaké itó imimá itó golíni óvisopa gihila napa limimó.

12

Vená makoki gosihá sipisimagi keí gakó

¹ Lá okago, okulumató anosa napa lá oko utó imó: Vená makó minamó eza agupeló ho silikakéna luho minamó. Itó agisa amunauka nene ikani milimikago minamó. Itó gotolaloka nene sonohí 12-atunú lilí ita akilí hitamó. ² Itó eza izegipa agatupagi minoko izegipala getanogo miluma geleko gopaga loko minamó. ³ * Itó lá oko noigo, okulumatoka anosa makó lá oko utó imó: Gosihá sipisi makó minamó nene ametamenía golohá loko minamó, itó gotoláa 7, itó sipiváa nene 10, itó gotola minoloko vitó vitó nene kugulizaki vetini akilí makó hitimikago minamó. ⁴ * Lá onoi gosihalímo okulumatoka iteko minake agasatunú sonohí nene hize hou lo losive makole oko hizeko atohe ahulo ahulo igo, mulusi makó nene mikasiuka lemémó. Itó gosihá sipisi eza lá oake, venalímo izegipa getokiko mikilí itove loake voko amatoka gizapa oko minamó. ⁵ * Itó izegipala getokago nene, numutó namató vejená aeni hánusatunú gizapa oketative loko lo molotamó. Itó ámina gipa getokago nene, ipá iki aliki itiki Ómasímini amatoka gonanalivagi holomámini amakuka ahulitamó. ⁶ Lá okago vená eza golisi vike mikasi gomopalaló ikani 42 nenémíni agikagú nasahilí nitiko minative loko Ómasímo ale vatí ota apatoka voko minamó.

⁷ * Lá okago, okulumatoka lova napa utó imó. Agelolitíni gizapa ve Maikolí itó izegipa agunamotamola keza sipisi gosiháma nene amiseleko apilitune liake lova ali utó amó. Itó helegaloka sipisi gosihá nene izegipa agunamotamolagi ámina iki gimisi magé iki minamó. ⁸ Itó lá ikamóza, gosihagegi nene keé liki lova aviligitamoláa amigo, okulumakutí kimisiliake gahe gikitamó. ⁹ * Lá amó nene amepa gosihá napa eza gozapá ká emane amunalokati mína ve Satá eza nene numutó namató ve kogoka vizé vizé oaká i vema ahelú i ahulikago, mikasigú limimó. Ezagi izegipala zuhagi monéna kehelú i ahulikago lemémó.

¹⁰ * Lá niago, okulumató gakó napa láa loko utó noigo gulumó: Ligive lagavetini galanáikumú Ómasímini avogisaló gamena gamena únaká neteká goní okimiaká noi vema nene okulumatokatí ahelú i ahulikago lemekanazo, Ómasilémo lugutó vizeaká itó aí alévolé itó aí gasova itó gologí oletative loko lo mololeta vevámini gizapa oaká zámuza nene utó o lamaná okave. ¹¹ Keza sipsip iza akalevamámini golanitunú itó goselé kepeleko kelegesá legemigo Ómasímini gakó liaká atunú amuza miliake aviligikamóma neve. Lá iki miniki alikínimú gelemake, itó lapuluva itupe liki gilisá amamóma neve. ¹² Nenemú okulumá agika itó nenegú mína vejenalita lokogoliza vizilo. Itó mikasiuka itó age nagamikuka niamoláa agae, lekeza nana itamó neve. Imane Satá eza gamenaváa mota asú inogo ive loko geleneike izapaló golesa molago lekelitoka núane nolimive.

¹³ Lá okago, gosihá sipisima ahulimikago, mikasigú lemeko minakumú geleake, izegipa geta venáma agizató alinogo ámegetoko vimó. ¹⁴ * Lá okago ámina vená nene nama gosúveha sipisímini agokéna lositá ali amikago, mikasi gomopalaló minoko aleko oaká itoka gosihá sipisímú golisi voko halá gimó. Neneloka nasahilí itiki niko, kilisimasi losive makolegi hapumagi vinogo ive. ¹⁵ Lá noiko, vená nene golisi okago, gosihá sipisi eza amegesaloka agepagutí nagamí nene vele ahulokago, ámina nagamilímo vele lemeake veleko vimó nene ámina vená alémoko vinogo nenémíni imó. ¹⁶ Lá inogo noigo, mikasímo vená agutó vizike agepa aká okago, gosihá sipisi nenémó vili nagamí nene mikasi agepagú leme asú imó. ¹⁷ Leme asú okago, gosihá sipisi eza venámamú izapaló molokago, ámina venalímíni izegipa agunamotamola Ómasímo lo huka gakó nene gili aleke Izesuni gakó goselé kepelemigo li utó miliki liaká a vejená nene lova ale kiminogo vimó. ¹⁸ Novike, age nagamí getatoka lemeko minamó.

13

Akohú gala lositá keí gakó

* 11:19: Ali 8:5, 16:18,21 * 12:3: Tan 7:7 * 12:4: Tan 8:10 * 12:5: Isa 66:7; Age 2:9 * 12:7: Zut 9
* 12:9: Apí 3:1; Luk 10:18 * 12:10: Hio 1:9-11; Zak 3:1 * 12:14: Tan 7:25, 12:7

¹ * Noigo, neza áni gutoka age nagamikutí nene hela netá napa makó itimó. Eza nene sipivaláa 10 itó gotoláa 7 itó gotoláa minoloko vitó nene kugulizakí vetini akilí minamó. Itó gotolaló agulizá minamó nene Ómasi aleko letoko loaká gakó minamó. ² * Hela netá napa áni gumó eza ametamenía nene pusi sipisímámini oko, agizanía nene peá galámini agizani nenémini oko, itó agepa nene laizon akohú gala agepamáminoko minamó. Itó gosihá sipisi nenémo ezáa zámua itó ezáa gonanalivagi siá itó ezáa guivahani loló oko minoaká zámua nene amimó. ³ Hela netalímíni gotoláa makó agómuni gi minake hele minamó gelekago áni gumó. Itó nenémo agómuni ha omikago lamaná imó. Lá okago nenemú numutó namató veenalite sigaga liake hela netá napama ámegetiki vamó. ⁴ Lá niake gosihá sipisímámo guivahani loló oko minoaká zámua amekamómave liki geké vaké liki gosiháma gupá zi amemó. Lá niake akohú netá amepa netáma ámina iki alími napa ake láa liki lámó: Hela netá napa makó ezagitana minamive. Itó makó éaho lova ale amítimó neve.

⁵ * Liki likago, agupe alími iti iti gakó, itó Ómasi alevo letovo otoko litive loko agepáa gúmusi molomikamó. Itó ikani 42 nenémini agikagú mikasiuka gizapa oko minative loko zámua amimó. ⁶ Itó nenemú Ómasi eza noimó agulizala nemó itó minoaká apala nemó keza okulumakú miniaká niamoláagi apí oko alevo galatovo oko loketoko minamó. ⁷ * Itó Ómasímíni vejená lova ale kemekoko kiviligitive loko gele amekago, némini oaká imó. Itó numutó namató vejená kugupe haitopaitó itó gakóini haitopaitó itó mulusi haitopaitó mukilitini agulizakí ve loló oko minative loko amuza ale amimó. ⁸ * Lá okiko mikasigú gevená muki keza hela netá napama gupá zi amiki agepoka litanigave. Itó sipsip akaleva apili hele vémo gozapá mikasí utó amí gamenaló alévolé kemetameki nia veenalitini kugulizáini nene puku makokú luhuva gizo molokago mina veenalitegó nene hela netáma nene nenémini itaminigave.

⁹ Lakagata hee lo minamó neneta gakó imane gili guni iki gililo: ¹⁰ * Makó keza kalapusi numukú minatave loko lonoiómoma nene kalapusi numukú ahulikitatize. Makó eza sopolotunú ve makó apele helekikoma ámináminiki sopolotunú ámina ve apili hilitaze. Ómasímíni apazá vejená keza ámina zupahé nene siti viziki gili alévolé iki minatakumule.

¹¹ Itó mikasí agikagutí hela netá napa makó itigo áni gumó. Eza sipsip iza nenéminoko sipivala lositá minamó. Anó lupa nene gosihá sipisi nenéminoko minamó. ¹² Lá noi ke goí oko iti akohú netalímíni zámuzagi minake aí avogisaló hoza aleko minamó. Lá noi ke, mikasigú numutó namató vejená lokimikago, goí oko iti hela netá agómuni gi minake hilitotí mómoká oko oti ve nene gupá zi amiki agepoka liaká niave. ¹³ Itó hela netá napa alika utó imó nenémo haitopaitó golvivi netá aleaká noi ve. Lá noi ke haitó suni napa makó lá oko alimó: Áisi lokago, mikasigú vejená mukitoka áni ginago, okulumakutí ló nene mikasiuka limimó. ¹⁴ Alévolé suni nenéminoko loló itive loko gele amekago, goí oko utó i hela netalímíni avogisaló loló ike mikasigú vejená kigika ale gopánapa oaká noi ve. Lá noi ke mikasiuka vejená lokimikago, hela netá napama amunaló emane sopolotunú apili hilikago goha oti netalímíni vogunahana nene lílí amó. ¹⁵ Vogunahana nene lílí iake, milikago noigo, alika utó i hela netá napa eza gele amimómave loko vogunahana alémo otekago, gakó loaká noi ve. Gakó lokago, vejená keza kalapusa hizi amemó. Amamoláa nene kipili helemó. ¹⁶ Itó aí gakotó nene vejená mukitó iti minamó limi minamó henóiki itó itó kugulizakí itó gelekélini nene kizani zamagaloka itó golihítoka anosa makó gizi asú inigave. ¹⁷ Lá ikiko hela netá napa nenémini anosa nene agulizá luhuvahe itó agulizalámíni nampavahe ali minisá amamoláa keza netá matá meina hizeaká itó salimoaká gapo hizi lí ikitanigave. ¹⁸ Nene anosámíni mognamú silipa iki gili vevesatave. Vejená makó keza gakó giliaká vejená níkima, hela netá napamámíni nampavalámíni mognáa ali utó miliki gilitaze. Nampávaá nene ve makolímíni agulizalímíni napaváá nene 666 nenéminoko neve.

14

Vejená 144 tausen gologí oketamá keí nama

¹ * Lá okago, neza nogómua ahulo moloko áni gumó nene sipsip iza akalevama Zelusale numutoka Zaion agokaló oteineigo áni gumó. Ezagi vejená 144 tausen ámina agokaló alegesá iki minamó nene golihítoka ezáa agulizá luhuva itó amelahini agulizá luhuva gizikago áni gumó. ² Lá niago okulumatokatí anó lupa gulumó nene nagamí lisani sipisímámini oko sasa loko itó gó pou pou loko limimó. Lá noigo, anó lupa gulumó nene gevená mukilite musiki ziaká netá napatunú nizego anó moloaká noitímínoko nego gulumó. ³ Lá noigo, gonanalivagi sialímíni amatoka nene netá alévoleláa losive losive itó monokú olotiva vetini

* 13:1: Ali 17:3,7-12 * 13:2: Tan 7:4-6 * 13:5: Tan 7:8,25, 11:36 * 13:7: Tan 7:21 * 13:8: Age 69:28; Ali 3:5, 17:8, 20:12, 21:27 * 13:10: Zel 15:2, 43:11 * 14:1: Izi 9:4; Ali 7:3

kovogisalo nama gosohá makó liki miniaká amó. Ámina nama nene veganalita gelesá avevezaha oko minamimó. Vegená 144 tausen nene numutó namató vegenatokatí meina hizeko gologí oketa vegená kéisigó gilitatúminoko neve. ⁴ Keza nene venaki mokoló netá lilí amake kígika gizopa lo minamoláa sipsip akaleva noitoka ámegetiki viaká niamoláa keza numutó namató vegená lugáalokatí Ómasímíni amatoka itó sipsip akalevámíni amatoka miniaká niamoláagó apí oko kelémo molamoláa niave. ⁵ Keza nene galanáníni nomí vegená nianazo, kegepaukatí soza gakó makó olío lemémimóma neve.

Ageló losive makoletini gakó

⁶ Ageló makó nene ká vozane veletó letoko novigo ánigumó nene, gakó lamaná alévoleáa minova minova oaká gakó nene mukí mikasiuka vegená kugupe haitopaitó itó konóini haitopaitó itó haitopaitó nagá lo utó oko lo kimitove loko mohona noigo ánigumó. ⁷ Áisi nene gakó napagutí sele loko láa loko limó: Vegená gona moloketati gamena mota alitokanazo, Ómasi golivala gilitiki aí agulizá ali otilo. Okulumaki itó mikasigí itó age nagamí itó hanuva nagamí goihá nagamiki kelémo utó i ve Ómasi nene agepoka liki minalo.

⁸ * Loko loake novigo, amegesaloka ageló makó oake láa loko sele limó: Papelonia apá napama mota tui loko vokave. Ámina apá amelage numutó namató vegená alévolé vain nagamí nalo nalo liki gala vizeaká netá aliki mokomú gala viziki miniaká átimo tui loko vokave.

⁹ Loko loake novigo, amegesaloka ageló makolímó oake gakó napa like láa loko limó: Makó keza hela netá napamahe itó vogunahanahe kalapusa hizi amitamó itó golihító aí anosa ali milatamó itó kígizakú aí agulizá luhuva gizatamó nenete ¹⁰ * vain nagamikítana oko Ómasímíni mukahá nemó hanuva nagamiki ale mukahá amoko gopa napa oketati lapevagutí kemekiko natave. Lá ikiko apazá ageló itó sipsip iza akaleva keí kovogisalo loki itó gihuká gehani ló lokiko, áminagú limiki níiki míluma napa giliki minanigave. ¹¹ * Itó míluma gililíki va vegená nenémináa níviko, lova lova oko minanogo ive. Itó nenémíni lokilaváa iteloko voko mino lúaló moloko minanogo ive. Nenemú hela netá napamahe itó vogunahanahe kalapusa hizi amiaká nia vegená niamó itó agulizalámíni anosa ali miniaká nia vegená nene mílumámo ma ahuloketoko vaminogo ive. Itó kavasú viziki itó geha ziki ma aminigave. Gamena gamena mílumámo ze lemeko miniko, gililíki viki minanigave. ¹² Loko limó nenazo, nenémo Ómasímó lo huká gakó itó Izesuni monó ali gilitiki amegesaló míliaká nia vegená Ómasímíni apazá vegenala keza nene alévolé iki minatakumó sele lo lemeká noive.

¹³ Lá okago, okulumatokatí gakó makó láa loko limigo gulumó: Imane gamenalotí veletoka Guivahaniloka gímiziki miniki hilita vegená keza mulúikú lamaná gilinigave loko luhuva gizozo. Loko lokago, Sikalahulímó láa loko limó: Lamaná. Keza iki míliki iaká amómámíni gihiláa kémegetoko vinogo inazo, hozanini míliiki míni gilinigave.

Mikasiuka hozámíni gihiláa aliti gakó

¹⁴ Goha ánigumó nene límusi mokoná galinali utó imó nene límusi amupiló ve makó minamó eza ametamenía vegenakitana oko, itó gotolaloka nene kugulizaki vetini akilí golitunú lilí amó nene hitoake minamó. Itó agizakuka nene nosáneta hukoaká amitá sánevetaláa makó ale minamó. ¹⁵ * Lá noigo, okulumakú monó zavusavegutí ageló makolímó lemeake límusi amupiló mina vema gakó napagutí láa loko lo amimó: Mikasigú hozámíni gihiláa mota utó o asú okaze. Itó hukoko ale molatani gamenaváa mota alitokaze. Nenemú geza amitakatunú hozagámíni gihiláa huko molozo. ¹⁶ Loko lokago, límusi amupiló mina vémo amitala ale zohota oko zeake mikasigú gihiláa hukoko ale gesá imó.

¹⁷ Lá noigo, ageló makolímó okulumakuka monó zavusavegutí olío lemeake ezagi ámina oko amitá sánevetaláa ale minamó. ¹⁸ Aleko noago, agivelaho makó nenémo okulumakuka zavusavémíni guguni gizoaká italó minatotí amó. Eza lolímíni gizapaváa nenémo agivelaho amitá sánevetaláa ale mina ve nene gakó napagutí láa loko lo amimó: Gihiláa guzá lo asú okamó nenazo, geza amitakatunú mikasigú vain nagalímíni gihila huko asú ozo. ¹⁹ Loko lokago, ageló agivelaho nene amitáma ale zohota oko zeake, mikasiuka vain gihiláa huko asú imó. Huko asú oake Ómasímíni mukahalímíni mí zeko liliká zeaká gehanímíni agikagú ahulokimikago limi asú amó. ²⁰ * Lá ikago, numuni apá heláaloka mí ziki míli lí ikago, áminagutí Ómasímó mukahá oketa vegenalítini golani nene nagamikítana oko lemeko minamó. Lemeko ohuni molago, 2 mitaló iteko velemó zimó. Itó ohuni molatímíni hánáa nene 320 kilomita mololoko voko minago ánigumó.

* 14:8: Isa 21:9; Zel 51:8; Ali 18:2

* 14:10: Isa 51:17; Izi 38:22; Ali 19:20

* 14:11: Isa 34:10

* 14:15: Zoe

15

Ageló 7 keza vejená mukí kivise asú iti netá 7 ali minamó

¹ Lá okago, okulumató haitó luhuva golivagi makó utó igo áñigumó nene ageló 7 keza vejená mukí kivise asú iti netá 7 ali minamó. Ámina netá nene miní ameko utó noiko, Ómasímini mukahá omo asú oko anogo ive loko lo molamó.

² Itó age nagamí makó áñigumó nene, kalasitunú líl a netá ló gulumavagi ali gopa napa iki líl amó gele minamó nego, áñigumó. Itó hela netá napama ezagi itó vogunahanavagi itó agulizalámíni nampava nene alévolé iki avilegemoláa keza kalasitunú age nagamí líl amómámíni agilikaloka Ómasímini musiki zeaká netá napa ali mína vejená nene áñigumó.

³ * Keza Ómasímini gelekélé veva Moseni itó sipsip akalevámíni nama láa líki lamó:

Kee, Ómasi Guivahani osá amosá velemaka,
oko moloko animó nene iteko neve.

Itó golivagi netá aleaká noane.

Numutó namató vejenalítíni Guivahani geza gapoka nene lamaná itó gihila lamaná neve.

⁴ * Geza hamolika apazá keké vízeko noane.

Nenemú numutó namató vejená geitoka iki kalapusi hizi giminigave.

Geza hehe loko aleko oko moloko ani netá nene utó o lamaná okamó nenazo,

Guivahani geza éaho golivaga gelegetamítive,

itó éaho gugulizaka ale napa amítive.

⁵ * Líki likago, neza nogómula ahulo moloko áñigumó nene okulumakú monó zavusavémíni gaheváa koló igo áñigumó. ⁶ Koló noigo, ageló 7 keza vejená mukí kivise asú iti netá 7 ali minamoláa zavusavegutí lememo. Keza ginégane mokoná ali luhiake apítoka nene golitunú líl a holotani ali zemó. ⁷ Itó alévolé oko minoaká netá losive losivemagutí makolímó ageló 7 nene lape 7 golitunú líl amó nene keme asú okago ali minamó. Ámina lape agikagú nene Ómasi mino lúaló moloko minoaká vémini mukahá vaí o minamó. ⁸ * Itó monó zavusave napa agikagú nene Ómasímini lapanalagutí itó zámuzalagutí lokíla vaí oake molo minamó. Itó ageló 7 keza vejená mukí kivise asú iti netá 7 velesá ali utó míli asú amago, zagusavegú itiaká gapováa nene míli lí ikago itemamó.

16

Lapegutí lekikago Ómasímini mukahá lími gakó

¹ Lá okago, monó zavusave agikagutí gakó napagutí ageló 7 láa loko lo nokimigo gulumó: Lekeza víki lape 7 nene alíki lekíkiko, Ómasímini mukahá nene mikasígú limitive.

² * Loko lokago ageló nampa 1 áisi nene voko lapeva ale lepekago, mikasígú limimó. Limíke, vejená keza hela netá napámíni anosa ali minamoláa itó aí vogunahana kalapusa hizi amiaká amolaloka gánatísi napa utó oake, kagavuki itó milumavagi utó imó.

³ Lá okago ageló nampa 2 áisi nene lapevagutí netá ale lekekago, age nagamikú holokago, age nagamí nene gonositíni golanigítana loló noigo, age nagamikú netá nene híli gesá amó.

⁴ * Híli gesá niago, ageló nampa 3 áisi voko lapevagutí netá leke ahulokago, mukí nagamí napagú itó mukí nagamí hinipíníki limimó. Lemekago golani nagamí loló o asú imó. ⁵ Loló o asú okago, ageló makó nagamító gizapa ahulomíkago noítímó láa loko Ómasi lo namigo gulumó: Apazá keké vízeko minanítika goí oko minanimó itó itína noanimó geza golesa netá lá oko líhimáinímíni meínava kemeaká ani netá nene ale gopa okogi nomimó mota utó okave. ⁶ Geí apazá vejená itó gegepagutí gakó líaká a vetíní golani lekemómámíni lelegi oko golani kemekako ninamó nene hee lokave. Golesa netá alinamómámíni meínaváa hee loko kemekane. ⁷ Loko noligo, guguni gizoaká italotí agelolímíni agepagutí gakó láa loko ligo gulumó: Guivahani Ómasi osá amosá ve geza lamaná oko ale hee lokogó líhima apasoaká noane.

⁸ Loko lokago ageló nampa 4 áisi lapevagutí netá aleko leke ahulokago, hogú vo holative loko gele amekago ho nenémo vejená lovo vímegevo imó. ⁹ Lá okago, vejená keza hómíni mumusikasilámó lovo vímegevo igo, Ómasímini gakotó vejená mukí kivise asú iti netá nenéminoko ale utó i vémini agulizala alívi letívi iki lamóza, kígíkáini ali víligamamó. Itó Ómasímini lapaná ali otemamó.

¹⁰ * Itó ageló nampa 5 áisi lapevagutí netá nene hela netá napámíni gonanalívagi siató lepekago limimó. Lemekago, eza gizapa oko mína mikasiuka nene límugusi lapa-lapa zeko

* 15:3: Gá 15:1 * 15:4: Zel 10:7; Age 86:9 * 15:5: Gá 38:21 * 15:8: 1 Kug 8:10-11; Isa 6:4 * 16:2: Gá 9:10 * 16:4: Gá 7:17-21; Age 78:44 * 16:10: Gá 10:21-22

minamó. Nego, vejená keza miluma sipisi giliki genezáini akohiki gikitiake minamó. ¹¹ Itó milumaváinimú itó kagavúinimú okulumakú Ómasi alivi letivi amóza, kigikáini ali viligiki iki miliki a netá golesa ahulamamó.

¹² * Lá okago ageló nampa 6 áisi nene lapevagutí netá nene leke ahulokago, nagamí napa agulizá Zupaletisi loko nekú lemekago, hó noititokatí kugulizaki ve napa anítita gapováa koló itive loko ámina nagamí nene uto asú imó. ¹³ Lá okago, neza ániagonougo, gosihá sipisimámini agepagutí, itó hela netá napamámini agepagutí, itó soza saza monó lole ale vemámini agepagutí holosi golesa losive makole gizalá gili va netá itemó. ¹⁴ Keza nene Satani gelekelé izegipalatini holosi nenete alévolé suni alitave loko nenémini zámuza ali minake numutó namató kugulizaki ve napa gala vizikago, Ómasi osá amosá vémini gamena napaló ali nupa iki lova hizinigave.

¹⁵ * Gilinahe. Neza gumaló ve nenéminoko galinali anitino uve. Nenemú vejená makó kugupe zapakó minatitó okugo kovoza helekatinazo, kigikáa gosohaki miniki kigikámini gineganeváa gizapa iki minatamó keza kogoliza vizinigave loko Guivahanimó nolive.

¹⁶ * Itó holosi keza lova hizitune liki mikasi makó agulizaláa Hipulu gajokutí Alamage-tonive liki latoka kugulizaki ve napa nene kilími nupa i asú amó.

¹⁷ Itó ageló nampa 7 áisi lapevagutí netá nene vogalaló ká melane leke ahulokago limimó. Nolimigo, monó zavusavegú gonanalivagi siatotí gamena imane mota asú okave loko gakó napagutí anó lupa lemekago gulumó. ¹⁸ * Lá okago, gó melevezá itó gó galaké itó anó sipisi nenémo moloake nominago, imimá sipisi noigo áni gumó nene vejená ganatilisi mikasiuka utó atotí imimá napa makó nenéminoko utó igo áni gumahatímini utó imó. ¹⁹ * Lá noigo, Papelonia apá nene zevo hutilí ovo noigo hóu lo losive makole imó. Itó numutó namató vejenalitini apá napa nene tui loko vimó. Itó Papelonia apá napámini amelagíni keikumú Ómasi eza gele minake vain nagamikitana oko mukahá okimiti lapegutí kemeko minamó. ²⁰ * Lá okago mikasi pokola nemó itó agoka nemó mukí vo tolova o asú imó. ²¹ * Itó okulumatotí golini óvisopa gihila napa napa gehani monuni nenémini okómo lemeko vejená zevo ategevo imó. Noigo, óvisopa gihila nenémo vauva aleko zevo ategevo oko kipilikumú Ómasi alivi galativi amó.

17

Mokoló venakitana apá napámini gakó

¹ * Lá okago, ageló 7 keza lape 7-a ali minamó keitokatí makolímó nenitoka oake, láa loko lo nimimó: Mokoló venakitana apá napama nagamí amupiló nemómámini lihima alinogo ize. Okako, gelepizugo, áni gatane. ² * Numutó namató kugulizaki ve napa ezagi mokoló mihina iaká amó. Itó numutó namató vejená nenete keza ámina venatokatí nene vain nagamikitana oko mokova mikilí iake, matúini gopa oaká noimó. ³ Nene áni gatane loko lo nemekago, nigika ale viligokago, mikasi gomopalaló nelémoko vimó. Neneloka vená makó áni gumó nene hela netá napa golohá makolímíni amupiló minamó. Ámina hela netalímíni agupeló agulizá mukí minamó nene Ómasi aleko letoko loaká gakó haitopaitolímíni gizikago minamó. Itó ámina netalímíni gotoláa 7-a itó sipiváa 10-a minamó. ⁴ * Itó vená eza gineganeváa nene okohu gó golohá lovimó ale akolo minamó. Itó gonanaliváa nene goli gehanigi meinava iteko mina netá ale guni oko akalámó. Itó agizakú lape makó golutinu lilí amó ale minamó nene, mokovámini golutuváa ulínaka itó netá golesa vaí oko minamó. ⁵ Itó golihilaló asuguná agulizá Papelonia apá napa numutó namató mokómini itó golutuva netalímíni izolahináa nénisi nene nouve liki luhuva gizikago minamó. ⁶ Itó vená eza Ómasímini apazá vejenala itó Izesutoka gímiziki minamómave liki kipili hele vejenalitini golani nake nake, matuna gopa okago nego, áni gumó.

Áni gokuke, ininá golesa nouke nagata gululusi gulumó. ⁷ Lá nougo, agelolímó láa loko loká onetamó: Nanamú ininá noane. Neza ámina venalímíni mogona itó hela netá napámo agohí geneimó nenémini mogona, itó hela netá napámini gotola 7-a itó sipivála 10-a nenémini mogona itínasa lo utó oko lo gimitoze, gelezo. ⁸ * Geza hela netá áni ganimó nene gozapá agómulagi minamó itína nene noamive. Alike nene aseva nomi galegutí atiginá oko itekoko voko minoko voko golesa o lamaná inogo ive. Itó eza gozapá minamó itó itína nene

* 16:12: Isa 11:15 * 16:15: Mat 24:43; Luk 12:39; Ali 3:3 * 16:16: Zak 12:11 * 16:18: Ali 8:5; 11:13

* 16:19: Isa 51:17 * 16:20: Ali 6:14 * 16:21: Gá 9:23; Ali 11:19 * 17:1: Zel 51:13 * 17:2: Isa 23:17; Zel

51:7 * 17:4: Zel 51:7 * 17:8: Tan 7:7; Ali 11:7; Age 69:28; Ali 13:8

noaminazo, atiginá oko okiko mikasiuka vevená keza ániigiiki sigaga litanigave. Mikasi utó amitokatí emane alévolé kemetameki nia vevenalitini kugulizáni giza pukugú kugulizá gizi milama vevenalite nenémini inigave.

⁹ Itó itína kígika koló omina vevenalitegó ámina anozámini mogona giliakató neve. Gotola 7 keza ámina venámámo ase hizeko nomina agoka 7 nenetini avevezaha neve. ¹⁰ Itó agoka 7 nene kugulizaki ve napa 7-atini avevezaha niave. Keikutí kugulizaki ve 5 keza haha ikamóza, makó nene itína hanuva noive. Makó nene minoko utó okoko gamena ahaváisi minative loko lotonoimóma neve. ¹¹ Hela netá napa gozapá minamó itó itína gamena nene noamimó áisi nene kugulizaki ve napa 7 keitoka mini amekiko, nampáini nene 8 inogo ive. Lá okiko, eza minoko lapuluva oakakú nene vo holanogo ive.

¹² * Itó sipiva 10-a ániganimó nene kugulizaki ve napa 10 keí avevezaha niave. Keza gizapa oaká zámua vevesá alinamamóma neve. Kugulizaki ve minata zámua nene apí iki hela netámagi gamena alinipáisi alinigave. ¹³ Keza geleakáini hamó minokiko, hela netá napamámini gelekeleláa itiki gizapa oaká zámuzáini nene aí agizakú milanigave. ¹⁴ Lá niiki Ómasímini sipsip akaleva nene lava ali amiki minanigave. Lá niko sipsip iza akaleva áisi nene guivahanitini ve uvóipo itó kugulizaki vetini ve uvóipo noinazo, eza nene amuza moloko kehelú inogo ive. Lá noiko, áisi nene kelémo etó okoko alesa molo kemekiko, aitoka alévolé iki gímize vevená nene ezagi apiziki minanigave.

¹⁵ Loko loake, láa loko mini ameko lo nimimó: Nagamí napa nene mokoló vená eza agilikaloka noigo ániganimó nenémo numutó namató vevená kugupe haitopaitó itó mulusi haitopaitó itó haitopaitó konoki vevenalitini avevezaha noive. ¹⁶ Itó sipivala 10 ániganimó nene kugulizaki ve napa 10-agi itó hela netá napamagi nene mokoló venáma mukahá apiliiki ahelú ikiko, agupe zapakó minoko helekiko, mémela níkiko, lumáa nene lolímo lanogo ive. ¹⁷ Lá itimó nene, hanuva ma aminogo ive. Ómasímo kígikagú ale vávani okiko, eza agata gilimoláa nene gili aliiki kígika hamó nominiko, gizapa oaká zámuzáini nene hela netámámini agizakú mili asú iiki aí gelekelela minanigave. Lá niko, Ómasímini gako nene alévolé inogo ive.

¹⁸ Itó vená makó ániganimó nene numuni apá napámini avevezaha noive. Ámina apá nenémo nene numutó namató kugulizaki vetini apá gotola loló okiko gelekele itiki minatave loko nenémini zámua aleneive, loko limó.

18

Papelonía apá tui loko vi gakó

¹ Lá okago ageló makó okulumakutí limigo ánigumó. Eza helisalámo alévolé oko minamó, itó lapanalámo mikasiuka hize sata igo ánigumó. ² * Eza gakó napa like láa loko limó: Papelonía apá napama tui loko vokave. Vokago holosi haitopaitolímimi numuni apá loló oko nominave. Mota gaha nama golesatini numuni apá loló oko nominave. ³ * Mukí numutó namató vevenalite alévolé vain nagamikítana oko mokova mikilí iaká amóma neve. Numutó namató kugulizaki ve napa keza ámina mokoló venaki ámina netá aliiki miniaká amóma neve. Numutó namató pisinisi hoza aliaká vete ámina hozámini moni aliake henóiki vevená lilí amóma neve.

⁴ * Loko lokago, okulumakutí gakó napa makó láa loko limigo gulumó: Vevenáne zuha lekeza ámina numuni apá nene ahuliiki golísi amave. Neneló miniki ámina apalímimi lihima netala alími vatí ikiko vevená mukí kivise asú ití netala lekelitoka zeloko vokatize. ⁵ * Ámina apalímimi lihima netala nene amupiló amupiló oko iteko okulumá ze gilitimó noive. Itó imane Ómasímo lihimavalámú agatí molamive. ⁶ * Nenemú netá golesa lilí ilikitató apasiiki nenéa aviligiki amupiló amupiló iki apasikitalo. Nenémini helegáa ekesá netá lekeza natave loko ali vavá ilikitamó nene aliki itiki amupiló amupiló iki kimilo. ⁷ * Kugupéini aliki itiki minake lagámini amupiló minake, meleketaakeni ali miniaká amóma neve. Nenémini helegáa miluma itó mulúini gitihiná oaká netá nene ali utó i kimilo. Ámina apá nenémo agikatunú nene neza imane nugulizaki vená napa nouve. Neza getó minamuve. Miluma gelemoko lagámini amupiló minoloko voko minanogo uve. ⁸ Loko loaká imó nenazo, gamena hamó zupahé ámina apatoka vevená mukí kivise asú ití netá mukí utó o amitize. Guivahani Ómasi eza amuzalagímo lihimavaláa napasotató nene heleaká netá itó mulúini gitihiná oaká netá itó gaúna heleaká netá utó okiko, ámina apató lolímo lo asú inogo ive, loko limó.

* 17:12: Tan 7:24 * 18:2: Ali 14:8; Isa 13:21; Zel 50:39 * 18:3: Ali 14:8 * 18:4: Isa 48:20; Zel 50:8, 51:6,45
* 18:5: Api 18:20-21; Zel 51:9 * 18:6: Age 137:8; Zel 50:29 * 18:7: Isa 47:7-9

9* Itó numutó namató kugulizake ve napa ámina venaki mokoló mihina iake ámina apató ló gehani giziki nake meleketakeni ake miniaká amó keza ló lokilaváa itekiko, ániigiiki ive nama iki miluma gilinigave. 10 Lá niiko, genavagi netá geleko haha imómámini mogona ániigiiki kehelele vizekiko, hotó miniki agae, agae, Papelonia apá napama lihimakámini meinaváa galinali anitegimikave liki linigave.

11* Itó numutó namató pisinisi hoza aliaká ve keza lelí henonite nene eáho itína meina hizitimó neve liki ámina iki miluma gili amitaze. 12* Keí henokanoni nene lá iki salimiaká amó: Goli gehani itó silivá gehani itó meinava iteko mina gehani haitopaitolímíni, itó meinava iteko mina lulú, itó kugupeló netá gonanalivagi mukí mokoná itó okohugó itó golohá itó za lamaná haitopaitolímíni itó elepani iza sipivatunú ali lolohalo a netá itó zasiha lónohanitunú, itó kapatunú itó aenitunú itó gala gehanitunú ali guni iki lilí ina netá, 13 itó silogoheni anuva haitopaitolímíni itó anuvavagi paulá guguni gizoakakumú itó lokila anuvavagi iteaká i netá itó anuvavagi netupa lamaná itó vain nagamí itó gilisima itó polisima laisima itó sipsip iza itó pulumaká iza itó hosi iza itó hosi izate gelelehá oaká kali netá lamaná mukí itó megusa izegipa itó veenalitini kemeni salimiaká amóma neve. 14 Itó pisinisi hoza aliaká ve keza láa liki litave: Mínumunikama ániigo gelekelé oko minoaká animó nene haha o asú okave. Itó golivaka hizi netá mota golohá okave. Itó gonanaligama voko haha okamó nenazo, nana oko goha alitanimó neve liki litave.

15* Itó ámina apatoka netá nenémínaa salimiki moni henokanoni ali nupa iaká a vejená keza genavagi netá geleko haha imó nene ániigiiki hotó otí miniki ive nama ikitiki miluma gilikitiki 16 agae, agae. Numuni apá napamave. Gineganega luhuvagi mokoná okohu golohá ale luhoaká amimómave. Itó gonanalivagi netá haitopaitolímíni meinava iteko minamó nenémíni amupiló minoaká animómave. 17* Lá animóza, imane henokanokama galinali lapuluva noinae liki linigave.

Itó nagamikú sipi amelage itó áminagú veno vejená itó sipigú hozaváa aliaká ve itó age nagamikú pisinisi hoza aliaká a ve keza ámina iki ló lokilaváa itekiko ániigiiki hotó miniki 18* miluma gilikitiki ive iki numuni apá napama nenémínaa makó hitoka netive. 19* Liki liiki goihá lánéhá iki ive nama iki miniki láa liki litave: Agae, agae. Apá napamave. Age nagamikú sipi amelage ámina apalímíni netá matalalotí henokanóinigi lilí iaká a vejená keza galinali gámekokó pizekave liki linigave.

20* Ámina apá napámini lihimaivaláa lekelitoka minamó nene Ómasímo itína apa-sokamómave liki okulumakú niamó itó Ómasímíni apazá vejenala itó aposolo itó Ómasímíni agepagutí gakó liaká ve niamó lekeza lokogoliza viziki mulutikú lamaná gililo.

21* Loko agelolímó li gakó nenémínoko utó okago, ageló alévoleláa makolímó gehani napa makó geheko oake age nagamikú hize ahulokago límimó. Nolímigo, láa loko límó: Papelonia apá napa ámina oko amuza moloko ahelú o ahulokiko, voko haha o lamaná inogo ive. 22* Itó musiki ziki voká ziki kita ziki hololopani huhu liki pikulí ziki miniaká a veenalitini konó lupa nene ámina apatoka goha makó utó aminogo ive. Itó kigizanitunú luhuva miliki netá ali utó miliaká amoláa nene ámina apatoka goha minaminigave. Itó hoza gaza nenémíni hoko-hoko haka-hakáa nene utó aminogo ive. 23* Itó mota gámekokó pizinogo ive. Livilímíni lapanaláa nene keitoka makó utó aminogo ive. Itó izoha alimi nimiliko ve vená keza gakó litamó nenémíni konó lupa ámina oko ámina apakú makó utó aminogo ive. Nene ámina apakú pisinisi hoza aliaká véa numutó namató ve napa lilí iki miniaká amóma neve. Itó keí gipe lakegusanímó numutó namató vejená kigikáini ale gopa imó. 24* Itó Ómasímíni agepagutí gakó liaká a ve itó Izesuni apazá vejená itó numutó namató monó alinakumule liki kipili hele veenalitini golanímíni meinaváa nene ámina apá napaloka minanazo, nenemú nene nenémíni otanogo ive, loko agelolímó límó neve.

19

1 Lá okago neza okulumakutí vejená mulusi sipisi keí konó lupa napa gulumó. Keza láa liki lámó: Haleluia. Ómasi agepoka lilo. Lugutó vizeaká itó gonanalivagi lapaná itó zámuzala helisalagi minamó nene Ómasímíni mututoni neve. 2* Áisi nene lihimatémíni meinaváa kemeaká hoza alekago gihiláa lelegí oko utó okave. Mokoló vená napa eza numutó namató ve mokoló mogona apí o kimike kelémo lapuluva oaká i venámámini lihima nekisáa apasamó. Lá noiike gelekelé vejenala zuha kipili helemómámini golanímíni lihima

* 18:9: Izi 26:16-17 * 18:11: Izi 27:31,36 * 18:12: Izi 27:12,13,22 * 18:15: Izi 27:31,36 * 18:17: Izi 27:26-30 * 18:18: Izi 27:32 * 18:19: Izi 27:30-34 * 18:20: Gapo 32:43; Zel 51:48 * 18:21: Zel 51:63-64; Izi 26:21 * 18:22: Isa 24:8; Izi 26:13 * 18:23: Zel 7:34, 25:10 * 18:24: Zel 51:49 * 19:2: Gapo 32:43

aitoka minamó nene apasokave liki lamó. ^{3*} Liki liake Ómasi agepoka lilo liki goha liki goha liki apá napamalo ló lokilaváa iteva iteva oko mino lúaló moloko minanogo ive liki lamó. ⁴ Itó monokú olotiva ve 24 itó alévolé oko minoaká netá 4-a keza kalapusa hiziki Ómasi gonanalivagi siató noi ve agepoka lake lamanale, Ómasi agepoka lilo liki lamó.

Ómasímini sipsip akaleva nene vená alemo ami gakó

^{5*} Lá okago, gonanalivagi siá minatokatí anó lupa makó láa loko utó imó: Ómasímini gelekelé vejenala zuha lekeza nene agepoka lilo. Limi minamó iti minamó golivala giliki miniaká niamó neneta, agepoka lilo. ^{6*} Liki likago, neza vejená mulusi nenetini konó lupa goha gulumó nene nagamí lisani napamáminoko sasa loko itó gó pou pou loko nominago, gakó napa láa loko utó imó: Guivahani Ómasile osá amosá ve eza agulizaki vete loló oko gizapa olimiaká hozava utó o lamaná noize, Ómasi agepoka lilo. ⁷ Ómasímini sipsip akaleva nene vená alemo amiti gamena alitokave, itó vejenala zuha keza aí vená lílí inígi ali vatí ikamó nenazo, nenemú leza logoliza vízeko mulutegú lamaná geleko agulizá ale otítune. ⁸ Keza mokoná ginégane vové avé loko minamó ali akalatave loko gele kemeneimóma neve. Liki lamó nene Ómasímini apazá vejenala keza vevesiki iki miliki iaká amó nenémo góini loló onoikumú linamó neve.

^{9*} Gakó láa loko utó okago, agelolímó gakó makó láa loko lo nimimó: Geza lá oko luhuva gizozo: Ómasímini sipsip iza akaleva nene vená alemo amiti gamenaló nosá lagámíni natave loko alesá molo líkími vejenala zuhalita mulutikú lamaná gililo. Loko loake, láa loko limó: Gakó lo nogumumó nene Ómasímini gakó gihiláa lamaná nene lo nogumuve. ¹⁰ Loko lo nemekago, nalapusa hizekoko gupá ze amitove loko nougo, óe, lá amo loake, láa loko limó: Néminamo. Neza gelekelé ve gígívekahina gígíve gagave Izesú lo utó i gakola ali gikitiki ali miniaká nia vejenalitini kígvéipina nouve. Ómasigó gupá ze amezo. Izesú lo utó i gakó nenémo Ómasímini agepagutí liaká a ve kelémo vávani igo alika utó iti netakumú liaká amóma neve, loko limó.

Gizopa hosi iza amegesaló mina vémini gakó

^{11*} Lá okago, neza nogómula ahulo moloko ánígumó nene okulumá koló okago, hosi iza gizopa makó nego ánígumó. Ámina hosi izámíni amupiló mina vémini agulizala nene litokó minoaká itó gakó gihiláa loaká ve eza lihímámíni meinava kemeaká hoza itó lovavagi hozava ale gopa amoko ale hee lokogó aleaká noive. ^{12*} Agómula gihiláa nene ló guluma oko minamó. Itó gotolaloka nene kugulizaki ve napatíni akilí mukí hitoake minamó. Itó agulizá luhuváa minamó nene ezágó gatoko geleaká noive. ¹³ Ginégane hána nene golani hilimikago minamó itó agulizá nene Ómasímini agepagú gakotó mina veve liki milamó. ¹⁴ Eza novigo, okulumakutí gimisigi ve mulusi napa mukí ginéganéini mokoná vové aveláa luhi minake, hosi iza mokonalitini kemegeosaló itiki miniake ámegetiki vamó. ^{15*} Agepagutí nene sopolo hána sánevetaláa makó ite minamó. Nenetunú nene numutó namató vejená kepeleko kiviligitive, itó aeni hánusa makó ale minoko gizapa oketanogo ive, itó Ómasi osá amosá vémini mukahá golesa ale utó moloko lihímámíni apasoaká hoza alinogo ive. ¹⁶ Ginéganeló itó humailaló agulizá luhuva nene kugulizaki vetini agulizaki ve itó guivahanitini guivahanive loko gizokago minamó.

^{17*} Lá okago, neza nogómula ahulo moloko ageló makó homámíni lapanató oteneigo ánígumó. Mukí nama nene vogalaló vigá ígá ígá niago, mukitoka gakó napagutí sele lo kimike limó: Ómasímó ló gehani napa nogizaze, iki alegesá ilo. ¹⁸ Lá níiki kugulizaki ve napatíni kugupe mémeláini itó ami gizapa vetini kugupe mémeláini itó ve alévoleláa keí kugupe mémela itó hosi izatini itó lova véinitini kugupe mémela itó ve mukilitini gelekelé izegípáini itó nagakú minamake hanuva minamoláa iti minamó limi mina vejenalitini kugupe mémeláini nataze loko limó.

¹⁹ Lá okago, neza hela netá napama itó numutó namató vetini kugulizaki véini itó izegipa kugunamotamóini iki alegesá iake niago ánígumó. Keza nene hosi iza gizopámíni amegesaló mina vegi izegípala agunamotamolagi lova ale kimitune liki anitemó. ^{20*} Itó hela netá napamagi itó gakó lóle ale ve sozámíni eza nene akohú netámámíni avogisaló alévolé suni haitopaitolímíni ali vegi nene kígzató alemó. Ámina gakó lóle ale ve sozámíni nenémo amunaló emane hela netalímíni agulizá luhuva ali minamoláa itó vogunahanaló kalapusa hiziki agepoka liaká amoláa nene ámina alévolé suni alike kígika ale gopa oketamóma neve.

* 19:3: Isa 34:10 * 19:5: Age 115:13 * 19:6: Izi 1:24 * 19:9: Mat 22:2-3 * 19:11: Age 96:13; Isa 11:4
* 19:12: Tan 10:6 * 19:15: Age 2:9; Isa 63:3; Ali 14:20 * 19:17: Izi 39:17-20 * 19:20: Ali 13:1-18

Ezagi hela netá napagi kogómulagi niasigo kelémoake lolagi nagamilagú gihuká gehani ló loko noikú ahulokimikago lemesimó. ²¹ Limikasio, kugunamotamoláa nene hosi iza gizopámini amegesaló mina vémini agepagutí sopoló hána sánevetaláa nenémo kepele gesá imó. Lá okago, mukí nama nenete aniteke kugupe mémelámia niki niki kagatupa imó.

20

Kilisimasi 1000 nenémini gakola

¹ Lá okago, okulumakutí ageló makó limigo ánígumó nene aseva nomi galémini kií itó seni nagá napa makó nene agizakú aleneigo ánígumó. ² * Áisi nene gosihá sipisi gozapá ká emane amunaukatí mina ve Satani nene agísa agizató aleake kilisimasi 1 tausen nene nagá numukú minative loko lotamó. ³ Lomiake, galegú hize ahulokago limimó. Lemekago, gaheváa nene alévolé oko geake humatunú moloko alémo kii limó nene, numutó namató vegená gigika goha ale gopa oketamoko hanuva minoloko voko kilisimasi 1 tausen ale ahulokiko, gologí omikiko nene, itekoko gamena alinipáisi minative loko lotamó.

⁴ * Itó neza gonanalivagi siá mukí nemo ánígumó nene netá golesamú livi hukivi hoza alitave loko loketa vegená nene áminaló minimi nivago ánígumó. Itó Izesuni agulizala li utó miliki Ómasímini gakola kelegesá legemigo ali gikitinago, luváini hukimi va vegenalitini kemeni ánígumó. Keza hela netá napama itó vogunahanaló kalapusa hiziki agepoka lisá amamoláa itó aí anosa nene golihúitó ali milamamoláa ité ali kigizakú milamamoláa ánígumó. Keza luváini huginakutí goha otiki miniki Kilistogegi kugulizaki vete aliaká hoza aliki miniko, kilisimasi 1 tausen vinogo ive. ⁵ Hililiki va vegená lugáa keza otemake kilisimasi 1 tausen nene asú itive liki ageva iki ha minamó. Helenosakutí oteaká ánígumó nene oteaká nampa 1 neve. ⁶ Ámina hilinakutí oteaká netató miní amiaká nia vegená keza Ómasímini apazá vegená niakumú mulúikú lamaná giliaká niave. Vegená nenémináa keza heleaká nampa 2 nenémo kugupelotí poposá vizinogo ive. Keza Ómasímini itó Kilistoni guguni giziaká vegenala lilí iki minanigave. Lá niiki Izesuki kugulizaki ve hoza aliliki niviko kilisimasi 1 tausen oko vinogo ive.

Satá monéna lapuluva iti gakó

⁷ Itó kilisimasi 1 tausen asú noiko, Satani nene nagá numukutí gologí imikiko, goha itinogo ive. ⁸ * Iteoko numutó namató mikasi nekisa vokisauka Gogo mikasiukatí itó Magogo mikasiukatí vegená gigika ale gopa okimioko kelémo negi hizeoko vegená gala viziko, lova ali utó inigi alegesá inigave. Keza nampáini nene getani nenéminiki gatoko gato asú amoakalímini nitave. ⁹ Vegená nenémináate mikasiuka hutilí iki Ómasímini apazá vegenala nitatoka itó Ómasímo amu heleaká noi apá Zelusalega viki gohoni milanigi ali viginigave. Lá niko, Ómasímo okulumakutí ló amiselekiko livi lúniivi inigave. ¹⁰ Lá ikiko, Satá nene amunaló vegená kogoka vizi ve nene hela lolímini ohunagú gihuká gehani ló loko minakú ahelú i ahulikiko limitimó nene hela netá napamagi itó soza gakó lole ale vegí áminagú emane amunaló limiki minasitotí ageva iki minasikú liminogo ive. Keza nene gasovagi netá gihikimikiko, gamena gamena únaká neteká miluma giliki mini lúaló miliki minanigave.

Gonanalivagi siá mokonalímini avogisaló goní ita gakó

¹¹ * Itó gonanalivagi siá sipisi mokoná makó ánígumó. Itó amupiló mina vémini avogisa ánígumó nene okulumaki mikasigi keza aí avogisalotí golisi ikasike goha utó amasimó. ¹² Lá niasigo, hele vegená iti minamó limi minamoláa gonanalivagi siató Ómasímini avogisaló otinago ánígumó. Lá niago siató mina vémo puku mukí ale ataloko minamó. Makó ale atalago ánígumó nene alévolé kemetameki nia vegenalitini kugulizá gizo mola puku minamó. Itó hiliki vamoláa keza goí iki hanuva minake iki miliki amómámini mogonamú ámina pukugú gizi milinató nene goní oketamó. ¹³ Itó ámina gamenaló age nagamikú hiliki va vegenaki kelémo atiginá imó. Itó heleakalímini itó galegú lemeakalímini agikagú hiliki va vegenaki kelémo atiginá imó. Itó hiliki vamoláa mukitoka keza iki miliki iaká a mogona lotuva lekeko nenémini helegáa apasoko kimimó. ¹⁴ Lá okago hele vegenaki galegú minamolagi nene lolagi nagamí ohukú kehelú o ahulokago lemémó. Nenémo heleaká nampa 2 loló onoive. ¹⁵ Itó vegená makó nene alévolé kemetameki nia vegenalitini kugulizá luhuva gizo mola pukugú minami vegená nene lolagi nagamí ohukú kehelú o ahulokago limiki minamó.

* 20:2: Apí 3:1 * 20:4: Tan 7:9,22 * 20:8: Izi 38:2,9,15 * 20:11: Tan 7:9-10

21

Okulumá gosohá itó mikasi gosohá utó itive

¹ * Itó okulumá lithahagi itó mikasi lithahagi keza viki haha ikasigo itó age nagamí ámina oko voko haha okago okulumá gosohaki mikasi gosohaki ánimú. ² * Itó apazá apá Zelusale numuni apá gosohá nene okulumakutí Ómasilokatí nolimigo ánimú nene ve makotó vená alimí aminigi gonanalisi imikago minamó nenéminoko nego ánimú. ³ * Itó gonanalivagi siatotí anó lupa sipía makó láa loko gulumó: Ánigalo. Ómasímini numuni apá nene veenalitini kovogisaló utó noive. Áisi nene holúikú minoko aleko noiko keza veenalala zuha lilí iki minanigave. Ezáa keitoka mino moloko nooko Ómasímini minanogo ive. ⁴ * Eza kogómula nogoza gilatoketanogo ive. Heleaká itó miluma geleaká itó ive nama oaká itó lagavú geaká nene asú okiko ma goha utó aminogo ive. Litaha netá nenéminá nene voko haha inogo ive, loko limó.

⁵ Itó gonanalivagi siató noi vemámo láa loko lo nimimó: Gililo. Neza netá mukí nene gosohá ale utó nomuluve. Loko loake, geza imane netakumú luhuva gizo molozo. Gakó gihila imane lokugo alévolé oakalímíni neve. ⁶ * Loko loake, láa loko lo nimimó: Ale lamaná o asú okuve. Neza goí moloko alika moloko netá apí oaká itó ale lutegeaká amelahina nouve. Makó keza nagamikumú kivisekikoma, nenitokatí alévolé kemetameki minoakalímíni nagamí nene hinipinikutí ihiki niliki viki minatave loko hanuva kiminogo uve. ⁷ * Makó keza monokú alévolé iliki viki Satani lovaváa aviligitamó nenete netá imane mili alinigave. Itó nénisi nene Ómasímini loló oko nougo, kéisi nene izegipáne lilí iki minanigave. ⁸ Lá onoimóza, gasovagi netakumú golisi gele vegená itó monó gilí ahuliaká nia vegená itó golutuva netá aliaká nia vegená itó kipili hiliaká nia vegená itó mokoló vegená itó gipe lakekusató vegená itó soza ómai netá gupá zi amiaká nia vegená itó soza gakotó vegená mukí nene ámina netá ali miniaká nia veenalitini numuni apá nene lolagi nagamí ohunagú gihuká gehani ló loko nekú minatave loko lonoimóma neve. Nenémo nene heleaká nampa 2 loló onoive, loko lo nimimó.

Zelusale apá gosohá utó iti gakó

⁹ Itó ageló 7 keza lapéinigú vegená mukí kivise asú iti netá 7 vaí okago ali minakutí makolímó nenitoka ake láa loko lo nimimó: Ano Ómasímini sipsip akalevamámíni alemo amiti vená gelepizitoze. ¹⁰ * Loko lokago, nigikáne ale noviligago agoka napa hána hána makotó nelémoko itike apazá apá Zelusalega nene Ómasilokatí okulumakutí nolimigo nelepizigo ánimú. ¹¹ Ómasímini gonanalivagi lapaná neneló noigo, ámina apalímíni avogisa nenémo gehani meinava iteko minamó agulizá zasipa gehani nenémini oko avogisámo hanato minamó. ¹² * Gehani geisa napa hána nene numuni apá ale vigeko mina geisámíni gatení 12-a minamó. Itó gateni hamopamotó nene ageló makó minamó. Itó gatetó nene Isilae vegená mulusi 12 keí kugulizá nene luhuva gizi milikago nego ánimú. ¹³ Ho noititoka gateni losive makole itó ezegaloka gateni ámina oko losive makole itó emegaloka gateni ámina oko losive makole itó ho nolimitoka ámina oko gateni losive makole neve. ¹⁴ Ámina geisámíni lukesaváa nene 12 minomo vonoive. Itó lukesaváa 12 nenémini amupiló Ómasímini sipsip akalevamámíni aposolo 12 keí kugulizá gizo molokago minomo vimó.

¹⁵ * Láa loko lo nimi ageló nenémo hánusaváa makó golitunú lilí ikago ale minamó nene numuni apá itó gatenaváa itó geisaváa molo geleaká hánusa minamó. ¹⁶ Ámina apá gohaláa tovoimoláa itó zohota vimoláa nene hamó lelegitokó nego, agelolímó hánusavatunú molo geleko ánimú nene 2400 kilomita nego ánimú. Itó tovoimoláa itó zohota vimoláa itó hána itimoláa nene hamó lelegitó neve. ¹⁷ Itó geisámíni hána imoláa molo gelekago 66 mita nenémini oko minamó. Vegenalita molo geleaká netá nene agelolímó ale minake molo giligo ánimú. ¹⁸ * Numuni apalímíni geisa nene mokoná gehani agulizá zasipa gehani nenetunukó gekago minamó. Itó ámina apá nene goli gehani vové avé loakalímíni kalasi nenéminoko hanato mina netatunú lilí ikago minamó. ¹⁹ Ámina numuni apalímíni lukesaváa nene meinava ite mina gehani haitopaitolímínitunú ali votamó. Lukesaváa nampa 1 nene mokoná gehani agulizá zasipa gehanitunú lilí amó. Itó lukesaváa nampa 2 nene gumugumusi gehani agulizá sapaia gehanitunú lilí amó. Lukesaváa nampa 3 nene agulizá agate gehanitunú lilí amó. Lukesaváa nampa 4 nene gihisigó gehani agulizá emalali gehanitunú lilí amó. ²⁰ Lukesava nampa 5 nene mokonaki golohaki gehani agulizá

* 21:1: 2 Pit 3:13; Isa 52:1; Ali 3:12 * 21:2: Isa 61:10 * 21:3: Izi 37:27 * 21:4: Isa 25:8, 35:10, 65:19 * 21:6: Isa 55:1 * 21:7: 2 Sam 7:14 * 21:10: Izi 40:2 * 21:12: Izi 48:30-35 * 21:15: Izi 40:3 * 21:18: Isa 54:11-12

satoníkisi gehanítunú lílí amó. Lukesaváa nampa 6 nene goločá gehani agulizá koniliani gehanítunú lílí amó. Lukesaváa nampa 7 nene gihuká gehani agulizá kilisalaíti gehanítunú lílí amó. Lukesava nampa 8 nene gihisigó gehani agulizá pelilo gehanítunú lílí amó. Lukesaváa nampa 9 nene gihuká gehani agulizá topasi gehanítunú lílí amó. Lukesaváa nampa 10 nene gihisigó gehani agulizá kilisopelesi gehanítunú lílí amó. Lukesaváa nampa 11 nene mikasi guhí gelevi gehani agulizá haiasini gehanítunú lílí amó. Lukesaváa nampa 12 nene goločá gehani agulizá ametisi gehanítunú lílí amó. ²¹ Itó gatenía 12 nene mokoná pesekú 12 meinaváa iteko minamolatanú lílí amó. Gateni hamopamó nene pesekú hamopamó sipisítunukó lílí amó. Itó numuni apalímíni gapováa nene goli gehani vové avetoakalímínitunú lílí ikago kalasi nenéminoko hanato minámó.

²² Guivahani Ómasi osá amosá ve áisi itó aí sipsip akaleva nenémo monó zavusave napa loló onoimó nenazo, ámina apatoka monó numuni nomigo ánígumó. ²³ * Itó ámina apatoka Ómasímíni gonanalívagi lapaná nenémo hize hanatatize, itó aí sipsip akaleva nenémo líví loló okoko minanogo inazo, neneló ikani ho lapanáini hize hanatati hozaváa nomive. ²⁴ * Numutó namató vejená keza ámina apalímíni lapanalagú mihina inigave. Itó numutó namató kugulizaki ve napa keza gonanalisi netáini nene áminalokagó alilíki vinigave. ²⁵ * Ámina apá nene límugusi zeko gó loko ma aminogo ive. Lá onoinaze, ámina taonímíni gateni nene holisakámáminoko koló oko minanogo ive. ²⁶ Numutó namató vejenalítini gonanalívagi netá meinava iteko mina netá nene ámina taonígú alilíki anitinigave. ²⁷ * Golotuva netá makó nene áminagú iteminogo ive. Itó kovoza netá makó alita vejená itó soza gakó li minata vejená keza ámina apakú vi hilaminigave. Ómasímíni sipsip akaleva nenémo alévolé kemetameki nia vejenalítini kugulizá nene pukugú gizo molokago mina vejenakó vi hilanigave.

22

¹ * Itó agelómámo minova minova oakalímíni nagamí napa makó nelepizigó ánígumó nene agómula golouto mina nagamí nene Ómasi itó sipsip akaleva keí gonanalívagi siatokatí lomoko novike, ² * ámina apalímíni gapo holukú lomoko vimó. Itó nagamí helega helega alévolé lemetameni ale utó oaká za noimó nenémini gihiláa haitopaitolímíni 12 nene ikani gola zupa zupa gihila zeko guzá loaká noive. Numutó namató vejená keza ámina agiláa nene níki zoki lamaná inigave. ³ Ámina apakú nene usilagi netá minaminogo ive. Ómasi eza itó aí sipsip akaleva keí gonanalívagi siá nenegú utó okiko, gelekelé izegipala keza gupá zi aminigave. ⁴ Itó aí agoka agepa ánígi minanigave. Itó agulizalímíni luhuváa nene golihtí minanogo ive. ⁵ * Itó Guivahani Ómasi ezáa nene lapaná kemekiko ali minatamó nenazo, ámina apató nene límugusi ma zeminogo ive. Itó lamu líví ahe itó hómíni lapanalahe nenémini hozaváa ma utó aminogo ive. Itó apá amelage keza kugulizaki ve lílí iki gizapa okimiaká hoza aliki mini lúaló mílíki minanigave.

Izesú atiginá iti gakó

⁶ Itó agelómámo láa loko lo nimimó: Gakó imane gakó gihila itó lokugo alévolé oakalímíni neve. Guivahani Ómasímo eza agepagutí gakó liaká ve ale kegepagú moloaká i ve áisi nene ageloa amiselelekego, gamena hána amiko utó itive loko lonoi netá nene gelekelé veva lekeza gilitave loko lo gemeko nogelepizigó ánígane. ⁷ Izesú nene gelenape. Neza litá oko núane vínogo uve. Itó makó keza imane pukugú alika utó iti gakó gizo molámó nene legesó iki gizapa iki ali minata vejenalite kogoliza vizinigave loko nolive.

⁸ Itó neza Zonina netá imane ánígoko gele asú umó. Gele asú okugo, netá imane nelepizi agelolímíni agisauka voko lipizekuke gupá ze aminogo nougo, ⁹ eza óe loake láa loko lo nimimó: Néminamo. Neza gelekelé ve gigivekahina nouve. Itó Ómasímíni agepagutí gakó liaká nia vetini kigivéipina nouve. Itó imane pukugú gakó legesó iki ali minata vejenalítini kigivéipina nouve. Geza Ómasígó gupá ze amezo. ¹⁰ Loko loake, láa loko lo nimimó: Gakó nene gihila ziti gamenaváa mota alitokaze, nenemú geza puku imanegú alika utó iti netalímíni gakó nene ali halá gemo. ¹¹ * Nenemú golesa netá aliaká nia vejená keza alikigó minataze. Itó kigikáini golotuva lovímó keza ámináminikigó minataze. Itó monokú hee líki mininatite nene hee líkigó minilíki víki minataze. Itó apazá niamoláa nene ámina iki apazá keké viziki minilíki víki minataze, loko lo nimimó.

* 21:23: Isa 60:19-20 * 21:24: Isa 60:3 * 21:25: Isa 60:11 * 21:27: Isa 52:1 * 22:1: Izi 47:1 * 22:2: Apí 2:9 * 22:5: Isa 60:19; Tan 7:18 * 22:11: Tan 12:10

¹² * Izesú láa loko limó: Gelenape. Neza litá oko vinogo uve. Vinake nene lihimatini meinava apasoko likimitove loko aleko vinogo uve. Vegená iki miliki amómámini meinaváa lelegí oko etó etó oko kiminogo uve. ¹³ * Neza goi moloko alika moloaká ve lolováa itó mogaána apí oaká itó ale asú oaká amelahina nouve. ¹⁴ * Gineganéini nagamí ziki ali vové avé liaká nia vejenakumú gulugo lagámini oaká noive. Keza nene lokimikugo alévolé lekemetameni ale utó oaká zámíni gihíla nataze, itó imane apalímíni gatekú itítaze. ¹⁵ Gipe lakekusató vegená itó mokoló vegená itó kipili híliaká nia vegená itó soza ómai netató gupá zi amiaká nia vegená itó sozaló vegená nené numuni apá númaseloka minanigave. ¹⁶ Neza Izesuna agelóne amiselekugo eza nene vegenáne zuha mulusi milató milató lekeza nene gakó imane lo utó moloko lo likimitize. Neza nene Tevitini agapilamola itó aí nagalagutí nouve, itó sonohí gazakomé lapanalagi ve nouve, loko limó.

¹⁷ * Ómasímíni Sikalahulímo itó aí sipsip akalevámíni venakitana mina vegenalite ano liki liaká niave. Itó makó keza gakó imane giliiki ámina iki ano liki linigave. Minova minova oakalímíni nagamikumú likivisekikoma, imanelokatí iki ihiki nataze. Natune likima iki imanelokatí nagamí nene meinava nomimó hanuva nataze, alo.

¹⁸ * Imane pukugú alika utó iti netalímíni gakó luhuva gizonoumó nene gatiki gilita vegená lekeza lakagata aleko ehe loko noluze, gílilo. Makó kezáini kagatatunú giliki imane gizo nomulu gakotó makó miní amiki milata vegená nene Ómasímo vegená mukí kivise asú iti netá imane pukugú gizo mulu netató miní ameketanogo ize, ehe. ¹⁹ Itó makó keza imane pukugú alika utó iti netalímíni gakokutí makó huki ahulata vegenatoka Ómasímo alévolé kemetameni ale utó oaká zámíni gihíláa itó apazá apala nene moseketanogo ive. Ámina netalímíni gakó nene imane pukugú gizo molokugo neve.

²⁰ Imane lo utó mola gakó hize lé oaká ve áisi nene Oo, mota núane vinogo uve loko nolive. Lamaná. Guivahani Izesú geza ano. ²¹ Guivahani Izesuni nasahílí nenémo lekelitoka mino moloko minino.